


Naul On Nga Mimerr  
Uripiv



The New Testament in the Uripiv language of Vanuatu

# **Naul On Nga Mimerr Uripiv**

## **The New Testament in the Uripiv language of Vanuatu**

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023

96303ce7-aa0a-513c-862d-415957a542e1

## Contents

Matiu . . . . .	1
Mak . . . . .	39
Luk . . . . .	63
Jon . . . . .	105
Majingen . . . . .	134
Rom . . . . .	171
1 Korin . . . . .	188
2 Korin . . . . .	206
Galesia . . . . .	216
Epesas . . . . .	222
Pilipae . . . . .	228
Kolosi . . . . .	232
1 Tesalonaeka . . . . .	237
2 Tesalonaeka . . . . .	241
1 TIMOTI . . . . .	243
2 Timoti . . . . .	249
Taetas . . . . .	253
Pilimon . . . . .	256
Ibrus . . . . .	258
Jemes . . . . .	272
1 Pita . . . . .	277
2 Pita . . . . .	282
1 Jon . . . . .	286
2 Jon . . . . .	291
3 Jon . . . . .	292
Jut . . . . .	293
Bori se Jon . . . . .	295

**Nosþen nga Mirres se  
Iesu Kristo nga  
MATIU  
Muli  
Batu nale nga mivsviseni  
lut nga parmeteni naul  
ngel puto suri**

Naul nga Matiu muli ngel osþe suri nosþen nga mïrres, nga Iesu evi jinibb nga Atua muloli rijrijen tevi jinibb sen nir tuwi pa vini, nga pivini þila mauren tevi jinibb sen nir. Ko suri Iesu ngok, ololi rijrijen nga Atua muloli renge Naul On Tuwi arremali. Iesu eak renge vanu se mïeri Isrel nir, ko elik ko emaur tevi nir ie. Ko nosþen ngok sete evi se nir kobbong, ko evi ma se jinibb jille ne iel ngatan.

Womujnen re naul ngel, Matiu osþe suri daron nga Iesu mïiak e, ko ejilwer suri etajer van re daron nga Jon mipaptaese Iesu, ko Demij mia-rrowrrowe ni. Ko vitunen, ejilwer suri daron nga Iesu mïtipatune majingen sen re vanu ne Galili, nga muwrai tweni nosþen nga mïrres sen tevi jinibb nir, ko okvisvisenir ko okloli jinibb arres re mesien ser. Ko vitunen, owrai tweni kele daron nga Iesu nïlinglingi Galili e ko mian Jerusalem e. Ko osþe suri nanu nga Iesu muloli vitue re majingen sen. Ko bongsin, osþe suri mijen se Iesu ko daron nga mimaur luwi kele e.

Matiu osþe kele nga Iesu evi jinibb nevisvisenien nga mïrres þelak nga orongwose puwrai tweni nale neseseien se Moses lat nga muto suri. Ko owrai suri kele batun vanu se Atua, nga Atua mivini mivi Numal se jinibb sen nir.

*Iesu metka sen nir*

<sup>1</sup> Ngel evi naul ne metka se Iesu Kristo metka se Devet, ko metka se Epram.

<sup>2</sup> Ko nise jinibb nir re metka nen: Epram womu jer. Ko Epram evesi Aesak, ko Aesak evesi Jekop, ko Jekop evesi Juta ko niaken sen nir. <sup>3</sup> Ko Juta evesi Peres ko Sera, nuru ko tasu se nuru ko Tamar; ko Peres evesi Esron, ko Esron evesi Ram. <sup>4</sup> Ko Ram evesi Aminatap, ko Aminatap evesi Nason, ko Nason evesi Salmon. <sup>5</sup> Ko Salmon evesi Boas nga tasu sen Reap, ko Boas evesi Opet nga tasu sen Rut, ko Opet evesi Jese. <sup>6</sup> Ko Jese evesi Numal Devet, ko Numal Devet elesi luwe kele nesevin se Uria, ko evesi Solomon. <sup>7</sup> Ko Solomon evesi Reopoam, ko Reopoam evesi Apia, ko Apia evesi Asa. <sup>8</sup> Ko Asa evesi Jeosapat, ko Jeosapat evesi Joram, ko Joram evesi Usia. <sup>9</sup> Ko Usia

evesi Jotam, ko Jotam evesi Eas, ko Eas evesi Esekia. <sup>10</sup> Ko Esekia evesi Manasa, ko Manasa evesi Amon, ko Amon evesi Josia. <sup>11</sup> Ko Josia evesi Jekonia ko niaken sen nir. Renge daron nen ko aron tertere nir arteka twenir van re Babilon e suri nuval.

<sup>12</sup> Arteka twenir jile osuw, ko Jekonia evesi Sealtiel, ko Sealtiel evesi Serupapel. <sup>13</sup> Ko Serupapel evesi Apiut, ko Apiut evesi Eliakim, ko Eliakim evesi Asor. <sup>14</sup> Ko Asor evesi Satok, ko Satok evesi Akim, ko Akim evesi Eliut. <sup>15</sup> Ko Eliut evesi Eliesar, ko Eliesar evesi Matan, ko Matan evesi Jekop. <sup>16</sup> Ko Jekop evesi Josep diwen se Merri, nga mivi tasu se Iesu nga marveruse Mesaeta.

<sup>17</sup> Mitipatun re metka renge Epram, musuwsuw re Numal Devet, evi metka esngavöl drromon ivij (14). Ko mïtipatun kele renge Devet, musuwsuw re daron nga marteka twenir van re Babilon, evi metka esngavöl drromon ivij kele. Ko mïtipatun kele renge daron nga marteka twenir van Babilon mijpari daron nga Kristo mïiak e, evi metka esngavöl drromon ivij kele.

*Iesu eak*

<sup>18</sup> Iesu Kristo errmali iel ngatan erpel. Arlingi ore Merri, Iesu tasu sen. Ko setewor evan ji diwen sen Josep, ko Merri etaole nga mïlesi nga ni mïtetaur. Suri Nemïn On ko esilvi ni. <sup>19</sup> Ko Josep, Merri diwen sen, evi jinibb nga mumomsawos mïrres, ko orrorrmi þilinglingi silveni nesen sen bbong; omusus puwrai tevi jinibb nir, tuloli Merri non tiwis. <sup>20</sup> Ko daron nga murrormi nanu ngel e nir, ko anglo san se Atua eplari jin renge bori san ko owrai owra "Josep, nik kuvi metka se Devet, sete kupmetutu kuptekai ko wor Merri pivi nesevin som. Suri bipi nga musloi ngok, Nemïn On ko elai tevi. <sup>21</sup> Mian ko vinok Merri pia-wosi natun norman san, ko kupa-lingi nisen piwajie Iesu. Suri ni pia-tekai tweni jinibb sen nir renge nololien ser."

<sup>22</sup> Nanu ngok eplari jile osorsan tevi nale san se Atua nga propet sen san owra wowomue tuwi pa: <sup>23</sup> "Nesen mïelakel osloi bipi mian ko pia-wosi natun norman san, ko para-lingi nisen piwajie Emanuel." Ko nais nen arieni erpel: "Atua eptevi kerr."

<sup>24</sup> Mian ko Josep emra re meturen sen; ko ololi suri erpe nga anglo se Numal muwrai tevi ni, ko etkai nesevin sen. <sup>25</sup> Ko sete evan jin ejpari daron nga muwosi natun norman mïiak. Ko daron nga mïiak jile musuw, ko elngi nisen ewajie Iesu.

**2**

*Jinibb sopor nga norongwosien ser  
milep arini arwera parlesi Iesu*

<sup>1</sup> Iesu eak renge Betliem ne Judia, ko renge daron nen, Erot evi batu numal. Ko sete epriv, ko jinibb sopor nga norongwosien ser milep arivel re vanu m̄inij san nga muto ngasu rengo Is, ko arini Jerusalem e. <sup>2</sup> Ko arsusi arwera “Nibeni bipi wel nga m̄iak nga pivi numal se m̄eri Isrel nir? Namlesi moju sen eplari, ko namini tweni nablotoe ni.”

<sup>3</sup> Daron nga numal Erot murnge nanu ngel e ko eririr elep, ko erpok kele re m̄eri Jerusalem kele nir aririr elep kele. <sup>4</sup> Ko Erot everus kortoni jinibb nga marlelep ne sulsulen nir ko jinibb nevisisenien ne nale neseseerien nir, ko osusi tevir owra “Nibeni lat nga Mesaea p̄iak ren?” <sup>5</sup> Ko nir arij weli ni, arwera “Mesaea p̄iak rengo Betliem re Judia. Suri nale san se Atua nga propet san muli wowomue tuwi ngel, owra <sup>6</sup> ‘Ko nik, Betliem re Judia, setete kuwelili rengo jinibb nga marlelep nir rengo Judia. Natum san nga pia-pelari jim pivi numal nga pia-metmete jinibb suk nir m̄eri Isrel.’”

<sup>7</sup> Mian ko vitunen vajin numal Erot everus silveni bbonge jinibb nen nir ne Is vini ji ni, ko osusi tevir owra “Moju nen eplari re daron sev?” <sup>8</sup> Arwera suri jile tevi, ko Erot ekrekrasir owrai tevir, “Erres, kapan kappej bipi wel nen p̄irres, ko poro kaplesi ni, ko kaploli inu borongwose; ko inu kele ban bolotoe ni.” Ko Erot okoni twenir arivel van Betliem e.

<sup>9-10</sup> Ko daron nga marivel kele vajin, ko arlesi kele moju nga; ko artaole, ko arir temijjal. Ko moju nga owowomu kele nir, ko nir arvijuri. Arvijuri moju nga mian ko oto jer mare momsawose naim nga Iesu m̄iak ren. <sup>11</sup> Ko daron nga maran loloim e, arlesi bipi wel nen nuru tasu sen Merri. Ko arjipa van ngatan ko arlotoe ni. Arlotoe jile ko arsaro van rengo nolo narr ser, ko arlai merrenien ser tevi ni, arla gol ko prangkinsens ko mir. <sup>12</sup> Mian ko vitunen vajin arlesi bori san nga Atua ewer orer sete parkali lweni ji Erot e. Ko arkali lweni re sel m̄inij e van rengo vanu ser e.

*Josep ko Merri orwosi natu nuru arwolu van Ijip e*

<sup>13</sup> Ko daron nga lartul nga norongwosien ser milep arivel e vajin, ko anglo san se Atua eplari ji Josep rengo bori san ko owrai tevi owra “Kuptur imare kupwosi bipi wolok ko tasu sen, kapwolu van Ijip mun e. Ko kaplik iok pijparsi daron nga bea-wera lweni nale tevin. Suri Erot owra p̄irevji pini, ko otomori pa pipej.” <sup>14</sup> Daron nga anglomuwrai jile tevi Josep nat nga mupong nen, ko Josep otur imare, owosi bipi wel nen, ko nir tasu sen arwolu van

Ijip mun e. <sup>15</sup> Ko arlik iok ejpari nga Erot mimij.

Ngok eplari osorsan tevi nale se Atua nga propet sen san muwrai wowomu pae tuwi, “Inu beveruse natuk piplari Ijip ko vini.”

*Erot okoni jinibb nuval sen nir nga parevji pini bipiwarreng nir*

<sup>16</sup> Mian ko vitunen vajin Erot orongwose jinibb ne Is nen arkerkerasi, ko ololar lengleng. Ko okoni jinibb ne nuval sen parevji pini bipi norman nir re Betliem ko rrale p̄etp̄eti Betliem, nga sia ser ejpari eru ko sia ser mulwi vitan. Ngel osorsan tevi daron nga jinibb ne Is marwerai tevi.

<sup>17</sup> Ngok eplari erpe nale se Atua nga Jere-maea muwrai wowomue tuwi: <sup>18</sup> “Arunge dingen san rengo ngaim ne Rama, arting nga arting lengleng. Rejel ko etengsi natun, ko omusus parjinge, suri natun armij pa osuw.”

*Josep arivel lingi Ijip, ko arluwi van Nasret e*

<sup>19</sup> Mian ko Erot emij vajin, ko anglo se Atua eplari kele ji Josep rengo bori san rengo Ijip ko owrai tevi, owra <sup>20</sup> “Kuptur imare, kupwosi bipi wolok, ko kami tasu sen, kapluwi van re vanu Isrel kele e. Suri m̄er nga muwra p̄irevji pini bipi wolok emij pa osuw.” <sup>21</sup> Ko Josep otur imare ko owosi bipi wel nen, ko arluwi van re vanu Isrel e.

<sup>22</sup> Mian ko Josep ornge kele nga Arkelaos ela wani milnge tata sen Erot, evi numal ne Judia. Murnge ko emtutu pian iok e. Mimitutu pian iok e, ko elesi bori san kele nga Atua ewer ore sete pian, ko arwolu van re vanu ne Galili e. <sup>23</sup> Ko arini arlik rengo ngaim san nga nisen Nasret. Ngok eplari wor osorsan tevi nale se Atua nga propet sen san muwrai wowomu pae suri Kristo, “Ni parveruse m̄eri Nasret ko.”

### 3

*Jon Baptaes ewerwer rengo lolo merwer*

<sup>1</sup> Mian mian ko vitunen Jon Baptaes evini ewerwer re lolo merwer ne Judia, owra <sup>2</sup> “Nolo kami pulululwi, suri otomori le pa batun vanu ne melrin p̄irrmali.” <sup>3</sup> Suri Jon evi m̄er nga Atua m̄ijilwer suri rengo nale ngel nga propet Aesea muli tuwi pa, muwra “Jinibb le san ekail rengo lolo merwer, owra ‘Kaploli lilane sel se Numal puto metmet terai. Kaploli mesekle sel sen nir parmetet p̄irres.’”

<sup>4</sup> Jon sunsun sen erpe propet Elaeja tuwi. Ori nevlw kamel, ko netatuw sen arloli nevlw buluk e. Ko re devjen nga re nanen sen e, elai nato nga mok-rowrow

re mösmös ko narllu sukabak nga mñierri orivi nanen sen.<sup>A</sup> <sup>5</sup> Ko nir jijle ne Jerusalem ko ne Jutia ko rrale nuwi seser ne Jortan arivel ko arini jin. <sup>6</sup> Arini jin, ko daron nga marwera tweni nololien ser, ko Jon epaptaes nir reнге nuwi seser ne Jortan.

<sup>7</sup> Ko daron nga mñilesi Parasi ko Satusi, nga marivi jinibb nga marlelep re mñeri Isrel nir, ko Jon owrai tevir: "Kamivi jinibb nga kamsij O! Kamirpe metka ne nuriet. Ko weta, kami kamrongwos kapwolu asi ko reнге lolaren se Atua nga pia-vini?" <sup>8</sup> Poro nolo kami pululuwi, rrek erres kapviseni wenen nen. <sup>9</sup> Sete kapwerwai tevi kami: 'Epram evi metka se kerr, ko ngok rramivi pa jinibb se Atua ko.' Nu nuwrai tevi kami: Atua orongwos pilai nevöt nawon ngel nir ko pilienir parivi metka se Epram. <sup>10</sup> Lelingen ngel artori batu deli oto metmet nga parta ototvi lape nai nir; ko nai jijle nga marsij, sete wener marres mun, parta twenir parwirr nir van reнге nabb nga nün. <sup>11</sup> Nu nupaptaes nuwi e kami, kami nga nolo kami mululuwi. Ko san nga pivivitu suri inu, ni ean wor mare reнге inu. Inu sete nurren rragrag nuvter re besai but sen nga mirae. Ni pia-paptaese kami re Nemñin On ko nabb. <sup>12</sup> Ni otori nai juljule san reнге nevren nga pujujle wene wit e nir, ko dokolvir parwirr lingi jelangir; ko piser kortoni jelangir pilngir reнге bepeim sen, ko pusli dokolvir reнге nabb nga sete san orongwose pivsi pini."

#### *Jon epaptaese Iesu*

<sup>13</sup> Vitunen Iesu evel re Galili vini re nuwi seser ne Jortan, pian ji Jon pipaptaese ni. <sup>14</sup> Ko Jon owra piwer ore ni, owra "Erpese nik kuvini jik nga inu bepaptaese nik? Erres ma poro nik kuppaptaese inu." <sup>15</sup> Ko Iesu erij weli, owra tevi ni: "Puto pipok ko wor, nga rporololi nanu jijle nga Atua mimrreni parpelari." Ko ni epaptaese ni vajin.

<sup>16</sup> Ko Iesu daron nga mipaptaes jile, evel lingi nuwi evesane, ko elesi melrin etpir; ko elesi Nemñin se Atua ojubbul erpe wunier, ko evini esilvi ni. <sup>17</sup> Ko drrelan san eplari re melrin, owra "Morok evi natuk nga memrreni, nurnge erres elep suri ni."

## 4

#### *Demij orowrowe Iesu*

<sup>1</sup> Daron nga Jon mipaptaes jile Iesu musuw vajin, Nemñin On etkai Iesu van re lolo merwer nga Demij purrowrowe ni. <sup>2</sup> Ko Iesu elngi tweni nanen, owra pulot van ji Atua. Ko mulot mian mian mijpari vajin nabong ngavöl ivij (40), vitunen ko ornge numer eaji lenglengle. <sup>3</sup> Ko Demij,

nga mok-rrowrowe jinibb, evini jin, owra puloli Iesu pivitan. Ko owrai tevi ni: "E, nik kuvi pa Atua natun, ko numer ajim. Kupwerai tevi nevöt nawon ngel nir, parivi niv." <sup>4</sup> Ko ni erij weli ni, owrai tevi ni, "Ejki, sete bololi, suri aruli erpel reнге Nale On se Atua, 'Jinibb sete orongwose pimaur kis e niv kobbong; pimaur e nale jile ngok nga miplari reнге jingo Atua.' "

<sup>5</sup> Vitunen Demij etkai Iesu van reнге ngaim nga muon reнге Jerusalem, ko elngi reнге drromdrromo Naim On mare jer, <sup>6</sup> ko owrai tevi, "E, nik kuvi pa Atua natun. Kuprow jubbul vitan. Suri aruli erpel reнге Nale On se Atua: 'Atua pia-koni anglo sen nir, parwosinik reнге nevrer mare, suri nik tukjilaklak wos belam reнге nevöt.' " <sup>7</sup> Ko Iesu owrai tevi: "Ejki, sete bololi, suri aruli kele erpel reнге Nale On se Atua: 'Nik sete kuprowrowe Numal Atua som te, pijki.' "

<sup>8</sup> Vesan kele Demij etkai Iesu van re botwen san nga muwu mare jer, ko evise-nie ni batun vanu jile ne iel ngatan nir, ko nosrovien nen nir. <sup>9</sup> Ko owrai tevi, "Poro nik kupjipa van ngatan kuplotoe inu, ko bea-lai nanu jile ngel nir tevim." <sup>10</sup> Ko Iesu owrai tevi ni, "Kupruj ngasu, Demij, suri aruli erpel reнге Nale On se Atua: 'Nik kuplotoe Numal Atua som, ko ni kobbong nik kupmajing sen.' " <sup>11</sup> Muwrai jile tevi, ko Demij elinglingi ni. Ko anglo sopor arini ji ni ko armetmete ni.

<sup>12</sup> Vitunen Iesu ornge nale nen nga marlingi Jon reнге naim ne nekaien, ko ni olwi van Galili e. <sup>13</sup> Mivini Galili, ko setemun evan Nasret, elinglingi Nasret ojpon ko etajar van Kapaneam e, ko elik ie. Kapaneam evi ngaim san nga muto devje nuwito nga milep nga mubbun rrerrale nisen Galili, reнге vanu ne metka se Sepulon ko Naptali. <sup>14</sup> Ngok eplari osorsan tevi nale san se Atua nga propet Aesea muli tuwi pa, owra <sup>15</sup> "Vanu se Sepulon ko vanu se Naptali re devje nuwi seser ne Jortan van re devjen nga ngalu e reнге dis; jinibb nen nir arivi jinibb ne vare. <sup>16</sup> Arivi jinibb nga marlik reнге nemalik, mian ko arlesi vajin moron nga milep. Ko jinibb nir nga marlik reнге vanu ne namol ne mijen, moron ngok eplari jir."

<sup>17</sup> Renge daron nen, Iesu etipatun nga miwerwer, owra "Nolo kami pululuwi, suri otomori le pa batun vanu ne melrin pirmali."

#### *Iesu everuse jinibb sen ivij*

<sup>18</sup> Renge nabong kele san, Iesu evel sere reнге jeli nuwito ne Galili. Ko elesi niaken eru, Saemon nga marveruse Pita, ko Antru. Ortuwe niva reнге nuwi, suri orivi jinibb nga morok-revrevei nai. <sup>19</sup> Ko Iesu owrai

tevi nuru, “Kopor-vijuri inu, ko inu bealoli kamru kopor-ivi jinibb nga morok-revvevei jinibb.”<sup>20</sup> Ko ngavilvil nuru orlinglingi niva se nuru ko orvijuri ni.

<sup>21</sup> Ko Iesu evel rujruj kele sapon ko elesi niaken kele eru, Jemes ko Jon, nuru tata se nuru Sepeti renge drrav ser, arilile niva ser. Ko everuse nuru.<sup>22</sup> Ko ngavilvil nuru orlinglingi drrav ko tata se nuru, ko orvijuri ni.

*Iesu evisviseni jinibb nir, ko ololi nir nga marmesi arres luwi*

<sup>23</sup> Ko Iesu evel jile re Galili, ko okvisviseni renge naim gortien ser, ko okwerwer suri nale nga mürres suri batun vanu ne melrin. Ko ok-loli nir nga marmesi mesien lele arres luwi.

<sup>24</sup> Mian ko nospen sen arsupe renge Siria jile. Ko jinibb nir arwosi jinibb jikle nga marmesi vini jin. Armesi mesien lele: sopor niber arerer, ko sopor demij esisilvir, ko sopor nemi nai ololir armijmij, ko sopor nga niber sopor mimij. Ko ololi nir arres luwi.<sup>25</sup> Ko delung elep arvijuri ni, jinibb ne Galili nir, ko Dekapolis nir, ko Jerusalem nir, ko jutia nir, ko nir nga marlik van devje Jortan e.

## 5

*Iesu evisviseni jinibb sen nir renge botwen mare*

<sup>1</sup> Daron nga Iesu mülesi delung nir, ko otongsa van mare renge botwen san ko elik ngatan. Ko jinibb sen nir arini jin, arlik rrale.<sup>2</sup> Ko ni esa jingon etipatun evisvisenir owra

<sup>3</sup> “Neiren renge nir nga norrorrmien ser mian ngatan,

suri batun vanu ne melrin evi pa se nir ko.

<sup>4</sup> Neiren renge nir nga marok-taure dauren ne nololien,

mian ko Atua pia-jinge nir ko.

<sup>5</sup> Neiren renge nir nga nolor maran ngatan jer,

suri mian ko dan pia-ivi se nir ko, ko nanu jile nga marto rengen.

<sup>6</sup> Neiren renge nir nga marmerrmerreni nga murrun nga mürres puto pürres, erpe jinibb armerrmerreni nanen ser ko nuwi nuñer,

mian ko Atua pia-la nanu nga marmerrmerreni tevir ko.

<sup>7</sup> Neiren renge nir nga marok-telasi jinibb, mian ko Atua pia-telasi tweni nir ko.

<sup>8</sup> Neiren renge nir nga nolor marwokwok, mian ko nir para-lesi Atua ko.

<sup>9</sup> Neiren renge nir nga marok-loli demat, suri mian ko jinibb nir para-veruse nir Atua natun ko.

<sup>10</sup> Neiren renge nir nga jinibb marloli mñisij tevir suri arloli nanu nga marres,

suri batun vanu ne melrin evi pa se nir ko.

<sup>11</sup> “Ko neiren renge kami poro jinibb nir parwor suri kami, ko poro nir parloli pürsij tevi kami, ko poro nir parkerkeris pürsij tevi kami, parwera nanu lele nga marsij suri kamivi inu jinibb suk nir.<sup>12</sup> Kami kañir pilep, suri nowli kami elep re melrin, osorsan tevi nowli propet san. Suri propet nir nga marwowomue kami tuwi, jinibb arloli esij ko pa tevir erpoc.

*Sol ko Moron*

<sup>13</sup> “Murru kami nga mürres arirpe sol se jinibb jikle nir nga marok-lingi re nanen ser. Ko poro nga sol dilten nga mürres pivel lingi jikle, ko pürres luwi pürpese ko? Erres re parlai ko parsor tweni, ko jinibb parivivel ren parbbötbböt ren vajin.

<sup>14</sup> “Ko murru kami nga mürres erpe moron se jinibb jikle nir. Moron sete orongwos puto teptepi; osorsan tevi ngaim nga milep san nga muto limjer mare re botwen.<sup>15</sup> Ko poro jinibb san pusli nasul, ko sete orongwos putori ngatan; putori mare sapon, ko puloli jinibb jile parlesi moron.<sup>16</sup> Kami kamivi nasul nen. Moron se kami pimor wor van ji jinibb jile, puloli jinibb jikle parlesi majingen se kami nga mürres, ko parsurövi Tata se kami nga mñilik renge melrin.

*Iesu ospe suri nale neseseien se Moses*

<sup>17</sup> “Sete kaprrorrmie inu nuvini tweni bolokloksi nale ne neseseien nir ko nale se propet nir nga marto re Naul On. Inu sete nuvini tweni bolokloksir, ejki, nuvini tweni bololir parpelari le.<sup>18</sup> Nuwretun nuwrai tevi kami, pia-jipari daron nga melrin ko iel ngatan pora-asi, sete bebje nale neseseien san pñasi nawon, pia-jipari nga nanu ngel jikle nir para-pelari.<sup>19</sup> Poro jinibb pñisan putor otvi nale nga welwelili jer nen san renge nale neseseien, ko pivisisenie jinibb nga parloli pürpoc kele, mñernen parveruse pivi jinibb nga welili jer renge batun vanu ne melrin.<sup>20</sup> Inu nuwrai tevi kami, kaploli nanu nga parres, parasie jinibb nevisisenien ne nale neseseien nir ko Parasi nir. Poro pijki, setete kami kamrongwos kapan renge batun vanu ne melrin.

*Iesu evisviseni suri sel ne lolaren*

<sup>21</sup> “Kami kamrunge pa nga marwerai pa tevi bürtera ne tuwi nir renge Naul On, ‘Sete kuprevji pini jinibb pñisan. Ko poro jinibb san pürveji pini jinibb pñisan, mñernen pia-sij ren re daron nga Atua puwra suri lat nga puto suri tevi jinibb nir.’<sup>22</sup> Ko inu ma nuwrai tevi kami vajin, Poro jinibb pñisan pulolarsi tuwan kobbong, mñernen pia-sij ren re daron nga Atua puwra suri lat nga puto suri tevi

jinibb nir. Ko poro jinibb p̄isan puwrai tevi tuwan, 'Kulengleng,' m̄nernen pia-sij ren re nosp̄en se numal nir. Ko poro jinibb p̄isan puwrai tevi tuwan, 'Kuvi jinibb nga kumloli sagraut nanu,' m̄nernen pia-sij ren rengo nabb ne norongen nga m̄isij.

<sup>23</sup> "Ko erpok, daron nga kumla merrenien som vini re nawot nga marok-sulsul ren tevi Atua, ko iokporo kuprorrmi jipari nga nik kumloli tuwam ololar, <sup>24</sup> kuplingi merrenien nen puto mun, ko kupan kuploli p̄irres tevi tuwam, pusuw, ko kupluwi vini kele kupa-la merrenien som vajin.

<sup>25</sup> "Ko poro nga jinibb san nga kumloli mulolar p̄itkai nik nga koporan re nosp̄en se numal nir, kupsaro pingavil, kuploli p̄irres tevi ni. Poro mijki, ko ni tia-lingi nik tevi numal nga mok-wera suri lat nga puto suri re jinibb nir, ko ni tia-lingi nik tevi jinibb ne naim ne nekaien, ko m̄nernen tia-lingi nik rengo naim ne nekaien. <sup>26</sup> Nuwretun nuwrai tevi nik, sete kurongwos kupivare re naim ne nekaien pijpari daron nga nik kupkele lweni nevöt nen jijle.

*Iesu evisviseni nir rengo sel nga marloli m̄isij tevi nesevin*

<sup>27</sup> "Ko kami kamrunge nga marwerai kele rengo Naul On arwera 'Sete kupvenae nesevin m̄inij.' <sup>28</sup> Ko inu ma nuwrai tevi kami vajin, Poro nga jinibb p̄isan pimteni rres nesevin kobbong ko nolon pivnae, ngok nolon ololi pa esij jile ko tevi vinnen. <sup>29</sup> Ko poro nga metem rres puloli nik kupvitan pipok, ko kupla tweni re nik, kupwirre. Erres p̄elak kobbong re metem devjen pijkie, evi nanu nga welili kobbong, rengo poro nga parwirre nibem totoklai pian rengo lat ne nejikien. <sup>30</sup> Ko poro nga nevrem rres puloli nik kupvitan pipok, ko kupta tweni re nik ko kupwirre. Erres p̄elak kobbong re nik nevrem devjen pijkie, evi nanu nga welili kobbong, rengo poro nga nibem totoklai pian rengo lat ne nejikien.

<sup>31</sup> "Ko arwerai kele rengo Naul On arwera 'Isi nga p̄ilngi kurtweni nesevin sen puli naul san suri, ko p̄ilai tevi vinnen.'

<sup>32</sup> Ko inu ma nuwrai tevi kami vajin, Poro nga jinibb san nesevin sen sete puloli womue batun, ko m̄nernen bbong p̄ilngi kurtweni nawone, ko m̄nernen ololi esij nga nesen sen pian pivitan re norman m̄inij. Ko poro nga san p̄ilesi vin nga m̄er nga m̄ilngi kurtweni ngok, m̄nernen evitan re nesevin ngok.

*Iesu evisviseni nir nga marok-loli rijri- jen nga marterter*

<sup>33</sup> "Ko kamrunge kele nga marwerai tuwi rengo Naul On, 'Sete kurongwos kupwera nise Atua nga puloli rijrijen som p̄iterter,

ko mian ko vitunen ko kuptor otvi nale nen. Poro kupwera nise Atua, ko kuploli ko wor pusorsan tevi kumwerai.' <sup>34</sup> Ko inu ma nuwrai tevi kami vajin, Sete kupwera rragrag nise nanu san nga puloli rijrijen som p̄iterter. Sete kupwera nise melrin, suri evi lat seksakel se Atua; <sup>35</sup> sete kupwera nise dan, suri evi lat nga m̄ilngi belan ren daron nga m̄isakel re nai seksakel se ni; sete kupwera nise Jerusalem, suri evi ngaim nga milep se Numal nga milep. <sup>36</sup> Ko sete kupwera nise batum kele daron nga kumloli rijrijen e, suri nik sete kurongwos kuploli rao batum san puwuwer rrek pimotmot. <sup>37</sup> Ko daron nga ma kumrijrij nga kuploli nanu san, ko kuploli ko wor nanu nen; ko daron nga kumrijrij nga sete kuploli nanu san, ko sete kuploli nanu nen. Murrun nga parwera nawon nise nanu daron nga parijrij, arivel ji Demij kobbong vini.

*Iesu evisviseni nir nga marwera parkele lweni murrun nga marsij nir*

<sup>38</sup> "Kamrunge nga marwerai kele rengo Naul On, 'Poro san pulokloksi metem tuwen, ko nik kupkele lweni kuplokloksi metem tuwen. Ko poro san puti rrawe liwen san, ko nik kupkele lweni, kuputi rrawe liwen san.' <sup>39</sup> Ko inu ma nuwrai tevi kami vajin, Sete kupwer ore jinibb nga m̄isij. Poro pungasim, ko puwje vasum rres, ko kuprieni nom, ko puwje kele vasum devjen kele. <sup>40</sup> Ko poro jinibb san puwra p̄ilngim rengo nosp̄en se numal nir ko p̄ilai sunsun som tuwen, ko kuplinglingi kele p̄ila sunsun ne melas som. <sup>41</sup> Ko poro jinibb san puon terter nik kupsa narr sen van ngasu, ko nik kupsai van ngasu jer wor. <sup>42</sup> Ko poro jinibb san pungoni nanu san ji nik, kuplai tevi ni; ko poro jinibb san owra p̄ilai mun jorom, sete kupwer ore ni.

*Iesu evisviseni nir nga parmerreni ko wor devje nuval ser*

<sup>43</sup> "Kamrunge nga marwerai kele rengo Naul On, 'Kupmerreni selem ko kupungasi jinibb nga mok-loli m̄isij tevin.' <sup>44</sup> Ko inu ma nuwrai tevi kami vajin, Kapmerreni wor jinibb nga marok-loli m̄isij tevi kami, ko kapverus suri nir nga marungasi kami. <sup>45</sup> Pipok ko kapivi natu Tata se kami mawos nga m̄ilik rengo melrin. Suri ni ololi nial sen esin ji jinibb nga marres ko nga marsij, ko okoni naus ous ji jinibb nga marres ko nga marsij. <sup>46</sup> Poro kapmerreni lartul nga bbong marmmerreni kami, ko ngok sev ko pivi nowli kami ren? Iok jinibb nga marok-lai takis kele, nga jinibb jijle nir marungasir, nir kele arok-loli kobbong erpok. <sup>47</sup> Ko poro nga kapwera 'eres' tevi tuwa kami nir kobbong, kamloli



nanu nga jinibb jille kobbong nir marok-loli. Jinibb nga marlik re devjen nga vare nir arok-loli kele erpok.

<sup>48</sup> “Ngok pirlpel ma, kami kapivi wor jinibb mawos nga kapmomsawos ñirres jille ko, pirpe Tata se kami nga ñilik re melrin ni omomsawos erres jile.”

## 6

*Sel nga marla nanu tevi ñeres (puaman) muto suri*

<sup>1</sup> Ko Iesu owra “Kapmetmet, sete kaploli nanu nga ñirres nga jinibb nir parlesi nawone. Poro pirlpok, ko nowli kami nga Tata se kami nga ñilik re melrin pia-lai tevi kamitijkie, suri jinibb arsurövi pa kami osuw.

<sup>2</sup> “Erpok, daron nga nik kumlai nevöt tevi ñeres, sete kupsupsupe kele tevi jinibb nir, pirpe lartul nga marivel re sel eru marok-loli re naim gortien nir ko rengen sel nir, nga marwera jinibb parsurövir. Nuwretun nuwrai tevi kami, nir arlai pa nowlir ko osuw. <sup>3</sup> Ko nik ma, daron nga nik kuplai nevöt tevi ñeres, kuplai silveni kenükamie, sete jinibb san purongwose. <sup>4</sup> Ko Tata som vajin nga ñilesi nanu nga muto silveni pia-lai nowlim tevim.

*Iesu evisviseni nir rengen sel momsawos ne loten*

<sup>5</sup> “Ko daron nga kamlot e, sete kaploli pirpe lartul nga marivel re sel eru. Nir armerreni partur rengen naim gortien nir ko partur ore mesakelkel ne sel nir, nga jinibb nir parlesi nir parlot. Nuwretun nuwrai tevi kami, nir arlai pa nowlir ko osuw. <sup>6</sup> Ko nik ma, daron nga nik kuplot, kupan rengen naim som ko kupkiorore metali, ko kuplot van ji Tata som nga ñilik silveni. Ko Tata som nga ñilesi nanu nga muto silveni pia-lai nowlim tevim.

<sup>7</sup> “Ko kami, daron nga kaplot, sete kapwer lululweni nanu nga kami sete kamrongwose, pirpe jinibb nga marlik vare marok-loli. Suri nir arrorrmi poro nga nir parwer lululweni pirlpok, ko atua ser nir parunge loten ser. <sup>8</sup> Sete kami kaploli pirlpok pirpe nir, suri Tata se kami orongwose womu pae sev nga nevre kami marmumrrol ren, vitunen ko kama-ungoni ni. <sup>9</sup> Ko ngok kami sel nga kaplot ren pirlpel le: Kapwera

“Tata se kem, nik nga kumlik rengen melrin, Nik nistem on. Nammerreni jinibb jille nir partori nistem.

<sup>10</sup> Nammerreni nik batun vanu som pivini iel ngatan.

Nammerreni nik marongen som piplari iel ngatan, pirpe nga muto pa re melrin.

<sup>11</sup> Kupla nanen pivter tevi kem lelingen, nabaani.

<sup>12</sup> Ko kuptelasi tweni nololien se kem, pirpe nga kem namok-telasi pa nanu nga marsij nga jinibb nir marok-loli tevi kem.

<sup>13</sup> Ko sete kuploli nanu parini parrowrrow ñelake kem. Ko kuptor ore Demij, sete pivini pulokloksi kem.

[Suri batun vanu evi som, ko derteren evi som, ko nosrövien evi som, ko parto pijpari tuwi ngok vini. Amen.]<sup>B</sup>

<sup>14</sup> “Suri poro kami kaptelasi tweni nololien se jinibb nir nga marok-loli tevi kami, ko Tata se kami nga ñilik re melrin kele ñitlasi tweni nololien se kami kele vajin. <sup>15</sup> Ko poro sete kaptelasi tweni nololien se jinibb nir, ko Tata se kami kele sete mia-telasi tweni nololien se kami kele vajin.

*Murrun nga parlingi kurtweni nanen lat nga muto suri*

<sup>16</sup> “Ko daron nga kamlingi kurtweni nanen nga kaplot van ji Atua, sete kaploli pirpe lartul nga marivel re sel eru. Arloli nor ous nawon nga jinibb nir parongwose nga marlingingi tweni nanen ser. Nuwretun nuwrai tevi kami, nir arlai pa nowlir osuw, suri jinibb arsurövir pa. <sup>17</sup> Ko nik, daron nga nik kuplingi kurtweni nanen nga kuplot, kupwirap vaseni nom ko kuploli lilane nom ñirres pirpe bbong nabong jille komok-loli. <sup>18</sup> Pirlpok, ko jinibb nir sete parongwose nga nik kumlingi tweni nanen. Ko Tata som ma nga ñilik silveni, ni kobbong purongwose; ko Tata som nga ñilesi nanu nga muto silveni pia-lai nowlim tevim.

*Nijor rengen melrin*

<sup>19</sup> “Sete nolo kami parkul, ko sete kapok-ser kortoni kis joro kami nga marres iel ngatan. Suri momom tuti ko doto nir tarurro lokloksir, ko jinibb venao tubbri lut nabbu ko tian tivevna loloim. <sup>20</sup> Nolo kami parres, ko re sel ngok, kapok-ser kortoni joro kami nga parres parto rengen melrin mare. Suri momom sete orongwos puti, ko doto sete arongwos parurro lokloksir, ko jinibb venao sete orongwose pubbri lut nabbu ko pian pivevna loloim. <sup>21</sup> Ngok poro nga jorom puto rengen lat nga ñirres, ko nolom kele ñirres, suri jorom oto pa lat nga ñirres osuw.

*Moron ne niben*

**B 6:13** Nale nga muto re nolo [ ], rrek sete Matiu oli, ko jinibb san ea-uli vitue daron nga muli tweni kopi san ne naul ngel.

<sup>22</sup> “Mete jinibb erpe moron ne nibem. Poro nga metem pīmerer, ko moron puwun saut re nibem totoklai. Ngok owra puwra, poro nga nolom pīrres, ko mauren som totoklai kele pīrres. <sup>23</sup> Ko poro nga metem pīsij, ko nermalik puwun saute nibem totoklai, suri metem erpe moron ne nibem. Ngok owra puwra, poro nga nolom pukul, ko mauren som totoklai kele pīsij jile.

<sup>24</sup> “Sete jinibb san orongwos pīmajing se numal pīeru pivesane. Poro piprop, ko tungasi nuru tuwen, ko timrreni nuru tuwen nen. Erpok ko, sete Atua orongwos pukonim re majingen sen poro nevōt mukonim pa renge majingen sen. Suri sete kurongwos kupmajing se nuru korti pivesane.

#### *Atua orongwos pimetmet kami pīrres*

<sup>25</sup> “Suri nanu ngel, nuwrai tevi kami, sete kaprorrmi pēlake mauren se kami. Sete kapok-wera ‘O, rrapurroi sev le?’, rreknga ‘O, rrapmini sev le?’, rreknga ‘O, rrapuri sunsun sev le?’. Mauren se jinibb nir evi nanu nga milep nga Atua mīlai pa tevi jinibb nir. Nanen evi nanu nga welili jer kobbong—Atua orongwos pīlai kele kobbong. Ko nibe jinibb nir kele evi nanu nga milep nga Atua mīlai pa tevir. Sunsun evi nanu nga welili jer kobbong—Atua orongwos pīlai kele kobbong. <sup>26</sup> Kaprorrmi ta numōn nga marok-il suri mesa ngok nir. Nir sete aruw ko sete arili tweni, ko sete arilingi nanen ser renge bēpēim; ko Tata se kami nga mok-lik ko re melrin ok-wunganir. Ko kami kamrres womu nen ko wor re numōn ngok nir re no Atua, ngok ni puwngani kami kele ko wor. <sup>27</sup> Kaprorrmi ta mēr nga murrorrmi pēlake mauren nga mumrrol. Orongwos puloli kele mauren sen pipriv kele renge sel ngok? Ejki rres nawon!

<sup>28</sup> “Ko suri sev kamrorrmi pēlake sunsun se kami? Kapmeteni wose renge nevgun nga marmaur suri orsel ngok nir. Armaur erpese? Sete armajing erpe jinibb te, ko sete arilile wose. <sup>29</sup> Ko nuwrai kele tevi kami, numal Solomon, daron nga mīlengi sunsun sen nga mīrres pēlak, ko sunsun sen emau erres, sete erpe nga mītra. Ko sunsun se nevgun, nulsen arres easi. <sup>30</sup> Ko mōsmōs ne orsel nir armaur erres, ko Atua ololi orsel emau erres e lelingen ngel; ko mevinen mun parsulir ko pa. Ko kami sete kamrorrmi nga Atua pīlai sunsun se kami nga parres? O, lartul, nosurien se kami ewelili jer.

<sup>31</sup> “Setete kaprorrmi pēlake piprel: ‘Rrapurro isev? Rrapmini isev?’ rreknga

‘Sunsun sev rrapuri?’ <sup>32</sup> Jinibb nir nga marlik vare arok-pej nanu nga ngok nir. Ko Tata se kami nga mīlik re melrin orongwos pae nanu jille nga nevre kami mumrrol ren. <sup>33</sup> Ko nanu nga milep nen nga kami kaploli, kappēlak nga kapsil van renge batun vanu se Atua, ko nga kaploli suri murrūn nga mīrres sen. Ko vitunen ni pia-lai kele nanu ngok jile nir tevi kami. <sup>34</sup> Sete erres kaprorrmi pēlake nanu ne mevi nir. Suri mevi evi nabong nga kaprorrmi suri nanu nga parpelari kis ren. Nanu nga mīsij nga pipari renge nabong san evtēre kaprorrmi suri re nabong nen kis kobbong.

## 7

### *Iesu evisviseni nir nga sete parwer lokloksi jinibb san*

<sup>1</sup> “Sete kapwer lokloksi jinibb pisan, puloli Atua sete mia-wer lokloksi kami. <sup>2</sup> Pusorsan tevi nga kami kamwer lokloksi jinibb nir, Atua kele pia-wer lokloksi kami. Ko tevi norngov sev nga kami kamrongvie jinibb, Atua pia-rongvie lweni kami e re nabong nga vitunen. <sup>3-5</sup> Ko erpese kumlesi nate nato nga tuwam mīkrae re nolo bēlan, ko sete kulesi suri nate buluk nga milep nga nik kumkerāe re nik nolo bēlam? Ko poro piprop, ko nik kupwera piprese tevi tuwam, ‘Tuwak, kuplinglingi bēse tweni nate nato nga kumkerāe re nolo bēlam,’ daron nga nik sete kumlesesi nate buluk nga milep nga nik kumkerāe re nik nolo bēlam? O, nik nga kumiel rege sel eru, tukbbōt re aseni ni bēlan, tuloli ni bēlan turro tiasil! Womunen kupserē tweni nate buluk nga milep nga nik kumkerāe re nolo bēlam jile pusuw, ko kuplesi nolo bēlam owokwok erres, ko kurongwos kupa-sere tweni vajin nate nato nga tuwam mīkrae mibbōlji bēlan.<sup>C</sup>

<sup>6</sup> “Ngok orrongrongvi nololien nga wowarrene se kalesia nir. Ko re devjen nga re nir ne vare nga marivi jinibb ngamarsij pētpēti, kapmetmet re nir. Daron nga poro kapan ji nir nga kapwera tweni nale suk, ko nir arongwose parpalpal pīterter tevi kami pipre guli, ko parungasi nale suk pipre bēpēp marbbōtbbōt re nanu nga mīrres.

### *Loten nga jinibb pīlai sev nga mungoni ji Atua*

<sup>7</sup> “Kapungoni, ko Atua pia-lai tevi kami. Kappej, ko Atua puloli kapa-lesi. Kapututi, ko Atua pia-tasi metali nen tevi kami.

<sup>C</sup> 7:3-5 Erpe iel, Matiu ošpe suri nanu nga muto re mete jinibb, ko kem namrieni nga namvijuri murrūn ne rjen ne nale nga iel.

<sup>8</sup> Suri nir jijle nga marok-ungoni para-lai, ko nir jijle nga marok-pej para-lesi, ko nir jijle nga marok-ututi, para-tasi tevir.

<sup>9</sup> “Jinibb si re kami poro nga natun pungoni niv tevi ni, ko ni ñikrekrasi pia-la nevöt tevi natun?” <sup>10</sup> Ko poro nga natun pungoni mesal, ko rreknga ni pia-la nuñet tevi? Ejki rres nawon, sete orongwos puloli pirpok. <sup>11</sup> Ko ngok, kami nga kamivi jinibb nga kamsij kamrongwos sel nga kapla nanu nga marres tevi natu kami nir. Ko Tata se kami nga ñilik re melrin pia-lai ko wor pumomsawos nanu nga marres tevi nir nga marungoni ni.

<sup>12</sup> “Nanu jijle nga kami kamwera jinibb parloli tevi kami, kami kele kaploli ko wor tevi nir pirpok kele. Ngok kobbong evi murrun ne nospen jile se Moses ko propet nir nga maruli re Naul On.

*Sel ne mauren ko sel ne nejjikien*

<sup>13</sup> “Kapasi rengo metali nga ñikel, nga pian re lut ne mauren. Suri metali ko sel nga poran rengo lut ne nejjikien, metali nen nolon elep, ko sel nen kele elep, ko nir elep nga marvijuri. <sup>14</sup> Ko metali ko sel nga poran rengo lut ne mauren, metali nen nolon ewelili jer, ko sel nen kele nolon ewelili jer; ko nir pievis kobbong parvijuri.

*Rraplesi wose jinibb rengo wenen ne mauren sen*

<sup>15</sup> “Kapmetmet rengo propet ne gerisen nir. Arirpe guli rrum nga numer ñiajir, ko aruri nevu sipsip arkerkeris arirpe sipsip nga sete marongwose parllokloksi nanu san. <sup>16</sup> Kaplesi wose nir rengo wenen nga marpelari rengo mauren ser. Sete jinibb arongwose partawe wene drra rengo moku, ko wene nitapol rengo jiber-mij, ejki. <sup>17</sup> Erpok, nai jijle nga marres parwen kele wenen nga marres, ko nai jijle nga marsij parwen wenen nga marsij. <sup>18</sup> Nai jijle nga marres sete arongwos parla wenen nga marsij, ko nai jijle nga marsij sete arongwose parla wenen nga marres. <sup>19</sup> Ko nai jijle nga sete parwen wenen nga ñirres, parta twenir, ko parwirrer van re nabb. <sup>20</sup> Erpok, kaplesi wose nir rengo wenen nga miplari re mauren ser.

*Jinibb mawos nir se Iesu*

<sup>21</sup> “Sete nir jijle nga marok-veruse inu ‘Numal, numal’ tetajer paran rengo batun vanu ne melrin. Rrek nir pievis kobbong, nir nga bbong marok-loli marongen se Tata suk nga ñilik re melrin mare ko. <sup>22</sup> Erpok, rengo nabong nga vitunen, nir elep parwera tevi inu, ‘Numal, numal, sete kurrormi wos nga kem namsupe nospen som re nisem, ko nga kem namoji tweni demij nir rengo nisem, ko nga kem namloli

majingen nga marterter marlelep marres nir rengo nisem?” <sup>23</sup> Ko vitunen bea-werai limjer tevi nir, “Setete nurongwose kami. Kapruj ngasu inu, kami nga kamok-majing nanu nga ñisij.”

*Jinibb lele eru nga morili naim*

<sup>24</sup> “Ngel, jinibb jijle nga marunge nale suk ngel nir ko marlolir, osorsan erpe jinibb san nga norongwosien sen otoo, nga ñili naim sen rengo dan nga ñiterter ñirres. <sup>25</sup> Mili jile vajin, mian ko naus ous elep, ko nuwi owlu vini, ko ling eser elep ko owi naim eterter. Ko setete evitan, suri arili pa eterter rengo dan nga ñiterter ñirres. <sup>26</sup> Ko jinibb jijle nga ñilenglang, norongwosien sen ñijkie, nga ñili naim sen rengo deñinan. <sup>27</sup> Mili jile vajin, mian ko naus ous elep, ko nuwi owlu vini, ko ling eser elep ko owi petpate naim. Ko emav ko omobburbur jijle.”

*Nevisvisenien se Iesu orrow erres*

<sup>28</sup> Iesu evinvin ore nale sen osuw iok. Ko bbösa nga milep elai delung e nir. <sup>29</sup> Suri ni nevisvisenien sen orrow erres, sete erpe nevisvisenien se jinibb nevisvisenien ne nale neseseien nir.

## 8

*Iesu ololi jinibb sopor arres luwi re mesien ser*

<sup>1</sup> Daron nga Iesu mujubbul vajin e rengo botwen, ko delung nga milep nir arvijuri ni. <sup>2</sup> Ko jinibb san nga mimsi mesien nga niber ñimemaual evini ejjol vitan jin, ko owra “Wurru, numal, oto ji nik, poro nga nik kupmarong, ko kurongwos kuploli nibek puwokwok luwi.” <sup>3</sup> Ko Iesu esareni nevren ejpari ñernen niben, ko owra “Inu numarong, nibem puwokwok luwi.” Ko ngavilvilsen mesien nga niber ñimemaual evel lingi ni, ko niben owokwok luwi erres. <sup>4</sup> Ko Iesu ewer ore, owrai tevi: “Kuplesi sete kupwerwera tevi jinibb ñisan, ko kupan kupviseni nibem tevi jinibb ne sulsulen san, ko kuplai merrenien ñisan pusorsan tevi Moses muli tuwi suri nir nga marres luwi re mesien ngok, miviseni nir nga nibem muwokwok pa musuw.”

<sup>5</sup> Ko daron nga Iesu mian rengo Kapaneam e, ko numal san se jinibb ne nuval ne Rom nir evini ji ni <sup>6</sup> ko ongoni ni, owra “Wurru, numal, nanwarreng weli ne majingen suk emsi, ematur rengo naim. Emsi mesien nga niber mokmijmij e, ko ornge esij ñelak.” <sup>7</sup> Ko Iesu owra lweni tevi: “Inu bevinuk le pa, rproporan bololi ni ñirres.” <sup>8</sup> Ko ñernen ewer ore, owra lweni tevi Iesu: “Numal, sete nurres nga nik kupini re loloim suk. Ko kuptur iok kobbong, kupwera bbong nale, ko nanwarreng suk wel nen ñirres luwi re mesien sen. <sup>9</sup> Ko inu

kele derteren suk otoo, ko numal suk sopor kele derteren ser arasie inu wor. Ko poro nga bowrai tevi jinibb ne nuval suk san, 'Kupan,' ko ni pian ko wor; ko poro nga bowrai tevi san kele, 'Kupini,' ko ni pivini ko wor; ko poro nga bowrai tevi jinibb ne majingen suk, 'Kuploli pirpel,' ko ni puloli ko wor pirpok."

<sup>10</sup> Ko daron nga Iesu murnge nale sen ngel, ko etaole, ko owrai tevi nir nga marvijuri ni: "Nuwretun, nuwrai tevi kami, setete nulesi jinibb san ne Isrel nga nosurien sen milep mirpe m̄erel. <sup>11</sup> Nuwrai tevi kami, nir pilep nga para-ivel re Is ko re Wes ko ngatan jikle vini, para-lik ngatan tevi Epram ko Aesak ko Jakop renga batun vanu ne melrin, ko para-aani nanen. <sup>12</sup> Ko m̄eri Isrel nir nga marrormi nawon nga paran renga batun vanu ne melrin, parasor twenir, paran renga lat nga mimalik jerjer. Iok ngok jinibb para-ting ko pararunge p̄isij pilep." <sup>13</sup> Ko Iesu owrai lweni kele tevi jinibb nuval nen, "Kupiel; nanu nga kumosuri piplari ko jim." Ko renga mete nial mawos nen, nanwarreng wel nen erres luwi re mesien sen.

<sup>14</sup> Ko vitunen, Iesu evan loloim se Pita, ko elesi Pita p̄ilen lekter ematur emsi mesien dowalul. <sup>15</sup> Ko Iesu ejpari nevre nesevin, ko mesien dowalul osuw re ni. Ko emra, ko etabbuni nanen se Iesu.

<sup>16</sup> Ko rivriv jer, re daron nga nial muwaj pini, ko nabong on ser musuw, ko artektekai jinibb elep vini ji Iesu nga demij marsisilvir; ko ni oji tweni neñin nga marsij rer tevi nale sen, ko ololi nir nga marmesi arres luwi re mesien ser. <sup>17</sup> Ngok eplari osorsan tevi nale san se propet Aesea nga muli tuwi mirpel: "Ni ela tweni mesien se kerr ko norongen nga m̄isij se kerr."

#### *Jinibb eru ormerreni porvijuri Iesu*

<sup>18</sup> Ko vitunen Iesu elesi delung elep nga martur rrale ni, ko owrai tevi jinibb sen nir, "Rrapan re devje nuwi Galili e." <sup>19</sup> Ko jinibb nevisvisenien ne nale nesesreien san evini ji ni, ko owra "Jinibb nevisvisenien, ngabe nga kupa-van e, ko inu beavijuri nik." <sup>20</sup> Ko Iesu owra lweni tevi ni, "Guli rrum nga wowarreng nir belaur otoo, ko numõn nir menuner otoo; ko inu jinibb Mawos, milngek ejkie. Ngok, kuprormi mun p̄irres poro nga kumrreni kupvijuri inu."

<sup>21</sup> Ko san re jinibb sen owra tevi ni, "Numal, kuplinglingi inu puwomu ban betevni luwe tata suk." <sup>22</sup> Ko Iesu owrai tevi, "Ejki, kupvijuri inu, ko kuplinglingi nir nga sete marla mauren ko pa partevni lartul nga marmij."

*Iesu ewer ore ling serser nga milep*

<sup>23</sup> Erij jile erpok musuw, ko ean esa renga drrav se nir, ko jinibb sen aran tevi ni. Ko ni evan, ematur lolo drrav. Ko drrav owlu.

<sup>24</sup> Ko mian ko ling serser nga milep etewut vini re nuwito, ko owi nuwi daptap nen elelep nga marjerjeravi drrav ser, ko drrav ser otomori purron. Ko Iesu ematur malum, sete emra wor. <sup>25</sup> Ko jinibb sen aran arwuni ni, ko arwerai tevi ni: "Numal, kupla se kerr, otomori rrapmij!"

<sup>26</sup> Ko ni owra tevi nir: "Erpe se kami kammetutu? Nosurien se kami ewelili jer." Ko otur mera, ko ewer ore ling ko daptap ne nuwi, ko ormol ker̄ikañe. <sup>27</sup> Ko nir artaole, ko arwerwerair e, "Jinibb nga mirpese le mirpel ngel, nga m̄irij tevi ling ko nuwi kele, ko morosuri ni?"

#### *Iesu oji tweni demij renga m̄eri Gatara eru*

<sup>28</sup> Ko vitunen arjipari devje nuwi renga ngaim se m̄eri Gatara. Ko jinibb eru nga demij n̄isisilvi nuru orpelari re lat ne dubb vini, orivel ore selen. Nuru orivi jinibb rrum, ko orloli jinibb sete arongwose parasi renga sel ngok. <sup>29</sup> Ko orkail ko orwera "Nik Atua natun, kuvini iel tweni kuploli sev le tevi komru? Kuvini tweni kuploli komru nobor-runge p̄isij puwomu, vitunen ko daron nen vajin?"

<sup>30</sup> Ko mori bbong nir, nior ber̄per artur arok-susung malum. <sup>31</sup> Ko demij nen nir arungoni tevi Iesu, arwera "Wurru, poro kupoji tweni kem, ko kuplinglingi kem naban nabsilvi ber̄per ngok nir." <sup>32</sup> Ko ni owra tevi nir: "Kapan." Ko daron nga marivare, aran arsilvi ber̄per nir; ko nir jikle arwolu renga botwen nga mivjivjar san ko arowrow jubbul van renga nuwi nga milep nen, ko arron ko armij.

<sup>33</sup> Ko jinibb nga marok-metmete ber̄per nir, daron nga marlesi, arwolu suri sel van ngaim e, ko arsupe nanu jile nga marpelari. Ko nanu nga milep nga marsupe suri, sev nga miplari ji laru nen nuru. <sup>34</sup> Ko nir nga marlik renga ngaim nen jikle nir arivel ore parsesewete Iesu. Ko daron nga marini ji ni ko arungonie eterter, arwera pivel lingi lut nga nir.

## 9

#### *Iesu ololi jinibb san nga devje niben mimij erres luwi kele*

<sup>1</sup> Ko mian ko Iesu esa luwi kele renga drrav nen, olwi kele vini renga ngaim sen e. <sup>2</sup> Ko jinibb sopor arwosi jinibb san re maling sen nga mimsie mesien nga niber mok-mij e vini jin. Ko Iesu elesi nosurien ser elep, ko owrai tevi m̄er nga mimi, "Natuk, nolom p̄irres, betlasi tweni nololien som le pa."

<sup>3</sup> Ko jinibb nevisvisenien ne nale nesereien sopor arwerwera lululwenir e, "Aro, m̄erel erij melmelas ko osopsoŋe pa Atua!"

<sup>4</sup> Ko Iesu orongwose norrorrmien ser, ko owra "Suri sev norrorrmien nga m̄isij muto re nolo kami ngok?" <sup>5-6</sup> Evi nanu nga m̄isisarow bbong nga bowrai tevi m̄erel, 'Nololien som nutlasi tweni pa,' suri si p̄ilesi poro nuwretun rrek nukrekris kob-bong? Ko evi nanu nga m̄iterter kele wor asi ngok nga poro bowra 'Kuptur imare kupla mlngom ko kupiel van renge naim som e,' suri jinibb jille parlesi lelingen poro pipari pirpe nga mowrai ngok. Ko bololi vajin nanu nga m̄iterter nen, puloli kaprongwose kele nga inu Jinibb Mawos derteren suk otoe renge iel ngatan nga Betlasi tweni nololien." Ko ni owrai tevi m̄er nga devje niben mimij, owra "Nuwrai tevi nik, Kuptur imare kuplai maling som kupwosi, ko kupiel van renge naim som e." <sup>7</sup> Ko ni erres luwi, ko otur imare ko evan renge naim sen e. <sup>8</sup> Ko delung nir arlesi nanu nga muloli, ko armetutue, ko arsurōvi Atua renge nga m̄ilai derteren nga mirpok tevi jinibb.

*Iesu everus Matiu nga p̄ivi jinibb sen*

<sup>9</sup> Ko Iesu evel lingi lat ngok, orujruj sapon. Ko elesi jinibb san nisen Matiu esakel renge lat nga mok-lai nevōt netakis e. Ko owrai tevi, "Kupvijuri inu." Ko ni otur imare, evijuri ni.

<sup>10</sup> Ko vitunen Iesu ean loloim se Matiu ko esakel re tep nga p̄iaan. Ko nir elep nga marok-lai nevōt ne takis arini kele, ko nir nga jinibb marok-ungasir arini arsakel tevi Iesu ko jinibb sen nir. <sup>11</sup> Ko Parasi nir marlesi ko arwerai tevi jinibb sen nir, "Erpese numal se kami m̄iaan tevi lartul ngok nga marok-loli nanu nga m̄isij?"

<sup>12</sup> Ko Iesu ornge nale ser ko owrai tevir: "Nir nga marres sete armerreni dokta; nir nga bbong marmesi ko. <sup>13</sup> Kapan kapmeteni suri re mining ne nale se Atua ngel: 'Nanu nga memrreni milep evi murrun nga partelasi jinibb. Murrun nga parsulsul tevi Atua evi nanu nga welili jer kobbong.' Sete nuvini tweni nga beveruse jinibb nga marvilvil ore marsij marwera marres, ko nuvini tweni nga beveruse nir nga sete markerkeris, ko marwer limjere nga marsij."

*Murrun nga mimerr ko murrun nga m̄itra*

<sup>14</sup> Ko vitunen vajin jinibb se Jon Baptaes nir arini ji Iesu, ko arsuasi tevi ni: "Erpese kem ko Parasi nir namlingi tweni nanen nga nablot van ji Atua, ko jinibb som nir sete arloli erpok?" <sup>15</sup> Ko Iesu owra lweni tevir, "Daron nga nesevin muwra p̄ilik ji diwen sen, ko elik malum tevi selen nir

rengenanen, sete arongwos partengsi wor. Ko daron nen pia-vini ko nga pia-ivel lingir vajin, ko arongwos parunge p̄isij vajin ko parlingi tweni nanen ser suri.

<sup>16</sup> "Ko sete jinibb san orongwose p̄ilai bebje kalik nga mimerr puwol ore lat nga mimarrerr renge sunsun nga m̄itra e. Poro pipok, ko kalik nga m̄imerr nen tia-sakuk ko tia-teri kele sunsun nga m̄itra, ko tia-loli lat nga m̄imarrerr tia-lep temijpal. <sup>17</sup> Ko erpok kele, sete jinibb san orongwos pujongjongi norro nga mimerr van renge hotel nga m̄itra nga marloli nevlu nanikot e. Poro pipok ko norro nga mimerr tut, tuloli nevlu nanikot nga m̄itra tirrerren ko tiap rrerresi, suri etra p̄elak. Ko norro timejviviv tisij, ko nevlu nanikot kele tisij. Pipok ko, norro nga mimerr parlingi ko wor renge nevlu nanikot nga mimerr mimalum m̄irres."

*Iesu ololi nesevin san erres luwi kele, ko nesenwarreng san nga mimij pa emaur luwi kele*

<sup>18</sup> Ko daron nga m̄irij mirpok tevi nir, ko numal san se m̄eri Isrel evini ji Iesu. Ko ejiol ko owra "Natuk nesenwarreng eamij bbong lelingen wolok. Ko poro nga nik kupini, kupa-jipari kobbong ni tevi nevrem, ko ni pia-maur luwi kele." <sup>19</sup> Ko Iesu otur imare ko evijuri ni, ko jinibb se Iesu nir kele arvijuri.

<sup>20</sup> Ko nesevin san nga mok-mesi mesien se nesevin nir tetajer, sete orongwos pumosi epari sia esngavōl drromon eru (12), evini evitu suri Iesu re duren, ko epari bongsi sunsun sen. <sup>21</sup> Nesevin norrorrmien sen erpel: "Poro bbong bejpari bongsi sunsun sen, ko inu bea-rres ko." <sup>22</sup> Ko Iesu erieni lweni ko elesi vinnen ko owrai tevi: "Natuk, nolom p̄irres, nosurien som ololim kumrres." Ko vinnen erres jer ko pa evesane.

<sup>23</sup> Ko daron nga Iesu mivini vajin re naim se numal nen, ko elesi nir nga marok-uwi davō ne mijen, ko nir nga marting vijajeng. <sup>24</sup> Ko ni owrai tevir, "Kapiel, suri nesenwarreng ngel setete emij, ko ematur kobbong." Ko daron nga marunge nale sen, ko armen kerajie. <sup>25</sup> Ko daron nga delung nir maran vajin vare e, ko ni evan re loloim nga nesenwarreng mimatur ren, ko erveinevre nesenwarreng nen imare, ko nesenwarreng emra. <sup>26</sup> Ko nosp̄en nen arsupe re lat nen jile nir.

*Iesu ololi metrrorr eru orkulu luwi*

<sup>27</sup> Daron nga Iesu mivel rujruj lingi ie, ko metrrorr eru orvijuri ni. Ko orkail, orwera "Wurru, kuprrorrmi komru, nik metka se Devet!" <sup>28</sup> Ko daron nga Iesu mian loloim e, ko metrrorr nuru oran jin. Ko ni owra tevi nuru, "Komor-osuri nga

inu nurongwos bololi nanu ngel?" Ko nuru orwera lweni, "O-o, numal." <sup>29</sup> Ko ejpari mete nuru, ko owra "Piplari pusorsan tevi nosurien se kamru." <sup>30</sup> Ko mete nuru orres. Ko Iesu ewer ore eterter owrai tevi nuru, "Kopor-lesi sete jinibb san purongwose." <sup>31</sup> Ko nuru daron nga morivel, ortur imare ko ortewijreni nospen ne Iesu renge vanu nen jile nir.

*Iesu ololi nabbut san erij luwi*

<sup>32</sup> Ko daron nga nuru morivare re naim e, ko jinibb sopor arpitevi nabbut san nga demij misisilvi vini ji Iesu. <sup>33</sup> Ko Iesu oji tweni demij, ko nabbut erij luwi vajin. Ko delung nir artaole, ko arwera "Sete pa nabong san rramlesi nanu nga mirpok eplari renge Isrel." <sup>34</sup> Ko Parasi nir arwera "Wi, ok-ojoi tweni demij suri ni elai derteren sen ji numal se demij nir."

*Iesu orrorrmi delung nir*

<sup>35</sup> Ko Iesu evel rrrerale ngaim nga marlelep nir ko nga wovarreng nir, ko okvisviseni renge naim gortien ser. Ko okwerwer suri nale nga mirres suri batun vanu ne melrin, ko ok-loli nir nga marmesi mesien lele, mesien ser osuw, arres vajin.

<sup>36</sup> Ko daron nga mulesi delung nir, ko orrorrmi elep suri nir. Suri arirpe sipsip nga sete san mok-metmeter, armaob nawon, setemun arongwose parwolu. <sup>37</sup> Ko owrai tevi jinibb sen nir, "Numös elep pelak, ko nir evis bbong nga partawer ko parilir. <sup>38</sup> Ngok, kapungoni tevi Atua, nga mivi numal ne numös, nga pukoni kele jinibb nga marok-tawe ko marok-ili sapon van re orsel sen."

## 10

*Aposol esngavöl drromon eru se Iesu*

<sup>1</sup> Ko Iesu everus jinibb sen esngavöl drromon eru (12), nga marveruse nir aposol, parini mori. Ko elai derteren tevir nga paroji nemin nga marsij nir, ko nga parloli nir nga marmesi mesien lele parres luwi.

<sup>2</sup> Ngel evi nise aposol esngavöl drromon eru: nga womuj nen Saemon, nga marveruse kele e Pita, ko Antru Pita tasin, ko Jemes natu Sepeti ko Jon Jemes tasin, <sup>3</sup> ko Pilip, ko Batolomiu, ko Tomas, ko Matiu nga mok-lai nevöt ne takis bonevis, ko Jemes natu Alpeas, ko Tateas, <sup>4</sup> ko Saemon nga bonevis nilik ji nir nga marmerrreni paroji tweni meri Rom nir, ko Jutas Iskariot, nga vitunen pia-teka kerasi Iesu.

*Iesu okoni tweni aposol sen nir*

<sup>5</sup> Jinibb esngavöl drromon eru ngel Iesu okonir van. Ko daron nga mukonir e, ko ewer sesesre erpel tevir: "Sete kapan ji jinibb ne vare nir, ko sete kapan renge ngaim san se meri Sameria nir, pijki.

<sup>6</sup> Rrek kapan wor ji meri Isrel nir. Nir arirpe sipsip nga marivel sarsarr. <sup>7</sup> Ko daron nga kapan, ko kapok-werwer pipel, kapwera 'Otomori le pa batun vanu ne melrin pirrmali.' <sup>8</sup> Kaploli nir nga marmesi parres, ko kaploli nir nga marmij parmaur luwi, ko kaploli nir nga marmesie mesien nga niber miniemaul parwokwok, ko kapoji tweni demij nga marsisilvi jinibb nir. Ngok evi derteren nga marlai nawone tevi kami. Sete kamwuli. Ko kami kele kaplai nawon tevi jinibb nir.

<sup>9</sup> Sete kapsongni nevöt renge baos se kami; poro pivi nevöt nga milep, rreknga nevöt nga welili, ko sete kapsongni, pijki. <sup>10</sup> Ko sete kapsa narr se kami daron nga kapiel e, ko sete kaptori sunsun pieru, rreknga but se kami, rreknga nai nga moktor etete kami. Sete kaptori nanu ngok nir, suri oto ji lartul nga kammajng ser para-lan nanu ngok nir tevi kami.

<sup>11</sup> "Ko daron nga kapan renge ngaim nga milep san, rrek nga welili san, kappej siko nga mirres ren, ko kaplik tevi, pijpari daron nga kapa-ivel. <sup>12</sup> Ko daron nga kapan renge naim sen, ko kapwera erres tevi nir nga marlik ren. <sup>13</sup> Ko poro nga nir parivi jinibb nga marres, ko kaplinglingi rijen se kami nga mirres ngok puto jer jir. Ko poro nga nir sete parivi jinibb nga marres, ko kaploli rijen se kami nga mirres ngok pulwi vinuk ji kami. <sup>14</sup> Ko poro sopor sete parmarong kami kapan ji nir, ko sete parunge nale se kami, daron nga kapiel lingi lut nen, erres kapwirrwirreni tweni maw nga muto re but se kami, nga piviseni tevir nga marloli misij. <sup>15</sup> Nuwretun nuwrai tevi kami, renge nabong nga Atua pia-wera suri lat nga puto suri tevi jinibb nir, pia-sij wor pia-asie renge nir ngok renge nir ne Sotom ko nir ne Gomora, nga marsupe tuwi pa suri nololien ser nga marsij.

*Jinibb nir para-loli pisij tevi jinibb se Iesu nir*

<sup>16</sup> "Kapmurrong. Bokoni tweni kami kapirpe sipsip nga paran renge livö ne guli rrum nir. Kapkulu metmet pirres pirpe numet, ko kapirpe kele wumet nga sete orongwos puloli pisij. <sup>17</sup> Kapmetmet re jinibb nir. Para-tekai kami van re nospen se numal ser nir, ko renge naim gortien ser, para-revji kami tevi nai <sup>18</sup> ko para-tekai kele kami van re no numal nga marlelep sopor kele, suri kamivi jinibb suk. Ko kapa-wera tweni nale suk tevi nir ko tevi jinibb ne vare nir.

<sup>19</sup> "Ko daron nga para-tekai kami, sete kaprorrmi pelake sev nga kapwerai ko

pirpese nga kapwerai. Suri Nem̄in On pia-lai nale tevi kami nga kapa-werai rengo mete nial mawos nen. <sup>20</sup> Suri sete kami kis kaprij, ko Nem̄in On se Tata se kami nga pia-rij rengo jingo kami.

<sup>21</sup> “Ko tuwan pia-te kai tasin pia-lingi re mijen, ko tata kele pia-loli pirpok tevi natun; ko natur kele nir para-tur imare, para-teka tata ser ko tasu ser para-lingi van re mijen. <sup>22</sup> Ko jinibb jile para-ungasi kami suri kamivi jinibb suk. Ko si nga pia-tur p̄iterter pijpari bongsin, Atua pia-la mauren tevi.

<sup>23</sup> “Ko poro nga parloli esij tevi kami rengo ngaim san, ko kapwolu van re ngaim nga surie. Nuwretun nuwrai tevi kami, setete kapiel p̄etp̄eti re ngaim ne Isrel nir, pijpari inu Jinibb Mawos bea-luwi vini. <sup>24</sup> Sete jinibb san elep asi ni nga mok-visviseni, ko sete jinibb ne majingen san elep asi numal sen. <sup>25</sup> Jinibb san purnge p̄irres kobbong nga pirpe numal sen. Ko poro san piveruse numal san puwra ‘Bielsepal’ (ngok evi nise numal se demij nir), ko pia-rij pia-sij kele wor tevi jinibb sen nir, suri jinibb sen nir arivi jinibb nga welili kobbong.

#### *Sete erres jinibb se Iesu pimtutu*

<sup>26</sup> “Ngok, sete kapmetutue nir. Suri nanu jijle nga m̄itiwtawi ore, para-raji puto limjer; ko nanu jijle nga muto teptepi, para-rongwose kele e. <sup>27</sup> Sev nga mowrai silveni tevi kami, ko kapa-werai limjer; ko sev nga mowra rengo boro kami, kapkail van mare, kapwerai tevi jinibb nir.

<sup>28</sup> “Ko sete kapmetutue nir nga marok-revji nibe jinibb, ko sete arongwose parevji nem̄ir. Kapmetutu wore Atua kobbong, suri ni orongwose pirevji kortoni niben ko nem̄in rengo lat ne norongen nga m̄isij.

<sup>29</sup> “Arok-wulwule num̄on nga wowar-reng nir nowlir ean ngatan temijpal. Ko sete nir san pivitan aseni ngatan poro nga Tata se kami sete pimarong. <sup>30</sup> Ko kami, kamlelep lingi nir wor ji Tata se kami. Erpe kami kamrorrmi rao batu kami evi nanu nga welili kobbong; ko suri kamlelep p̄elak ji Tata se kami, ni orongwose jijle rao batu kami nir. <sup>31</sup> Ngok, sete kapmetutu. Kamlelep temijpal wor asi num̄on nga wowar-reng ngok nir, ko Tata se kami pimmetete kami kele wor.

#### *Jinibb nga muwra tweni nga ni evi se Iesu*

<sup>32</sup> “Si nga puwrowrai inu rengo no jinibb nir, inu kele bea-werwerai ni rengo no Tata suk nga m̄ilik re melrin. <sup>33</sup> Ko si nga pivilvil ore inu rengo no jinibb nir, inu kele bea-vilvil ore ni rengo no Tata suk nga m̄ilik re melrin.

#### *Iesu ololi jinibb nir arwirr sarrsarr*

<sup>34</sup> “Sete kaprorrmi nga nuvini tweni bokoni demat vini iel ngatan. Sete nuvini tweni bokoni demat, ko nuvini tweni βeti wukari jinibb nir, pivi meling p̄ieru e. <sup>35</sup> Ko nuvini tweni bololi jinibb p̄itre tata sen, ko nesenwarreng p̄itre tasu sen, ko nesevinli p̄itre p̄ilen lekte. <sup>36</sup> Ko devje nuval se jinibb nir parpelari re nir lulweni kobbong niaken.

#### *Jinibb se Iesu nir parloli ko wor Iesu puwomu rengo mauren ser*

<sup>37</sup> “Ko poro jinibb san pimrreni tata sen rreknga tasu sen womu re inu, ko sete erres re pivi jinibb suk. Ko ni nga mimrreni natun norman rreknga nesevin womu re inu, ko sete erres kele re pivi jinibb suk. <sup>38</sup> Ko si nga sete muwosi nai pelaot sen pivijuri inu, ko sete erres re pivi jinibb suk. <sup>39</sup> Si nga putor totoni mauren sen p̄iterter iel ngatan, mian ko pia-tor jabble; ko si nga pimaronge mauren sen suri m̄imajing suk, ko mian ko pia-tor sweri mauren nga m̄irres.

#### *Atua pia-la nowli jinibb mawos*

<sup>40</sup> “Ko si nga pimarong kami kapan ji ni, ko erpe emarong kele inu ban ji ni. Ko ni nga pimarong ban ji ni, erpe emarong kele nga Tata suk nga mukoni inu pian ji ni. <sup>41</sup> Ko si nga pimarong nga propet san pian ji ni suri evi propet, ni kele pia-lai nowli propet ji Atua. Ko si nga pimarong nga jinibb nga m̄irres san pian ji ni suri evi jinibb nga m̄irres, ni kele pia-lai nowli jinibb nga m̄irres san ji Atua. <sup>42</sup> Ko si nga p̄ilai biles nuwi kobbong nga mimemrriani san tevi jinibb suk nga welili ngel san nga pimni, suri evi jinibb suk, erpe ololi nanu nga welili kobbong. Ko nuwretun nuwrai tevi kami, m̄iernen pia-lai nowlin nen ko wor ji Atua.”

## 11

#### *Jinibb se Jon Baptaes arini arlesi Iesu*

<sup>1</sup> Iesu evinvini ore nga muwer sesesre jinibb sen esngav̄ol dromon eru iok. Ko evel rujruj sopen kele vini re ngaim sopor nga marto rrale ie, nga pivisviseni ko p̄iwerwer rer.

<sup>2</sup> Renge daron nen, Jon Baptaes elik rengo naim ne nekaien, ko ornge majingen se Kristo nga mulolir. Ko okoni jinibb sen sopor van ji Iesu. <sup>3</sup> Ko arsusi tevi, “Erpese? Nik kuvi ni nga kem m̄ieri Isrel nir namok-teravi, rreknga ejki, nabtiriv m̄inj malum?” <sup>4</sup> Ko Iesu erij weli tevi nir, owra “Kapan ji Jon, ko kapa-werai tevi ni nanu nga m̄irres nga kamlesi ko kamrunge, pirpel: <sup>5</sup> ‘Metrorr arkuluku erres luwi, ko naroj nir arivel erres, ko

jinibb nga marmesie mesien nga niber m̄in̄femaul arwokwok luwi, ko borwon nir arongrong luwi, ko mijen nir armaur luwi, ko arwerwer nale nga m̄irres tevi Beres nir. <sup>6</sup> Ko neiren re ni nga sete m̄ilesi nanu san renge inu nga puloli ni purnge p̄isij rengen.”

*Iesu os̄pe suri Jon Baptaes*

<sup>7</sup> Ko daron nga nir marivel e vajin, ko Iesu etipatun nga puwrai tevi delung nir suri Jon, owra “Sev ko kamiel tweni van kaplesi re lolo merwer bonevis? Kamiel tweni kaplesi jinibb san nga mirpe mavir nga ling mok-uw̄i sarrsarre? Ejki. <sup>8</sup> Ko suri sev kamiel? Kaman tweni kamlesi jinibb san nga muri sunsun nga mimau m̄irres? Ejki, nir nga maruri sunsun nga mirpok arlik re naim se numal nga marlelep nir. <sup>9</sup> Ko suri sev kamiel? Kaman tweni kamlesi propet san? Nuwrai tevi kami, ewretun, ni evi propet, ko elep kele wor asi propet nir. <sup>10</sup> Ni ngel ko tuwi aruli suri renge Naul On, erpel: ‘Kapmurrong, bokoni jinibb suk san nga puwowomu re Mesaea, ko puloli sel se ni pimetet.’ <sup>11</sup> Nuwretun nuwrai tevi kami, renge nir p̄etp̄eti nga mariak iel ngatan, sete san erpe Jon Baptaes. Ni elep wor asi nir. Ko renge nir nga paran re batun vanu ne melrin, nir p̄etp̄eti arlelep asi wor Jon.

<sup>12</sup> “Mitipatun renge daron nga Jon Baptaes mok-werwer e evini mijpari lelingen, ko jinibb ne balpalen nir arpalpal tere batun vanu ne melrin, ko arwera parpalpal ore jinibb nir sete paran rengen. <sup>13</sup> Nale se propet nir, ko nale neseseiren nga maruli tuwi pa, arsupe wowomue ko pa osuw, mijparimian ko Jon mia-pelari. <sup>14</sup> Ko nanu nga bowrai rreknga p̄iterter nga parosuri le, ko Jon le evi Elaaja nga nir marsupe wowomue nga pia-luwi vini. <sup>15</sup> Isi nga boron otoa, purnge re nolo boron!

<sup>16</sup> “Ko bowrai rrongrongvi dul nga lelingen ngel aripese? Arirpe bipiwarreng nga marlik renga mesa nga m̄irres sopen, ko markikail marververuse seler nir parini jir partetnij. <sup>17</sup> Ko arwera ‘Namuwi nabbu, ko kammusus kapsew e; namla nubo nga martaur e, ko kammusus kaptng. Kammusus kaptetnij detnijen ne neiren, ko detnijen ne dauren.’ <sup>18</sup> Ko erpok kele, dul nga lelingen ngel arungasi murre Jon ko murre inu jinibb Mawos kele. Suri Jon mivini, ko sete ean elep, ko sete emni norro ejki, suri ok-lot tetajer. Ko dul ngel arlesi esij, ko arwera ‘Demij san esisilvi.’ <sup>19</sup> Ko inu Jinibb Mawos nuvini nomokaan ko nomok-mini norro. Ko dul ngel arlesi esij kele, ko arwera ‘Kaplesi, leorlep, ko lemni kis norro! Ni evi sele jinibb nga marok-lai nevöt ne takis, ko jinibb

nga marsij nir.” Ko Iesu owrai tevir, “Ko norongwosien sete eplari re sel sansan, eplari wor re sel elep ko. Ko komru Jon, komru kes nomor-vijuri.”

*Iesu otortori jinibb nga sete marosuri ni*

<sup>20</sup> Ko vitunen Iesu etipatun ko erij terter tevi nir nga marlik renga ngaim sopor suri nelesien jijle nga muloli re nir marlesi, ko sete nolor arlululwi ren. <sup>21</sup> Ko owra “Wi, kami m̄eri Korasin! Wi, kami m̄eri Betsaeta! Kami nga kamok-ungasi jinibb ne vare nir, erpe m̄eri Taea ko m̄eri Saeton nir. Ko poro nga san puloli majingen nga marinijnij nawone ngel nir nga mololi ji kami renga Taea ko Saeton, ko nolor pulululwi pa tuwi nen renga nololien ser, ko paruri sunsun tera nga marmerrmerris nir, ko parlik renga niavi nabb parp̄palose, parviseni nga arorrmi nanu nga marsij nga marloli sarrsarre nir. <sup>22</sup> Ko nuwrai tevi kami, pia-sij wor renga kami pia-asi nir m̄eri Taea ko Saeton renga nabong nga Atua pia-wera suri lat nga puto suri tevi jinibb nir, suri nolo kami sete olululwi. <sup>23</sup> Ko kami, m̄eri Kapaneam, kamok-rorrmi nga kapa-van mare re melrin, a? Ejki, ko kapa-van ngatan jer re lat ne mijen. Poro nga san puloli majingen nga marlelep ngel nir nga mololi ji kami renga Sotom tuwi, ko nolor pulululwi, ko Atua sete pusli ngaim ser, puto p̄irres pijpari lelingenok. <sup>24</sup> Ko nuwrai tevi kami, pia-sij wor renga kami pia-asi nir m̄eri Sotom renga ngatan nga Atua pia-wera suri lat nga puto suri tevi jinibb nir, suri nolo kami sete olululwi.”

*Iesu owra erres wor tevi Tata sen*

<sup>25</sup> Ko renga daron ngok, ko Iesu owra “Nuwra erres wor tevi nik, Tata. Kuvi Numal ne melrin ko ne ngatan. Ko kusilveni nanu ngel nir suri batun vanu ne melrin renga nir nga marwera ‘Norongwosien se kem otoa, ko namrongrongwos,’ ko kuviseni tevi nir nga nolor maran ngatan mirpe bipiwarreng. <sup>26</sup> Erpok, emawos re nik, Tata, nelesien som.

<sup>27</sup> “Nanu jijle Tata suk elair pa tevi inu. Ko sete jinibb san orongwose inu Natu Atua, Tata suk kobbong. Ko sete san orongwose Tata suk kele, inu kobbong Natun nusan, ko si nga memrreni kele beviseni Tata suk tevi ni.

*Kapini kaplai mosien ji inu*

<sup>28</sup> “Kapini ji inu, kami nga kamp̄elak milep ko kamtetaur milep, ko inu bealai mosien tevi kami. <sup>29</sup> Ko kapwosi nai soloslo suk re birpari kami, ko kapivi jinibb ne majingen suk, ko kapmeteni re inu. Suri inu numalum, ko nolok ean ngatan temijpal, ko kapa-lesi mosien re



neni kami. <sup>30</sup> Suri nai soloslo suk sete majingen nen orrow, ko detauren suk nga bea-lai tevi kami kapsoloi esisarow kobbong."

## 12

*Jinibb se Iesu nir arsesri tweni wene wit re nabong ne mosien*

<sup>1</sup> Renge daron nen, renge nabong ne Sapat san, ko Iesu ko jinibb sen nir arivel rruungi orsel ne wit

san. Ko jinibb sen nir, numer ajir, ko artipatun arsesri sursele wene wit nir, ko arurroi. <sup>2</sup> Ko daron nga Parasi marlesi, ko arlesi esij, suri evi nabong ne Sapat. Ko arwerai tevi Iesu: "E, kuplesi, jinibb som nir artor otvi neseseien ne nabong ne Sapat!"

<sup>3</sup> Ko ni owrai tevi Parasi nir, "Nurrorrmi sete kammeteni suri nanu nga Numal Devet muloi nabong san tuwi, daron nga numer miaji ni ko jinibb sen nir. <sup>4</sup> Ko ean loloi se Atua ko elai niv nga jinibb ne sulsulen marlai pa tevi Atua musuw, ko ni ko jinibb sen nir nga marpitevi ni arurroi. Ngok nale neseseien ewer orer nga sete parurroi, jinibb ne sulsulen kis kobbong parurroi. Ko nospen nen ejkie ji Atua. <sup>5</sup> Ko rreknga sete kammeteni kele renge nale neseseien nga renge nabong ne Sapat nir, ko jinibb ne sulsulen nir ne Naim On se Atua arok-tor ototvi neseseien ne nabong ne Sapat daron nga marmajing majingen ser, ko nospen nen ejkie ji Atua. Kammeteni ko pa, ko kamrelenge. <sup>6</sup> Ko nuwrai tevi kami, inu ngel, nulep asi Naim On. <sup>7</sup> Ko poro nga kaprongwose mining ne nale ngel nga muto kele re Naul On, 'Atua owra sete kaprorrmi sulsulen ko nanu nga maripok nir, ko kaprorrmi suri jinibb,' ko sete kapsupe suri nir ngok nga nospen ser mijkie. <sup>8</sup> Ko inu Jinibb Mawos nuvi numal ne Sapat."

*Iesu ololi nevre jinibb san erres luwi kele*

<sup>9</sup> Ko Iesu evel rujruj kele sopen, ko ean re naim gortien ser san. <sup>10</sup> Ko jinibb san nga nevre mimij elik iok. Ko Parasi nir armerreni parloli Iesu puloli nanu san nga nospen nen putoe. Ko arsusai tevi, arwera "Erpese? Evi nanu nga mirres nga parloli jinibb pirres luwi re nabong ne Sapat, rreknga ejki?" <sup>11</sup> Ko ni owrai lweni tevir, "Poro nga kami san sipsip sen san otoa, ko sipsip nen pivitan re bulwil san re nabong ne Sapat, ko ni sete mia-van miarrrul ren ko pirvei tweni, ko pilngi kurtweni kobbong, puto iok? Ejki, pian ko wor, pirvei tweni. <sup>12</sup> Ko jinibb elep asi wor ean mare re sipsip. Ngok, erres ko pa nga parloli pirres re nabong ne Sapat." <sup>13</sup> Vitunen, ko ni owrai tevi jinibb nga

nevre mimij, "Kupete nevre." Ko ni ete nevre emetet, ko nevre erres luwi erpe nevre devjen. <sup>14</sup> Ko Parasi nir arlolarsi, ko arivare ko armurri suri sel nga parevji pini Iesu ren.

*Iesu evi jinibb ne majingen se Atua*

<sup>15</sup> Iesu orongwose norrorrmien ser, ko evel lingi ie. Ko delung arvijuri ni, ko ni ololi nir jikle nga marmesi arres luwi. <sup>16</sup> "Ko ni ewer ore nir nga nir sete parsupu ni. <sup>17</sup> Ngok eplari osorsan tevi nale san se Atua nga propet Aesea muwrai tuwi: <sup>18</sup> "Merel evi jinibb ne majingen suk nga motobbobbue ko nga memrreni, ko nurnge erres elep suri ni. Bea-loli Nemik pia-silvi ni, ko ni pia-van pia-wer tweni neseseien suk nga mimawos tevi meri vare nir. <sup>19</sup> Sete orongwos pilat, ko sete orongwos pikail vijajeng pelak; ko sete san orongwos purnge drrelan re sel nga marlelep nir nga nir elep marivel asasi ren. <sup>20</sup> Ni pivi jinibb malum tevi nir nga marmeljakov ko tevinir nga derteren ser mijkie. Ko ni pok-loli pipok pijpari daron nga ni pia-loli jile pa neseseien nga mimawos nga pia-asi ko pia-to pitertter jer. <sup>21</sup> Ko jinibb ne vare nir parlingi nolor pitertter re ni."

*Parasi nir arwera Iesu ela derteren sen ji Demij*

<sup>22</sup> Ko vitunen arpitevi jinibb san nga demij misilvi ko mivi metrroir ko nabbut vini ji Iesu. Ko ni ololi erres luwi, ko erij vajin ko okluklu. <sup>23</sup> Ko delung nir bbosa elair e, ko arwera "A, rreknga ni evi metka mawos se Numal Devet nga rramok-teravi!"

<sup>24</sup> Ko Parasi nir daron nga marunge, arwera "Merel elai derteren nga pok-oloji demij e ji Bielsepal kobbong, numal se demij nir." <sup>25</sup> Ko Iesu orongwose norrorrmien ser, ko owra tevir: "Poro vanu pisan jinibb nen nir parteri wukari meling nen pieru e, ko vanu nen pivitan pisij. Ko poro nga ngaim pisan rreknga niaken pisan jinibb nen nir parteri wukari devjen pieru e, ko ngaim nen rreknga niaken nen setete orongwos porlik pirres, porvitan ko. <sup>26</sup> Ko poro nga Demij pok-oloji demij sen nir, ko ololi meling eru e, ko ortertere lweni nuru, ko batun vanu sen pirres pipse? Pivitan ko. Ngok kamsarr nga kamwerai inu nulai derteren suk ji Bielsepal, numal se demij nir. <sup>27</sup> Ko poro nga pivi weretunen nga inu nomok-lai derteren suk nga boji tweni demij e nir ji Bielsepal, ko pipse kele re jinibb se kami nir? Suri nir kele arok-oloji demij nir. Ko arok-lai derteren ser ngabe ko? Erres nir parlesi suri nale se kami nga kamwerair ngok. <sup>28</sup> Ko poro nga belai derteren suk nga boji tweni demij e

nir ji Nem̄in On se Atua, ngok batun vanu se Atua eplari le pa ji kami. Kaprroirmi p̄irres suri nanu ngok. <sup>29</sup> Ko erpok kele, sete jinibb san orongwos pian nawon lolo naim se jinibb nga m̄iterter san ko p̄ila nijor sen nir. Ejki, pian puwomu ko p̄isre totoni m̄nernen, ko vitunen vajin pia-lai p̄etp̄eti nijor sen jile nir. Ko m̄nernen erpe Demij, nga Nem̄in On esre totoni pa osuw. <sup>30</sup> Ko poro san sete p̄imajing tevi inu, erpe etre inu ko; ko poro san sete p̄iser kortoni tevi inu, ngok erpe ewirrwir sisamis nir. <sup>31</sup> Niko nuwrai tevi kami, nololien jile nir ko nale nga m̄isij jile nir, Atua orongwose p̄itlasi tweni reнге jinibb nir. Ko nale nga marsopsope ma Nem̄in On e, Atua sete orongwose p̄itlasi tweni rragrage reнге jinibb. <sup>32</sup> Ko poro san p̄irij p̄isij ko pusopsope inu Jinibb Mawos, ko Atua orongwose p̄itlasi tweni rengen. Ko poro san p̄irij p̄isij ko pusopsope Nem̄in On, ko Atua sete orongwose p̄itlasi tweni rengen lelingen ngel, ko tuwi ngok vini. Ngok kapmetmet nga sete kapwera i nga inu nula derteren suk ji Demij.

*Kapmeteni viringsi duru nai reнге we-nen nga miplari ren*

<sup>33</sup> "Poro nai san p̄irres, ko wenen kele p̄irres. Ko poro nai san p̄isij, ko wenen kele p̄isij. Suri nai jijle arlesi wose reнге wenen. <sup>34</sup> Kamivi jinibb nga kamsij, kamivi metka ne numet. Kapwera nanu nga parres sapon p̄irpese? Suri, sev nga muwun saut re nolor, niko jingor marwera tweni. <sup>35</sup> Jinibb nga m̄irres okwera tweni nanu nga m̄irres kobbong nga muto reнге nolon; ko jinibb nga m̄isij okwera tweni nanu nga m̄isij kobbong nga muto reнге nolon. <sup>36</sup> Nuwrai tevi kami, bejbe nale jijle nga jinibb sete murrormi muwomue, ko muwra tweni, Atua pia-lesi suri nir jijle reнге nabong nga puwra suri lat nga puto suri tevi jinibb nir. <sup>37</sup> Renge rijen som ko nir, Atua pia-wera i ko nik kurses, rrenga kusij."

*Jinibb nga marlelep sopor arwera parlesi nelesien san*

<sup>38</sup> Vitunen ko jinibb nevisvisenien ne nale nesereien sopor ko Parasi sopor arkerkerasi Iesu, ko arsusi tevi, arwera "Jinibb nevisvisenien, nammerreni kupviseni nelesien san tevi kem, nablesi. Ko ngok nabrongwose nga weretunen nik kuvel ji Atua vini." <sup>39</sup> Ko ni owra lweni tevir, "Kamivi dul nga m̄isij, kamok-loli esij tevi Atua erpe nesevin san nga mok-loli m̄isij tevi diwen sen. Erpese kammerreni beviseni nelesien san tevi kami kaplesi? Kapa-lesi kobbong nelesien p̄isan, nga pusorsan tevi nelesien se propet Jona nga miplari tuwi. <sup>40</sup> Erpe Jona elik nutrin

itul ko nutpong itul reнге depai nai nga milep nen, p̄irpok ko inu Jinibb Mawos bea-lik nutrin p̄itul ko nutpong p̄itul reнге lolo dan. <sup>41</sup> Ko reнге nabong nga Atua pia-wera suri lat nga puto suri tevi jinibb nir; jinibb nir ne Nineve para-tur imare ko para-supe suri kami. Suri nir nolor arlululwi daron nga Jona m̄iwerwer tuwi. Ko kaplesi inu ngel, nulep asasi Jona, ko kami sete nolo kami olululwi daron nga inu m̄iwerwer tevi kami. <sup>42</sup> Ko reнге nabong nga Atua pia-wera suri lat nga puto suri tevi jinibb nir; nesevin nga tuwi nga mivi kwin se nir ne Saot pia-tur imare ko pia-supe suri kami. Suri ni evel ngasu pelak reнге bongsi vanu vini, owra purongwose norongwosien se Numal Solomon. Ko kaplesi inu ngel, nulep asasi Solomon. Ko suri sev kami sete kamini ji inu?

*Nem̄in nga m̄isij nga m̄ivel olwi kele vini*

<sup>43</sup> "Moro nga nem̄in nga m̄isij san nga m̄isilvi jinibb san m̄ivel lingi ni, ko evel rurrngi lat nga nuwi mijki e, epejpej lat nga p̄ilik p̄irres ren; ko sete otor sweri san. <sup>44</sup> Mian ko owra 'O, bolwi kele van re naim suk, lat nga mevel lingi vini.' Ko daron nga mijpari, elesi naim sen obbubbi, ko elesi aruruk vaseni pae osuw, ko arjuroi erres. <sup>45</sup> Elesi jile naim sen musuw, ko olwi van ko elesi nem̄in ebud kele nga marsij asie ni, ko nir jijle aran loloim ko arlik iok. Ko morok vajin nga nem̄in nga marsij marsilvi elik esij easi re nga m̄ilik womu. Ko p̄irpok kele ko tevi kami nga kamivi dul nga kamsij."

*Iesu tasu sen ko tasin nir arini parlesi ni*

<sup>46</sup> Daron nga m̄irij malum mirpok tevi delung nir, ko tasu sen ko tasin nir arini. Ko artur vare ko argoni tevi jinibb sen nir nga parij tevi Iesu. <sup>47</sup> Ko san owrai tevi Iesu, "Tasu som ko tasim nir nir le vare, ko argoni nik nga parij tevi nik." <sup>48</sup> Ko Iesu owra lweni tevi ni nga muwrai tevi ni, "Isi evi tasu suk, ko isi arivi tasik?" <sup>49</sup> Ko ni esareni nevren mawos jinibb sen nir ko owra "Nir ngel le arivi tasu suk ko tasik nir. <sup>50</sup> Suri si nga puloli marongen se Tata suk nga m̄ilik re melrin mare, ni ko evi pa tasik ko jojok ko tasu suk osuw."

## 13

*Nale rrongrongvi ne jinibb nga mok-jijreni jelangin*

<sup>1</sup> Re nabong mawos nen, Iesu eivare lingi naim nen, ean elik re devje nuwito ne Galili. <sup>2</sup> Elik, ko delung nga milep sopor arini arkorti rrale ni. Ko suri nir elep pelak, ni otur imare ko esa van reнге drrav

san ko esakel rengen. Ko delung jile artur jer ngaut.

<sup>3</sup> Ko ni ospe suri nale rrongrrongvi elep tevi nir. Owra “Kapmurrong. Jinibb san nga mok-jijreni jelangin ean tweni pijjireni jelangin orsel. <sup>4</sup> Ko daron nga mok-jijreni e, ko ejjireni aseni sapon, ko jelangin sopor arvitan re devje sel e. Ko numon nir arini artasi twenir. <sup>5</sup> Ko sopor arvitan van re dan ne nevot, lat nga sete dan mintul e. Ko moro maretiv, arpelari ngavilvilsen imare, suri sete arto ngatan pelak re nolo dan. <sup>6</sup> Ko daron nga nial misner, ko armeli. <sup>7</sup> Ko suri lafer sete ever, ko armij. <sup>8</sup> Ko sopor arvitan van re lolo moku, ko moku emra tevtev nir, ko emelngi orer. <sup>9</sup> Ko sopor ma sete arwij lingi dan nga mirres nen, armatur jer rengen dan nga mirres nen, ko armaur erres, ko arwen. Ko sopor wener ongut (100), ko sopor wener ngavol ouwon (60), ko sopor wener ngavol itul (30). <sup>10</sup> Isi nga boron otoa, purnge re nolo boron!”

*Iesu owra tweni suri sev ni mokrij re nale rrongrrongvi*

<sup>10</sup> Ko Iesu jinibb sen arini ji ni ko arsusi tevi: “Suri sev komok-supe suri nale rrongrrongvi tevi nir?” <sup>11</sup> Ko ni owra lweni tevir, owra “Atua elai tevi kami nga kaprongwose nanu nga marto teptepi rengen batun vanu ne melrin, ko sete elai tevi nir nga ngok nga parongwose. <sup>12</sup> Si nga norongwosien sen mutoe, Atua pia-lai pilep kele tevi ni. Ko si nga norongwosien sen muwelili jer, Atua pia-la tweni jin. <sup>13</sup> Nomok-supe suri nale rrongrrongvi tevi nir, suri arok-lesi ko sete arok-lesi wose, ko arok-runge ko sete arok-rongwos kele e. <sup>14</sup> Renge nir ngel eplari erpe nale san se Atua nga propet Aesea ospe wowomue, owra ‘Kapa-runge pilep, ko setete kama-rongwose; ko kapa-lesi pilep, ko setete kama-lesi wose. <sup>15</sup> Suri jinibb ngel nir batur eterter ko boror arwonwon ko meter arpil, ko arwera “Rratlesi tevi meterr, ko rratrunge tevi bororr, ko rratrongwose re nolorr, ko nolorr tulululwi, ko Atua tia-loli kerr rratres luwi!”

<sup>16</sup> “Ko kami ma, kamluk erres, suri mete kami arok-lesi, ko boro kami arok-runge. <sup>17</sup> Nuwretun nuwrai tevi kami, propet elep ko jinibb nga marres elep ne tuwi armerreni elep parlesi nanu nga kamlesir ngel nir, ko sete arlesir; ko arwera elep parunge nanu nga kami kamrunger ngel nir, ko sete arunger.

<sup>18</sup> “Kaprunge kele ta jilweren rrongrrongvi suk suri jinibb nga mok-jijreni jelangin, bowra tweni vajin. <sup>19</sup> Poro jinibb san purnge nga marsupe suri batun vanu ne melrin ko sete purongwose nale nen,

Demij pivini ko piteseeni tweni nale nga mietiv rengen nolon. Ngok erpe pa jelangin nga marvitan re devje sel. <sup>20</sup> Ko jelangin nga marvitan rengen dan ne nevot, erpe pa jinibb san nga murnge nale, ko nilai ngavilvil, ko eir elep. <sup>21</sup> Ko lafen ejki malume, ko orongwos puto bbong beblen; ko daron nga nanu nga muterter mivini, rreknga poro nga jinibb sopor partur imare parloli pisij tevi ni suri nale nga muosuri, ko ni elngi kurtweni evesane. <sup>22</sup> Ko jelangin nga marvitan rengen lolo moku, erpe pa jinibb san nga murnge nale; ko suri orrorrmi pelake nanu ne iel ngatan nir, ko suri emrreni joron pilep, nanu ngok nir armelngi nale nga mimaur ren, ko arloli wenen ejkie. <sup>23</sup> Ko jelangin nga marvitan re dan nga mirres, erpe pa jinibb sopor nga marunge nale, ko marongwose, ko marlai wener. Ko wenen nir sapon ejpari ongut (100), ko nir sapon ngavol ouwon (60), ko nir sapon ngavol itul (30).”

*Nale rrongrrongvi ne mosmos nga misij nga mimaur korti tevi wit*

<sup>24</sup> Ko Iesu ela nale rrongrrongvi minij kele san tevi nir, owra “Renge batun vanu ne melrin, Atua puloli pusorsan tevi murrur jinibb ngel: Jinibb san ean ejjireni jelangin nga mirres ne wit re orsel sen. <sup>25</sup> Ejjireni jile osuw, ko daron nga jinibb marmatur e, ko ni devje nuval sen evini ko ejjireni jelangin nga misij oto tevi wit nen, ko evel. <sup>26</sup> Ko mian ko jelangin nen nir aretiv vajin, ko armaur, ko arwen. Ko arlesi wose vajin mosmos nga misij nen mutur tevir, suri wenen enije. <sup>27</sup> Ko jinibb ne majingen se mer nga orsel sen nir arini jin ko arwera tevi ni: ‘Numal, erpese? Kujjireni jelangin nga marres rengen orsel som, ko mosmos nga misij ngel evan erpese?’ <sup>28</sup> Ko ni orongwose ko owrai tevi nir, ‘Devje nuval ko ololi nanu ngel.’ Ko jinibb sen arwera kele tevi ni, ‘Ko kumarong kem naban nabrrangi twenir?’ <sup>29</sup> Ko ni owra ‘Ejki, pijki, daron nga poro kaprrangi mosmos nga misij e, takrrangi tweni wit nga mirres tuto tevir. <sup>30</sup> Kapllinglingir parmaur korti pijpari daron ne numos. Ko rengen daron ne numos ngok, bea-wera tevi nir nga partawer, “Kasper kortoni mosmos nga marsij puwomu, ko kasperer parivi bbobbti nga para-sulir. Ko kasperer wit nen pian rengen bepeim suk.”

*Nale rrongrrongvi ne jelangi nubek ko ne is*

<sup>31</sup> Ko ni ela nale rrongrrongvi minij kele san tevi nir, owra “Batun vanu ne melrin osorsan tevi jelangi nubek nga mivitan re nai san. <sup>32</sup> Jelangin nen ewelili jer lingi jelangin minij nir, ko daron nga mimaur, elep lingi nai nir. Ko numon ne mesa

nir arini arok-loli menu ner reнге rengsin nir.”<sup>D</sup>

<sup>33</sup> Ko ni ela nale rrongrrongvi m̄inij kele san tevi nir, owra “Batun vanu nemelrin osorsan tevi is nga nesevin m̄ilai m̄ilngi reнге besin nga milep san nga muwune plaoa, ko m̄ikiskisi. Ko setemun arlesi is nen, ko ololi niv jile epau.”

*Iesu ok-la nale rrongrrongvi kis tevi delung nir*

<sup>34</sup> Nanu ngel jile nir, Iesu os̄pe tevi delung nir reнге nale rrongrrongvien. Poro nale rrongrrongvi pijki, ko sete mia-supe nanu san tevi delung nir. <sup>35</sup> Ngok eplari osorsan tevi nale san se Atua nga propet san muwrai tuwi: “Bea-sa jin-gok, ko bea-lai nale rrongrrongvi, bea-werwera tweni nanu nga martepeti re iel ngatan m̄itipatun mivini mijpari lelin-genok.”

*Iesu owra tweni vajin nale rrongrrongvi ne m̄ösmös nga m̄isij lat nga muto suri*

<sup>36</sup> Vitunen ko Iesu evel lingi delung nir, ko evan loloim re naim. Ko jinibb sen nir arini ji ni ko arwera “Kupwera suri ta tevi kem nale rrongrrongvi ne m̄ösmös nga m̄isij reнге orsel ngok.” <sup>37</sup> Ko ni owra lweni tevir, owra “Jinibb nga m̄ijijreni jelangin nga m̄irres ngok erpe pa inu ko, Jinibb Mawos. <sup>38</sup> Orsel ngok erpe pa iel ngatan ko. Ko jelangin nga marres ngok arirpe pa jinibb nir ne batun vanu ne melrin ko, ko jelangin nga marsij ngok arirpe pa jinibb se Demij ko nir. <sup>39</sup> Ko devje nuval nga m̄ijijrenir erpe pa Demij ko. Ko numös ngok erpe pa iel ngatan ko bongsin nga pia-suw e ko pa, ko nir nga martawe ngok arirpe pa anglo ko nir. <sup>40</sup> Pusorsan tevi nga marser kortoni m̄ösmös nga marsij nir ko marsuli, pia-sorsan kele tevi iel ngatan bongsin nga pia-suw e. <sup>41</sup> Inu Jinibb Mawos bea-koni anglo suk nir, ko nir para-sere kortoni nir nga marok-loli jinibb parong tweni nale suk ko nir nga marok-loli nololien nga marsij reнге batun vanu suk. <sup>42</sup> Para-sere kortonir jile, ko para-wirrer van re nabb. Iok ngok jinibb para-ting ko para-runge p̄isij pilep. <sup>43</sup> Ko reнге daron nen jinibb nga marres nir pia-irpe nial, para-mor reнге batun vanu se Tata ser. Kaprunge reнге nolo boro kami!

*Nale rrongrrongvi ne nanu itul*

<sup>44</sup> “Batun vanu ne melrin osorsan tevi nijor nga m̄irres san nga muto teptepi reнге orsel, nga poro jinibb san putor sweri, ko p̄ir pilep ren, ko p̄isilveni kele.

**D** 13:32 Erpe iel, Matiu orrongrrongvi batun vanu se Atua erpe jelangi mastat, ko suri mastat ejki iel, namlingi nubek, nga puloli mining ne nale se Matiu piplari limjer.

Ko suri eir elep ren, ko pian puwluwule joron jikle nir, ko puwli tweni orsel ngok, nga nijor nen pivi sen ko vajin.

<sup>45</sup> “Ko erpel kele, batun vanu ne melrin osorsan tevi nevöt san nga marok-lai lolo bottrum. Ko jinibb san nga mokwuli nevöt ngok nir, <sup>46</sup> daron nga mutor sweri nevöt nga nowlin milep temijpal ngok san, ko olwi van owulwule joron jikle nir ko ela nevöt nen, ko owli tweni vajin nevöt ngok evi sen.

<sup>47</sup> “Ko erpel kele, batun vanu ne melrin osorsan tevi niva san nga marwirre reнге dis, ko nai jikle maron ren. <sup>48</sup> Ko daron nga niva nen puwun, parevei van ngaut e. Ko parlik ngatan, ko parla mesal nga marres parsongni van re narr; ko nga marsij nen, parwirr twenir. <sup>49</sup> Pia-irpok kele ko reнге daron ne iel ngatan bongsin. Anglo nir para-vini para-la tweni jinibb nga marsij re nir nga marres, <sup>50</sup> ko parwirrer van re nabb. Iok ngok jinibb para-ting ko para-runge p̄isij pilep.”

*Nale rrongrrongvi ne jinibb san nga m̄ilngi nanu nga mimerr ko nanu nga m̄itra*

<sup>51</sup> Iesu osusi tevir, “Kamrongwose nanu ngel nir?” Ko nir arwera lweni tevi: “O-o.” <sup>52</sup> Ko ni owrai kele tevir: “Ko jinibb nevisvisenien ne nale nesesreien san nga marok-visvisenie pa reнге murru batun vanu ne melrin erpe jinibb san nga murongwos p̄ila tweni nanu nga mimerr ko nanu nga m̄itra reнге narr sen. Suri jinibb nevisvisenien nen ne nale nesesreien orongwos pae suri nale se Atua ne tuwi ko ne lelingenok kele.”

<sup>53</sup> Daron nga Iesu musuw re nale rrongrrongvi ngel nir vajin, ko evel lingi ie, <sup>54</sup> ko olwi vajin vini re ngaim sen e. Ko evisiseni jinibb nir re naim gortien ser; ko jinibb nen nir bbösa elair e, ko arwera “E, m̄erel ela norongwosien ko derteren ngel ngabe?” <sup>55</sup> Ni ngel evi metusu lebbong san natun, ko tasu sen marveruse Merri, ko tasin nir Jemes, ko Josep, ko Saemon, ko Jutas. <sup>56</sup> Ko jojin le ngel nir marlik tevi kerr. Ko m̄erel ela nanu ngel nir ngabe ko?” <sup>57</sup> Ko arong karkare ni. Ko Iesu owrai tevir, “Propet san parosuri ko wor, sete mia-jiki; ko reнге nir nga re ngaim sen ko nir nga niaken sen, san pijki.” <sup>58</sup> Ko setemun ololi majingen elep iok, suri arong tweni nale sen.

## 14

*Mijen se Jon Baptaes*

<sup>1</sup> Renge daron nen, Erot natun san nga marveruse Erot Antipas, ornge nospen nga

marsuŕe Iesu e. <sup>2</sup> Ko owrai tevi jinibb sen nir, “Merel evi Jon Baptaes le. Ni emra renge mijen, niko derteren sen mutoe nga muloli majingen nga marinijnij nawone nir.” <sup>3-4</sup> Owrai erpok suri nanu san nga miplari seveling nga, erpel: Erot etka luwe Erotias, nesen se tuwan Pilip. Ko Jon owra tevi Erot, “Sete evi nesesreien nga mimawos nga nik kupteka luwe nesen se tuwam.” Daron nga muwrai mirpok, ko Erot orrul totkoni ni ko esre totkoni, ko elngi ni van re naim ne nekaien, suri Erotias sete emrreni Jon ŕirij pirpok. <sup>5</sup> Ko Erot owra pirevji pini Jon, ko emtutue delung nir, suri nir arwera ni evi propet san.

<sup>6</sup> Mian ko vitunen vajin, nir arloli nabong san suri sia se Erot ejpipŕet. Ko Erotias natun nesevin mŕelakel esew re no nir, ko Erot elesi erres. <sup>7</sup> Ko ololi rijrijen tevi, owra “Sev nga kupungoni, ko inu bealai ko tevim.” <sup>8</sup> Ko nesen mŕelakel nen erij nale se tasu sen, owra “Kuplai tevik iel batu Jon Baptaes renge narov san.” <sup>9</sup> Ko Erot ornge esij e; ko suri mŕirijrij pa ko nir nga marini maraan tevi marunge pa, ko ololi owra nale tevi jinibb sen nir nga parlai tevi nesen mŕelakel nen. <sup>10</sup> Ko okoni jinibb sen san pian renge naim ne nekaien ko ŕita otvi batu Jon Baptaes. <sup>11</sup> Mernen evan, ololi erpok, ko elngi batu Jon Baptaes re narov san. Ko esale tevi nesenwarreng, ko nesenwarreng esale elai tevi tasu sen. <sup>12</sup> Ko vitunen, Jon jinibb sen nir arini, arwosi Jon niben, ko arivel tevi van, artevni. Artevni jile Jon, ko vitunen aran arwerai tevi Iesu.

### *Iesu owngani delung nga milep*

<sup>13</sup> Ko daron nga Iesu murnge nanu ngel nir, esa re drrav ko evel lingi ie; owra pian re lolo merwer, ko ŕisan pilik sophon. Ko delung nir, daron nga marunge, ko arivel lingi ngaim ser nir, ko arvijuri, arivel re jeli nuwi. <sup>14</sup> Ko Iesu, daron nga mujubbul re drrav, elesi delung elep. Ko orrorrni nir elep, ko ololi nir nga marmesi arres luwi.

<sup>15</sup> Mian ko nat erivriv vini, ko jinibb sen arini jin, arwerai tevi ni, “Iel evi lolo merwer le, ko nat tupong mun. Kupkoni tweni lartul ngok nir parivel paran re ngaim nir parwuli nanen ser.” <sup>16</sup> Ko Iesu owra lweni tevir, “Nir sete mara-ivel. Kami ko kapla nanen tevir paraani.” <sup>17</sup> Ko nir arwera lweni tevi “Ai, kem namtori bbong niv elim le ko nai eru.” <sup>18</sup> Ko ni owra “Kaplair ta vini jik.” <sup>19</sup> Ko owrai tevi delung nir parlik ngatan re mŕsmŕs. Ko ni ela niv nga elim nga ko nai nga eru nga, ko oklu imare van re melrin owra erres tevi Atua rengen, musuw ko otpoi ko elai tevi jinibb sen nir; ko nir arlai tevi delung nir.

<sup>20</sup> Ko nir jijle arurroi, mian ko arup vajin. Ko jinibb sen nir arsere kortoni bebjen nga marjijpon nen nir van renge narr esngavŕl dromon eru arwun saute. <sup>21</sup> Ko nir nga marurroi ngok arever erpe nuvasngavŕl nuvalim (5000) norman kis, ko nesevin ko bipiwarreng kele sete arever.

### *Iesu evel mare re nuwi*

<sup>22</sup> Ko ngavilvil ololi jinibb sen nir arsa kele re drrav, parwowomu van re devje nuwi, parteravi ni nga ni pukoni tututweni delung nir parivel. <sup>23</sup> Daron nga mukoni tututweni delung nir marivel musuw, ni esan otongsa van re botwen nga pulot. Olot mian, ko nat opong vajin, ko ni esan malum iok. <sup>24</sup> Ko jinibb sen nir nga marla drrav aran vajin re liven mesa re nuwito. Ko daptap ne nuwito arus renge drrav, suri arwolu tere ling.

<sup>25</sup> Marwolu tere ling mirpok mian, ko nat otomori ŕisal ŕirin vajin, ko Iesu evel mare re nuwi vini pivini ji nir. <sup>26</sup> Ko jinibb sen nir arlesi ni mivel mare re nuwi ko armetutu, arwera “O, neŕin ko san!” Ko arkail mare suri armetutu. <sup>27</sup> Ko Iesu erij tevir evesane, owra “Nolo kami ŕirres, inu lebbong, sete kapmetutu.” <sup>28</sup> Daron nga ni muwrai mirpok ko Pita erij weli lweni ni, owra “Numal, poro weretunen evi nik, kupwerai tevi inu nga inu bevel mare re nuwi vinuk jim.” <sup>29</sup> Ko ni owra “Kupini.” Ko Pita orow jubbul re drrav, ko evel mare re nuwi pian ji Iesu. <sup>30</sup> Mivel mian, ko elesi ling eser eterter, ko emtutu vajin, ko etipatun purron. Ko ekail owra “Numal, kupla se inu!” <sup>31</sup> Ko Iesu esareni nevren ngavilvil ko orrul ren, ko owra tevi, “Nik nosurien som ewelili, ko erpese norrorrmien som eru e?” <sup>32</sup> Ko daron nga morini morsa re drrav, ko ling omol vajin. <sup>33</sup> Ko jinibb se Iesu nir nga renge drrav arlotoe ni ko arwera “Weretunen, nik kuvi Atua natun.”

### *Iesu ololi nir nga marmesi Genesaret arres luwi*

<sup>34</sup> Ko arwolu re drrav, arwolu toku renge devje nuwito renge ngaim san, nisen Genesaret. <sup>35</sup> Ko daron nga jinibb ne lat nen nir marlesi wose Iesu, arla nale van ji nir nga marlik rrale ie. Ko jinibb nen nir artekai jinibb nga marmesi vini ji ni, <sup>36</sup> ko arungoni tevi Iesu nga parjipari kobbong bongsi sunsun sen. Ko ni emarong, ko nir jijle nga marjipari arres luwi.

## 15

### *Parasi ko jinibb nevisvisenien artere Iesu suri sete evijuri sel mawos ser*

<sup>1</sup> Renge daron nen ko Parasi sopor ko jinibb nevisvisenien ne nale nesesreien

sopor arivel Jerusalem vini ji Iesu, ko arwerai tevi <sup>2</sup> “Erpese jinibb som nir martor otvi nale se Birterawarrang nir? Suri sete arjevavöl daron nga maraan e.” <sup>3</sup> Ko ni erij weli lweni nir owra “Erpese kami kele kamtor otvi nale neseseiren se Atua nga kamok-vijuri nale se Birterawarrang se kami nir?” <sup>4</sup> Suri Atua nale neseseiren sen owra ‘Kuprroormi lilane tata som ko tasu som,’ ko nale san kele erpel: ‘Mer nga m̄irij m̄isij tevi tata sen rreknga tasu sen sete orongwos pimaaur, kaprevji pini ko wor.’ <sup>5</sup> Ko kami ma kamwera ‘Isi nga pia-werai tevi tata sen rreknga tevi tasu sen: “Nulai pa merrenien tevi Atua, setemun inu mea-lai kele tevi nik.” <sup>6</sup> erij erres, ko sete mia-osuri mun tata sen ko tasu sen renga nanu ngok.’ Erpok nale se kami owra nale m̄inij re nale se Atua, nga setemun parvijuri. <sup>7</sup> Kamiel re sel eru! Aesea orrongvi ken̄kan̄e kami erres, daron nga muwra wowomue suri kami: <sup>8</sup> ‘Lartul ngel nir arosuri inu tevi nevlv jingor kobbong, ko nolor oto ngasue inu. <sup>9</sup> Arloto nawone inu, arvisvisieni nevisvisien nga mivi se jinibb bbong.’”

*Nanu nga marloli jinibb murrokitkit renga ne Atua*

<sup>10</sup> Ko Iesu everuse delung nir ko owrai tevir, “Kaprunge nanu ngel ko kaprongwose. <sup>11</sup> Sete nanu nga mian re nolo jinibb ololi ni orro (ngok evi norroormien se nir nga marok-jevavöl taji kobbong); ko ngel ko ma, nanu nga miplari re nolo jinibb ololi jinibb orro.”

<sup>12</sup> Ko vitunen jinibb sen nir arini jin, arwerai tevi ni: “Nik kurongwose nga Parasi nir marunge m̄isij e nanu nga kumwerai ngok?” <sup>13</sup> Ko ni erij weli lweni, owra “Nanu jijle nga Tata suk nga m̄ilik re melrin sete murwir, pia-rangi tweni ko. <sup>14</sup> Kaplinglingi nir parirpok. Arivi metrorr pa osuw, ko arwera parvisieni sel. Ko poro nga metrorr puwowomue metrorr renga sel, ko nuru kes pora-vitan van renga bbulwil.” <sup>15</sup> Ko Pita owrai tevi ni: “Kupwera suri nale rrongrongvi ngok ta tevi kem.” <sup>16</sup> Ko ni owra “Kami kele norongwosien se kami ejki malume? <sup>17</sup> Sete kamrongwose nga nanu jijle nga mian re nolon evan renga depain e, ko parta

lev tweni p̄iasi kobbong? <sup>18</sup> Ko nanu nga mivare re jingon eplari re nolon, ko ngok kobbong ololi jinibb orro. <sup>19</sup> Suri eplari re nolo jinibb ko, norroormien nga marsij, nga parevji pini jinibb suri, nga norman pian ji nesevin nga sete evi nesen sen, nga nesevin pian ji norman nga sete evi diwen sen, nga parvenae joro jinibb, nga parkerkeris re kot, nga parsopsopē

p̄isij Atua rreknga pari p̄isij tere jinibb. <sup>20</sup> Nanu ngel le nir arloli jinibb orro; ko nga paraan sete parjevavöl, sete ololi jinibb orro.”

*Iesu oji tweni demij re nesenwarrang san*

<sup>21</sup> Ko vitunen Iesu evel lingi ie, evel rujruj sopon evan morie Taea ko Saeton. <sup>22</sup> Ko daron nga mivel mori ie mirpok, ko nesevin ne Kenan san nga m̄ilik ie sopon ermmali ko ekail van jin, owra “Kuprroormi inu, numal, nik metka se Devet! Natuk nesenwarrang, demij arsisilvi ni esij elep.”

<sup>23</sup> Ko Iesu sete erij nale weli san tevi nesevin. Mian ko jinibb sen nir arini jin ko arungoni tevi ni: “Kupkoni tweni vinok, suri ekail vijajeng suri kerr.” <sup>24</sup> Ko ni erij weli lweni tevir, owra “Atua okoni inu nga ban ji m̄eri Isrel kis kobbong, nga marirpe sipsip nga marjijki, sete ban ji jinibb m̄inij nir. Ko vinok evi nesevin ne vare san.”

<sup>25</sup> Ko vinnen evini ejilv vitan ji Iesu ko owra “Wurru, numal, kupla se inu.” <sup>26</sup> Ko ni erij weli lweni tevi ni, owra “Sete erres nga parla nanen se bipiwarang nir ko parwirre tevi guli nir.” Ni erij erpok suri m̄eri Isrel nir arok-veruse jinibb ne vare nir arwera “guli” e nir. <sup>27</sup> Ko vin nga owra “Ewretun, numal, ko guli nir arok-urroi ko wor bebje nanen nga marvitvitan re numal ser tep sen.” <sup>28</sup> Daron nga murnge nale se nesevin ngok, ko Iesu owra lweni tevi: “O, nesevin, nosurien som elep temijpal. Puto pirpe nga nik kumarong.” Ko re mete nial mawos nen vinnen natun erres luwi.

*Iesu ololi jinibb elep nga marmesi arres luwi*

<sup>29</sup> Iesu evel lingi iok ko evini re nuwito ne Galili ko otutur sopon iok; mian ko otongsa van mare re botwen, ko elik ngatan iok. <sup>30</sup> Ko delung elep arini ji ni, arpitevi jinibb nga marmesi sopor, sopor belar rreknga nevrer arsi, sopor meter arrorr, sopor arivi naroj, sopor arivi nabbut, ko nga marmesi mesien lele kele nir; ko arlingir ngatan re belar Iesu. Ko Iesu ololi nir arres luwi. <sup>31</sup> Ko daron nga jinibb nir marlesi nabbut marij, ko nir nga belar ko nevrer marsij arres luwi, naroj marivel, ko metrorr markulu, bbösa elair e, ko arsurövi Atua se m̄eri Isrel nir.

*Iesu ela kele nanen tevi delung nir*

<sup>32</sup> Vitunen ko Iesu everus jinibb sen nir vini ji ni, ko owrai tevi nir, “Nurroormi lengleng delung ngel nir, suri arpitevik nabong itul le pa, ko nanu nga parurroi ejki. Ko numusus bokoni tweni nawon nir, suri numer ajir pa, ko tarmaob re sel.” <sup>33</sup> Ko jinibb sen nir arwerai tevi: “Rrapla

nanen ngabe ko, suri iel evi lolo merwer, ko delung elep pelak?" <sup>34</sup> Ko Iesu owrai tevir, "Kamtori niv evis?" Ko nir arwera "Ebut, ko nai wowarreg sopor."

<sup>35</sup> Ko ni owrai tevi delung nir parlik ngatan re dan. <sup>36</sup> Ko ni ela niv nga ebut nga ko nai nga nir, ko olot owra erres tevi Atua suri, ko otpoir ko elair tevi jinibb sen nir; ko jinibb sen nir artututwenir tevi delung nir. <sup>37</sup> Ko nir jikle arurroir, mian ko arup jile. Ko arsere lweni bebje nanen nir nga marjijpon nir van re narr ebut arwun saut. <sup>38</sup> Nir nga marurro niv ko nai nir evi nuvasngavöl vavij (4000) norman kis, ko sete areve nesevin ko nanwarreg nir.

<sup>39</sup> Ko Iesu okoni tweni delung nir arivel; ko ni esa re drav, ko evan morie ngaim san nisen Makatan.

## 16

<sup>1</sup> Ko Parasi sopor ko Satusi sopor arini. Arwera parrowrrowe Iesu, armerreni ni puloli nelesien san rege derteren ne melrin tevi nir parlesi. <sup>2</sup> Ko ni erij weli lweni tevi nir owra "Daron nga nat mirivriv, ko kami kamok-wera 'Nat pïrres ko, suri rramlesi nabor arsongong.'" <sup>3</sup> Ko daron nga nial pimraej, ko kami kapok-wera 'Lelingen naus puto tevi ling, suri rramlesi nabor arsongong ko arnotmote.' Erpese kamlesi wose nabor nir ko kamrongwose nat nga piprese nga piplari suri, ko kami sete kamrongwose nabong se inu nga meplari ren? <sup>4</sup> Kamivi dul nga nïisij, kamok-loli esij tevi Atua erpe nesevin san nga mok-loli nïisij tevi diwen sen! Erpese kammerreni beviseni nelesien san tevi kami kaplesi? Kapa-lesi kobbong nelesien pisan, nga pusersan tevi nelesien se propet Jona nga miplari tuwi." Ko daron nga Iesu mïrij jikle mirpok tevir, ko evel lingir.

*Iesu erij tevi jinibb sen nir suri nosurien ser ewelili*

<sup>5</sup> Ko Iesu evini ji jinibb sen nen nir, ko arsa re drav, arwolu van re devje nuwito e. Ko jinibb sen nir arlesi vajin nga sete arla niv sopor partori suri. <sup>6</sup> Ko Iesu owrai tevir, "Kapmetmet pïrres rege is se Parasi nir ko Satusi nir." <sup>7</sup> Ko nir arwerwera lweni tevir, arwera "O, suri sete rramtori niv, niko mïrij mirpok." <sup>8</sup> Ko Iesu orongwose norrorrmien ser ko owrai tevir: "O, kami nga nosurien ewelili, suri sev kami kamwerweraie kami mirpok suri sete kamtori niv? <sup>9</sup> Setewor kamrongwose? Rreknga setemun kamrorrmi suri niv nga elim, nga nir evi nuvasngavöl valim (5000) marurroir ko marup e, ko narr evis kele nga kamsere marwun? <sup>10</sup> Rreknga niv nga ebut nga nir evi nuvasngavöl vavij (4000) marurroir ko

marup e, ko narr evis kele nga kamsere marwun? <sup>11</sup> Erpese sete kamrongwose nga inu sete nuspe suri niv? Kapmetmet rege is se Parasi nir ko Satusi nir." <sup>12</sup> Ko nir arongwos vajine nga ni sete owrai nga nir parmetmet rege is ne niv, ko rege nevisvisenien nga nïisij se Parasi nir ko Satusi nir.

*Pita owra tweni nga Iesu evi Mesaea*

<sup>13</sup> Ko nir artutur kele sopon. Ko daron nga marini mori re Sisaria Pilipae, ko ni osusi tevi jinibb sen nir, owra "Jinibb nir arwera inu Jinibb Mawos nuvi isi?" <sup>14</sup> Ko nir arwera "Sopor arwera nik kuvi Jon Baptaes, sopor arwera nik kuvi Elaeja, ko nir sopon kele arwera Jeremaea, rreknga propet san ne tuwi." <sup>15</sup> Ko ni owra tevir, "Ko kami, kamwera inu nuvi isi?" <sup>16</sup> Ko Saemon Pita erij weli lweni owra "Nik kuvi Mesaea, Atua nga mimaur natun." <sup>17</sup> Ko Iesu erij weli lweni owrai tevi ni: "Nik kulik erres ko pa, Saemon natu Jon, suri sete jinibb san ololi kurongwose nanu ngel, ko Tata suk ko nga mïlik re melrin ololi kurongwose. <sup>18</sup> Ko inu nuwrai tevim, nik kuvi Pita (nais ngok Pita rege nale se mïeri Gris nir owra bereng). Nik kupivi batu jinibb suk nir totoklai, pipre nga marili naim san rege bereng. Ko mijen sete derteren sen evter nga piasie nir. <sup>19</sup> Bela ki ne batun vanu ne melrin tevi nik. Ko poro nga nik kupwer ore nanu san rege iel ngatan, Atua kele piwer ore; ko poro nga nik kupmaronge parloli nanu san iel ngatan, Atua kele pimaronge parloli."

<sup>20</sup> Mirij jile mirpok, ko ewer ore jinibb sen nir nga sete parwerwera tweni tevi jinibb san nga ni evi Mesaea.

*Iesu owra wowomue nga ni pimij ko vitunen pia-maur luwi kele*

<sup>21</sup> Etipatun re daron ngok ko Iesu ok-wera suri tevi jinibb sen nir nga ni pian rege Jerusalem ko wor, ko Birterawarreg nir ko jinibb nga marlelep re sulsulen nir ko jinibb nevisvisenien ne nale nesereien nir para-loli pïisij tevi re nanu pilep, niben pia-runge pïisij e, ko para-revji pini; ko nabong pïtul ko Atua pia-loli ni pia-tur imare kele. <sup>22</sup> Mirij jile mirpok, ko Pita ervei tweni ni nuru orsan, ko etipatun erij terter tevi, owra "Numal, Atua pia-rrorrmi nik. Setete pia-pelari pipropok ji nik." <sup>23</sup> Ko Iesu erieni ni ko owrai tevi Pita, "Demij, kupruj ngasue inu! Kuwer ore inu nga sete bololi majingen se Atua. Norrorrmien som sete erpe norrorrmien se Atua, erpe norrorrmien se jinibb kobbong nir."

<sup>24</sup> Muwrai jile tevi Pita mirpok, ko owrai vajin tevi jinibb sen nir: "Poro san pimarong pivijuri inu, ni putor ore nanu nga

ni bbong mimrreni, puwosi nai pelaot sen, ko pivijuri inu. <sup>25</sup> Ko poro san puwra putor totoni mauren sen, mian ko pia-tor jabble; ko poro nga san pimaronge mauren sen suri mivijuri inu, ko mian ko pia-lai vajin mauren nga mürres. <sup>26</sup> Pia-rres pirpese re jinibb san poro pílai pētpeti nijor ne iel ngatan nir, ko mauren sen pijijiki? Pia-la sev ko pia-wuli lweni mauren sen e? <sup>27</sup> Inu Jinibb Mawos bea-luwi vini re nosrövien se Tata suk tevi anglo suk nir, ko renge daron nen bea-wuli jinibb jijle nir pusorsan tevi majingen ser sisamis. <sup>28</sup> Nuwretun nuwrai tevi kami, kami sopor nga kamtur iel setete kama-mij wor pijpari nga kapa-lesi inu Jinibb Mawos tevi batun vanu suk vini.”

## 17

### *Atua erieni nibe Iesu enije*

<sup>1</sup> Nabong ouwon easi osuw, ko Iesu etka Pita ko Jemes ko Jemes tasin wor Jon, ko nir arsan aran artongsa van re botwen nga mian mare san. <sup>2</sup> Ko Atua erieni nibe Iesu re no nir; ko Iesu non erinrin erpe nial, ko sunsun sen ow erpe moro nial. <sup>3</sup> Ko artaol arvesane ko arlesi Moses ko Elaeja kele orpelari jin, orjiljilwer tevi. <sup>4</sup> Ko Pita erij van ji Iesu, “O, numal, erres kem namlik pa iel. Poro kumarong, inu ßeli gorkoraim pítul iel, san piví se nik, van piví se Moses, ko san piví se Elaeja.” <sup>5</sup> Daron nga mok-rij malum mirpok, ko nabor nga mürinrin san esalsal orer, ko arunge drelan san eplari re nabor, owra “Morok evi natuk nga memrreni, ko nurnge erres elep suri ni. Kaprunge ni pírres.” <sup>6</sup> Ko daron nga jinibb sen nir marunge, ko armetutu temijpal, ko arsusweni nor van ngatan. <sup>7</sup> Ko Iesu evini jir ko ejparir ko owra “Kapmera, sete kapmetutu.” <sup>8</sup> Ko daron nga markulu imare, sete arlesi jinibb san, Iesu esan bbong.

### *Jiljilweren tweni Elaeja*

<sup>9</sup> Ko daron nga marok-jubbul re botwen malum, ko Iesu ewer orer, owra “Sete kapwerwera nanu nga Atua miviseni kamlesi re mete kami tevi jinibb pisan, pijpari nga inu Jinibb Mawos bea-tur imare luwi re mijen.”

<sup>10</sup> Ko jinibb sen nir arsusi rongorngre tevi ni arwera “Erpese jinibb nevisvisenien ne nale neseseien nir marwera Elaeja pivini womu ko wor?” <sup>11</sup> Ko Iesu erij welir, owra “Arweretun nga marwera Elaeja pia-vini ko wor ko pia-loli nanu jijle piasorsan. <sup>12</sup> Ko inu nuwrai tevi kami, Elaeja evini pa osuw; ko nir sete arosuri, ko arloli wor sev nga mäsij nga marmerrreni tevi

ni. Pirpok kele kobbong nir para-loli pīsij tevi inu Jinibb Mawos, nibek purnge pīsij.” <sup>13</sup> Daron nga mürir mirpok ko jinibb sen nir arongwose vajin nga ni sete ospe suri Elaeja weretun, ko ospe suri Jon Baptaes tevi nir.

### *Iesu oji tweni demij renge bipiwarreng san*

<sup>14</sup> Ko musuw vajin, arini ji delung nir; ko jinibb san evini ji ni ko ejpa ngatan jin, <sup>15</sup> ko owra “Wurru, numal, kuprormi natuk norman; nai ok-loli, ko ornge niben esij e elep. Ko nabong elep ok-wajeni re nabb nga mian ko re nuwi. <sup>16</sup> Ko nutkai van ji jinibb som nir, ko nir sete arongwose parloli pírres luwi.” <sup>17</sup> Ko Iesu owra “Kamivi dul nga nosurien se kami ejkie ko norrormien se kami mülengleng. Belik tevi kami pijpari seveling? Borngre pīsij suri kami pijpari seveling? Kaptekai ta bipiwarreng nen vini jik iel.” <sup>18</sup> Ko Iesu otortori demij nga mäsivili ni, ko eivare evel lingi ni. Ko bipiwarreng nen erres luwi re mete nial mawos nen.

<sup>19</sup> Ko vitunen, jinibb se Iesu nir arsan arini jin, ko arwera “Erpese kem sete namrongwose naboji tweni demij ngok?” <sup>20</sup> Ko Iesu owrai tevir, “Suri nosurien se kami ewelili jer. Nuwretun nuwrai tevi kami, poro nosurien se kami putoe pirpe jelangi nubek nga welili bbong, ko pivtere nga kapwera tevi botwen nga milep ngel, ‘Kupruj ngasu iok,’ ko puruj ko. Sete nanu pisan kele nga kami sete kamrongwos kaploli. <sup>21</sup> [Ko nga paroji tweni demij nga pirpok, parlot ko wor, ko parlinglingi nanen ser, ko niko paroji tweni.]E

### *Iesu owra tweni kele nga ni pimij*

<sup>22</sup> Ko mian ko daron nga marini marlik korti re vanu ne Galili vajin, ko Iesu owrai tevir: “Inu Jinibb Mawos para-teka kerasi inu van re nevre jinibb. <sup>23</sup> Ko jinibb nen nir para-revji pini inu; ko renge nabong itolin, Atua pia-loli inu bea-maur luwi kele.” Ko jinibb sen nir, daron nga marunge nale ngok, ko arunge esij lenglengen e.

### *Iesu owli takis ne Naim se Atua*

<sup>24</sup> Ko daron nga marini vajin re Kapaneam, ko lartul nga marok-lai nevot ne takis nga mivi se Naim On ne Jerusalem arini ji Pita. Ko arsusi tevi arwera “Jinibb nevisvisenien se kami ok-wuli takis ngel, rrek ejki?” <sup>25</sup> Ko ni owra “O-o. Ni ok-wuli ko.”

Ko daron nga Pita mian vajin loloim ji Iesu, ko Iesu erij womu tevi, owra “Kurrorrmi sev, Saemon? Numal nga marlelep

E 17:21 Nale nga muto re nolo [ ], trek sete Matiu oli, ko jinibb san ea-uli virtue daron nga muli tweni kopi san ne naul ngel.



nir ne iel ngatan arok-lai nevöt ne takis ser ji isi? Ji jinibb ser nir, rreknga ji jinibb neturvitan nir?"<sup>26</sup> Ko Pita owra tevi, "Ji jinibb neturvitan nir." Ko Iesu owrai tevi ni: "Niko muloli jinibb ser nir sete arongwos parwuli. Ko erpok kele, jinibb se Atua nir, Atua sete orongwose pok-la nevöt jir."<sup>27</sup> Ko rromormusus rroporloli nir nga marok-lai takis ne Naim On parlolar. Kupjubbul van ngatan re nuwi kuptutumun, ko nai nga kupa-revei womue, kupwaki nisen; ko kupa-lesi bebje nevöt san oto ren nga pivtere kerru korti rropora-wuli takis se kerru e. Ko kupan kupwulie tevir."

## 18

### *Jinibb nga mian mare wor*

<sup>1</sup> Re daron mawos nen malum ko jinibb se Iesu nir arini jin ko arsuasi tevi arwera "Isi elep womunen renga batun vanu ne melrin?"<sup>2</sup> Ko Iesu everuse bipi san vini jin ko ololi otur liven re nir,<sup>3</sup> ko owra "Nuwretun nuwrai tevi kami, Poro nor-rormien se kami sete pulwi pivini pirpe bipiwarreng nir, ko kami setete kamrongwos kapan re batun vanu ne melrin."<sup>4</sup> Isi nga puloli lweni ni pivi jinibb malum pirpe bipi ngel, ni pilep womunen renga batun vanu ne melrin.<sup>5</sup> Ko isi nga muosuri inu ko mimaronge bipi nga mirpel san pian ji ni, erpe emaronge nga inu kele ban jin.

### *Nanu nga marongwos parloli jinibb pivitan van renga nololien*

<sup>6</sup> "Poro isi nga puloli nir san nga welili ngel nga muosuri inu pivitan van renga nololien, erres p̄elak renga m̄ernen poro nga parrul totoni womue, ko parruloni nevöt nga milep san renga nowen, ko parjubbli maure re liven mesa re dis, purron van ngatan e."<sup>7</sup> Esij wor elep niko re jinibb ne iel ngatan ngel nir suri nanu jijle nga marok-loli jinibb nir parvitan. Nanu ngok nir parini ko wor, ko esij elep niko re jinibb nga m̄ilai nanu ngok san vini.

<sup>8</sup> "Ko pirpel ko, poro nga nevrem rreknga belam porloli kupvitan renga nosurien som, erres ma kupta tweni nuru kupsor tweni nuru van ngasue nik. Evi nanu nga m̄irres renga nik poro kupan renga mauren tevi nevrem p̄isansan rreknga belam p̄isansan, easi re poro nevrem korti nuru ko belam korti nuru, ko parwirre nik van re nabb nga p̄in tuwi ngok vini."<sup>9</sup> Ko poro nga metem puloli kupvitan, kupla tweni ko kupwirre van ngasue nik. Evi nanu nga m̄irres renga nik poro kupan renga mauren tevi metem p̄isan, easi re poro metem korti nuru ko

parwirre nik van re nabb ne norongen nga m̄isij.

### *Nale rrongrrongvi ne sipsip nga mijijki*

<sup>10</sup> "Kapmetmet renga kamkulu wutane re san nga welili ngel. Nuwrai tevi kami, renga melrin anglo ser nir nga marok-metmete nir arlesi tetajer no Tata suk nga m̄ilik re melrin.

<sup>11</sup> "Ko inu Jinibb Mawos nuvini tweni ßela se nir nga marjijki."<sup>12</sup> Kami kamr-rormi erpese? Poro nga jinibb san sipsip sen engut (100), ko san rer evel sarsarr ko esarr; ni sete orongwos p̄ilinglingi ngavöl esiw drromon esiw (99) ngok renga botwen parurroi mösmös ko pian pipej nga m̄isarr? Ni pian ko wor."<sup>13</sup> Nuwretun nuwrai tevi kami, poro putor sweri, ko p̄ir pilep wor ren suri sipsip ngok, piasie nga ngavöl esiw drromon esiw nga sete marivel sarsarr."<sup>14</sup> Erpok kele, sete evi marongen se Tata se kami nga m̄ilik re melrin nga san nga welili ngel pijijki.

### *Tuwam nga muloli m̄isij tevim*

<sup>15</sup> "Poro nga kalesia nga nivi tuwam e puloli p̄isij tevim, ko kupan ji ni, kamru koporsan bbong, ko kuptortorie suri. Ko poro purnge nik, ko ololi ni evi luwi tuwam."<sup>16</sup> Ko poro sete purnge nik, ko kupla kele jinibb p̄isan rreknga p̄ieru, nga pirpe nale san nga Naul On muwrai: "Nale jijle nir, nir p̄ieru ko wor rreknga p̄itul parwilwil ren."<sup>17</sup> Ko poro pumusus malum purnge nir, kupwerai tevi nir nga marivi kalesia. Ko poro pumusus malum purnge nir, ko kaploli ni vajin pirpe jinibb ne vare san, rreknga jinibb nga mok-lai takis san.

### *Loten ne gortien*

<sup>18</sup> "Nuwretun nuwrai tevi kami, nanu jijle nga kapwer orer renga iel ngatan, Atua kele p̄iwer orer renga melrin; ko nanu jijle nga kapmaronge parlolir iel ngatan, Atua kele pimaronge parlolir renga melrin."<sup>19</sup> Nuwretun kele nuwrai tevi kami, poro kami p̄ieru kobbong pormarong korti renga iel ngatan suri nanu p̄isan nga porungoni, ko Tata suk nga m̄ilik re melrin pia-loli wor nanu nen tevi nuru."<sup>20</sup> Poro jinibb p̄ieru rreknga p̄itul parkorti nga parlotoe inu, ko inu kele ßelik livö nir."

### *Nale rrongrrongvi ne m̄er nga mu-musus p̄iwer tweni nivnon se selen*

<sup>21</sup> Vitunen ko Pita evini jin ko osusi tevi owra "Numal, pivavis nga tuwak puloli p̄isij tevik ko ßetlasi ni? Pijpari pivabut?"<sup>22</sup> Ko Iesu owra lweni tevi "Inu nuwrai tevi nik, sete pivabut te, ejki, ko pijpari ma pingavöl piebut pivabut (77) kis."<sup>23</sup> Suri renga batun vanu ne melrin, Atua pia-loli pirpe jinibb ngel le: Numal nga milep san owra pieve nivnon se jinibb sen nir."<sup>24</sup> Ko

daron nga m̄itipatun pieve, ko artekai san nga muloli nivnon mijpari nev̄ot elep nga elep. <sup>25</sup> Ko suri sete orongwos puwli, ko numal sen ololi nale nga parwuli ni pivi demij maur, tevi nesen sen ko natun nir, ko parwuli kele joron jile nir, nga puloli parwuli tweni nivnon sen e sopon nga muloli. <sup>26</sup> Ko jinibb ne majingen nen ejiol vitan ongoni eterter tevi, owra "Wurru, numal, kuplinglingi inu beblen, pian ko bea-wuli tweni jile kobbong nivnon suk nir." <sup>27</sup> Ko numal sen orrorrmi ni, ko owra lweni tevi ni, "Nivnon som osuw ko pa." Ko elinglingi ni evel.

<sup>28</sup> "Ko jinibb ne majingen nen evel. Ko daron nga mivini vare e, elesi selen nga mok-majing tevi ni san nga muloli pa nivnon jin, mijpari nev̄ot nga welili bbong. Ko ololarsi ko orrul totoni ni, ekinji ĩirislan ko owrai tevi: "Kupwuli nivnon som!" <sup>29</sup> Ko selen nen ejiol vitan ko ongoni tevi ni, owra "Wurru, kuplinglingi inu beblen, pian ko bea-wuli twenir kobbong tevim." <sup>30</sup> Ko ni omusus p̄ilinglingi ni; otur imare, etkai ni ean elngi re naim ne nekaien, pijpari nga pia-wuli jile wor nivnon sen. <sup>31</sup> Ko daron nga selen nir marlesi nanu nga muloli tevi, ko arunge esij elep e; ko aran arwerai nanu nga muloli tevi numal ser nga womu m̄iwer tweni m̄nernen nivnon sen jile. <sup>32</sup> Ko daron nga numal ser murnge jile, ko ololar lenglengen; ko vitunen everus m̄nernen, ko owrai tevi: "Kuvi jinibb nga m̄isij p̄erp̄er! Nuwer tweni pa nivnon som ngok p̄etp̄eti nga sete kupwuli, suri nik kurngoni tevi inu. <sup>33</sup> Ko suri sev nik sete kurongwos kuploli pipok, kuprorrmi selem pusorsan tevi nga inu morrorrmi nik?" <sup>34</sup> "Ko numal sen ololarsi lenglengen e, ko etkai ni van ji jinibb nga marok-telmaji nir re naim ne nekaien, p̄ilik iok pijpari nga pia-wuli jile nivnon sen."

<sup>35</sup> Ko Iesu owrai kele, "Ko erpok Tata suk nga m̄ilik re melrin etlasi tweni pa nololien se kami nga marlelep nir. Ko poro nga kami nolo kami weretunen sete p̄itlasi tweni nanu nga tuwa kami muloli m̄isij tevi kami, nga mirpe nanu nga welili kobbong, ko Tata suk pia-loli tevi kami pusorsan tevi numal ngok muloli tevi jinibb sen ngok."

## 19

*Iesu os̄pe suri sel nga marlingi kurtweni nesen ser*

<sup>1</sup> Daron nga Iesu musuw re m̄irij vajin, ko evel lingi Galili, evini re Jutia re devje nuwi seser ne Jortan. <sup>2</sup> Ko delung elep arvijuri ni, ko ni ololi nir nga marmesi arres luwi ie.

<sup>3</sup> Ko Parasi kele nir arini jin, arwera parrowrowe ni. Ko arsusi, "Erpese? Evi nanu nga m̄irres nga jinibb p̄ilingi kurtweni nesevin sen suri nanu jille?" <sup>4</sup> Ko ni erij luwi, owrai tevir: "Rreknga kami sete kameve nga ni nga muloli nanu jille womu, ololi norman ko nesevin, <sup>5</sup> ko owra 'Ko ngok niko suri mirpel ngel ko, norman pivel lingi tata sen ko tasu sen, pian vajin pijtevi nesevin sen. Nuru nga eru ngok porivi vajin niben sansan ko metka sansan.' <sup>6</sup> Ko ngok niko suri setemun orivi eru, ko orivi vajin niben sansan ko metka sansan. Sev nga Atua m̄ijipteni kortoni nuru, sete erres jinibb san p̄ila tweni kele." <sup>7</sup> Ko nir arwera lweni tevi: "Poro pipok ngok ko, suri sev Moses owra 'Poro jinibb san p̄ilingi kurtweni nesevin sen, ko puli naul p̄ilai tevi, ko p̄ilingi tweni vajin?' " <sup>8</sup> Ko ni owra lweni tevir, "Suri batu kami nga m̄iterter, niko Moses mimarong nga kaplingi kurtweni nesevin se kami nir. Ko renge womunen sete erpok. <sup>9</sup> Ko nuwrai tevi kami, Poro nga jinibb san nesevin sen sete puloli womue batun, ko m̄nernen bbong p̄ilingi kurtweni nawone, ko p̄itka kele nesevin p̄isan kele, ni evitan re nesevin ngok ko vajin."

<sup>10</sup> Ko jinibb sen nir arwerai tevi ni, "Poro pipok tevi jinibb san ko nesevin sen, rrek erres sete portektekai nuru." <sup>11</sup> Ko ni owra lweni tevir, "Sete jinibb jille orongwose puloli pipre nga kamwerai ngok, nir nga bbong Atua m̄ilingi re nolor arongwose parloli pipok. <sup>12</sup> Jinibb sopor sete arongwose partekai nesevin suri arivi demaw, rreknga ariak erpok ko wor, rreknga jinibb ololi arirpoki. Ko inu nomok-supe suri nir nga marivi jinibb rres ko wor, ko sete arteka nesevin suri armajing suri batun vanu ne melrin. Si nga murongwos puloli pipok, puloli pipok ko wor."

<sup>13</sup> Ko vitunen jinibb sopor artekai bipiwarreng ser vini ji ni nga ni p̄ilingi nevren rer ko pulot. Ko Iesu jinibb sen nir artortori lartul nen nir. <sup>14</sup> Ko Iesu owrai tevir: "Sete kapwer orer. Kaplinglingi bipiwarreng nir parini jik, suri batun vanu ne melrin evi se nir nga marirpe bipiwarreng ngok nir." <sup>15</sup> Ko elngi nevren rer jile osuw, ko evel lingi ie.

*Jinibb san emrreni p̄ila mauren nga sete mia-suw nabong sopon*

<sup>16</sup> Mian ko vitunen vajin, ko jinibb san evini jin ko osusi tevi ni: "E, jinibb nevisvisenien, bololi majingen sev nga p̄irres pivtere nga bea-lai mauren nga tuwi ngok vini?" <sup>17</sup> Ko Iesu owra lweni tevi: "Erpese kumsusi tevik suri nanu nga m̄irres? Jinibb san bbong erres, Atua. Ko poro kupwera kapla mauren ngok, kuptori

nale neseseirei se Atua.”<sup>18</sup> Ko m̄nren osusi kele tevi Iesu: “Sev nale neseseirei ko kumwerai ngok?” Ko Iesu owra lweni tevi ni: “Nale neseseirei nen le ngel: ‘Sete kuprevji pini jinibb, sete kupvenae nesevini, sete kupevna, sete kupkerkeris re nosp̄en se numal nir,<sup>19</sup> kuposuri tata som ko tasu som, ko kupmerreni selem pirpe nik luwi.’ ”<sup>20</sup> Ko m̄elakel nen owra lweni tevi Iesu: “Nomok-loli jile pa erpe nale nga kumwerair ngok nir. Sev ojpon kele wor nga bololi?”<sup>21</sup> Ko Iesu owra lweni tevi ni, “Poru kupmerreni kupivi jinibb mawos jile p̄irres, kupan kupwulwule jorom jille nir, ko kupla nev̄ot nen tevi beres nir; ko jorom nga marres putoe mare re melrin. Ko kupini kupvijuri inu.”<sup>22</sup> Daron nga m̄elakel murnge nale se Iesu ngok e, ko ornge esij e elep, suri ni joron nir elep. Ko evel.

*Eterter renge jinibb nga joron milep pian re batun vanu ne melrin*

<sup>23</sup> Ko Iesu owrai tevi jinibb sen nir, “Nuwretun nuwrai tevi kami, Eterter elep renge jinibb nga joron milep pian re batun vanu ne melrin.”<sup>24</sup> Ko bowrai kele tevi kami: Eterter temijpal renge nato liwen pietiv.<sup>F</sup> Ko nga jinibb san nga joron milep poro pian re batunvanu se Atua, eterter wor elep asi wore ngok.”<sup>25</sup> Ko daron nga jinibb sen nir marunge nale ngel, ko bb̄osa elair e elep, ko arwera “Poru pirpok, ko si ma orongwos p̄ila mauren?”<sup>26</sup> Ko Iesu emtenir ko owrai tevir: “Eterter re devjen nga jinibb puloli. Ko re devjen nga Atua, ni orongwos puloli nanu jille.”

<sup>27</sup> Ko Pita erij weli, owra lweni tevi: “Kuplesi kem, namlinglingi joro kem jile arjipon, ko namini namvijuri nik. Nabala sev p̄irres ren?”<sup>28</sup> Ko Iesu owrai lweni tevi ni: “Nuwretun nuwrai tevi kami, renge daron nga Atua pia-loli nanu jille parmerr p̄irres, ko inu Jinibb Mawos be-sakel renge nai seksakel suk tevi nosr̄ovien suk; ko kami nga kamok-vijuri inu, kami kele kapa-sakel re nai seksakel pisngav̄ol drromon p̄ieru, ko kapa-wera suri lat nga puto suri tevi metka ne Isrel nir esngav̄ol drromon eru.”<sup>29</sup> “Ko nir jile kele nga marivel lingi naim ser nir rreknga tuwar nir rreknga jojir nir rreknga tata ser rreknga tasu ser rreknga natur nir rreknga dan ser suri marongen suk, lartul nen nir para-la weli vajin renge iok pijpari pungut pivesan, ko para-lai kele mauren ne tuwi ngok vini.”<sup>30</sup> Ko nir elep nga marwowomu mian ko para-vivitu, ko nir elep nga marvivitu, mian ko para-wowomu.”

<sup>F</sup> 19:24 Erpe iel, Matiu os̄pe kamel p̄isil rrrunggi batu nitel san nolom. Ko suri kamel ejki iel, namsūpe nato ela wani.

## 20

*Nale rrongrrongvi ne jinibb sopor nga marmajing tweni nowlir*

<sup>1</sup> Ko Iesu owrai kele tevir, “Renge batun vanu ne melrin, Atua pia-loli pusorsan tevi jinibb ngel le: Jinibb san naut nga milep sen san otoo. Ko nabong san emremra rorongp susu, owra p̄ilai jinibb ne majingen sopor nga parmajing renge orsel sen.”<sup>2</sup> Mian ko eskai jinibb sopor, os̄pe suri nowli nabong tevir, mian ko nir armarong renge nowli nabong nen; ko ni okoni nir vajin van re orsel sen.”<sup>3</sup> Ko re mete nial esiw sopon, ko ni otutur sopon kele; ko daron nga mututur e, ko elesi jinibb sopor kele artur nawon re maket.”<sup>4</sup> Ko owra tevir, “Kami kele kapan re orsel suk, ko nowlin sev nga pumomsawos beawuli kami ren.”<sup>5</sup> Ko nir aran. Ko re mete nial esngav̄ol drromon eru sopon, mian ko re kele mete nial itul sopon re nat mirivriv, otutur kele, ko ololi erpok kele.”<sup>6</sup> Ko mijpari re mete nial elim sopon rivriv, ko otutur kele; ko elesi jinibb sopor kele artur nawon, ko owrai tevir: ‘Erpese kamtur nawon iel mirpel nabong totoklai san?’<sup>7</sup> Ko nir arwera lweni tevi: ‘Suri sete jinibb san elngi majingen re kem.’ Ko ni owrai tevir: ‘Kami kele kapan re orsel suk.’

<sup>8</sup> “Ko rivriv jer ko vajin, numal nga naut sen nen owrai tevi m̄er nga mok-metmete joron nir, ‘E, kupverus kortoni jinibb ne majingen nir, ko kupwulir. Ko kuptipatun kupwuli re nir nga marvivitu, pian pusuw-suw re nir nga marwowomu.’ ”<sup>9</sup> Ko nir nga martipatun majingen re mete nial elim sopon rivriv arini ko arlai nev̄ot ser, osorsan tevi nowli nabong san totoklai.”<sup>10</sup> Mian ko nir vajin nga marini wowomu re majingen arini, arorrmi rreknga nir nowlir parasi wor van mare wor. Ko ejki, nir erpok kele bbong, arlai nev̄ot nga musorsan tevi nowli nabong san.”<sup>11</sup> Ko daron nga marlair e, ko nir arwor suri jinibb nga naut sen.”<sup>12</sup> Mian ko arwera tevi: ‘E, erpese nir ngel arvivitu armajing bbong mete nial sansan, ko nik kuwlr osorsan tevi kem nga nammajing renge nabong totoklai, namrunge m̄isij renge nial nga milep?’ ”<sup>13</sup> Ko ni owra lweni tevi nir san, owra ‘Selek, sete nuloli esij tevim, suri nik kumarong pa tevi inu renge nev̄ot ngok.”<sup>14</sup> Kupla nev̄ot som ko kupiel. Inu numrreni bowli nga mivitu ngel pusorsan tevi nik.”<sup>15</sup> Rrek kulesi nga sete evi nanu nga m̄irres nga inu bololi sev nga memrreni re jorok? Ejki ma, erres ko wor. Rreknga nolom eleplep kobbong suri inu nolok erres.”<sup>16</sup> Ko Iesu owrai kele:

"Pirpok ko, nir nga marvivitu mian ko para-wowomu, ko nir nga marwowomu, mian ko para-vivitu."

*Iesu owra tweni vatolin nga ni pimij*

<sup>17</sup> Ko vitunen Iesu owra pulwi kele van Jerusalem e. Ko jinibb sen nir esngavöl dromon eru arpatevi ni re sel. Marivel mian, ko Iesu etkai talev nir van re devje sel e, ko owrai tevir: <sup>18</sup> "Kaplesi, rraman Jerusalem le ngel. Ko daron nga rrapa-jipari, ko parateka kerasi inu Jinibb Mawos van ji jinibb sulsulen nga marlelep nir, ko ji jinibb nevisvisenien ne nale nesesreien nir. Ko para-wera inu ban re mijen, <sup>19</sup> ko paratekai inu van ji jinibb ne vare nir nga paratetnje inu ko para-telmaji inu, ko pararulonin inu para-wuse maure inu re nai pelaot. Ko mian ko re nabong itolin, Atua pia-loli inu bea-maur luwi kele re mijen."

*Tasu se Jemes ko Jon ongoni nanu san ji Iesu*

<sup>20</sup> Mian ko vitunen Sepeti nesen sen eptevi natun nuru Jemes ko Jon, nga morivi pa jinibb se Iesu, arini ji Iesu ko arjipa jin. Ko vinnen owra pungoni nanu san ji Iesu. <sup>21</sup> Ko Iesu owra tevi: "Kumrreni sev?" Ko vinnen owra lweni tevi ni: "Numrreni kupwera nale san nga natuk norman ngel nuru porivi jinibb nga morlelep jer renge batun vanu som, tuwen pisakel re nevrem rres, ko tuwen re nevrem mair." <sup>22</sup> Ko Iesu owra lweni: "O, sete komor-rongwose nanu nga komorngoni ngok. Kamru komor-vitere kopor-minmin re biles ne norongen nga misij nga inu beminmin ren?" Ko nuru orwera lweni tevi ni: "O-o, komru nomor-vitere." <sup>23</sup> Ko ni owra tevi nuru, "Kopora-minmin ko re biles nga inu beminmin ren. Ko re kopora-sakel re nevrek rres rreknga re nevrek mair, sete evi nanu nga inu bea-lai. Evi nanu nga Tata suk ko pia-lai tevi nuru nga mutobbobbu tweni nuru pae musuw nga pia-lai tevi nuru."

<sup>24</sup> Ko daron nga nir esngavöl marunge, arlolarsi niaken nen e nuru, suri nuru orwera poran mare porasi nir. <sup>25</sup> Ko Iesu orongwose norrorrmien ser, ko everus kortoni nir jijle vini jin ko owrai tevir: "Kami kamrongwose numal nir se jinibb ne vare nir aron tertere jinibb ser, ko jinibb nga marlelep ser nir arok-rrowrowe derteren ser elep. <sup>26</sup> Sete pirpok re livö ne kami. Isi nga mimrreni pivi jinibb nga milep re livö ne kami, ni puloli lweni ko wor ni pivi jinibb nga welili, nga pivi jinibb ne majingen se kami. <sup>27</sup> Ko isi nga mimrreni puwowomu re kami, ni pivi demij maur se kami. <sup>28</sup> Osorsan tevi inu Jinibb Mawos, sete nuvini tweni nga jinibb parmajing se inu, ko nuvini tweni bemajing se nir, ko

nga belai mauren suk puto wani milnge delung nir re mijen, ko bowli lweni."

*Iesu ololi metrrorr eru orkulu luwi kele*

<sup>29</sup> Ko nir artutur mian, ko daron nga marivel lingi Jeriko, ko delung elep arvijuri ni. <sup>30</sup> Ko renge devje sel, metrrorr eru orlilik ren. Ko daron nga morunge Iesu nisiasi re sel, orkail orwera "Warru, Numal, metka se Devet, kuprrorrm komru!" <sup>31</sup> Ko delung nir artortori nuru, arwera "Kopor-pper!" Ko nuru orkail van mare lengleng kele, orwera kele: "Warru, Numal, metka se Devet, kuprrorrm komru!" <sup>32</sup> Ko Iesu otur murrong ko everus nuru ko owrai tevi nuru: "Komor-marong bololi sev tevi kamru?" <sup>33</sup> Ko nuru orwera lweni tevi: "O, numal, nomor-marong mete komru porkulu luwi." <sup>34</sup> Ko Iesu orrorrm lengleng nuru, ko ejpari mete nuru. Ko ngavilvil orkulkulu luwi erres vajin, ko orvijuri ni.

## 21

*Iesu ean Jerusalem ko eviseni nga ni evi batu Numal*

<sup>1</sup> Ko mian ko vitunen arini morie Jerusalem, ko arini re ngaim san nisen Betpas nga muto morie botwen san nga marveruse Botwen ne lolnai ne olip. Ko Iesu owrai tevi jinibb sen eru: <sup>2</sup> "Koporan re ngaim nga muto ngokwan ngok. Ko pingavil kopora-lesi arile totkoni dongki san tevi natun. Kopor-rupaji dali nuru ko kopor-ile nuru vini jik. <sup>3</sup> Ko poro san pirij tevi kamru suri, ko kopora-wera lweni tevi, 'Numal emrreni nuru.' Ko pingavil ko pilinglingi kamru kopor-ile nuru vini." <sup>4</sup> Ngok eplari osorsan tevi nale san se Atua nga propet sen san muli wowomue tuwi mirpel: <sup>5</sup> "Kapwera tevi jinibb nir nga marlik re Saeon, 'Kaplesi Numal se kami evini ji kami, evi jinibb malum, ko esakel re dongki nga welili kobbong, nga mivi natu dongki ne majingen.'" <sup>6</sup> Ko nuru oran ko orloli osorsan erpe Iesu muwrai tevi nuru, <sup>7</sup> ko orile dongki nen tevi natun vini ji Iesu; ko arpelsen sunsun ser re nuru, ko Iesu esakel mare ren. <sup>8</sup> Ko delung elep arla sunsun ser arpelsen renge sel, ko nir sopor kele artitai rensi nai tevi raor, arpelpelsen renge sel. Ngok eviseni nga artori Iesu evi jinibb nga milep. <sup>9</sup> Ko delung elep sopon, sopor nga marwowomu ko sopor nga marvivitu arkikail, arsurövi ni ko arwera "Osana van ji metka ngel se Devet! Numal Atua, nik kurij pa erres tevi ni nga mivini re nik nistem. Osana re melrin mare!"

<sup>10</sup> Ko daron nga mivini Jerusalem e, ko jinibb ne ie nir arore, arwera "Isi ko ngok?" <sup>11</sup> Ko delung nir arwera lweni:

“Ngel evi propet Iesu ne Nasret rengo Galili.”

*Iesu oji tweni nir nga marwulwule nanu rengo Naim On*

<sup>12</sup> Mian ko vitunen vajin ko Iesu evan re loloi ne Naim On. Ko oji tweni nir nga marok-wulwule nanu nir iok tetajer, ko nir nga marok-wulwuli nanu nen nir, ko evatpuse tep se nir nga marok-kelkele nevöt nir, ko evatpuse kele nai seksakel se nir nga marok-wulwule wuñer nir. <sup>13</sup> Ko owrai tevir: “Aruli pa tuwi nale se Atua san ngel, owra ‘Naim suk, parveruse naim ne verusen.’ Ko kami kamtur imare vajin ko kamloli evi ‘naim ne venao res.’”

<sup>14</sup> Mian ko jinibb nga meter marrorr nir ko naroj nir arini jin rengo Naim On, ko ni ololi arres luwi. <sup>15</sup> Ko daron nga jinibb nga marlelep re wulsulen nir ko jinibb nevisvisenien ne nale neseseien nir marlesi muloli majingen nga marinijnij nawone, ko nanwarreng nir markikail rengo Naim On, nga marwera “Osana van ji metka se Devet!”, ko lartul nen arlolars lenglengen e

Iesu suri. <sup>16</sup> Ko arwerai tevi: “E, erpese? Nik kurnge nanu nga nanwarreng ngel nir marwerair ngok?” Ko Iesu owrai lweni tevir: “O-o. Ko kami sete kameve nabong san nale ngel se Atua nga muwra tuwi: ‘Eplari re jingo bipi nir ko bipiwarreng nga marsus malum nir, Atua ololi nir arsurövi ni erres ðelak.’ Kami kameve ko pa osuw.” <sup>17</sup> Ko elinglingir ko evel van re ngaim ne Betani ko omosi ie.

*Nai pik nga wenen mijkie*

<sup>18</sup> Mian ko mevinen vajin rengo rorpong susu, olwi van ngaim e re Jerusalem. Ko daron nga mututur mian, ko numer eaji. <sup>19</sup> Ko elesi nai san nisen nai pik otur re devje sel, ko emawose evan ren, owra purro wenen. Ko elesi raon kiskis bbong, sete wenen otoe. Ko owrai tevi nai pik nen, “Setemun wenem puto kele e nabong san pijpari tuwi ngok vini.” Ko daron momsawos e nen ko pa, nai pik nen emli. <sup>20</sup> Ko jinibb sen nir, daron nga marlesi e, ko artaole ko arwera “Erpese nai pik ngel mimli mivesane?” <sup>21</sup> Ko Iesu erij welir, owrai tevir: “Nuwretun nuwrai tevi kami, poro nosurien se kami putoe, ko sete kaprrorrmii karkare le, ko ngok kami kele kaprongwose kaploli kobbong pirpe nga mololi ngel tevi nai pik ngel. Ko mare re iok, kapwerai kele tevi botwen ngel nga Atua ðila tweni ko puwirre van re dis, ko piplari pusorsan tevi. <sup>22</sup> Ko nanu jille, sev nga kapa-ngoni rengo verusen, poro kapa-osuri, ko kapa-lair ko.”

<sup>23</sup> Ko Iesu olwi kele van re Naim On e, ko ok-visviseni jinibb nir. Ko jinibb nga marlelep nir ne wulsulen ko birterawarreng nga marivi pa jinibb nga marlelep arini jin ko arsusi: “E, kula derteren ngok nir ngabe ko nga komok-loli nanu ngok e nir? Siko elai tevim?” <sup>24</sup> Ko Iesu erij welir owrai tevir: “Inu kele bosusi kami e nanu ðisan, ko poro kami kapwerai tevik, ko inu kele pirpok bowrai tevi kami nulai derteren ngel nir ngabe le nga mololi nanu ngel le nir. <sup>25</sup> Kami kapwerai ta tevik: Jon ela derteren sen nga mok-paptaes e ngabe? Ji Atua, rreknga ji jinibb kobbong?” Ko nir arwerai tevir: “Poro rrapwerai, ‘Evel ji Atua vini,’ ko ni tia-werai lweni tevi kerr, ‘Erpese kami sete kamosuri ni?’ <sup>26</sup> Ko poro rrapa-wera, ‘Evel ji jinibb kobbong vini,’ ko rrammetutue delung nir, suri nir jile artori pa Jon osuw evi propet.” <sup>27</sup> Ko nir arwera lweni tevi Iesu, arwera “Sete namrongwose.” Ko Iesu owra lweni tevi, “Ia, ko inu kele sete nurongwose bowrai tweni tevi kami rengo derteren sev nga mololi nanu ngel e nir.”

*Iesu owra nale rrongrongvi tweni jinibb nga natun eru*

<sup>28</sup> Ko Iesu owrai kele, “Kaprrorrmii ta nanu ngel: Jinibb san natun otoe, natun eru. Ko evini ji merwomu nen ko owrai tevi, ‘Natuk, lelingen kupan kupmajing re orsel suk.’ <sup>29</sup> Ko natun owrai lweni tevi, ‘Numusus.’ Ko mian ko vitunen ko vajin, ko norrorrmien sen olwi, ko evan. <sup>30</sup> Ko tata se nuru evini kele ji merwitu nen, ko owrai kele erpe nga muwrai tevi merwomu. Ko merwitu nen owra lweni tevi: ‘Bean ko tata.’ Mian ko setemun evan.” <sup>31</sup> Ko Iesu osusi suri re nuru nga eru ngok tevir, owra “Nuru si nen ko ololi marongen se tata sen?” Ko nir arwera lweni tevi: “Nga womu nen.” Ko Iesu owra lweni tevir: “Nuwretun nuwrai tevi kami, kami kamsorsan temijpal tevi merwitu nen. Ko lartul nga marok-la nevöt ne takis nir ko nesevin ne sel nir nga kamungasir ngok arorsan tevi merwomu nen, ko nir parlai wani milnge kami van re batun vanu se Atua. <sup>32</sup> Suri Jon evini ji kami, evisviseni sel nga mumomsawos merres, ko kami sete kamosuri ni. Ko nir ma, lartul nga marok-la nevöt ne takis nir ko nesevin ne sel nir, arosuri ni. Ko kami, daron nga kamlesi nir nga marosuri mirpok ngok, ko norrorrmien se kami sete olwi kele nga kami kele kaposuri ni.

*Nale rrongrongvi tweni jinibb nga marsij nga marok-metmet orsel ne grep*

<sup>33</sup> “Kaprunge ta nale rrongrongvi rinij kele, ngel: Jinibb san orsel sen otoe. Ko orwi grep. Ololi nalut owlu rrale live

laut. Ko eli bbulwil ko elngi besin san ren, ko san oto mare e nga parjinteni wene grep ren ko jinibb parok-bböt ren, suwen piseser van re besin nga muto ngatan e. Muloli jile mirpok, ko eli naim san nga muwu mare nga jinibb nga marok-kulkulu parsa paran partur mare ren, ko parok-kulkulu pej nanu nga marok-vevna nir. Erpok, ololi jile osorsan tevi nga marok-loli daron nga maruwi nanu nen. Koelinglingi tevi jinibb sopor parmetmete, ko ni evel van re vanu nünij e.

<sup>34</sup> “Ko mian ko daron nga wenen mutomori pimiri; ni okoni jinibb sen sopor van ji nir nga marok-metmete orsel sen, nga nir parla wenen nen sopor, pusorsan tevi nga marijrij e. <sup>35</sup> Ko jinibb nen nga marok-metmete orsel arrul totonir; ko nir san artelmaji, nir san arevji pini, ko nir san artuwe. <sup>36</sup> Mian ko ni okoni kele jinibb sen sopor nir elep asi vajin nga womu, ko lartul nga arloli kele tevir osorsan tevi nga marloli tevi nir nga womu.

<sup>37</sup> “Mian ko vitunen jer vajin, okoni natun norman; orrorrmi nga nir parloli pïrres le tevi ni natun. <sup>38</sup> Ko jinibb nen nir, daron nga marlesi ni natun, arwerwera tevir, ‘O, ngel evi natun nga pia-la joro tata sen. Rraprevji pini, ko puloli orsel pia-ivi vajin se kerr!’ <sup>39</sup> Ko arrul totoni, ko arevevi van vare re orsel, ko arevji pini.”

<sup>40</sup> Ko Iesu osusi tevi nir, owra “Ko daron nga jinibb nga orsel sen pivini, ko puloli sev tevi jinibb ngok nir?” <sup>41</sup> Ko nir arwera lweni tevi ni, “Suri nir arivi jinibb nga marsij, ni kele puloli pïisij pusorsan luwi tevir, pïrevji pinir. Ko pia-linglingi orsel sen tevi jinibb sopor kele nga parok-metmete ko para-la wenen nen tevi re daron mawos nen.” <sup>42</sup> Ko Iesu owrai tevir: “Sete kameve nabong san nale ngel ne Naul On? Nabur nga lartul nga marok-ili naim marungasi marwirre, ni ko vajin evi nabur nga murrul totoni naim mïterter. G Ngel evi majingen se Numal nga muloli, ko rramtaole rramlesi mïrres pëlak.’ Kameve ko pa osuw.

<sup>43</sup> “Ngok, nuwrai tevi kami: Atua pia-la tweni batun vanu sen ji kami, ko pia-lai tevi jinibb sopor kele nga para-la wenen nga musorsan tevi. <sup>44</sup> Si nga pusnge nabur ngel, niben pimabbur. Ko si nga nabur ngel piravij ren, niben pumoloplop pëtpëti.”

<sup>45</sup> Ko jinibb nga marlelep nir re sulsulen ko Parasi nir daron nga marunge nale rrongrrongvi sen ngok, arongwose nga ni owra suri nir. <sup>46</sup> Ko arwera parrul totoni

Iesu, ko armetutu delung nir. Suri delung nir artori ni evi propet san.

## 22

*Nale rrongrrongvi ne dabbuen ne totkoiën*

<sup>1</sup> Ko Iesu ela nale rrongrrongvi kele tevi nir, owra <sup>2</sup> “Renge batun vanu ne melrin, Atua pia-loli pusorsan tevi numal ngel le: Numal san ololi dabbuen ne totkoiën se natun norman. <sup>3</sup> Ko okoni jinibb sen nir nga parveruse nir nga mïla pa nale tevir nga parini. Ko nir armusus parini. <sup>4</sup> Ko okoni kele jinibb sen sopor kele, owra ‘Kapwera tevi nir nga mïla nale tevir nga parini, “Kaplesi, nuloli lilane jile nanen, tutor pini pa buluk suk nir ko natu buluk suk nga marlelep marres nir, ko nanu jille oto omomsawos pa nga parurroi. Kapini renge dabbuen ne totkoiën.” ’ <sup>5</sup> Ko nir arong melmelase bbong, ko arivel; san evan orsel sen, ko san evan emajing re sto sen. <sup>6</sup> Ko nir sopen nga marlik jer nen arrul totoni jinibb nga mukonir nen, ko arloli esij tevir; ko arevji pinir. <sup>7</sup> Ko numal nen, daron nga murngene nanu nga marloli ngok, ko ololar lenglengen. Ko okoni jinibb nuval sen nir aran ko arpip pinipini jinibb nen nir nga marok-revrevji pini jinibb, ko arsuloi ngaim ser. <sup>8</sup> Muloli jile mirpok tevir musuw, ko owrai vajin tevi jinibb sen nir, ‘Nanen ne totkoiën arloli jile osuw, artiriv ko vajin. Ko nir nga marwera tevi nir nga parini, sete arres re parini. <sup>9</sup> Kapiel ta vajin suri sel nir, ko jinibb si nir nga poro kapa-sewute re sel, kapa-wera tevir nga nir parini re nanen ne totkoiën.’ <sup>10</sup> Ko jinibb sen nir arloli erpok, arivel suri sel nir; ko daron nga marsewute jinibb tama san, poro pivi jinibb nga mïisij rreknga jinibb nga mïrres, ko arwera tevi, ‘Kupan re nanen ne totkoiën.’ Marok-loli mirpok mian, konaim ne nanen ne totkoiën owun saute nir nga marini vajin.

<sup>11</sup> “Ko daron nga numal nen ne nanen mivini loloim nen, owra pïlesi nir nga marini, ko otor sweri jinibb san loloim nga sete muri sunsun mawos ne totkoiën. <sup>12</sup> Ko numal nen owrai tevi mïernen, ‘Selek, erpese kumini loloim ko sete kumuri sunsun mawos ne totkoiën?’ Ko ni omurrong jer. <sup>13</sup> Ko numal nen elesi esij ko owrai tevi jinibb sen nir, ‘Kaprrul kokortoni nevren nuru ko ðelan nuru, ko kapsere totkoni. Ko kapwos tweni van vare e, ko kapwosi van kapwirre van re lat nga mimalik jerjer. Tok ngok jinibb para-ting ko para-runge pïisij pilep.’

G 21:42 Erpe iel, Matiu ospe nevöt, ko murrun nga nir marili naim muto suri; ko kem namrieni erpe kerr rramïli naim iel, nga puloli mining ne nale se Matiu piplari limjer.

<sup>14</sup> “Nir elep nga Atua mīveruser nga parini jin, ko nir ewelili bbong mīlai twenir parivi sen.”

*Erres nga jinibb puwli takis tevi Sisa, rreknga ejki?*

<sup>15</sup> Ni mīrij jile mirpok musuw, ko Parasi nir arivel van lut san e ko arkorti, ko arsupuŕe suri parloli pīrpeŕe nga Iesu puon luwi re nale sen. <sup>16</sup> Arsuŕe jile osuw, ko arkoni jinibb ser sopon tevi jinibb se Erot sopor aran arkerkerasi Iesu, arwera “Jinibb nevisvisenien, namrongwose nik kuwretun, kuvisviseni sel se Atua reŕge weretunen. Sete kuwor suri jinibb san, suri sete kumtutev jinibb san. <sup>17</sup> Ngok, kupweraŕi ta tevi kem norrorrmien som. Evi nanu nga mīrres rraplai nevōt ne takis tevi Sisa, batu numal se mīeri Rom nir, rreknga ejki?” <sup>18</sup> Ko Iesu orongwose nga arwera parkerkerasi ni, ko owra tevir: “Suri sev kamrrowrrowe inu, kami nga kamiŕe re sel eru? <sup>19</sup> Kapviseni ta inu nevōt nen.” Ko nir arlai nevōt nen san tevi. <sup>20</sup> Ko ni elai, emteni, ko osusi tevir, “Isi le nisen ko non marulī reŕgen ngel?” <sup>21</sup> Ko nir arwera lweni tevi, “Rrekma Sisa ko.” Ko ni owrai tevir, “Kaplai tevi numal se mīeri Rom sev nga marivi se ni, ko kaplai tevi Atua sev nga marivi se Atua.”

<sup>22</sup> Ko daron nga marunge nale ngel e nir, bbōsa elair e, suri arrorrmi Iesu sete orongwose pīasie nir reŕge nanu ngok. Ko arlinglingi ni ko arivel sisamis.

*Pīrpeŕe re jinibb nga mimij ko mimaur luwi kele*

<sup>23</sup> Ko vitunen, re nabong mawos nen malum, ko Satusi nir sopor arini jin kele. Nir arok-wera jinibb sete orongwos pīmaur luwi kele reŕge mijen. Ko arsuŕi kerkerasi tevi, arwera <sup>24</sup> “Jinibb nevisvisenien, Moses oŕai tuwi, ‘Porō jinibb pīsan pīmij ko natun pīkie, ko tasin pītkaŕi nesevin sen ko pivesi wani metka se tuwan nga mimij ngok.’ <sup>25</sup> Ko reŕge kem bonevis jinibb ebut arivi niaken erpok. Ko mīerwomu nen etka nesevin sen; mian ko orongwose otomori pīmij, ko owrai tevi tasin, ‘Natuk ejkie, kuptekai nesevin suk.’ Ko mīerwomu emij. <sup>26</sup> Ko mīervitu kele ololi erpok kele, etka kele nesevin nga, mian ko emij. Mian ko ejpari ebutun nga vitu jer nen, nir jijle artekaŕi nesevin nga, mian ko nir jijle armij lingi vin nga. <sup>27</sup> Mian ko vitu jer nen vajin, ko nesevin emij vajin. <sup>28</sup> Ko namwera nabsusi tevim: Reŕge daron nga jinibb nir parmaur luwi kele re mijen, siko re nir niaken nga ebut ngok pia-ivi nesen sen e vinnen? Kupweraŕi ta we!” <sup>29</sup> Ko Iesu erij welir owrai tevir: “Kamsarr, suri sete kamrongwose derteren

se Atua. <sup>30</sup> Suri reŕge meraien ne mijen, sete arongwose para-totko kele mun, ko para-irpe vajin anglo ko re melrin. <sup>31</sup> Ko nga kami kapjipari meraien ne mijen evi weretunen, ko ŕelai nale san se Atua nga kamrongwose pae nga muwrai tevi kami ngel, muwra <sup>32</sup> ‘Inu nuvi Atua se Epram, ko Atua se Aesak, ko Atua se Jekop.’ Atua sete evi Atua se jinibb nga marmij nir, ko evi pa se jinibb nga marmaur nir. Suri derteren sen elep nga elep lingi mijen.”

<sup>33</sup> Ko daron nga delung nir marunge nale ngel, ko bbōsa nga milep elair reŕge nevisvisenien nga mīrres sen.

*Nale neseseŕien nga mian mare wor re nale neseseŕien mīnij nir*

<sup>34</sup> Ko Parasi nir, daron nga marunge Iesu muloli Satusi nir marmurrong jer mirpok, ko nir arververus kortonir arkorti lat san. <sup>35</sup> Mian ko san re nir nga norongwosien sen mutoe re nale neseseŕien se Atua osusi rongorŕge tevi ni, owra purrowrrowe ni, owra <sup>36</sup> “Jinibb nevisvisenien, reŕge nale neseseŕien, kulesi nale ngabes nen ko elep womunen?” <sup>37</sup> Iesu owra lweni tevi: “ ‘Kupmerreni Numal Atua som tevi nolom totoklai, tevi mauren som totoklai, ko tevi norrorrmien som totoklai.’ <sup>38</sup> Ngok evi nale neseseŕien nga milep womu jer nen. <sup>39</sup> Ko nga suri nen e, mutomori pīrpe ngok, ni le ngel: ‘Kupmerreni selem pīrpe nik luwi.’ <sup>40</sup> Ngok ko nuru orivi batu nale neseseŕien nir, ko nale se propet nir kele.”

*Mesaea evi metka se Devet, ko evi kele Numal sen*

<sup>41</sup> Parasi nen nir arlik korti malum, ko Iesu osusi tevir, <sup>42</sup> owra “Kamrorrmi Mesaea erpeŕe? Isi ko metka sen?” Nir arwera lweni tevi, arwera “Se Numal Devet.” <sup>43</sup> Ko ni owra lweni tevir, “Porō pīrpok, ko Mesaea piveruse Devet puwra ‘Numal,’ suri Devet owowomu. Ko ejki, Nemīn On ololi Devet miveruse Mesaea muwra Numal, nga muwra <sup>44</sup> ‘Numal Atua owra tevi Numal suk, ‘Kuplik reŕge nevrek rres pījpari nga bea-lingi devje nuval som nir parīrpe lat nga kupbbōt ren reŕge nolon ŕelam ngatan.’ ” <sup>45</sup> Porō nga pīrpok Numal Devet miveruse Mesaea mivi Numal sen, ko evi metka sen erpeŕe?”

<sup>46</sup> Ko daron nga mīrij jile mirpok, ko sete jinibb kele san orongwos pīrij weli nale san tevi ni. Ko mītipatun re daron nen jinibb jijle armetutu, setemun san orongwos pususi rongorŕge nanu san tevi ni.

## 23

*Iesu erij tere jinibb nevisvisenien nir ko Parasi nir*

<sup>1</sup> Mian ko Iesu erij tevi delung nir ko jinibb sen nir, owra <sup>2</sup> 'Jinibb nevisvisenien ne nale neseseien nir ko Parasi nir arla wani milnge Moses, arivi pa jinibb nga parvisviseni jinibb nir re nale neseseien nga Moses muli tuwi. <sup>3</sup> Suri iok ko, nanu jijle nga marwerai tevi kami, kaploli tevir pirpe nga marwerai kobbong. Ko re devjen nga nanu nga marlolir, sete kaploli surir e pirpok. Suri nir arok-werai, ko sete arok-majing suri. <sup>4</sup> Arsere bböbtti nga marrow milep ko eterter nga jinibb nir parsoloir, ko arjingtenar re birpari jinibb nir; ko nir mawos ma arimus parsas tweni bbös nevrer e san. <sup>5</sup> Ko rege majingen ser arlolir armerreni jinibb parlesir. Kamrongose narr nga wewarreg nir nga marsongni naul nga maruli tweni nale se Atua rer, nga jinibb nir parruloni re borngir ko nevrer. Ko nir arloli se nir arlelep nga jinibb parlesir ko parsurövir renger. Ko suri norrorrmien ngok kobbong, muloli marloli kele sunsun ser marpepriv. <sup>6</sup> Ko rege nanen kele, arok-marreni parsakel re lat nga jinibb nga marlelep nir marok-sakel rer; ko arloli erpok kele re naim ne gortien nir. <sup>7</sup> Ko armerreni jinibb partorir re maket, ko jinibb nir parveruse nir, 'Jinibb nevisvisenien.' <sup>8</sup> Ko kami, sete kaplolir parveruse kami san 'Jinibb nevisvisenien,' suri jinibb sansan bbong evi jinibb nevisvisenien se kami, ko kami jijle kamivi niaken. <sup>9</sup> Ko sete kapveruse jinibb san pivi tata se kami rege iel ngatan, suri jinibb sansan bbong evi tata se kami, ni nga nūlik re melrin. <sup>10</sup> Ko sete kaplolir parveruse kami 'Numal,' suri Numal se kami sansan bbong, Mesaea. <sup>11</sup> Ko ni nga mivi jinibb nga milep temijpal re livö rege kami, pivi wor jinibb ne majingen se kami kele. <sup>12</sup> Ko si nga musustur lweni ni mian mare, Atua piadololi ni pian ngatan. Ko si nga puloli lweni ni pian ngatan, Atua pia-sustur ni pian mare.

*Iesu ewer lokloksi jinibb nevisvisenien nir tevi Parasi nir*

<sup>13</sup> "Wi, kami jinibb nevisvisenien ne nale neseseien, ko kami Parasi, kami nga kamieli re sel eru! Suri kamkikiorore batun vanu ne melrin tevi jinibb nir. Ko kami kele sete kaman, ko sete kamlinglingi kele nir nga marmmerreni paran. <sup>14</sup> [Wi, kami jinibb nevisvisenien ne nale neseseien, ko kami Parasi, kami nga kamieli re sel eru! Kami nga nolo kami mok-venae pa naim se nesevin nir nga diwen ser marmij lingir, ko kamkerkeris re kamloli nawon verusen

nga marpepriv. Suri nanu ngok, puloli Atua putor vitrangir kami pilep.]<sup>H</sup>

<sup>15</sup> "Wi, kami jinibb nevisvisenien ne nale neseseien, ko kami Parasi, kami nga kamieli re sel eru! Kampevlak kamwolu otvi dis ko kamieli suri vanu nga kaplai jinibb pisansan pivini pipitevi kami. Ko daron nga miptevi kami mirpok, kamloli ni evi pa jinibb nga pian re lat ne norongen nga nūisij, evi jinibb nga nūisij varu re kami.

<sup>16</sup> "Wi, kami metrorr nga kamok-wowomue jinibb re sel. Kamok-wera 'Isi nga piriirij rege Naim On, ololi nanu nawon. Ko isi nga piriirij rege gol ne Naim On, ngok ni puloli nanu nen ko wor.' <sup>17</sup> Kamlengleng, kamivi metrorr. Ngabes nen evi nanu nga milep nen, gol nen, rreknga Naim On? Suri Naim On kobbong ololi gol nga muto ren on. <sup>18</sup> Ko kamok-wera kele, 'Isi nga piriirij rege nawot nga marok-sulsul ren re Naim On, ololi nanu nawon. Ko isi nga piriirij rege merrenien nga muto ren, ngok ni puloli nanu nen ko wor.' <sup>19</sup> Kamivi metrorr! Ngabes nen evi nanu nga milep nen, merrenien nen, rreknga nawot? Suri nawot kobbong ololi merrenien on. <sup>20</sup> Suri isi nga piriirij re nawot, erpe erijrij ren ko nanu jijle nga pa marto ko ren kele. <sup>21</sup> Ko isi nga piriirij re Naim On, erpe erijrij ren, ko erijrij kele rege Atua nga pa nūlik ko ren kele. <sup>22</sup> Ko isi nga piriirij re melrin, erpe erijrij rege nai seksakel se Atua, ko erijrij kele rege Atua nga nūisakel ren kele.

<sup>23</sup> "Wi, kami jinibb nevisvisenien ne nale neseseien ko kami Parasi, kami nga kamieli re sel eru! Ko kamok-eveve roi wovarreg nir nga marok-lingi re nanen, min ko til ko kamin, nga kaploli pusorsan pētpeti tevi nale neseseien se Atua, ko kaplai songovlön pian ji Atua. Ko kamlinglingi nanu nga marlelep re nale neseseien, erpe neseseien mawos, murrun nga marrorrmii jinibb, ko murrun nga marosuri weretunene. Ngok, nanu nga marlelep e nir, kaplolir ko wor, ko sete kaplinglingi nanu nga wovarreg, pirpe murrun nga parlai songovlön pian ji Atua, parjipon. <sup>24</sup> Kamivi metrorr nga kamok-wowomue jinibb re sel. Daron nga kamwera kapmini nuwi, ko kamlesi nunu nūisal ren, ko kamjuljule tweni, musuw ko kammini nuwi nen vajin. Ko poro kaplesi buluk san<sup>I</sup> nūisal re nuwi se kami, ko sete kamjule tweni, kammini kobbong, ko kamrrrolmi nuwi tevi buluk nen!

<sup>25</sup> "Wi, kami jinibb nevisvisenien ne nale neseseien, ko kami Parasi, kami nga

<sup>H</sup> 23:14 Nale nga muto re nolo [ ], rrek sete Matiu oli, ko jinibb san ea-uli vitue daron nga muli tweni kopi san ne naul ngel. <sup>I</sup> 23:24 Erpe iel, Matiu ospe kamel, ko suri kamel ejki iel, namsupe buluk ela wani, nga puloli mining ne nale se Matiu piplari piñifer.



kamiel re sel eru! Kamok-rrawe vare ne biles nir ko plet nir arwokwok, ko rengo nolor arrokkitkit temijjal. Erpe kami, nolo kami arwun saute venao. Ko kamwera malum kapevna, nolo kami sete orongwos pusuw ren. <sup>26</sup> Kami Parasi, kamivi metrorror! Womuj nen, kaprrawe vaseni nolo biles ko plet puwomu, ko vare nen kele puwokwok ñirres vajin.

<sup>27</sup> “Wi, kami jinibb nevisvisenien ne nale neseseien ko kami Parasi, kami nga kamiel re sel eru! Kamirpe dubb nga marbbölji laen er, vare ner marow mïrres, ko lolor marwun saute ji jinibb nga marmij nir, ko nanu jijle nga marrokkitkit nir. <sup>28</sup> Erpok kele re kami, jinibb arlesi re vare ne nibe kami armomsawos erres; ko rengo nolo kami arwun saute gerisen nir ko nololien nga marsij nir.

<sup>29</sup> “Wi, kami jinibb nevisvisenien ne nale neseseien ko kami Parasi, kami nga kamiel re sel eru! Kamok-tuwe nevöt re dubb se propet nir ne tuwi pa ko kamok-juroi dubb se jinibb nga marres nir ne tuwi <sup>30</sup> ko kamok-wera ‘Poron nga nablík re nabong nga tuwi nir se ßirterwarreng se kem nir, sete nama-pitevi nir nga marevji propet nir drra mibböljir.’ <sup>31</sup> Ko ngok, kamwer lokloksi kami lweni kobbong, suri kamwera kamivi metka mawos se nir nga marevji propet nir. <sup>32</sup> Iow, erres kobbong, majingen nga marsij se ßirterwarreng se kami nga marmajing linglingir, kami vajin kapmajing jijler. <sup>33</sup> O, kamivi numet! Kamivi metka se numet nir nga marsij ko marok-wolu. Kapwolu asi re lat ne norongen nga mïrsij pirpese? <sup>34</sup> Erpok ko, kaplesi, bokoni propet sopor ko jinibb sopor nga norongwosien se mutoe, ko jinibb nevisvisenien ne nale neseseien sopor vinuk ji kami. Ko nir sopor kaparevji pini, ko nir sopor kaparrulonir kapa-wuse maur nir re nai pelaot, pararrul pijpari para-mij. Ko nir sopor kapatelmajir re naim gortien se kami, ko kapajir re ngaim ko ngaim. <sup>35</sup> Ngok pulodi drra jinibb jijle nga marres nga marevji iel ngatan parbbölji kami, etipatun re drra jinibb nga mïrres nen Epel, ejpari drra Sekaria natu Barakaea nga ßirterwarreng se kami marevji pini re Naim On mawos, liven ne lat nga muon ko nawot. <sup>36</sup> Nuwretun nuwrai tevi kami, drra jijle ngel nir para-bbölji kami nga lelingen ngel nir.

*Iesu orrorrmielep suri mïri Jerusalem nir*

<sup>37</sup> “O Jerusalem, Jerusalem, nik nga komok-revji pini propet nir, ko komok-tuwe pini jinibb nir nga Atua mukonir vini jim. Vavis nga mowra ßeser kortoni

natum nir parkorti pirpe nato dosevin nga mïsrew ore natun nir; ko ejki, kammusus. <sup>38</sup> Kaplesi, Atua evel lingi pa kami ko Naim On se kami. <sup>39</sup> Ko nuwrai tevi kami, setete kama-lesik kele sopon pijpari nga kapawera: ‘Atua erij pa erres suri ni nga mivini re ni nisen.’”

## 24

*Iesu owra tweni nga partingtinge Naim On*

<sup>1</sup> Ko Iesu eivare, owra pivel lingi Naim On. Ko jinibb sen nir arini jin, arwera parviseni tevi ni majingen nga marres milep ne Naim On. <sup>2</sup> Ko Iesu erij welir, owra “Kamlesi nanu ngok nir? Nuwretun nuwrai tevi kami, pian ko sete nevöt ngok nir san pia-jek jer re ßisan, para-wirr sisamis ßetpeti.”

*Norongen nga mïrsij nga pia-vini*

<sup>3</sup> Mian ko vitunen vajin, Iesu ok-lik ngatan re Botwen ne lolnai ne olip, ko jinibb sen nir arini malum bbong jin, ko arsusi tevi: “Kupwera! ta tevi kem, nanu ngok nir para-rremali seveling? Ko sev piviseni daron nga kupa-luwi e vini ko ngatan ngel bongsin nga pia-suwuw e?” <sup>4</sup> Ko Iesu owra lweni tevir, “Kapmetmete jinibb san tia-kerkerasi kami. <sup>5</sup> Suri nir pilep ko para-vini rengo inu nisek, ko parawera ‘Inu le Mesaea,’ ko para-kerkerasi jinibb pilep para-vijurir. <sup>6</sup> Ko kapa-runge naror ne nuval nir ko nospen ne nuval nir. Kapmetmet, takmetutue. Nanu ngok jile nir para-pelari ko wor, ko ngatan ngel bongsin ejki wor. <sup>7</sup> Ko jinibb nir para-tur imare para-val tevi jinibb nir, ko batun vanu nir para-tur imare para-val tevi batun vanu nir, ko numer pia-to, ko narfi pia-ni re lat lele. <sup>8</sup> Nanu ngel nir arivi nanu womunen re martipatun, erpe nesevin san nga murnge rrongvi depain.

<sup>9</sup> “Renge daron nen, ko para-tekai kami van ji jinibb nga para-loli ßisij tevi kami, ko para-revji pini kami. Ko jinibb jijle para-ungasi kami suri kamivi jinibb suk. <sup>10</sup> Ko rengo daron nen nir pilep nolor pia-vitan, ko para-tektekai kerasi lululwenir, ko para-ungungasi lululwenir. <sup>11</sup> Ko propet ne gerisen nir pia-lep para-tur imare ko para-kerkerasi jinibb pilep, paravijurir. <sup>12</sup> Ko suri nololien se jinibb nir pia-wun saut, pia-loli merrenien se kalesia nir pilep pia-melmelas. <sup>13</sup> Ko si nga piatur ßiterter pijpari bongsin, mïrenen pi-la mauren nga mïrres. <sup>14</sup> Ko nospen nga mïrres suri batun vanu ne melrin parasuße tevi jinibb jijle nir puwomu rengo iel ngatan, nga jinibb ne vare nir para-runge; pia-suw vajin, ko bongsin pia-vini ko vajin.

*Nanu nga milep nga pia-pelari  
Jerusalem*

<sup>15</sup> “Ko nabong san kapa-lesi atua se jinibb ne vare nir nga m̄sij nga m̄sij, nga propet Daniel muspe tuwi pa, parasireni putur renga lat nga muon, ko pia-loli nir para-wolu lingi lat on nen.” (Si nga mok-eve purongwose.) <sup>16</sup> “Korenga daron nen, kami nga kamlik Jutia kapwolu van re botwen e nir. <sup>17</sup> Ko kami nga kamlik vare renga naim se kami, sete kapluwi kele van loloim se kami kapla joro kami pisan, ejki, kapa-wolu lingir pingavil. <sup>18</sup> Ko kami nga kammajing re orsel se kami, sete kapa-luwi kele van re ngaim se kami kapa-la sunsun se kami, ejki. <sup>19</sup> Wi renga nesevin nir nga marsolo malum bipi, ko renga nesevin nir nga marloli bipi ser marsus renga nabong nga marsij nen nir. <sup>20</sup> Kapungoni ko wor tevi Atua nga woluen se kami sete pia-vini re daron ne naus, rreknga re nabong ne Sapat. <sup>21</sup> Suri daron nen pia-ivi daron nga m̄iterter m̄sij temijpal san. Mitipatun re daron nga Atua muloli iel ngatan e, mivini mijpari lelingen ngel, nanu san setewor eplari erpok, ejki wor; ko vitunen, sete pia-irpok kele piasesan. <sup>22</sup> Numal Atua orrorrmi pa nga pia-ta tweni nabong nga marsij ngel nir; poro pijki, ko sete jinibb san mia-maur. Ko suri orrorrmi nir nga ni mutobbobbu pae nir, ko niko muloli nabong nen nir sete pilep pelak.

<sup>23</sup> “Ko renga daron nen, poro jinibb san pia-werai tevi kami, ‘Kaplesi, Mesaea ngokwan,’ rreknga ‘Ngelan,’ sete kapa-osuri. <sup>24</sup> Pian, ko pia-irpok ko wor renga iel ngatan; mesaea ne gerisen nir pilep para-tur imare, ko propet ne gerisen nir pilep para-tur imare, ko para-viseni nevisenien ko nelesien nga marlelep nir, nga para-kerkerasi jinibb nir, ko jinibb se Atua kele nir. Ko sete arvitere para-kerkerasi jinibb se Atua nga mutobbobbu nir. <sup>25</sup> Kaplesi, nuwrai wowomu pae kami le ngel. <sup>26</sup> Erpok, poro para-werai tevi kami, ‘Kaplesi, Mesaea nika lolo merwer!’ kami sete kapan. Ko poro para-werai tevi kami, ‘Kaplesi nika, elik teptepi loloim sopen re naim ngok san,’ ko sete kapa-osuri. <sup>27</sup> Erpe navil nga mivil, daron nga mivil renga devje melrin ko mimor vaseni melrin petpeti mivesane mijpari devjen, nga jinibb jijle nir marlesi, ko ngok pia-irpok renga inu Jinibb Mawos renga daron nga bea-luwi vini. <sup>28</sup> Pirpe daron nga nanu san emij, ko numon nir nga maroktasi parmot rrale; orongwos kaplesi wose kobbong ngasau.

*Jinibb Mawos pia-pelari re melrin*

<sup>29</sup> “Ko vitunen vajin re daron nga m̄sij nen, ngavilvil nial pia-mot, ko navol sete mia-ser, ko moju ne melrin nir paravititan, ko nanu nga marterter ne melrin nir para-terrterring. <sup>30</sup> Mian ko vitunen nelesien se inu Jinibb Mawos pia-pelari re melrin. Ngok pia-loli metka se jinibb ne iel ngatan nir para-ting nga para-lesi inu Jinibb Mawos bea-vini re nabor ne melrin nir tevi derteren ko nosrovien nga milep. <sup>31</sup> Ko vitunen, daron nga para-uwi davō nga milep san, ko inu bea-koni anglo suk nir para-van re iel ngatan bongsin ivij jijle, tevi lat petpeti nir nga melrin m̄salsal orer, ko para-ser kortoni jinibb suk nir nga motobbobvue.

*Sete jinibb san rragrrag orongwose  
nabong nen*

<sup>32</sup> “Kaprorrmi renga nale rrongrrongvi ne nai pik, ngel: Daron nga rengsin mimalum vajin, ko etengriv luwi kele nga puloli raon nir parpelari. Ngok, kamrongwos pae daron ne dorvusavus oruj mori. <sup>33</sup> Kami pirkok ko, daron nga kapa-lesi nanu ngok nir, kapa-orongwose nga inu nuruj mori pelak, erpe nutur ko vajin roro metali. <sup>34</sup> Nuwretun nuwrai tevi kami, dul nga lelingen ngel sete pia-asi wor pijpari nga nanu ngel nir para-pelari. <sup>35</sup> Melrin ko ngatan, mian ko pora-asi; ko nale suk nir setete mara-asi, ejki, para-pelari ko wor.

<sup>36</sup> “Ko nabong nen, ko mete nial nen, sete jinibb san rragrrag orongwose, ejki; sete anglo ne melrin san kele orongwose, ejki; ko inu kele Atua Natun, inu sete nurongwose; ko Tata suk kobbong, ni esan orongwose. <sup>37</sup> Inu Jinibb Mawos bea-vini pia-sorsan pia-irpe Noa nabong sen tuwi nga naus nga milep mus ko iel ngatan murron ko nanu jijle nir marmij. Suri re daron nen, jinibb nir arlelea nawon. Pia-sorsan kele ko pia-irpok tevi inu daron suk nga bea-luwi e. <sup>38</sup> Suri nabong nga wowomu nen nir, mian ko vitunen naus pia-us, jinibb nir aran ko arminmin ko arloli totkoiennir, ejpari nabong nga Noa mian re lolo drav nga milep e. <sup>39</sup> Ko sete arongwose naus nga pilep nga pivini, ejpari nga mian ko mivini m̄siale twenir. Pia-sorsan kele ko pia-irpok tevi inu daron suk nga bea-luwi e. <sup>40</sup> Renga daron nen, jinibb pieru portur re orsel; ko parla luwe nuru tuwen, ko tuwen putur jer. <sup>41</sup> Ko nesevin pieru porlik korti portabbu nurrer; ko parla luwe nuru tuwen, ko tuwen pilik jer. <sup>42</sup> Erpok ko, kapkulkulu. Suri kami sete kamrongwose nabong sev nga inu Numal se kami bea-luwi ren. <sup>43</sup> Kaprongwose nanu ngel: Poro jinibb san purongwose daron sev re nutpong nga jinibb venao pivini p̄irrarre naim sen, ko

ni puklu pimetmet ko putur ore nga jinibb nen sete p̄irrarre naim sen. <sup>44</sup> P̄irpok ko kami kele kapmetmet nga kaptiriv ko wor, suri inu Jinibb Mawos dea-pelari re mete nial nga sete taka-rongwose.

*Nale rrongrrongvi tweni jinibb ne majingen eru*

<sup>45</sup> “Jinibb si nga erpe jinibb ne majingen nga muosuri m̄irres, ko batun otoa? Numal sen ololi ni emetmete jinibb ne majingen sen nir, ko puwngani nir renge daron momsawos. <sup>46</sup> Jinibb ne majingen nga m̄irres nen pia-runge p̄irres daron nga numal sen pia-vini ko pia-lesi ni m̄imajing m̄irres mirpok. <sup>47</sup> Nuwretun nuwrai tevi kami, numal nen pia-loli m̄ernen pia-metmete joron totoklai nir. <sup>48</sup> Ko poro nga m̄ernen pivi jinibb nga m̄isij, ko puwrai re nolon, ‘O, numal suk ololola nga pulwi vini. Poro nga bololi nanu san, ni sete orongwos purongwose,’ <sup>49</sup> ko etipatun vajin pivrrali selen nir nga marmajing tevi nga numal sen m̄ilngi ni mivi jinibb nga milep rer, ko eaan ko eminmin tevi jinibb nga marok-minmin nir. <sup>50</sup> Ko numal se m̄ernen pia-luwi vini re nabong nga m̄ernen sete murrormi, ko renge mete nial san nga sete murongwose. <sup>51</sup> Ko numal nen pia-oji tweni m̄ernen pia-suw, ko pia-tor vitranḡi ni pusorsan tevi lartul nga marivel re sel eru, re lat nga jinibb para-ting ko para-runge p̄isij pilep.”

## 25

*Nale rrongrrongvi ne nesenwarreng m̄elakel esngavöl*

<sup>1</sup> Ko Iesu ela nale rrongrrongvi m̄inij kele, owra “Re daron nen, batun vanu ne melrin pia-pelari pusorsan tevi nanu ngel nga miplari ji nesenwarreng m̄elakel esngavöl ngel: Nesevin m̄elakel esngavöl arsa laet ser, ko aran arwera parivel ore jinibb san nga muwra putotko re nabong nen. <sup>2</sup> Nir elim norrormien ser ejkie, ko nir elim norrormien ser otoa. <sup>3</sup> Suri nir nga norrormien ser mijkie arsa laet ser, ko sete artori karsin; <sup>4</sup> ko nir nga norrormien ser mutoe, artori botel karsin ser oto tevi laet ser. <sup>5</sup> Ko jinibb nen nga muwra putotko nen ololola malum. Mian, ko nesenwarreng nen nir meter arruruwel, ko armatur.

<sup>6</sup> “Ko muruj mori nat nga m̄irrang sopen, ko san ekail owra ‘Kaplesi, jinibb nga putotko evini. Kapiel ore!’ <sup>7</sup> Ko nesenwarreng nen nir armera, ko arrowrowe laet ser. <sup>8</sup> Ko nir nga norrormien ser mijkie arwera tevi nir nga norrormien ser mutoe, ‘E, kapla karsin se kami sopen tevi kem, suri laet se kem artep.’ <sup>9</sup> Ko nir nga norrormien ser mutoe arwera lweni

tevir, ‘O, ejki rres, sete tivtere kem ko kami. Erres p̄elak kapluwi van re sto ko kapwuli wor nga pivi se kami.’ <sup>10</sup> Ko daron nga marluwi van parwuli e, ko jinibb nga putotko evini. Ko nir nga martirive aran arp̄itevi ni aran re totkoiien, ko mian ko arkikiore metali nen.

<sup>11</sup> “Mian ko vitunen vajin, nir nga norrormien ser mijkie nen arini arwera ‘Numal, numal, kuptasi metali tevi kem!’ <sup>12</sup> Ko ni owra lweni tevir, ‘Nuwretun nuwrai tevi kami, Sete nurongwose kami.’” <sup>13</sup> Ko Iesu owra kele: “Erpok, kapkulkulu, suri sete kamrongwose nabong nen rreknga mete nial nen nga inu bea-luwi vini ren.

*Nale rrongrrongvi ne jinibb itul nga martori nevöt se numal*

<sup>14</sup> “Suri renge batun vanu ne melrin, Atua pia-loli pusorsan tevi numal ngelle: Jinibb san owra pivel van re vanu nga ngasu san. Ko everuse jinibb ne majingen sen nir, ko elngir parmetmete joron nir. <sup>15</sup> Ko ela tevi nir san beje silva nevöt nuvasngavöl valim (5000), ko tevi nir san kele ela nuvasngavöl varu (2000), ko tevi nir san kele, nuvasngavöl vesan (1000). Ngok, elai tevir osorsan tevi norongwosien ser sisamis. Elai jile tevir, ko evel. <sup>16</sup> Ko ni nga m̄ila nuvasngavöl valim nen esaro van ngavilvil ko emajing ren, ko ololi kele ejpari nuvasngavöl valim kele. <sup>17</sup> Ko ni nga m̄ila nuvasngavöl varu nen ololi osorsan erpok kele, ko ni ololi kele ejpari nuvasngavöl varu kele. <sup>18</sup> Ko ni nga m̄ila nuvasngavöl vesan evan ko eli dan ko etevni silveni ren nevöt se numal sen nen. <sup>19</sup> “Mian ko vitu jer nen vajin, numal se jinibb ne majingen nen nir olwi vini, owra p̄ilesi suri ta nevöt sen nen ji nir, ko everuse nir. <sup>20</sup> Ko ni nga m̄ila nuvasngavöl valim evini; ko otori nuvasngavöl valim kele oto tevi, ko owrai tevi numal sen owra ‘Numal, nik kula nuvasngavöl valim ko tevik; ko kuplesi, nuloli kele nuvasngavöl valim kele ngel oto tevi.’ <sup>21</sup> Ko numal sen owra tevi ni, ‘Erres p̄elak! Nik kuvi jinibb ne majingen nga m̄irres, ko komokosuri erres. Suri kuosuri erres re nanu nga welili ngel, ko inu bea-loli nik kupametmete nanu pilep kele wor. Kupini re neiren se inu numal som.’ <sup>22</sup> Ko ni nga m̄ila nuvasngavöl varu evini, ko owra ‘Numal, nik kula nuvasngavöl varu ko tevik; ko kuplesi, nuloli kele nuvasngavöl varu kele ngel oto tevi.’ <sup>23</sup> Ko numal sen owra tevi ni, ‘Erres p̄elak! Nik kuvi jinibb ne majingen nga m̄irres, ko komokosuri erres. Suri kuosuri erres re nanu nga welili ngel, ko inu bea-loli nik kupametmete nanu pilep kele wor. Kupini re neiren se inu numal som.’ <sup>24</sup> Ko ni nga

māla nuvasngavöl vesan evini, ko owrai tevi: 'Numal, nurongwose, nik kuvi jinibb nga māterter. Komok-tawe wenen nga nik sete kumruwi, ko komok-ser kortoni wenen nga nik sete komok-juljule tweni dokolvin ren, arivi som. <sup>25</sup> Ko inu numtutu, ko nuan nusilveni nevöt som lolo dan. Kuplesi ngel, nanu nga mivi som.' <sup>26</sup> Ko numal sen owra lweni tevi: 'Nik kuvi jinibb ne majingen nga mäsij! Nibem emijmij temijpal. Kurongwose pae nga inu nomok-tawe wenen nga inu sete nurwi, ko nomok-ser kortoni wenen nga inu sete nomok-juljule tweni dokolvin ren, arivi suk. <sup>27</sup> Ko erpese sete kulngi nevöt suk re bang, ko re daron nga bea-luwi vini, ko bea-lai nevöt suk tevi majbböl nen nga bang mok-wuli lwenie?' <sup>28</sup> Ko owra tevi jinibb sen sapor, 'Kapla tweni nevöt suk jin, kaplai tevi ni nga mutori nuvasngavöl valim ngok. <sup>29</sup> Suri nir jikle nga martori pa, para-lai pilep kele ko wor tevir. Ko ni nga sete mutori milep para-la luwe ko wor jin. <sup>30</sup> Ko kapwirre jinibb ne majingen ngoknga sete muloli nanu san mīrres van re lat nga mimalik jerjer. Lok ngok jinibb para-ting ko para-runge pīsij pilep.'

*Daron nga Jinibb Mawos pia-wera suri lat nga puto suri re jinibb jikle nir*

<sup>31</sup> "Re daron nga inu Jinibb Mawos bealuwi vini tevi nosrövien suk, ko anglo nir para-pitevik. Ko bea-sakel re nai seksakel ne nosrövien suk. <sup>32</sup> Ko anglo nir para-ser kortoni jinibb nir ne vanu jikle rengo nok. Ko inu bea-tututweni nir sisamij rer, bealoli pivi meling pīeru e, pirpe jinibb nga mok-metmete sipsip mok-tututweni tweni sipsip sen nir rengo nanikot nir. <sup>33</sup> Ko bea-lingi nir nga marirpe sipsip nir re nevrek rres, ko nir nga marirpe nanikot nir re nevrek mair. <sup>34</sup> Ko bea-ivi numal, ko bea-werai tevi nir nga re nevrek rres, 'Kapini, kami nga Tata suk mīrij mīrres suri kami, kapla vajin batun vanu nga Tata suk muloli terai kami re daron nga womu jer nen nga iel ngatan mītipatun. <sup>35</sup> Suri inu numer ajik, ko kamla nanen tevik. Nolok emesmes, ko kamloli numinmin. Nuturvitan, ko kamtekai inu van loloim e. <sup>36</sup> Numalmal, ko kami kamlai sunsun nuri. Numsi, ko kami kamini kamkulkule inu. Nulik re naim ne nekaijen, ko kami kamini jik.' <sup>37</sup> Ko nir nga marres nen para-taole, para-werai tevi inu, 'E, numal, seveling namlesi nik, numer ajim, ko namwunganim, rreknga nolom emesmes, ko namloli kuminmin? <sup>38</sup> Rreknga seveling namlesi nik kuturvitant, ko namtekai nik van loloim se kem, rreknga kumalmal ko namloli kuri sunsun? <sup>39</sup> Rreknga seveling namlesi nik

kumsi, rreknga kulik re naim ne nekaijen, ko naminuk jim?' <sup>40</sup> Ko inu numal beawerai lweni tevi nir, 'Nuwretun nuwrai tevi kami, Erpe nga kamloli erres tevi tasik nga welili jer ngel san, ko erpe kele kamloli ko tevi inu.'

<sup>41</sup> "Ko mian ko bea-werai kele tevi nir nga rengo nevrek mair vajin, 'Kapruj ngasu inu, kami nga Atua mīrij pa māsij suri kami, ko kapan re nabb nga mīn tuwi ngok vini, nga Atua muloli terai Demij ko anglo sen nir. <sup>42</sup> Suri numer ajik, ko sete kamla nanen tevik. Nolok emesmes, ko sete kamloli numinmin. <sup>43</sup> Nuturvitan, ko sete kamtekai inu van loloim e. Numalmal, ko sete kamloli nuri sunsun; numsi, ko nulik re naim ne nekaijen, ko sete kami kamkulkule inu.' <sup>44</sup> Ko nir para-taole ko para-werai lweni tevi inu, 'E, numal, seveling namlesi nik, numer ajim rreknga nolom emesmes rreknga kuturvitant rreknga kumalmal rreknga kumsi, rreknga kulik re naim ne nekaijen, ko sete namloli nanu san tevi nik?' <sup>45</sup> Ko inu beawera lweni tevir, 'Nuwretun, nuwrai tevi kami, Erpe nga kami sete kamloli tevi san nga welili jer ngel, erpe sete kamloli ko tevi inu.' <sup>46</sup> Ko nir paran re lat ne norongen nga māsij ne tuwi ngok vini. Ko nir nga marres nen paran re mauren ne tuwi ngok vini."

## 26

*Numal nir se mēri Isrel armurri suri sel nga parevji pini Iesu*

<sup>1</sup> Ko daron nga Iesu mivinvini ore rijen sen ngok vajin, ko owrai tevi jinibb sen nir, <sup>2</sup> "Kamrongwose, teru le pa evi nabong ne nanen ne Asien se mēri Isrel nir, daron nga marrorrmī lweni nga marivel lingi Ijip tuwi. Ko inu Jinibb Mawos para-tekai kerasik nga para-rruloni inu para-wuse maure inu re nai pelaot, pijpari nga bemij pin."

<sup>3</sup> Re wosenen mawos bbong ko jinibb nir nga marlelep re sulsulen ko bīrtera nir nga marivi pa jinibb nga marlelep nir re mēri Isrel nir, arini arlik korti re batu jinibb ne sulsulen nir naim sen. Ko batu jinibb ne sulsulen nir nisen ko Kaeapas. <sup>4</sup> Ko armurri suri nga pirpese parrul re venae Iesu nga parevji pini. <sup>5</sup> Ko nir arwerwerai lweni tevir, "Re nabong ne nanen pijki, jinibb nir tara-revji kerr."

*Nesevin san evji nanu nga mapun mīrres pēlak re batu Iesu*

<sup>6</sup> Ko vitunen vajin, Iesu evan Betani re naim se jinibb san nisen Saemon nga tuwi mimsi e mesien nga niber mīriēmaul. <sup>7</sup> Re lat nen, nesevin san evini jin, otori botel san nga marmajing e nevöt nga mīrres san,

nisen alapasta. Ko renge botel nen, nuwi nga muto ren, mapun erres elep, ko nowlin ean mare jer. Ko ejvi re batu Iesu daron nga misakel pia-aan e. <sup>8</sup> Ko daron nga jinibb sen nir marlesi, nolor esij e ko arlolar e, ko arwerwera lweni tevir, "Erpese vinel mulokloksi nanu ngok mirpok?" <sup>9</sup> Suri poro parwulwule nuwi ngok, nowlin pilep temijpal, ko parlai tevi beres nir." <sup>10</sup> Ko Iesu orongwose norrorrmien ser, ko owrai tevir, "Erpese kamlokloksi vinel? Suri ololi majingen nga mürres san tevik. <sup>11</sup> Beres ngok nir arlik tetajer ko pa tevi kami, ko inu sete inu mea-lik tetajer tevi kami. <sup>12</sup> Renge nga nesevin ngel mijvi nuwi ngel re inu nibek, ololi lilane nga pa partevni inu. <sup>13</sup> Nuwretun nuwrai tevi kami, re iel ngatan totoklai ngabe nga parwerwera nospen nga mürres ngel ren, ko parsuþe kele nanu nga nesevin ngel muloli kele pivi now se ni."

*Jutas emarong nga þitkai kerasi Iesu*

<sup>14</sup> Mian ko san re nir esngavöl drromon eru, nga marveruse Jutas Iskariot, evan ji nir nga marlelep re sulsulen nir <sup>15</sup> ko owrai tevir: "Kapa-la sev tevik poro nga inu beateka kerasi Iesu tevi kami?" Ko arla bebbe nevöt silva evi ngavöl itul (30) tevi ni. <sup>16</sup> Ko etipatun re daron nen, epejpej nabong san nga mürres nga þitka kerasi Iesu ren.

*Jinibb se Iesu nir arloli lilane nanen ne Asien oto metmet*

<sup>17</sup> Mian ejpari nabong wumunen ne nanen ne niv nga is mijki ren. Ko Iesu jinibb sen nir arini jin, arwerai tevi: "Kumarong kem nabloli lilane ngabe nga nik kupaani nanen ne Asien ren?" <sup>18</sup> Ko ni owra "Kapan re ngaim ne Jerusalem ji jinibb san ngok, ko kapwerai tevi ni, 'Jinibb nevisvisenien owra "Daron suk oto mori pa. Bea-tori nanen ne Asien tevi jinibb suk nir re naim som." "

<sup>19</sup> Ko nir arloli erpe nga Iesu muwrai tevir, ko arloli lilane nanen ne Asien etriv.

*Iesu owra tweni nga Jutas þitkai kerasi ni*

<sup>20</sup> Mian ko rivriv jer ko vajin, nial muwaj pini, ko Iesu esakel tevi jinibb sen nir esngavöl drromon eru, para-aan. <sup>21</sup> Ko daron nga maraan e, ko owrai tevi nir: "Nuwretun nuwrai tevi kami nga san re kami pia-tekai kerasi inu." <sup>22</sup> Ko nolor arrum elep, ko artipatun arwerwera tevi ni, "Numal, evi inu?" <sup>23</sup> Ko ni owra lweni tevir, "San re kami nga rramok-saro rramok-la nanen re plet ngel, pia-teka kerasi inu. <sup>24</sup> Inu Jinibb Mawos beavan pirpe nga maruli suri inu renge Naul On pa. Ko wi, isi ko pia-ivi mñernen nga pia-teka kerasi inu Jinibb Mawos. Erres

þelak bbong re mñernen poro sete þiak." <sup>25</sup> Ko Jutas nga þitka kerasi ni owrai tevi ni, "Jinibb nevisvisenien, evi inu?" Ko Iesu owrai tevi, "Erpe nik kumwera."

*Iesu orro tuloni nanen ne Asien tevi nir*

<sup>26</sup> Ko re daron nga marok-aan malum e, Iesu ela niv ko owra erres tevi Atua suri, ko otpoi ko owngani tevi jinibb sen nir ko owra "Kaplai kapurroi, ngel evi nibek."

<sup>27</sup> Ko elai kele biles ko owra erres tevi Atua suri, ko elai tevir, ko owra "Kami jijle kapmini. <sup>28</sup> Ngel evi drrak nga puloli marongen se Atua putur imare. Inu mejvi ngel suri netlasien ne nololien se delung nir. <sup>29</sup> Nuwrai tevi kami, Sete nurongwose bemni kele norro ngel pijpari nabong nga bea-mini nga mimerr tevi kami renge batun vanu se Tata suk."

<sup>30</sup> Mian ko arla nubo nga marok-lai daron nga maraan jile re nanen ne Asien osuw, ko arivel vajin van re Botwen ne lolnai ne olip.

*Iesu owra tweni nga Pita pia-vilvil ore ni*

<sup>31</sup> Ko Iesu owrai tevir, "Kami jijle nolo kami pia-vitan suri inu renge natmupong ngel, suri aruli re Naul On, 'Bea-revji jinibb nga mok-metmete sipsip, ko sipsip parawolu sarsarr.' <sup>32</sup> Ko bea-tur imare kele, ko vitunen vajin ko bea-womu bea-ivel ore womu kami re Galili." <sup>33</sup> Ko Pita owra lweni tevi: "Poro nolo jinibb ngel jijle nir pia-vitan suri nik, ko inu ma nolok setete mia-vitan." <sup>34</sup> Ko Iesu owrai tevi, "Nuwretun nuwrai tevi nik, renge nat nga mupong ngel puwomu, vitunen ko nato pia-kokrou, ko nik kupa-vilvil ore inu pivatul." <sup>35</sup> Ko Pita owra lweni tevi: "Setete bea-vilvil ore nik ko, poro bea-mij wor tevi nik!" Ko jinibb sen jijle nir arwerai kele erpok.

<sup>36</sup> Vitunen Iesu eptevi jinibb sen nir aran re lat san nisen Getsemane. Ko owrai tevir, "Kaplík iel, daron nga inu ban beverus sopen iok." <sup>37</sup> Ko etkai Pita ko natu Sepeti nuru, arivel rujruj sopen. Ko ni nolon orrum elep vajin ko ornge esij. <sup>38</sup> Ko owrai tevir, "Inu nolok orrum temijpal, otomori puloli bemij e. Kaplík iel ko kapkulkulu þirres tevi inu." <sup>39</sup> Ko ni evel rujruj kele sopen van ngasu ko ejjol non van ngatan ko olot ko owra "Tata suk, poro pivi nanu nga þisisarow, kupla tweni biles ne norongen nga mñisij ngel, inu sete beaminmin ren. Ko piplari pusorsan tevi nik marongen som, sete inu marongen suk."

<sup>40</sup> Ko olwi kele vini ji jinibb sen nir nga itul nga ko elesi armaturrwel; ko owra tevi Pita, "Erpese kami sete kamviter kapkulkulu tevi inu mete nial þisansan?" <sup>41</sup> Kapkulkulu þirres, ko kapverus nga

sete nanu parini parrowrow p̄elake kami. Neñi kami emarong lengleng, ko nibe kami emijnij.”

<sup>42</sup> Ko evel lingir kele varwen ko olot kele, owra “Tata suk, poro pivi nanu nga p̄isisarow, kuploli biles ngel pia-asi re inu, nga inu sete beminmin ren. Ko pirpok ko wor, piplari ko wor pusorsan tevi marongen som.” <sup>43</sup> Ko olwi kele vini; ko elesi armatur kele, suri meter orrwel.

<sup>44</sup> Ko elinglingir ko evel lingir kele ko olot vatolin, owra kele nale mawos nga muwrair womu. <sup>45</sup> Vitunen, olwi kele vini ji jinibb sen nir nga itul nga, ko owrai tevi nir, “Erres, kapmatur vajin, kapmosi p̄irres. Kaplesi. Daron suk evini nga parteka kerasi inu Jinibb Mawos van re nevre lartul nga marsij nir. <sup>46</sup> Kapmera, kerr pivel. Kaplesi m̄er nga p̄itka kerasi inu otomori le pa pivini.”

*Devje nuval se Iesu arini arrul totkoni ni*

<sup>47</sup> Ko daron nga ni m̄irij malum e, ko Jutas, san re esgav̄ol dromon eru evini, eptevi delung nga milep san ngamartori nesip ne nuval ser nir ko βetiluk ser nir. Arivel ji jinibb nga marlelep re sulsulen nir ko b̄irtera nir nga marivi pa jinibb nga marlelep re m̄eri Isrel nir vini. <sup>48</sup> Ko ni nga p̄itka kerasi ni owrai pa tevir lat nga pia-loli surie, owra “Kaplesi si nga bea-rromji, ni evi ni nen ko. Kapa-rrul ren.”

<sup>49</sup> Marini vajin, ko ngavilvil ni evan ji Iesu ko owra “O, erres, jinibb nevisvisenien.” Ko orromji ni. <sup>50</sup> Ko Iesu owrai tevi ni, “Selek, kuploli vajin nanu nga kumini suri.” Ko nir arini, ko arrul totoni Iesu. <sup>51</sup> Ko san re nir nga marp̄itevi Iesu esaro ko ervei tweni nesip ne nuval sen ko eta jinibb san, ko eta tweni boron. Ko m̄ernen evi jinibb ne majingen se batu jinibb ne sulsulen nir. <sup>52</sup> Ko Iesu owrai tevi, “E, kuplingi lweni nesip ne nuval som ngok re m̄ilngen. Suri nir jijle nga marla nesip ne nuval, para-mij ko rene nesip ne nuval. <sup>53</sup> Nik kurrormi sete nurongwose beveruse Tata suk, ko ni lelingen wolok pukoni meling nga marlelep ne anglo ne nuval pisngav̄ol dromon pieru (12) parp̄itevi inu? <sup>54</sup> Ko poro pirpok, ko pirpese nga nale se Atua nga maruli rene Naul On nga pia-pelari ko wor suri inu pia-remali mawos?”

<sup>55</sup> Ko re daron mawos nen, Iesu owrai tevi delung nir, “Erpese? Kamloli erpe nuvi jinibb nga mok-revji jinibb san. Kamini tweni kaprrul totkonik, ko kamtori nesip ne nuval nir ko βetiluk nir. Ko tetajer nomok-lik rene Naim On, nomok-visviseni, ko sete kamrrul totkonik. <sup>56</sup> Ko nanu ngel jijle nir arpelari osorsan tevi

nale se Atua nga propet sen nir aruli wowomue tuwi pa.” Erij jile erpok, ko jinibb sen nir arivel arwolu lingi.

*Iesu otur re no Kaonsel*

<sup>57</sup> Ko delung nga marrul totkoni Iesu arevei tweni van ji Kaeapas, nga mivi batu jinibb ne sulsulen nir, lat nga jinibb nevisvisenien ne nale neseseien nir ko b̄irtera nir nga marivi pa jinibb nga marlelep re m̄eri Isrel nir markorti pa ren. <sup>58</sup> Ko Pita evivitue nir vitu jer van re lolo naworr ne naim se batu jinibb ne sulsulen nir nga mutur ren. Ko elik ngatan tevi jinibb nga marok-metmete lat nen, owra p̄ilesi bongsi nanu nga parloli tevi Iesu. <sup>59</sup> Ko jinibb nga marlelep ne sulsulen nir tevi nir jijle nga marok-tori gortien nga milep arpepej nale gerisen san nga p̄itre Iesu, puloli parlingi ni re mijen suri. <sup>60</sup> Ko sete arlor sweri san, ewretun nir elep arini ko arkerkeris bbong. Mian ko vitu jer nen ko vajin, jinibb eru orini <sup>61</sup> orwera “Merel owra ‘Inu nuvter bolokloksi Naim On se Atua ngel, ko nabong p̄itul kobong, be-ili lweni.’” <sup>62</sup> Ko batu jinibb ne sulsulen nir otur imare ko owrai tevi ni: “Sete kupwera nanu san? Erpese re nale se nuru nga morij terem e ngok?” <sup>63</sup> Ko Iesu omurrong. Ko batu jinibb ne sulsulen nir owra kele tevi, “Nungoni nik re nise Atua nga mimaur, kupwera weretunen tevi kem poro nik kuvi Mesaea Atua natun, rreknga ejki!” <sup>64</sup> Ko Iesu owrai, “Erpe nik kumwera. Ko nanu san kele bowrai tevi kami: Vitunen kapa-lesi inu Jinibb Mawos bea-sakel rene Atua nga derteren sen mutoe nevren rres. Ko bea-luwi re nabor ne melrin vini.” <sup>65</sup> Daron nga batu jinibb ne sulsulen nir murnge nale se Iesu ngok, ko ererrisi sunsun sen, ko owra “A, ni erij melmelas ko osopsope pa Atua! Erpese kerr rrampej malum jinibb kele san nga puwra nale kele sopen? Kaplesi, lelingenok kamrunge ni erij esij. <sup>66</sup> Kamrrormi erpese?” Ko nir arwera lweni tevi, “O, ni erres re pimij ko wor!” <sup>67</sup> Ko arlutōvi non ko aruti, ko nir sopen arwuje <sup>68</sup> ko artetnije ni, ko arwera tevi, “Kupwera tevi kem, nik Mesaea, isi ko muwjem ngok?”

*Pita evilvil ore nga sete orongwose Iesu*

<sup>69</sup> Ko Pita elik malum vare re naim rene lolo naworr nen. Ko nesenwarreng ne majingen san evini jini, ko owrai tevi ni: “E, nik kele komok-pitevi Iesu ne Galili.” <sup>70</sup> Ko ni evilvil ore rene no delung nir, owra “Sete nurongwose nanu nga kumwera ngok!” <sup>71</sup> Ko ni orujruj van morie metali ne naworr nen. Ko nesenwarreng m̄inij kele san elesi ni, ko owrai tevi nir nga marlik ie, “Merel okp̄itevi Iesu ne Nasret.”

<sup>72</sup> Ko ni evilvil ore kele ojuji mare, owra “O ejki, sete nurongwose morok!”

<sup>73</sup> Mian ko behlen kele, ko nir nga martur iok arini ji ni ko arwerai tevi Pita, “Ewretun nik kuvi nir san, suri rijen som erpe mēri Galili nir.” <sup>74</sup> Ko Pita ololi nale nga mīterter temijpal san, ko ojuji mare ren ko owra “Mowra sete nurongwose morok!” Ko mian ko ngavilvil nato okokrou. <sup>75</sup> Ko Pita orrorrmi vajin nale se Iesu nga muwrai tevi ni, “Puwomu, vitunen ko nato pia-kokrou, ko nik kupavilvil ore inu pivatul, nga kupwera sete kurongwose inu.” Ko ni eivare ko eting temijpal.

## 27

### *Arlingi Iesu van re nevre Paelat*

<sup>1</sup> Daron nga rorpong susu mivini e, ko jinibb nga marlelep re sulsulen nir ko bīrtera nir nga marivi pa jinibb nga marlelep nir artori gortien san, armurri suri parlingi Iesu re mijen. <sup>2</sup> Armurri jile osuw, ko arsere nevren ko arpitei tweni ko artekai van ji numal Paelet, nga batu numal se mēri Rom nir mīlgi ni nga pokmetmete mēri Isrel nir.

### *Mijen se Jutas*

<sup>3</sup> Ko daron nga Jutas, nga mītkā kerasi Iesu, mīlesi nga marwera Iesu pimij, ko norrorrmien sen olwi. Ko ela lweni bebje nevōt silva ngavōl itul nen elai van ji jinibb nga marlelep nir re sulsulen ko bīrtera nir nga marivi pa jinibb nga marlelep nir, <sup>4</sup> ko owrai tevir, “O, nuloli nololien re nga mirpel ngel nga mētkā kerasi jinibb nga mīrres pian re mijen!” Ko nir arwera “Ko erpese kumini kumngoni tevi kem? Sete evi nga kem, evi nga nik ko wor. Kuprunge surim tevi!” <sup>5</sup> Ko Jutas ewir tweni nevōt nen van loloim re Naim On, ko evel, ko evan orroloni lweni ni tevi dil, ko emij.

<sup>6</sup> Ko jinibb nga marlelep re sulsulen nir arla nevōt nen, ko arwera “Sete erres rraplai rraplingi re nevōt ne Naim On bokis nen, suri evi nowli drra ne mijen.”

<sup>7</sup> Ko armurri suri, mian ko arla nevōt nen, arwuli tweni dan sopen se mēer nga mok-majing sopen dan, ko arloli pivi lat san nga partevni jinibb neturivitan nir ren. <sup>8</sup> Ngok dan ngok arveruse “dan ne drra ne mijen” ejpari lelingen. <sup>9</sup> Ko ngok kele eplari erpe nale se Atua nga propet sen Jeremaea muwrai wowomue tuwi pa ngel: “Ko nir arlai bebje silva nevōt ne ngavōl itul, nowli ni nga mēri Isrel sopen arlingi nowlin. <sup>10</sup> Ko arlair arwuli tweni dan se mēer nga mok-majing sopen dan, erpe nga Numal Atua muwrai tevi inu bololi.”

### *Iesu otur rengo no Paelet*

<sup>11</sup> Musuw, ko Iesu vajin otur womu re no numal Paelet. Ko numal Paelet osusi tevi, owra “Nik kuvi numal se mēri Isrel nir?” Ko Iesu owrai tevi, “Erpe nga nik kumwera.” <sup>12</sup> Ko daron nga jinibb nga marlelep re sulsulen nir ko bīrtera nir nga marivi pa jinibb nga marlelep nir marwera tweni nale ser nga marij tere Iesu ren, ko ni sete owra lweni nanu san. <sup>13</sup> Ko daron nga nir marij jile musuw, ko numal Paelet owrai tevi ni, “Erpese? Sete kurnge nale ser nga muwun saut ngok nga marij terem ngok?” <sup>14</sup> Ko ni sete owra suri lweni nanu san tevi, ololi numal Paelet etaol lengenge.

### *Paelet owra tweni nga Iesu pimij ko wor*

<sup>15</sup> Ko sia jijle, re daron ne nanen re Asien mirpok, ko numal Paelet ok-marong pok-la tweni jinibb nga mīlik re naim ne nekaien san nga delung nir poro parwera nisen. <sup>16</sup> Ko jinibb san elik re naim ne nekaien re daron nen, arveruse nisen Iesu Barapas. Jinibb jijle arok-runge nanu nga marsij nga mok-lolir. <sup>17</sup> Mian ko delung arkorti vajin, ko numal Paelet osusi lesi owrai tevir, “Kammarong isi bea-la tweni tevi kami, Iesu Barapas, rreknga Iesu nga marveruse Mesaea?” <sup>18</sup> Suri numal Paelet orongwose nolor eval tevi Iesu ko niko martekai vini jin.

<sup>19</sup> Ko daron nga mīsakel ngatan re lat nga mok-sakel ren mok-wera suri lat nga puto suri tevi jinibb nir e, ko nesen sen oli naul ko elai tevi jinibbsan elai van jin, ko owra “Sete kuploli nanu san tevi jinibb nga mīrres ngok, suri numatur lesi bori natmupong suri ni, ko nurnge esij elep e.”

<sup>20</sup> Ko jinibb nga marlelep re sulsulen nir ko bīrtera nir nga marivi pa jinibb nga marlelep nir arververus delung nir nga parungoni pīla tweni Barapas ko pīrevji pini Iesu. <sup>21</sup> Ko re daron nga numal Paelet mususi kele e tevir, “Kammarong isi ko re nuru nga eru ngel bea-la tweni tevi kami?”, ko nir arwerai lweni, “Barapas!” <sup>22</sup> Ko numal Paelet owra lweni tevir, “Poropirpok, ko bololi sev tevi Iesu nga marveruse Mesaea?” Ko nir jijle arwera lweni tevi, “Pimij re nai pelaot!” <sup>23</sup> Ko numal Paelet owra “Suri sev? Ololi sev esij?” Ko nir arkail van mare kele, “Pimij re nai pelaot!”

<sup>24</sup> Ko numal Paelet elesi vajin sete orongwose puloli mun nanu san, suri delung artoni lweni ni eterter, ko otomori vajin parloli laten nga milep san. Ko elai nuwi sopen ko ejevavōl e rengo no delung nir ko owra “Inu drra jinibb ngel sete pubbōljik. Kaprunge suri kami tevi!” <sup>25</sup> Ko nir jijle arwera lweni tevi, “Rrek erres, drran pubbōlji kem ko metka se kem nir.” <sup>26</sup> Marwera jile mirpok, ko numal Paelet

ela tweni Barapas tevir. Ko etelmaji Iesu ko etkai vini ji jinibb ne nuval sen nir, nga pimij re nai pelaot.

*Jinibb nuval nir artetniji Iesu*

<sup>27</sup> Ko nir vajin artekai Iesu van re naim nga milep se numal Paelet, ko arser kortoni delung ne jinibb nuval nir. <sup>28</sup> Ko nir aruri tweni sunsun sen ko aruri lweni sunsun nga nulsen musongsong van ren; ngok arrongrrongvi nulse sunsun se numal ser nir. <sup>29</sup> Ko artali dil moku arrongrrongvi erpe nuvan se numal san, ko arlingi re batun ori; ko arla mavir otori orrongrrongvi nai se numal nga mok-tori. Musuw ko arjipa vajin baur ngatan jin arkerkerasi, arwera "O, erres, numal se mēri Isrel nir!" <sup>30</sup> Ko arlutövi ni, ko arla mavir nen ko arvirvirrale batun e. <sup>31</sup> Ko arkerkerasi ni mirpok jile musuw, ko aruri tweni sunsun ren ko aruri lweni sunsun sen van ren, ko arpitei tweni ni van re lat nga pimij re nai pelaot e.

<sup>32</sup> Ko daron nga marivel mirpok vini, ko arlesi jinibb san ne Saerin nga nisen Saemon. Ko aron tertere ni nga puwosi nai pelaot se Iesu. <sup>33</sup> Ko mian ko arini vajin re lat san nisen Golkota. Nais ngok renge nale se mēri Isrel nir owra "Lat ne bongur." <sup>34</sup> Ko arla norro, ko arlingi nanu san nga mirpe melu van ren nga puloli poro pimni ko niben puprus e. Ko arlai tevi. Ko ni, daron nga mimni lesi bbong, ko omusus pimni.

<sup>35</sup> Ko arruloni arwuse vajin re nai pelaot, musuw ko artutweni sunsun sen, ko artuwe daes arwera parlesi isi nga poro piaasi, niko sunsun se Iesu pivi sen. <sup>36</sup> Musuw, ko arlik ngatan vajin, ko armetmet suri Iesu ie. <sup>37</sup> Ko aruli tweni nale san ngel suri nga marevji pini ni, "Merel evi Iesu, numal se mēri Isrel nir," ko arwuse mare re batun. <sup>38</sup> Ko arruloni kele jinibb eru nga morok-vevna ko morok-revrevji jinibb tevi Iesu, nuru tuwen arwuse re nai pelaot san re nevren rres ko tuwen re nevren mair.

<sup>39</sup> Ko lartul nga marasasi ie arij esij tevi, arwirwirrleni batur tevi, ko armen keraji. <sup>40</sup> Ko arwera tevi, "A, nik nga kumwera kuplokoksi Naim On ko nabong pitul ko kupili lweni, kupla lweni nik poro kumivi Atua Natun, ko kuprow jubbul re nai pelaot vitan!"

<sup>41</sup> Erpok kele re jinibb nga marlelep re sulsulen nir, arkerkerasi Iesu tevi jinibb nevisisenien ne nale neseseiren nir ko birtera nir nga marivi pa jinibb nga marlelep re mēri Isrel nir, ko arwera <sup>42</sup> "Poro weretunen mīla se jinibb mīnij nir, ko erpese ni sete orongwose pīla lweni se ni? Evi numal ne Isrel, ko purow jubbul re nai pelaot vitan, ko rrapa-osuri ni vajin!

<sup>43</sup> Ni ebibto Atua, Atua pitka tweni vajin lelingenok poro pimrreni ni. Suri owrai pa, 'Inu nuvi Atua Natun.' "

<sup>44</sup> Erpok kele, nuru nga morok-revrevji jinibb nga marruloni nuru tevi Iesu oraji liwe nuru tevi Iesu.

*Mijen se Iesu*

<sup>45</sup> Ko mian ko levial ko vajin, nial muwosput, ko nat emalik pētpeti re vanu ejpari mete nial itul. <sup>46</sup> Ko momsawos mete nial itul sopon, ko Iesu ekail drrelan elep, owra "Eli, Eli, lama sapaktani?" Ngok renge nale se mēri Isrel nir owra "Atua suk, Atua suk, erpese kumieli lingi inu?" <sup>47</sup> Ko nir sopor nga martur ie arunge jabble, ko arwera "Merel everuse Elaaja ko." <sup>48</sup> Ko ngavilvil nir san owlun van ko ela nanu san erpe nalum, ko ololi ervei norro nga mimelmel van ren, ko elngi re mavir ko esareni tevi Iesu pimni. <sup>49</sup> Ko nir mīnij nen nir arwera "Pirpok pa! Rraplesi ta poro Elaaja pivini pia-la sen." <sup>50</sup> Ko Iesu ekail kele drrelan elep ko osrow pini.

<sup>51</sup> Ko kalik nga murrul ore lat nga muon emarrerr devjen eru e, mītipatun re bongsin nga mare osuw re bongsin nga ngatan. Ko narūi erūi ko bereng nir armoworwor. <sup>52</sup> Ko dubb nir artepīr, ko nibe jinibb on elep nga marmij armera. <sup>53</sup> Ko vitunen daron nga Iesu mimra jile re mijen sen ko nir arivel lingi dobbir, ko aran re Ngaim On Jerusalem; ko arpelari ji jinibb elep arlesir.

<sup>54</sup> Ko daron nga numal se jinibb nuval nen nir ko jinibb nga marpivevi ni marmetmet suri Iesu marunge narūi mīnūi ko nanu jijle nga marpelari ngok, ko armetutu temijpal, arwera "Ewretun, mērel evi Atua Natun!"

<sup>55</sup> Ko nesevin elep nga marok-majing sen ko nga marvijuri re Galili vini, artur ngasu bbong ko armeteni. <sup>56</sup> Livō re nir, Merri ne Maktala ko Merri tasu se Jemes ko Josep, ko Sepeti nesen sen.

*Josep etevni Iesu*

<sup>57</sup> Mian ko rivriv jer vajin, jinibb ne Aramatia san nga joron milep, nisen Josep, evini. Ni kele evi jinibb se Iesu san. <sup>58</sup> Ko evan ji numal Paelet, ongoni nibe Iesu. Ko numal Paelet owra nale san nga parlai. <sup>59</sup> Ko Josep ela niben, ko onbe ore kalik nga muwokwok e mīrres. <sup>60</sup> Ko elngi renge dubb sen nga mimerr nga mītai renge bereng. Ko eitini nevō bereng nga milep san oto ore metali ne dubb, ko evel lingi. <sup>61</sup> Merri ne Maktala ko Merri mīnij nen kele san orlik mori bbong ie, no nuru orlik ormawos e dubb.

*Jinibb nuval sopor armetmete dubb se Iesu*



<sup>62</sup> Ngok evi nabong nga parloli lilane nanu parto pumomsawos parteravi nabong ne Sapat. Mevinen jinibb nga marlelep re sulsulen nir ko Parasi nir arini arkorti ji numal Paelet, <sup>63</sup> ko arwera "Numal, namrromi iok. Jinibb ne gerisen ngok daron nga mimaar malum e, ko owra 'Vitunen, nabong pitul, ko bea-maur luwi kele re mijen.'" <sup>64</sup> Ngok, kupwera ta nale san nga parmetmet ore dubb pirres pijpari nabong pitul. Jinibb sen nir tarini ko tarvenae tweni ni ko tarwera tevi jinibb nir, 'Ni emaur luwi re mijen.' Ngok poro pipok gerisen nga vitu jer nen tia-sij tia-asie nga womuj nen." <sup>65</sup> Ko numal Paelet owrai tevir, "Kamrongwose kapla jinibb nuval sopor. Kapiel vajin kaploli parmetmet ore nanu jikle puto pirres pirpe nga kami kamrongwose."

<sup>66</sup> Ko arivel aran ko arlingi nanu san renge nevöt nga muto ore metali nga puloli parongwose poro jinibb san piasi van lolaim. Ko arlingi jile osuw, ko arlingi vajin jinibb ne nuval nen nir parmetmet ore.

## 28

### *Iesu emaur luwi kele*

<sup>1</sup> Mian ko vitunen ko vajin, nabong ne Sapat osuw ko nial etipatun nga pimraej re nabong womu re wik, ko Merri ne Maktala ko Merri münij nen kele oran orwera porlesi dubb. <sup>2</sup> Ko nanü nga milep san emü, suri anglo san se Numal Atua ojubbul re melrin vini; evini eitini tweni nevöt ne metali, ko esakel ren. <sup>3</sup> Non erinrin erpe moro navil ko sunsun sen eraprap temijjal erpe numow. <sup>4</sup> Ko nir nga marmetmete dubb armetutue ko aririr lengleng, arirpe jinibb nga marmij nir. <sup>5</sup> Ko anglo erij, owrai tevi nesevin nen nuru, "E, sete kopormetutu, suri nurongwose komorpej Iesu nga mimij re nai pelaot. <sup>6</sup> Ni ejki iel. Suri emaur luwi kele, erpe nga muwrai wowomue. Koporini ta koporlesi lat nga mimatur ren." <sup>7</sup> Nuru orlesi jile osuw, ko anglo owrai kele: "Koporan pingavil, koporwera tevi jinibb sen nir nga ni emaur luwi kele pa renge mijen. Ko ni puwowomue kami van re Galili e, ko kapalesi ie. Pirpe nga inu mowrai ngel tevi kamru." <sup>8</sup> Ko orivel lingi dubb ngavilvil tevi metutuen ko neiren nga milep, ko orwolu van porla nale tevi Iesu jinibb sen nir. <sup>9</sup> Ko ortaole orsorrvi lengleng Iesu miplari ji nuru, ko owra "O, erres." Ko oran orjipa ngatan jin ko orrul totoni ßelan, ko orsurövi ni. <sup>10</sup> Ko Iesu owrai tevi nuru, "Sete kopormetutu. Koporan koporwera

tevi tasik nir nga para-wowomu iak Galili, ko para-lesik ie."

### *Nale se jinibb nuval nir*

<sup>11</sup> Ko daron nga nuru moran e, ko jinibb sopor nga marmetmet dubb nen arluwi van Jerusalem e, ko arwera tevi jinibb nga marlelep re sulsulen nir nanu jikle nga marpelari. <sup>12</sup> Ko nir arkorti tevi birtera nga marivi pa jinibb nga marlelep nir ko armurri suri parloli pipese partawi ore nanu nga miplari. Mian ko vitunen ko vajin arla nevöt elep tevi jinibb nuval nen nir, <sup>13</sup> ko arwera tevi nir, "Kami kapwera tevi jinibb nir, 'O, jinibb sen nir arini natmupong ko arvenae tweni niben daron nga nammatur e.'" <sup>14</sup> Ko poro numal Paelet purnge nale ngel, ko kem naba-van nabaloli pirres tevi ni, ko kami sete kapa-lanorongen nga müsij ren." <sup>15</sup> Ko jinibb nuval nen arla nevöt nen evi se nir, ko arloli erpe nir marwera suri tevir. Ko nospen ne gerisen ngel meri Isrel nir arsupe ejpari lelingen ngel malum.

### *Iesu ermali ji jinibb sen nir*

<sup>16</sup> Ko Iesu jinibb sen nir esngavöl dromon san (11) arivel van re Galili van re botwen nga Iesu muwrai pa tevir. <sup>17</sup> Ko daron nga marlesi ni, ko arsurövi ni; ko nir sopen sete arosuri erres. <sup>18</sup> Ko Iesu evini mori jir, ko owrai tevir, "Atua elai pa derteren jile tevi inu re nanu jikle ne melrin ko iel ngatan. <sup>19</sup> Ngok, kapan re vanu jikle, kapvisviseni jinibb nir, paravi jinibb suk. Ko kappaptaes nir re nise Tata suk ko re nise inu Atua Natun, ko re nise Nerün On. <sup>20</sup> Ko kapvisvisenir nga parloli suri nanu jikle nga mowrai tevi kami. Ko kaplesi, inu beptevi kami tetajer, pian pijpari ngatan ngel bongsin."

**Nospen nga Mirres se  
Iesu Kristo nga  
MAK  
Muli  
Batu nale nga mivsviseni  
lut nga parmeteni naul  
ngel puto suri**

Naul ngel etipatun re nale san nga muwra "Batu nospen nga mirres se Iesu Kristo, Atua Natun." Mak eviseni nga Iesu evi jinibb ne majingen, ko nale sen derteren nen otoa. Rramrongwose rraplesi derteren sen reнге murrun nga mokvisviseni jinibb e nir, ko nga derteren sen otoa nga puoji tweni demij e nir, ko nga pitlasi tweni nololien se jinibb e nir. Iesu owrai tweni nga ni evi Jinibb Mawos, ko evini nga elai mauren sen nga pitlasi tweni nololien se jinibb nir nga puloli parivel sisarow. Mak ospe suri nanu nga marinijnij nawone nir (merikel) nga Iesu mulolir easi nga muspe nale se Iesu.

Re naul ngel womujnen Mak ospe suri Jon Baptaes ko majingen sen, ko nga Jon mipaptaese Iesu. Ko vitunen ospe kele suri Demij nga murrowrowe Iesu. Ko vitunen beblen, etajer nga muspe suri majingen se Iesu nga muloli jinibb nga marmesi arres luwi kele, ko okvisviseni kele jinibb nir. Ko jinibb sapor arok-tere ni ko tetajer arok-lolarsi, ko lolaren ser ean ma mare elep.

Batun 11 ejpari 16 arsupe kis bbong wik nga Iesu pimij ren, mian ko arsupe kele nga mimaur luwi re mijen.

*Jon elik reнге lolo merwer ewerwer*

<sup>1</sup> Batu nospen nga mirres se Iesu Kristo Atua Natun. Ko etipatun erpel: <sup>2</sup> Erpe Atua owrai reнге naul nga Aesea propet sen muli tuwi pa, owra "Kapmurrong, bokoni jinibb suk san nga puwowomu re Mesaea, ko puloli sel se ni puto metmet. <sup>3</sup> Drrela mernen ekail reнге lolo merwer owra 'Kaploli lilane sel se Numal puto metmet terai! Kaploli mesekle sel sen nir parmetet pirres.'" <sup>4</sup> Erpok ko Jon evini, ko ewerwer owra "Kaprieni lweni nolo kami reнге nololien se kami nir, ko kappaptaes, ko Atua pitlasi tweni nololien se kami." Ko Jon okpaptaes reнге lolo merwer. <sup>5</sup> Ko reнге ie jinibb jijle ne vanu ne Jutia nir ko nir jijle nga reнге Jerusalem nir arivel tweni. Arwerwera tututweni nololien ser nir, ko Jon epaptaese nir reнге nuwi seser ne Jortan.

<sup>6</sup> Jon ori bbong silvi kamel nga marvati mivi sunsun, ko etatuwe nevlul buluk reнге netutwen, erpe Elaeja tuwi. Ko orro bbong nato nga mok-rowrow reнге mošmös ko narllu sukabak nga mieri.<sup>A</sup> <sup>7</sup> Ko ewerwer owra "San nga pivivitu suri inu vini niko, ni evan wor mare reнге inu. Inu sete nures rragrrag nuvter nga bejiol vitan nga betlasi tweni dil reнге but sen. <sup>8</sup> Inu nomok-paptaese kami bbong e nuwi le, ko ni ma pia-paptaese kami e Nerin On."

*Jon epaptaese Iesu*

<sup>9</sup> Sete epriv ko Iesu evel lingi sisen Nasret, ngaim nga welili ne Galili san, ko evini ji Jon. Ko Jon epaptaese ni reнге nuwi seser ne Jortan. <sup>10</sup> Ko daron nga mitawij reнге nuwi imare, ko elesi evesane melrin eteri wukari eru e etpir; ko elesi Nerin On erpe wumer orow jubbul rengen vini ko esakel reнге ni. <sup>11</sup> Ko drrela Atua evel reнге melrin vini owra "Nik kuvi natuk nga numrrenim elep, nurnge erres surim."

*Demij orrowrowe Iesu*

<sup>12</sup> Daron mawos nen ko pa, Nerin On owowomue Iesu orujruj kele wor van reнге lolo merwer liven sapon. <sup>13</sup> Ko ni elik reнге ie ejpari nabong ngavöl ivij (40) nga Demij mok-rrowrowe, ni elik reнге lat nga nanu rrum ne lolo merwer nir marok-tur reнге. Ko anglo arok-kuluklu metmet re ni erres kemkañe.

*Iesu olwi van Galili e ko etipatun majingen sen*

<sup>14</sup> Arlingi womue Jon reнге naim ne nekaien, mian ko vitunen vajin ko Iesu ea-vini reнге Galili, evisviseni nospen nga mirres se Atua. <sup>15</sup> Ko ni owrai owra "Nabong suk mawos le pa, ko batun vanu se Atua oruj mori pa pivini. Nolo kami pulululwi ko kaposuri nospen nga mirres."

*Iesu everus jinibb ivij nga marok-tutumun*

<sup>16</sup> Vitunen vajin ko Iesu evel sere suri jeli nuwito nga milep ne Galili. Ko elesi Saemon nuru tasin wor Antru orok-juröni niva se nuru van reнге nuwi ngatan, suri nuru orivi jinibb nga morok-revrevei nai. <sup>17</sup> Ko Iesu owrai tevi nuru owra "Laru, koporini koporvitu surik, ko inu bololi kamru koporivi jinibb nga morok-revrevei jinibb." <sup>18</sup> Ko orsaro ngavilvil orlingi kurtweni niva se nuru ojpon jer, ko orvijuri suri ni.

<sup>19</sup> Ko daron nga mivel rujruj kele beblen e ko elesi Sepeti natun nuru, Jemes ko tasin

<sup>A</sup> 1:6 narllu sukabak nga mieri: eg blong sugabag; honey.

wor Jon, orsakel reнге drrav ser orok-illie lweni niva ser lat nga marmarrerr nir. <sup>20</sup> Ko Iesu everus nuru kele, ko nuru orlingling tata se nuru Sepeti reнге drrav ser tevi jinibb ne majingen sen nir, ko orvijuri Iesu.

*Iesu oji tweni nemin nga misij reнге jinibb san*

<sup>21</sup> Ko Iesu eptevir aran reнге ngaim ne Kapaneam e. Ko reнге Sapat aran reнге naim ne loten ser, ko Iesu evisviseni jinibb nir. <sup>22</sup> Ko daron nga jinibb nir marmurrarong suri ni nevisvisenien sen e ko bbösa elair e. Suri ni nevisvisenien sen orrow erres, sete erpe nevisvisenien se jinibb nevisvisenien ne nale nesereien nir. <sup>23</sup> Ko re daron nen reнге naim ne loten, jinibb nga nemin nga misij misisilvi san elik reнге, ko ekail van mare, owrai tevi Iesu <sup>24</sup> owra "Sev som oto ni le iel, nik Iesu ne donasret? Kuvini nga kuplokloksi kem? Inu nurongwos nik, isi nik. Nik kuvi jinibb on se Atua." <sup>25</sup> Ko Iesu ewer ore nemin nga misij ko owrai tevi owra "Sete kuprij, kupivare lingi ni." <sup>26</sup> Ko nemin nga misij ololi ni elilawij ko eririr lengleng. Ko ekail van mare ko esil ivare, ko owlu lingi. <sup>27</sup> Bbösa nga milep elair e, ko arsur vijvij, arwerwera lululweni tevir, "Sev le ngel? Nevisvisenien nga mimerr san! Nale sen orrow otutun erres, owrai bbong tevi nemin nga marsij nir ko arosuri ni." <sup>28</sup> Ngavilvilsen nospen nen arsupsupe rrrrale petpeti vanu ne Galili jile nir.

*Iesu ololi Pita pilen ko jinibb elep nga marmesi arres luwi*

<sup>29</sup> Mian ko nir arivare lingi naim ne loten vini vare e, ko artajer van reнге naim se Saemon e ko Antru; ko Jemes ko Jon orpitevir. <sup>30</sup> Ko iok Saemon pilen lekter emsi mesien dowalul ematur, ko arwerai tevi Iesu. <sup>31</sup> Ko ni evan ko orrul re Saemon pilen nevren ko esa raji imare. Ko mesien dowalul evel lingi vin nga, ko ean etabbu nurrer.

<sup>32</sup> Ko reнге nat nga mirivriv daron nga nial miwaj pini e ko nabong on ser musuw, ko jinibb nir arwowosi vajin jinibb nga marmesi nir, ko artekai jinibb nga nemin nga marsij marsilvir kele arini ji Iesu. <sup>33</sup> Ko jinibb jijle nga reнге ngaim nen arini arlik korti armot rrale metali vare e. <sup>34</sup> Ko ni ololi nir elep nga marmesi mesien lele arres luwi, ko oji tweni nemin nga marsij elep. Ko ewer orer nga sete parij, suri arongwose ni.

*Iesu ewerwer reнге vanu ne Galili petpeti*

<sup>35</sup> Renge rorpong susu nat nga p̄isal p̄irin, ko Iesu emremra esan evel van

reнге lat nga nat mubbubbil e san, ko lot ie. <sup>36</sup> Mian ko sete epriv ko Saemon ko nir nga marlik tevi ni, arpej ni ko arvivotu suri ni. <sup>37</sup> Mian ko artor sweri ko aran jin. Daron nga maran jin e, ko arwerai tevi ni arwera "Ai, jinibb jijle arok-pej nik." <sup>38</sup> Ko ni owrai tevir owra "Kerr pian kele wor re ngaim minij e nir, nga inu bewerwer kele renger. Suri nuvini tweni iok le ngel." <sup>39</sup> Ko ni evan reнге loloim ne naim loten ser petpeti nir reнге Galili ko ok-werwer reнге nir, ko okoji tweni nemin nga marsij nir.

<sup>40</sup> Ko nabong san jinibb nga mimi mesien nga niber minemaual san evini ejipa jin ngatan, ko ongoni tevi ni owra "Wurru, poro nga nik kupmarong ko kurongwos kuploli inu bowokwok." <sup>41</sup> Ko Iesu orrorrmi lengleng ni, ko sete ering e mesien sen, ko esaro elngi nevren reнге; ko owrai tevi owra "Inu numarong. Kupwokwok ko." <sup>42</sup> Ko ngavilvilsen mesien nga niber minemaual evel lingi ni, ko ni owokwok ko ornge erres luwi. <sup>43-44</sup> Ko reнге daron mawos nen ko pa Iesu ewer ore ni, owrai tevi, "Kuplesi sete kupwerai nanu pisan tevi jinibb pisan, ko kupvijuri sel van re Naim On, ko kupasi ji jinibb ne sulsulen san pilesim.

Ko kuplai nanu ne sulsulen nga Moses muwrai reнге nale nesereien sen tevi ni. Suri kumwokwok pa." Ko ni elinglingi evel. <sup>45</sup> Evel van ko etipatun osupsupe limjer, etewijreni nanu nga elep. Ko ololi Iesu setemun orongwos pivel limjer reнге ngaim mun nir, ni elik jer ko pa reнге lolo merwer. Ko ngok ololi bbong jinibb ne lat petpeti arivivel tweni malume.

## 2

*Iesu ololi jinibb nga devje niben mimij san erres luwi*

<sup>1</sup> Nabong evis arasi osuw, mian ko Iesu olwi kele van reнге Kapaneam e, ko elik re naim se Pita. Ko jinibb arunge nospen nen nga ni elik reнге loloim nen. <sup>2</sup> Ko delung elep aran jin reнге loloim; ko loloim setemun evter nir, ko vini vare e kele reнге roro metali setemun evter kele. Ko ni ewerwer reнге nale nga m̄irres tevir.

<sup>3</sup> Ko nir sopor ara-vini vivitu tevi jinibb san nga devje niben mimij; nir ivij arwosi reнге maling sen. <sup>4</sup> Ko sete arongwos parini mori ji Iesu, suri jinibb elep pelak. Ko arsa van mare reнге drru naim, ko arrarre drru naim mare momsawos lat nga Iesu milik e etpir. Arrarre jile osuw, ko arla dil sopor, ko arile reнге maling nga marsale m̄ernen ren, ko arjuröni van ngatan e. <sup>5</sup> Ko Iesu elesi nosurien ser, ko owrai tevi m̄er nga devje niben mimij

nen, owra "Natuk, nololien som nir nutlasi twenir pa osuw."

<sup>6</sup> Ko jinibb nevisvisenien ne nale nesereien sopor arlik ie renge daron nen ko arrorrmi sarrsarre renge nolor, arwera <sup>7</sup> "Erpese m̄erel n̄irij mirpok? Ni erij melmelas ko osopsoḡe pa Atua! Isi orongwos p̄itlasi tweni nololien nir, Atua kobbong esan bb̄ölb̄ö!" <sup>8</sup> Ngavilvilsen Iesu ornge niben nen, orongwose nga nir arrorrmi erpok renge nolor. Ko owrai tevir, owra "Suri sev kami kamrorrmi nanu ngel nir renge nolo kami nir mirpok?" <sup>9</sup> Evi nanu nga n̄isisarow bbong nga bowrai tevi m̄erel, 'Nololien som nutlasi tweni pa,' suri si p̄ilesi poro nuwretun rrek nukrekris kobbong? Ko evi nanu nga n̄iterter kele wor asi ngok nga poro bowra, 'Kuptur imare kupla milngom ko kupiel van renge naim som e,' suri jinibb j̄ille parlesi lelingen poro piplari pirpe nga mowrai ngok. <sup>10</sup> Ko bololi vajin nanu nga n̄iterter nen, puloli kaprongwose kele nga inu Jinibb Mawos derteren suk oḡe renge iel ngatan nga ḡetlasi tweni nololien." Ko ni owrai tevi m̄er nga devje niben mimij, owra <sup>11</sup> "Nuwrai tevi nik, Kuptur imare kuplai maling som kupwosi, ko kupiel van renge naim som e." <sup>12</sup> Ko ni otur mera kasi ngavilvil, ko owosi maling sen ko evel limjer renge nor evan vare e. Ko nir j̄ille bb̄ösa elair e, ko arsurövi Atua arwera "Sete pa rramlesi nanu san erpe nga ngel tuwi, ejki rres nawon wor."

*Iesu everuse Livae pivi jinibb sen, pivi-juri ni*

<sup>13</sup> Ko Iesu evel olwi kele van renge nuwito ne Galili e. Ko jinibb elep aran j̄i ni, ko ni evisviseni nir. <sup>14</sup> Ko renge daron nga mivel asi, ko elesi Livae natu Alpuz elik renge naim ne takis nga mok-majing rengen. Ko owrai tevi ni owra "Merel, kupini kupvijurik." Ko ni otur imare kasi ko evijuri ni.

<sup>15</sup> Musuw vajin ko vitunen daron nga m̄ilik renge nanen m̄iaan, ko jinibb elep nga marok-la nev̄öt ne takis, ko jinibb nga marok-loli nololien nga marsij nir nga marwir twenir arlik tevi, ko jinibb sen kele wor nir, ko nir elep kele wor nga marvijuri. <sup>16</sup> Ko jinibb ne nevisvisenien ne nale nesereien nga marivi Parasi sopor arlesi esij ko arlolair e. Ko aran arlesi jinibb se Iesu nir, ko arwor suri Iesu tevir, arwera "Erpese ni aan ko eminmin tevi jinibb nga marok-la nev̄öt ne takis ko jinibb nga marok-loli nololien nga marsij nir!" <sup>17</sup> Daron nga Iesu murnge nale ser ngok e ko owrai tevir owra "Nir nga marres sete armerreni dokta, ko nir nga bbong marmesi ko armerreni dokta. Erpok ko,

inu sete nuvini tweni beveruse nir nga marok-wera tetajer nga nir lweni marres, ejki, ko nuvini tweni bbong beverus nir nga sete markerkeris, ko marwer limjere nga marsij."

*Nosusien suri murrun nga parlinglingi nanen parvil*

<sup>18</sup> Jon jinibb sen nir ko jinibb se Parasi nir arvil. Ko jinibb sopor arlesi, ko arini j̄i Iesu ko arwerai tevi, arwera "Suri sev Jon jinibb sen nir ko Parasi nir jinibb ser nir marvil, ko nik jinibb som sete marvil?" <sup>19</sup> Ko Iesu owrai tevir, owra "Orongwos jinibb nga mutotko selen parvil daron nga m̄ilik malum tevir e? Daron nga m̄ilik malum tevir e, ngok sete arongwos parvil. <sup>20</sup> Mian ko nabong nen nir para-vini vajin, ko para-tekai tweni jir; ko ngok ko, nir para-runge p̄isij ko para-vil ko renge nabong nen nir.

<sup>21</sup> "Ko erpok kele sete jinibb san orongwos p̄ila kalek nga mimerr ko puwol ore lat nga n̄imarrerr e renge sunsun tera, ko p̄ilile ore rengen. Poro pirpok, ko nga mimerr tia-sakuk ko tia-teri kele kalek nga m̄itra, ko tia-loli lat nga n̄imarrerr tia-lep temijpal. <sup>22</sup> Ko erpok kele, sete jinibb san orongwos pujongjongi norro nga mimerr van renge botel nga m̄itra nga marloli nevlü nanikot e. Poro pirpok, ko norro nga mimerr tut, tuloli nevlü nanikot nga m̄itra tirrerren ko tiap rrrersi, suri etra p̄elak. Ko norro timejiviviv tisij, ko nevlü nanikot kele tisij. Pirpel ko, norro nga mimerr parlingi ko wor renge nevlü nani nga mimerr mimalum m̄irres."

*Jinibb se Iesu nir arsesri wene wit renge nabong ne Sapat*

<sup>23</sup> Mian ko Iesu evel otvi naut ne wit san renge nabong ne Sapat. Eptevi jinibb sen nir, ko jinibb sen nir artipatun arsesri wene wit nir ko arlair arurrurro surseler. <sup>24</sup> Ko Parasi sopor arlesi, ko arwerai tevi ni, arwera "Kuplesi ta! Nir arloli nanu nga sete mumomsawos renge nabong ne Sapat ko!" <sup>25</sup> Ko ni owra lweni tevir, owra "Aro, ejki ma, ko rreknaga ma kami sete kameve renge Naul On, nanu nga Numal Devet muloli daron nga nanen ser mijkie, numer m̄iaji ni ko nir nga marlik tevi ni?" <sup>26</sup> Ni ean renge Naim On se Atua daron nga Apiata mivi batu jinibb ne sulsulen, ko ela niv nga sete erres renge jinibb nawon parurroi, evi kis bbong se jinibb ne sulsulen ko; ko orroi, ko ni elai kele tevi nir nga marlik tevi ni arurroi kele." <sup>27</sup> Ko Iesu ewer oti nale sen vajin tevir, owra "Atua elngi Sapat nga p̄ila se jinibb, sete elngi jinibb nga p̄ila se Sapat, ejki! <sup>28</sup> Ko niko erpok ko inu Jinibb Mawos nuvi Numal ne Sapat."

## 3

*Iesu ete nevre jinibb san nga mīkati emetet luwi*

<sup>1</sup> Iesu olwi kele evan reнге naim ne loten. Ko reнге loloim ne loten nen, jinibb san nga nevre n mīkati elik reнге. <sup>2</sup> Ko Parasi sopor armeteni suri ni, poro nga ni puloli mēr nga nevre n mīkati nen pīrres reнге nabong ne Sapat; ko ngok nir partor sweri sel san nga parevei ni pian re kot suri. <sup>3</sup> Ko ni owrai tevi mēr nga nevre n devjen mīkati nga, owra “Kupini ta iel, kuptur womu iel.” <sup>4</sup> Ko ni owrai tevi nir, owra “Reнге devjen ne nale neseseien, erres nga parloli nanu nga nīrres reнге nabong ne Sapat? Rrek poro pijki, parloli pīsij? Erres nga parloli jinibb san pīrres luwi re nabong ne Sapat? Rrek poro pijki, ko parloloksi jinibb rrek!” Ko nir armurrong. <sup>5</sup> Ko Iesu vajin oklu rrale nir jilje nga martur rrale ni, ko ololarsir ko ornge esij, suri nolor eterter elep erpe nevōt. Ko owrai tevi mēr nga nevre n mīkati, owra “Kupete ta nevre n pimetet.” Ko ni ete nevre n emetet erres luwi. <sup>6</sup> Ko Parasi nen nir arivare vini vare e, ko arsaro ngavilvilsen aran arkorti tevi jinibb se Erot nir. Ewretun Parasi nir ko jinibb se Erot nir tetajer orok-lololarsi lweni nuru, ko arlik lat sansan vajin, ko arsupupe suri parevji pini Iesu pīrperse.

*Delung elep arvitu suri Iesu*

<sup>7-8</sup> Iesu eptevi jinibb sen nir, arjubbul luwi kele van reнге nuwito ne Galili e ngalu. Ko delung nga delung nga milep nga marunge nanu nga marlelep nga ni mok-lolir arinini jin ko arvijuri, nir ne Galili ko nir ne Jutia ko nir ne Jerusalem ko nir ne Itumia, ko nir ne devjen nga muto roroni van Jortan e, ko rrale Taea ko Saeton. <sup>9</sup> Ko Iesu owrai tevi jinibb sen nir nga parwer totoni ngarr drav san puto terai ni, suri delung elep pēlak, ko tarlilji ni. <sup>10</sup> Ko ni ololi nir elep pa arres luwi, ko niko nir elep nga marmesi artontonir parini mori arlilji Iesu, arwera parjipari. <sup>11</sup> Ko nemīn nga marsij nir, daron nga marlesi ni e ko arwajenir van ngatan reнге non, ko arkail van mare arwera “Nik kuvi Atua Natun!” <sup>12</sup> Ko ni otortorir, ko ewer orer eterter nga sete parwowra tweni ni tevi jinibb nir parongwose, pijki.

*Iesu otobbobbue jinibb sen nir es-gavōl drromon eru (12)*

<sup>13</sup> Mian ko Iesu otongsa tevi jinibb sen pētēpeti nir van reнге botwen nga muwu mare milep san. Ko reнге marongen se ni, ni everus nir esgavōl drromon eru (12) arini mori jin, ko otobbobbue nir. <sup>14</sup> Ko ni everuse nir arwaji aposol, nga

parok-pitevi ni, ko ngok pok-konir parok-an parok-werwer. <sup>15</sup> Ela derteren tevir nga parok-oji tweni nemīn nga marsij nir nga marok-sisilvi jinibb nir parivare. <sup>16</sup> Jinibb nen nir niser le ngel: Saemon nga ni mīlngi kele nisen san miwajie Pita, <sup>17</sup> ko Jemes nga Sepeti natun, ko tasin wor Jon, nga ni mīlngi kele nise nuru morwajie Boanejes, nga muwra puwra natu belver (suri orivi jinibb nga morok-verver). <sup>18</sup> Ko Antru ko Pilip ko Bartolemu ko Matiu ko Tomas ko Jemes nga natu Alpus ko Tateas ko Saemon ne Selote (ngok evi pati se lartul nga marmērreni parwirre mēri Rom nir), <sup>19</sup> ko Jutas ne Iskariot nga vitunen pia-tekai kerasi Iesu van reнге mijen.

*Jinibb sopor arwera Iesu ok-loli majingen sen reнге derteren se Demij*

<sup>20</sup> Iesu olwi kele vini reнге naim se Pita e. Ko delung elep kele arini korti kele jin, ko ngok ololi setete daron ser otoa, erpok kele re daron ne nanen kele. <sup>21</sup> Ko metka sen arunge, ko arivel tweni parlesi lweni ni; suri jinibb sopor arwera ni elengleng.

<sup>22</sup> Ko jinibb ne nevisvisenien ne nale neseseien sopor arivel reнге Jerusalem e vini, ko arwera “Belsipa ko, numal se demij nir, ok-pitpitevi ni nga mok-oji tweni nemīn nga marsij marok-ivare ngok.” <sup>23</sup> Ko ni everus nir arini jin mori, ko ni owra nale rrongrrongvi sopor tevir, owra “Demij puoji lweni ni pīrperse?” <sup>24</sup> Ko poro batun vanu san pīteri wukari pīeru e, ko pulolarsi lweni, ko pītre lweni, batun vanu nen setete mia-tur! <sup>25</sup> Ko poro metka san pīteri wukari pīeru e, ko pulolarsi lweni, ko pītre lweni, metka nen sete orongwos pīlik pīrres. <sup>26</sup> Ko erpok kele, sete Demij orongwos putur imare pītre lweni ni lweni ko pīteri wukari pīeru e pīrpe nga kami kamwerai ngok, suri poro puloli pīrpok, ko sete orongwos putur te, suri evan pa reнге bongsin ko osuw. <sup>27</sup> Ko erpel ma le: sete jinibb san orongwose pian reнге naim se jinibb nga derteren sen mutoe san, ko pulokloksi joron, ejki. Womujnen ni pīla dil ko pīsre totoni mēr nga derteren sen mutoe ngok ko wor, ko ngok orongwos pia-lokloksi joro mēnren ko vajin. Niko inu nuloli tevi Demij reнге derteren se Nemīn On ko. <sup>28</sup> Ko kaprunge nanu kele san: Nuwretun nga nuwretun nuwrai tevi kami, jinibb nir Atua pītiasi tweni nololien ser nir ko nale nga marsij ser kele nir nga marok-rij melmelas renger. <sup>29</sup> Ko poro san pīrij melmelas ko pusopsope Nemīn On, ngok netlasien nen ejki rres nawone. Ni on reнге nololien nga puto tuwi ngok vini.” <sup>30</sup> Owrai erpok suri nga nir arwera nerīn nga mīsij eptevi ni.

<sup>31</sup> Mian ko Iesu tasin nir ko tasu sen arivel ko arini ie; ko artur vare, ko arkoni jinibb san evan piveruse loloim. <sup>32</sup> Ko delung elep arlik rrale ni. Ko arwerai tevi ni, arwera "Kuplesi tasu som ko tasim nir artur ngel vare, arpej nik, arwera parlesim." <sup>33</sup> Ko ni owra lweni tevi nir, owra "Isi evi tasu suk ko isi arivi tasik nir?" <sup>34</sup> Ko ni oklu emteni nir nga marlik rrale ni, ko owrai tevir, owra "Kaplesi tasu suk ko tasik nir, nir le ngel!" <sup>35</sup> Isi nga puloli marongen se Atua, mïernen ko evi tasik ko jojik ko tasu suk."

#### 4

##### *Nale rrongrrongvi ne mïer nga mok-jijreni jelangin*

<sup>1</sup> Ko Iesu evisviseni kele jinibb nir renge jeli nuwito ngalu, ko delung elep nga elep arini korti jin. Ko ni esa asi van renge drrav san e ko esakel rengen. Ko jinibb sen nir arsoni tweni drrav, esal van ngalngalu sopen, ko delung jile nir arlik jer ngaut renge jeli nuwito. <sup>2</sup> Ko ni evisvisenir e nanu elep renge nale rrongrrongvi. Ko owrai tevir renge nale rrongrrongvi sen, owra <sup>3</sup> "Kaprunge ta. Jinibb san nga mok-jijreni jelangin evel van nga pijijreni jelangin. <sup>4</sup> Ko daron nga mok-jijreni jelangin e mirpok, ko sopor arwij asi van renge dan ne sel e, ko numön arow vini ko artasi twenir. <sup>5</sup> Ko sopor kele arwij asi van renge dan ne jerev e, lat nga dan sete mimtul rengen. Ko aretiv pelari ngavilvilsen, suri dan sete emtul. <sup>6</sup> Mian ko daron nga nial mivini muwosput mare e, ko armeli, suri laþer ejkie, ko armaob. <sup>7</sup> Ko sopor kele arwij asi van renge lolo moku e; ko moku armaur imare ko arejal tevtavnir, ko sete arongwos parwen. <sup>8</sup> Ko sopor ma sete arwij lingi dan nga mïrres nen, armatur jer rengen, ko aretiv, armaur, ko arwen. Sopor wener ejpari ngavöl itul (30), ko sopor wener ejpari ngavöl ouwon (60), ko sopor wener ejpari ongut vesan (100)." <sup>9</sup> Ko ni owrai tevir, owra "Isi nga boron otoo, purnge re nolo boron!"

##### *Iesu owra tweni suri sev nga ni mok-visiseni jinibb nir renge nale rrongrrongvi*

<sup>10</sup> Ko renge daron nga Iesu mïsan vajin e, ko lartul nga marlik tevi ni ko jinibb sen wor nir esngavöl drromon eru arsusi nale rrongrrongvi nen nir tevi ni. <sup>11</sup> Ko ni owrai tevir, owra "Kami ko ma, Atua elai momsawos nanu nga marto silveni renge batun vanu sen tevi kami. Ko nir nga marlik renge vare nir, nanu jile arlai tevir renge nale rrongrrongvi. <sup>12</sup> Niko Naul On owrai owra 'parlesi ko parlesi lululweni, ko sete parlesi wose. Parunge ko parunge lululweni, ko sete parongwose. Suri nolor

eterter ko armusus nolor pulululwi, ko arwera 'Rratrongwose ko rratmetutu, ko rratrieni lweni nolorr tululwi, ko Atua titlasi tweni nololien se kerr suri!" <sup>13</sup> Ko ni owrai tevir, owra "Kami kamrrerrenge nale rrongrrongvi nga mowrai ngok ko? Ko poro pipok ko poro nga bowra nale rrongrrongvi mïnij kele sopor, ko kami kaprongwose pipese? <sup>14</sup> Mer nga mok-jijreni jelangin ngok, erpe mïer nga mokerwerwer renge nale se Atua ko. <sup>15</sup> Dan ne sel osorsan tevi nir nga ngel le, nga marunge nale se Atua ko marloli nolor mïterter nga marmusus parunge ko parlingi renge nolor. Niko muloli ngavilvilsen Demij mivini mïteseni luwe nale se Atua renge nolor. <sup>16</sup> Ko dan ne jerev erpe nir nga ngel le, nga marunge nale se Atua nga mivitan, ko arir lengleng e ko arlai ngavilvilsen. <sup>17</sup> Ko laþer sete artoe renge nolor; arlik beblen bbong, mian ko daron nga nat mïkarkar renger e suri nale ne batun vanu se Atua, ko marojir suri, marloli mïisij tevir suri, ko nolor arvitan arvesane. <sup>18</sup> Ko nir mïnij nen nir arirpe jelangin nga miwij van renge lolo moku. Nir ngel ko arivi lartul nga marmurronge nale, <sup>19</sup> ko arrormi þelak nanu ne iel ngatan nir, rrek nijor ervei norrorrmien ser, rrek nolor arvenae nanu elep kele. Ko nanu ngok ko nir arejal tevtavnir vajin nale ne batun vanu se Atua nga morrongrrongvi re jelangin nga mivitan re nolor, ololi sete wener otoo rragrag. <sup>20</sup> Ko jelangin sopor nga marvitan van renge dan nga mïrres nen e arorsan tevi nir nga marunge nale ko martori renge nolor, ko arwen. Sopor wener ngavöl itul (30), ko sopor wener ngavöl ouwon (60) ko sopor wener ongut vesan (100)."

##### *Moron nga martepilis ore biles e*

<sup>21</sup> Ko Iesu owrai kele tevi nir, owra "Daron nga kumla laet vini e, sete orongwos kupla twenie nga kuptawi ore besin e, ko sete orongwos kuplingi renge melve maling, ejki. Ko kuplingi ko wor renge milngen mawos. <sup>22</sup> Ko erpok ko, sete nanu san orongwos piteptepi; pian ko pia-to limjer kobbong. Rrekgana nanu tama san nga parsilveni puto teptepi, ejki rres nawon! Nanu jile parpelari þetþeti ko wor renge moron. <sup>23</sup> Isi nga boron otoo, purnge re nolo boron!"

<sup>24</sup> Ko ni owrai kele tevi nir, owra "Nale ngok nga kamok-murrong nir ngok, kaprrormir ko wor, ko kamrongwos kaplair pusorsan tevi nga kamok-þelak mïterter suri. Ko Atua þila norongwosien mare nen kele tevi kami. <sup>25</sup> Mer nga murnge ko murrul totoni, mïernen para-lai kele ko wor tevi ni. Ko mïer nga murnge

ko sete murrul totoni, m̄nernen para-lai tweni jin norongwosien sen beblen nga ni murongwos wowomue pa.”

*Nale rrongrrongvi ne jelangin mimra*

<sup>26</sup> Ko Iesu owrai tevir, owra “Batun vanu se Atua erpel le. Jinibb san ok-jijreni jelangin renge orsel san. <sup>27</sup> Musuw ko ean vajin elelea nawon, setemun orrorrmi suri renge nutrin ko nutpong, ejki mun. Jelangin etiv pelari esan. Ko emra elep vajin, ko m̄nernen sete orongwose rragrage suri erpese. <sup>28</sup> Dan esan kobbong ololi ewen. Womujnen elngi nowsen mian ko nevgun, mian ko elngi wenen jile vajin. <sup>29</sup> Ko daron nga wenen m̄itra m̄irres mimirr vajin, ko m̄ier nga ela nesip ko ean eta tutweni vajin, suri evi daron ne numōs vajin.”

*Nale rrongrrongvi ne jelangi nubek*

<sup>30</sup> Ko Iesu owrai tevi jinibb nir, owra “Kerr purrongrrongvi batun vanu se Atua pirpese? Rreknga renge nale rrongrrongvi sev rraploli piplari limjer p̄irres rengen? <sup>31</sup> Rraprrongrrongvi pirpel le: Jinibb san ela jelangi nubek san ko orwi. Jelangin nen ewelili nga ewelili jer lingi jelangi nai jijle nir. <sup>32</sup> Ko daron nga murwi jile ko mietiv pelari vajin, ko emra elep van mare e, ko easi p̄etp̄eti nai nga ngok nen nir. Ko emeseksek, rengsin nir arlelep arsalsal van ngasu jer. Ko numōn esaut arinini ren, arok-loli menur renge rengsin nir, ko arok-molmol re melven.”<sup>B</sup>

*Iesu ok-visviseni jinibb nir ko ok-la wor nale rrongrrongvi ko*

<sup>33</sup> Iesu ela nale rrongrrongvi lele elep kele nga marirpok nir tevi jinibb nir, osorsan tevi nir marongwos parongwose. <sup>34</sup> Ni ok-visviseni nir renge bbong nale rrongrrongvi ko. Ko daron nga Iesu nir jinibb sen kis vajin marsan, ko owra suri nale rrongrrongvi nga nir lat nga marto suri vajin.

*Iesu ewer ore ling serser nga m̄itewut vini*

<sup>35</sup> Renge nabong nen malum, renge daron nga nat mirivriv vini, ko Iesu owrai tevi jinibb sen nir owra “Kerr puwlu van renge devje nuwi e.” <sup>36</sup> Ko arivel arlinglingi delung nir artur jer, ko arengeni ni renge drrav eptevir, drrav nga pa ni m̄isakel ko rengen. Ko drrav m̄inij kele sopor arpitevi drrav nen. <sup>37</sup> Ko mian ko sete epriv ko ling serser nga milep san etwut vini. Ko daptap arwowosi elep, arututi drrav ko arjivjivi van renge nolon. Ko natung owun elep renge drrav, ko otomori

purron. <sup>38</sup> Ko Iesu ematur pareng pa renge batu drrav vitunen, ematur oulele pilo san. Ko jinibb sen arini ko arwuni tweni, arwera tevi arwera “E, jinibb nevisvisenien, sete kurrorrmi nga Kerr rrapmij?” <sup>39</sup> Ko ni emra otur ko ewer ore ling. Ko owrai tevi nuwi owra “Kupmol kupjire p̄irres!” Ko ling omol omosi evesane, evilvil. <sup>40</sup> Ko ni owrai tevi nir owra “Suri sev nolo kami eririr?” Nibeni nosurien se kami?” <sup>41</sup> Ko nir armetutu lengleng, arij vijvij por arwerwera tevir arwera “Aro, isi le ngel, nga ling ko nuwi kele morosuri ni?”

## 5

*Iesu oji tweni nem̄in nga m̄isij san renge m̄eri Gerasa san*

<sup>1</sup> Nir arwolu toku renge devje nuwito momsawos renge sise m̄eri Gerasa nir. <sup>2</sup> Ko daron nga moka-jubbul renge drrav e, ko jinibb san nga nem̄in nga m̄isij m̄isisilvi evel pelari renge dubb e nir vini, evel tersele, esewute. <sup>3</sup> Mernen ok-lik pa renge lat nga marok-tivtavin e ko, renge dubb nir. Ko setemun jinibb san orongwose p̄isre totoni tevi dil nga marterter e nir, ko dil delrrurr kele nir sete arvitere, ejki mun. <sup>4</sup> Suri arok-sere totoni tetajer pa nevren ko nuru ko belan nuru tevi dil nga marterter e nir ko tevi dil delrrurr nir, ko ok-rrerrersir armotot. Ko niko setemun san derteren sen ewere nga purrul totoni puloli pumu luwi. <sup>5</sup> Ko tetajer, renge nutrin ko nutpong kele nir, ni ok-ivel karkar renge dubb nir ko botwen nir ko ok-kikail ko ok-tevteve nevōt e ni luwi niben nir.

<sup>6</sup> Ko daron nga m̄ilesi Iesu mivel malum ngasu wore vini, ko owlu van jin ejipa ngatan jin. <sup>7</sup> Ko ekail van mare temijpal owra “Sev som oto ni le iel, Iesu Atua ne Drromsen Mare Natun? Inu nungoni nik eterter renge Atua, warru sete kuploklok-sik!” <sup>8</sup> Suri Iesu muwra pa “Nik nem̄in nga m̄isij, kupivare lingi morok!” <sup>9</sup> Ko Iesu osusi tevi, owra “Nik nisem si?” Ko ni owrai tevi ni, owra “Inu nisek ko Delung, suri kem elep.” <sup>10</sup> Ko ni ongoni tevi Iesu eterter, nga ni sete puoji tweni nem̄in nga marsij nen nir parivel lingi vanu nen.

<sup>11</sup> Ko renge ie, nior berp̄er nga milep san arok-susung bbong mori jeli botwen nen. <sup>12</sup> Ko nem̄in nga marsij nir arngoni tevi Iesu arwera “Kupkoni kem van renge berp̄er ngok nir, nga kem nabsilvir.” <sup>13</sup> Ni elinglingir, ko nem̄in nga marsij arsil ivivare lingi m̄ier nga, ko arwolu van arsilvi berp̄er nir; ko arloli batur arlengleng. Ko berp̄er nen nir elep, evi nuvasngavōl varu

<sup>B</sup> 4:32 Erpe iel, Mak orrongrrongvi batun vanu se Atua erpe jelangi mastat; ko suri mastat ejki iel, namlingi nubek, nga puloli mining ne nale se Mak piplari limjer.

(2000); ko nir p̄et̄peti arwolu jubbbubbul mawos nuwito ngatan, ko arow jubbbubbul van renge nuwi, ko arron. <sup>14</sup> Ko lartul nga marok-uwngani berper nen nir arwolu van renge ngaim nga milep ko ngaim nga marsij milep marsisilvi nga, norrorrmien sen erres luwi, ko ori sunsun, ko elik malum vajin. Ko armetutu vajin. <sup>16</sup> Ko nir nga marlesi mawose nanu ngel miplari arsupe suri erres tevir lat nga muto suri, erpese renge ni nga nem̄in nga marsij marsisilvi, ko suri kele berper nir. <sup>17</sup> Ko nir aron tertere Iesu arwerai tevi nga ni pivel lingi vanu ser.

<sup>18</sup> Ko daron nga ni m̄isa luwi renge drrav, ko m̄er nga nem̄in nga marsij marsisilvi bonevis nga ongoni tevi Iesu nga ni pip̄tevi ni. <sup>19</sup> Ko Iesu ewer ore owra pijki, ko owrai tevi ni, "Kupluwi van renge naim som e ji metka som nir, ko kupsupe tevir erpese nga Numal mimrreni nik, ko nanu nga milep nga muloli tevim." <sup>20</sup> Ko m̄ernen osri sel sen olwi, ko ospuspe vajin limjer renge lat nga marwera Ngaim Esgavöl e, nanu nga milep nen nga Iesu muloli tevi ni. Ngok jinibb jikle daron nga marunge, ko artaole.

*Iesu ololi nesevin san nga drran muto m̄isij erres luwi, ko nesenwarreng san emaur luwi kele*

<sup>21</sup> Iesu esa kele renge drrav ko arwolu pelaot van renge devje nuwito kele e. Ko daron nga marwolu toku e vajin, ko delung nga milep arini korti jin ngalu. <sup>22</sup> Ko renge iok jinibb san nisen Jaeras nga mokmetmete naim ne loten elesi ni ko evini jin, ejipa ngatan renge belan. <sup>23</sup> Ko on tertere owra "Natuk nesenwarreng otomori pimij. Wurru nungonim kupini kuplingi nevrem rengen, ko vin wel nen p̄irres luwi!" <sup>24</sup> Ko Iesu eptevi ni nuru oran. Ko delung elep arvijuri suri ni ko arlilji ni.

<sup>25</sup> Ko nesevin san nga mesien se nesevin nir muloli tetajer e renge sia esgavöl drromon eru, <sup>26</sup> ko ornge lengleng e esij elep, ewretun elesi dokta elep. Ko olokloksi p̄et̄peti nevöt sen, ko setete nanu san erres renge ni, ea-runge lengleng ma esij ko. <sup>27</sup> Ko daron nga murnge vajin nanu nga Iesu mulolir, ko esilvi delung nir vitu ko evini morie, ko ejpari sunsun sen. <sup>28</sup> Suri orrorrmi renge nolon, owra "Poru bbong bejpari bongsi sunsun sen ko ngok inu berres luwi ko pa." <sup>29</sup> Ko daron mawos nga pa mijpari e ko mete dra emes, ko ornge renge niben nga ni erres pa osuw renge mesien sen. <sup>30</sup> Renge daron mawos

nen Iesu ornge renge niben nga derteren owlu lingi ni, ko erieni ni ko osuri owra "Isi ko mijpari sunsun suk?" <sup>31</sup> Ko jinibb sen nir arwerai tevi, arwera "Po! ko kulesi delung elep arlilijim, ko erpese nik kuwra isi ejparim?" <sup>32</sup> Ko ni okluku wor emteni rrale nir, owra p̄ilesi isi ko ololi nanu ngel. <sup>33</sup> Ko nesevin nen emtutu ko eririr, orongwose sev nga ni muloli. Ko evini ejipa vitan renge bela Iesu ko owra weretunen nir tevi. <sup>34</sup> Ko ni owrai tevi vinnen, owra "Natuk, nosurien som ololim kumrres. Kupluwi renge demat, kurres ko pa renge mesien som."

<sup>35</sup> Daron nga m̄irij malum e ko jinibb sopor arivel renge naim se Jaeras vini, ko arwerai tevi Jaeras arwera "Natum nesenwarreng emij pa osuw. Kuplingingi Numal, setemun kupvijajeng rengen." <sup>36</sup> Ko Iesu sete ewer suri nale nga marwerai nir, owrai tevi owra "Sete kupmetutu. Sansan kobbong, kuposuri." <sup>37</sup> Ko ni ewer ore jinibb nir sete san pivijuri, sansan kobbong Pita ko Jemes ko Jon, Jemes wor tasin. <sup>38</sup> Ko nir aran vajin renge naim se Jaeras. Ko Iesu elesi nga nir muwun saut, ko arting vijajeng lengleng, arul temijpal van mare. <sup>39</sup> Ko ni evan loloim, ko owrai tevi nir, owra "Erpese kami kamting vijajeng? Nesenwarreng sete emij, ko ematurrwel kobbong." <sup>40</sup> Ko nir arunge erij se lenglengen, ko armen keraji e. Ko ejelir aran vare e, ko elai kis bbong tata ko tasu se nesenwarreng ko nir nga marpitevi ni. Ko ni evan renge lat nga nesenwarreng mimatur ren. <sup>41</sup> Ko orrul totkoni nevre nesenwarreng ko owrai tevi owra "Talita kum," nga muwra mirpel: "Nesenwarreng, nuwrai tevi nik kupmera." <sup>42</sup> Ko renge daron mawos nen ko pa nesenwarreng emra, ko evivel. Suri sian esgavöl ko pa drromon eru. Ko bbösa nga milep elair e. <sup>43</sup> Ko Iesu ewer ore nga sete parwowrai nanu ngel tevi jinibb pisan purongwose, pijki. Ko owrai tevir nga parlai nanen sapon tevi vin wel nen purroi.

## 6

### *Meri Nasret aroji tweni Iesu*

<sup>1</sup> Ko Iesu evel lingi lat nen ko olwi van renge ngaim sen e, ko jinibb sen nir arvijuri suri ni. <sup>2</sup> Ko moro nabong ne Sapat mivini, ko ni evan renge naim ne loten ko eviviseni jinibb nir rengen. Ko nir elep armurrarronge ni, ko bbösa elair e ko arwera "Merel ela norongwosien ngabe le? Ko ok-loli nanu nga marinijnij nawone nir arirpese le?" <sup>3</sup> Kerr rramrongwose kobbong, evi metusu, Merri natun, ko tasin Jemes ko Joses, ko Juta, ko Saemon. Ko



sete jokin le nir ngel marpitevi kerr?" Ko arong karkare. <sup>4</sup> Ko ni owrai tevi nir, owra "Weretunen, propet san arongwos parosuri lat jille nga mian e. Ko jinibb nga ma renge sisen woswos, ko metka sen nir ko niaken sen nir sete mara-osuri þelake. Nanu ngok sete erres." <sup>5</sup> Ko ni sete orongwos puloli nanu san ie. Elnge bbong nevren renge nir nga marmesi evis ko, ololi arres luwi. <sup>6</sup> Ko ni etaole nga sete marosuri. Ko evel evisviseni jinibb nir rrale vanu nen ngaim nen nir.

*Iesu okoni jinibb sen nir esngavöl drromon eru aran arwerwer*

<sup>7</sup> Ko Iesu everus jinibb sen esngavöl drromon eru arini jin, ko elai derteren tevir nga parozi tweni nemin nga marsij nir. Ko ni okoni tweni nir ererwi arivel. <sup>8</sup> Ko ni ewer orer, owra "Sete kaptori nanu pisan renge nivelen se kami renge sel, pijki, niv pijki, narr pijki, ko nevöt pijki renge baos kele. Sansan kobbong, kaptori nejipjip pisansan. <sup>9</sup> Ko kaprae but se kami, ko sete kapuri sunsun þieru." <sup>10</sup> Ko ni owrai kele tevir owra "Naim ngabe nga kami kapan rengen womu ko parevei kami, kaplik ko pa rengen pijpari daron nga kapa-ivel lingi naim nen. <sup>11</sup> Ko poro renge ngaim san jinibb nen nolor þiterter, sete parunge kami nga parevei kami van jir, ko ngok, daron nga kapa-ivel lingi ie, erres kapwirwirreni tweni maw nga muto re but se kami renge meter nga parlesi, piviseni tevir nga marloli mñisij."

<sup>12</sup> Ko nir arivel lingi, aran arwerwer tevi jinibb nir nga nolor pulululwi. <sup>13</sup> Ko arozi tweni nemin nga marsij elep arivare renge jinibb nir, ko arjivi oel van renge nir elep nga marmesi, ko arlolir arres luwi.

*Numal Erot Antipas osþe suri Iesu*

<sup>14</sup> Ko Numal Erot Antipas ornge marsuþe Iesu, suri nisen jinibb jile arunge. Ko nir sopor arwera "Jon Baptaes ko otur imare luwi renge mijen, ko ngok niko majingen nga marlelep ngok arimare renge ni, ko ololi nanu nga marininjij nawon ngok e nir." <sup>15</sup> Ko jinibb sopor kele arwera "Ni evi Elaeja," ko nir sopor kele arwera "Ni evi propet ko, erpe propet ne tuwi san." <sup>16</sup> Ko Erot daron nga murnge ko owra "Rrek Jon ko nga inu mñeta otvi batun, otur imare luwi kele renge mijen kele!"

*Mijen se Jon Baptaes*

<sup>17</sup> Ko Erot Antipas bonevis pa okoni jinibb san evan orrul totoni Jon ko esre totoni elngi renge naim ne nekaien, suri marongen se Erotias nesevin se tuwan Pilip. Suri ni etkai luwe vinnen, <sup>18</sup> ko Jon owrai tevi Erot, owra "Sete erres nga nik kuptekai luwe nesen se tuwam." <sup>19</sup> Niko

Erotias esij lengleng tevi Jon, emrreni parevji pini. Ko Erot ewer ore, <sup>20</sup> suri emtutue Jon; orongwose nga ni evi jinibb san nga mñrres, evi jinibb on. Ko emetmete ni erres renge naim ne nekaien. Ko daron nga murnge nale sen, ko eir kobbong renge purnge, ko ornge esij lengleng kele, suri ololi nanu elep.

<sup>21</sup> Ko mian ko nabong mawos se Erot evini nga ni puloli dabbuen renge nga ni mñiak e. Puloli tevi numal sen nir, ko batu jinibb nuval nir, ko batu jinibb ne Galili nir. Ko renge daron nen, Erotias elesei evi daron san nga mñrres se ni. <sup>22</sup> Ko okoni natun nesen mñelakel evini loloim ko esew. Ko Erot ko lartul nga marlik tevi renge nanen marlesi, ko arlesi erres þelak. Ko numal Erot owrai limjer tevi vinnen owra "Kupngoni tevik isevev nga nik kumrreni ko inu þelai tevim!" <sup>23</sup> Ko ni ojuji lengleng mare ko owrai tevi vinnen owra "Isev tama san nga poro kupngoni tevik, þelai tevim; poro pivi devjevanu suk, ko þelai ko wor tevim." <sup>24</sup> Ko ni ean vare ko osusi tevi tasu sen, owra "Bongoni sev le?" Ko tasu sen owra lweni tevi owra "Kupngoni batu Jon Baptaes." <sup>25</sup> Vinnen ewit olwi evel mawose numal ko ongoni tevi owra "Numrreni nik kupla Jon Baptaes batun tevik renge narov." <sup>26</sup> Ko numal orrrrmi elep suri sev nga ni mimarong pa rengen. Ko suri muloli pa rijrijen sen rengen, ko suri kele nir nga marlik tevi renge nanen nga maraan, nir jile arunge, ngok setemun orongwos pumus. <sup>27</sup> Ko ni owrai tevi jinibb sen san pian renge naim ne nekaien ko þita otvi batu Jon, ko þila lweni vini. Ko mñernen evan, eta otvi jile, <sup>28</sup> ko esale lweni renge narov vini. Ko elai tevi nesenwarreng, ko nesenwarreng esale elai tevi tasu sen. <sup>29</sup> Ko daron nga Jon jinibb sen nir marunge, ko aran arwosi niben, aran artevni renge dubb.

*Iesu owngani jinibb evi nuvasngavöl nuvalim (5000)*

<sup>30</sup> Jinibb se Iesu nir arlulwi vini arlik korti ji Iesu, ko arsuþe suri nanu jille tevi ni sev nga marlolir, ko sev nga marvisviseni tevi jinibb nir. <sup>31</sup> Ko ni owrai tevir, owra "Kami kis kobbong kapini, kappitevik kerr pian renge lolo merwer e, ko kapmosi sapon." Suri iok jinibb arinini jir ko arlululwi, ko ololi setete daron ser otee, erpok kele re daron ne nanen kele. <sup>32</sup> Ko nir aran renge drrav e arsa rengen, ko arwolul silveni tweni bbong lat san nga mivi lolo merwer.

<sup>33</sup> Ko jinibb ne ngaim nen nir arlesir daron nga marwolul e. Ko nir elep arlesi woser, ko arwolul orer kali ngaut e, ko arwowomu renge nir renge lat nen. <sup>34</sup> Ko

Iesu nir jinibb sen arwolu toku; ko ni ojubil, ko elesi delung nga milep nga milep marlik pa. Ko orrorrmi lengleng nira, suri arirpe sipsip nga jinibb nga muwowomue nira mijkie. Ko ni etipatun evisvisenir e nanu elep.

<sup>35</sup> Ko mian ko nat nga mirivriv evini vajin. Ko jinibb sen nira arini jin ko arwerai tevi ni, arwera "Tel evi lolo merwer le, ko nial otomori pa piwaj pini." <sup>36</sup> Kupkoni tweni nira parivel paran renga ngaim nga marlelep nira ko nga wewarrens nira nga ngok nira, ko nira lweni wor parwuli nira, suri nanen nga parurroi ejki." <sup>37</sup> Ko ni owrai lweni tevir, owra "Kami ko kapla nanen tevir parurroi." Ko nira arwera lweni tevi, arwera "Ai, merre nevot ko! Poro pirkop kem naban nabwuli nira e nevot selva pungut pivaru (200) ko nablai tevir parurroi?" <sup>38</sup> Ko ni owrai tevir, owra "Ko kami kamtori nira evis? Kapan ta kaplesi." Ko nira aran arlesi, ko arluwi ko arwera "Namtori elim, ko nai eru." <sup>39</sup> Ko ni owrai tevir nga parloli jinibb nira parlik ngatan renga mosmos nga miejejen, pivi meling pievis e. <sup>40</sup> Ko nira arli arlik vivongsur renga meling nira. Meling sopor ongut vesan (100) rengen ko sopor ngavol elelmi (50) renga. <sup>41</sup> Ko ni ela nira nga elim nga ko ela nai nga eru nga ko esarrerr imare emteni melrin, ko olot erij erres surir. Ko obbri otvi nira nira, ko elai tevi jinibb sen nira, ko nira arlai tevi jinibb nira. Ko ololi kele erpok renga nai. <sup>42</sup> Ko nira jijle arurroi ko nira jijle arup. <sup>43</sup> Ko jinibb sen nira arsere lweni bebje nira nga marurro linglingir ko nai nga marurro linglingir van renga narr esngavol drromon eru arwun saut er. <sup>44</sup> Ko jinibb nga marurroi nira nen nira, nira evi nuvasngavol nuvalim (5000) totoklai.

#### *Iesu evel renga nuwito nga milep*

<sup>45</sup> Ko Iesu ololi jinibb sen nira arsa van renga drav parwowomu van renga devje nuwi e renga ngaim ne Betaeta, daron nga ni pukoni tweni jinibb nira parivel e. <sup>46</sup> Vitunen renga mukoni tweni jile nira marivel e, ko ni esan vajin evel otongsa van renga botwen nga pulot. <sup>47</sup> Mian ko nat nga mirivriv e vini vajin, ko drav esal ko pa renga liven mesa renga nuwito. Ko ni esan elik jer ngaut. <sup>48</sup> Ko elesi nga nira marsu marunge misij, suri arsu tere ling. Ko mian ko nat otomori pisal pirin, ko evan jira, evel renga nuwi. Mian ko evini mori jira, ko ololi erpe owra piase nira. <sup>49</sup> Ko daron nga nira marlesi nga mivel renga druru nuwi mare, ko arrorrmi rreknga evi nerin san, ko arkail lengleng van mare. <sup>50</sup> Nira jijle arlesi ko nolor opotpote elep. Ko ni esaro ngavilvilen erij tevir, owra "Inu lebbong, nolo kami pirres! Sete kapmetutu." <sup>51</sup> Ko

nira esa van mare renga drav jira, ko ling omol evesane. Ngok ololi bbosa ela nira e elep. <sup>52</sup> Suri sete arongwose suri nanu nga mininjini nawone nga Iesu muloli re devjen ne nira, norrorrmien ser sete otoe.

#### *Iesu ololi jinibb nga renga Genesaret sopor arres luwi*

<sup>53</sup> Ko nira arwolu pelaot kele arini renga vanu ne Genesaret e renga devje nuwito e, ko arile totoni drav renga lat nen. <sup>54</sup> Ko daron nga maroka-jubbjubb renga drav, ko jinibb nga ie nira ngavilvilarlesi wose Iesu, ko arini jin. Ko ni ololi nira elep arres luwi. <sup>55</sup> Ko jinibb nira arwolu petpeti renga vanu nen, ko arwosi nira nga marmesi renga maling ser vini jin renga ngabe nga ni milik e. <sup>56</sup> Ko ngabe nga ni mian renga, renga ngaim nga welli rreknga ngaim nga milep, arwosi nira nga marmesi van renga maket nira, ko arngoni tevi nga poro bbong parjipari bongsi sunsun sen. Ko nira jijle nga marjipari arres luwi.

#### *Jinibb nga marlelep renga meri Isrel nira arlolarsi Iesu suri sete mutori murruru vanu ser*

## 7

<sup>1</sup> Parasi nira ko jinibb nevisvisenien ne nale nesereien arivel renga Jerusalem e vini, arini arlik korti jira Iesu. <sup>2</sup> Ko nira arlesi nga jinibb sen nira nevrer arrokkitkit nga marurro nira, sete arjevavol. <sup>3</sup> Parasi ko meri Isrel nira artori murruru ne jejavolen se birterwarrens ser nira eterter. Poro sete parjevavol, ko ngok sete paraan. <sup>4</sup> Ko poro parluwi renga maket vini, ko poro sete parjevavol ko ngok sete arongwos paraan. Ko nanu elep kele nga martori mirpok, renga marrawe biles minminen ko sospen ko besin ko maling.

<sup>5</sup> Ko Parasi nen nira ko jinibb ne nevisvisenien ne nale nesereien nen nira arsuhi tevi ni, arwera "Erpese nga nik jinibb som nira sete marvijuri murruru birterawarrens se kerr nira nga tuwi, ko marurroi nira tevi nevrer nga marrokkitkit?" <sup>6</sup> Ko ni owrai tevir, owra "Aesea owrai erres kemkame suri kami sel se kami eru, nga muwrai mirpel, muwra 'Lartul ngel nira arosuri inu tevi nevu lingor kobbong, ko nolor oto ngase inu.' <sup>7</sup> Arloto nawone inu. Arvisviseni nevisvisenien nga mivi se jinibb bbong.' <sup>8</sup> Erpok ko, kami kamlinglingi kurtweni nesereien se Atua, ko kamtori murruru ne rijen se jinibb kobbong nira eterter." <sup>9</sup> Ko ni owrai kele tevir, "Kami kamlinglingi kurtweni jerjere nale nesereien se Atua, ko kamwera kaptori murruru ne rijen se

kami. <sup>10</sup> Suri Moses owra 'Kuprroirmi lilane tata som ko tasu som. Mer nga m̄irij m̄isij tevi tata sen rreknga tasu sen sete orongwos pimaur, kaprevji pini ko wor.' <sup>11</sup> Ko kami vajin kamwera 'Poru nanu san nga moro jinibb san pilai tevi tata sen rreknga tasu sen, ko puwra "Ejki, nanu ngel on, ko evi se Atua," <sup>12</sup> ko kami kamwera "Ejki, erres kobbong, setemun mia-lai nanu nen tevi tata sen rreknga tasu sen." <sup>13</sup> Kamlinglingi kurtweni nale se Atua evi nanu nawon, suri kamtori murrin ne rijen se kami. Ko nanu elep kele nga marirpok nir kamok-pelak kamok-lolir."

*Nanu nga marloli jinibb murro rengo no Atua*

<sup>14</sup> Ko ni everus kele delung nir arini jin, ko owrai tevir owra "Kapmurrarronge inu p̄irres ko kaprunge nanu nga bowrai ngel: <sup>15</sup> Sete nanu san nga mivel vare e van rengo nolo jinibb ololi orro, ejki. Ko nanu nga marpelari ko ma rengo nolo jinibb arivi nanu nga marloli jinibb murro. <sup>16</sup> [Poru kami san boron otoo ko purnge re nolo boron!]"<sup>C</sup>

<sup>17</sup> Ko ni evel lingi delung nir ko evini rengo loloim e; ko jinibb sen nir arini jin ko arsuji rongronge nale nen tevi ni. <sup>18</sup> Ko ni owrai tevi nir owra "Kami kele kamlengleng kamirpe nir? Sete kamrongwose nga nanu nga mivel vare van rengo nolo jinibb e sete orongwos puloli purro. <sup>19</sup> Suri sete evan rengo nolon, ko evan rengo depain kobbong, ko easi tweni." Owrai erpok nga nanen jikle arres kobbong, sete arongwos parwer ore nanen san puon nga jinibb sete purroi.

<sup>20</sup> Ko ni owra kele, "Nanu nga ma mivare ko rengo nolo jinibb vini, ngok ko ma ololi jinibb orro rengen. <sup>21-22</sup> Suri rengo nolo jinibb ko nanu ngel nir marpelpelari, ko norrormien nga marsij marivare: Arvevna, arevji pini jinibb, arkerkeris, arwer lokloksi jinibb, arij melmelas ko arsope Atua, nolor emrremrreni nanu nir, nolor eleplep, arloli murru lenglengen ser, arloli nolor nga mian mare pelak. Ko nesevin arloli murrin nga martori joror nir nga sete marmomsawos re mete jinibb nir, ko norman ean ji nesevin nga sete evi nesen sen, ko nesevin ean ji norman nga sete evi diwen sen. Ko arloli murrin karkar lele nir nga marsij nir. <sup>23</sup> Nanu nga marsij ngel nir arpelpelari rengo nolo jinibb vini vare e, ko nir ko arloli jinibb orro."

*Nesenwarreng san, Iesu oji tweni demij rengen eivare*

<sup>24</sup> Mian ko Iesu evel lingi ie, ko evan rengo ngaim nga muto mori Taea san. Ko evan rengo loloim nen san, ko sete emrreni san purongwose; owra p̄isan p̄ilik. Ko ejki rres nawon, sete orongwos piteptepi. <sup>25</sup> Ko nesenwarreng san, nesevin san natun, nem̄in nga m̄isij san esisilvi. Ko nesevin nga natun nen ornge nga Iesu m̄ilik ie; ko esaro ngavilil van jin, ko evan ejipa van ngatan rengo belan. <sup>26</sup> Vinnen evi nesevin ne vare san, ko eak rengo Ponisia, ngaim nga welili ne Siria san. Ko ongoni tevi Iesu nga puoji tweni nem̄in nga m̄isij nen nga m̄isisilvi natun nen, pivare lingi. <sup>27</sup> Ko ni owrai tevi vinnen owra "Nanwarreng paraan parup puwomu, suri sete erres nga parla nanen se bipiwarreng ko parsor tweni tevi guli." Ni ewir̄ nale ngok mirpok ngok suri tetajer m̄eri Isrel nir arok-wera "guli" e jinibb ne vare nir. <sup>28</sup> Ko vin nga otuw lweni nale tevi, owra "Erpok ko Numal, ko guli ngok nir nga marmatur rengo melve tep ngok nir arok-urroi bebje nanen se bipiwarreng sapon!" <sup>29</sup> Ko ni owrai tevi vinnen owra "Suri kumwerai mirpok, ko kupluwi suri sel som, kupiel. Nem̄in nga m̄isij nen eivare pa lingi natun."

<sup>30</sup> Ko daron nga vin nga mulwi vini rengo naim sen e, ko elesi nga nem̄in nga m̄isij eivare lingi pa natun osuw, ko natun erres vajin ematur rengo maling.

*Iesu ololi jinibb san nga boron muwon-won ko nemen m̄ikel erres luwi*

<sup>31</sup> Iesu evel lingi kele Taea ko olwi, ekalie otvi rengo Saeton e, evel rurrngi rengo liv̄o ne Ngaim Esngav̄ol, olwi vini rengo nuwito ne Galili. <sup>32</sup> Ko jinibb sopor arpitevi jinibb san nga mivi borwon ko nemen m̄ikel vini jin. Ko nir arngoni tevi ni nga ni p̄ilngi nevren rengo m̄iernen ko puloli ni p̄irres luwi. <sup>33</sup> Ko Iesu eptevi tweni m̄iernen lingi delung nir, ko nuru kis orsan ortur talev. Ko ni ojongroni bb̄os nevren rengo nolo boro m̄iernen, musuw ko evrae kele ni luwi wor nevren ko epari m̄iernen nemen e. <sup>34</sup> Musuw, ko eleng raji meten oklu emteni melrin, ko engavsi ko owra "Epata", nga muwra mirpel, "Borom p̄iap, ko nemem p̄imtarup!" <sup>35</sup> Ko m̄iernen boron eap ko orngurunge nanu vajin, ko nanu nga m̄isre totoni nemen emtarup lingi; ko ni erij vajin erres. <sup>36</sup> Ko Iesu ewer orer nga nir sete parwerwera nanu ngel tevi jinibb pisan pijki, ewer ore lenglengen e nir wor rengen. Ko nir armerreni lenglengle wor parwowrai,

<sup>C</sup> 7:16 Nale nga muto re nolo [ ], rrek sete Mak oli, ko jinibb san ea-uli vitue daron nga muli tweni kopi san ne nalu ngel.

ko arwovrai tweni; arsupsupe vajin elep lengleng. <sup>37</sup> Bbōsa nga milep elair ko arwera "Aro, ni ololi nanu elep arres, ololi kele borwon ngel kele nga nemen mikel ngel erres luwi."

## 8

*Iesu ela nanen tevi jinibb evi nuvasngavöl vavij (4000)*

<sup>1</sup> Renge nabong nen nir, delung elep nga elep armot rrale Iesu; ko nanu san ejki nga parurroi. Ko Iesu everus jinibb sen nir arini jin ko owrai tevir owra <sup>2</sup> "Nurrorrmi lenglengen e delung ngel nir elep, suri arlik tevik nabong itul le pa, ko sete artori jere mun nanu san nga parurroi. <sup>3</sup> Ko poro bokoni twenir re nga numer miajir mirpok, ko tara-maob rege sel, suri nir sapon arivel wor ngasu ko vini." <sup>4</sup> Ko jinibb sen nir arwerai lweni tevi ni arwera "Po! Nabla niv ngabe le nga pivtere lartul ngel nir parurroi parup e? Suri iel evi lolo merwer le!" <sup>5</sup> Ko ni osusi tevi nir owra "Ko kami kamtori niv evis?" Ko nir arwera lweni tevi ni arwera "Mmmm...ebut bbölböl lebbong!"

<sup>6</sup> Ko ni owrai tevi delung nir owra parlik ngatan rege dan, ko ni ela niv nga ebut nga nir, ko olot owra erres tevi Atua surir. Ko otpoir ko elair tevi jinibb sen nir, ko jinibb sen nir arselsaler van ji jinibb nir. <sup>7</sup> Ko nir artori nai nga wovarrang sopor, ko ni erij erres kele suri nai nga nir, ko owrai tevi nir parselsaler kele van ji jinibb nir. <sup>8</sup> Ko nir jile arurroi, ko arup. Ko arsersere lululweni bebjen nga marjipon van rege narr ebut arwun saut. <sup>9</sup> Nir totoklai nga marurroi ejpari nuvasngavöl vavij (4000) sapon. Ko ni okoni twenir arivel. <sup>10</sup> Ko esaro ngavilvil esa rege drav tevi jinibb sen nir, aran devjen e rege Dalmanuta e.

*Parasi sopor armerreni parlesi nelesien pisan*

<sup>11</sup> Ko Parasi sopor arini ji ni, arwera parrowrrowe ni; arsusi kerkerasi tevi ni, armerreni parlesi nelesien ne melrin san nga ni puloli. <sup>12</sup> Ko Iesu engavsi lenglengen e ko owra "Erpe se dul ngel nir arpe nelesien? Nuwretun nga nuwretun lengleng nuwrai tevi kami, sete mara-lai nelesien san tevi dul ngel nir." <sup>13</sup> Ko ni evel lingir ean kele esa rege drav aran rege devjen nuwito e.

*Iesu osur terter tevi jinibb sen nir suri norrorrmien ser sete otoa*

<sup>14</sup> Nir armalie parla nanen sapon nga partor mas e, artotori suri bbong niv sansan bbölböl rege drav. <sup>15</sup> Ko Iesu

osur terter tevir owra "Kapkulkulu metmet pïrres rege is ne Parasi ko is ne Erot, tulokloksi kami." <sup>16</sup> Ko nir arwerwera lululweni tevir arwera "Suri kerr sete rramtori niv te, niko muwrai mirpok ngok." <sup>17</sup> Iesu orongwose norrorrmien ser ko owrai tevir, "Kamok-werwera lululweni kami e sev ko? Suri sev norrorrmien se kami oto re niv bbong, ko sete kamlesi wose, ko sete kamrongwose? Norrorrmien se kami sete otoa?" <sup>18</sup> Mete kami otoa pa, ko sete kamlesi? Boro kami otoa pa, ko sete kamrunge e? <sup>19</sup> Renge wosenen nga inu motpoi otvi niv elim tevi nir nuvasngavöl nuvalim, ko kami kamsersere lululweni bebjen nga marjipon van rege narr evis nga marwun saute?" Ko nir arwera "Esgavöl drromon eru." <sup>20</sup> "Ko rege niv nga ebut nga mēlai tevi nir nuvasngavöl vavij, kami kamsersere lululweni bebjen van rege narr evis arwun saute?" Ko nir arwera "Ebut." <sup>21</sup> Ko ni owra lweni tevir owra "Ko ngok kami setewor kamrongwose derteren suk?"

*Iesu ololi jinibb nga meten murrorr san erres luwi rege Betsaeta*

<sup>22</sup> Iesu ko jinibb sen nir arini rege Betsaeta, ko jinibb sopor arpitevi jinibb san nga meten murrorr vini ji Iesu, ko arngoni ni nga ni pilingi nevren rege mēnren. <sup>23</sup> Ko ni orrull totkoni metrroren nevren ko eptevi tweni rege ngaim van vare e, ko evrae meten e nolton ko elngi nevren nuru rengen. Ko osusi tevi ni owra "Kuleslesi nanu san?" <sup>24</sup> Ko ni okluklu emteni rrale ni, ko owra "Nulesi jinibb nir, nulesir arirpe duru nai arivel." <sup>25</sup> Ko Iesu elngi kele nevren nuru rege mete metrroren nen nuru, ko metrroren emet teretre oklu luwi erres vajin, emteni nanu jijile arres. <sup>26</sup> Ko Iesu owrai tevi ni owra "Kupluwi ko pa van rege naim som e, setemun kupiel limjer re ngaim," ko okoni tweni.

*Pita owra tweni nga Iesu evi Kristo*

<sup>27</sup> Iesu nir jinibb sen nir arivel aran rege ngaim jile ne Sisaria Pilipae nir. Ko rege sel ni osusi tevi jinibb sen nir, owrai tevir, "Jinibb nir arwera inu nuvi isi?" <sup>28</sup> Ko nir arwerai tevi ni, "Sopor arwera Jon Baptaes, ko sopor arwera Elaeja, ko sopor arwera propet san." <sup>29</sup> Ko ni osusi tevi nir kele, "Ko kami, kamwera inu nuvi isi?" Pita owra lweni tevi ni, "Nik kuvi Mesaea nen ko, nga namok-tirive." <sup>30</sup> Ko Iesu ewer orer owra "Sete kapwerwerai tevi jinibb pisan, pijki."

*Iesu owovrai wowomue tevi jinibb sen nir nga ni pimij ko pia-maur luwi kele rege mijen.*

<sup>31</sup> Iesu etipatun evisviseni jinibb sen nir, owrai tevir nga ni Jinibb Mawos purnge wor p̄isij ko renge nanu pilep lengleng. Ko b̄irterawarrang ko batu jinibb ne sul-sulen nir ko jinibb nevisvisenien ne nale neseseiren nir parungasi ni, ko parevji pini. Ko nabong p̄itul ko pimaur luwi. <sup>32</sup> Ni owrai tweni nale ngel limjer, ko niko Pita eptevi taleve ni ko erij terter tevi ko ewer ore ni. <sup>33</sup> Ko ni erieni emteni jinibb sen nir, ko otortori Pita ewer ore owra "Kupini renge durek e, nik Demij! Suri nik sete kurrormi nanu nga marivi se Atua, kurrormi nanu nga marivi se jinibb bbong."

*Jinibb se Iesu pimali wor ni lweni*

<sup>34</sup> Ko Iesu everus jinibb sen nir ko delung nir vini jin, ko owrai tevir owra "Poru jinibb san puwra pivijurik, ni putor ore nanu nga ni bbong mimrreni, ko puwosi nai pelaot sen ko pivijurik. <sup>35</sup> Poru san puwra putor totoni mauren sen, mian ko pia-tor jabble; ko poro nga san pimaronge mauren sen suri mivijuri inu ko suri nos̄pen nga m̄irres, ko mian ko pia-lai vajin mauren nga m̄irres. <sup>36</sup> Poru jinibb pisan p̄ilai p̄etp̄eti nanu ne iel ngatan ngel nir, ko putor jabble mauren sen pijijki, ko p̄ilesi sev ko p̄irres rengen? <sup>37</sup> Jinibb p̄ila isev p̄ikle lweni mauren sen e? <sup>38</sup> Ko isi san poro pimanune inu ko nale suk renge dul nga muloli karkar nanu nga m̄isij ngel, inu kele Jinibb Mawos bemanune ni renge daron nga bea-vini e renge nosr̄övien se Tata suk tevi anglo on nir."

**9**

*Iesu niben erieni enij kele e*

<sup>1</sup> Ko ni owrai tevi nir owra "Nuwretun nuwrai tevi kami, kami sapon renge kami nga kamtur ngel setewor kapmij, ko kaplesi batun vanu se Atua pivini tevi derteren nen."

<sup>2</sup> Nabong ouwon asi osuw, vitunen ko Iesu etka Pita ko Jemes ko Jon arpitevi ni, nir kis arsan artongsa van renge botwen nga muwu van mare jer san. Maran mare vajin, ko ni niben erieni enij kele e renge nir nor. <sup>3</sup> Ko sunsun sen erinrin ow raprap titis lengleng; sete san renge iel ngatan orongwos puloli kalek pisan puow raprap jipari. <sup>4</sup> Ko renge ie Elaeja ko Moses orpelari limjer jir ko orjiljilwer tevi ni. <sup>5</sup> Ko Pita owrai tevi Iesu owra "Numal, erres kem namlik pa iel! Kem nabloli gorkoraim p̄itul, san pivi se nik, ko san pivi se Moses, ko san pivi se Elaeja." <sup>6</sup> Ni errerlengen nanu nga puwrai, suri metutuen nga milep elair, armetutu elep.

<sup>7</sup> Ko mian ko nabor san esal vini ko esalsal ore iok; ko renge nabor nen drrelan

san eplari rengen, owra "Ngel evi natuk nga memrreni, ko ngok kami kaprunge ni." <sup>8</sup> Ngavilvilsen arienir arkulkulu pej; ko setemun arlesi san, ejki mun, Iesu kis vajin esan eptevi nir.

<sup>9</sup> Ko mian ko renge daron nga marok-jubbul vajin renge botwen vini ngatan e, ko ni ewer orer nga sete parwowra nanu ngel nir nga marlesir ngel tevi jinibb pisan, pian pijpari daron nga Jinibb Mawos pimaur luwi kele renge mijen. <sup>10</sup> Nir artori totoni nale nga muwrai tevi nir kis ngok, ko nir arsususi lululweni tevi nir, "Owra puwra sev ko nga muwra 'pimaur luwi kele renge mijen'?"

*Nir arsupe suri Elaeja*

<sup>11</sup> Ko nir arsususi tevi Iesu arwera "Jinibb nevisvisenien ne nale neseseiren arsupe suri arwera Elaeja pivini ko wor puwomu." <sup>12</sup> Ko Iesu owra "Ewretun Elaeja pivini ko wor puwomu ko puloli nanu jijle parto p̄irres puwomu. Ko erpese le maruli suri Jinibb Mawos nga nolor p̄iebreni ni ko ni purnge p̄isij renge nanu pilep? <sup>13</sup> Ko inu nuwretun nuwrai tevi kami, Elaeja evini pa osuw, ko nir arloli nanu nga marmerrreni tevi ni osoran tevi nga maruli suri ni e."

*Iesu oji tweni demij san renge bipiwar-reng san*

<sup>14</sup> Ko daron nga marluwi vajin vini jinibb se Iesu e sopor nen nir, ko arlesi nga delung nga milep martur rraler, ko jinibb nevisvisenien ne nale neseseiren marok-susi rongorngenge nanu sapon tevir. <sup>15</sup> Ko ngavilvilsen daron nga delung markulu sweri ni ko bbosa nga milep elair e, ko arwolu ore aran jin. <sup>16</sup> Ko ni osusi tevi nir owra "Ko kami kamok-susi rongorngenge sev ko tevi nir iok?" <sup>17</sup> Ko nir san nga renge delung ngok owrai tevi ni, "Numal, nuptevi natuk le ngel p̄ivinuk jim. Ner̄in nga m̄isij esisilvi ko evi nabbut, sete erij. <sup>18</sup> Ko ngabe nga poro pip̄tevi van e ko evivivrulle ko osurrngoni temipale, ko melabbsen eplari renge jingon, ko orrliw ko erivtet ko aji nisen. Ko nuwrai tevi jinibb som nir nga nir paroji tweni, ko sete arongwos parloli." <sup>19</sup> Ko Iesu owrai tevir owra "Kami dul ngel sete kamosuri ko! Beptevi kami pijpari seveling? Borngge p̄isij suri kami pijpari seveling? Kaptekai ni pivini jik!" <sup>20</sup> Ko nir arpitevi ni vini jin. Ko moka-lesi Iesu ko nem̄in nga m̄isij evivvrulle m̄ier wel nen, ko ewajeni ngatan renge dan elilawij, melabbsen eplari renge jingon. <sup>21</sup> Ko Iesu osusi tevi tata se m̄ier wel nen owra "Seveling le pa nanu ngel m̄ivini rengen?" Ko ni owra "Renge daron nga mivi malum bipi e ko. <sup>22</sup> Ko momori ok-wajeni van renge nabb ko renge nuwi,

owra pok-tor pini. Ko poro nga nik kurprorrmi kem, ko kurongwos kuploli nanu pisan, kupla se kem!" <sup>23</sup> Iesu owrai tevi m̄ernen, "E, kuwrai kuwra 'Poro nik kurongwos kuploli,' ko sete oto iok ko. Oto wor re nik nosurien som ko. Suri poro kuposuri, ko nanu jijle armalum kobbong rengo m̄er nga muosuri." <sup>24</sup> Ko tata se bipiwarreng esaro ngavilvilsen ekail owra "Nuosuri, kupla se inu nga sete mosuri!" <sup>25</sup> Ko daron nga Iesu m̄ilesi delung marwolwolu vini korti, ko ewer ore nem̄in nga m̄isij, osur terter tevi ni owra "Nik nem̄in ne nabbut ko borwon, kupivare lingi ni, ko sete kupsilvi ni kele!" <sup>26</sup> Ko nem̄in nga m̄isij ekail lengleng, ko evirvireni m̄er wel nen elep, ko esil ivare rengen. Ko m̄er wel nen erpe mimij pa, ololi jinibb elep arwera "O, emij pa!" <sup>27</sup> Ko Iesu ervei nevren, ko esa raji imare, ko m̄er wel nen otur imare. <sup>28</sup> Mian ko daron nga mivini vajin rengo naim e, ko jinibb sen nir arsusi silveni tevi ni arwera "Erpese nga kem sete namrongwose naboji tweni?" <sup>29</sup> Ko ni owra lweni tevir owra "Nem̄in nga mirpel ngel, eterter lenglengen nga pivivare. Sansan kobbong, rengo verusen."

*Iesu owra lweni kele tevir nga ni pimij ko wor*

<sup>30</sup> Ko nir arivel lingi lat nen, ko arivel otvi rengo vanu ne Galili. Ko Iesu sete emrreni nga san purongwose. <sup>31</sup> Ko ni evisiseni jinibb sen nir, owrai tevir owra "Jinibb Mawos partekai van rengo nevre jinibb nir ko parevji pimij. Ko vitunen rengo daron nga marevji mimij e ko nabong pitolin vajin, ko ni pia-maur luwi kele." <sup>32</sup> Ko nir arrelenge nale nga muwrai ngok, ko armetutue nga parsusi lweni tevi ni.

*Isi pivi jinibb nga milep jer nen rengo nir*

<sup>33</sup> Ko nir arini rengo Kapaneam, ko aran arlik rengo naim se Pita. Ko ni osusi tevi nir owra "Kami kamok-rij latlat lululweni kami rengo sel ngok. Suri sev ko?" <sup>34</sup> Ko nir armurrarrong, suri nir arok-rij latlat lululweni tevi nir rengo sel suri isi pivi jinibb nga milep jer rengo nir.

<sup>35</sup> Ko ni esakel ngatan ko everus jinibb sen nen nir esngavöl dromon eru arini jin. Ko owrai tevir, "Poro jinibb pisan puwra pivi jinibb nga milep jer nen, ko ngok ni pia-ivi jinibb nga welili jer nen, pia-ivi jinibb ne majingen ser." <sup>36</sup> Ko ni etkai bipiwarreng nga welili san ko elngi

elik rengo liven rengo nir, ko owosi esale rengo nevren nuru ko owrai tevir owra <sup>37</sup> "Isi nga pitkai bipiwarreng nga welili san nga mirpel ngel vini jin rengo inu nisek, ko ngok erpe ni etkai inu ko pa. Ko isi nga mitkai inu, erpe sete etkai inu ko, ko etkai ni nga mukoni inu ko."

*Mer nga sete m̄itre kerr, ni evi kerrkerr ko*

<sup>38</sup> Ko Jon owrai tevi owra "Numal, namlesi jinibb san oji tweni demij rengo nik nisen, ko namwer ore, suri nga ni sete evijuri kerr." <sup>39</sup> Ko Iesu owrai tevi nir owra "Sete kapwer ore ni. Suri sete jinibb san orongwos puloli majingen nga milep rengo inu nisek ko putur imare vajin ko pirij pisij tevi inu. <sup>40</sup> Mer nga sete m̄itre kerr, ni evi kerrkerr ko san. <sup>41</sup> Nuwretun nuwrai tevi kami, Isi nga pilai bbong biles nuwi wel san tevi kami kapmini suri kami kamivi se inu Mesaea, m̄ernen setete mia-tor jabble nowlin.

*Nanu nga marongwos parloli jinibb parjilaklak*

<sup>42</sup> "Ko isi san poro puloli bipiwarreng nga ngel nga muosurik ngel san pijilaklak, erres pelak poro m̄ernen parruloni nevöt nga milep temijpal san rengo nowen ko parjuröni rengo dis mot. <sup>43</sup> Ko poro nevrem pulolim kupjilaklak, kuptai otvi; puloli pirres pelak nga kupasi van re mauren, p̄iasie nga nevrem korti nuru nga pulolim kupan rengo lat ne nejijkien, rengo nabb nga sete san orongwos pivsi pini. <sup>44</sup> [Naulwij ne lat nen sete arongwos parmij ko nabb nen sete arongwos parvisi pini.]<sup>D</sup> <sup>45</sup> Ko poro belam pulolim kupjilaklak, kuptai otvi; puloli pirres pelak nga kupasi van re mauren, p̄iasie nga belam korti nuru nga pulolim kupan rengo lat ne nejijkien, rengo nabb nga sete san orongwos pivsi pini. <sup>46</sup> [Naulwij ne lat nen sete arongwos parmij ko nabb nen sete arongwos parvisi pini.]<sup>E</sup> <sup>47</sup> Ko poro metem pulolim kupjilaklak, kupwirr tweni; puloli pirres rengem nga kupsilvi batun vanu se Atua tevi metem pipsansan, p̄iasie nga metem korti nuru nga pulolim kupan rengo lat ne nejijkien rengo nabb nga sete san orongwos pivsi pini. <sup>48</sup> Naulwij ne lat nen sete arongwos parmij ko nabb nen sete arongwos parvisi pini.

<sup>49</sup> Jinibb jijle Atua purrowrrow nir rengo nabb, pusorans tevi marsuli lesi nevöt mot.<sup>F</sup> Poro nga m̄isij, ko nabb p̄iani pivi niavin. Ko poro nga m̄irres, sete

<sup>D</sup> 9:44 Nale nga mutuo re nolo [ ], rrek sete Mak oli, ko jinibb san ea-uli vitue daron nga muli tweni kopi san ne naul ngel. <sup>E</sup> 9:46 Nale nga mutuo re nolo [ ], rrek sete Mak oli, ko jinibb san ea-uli vitue daron nga muli tweni kopi san ne naul ngel. <sup>F</sup> 9:49 Erpe iel, Mak ospe sol, ko namlingi nevöt mot nga puloli mining ne nale sen piplari piim̄er.

nabb orongwos p̄iani lokloksi. Erpok kele marlingi sol renge nanen nga parunge lesi dilten, dilten erres, rreknga esij. <sup>50</sup> Sol erres, ko poro nga sol dilten nga mimelmel pusuw rengen, ko parloli pimelmel luwi pirpese? Kaptori sol renge nolo kami, ko kaploli demat tevi kami sisamis luwi.”

## 10

*Iesu erij tevir owra sete erres jinibb p̄ilinglingi kurtweni nesevin sen*

<sup>1</sup> Ko Iesu otur imare evel lingi lat nen, ko evini renge vanu ne Jutia renge devjen nga muto roroni van renge Jortan e. Ko delung elep kele arini korti jin, ko ni evisvisenir kele erpe nga momori mok-loli pa. <sup>2</sup> Ko renge ie Parasi sopor arini jin arwera parrowrowe ni. Ko arsusi tevi ni arwera “Erpese, renge nale nesesreien evi nanu nga m̄irres nga jinibb p̄ilinglingi kurtweni nesevin sen?” <sup>3</sup> Ko ni owrai lweni tevir owra “Ko Moses owra sev ko tevi kami?” <sup>4</sup> Ko nir arwera lweni tevi ni arwera “Moses owra jinibb puli naul nga pukur tweni nesevin sen ko p̄ilai tevi, ko p̄ilngi kurtweni vajin.” <sup>5</sup> Ko Iesu owrai lweni tevir, “Suri nolo kami nga m̄iterter ko, niko muloli Moses muli nale nesesreien ngel nga puwomue kami. <sup>6</sup> Ko renge womu jer m̄itipatun, Atua ololi iel ngatan ko nanu jile, ko ‘ololi jinibb eru, norman san ko nesevin san. <sup>7</sup> Ko ngok niko suri mirpel ngel ko, norman pivel lingi tata sen ko tasu sen, pian vajin pipitevi nesevin sen. <sup>8</sup> Nuru nga eru ngok porivi vajin niben sansan ko metka sansan.’ Ko ngok niko nuru setemun orivi eru, ko orivi vajin niben sansan ko metka sansan. <sup>9</sup> Sev nga Atua mijipteni kortoni nuru, sete erres jinibb san p̄ila tweni kele.”

<sup>10</sup> Daron nga marlik vajin lolaim ko jinibb sen nir arsusi lweni kele nanu nga tevi ni. <sup>11</sup> Ko ni owrai tevir, “Poro isi san p̄ilngi kurtweni nesen sen ko p̄ilesi kele nesevin m̄inij kele san, ngok olokloksi lenglengen e nesevin sen nga womu, ololi butterter sen tevi. <sup>12</sup> Ko poro nesevin p̄ilngi kurtweni diwen sen p̄ilik kele ji jinibb m̄inij san, ni kele ololi kobbong erpok, olokloksi diwen sen.”

*Iesu erij erres suri bipiwarreng nir*

<sup>13</sup> Ko jinibb sopor arpitevi bipiwarreng sopor vini ji Iesu nga ni p̄ilngi nevren renger. Ko jinibb sen nir artortori nir nga marpitevi nir vini. <sup>14</sup> Ko daron nga Iesu m̄ilesi e ko ololar lengleng, ko owrai tevir, “Kaplinglingi bipiwarreng parini jik, sete kapwer orer te. Suri batun vanu se

Atua evi se nir nga nolor marirpe bipiwarreng ngok nir. <sup>15</sup> Nuwretun nuwrai tevi kami, m̄er nga sete puloli nolon pivini pirpe bipiwarreng, ni sete orongwos pian van renge batun vanu se Atua.” <sup>16</sup> Ko ni erake totoni bipiwarreng nen nir, ko elngi nevren renger, ko erij erres surir.

*Jinibb nga joron milep san emrreni p̄ila mauren nga sete pusuw*

<sup>17</sup> Ko daron nga mivel suri sel, ko jinibb san owlu van

jin, ko ejpa jin ngatan, ko osusi tevi ni owra “Numal nga m̄irres, inu bololi sev, ko belai mauren nga muto tuwi ngok vini?” <sup>18</sup> Ko Iesu owrai tevi m̄iernen owra “Erpese nga nik kumwera inu nurres? Sete san erres, Atua kobbong esan. <sup>19</sup> Nik kurongwos pae nale nesesreien se Atua, ‘Sete kuprevji pini jinibb, sete kupvevna, ko sete kupkerasi san kupvena, ko sete kupvena nesevin, sete kupkerkeris, kuposuri tata som ko tasu som nuru p̄irres.’” <sup>20</sup> Ko m̄iernen owra lweni tevi Iesu, “O numal, nanu ngel nir nulolir pa renge daron nga mevi nanwarreng malum e ko, mivini mijpari lelingen ngel.” <sup>21</sup> Ko Iesu oklu emteni, ko emrreni elep ko owrai tevi ni, “Nanu sansan kobbong setewor kuloli. Kupan kupwulwule jorom nir ko kuplai nowlir tevi beres nir. Ko nik nowlim puto renge melrin. Ko nik kupini vajin kupvijurik.” <sup>22</sup> Ko ni non eta dan e Iesu muwrai mirpok, ko evel, ornge lengleng esij. Suri ni evi jinibb nga joron milep.

*Evi nanu nga m̄iterter renge jinibb nga joron milep pian renge batun vanu se Atua*

<sup>23</sup> Iesu erieni oklu emteni jinibb sen nir, ko owrai tevir, “Evi nanu nga m̄iterter milep san renge nir nga joror milep paran renge batun vanu se Atua.” <sup>24</sup> Ko nale sen ngok nir bbōsa ela jinibb sen e nir, ko arperper nawon. Ko Iesu owrai suri lweni kele tevir owra “Nanwarreng nir, evi nanu nga m̄iterter milep nga san pian renge batun vanu se Atua. <sup>25</sup> Erpe nato, eterter temijpal renge liwen pietiv. Ko nga jinibb nga joron milep p̄isil asi van renge batun vanu se Atua eterter temijpal wor asie ngok.” <sup>26</sup> Jinibb sen nir arong wonwon nawone nale ngok, bbōsa nga milep elair e. Ko arwerwera lululweni tevi nir lweni, “Po! Ko ngok isi le ma orongwos pian renge mauren?” <sup>27</sup> Iesu emtenir ko owrai tevir, “Renge jinibb evi nanu nga m̄iterter. Ko renge Atua ejki, suri nanu jikle armalum kobbong renge Atua.” <sup>28</sup> Ko Pita etipatun owrai tevi ni, “E, kuplesi kem namlinglingi nanu ngok jile pa nir

ko namvijurim vajin.”<sup>29</sup> Iesu erij weli lweni owra “Nuwretun nuwrai tevi kami, sete jinibb san nga mivel lingi naim sen rreknga tuwan nir ko tasin nir, rreknga jojin nir rreknga tata sen rreknga tasu sen, rreknga natun nir rreknga vanu sen suri inu marongen suk ko nospen nga n̄irres, puwra sete orongwos p̄ila weli nanu nga mivel lingir ngok nir, ejki,<sup>30</sup> m̄ernen p̄ila weli pungut ko wor renga daron nga lelingen ngel pivses nir sisamis luwi, metka sen nir ko tuwan tevi tasin nir; ko jojin nir ko tasu sen nir ko natun nir ko vanu sen nir. Ko jinibb parloli p̄isij tevi suri nga muosuri Atua. Ko vitunen vajin pia-lai mauren nga muto tuwi ngok vini.<sup>31</sup> Ko jinibb elep nga lelingenok marwowomu, mian ko parvivotu vajin. Ko elep nga lelingenok marvivotu mian ko parwowomu vajin.”

*Iesu owra lweni kele nga mian ko ni pimij*

<sup>32</sup> Nir arusri sel artongsa van renga Jerusalem e. Ko Iesu ewit ko owowomue nir ie, ko jinibb sen nir bb̄osa elair e nga mimawose Jerusalem mirpok, ko jinibb nga marvijurir armetutu. Ko ni eptevi tweni jinibb sen esngav̄ol drromon eru, ko osp̄e suri nanu nga para-pelari renga ni tevi nir.<sup>33</sup> Owra “Kaplesi, rrapongsa le pa van renga Jerusalem. Ko partekai inu jinibb Mawos van ji batun numal ne sulsulen nir ko jinibb nevisvisienen ne nale nesesreien nir. Ko nir parwera erres renga bemij, ko partekai inu van ji jinibb ne vare nir.<sup>34</sup> Ko nir parsop̄e inu, ko parverae noltor e inu, ko parvirviralali inu, ko parevji pini inu. Ko vitunen renga nabong p̄itolin ko inu bemaure luwi kele.”

*Jemes ko Jon orngoni nanu san tevi Iesu*

<sup>35</sup> Jemes ko Jon, Sepeti natun nuru, orini ji Iesu ko orwera tevi ni, “Numal, komru nomor-marong nga nik kuploli tevi komru sev nga nobor-ngoni tevi nik.”<sup>36</sup> Ko ni owra lweni tevi nuru, “Kamru komor-marong nga inu bololi sev le tevi kamru?”<sup>37</sup> Ko nuru orwera lweni tevi ni, “Komru nomor-marong nga nik kuploli komru tuwen p̄isakel renga nevrem rres, ko komru tuwen p̄isakel renga nevrem mair, renga daron ne nosr̄ovien som.”<sup>38</sup> Ko Iesu owrai tevi nuru, “Kamru sete komor-rongwose sev nga komor-ngoni. Kamru komor-viter kopor-minmin renga biles ne norongen nga m̄isij nga inu beminmin renga? Rreknga komor-rongwos kopor-paptaes renga baptaesen ne norongen nga m̄isij nga inu bepaptaes renga?”<sup>39</sup> Ko nuru orwera lweni tevi ni, “O-o, nomor-viter.” Ko Iesu owrai tevi nuru, “Biles nga inu beminmin renga, kamru kele kopor-minmin renga. Ko baptaesen nga

inu bepaptaes renga, kamru kele kopor-paptaes renga.”<sup>40</sup> Ko nga kopor-sakel renga inu nevrek rres ko renga nevrek mair sete evi nga inu belai, evi se nir bbong nga Atua muloli terai nir e ko.”

*Nanu nga muloli jinibb mian mare weretunen*

<sup>41</sup> Ko daron nga jinibb sen esngav̄ol marunge, ko arlolarsi lenglengen e Jemes ko Jon.<sup>42</sup> Iesu everus nir vini jin, ko owrai tevir, “Kami kamrongwos pae murrur jinibb nga marwera marivi numal nga marwowomu renga jinibb ne vare. Nir arwer orer eterter ko arrowrowe derteren ser renger.”<sup>43</sup> Ko kami sete kapirpok. Mer nga mimarong pivi jinibb nga milep renga kami, ni pivi jinibb ne majingen se kami ko wor.<sup>44</sup> Mer nga pimarong pivi jinibb nga puwomu renga kami, ni pivi demij maur se kami jile ko wor.<sup>45</sup> Ngok nuwretun, inu Jinibb Mawos kele sete nuvini nga jinibb parmajing suk, ejki. Ko nuvini ma nga Bemajing se jinibb nir, ko belai mauren suk pivi nowli jinibb pilep, ko bojri lwenir e.”

*Iesu ololi Batimeas meten oklu elesi vajin nanu nir*

<sup>46</sup> Ko nir aran Jeriko. Ko daron nga nir jinibb se Iesu marivel lingi Jeriko e, ko delung nga milep arvijurir. Ko Batimeas nga meten murrorr nga mok-ngun-ngun res, natu Timeas, elik renga roro sel.<sup>47</sup> Ko daron nga ni murnge Iesu ne doNasret m̄ias̄i, ko ekail van owra “Iesu nik metka se Devet, kuprroormi inu!”<sup>48</sup> Ko jinibb elep arkail ore ni, arwera ni pip̄erper; ko ni ekail temijpal kele ko owra “Nik metka se Devet, kuprroormi inu!”<sup>49</sup> Ko Iesu otur murrong, ko owra “Kapverus ni vini.” Ko nir arveruse metrorr arwera tevi “Nolom pian ngatan, kupmera! Everus nik.”<sup>50</sup> Ko ni ewirr tweni sunsun ne melas sen, ko otur imare kasi ko evan ji Iesu.<sup>51</sup> Ko Iesu osusi lweni tevi metrorr owra “Nik kumarong inu bololi sev tevi nik?” Ko metrorr owrai tevi ni, “Numal, numarong boklu.”<sup>52</sup> Ko Iesu owrai tevi ni, “Kupiel suri sel som ko wor. Nosurien som ololim kumrres.” Ko ngavilvil meten oklu luwi evesane, ko evijuri suri ni renga sel.

## 11

*Iesu evan renga Jerusalem, ko jinibb artori ni mare*

<sup>1</sup> Daron nga nir marini mori renga Jerusalem e renga Betpas ko Betani renga botwen ne lolnai ne olip, ko ni okoni tweni jinibb sen eru.<sup>2</sup> Owrai tevi nuru, “Kopormawos renga ngaim nga muto roroni no kamru ngok, ko kopor-lesi natu dongki san



niko eati nga jinibb san setewor esakel rrongvi rengen. Kopor-telasi ko kopor-ile vini. <sup>3</sup> Ko poro jinibb pisan puwrai tevi kamru, 'Erpese komor-loli mirpel?' Ko kopor-wera, 'Numal emrreni wor, ko sete mia-periv ko pia-lingi lweni.'" <sup>4</sup> Ko nuru orivel lingi, oran ko orlesi natu dongki nga mīati mori rengo roro metali vare rengo sel, ko ortelasi. <sup>5</sup> Ko jinibb sopor nga martur ie arwera tevi nuru, "Komor-telasi dali natu dongki ngok suri sev?" <sup>6</sup> Ko nuru orwera lweni tevir erpe nga Iesu muwrai, ko nir arlinglingi nuru orivel. <sup>7</sup> Ko nuru orile natu dongki van ji Iesu; ko orpelseni sunsun se nuru rengen, ko ni esakel rengen. <sup>8</sup> Ko nir elep arpelseni sunsun ser rengo sel, ko nir sopor arta nablasi nini ko rengsi nai tei raor ko arpelsenir rengo sel. <sup>9</sup> Ko jinibb nga marwowomu ko jinibb nga marvivitu suri arkail arwera "Osana! Numal Atua, nik kurij pa erres tevi ni nga mivini rengo nik nisem. <sup>10</sup> Neiren rengo Batun Vanu nga mivini, batun vanu se tata se kerr Devet. Osana van ji Atua ne drromsen mare!"

<sup>11</sup> Musuw ko Iesu evan rengo Jerusalem ko evan rengo Naim On se Atua, ko onunri nanu jille nga marto rrale. Ko nat erivriv vajin, ko ni eptevi jinibb sen esngavöl drromon eru ko arluwi van rengo Betani e.

#### *Nai san nga wenen mijki rengen*

<sup>12</sup> Ko rengo mevinen vajin daron nga marivel lingi Betani e, ko numer aji Iesu. <sup>13</sup> Ko ni elesi nai pik san otur iokwan, etavös luwi pa, raon otoo. Ko evan mori rengen, owra poro pīlesi wenen putoe. Ko moro mivini rengen ko sete elesi nanu san rengen, raon kiskis bbong, suri setewor evi daron nga piwen e. <sup>14</sup> Ko Iesu erij, owrai tevi, "Setemun jinibb san purro kele wenen, rengo lelingen ngel ko pa ko tuwi ngok vini."

#### *Iesu oji tweni jinibb nga marwuwule joror rengo Naim On se Atua*

<sup>15</sup> Nir arini rengo Jerusalem. Ko Iesu evan loloim rengo Naim On se Atua ko oji tweni lartul nga marwuwule nijor rengo Naim On ko lartul nga marwuwulir, ko evatpuse tep se nir nga markelkele nevöt ko nai seksakel se nir nga marwuwule wumēr nir. <sup>16</sup> Ko ewer ore jinibb nir, sete san puwosi nanu pisan pīkali otvi rengo live laut ne Naim On e. <sup>17</sup> Ko ni evisviseni nir owrai tevir, "San oli owra 'Naim suk pivi naim ne verusen se jinibb ne vanu nga musuw ngok.' Ko kami kamtur imare vajin ko kamloli evi 'naim ne venao res!'"

<sup>18</sup> Daron nga batu jinibb ne sulsulen nir ko jinibb nevisviseni ne nale nesereien nir marunge e, ko arkulkulu pej sel san nga parevji pini ni rengen. Ko armetutu parrul re ni, suri rengo nevisviseni sen delung jile bbōsa elair e. <sup>19</sup> Ko rengo nat nga mirivriv mivini e ko ni evel lingi ngaim nga milep nen.

#### *Nai pik ngok eviseni derteren ne nosurien*

<sup>20</sup> Ko moro mevinen rengo rorong marvijuri sel marasi rengo lat nen, ko arlesi nai pik nga mukor rengo drromon ko mijpari rengo laḡen ngatan. <sup>21</sup> Ko Pita orrorrmi jipari nga Iesu mīrij tevi nai nen, ko owrai tevi ni, "Jinibb nevisviseni, kuplesi nai pik nga nik kumsur terter tevi nga, okur jile." <sup>22</sup> Ko Iesu erij owra lweni tevi nir, "Kaplingi nosurien se kami rengo Atua. <sup>23</sup> Nuwretun nuwrai tevi kami, Isi san poro puwrai tevi botwen ngel, 'Kupruj ngasu iok, kupwirr van ngalu e rengo dis e,' ko sete norrorrmien sen pīeru e, ko puosuri sev nga muwrai ngok, ko niko nanu nen piplari ko pusorsan tevi nga muwrai. <sup>24</sup> Niko nuwrai tevi kami, Nanu jile nga kami kamngoni rengo kamlot, kaposuri ko wor nga kami kaplair, ko kaplair ko vajin. <sup>25</sup> Ko poro nolo kami pīsij tevi jinibb pisan, ko rengo daron nga kami kamtur e nga kaplot, kaptelasi tweni ni. Ko ngok Tata se kami nga mīlik rengo melrin pītasi tweni nololien se kami. <sup>26</sup> [Ko poro nga kami sete kamtelasi nololien se kami, ko Tata se kami nga mīlik re melrin ni kele sete pītasi nololien se kami.]"H

#### *Jinibb nga marwowomu rengo mēri Isrel nir arsusi nanu san tevi Iesu*

<sup>27</sup> Ko nir arluwi kele vini rengo Jerusalem e. Ko daron nga Iesu mok-tutur suri loloim ne Naim On e, ko batu jinibb ne sulsulen nir ko jinibb nevisviseni ne nale nesereien nir ko Bīrterawarren nir arini jin. <sup>28</sup> Ko arwera tevi ni, "Rengo derteren sev nga nik kumloli nanu ngel nir, rreknga isi elai derteren ngel tevim nga kuploli nanu ngel e nir rengo?" <sup>29</sup> Ko Iesu owrai tevi nir, "Inu bosusi kami mun e nale san nile, ko poro kapwera lweni tevik, ko inu bea-wera lweni tevi kami nga rengo derteren sev nga inu mololi nanu ngel nir rengen. <sup>30</sup> Baptaesen se Jon evel rengo melrin vini, rreknga evel rengo jinibb vini? Kapwera ta tevik." <sup>31</sup> Nir arwerwera lululweni tevir arwera "Poro rrapwera 'Evel rengo melrin vini,' ko ni puwra 'Ko erpese sete kami kamosuri ni?'" <sup>32</sup> Ko poro rrapwera 'Rengo jinibb,' ko

H 11:26 Nale nga muto re nolo [ ], rrek sete Mak oli, ko jinibb san ea-uli vitue daron nga muli tweni kopi san ne naul ngel.

iok p̄isij re kerr." Suri armetutue delung nir; suri nir jile artori Jon evi propet weretunen. <sup>33</sup> Mian ko arwera lweni tevi Iesu, "Ia, sete namrongwose." Ko Iesu owrai tevi nir; "Ko inu kele sete numawerai tevi kami renge derteren sev le nga inu mololi nanu ngel nir rengen."

## 12

*Jinibb nga marsij nga marmetmete naut se numal*

<sup>1</sup> Iesu owra nale rrongrongvi san tevi jinibb nir; owra "Jinibb san owra naut ne grep san, ko osi rrale nalut rengen. Ko eli bbulwil san renge lat nen nga jinibb parivel renge grep nir ko suwer p̄iseser van rengen. Ko eli naim san nga muwu mare nga parsar en ko parkulkulu metmet p̄irres. Ko elai naut nen tevi jinibb sopor nga parmajing rengen, ko ni evel van renge ngaim m̄inij e san. <sup>2</sup> Mianan ko mijpari renge daron mawos nen vajin nga partawe wenen e, ko ni okoni jinibb ne majingen sen san van ji jinibb nga marmetmete naut nga, p̄ilai wenen sapon jir. <sup>3</sup> Ko nir arrul re totoni ni, ko arvirrvirrali, ko arkoni tweni evel kiskis olwi. <sup>4</sup> Ko ni okoni kele jinibb sen m̄inij nen san evan jir; ko nir arla nevöt ko artuwe rrrurrgi batun e, ko arloli esij elep tevi, ko arkoni tweni olwi. <sup>5</sup> Ko ni okoni kele jinibb sen m̄inij nen san, ko m̄ernen arevji pini emij. Ko nir elep keke wor nga mukonir van jir; nir sapon arvirrvirralir; ko nir sopor arevji pinir armij. <sup>6</sup> Ko sansan bbölbölbölvajin ojpon jer, natun nga mimrreni temjpal nen e. Ni okoni vivitu jere evan jir; owra 'Nir rreknga parosuri natuk le.'

<sup>7</sup> "Ko jinibb nga marmetmete naut nen daron nga marlesi, ko arwera lulenwani tevi nir; 'Ngok, natun mawos nga pia-la joro tata sen ko ngok. Kerr p̄irevji pini, ko naut sen pivi vajin se kerr e.' <sup>8</sup> Ko arrul totoni ni, ko arevji pini emij, ko arsor tweni van vare e renge naut ne grep nen e.

<sup>9</sup> "Ngok mirpok ngok, numal ne naut ne grep nen pulwi vini ko puloli sev ko tevir? Ni pivini ko p̄irevji pinir; ko p̄ilai tevi jinibb m̄inij kele sopor." <sup>10</sup> Ko Iesu osusi tevir owra "Ia, ko nale nga maruli renga Naul On ngel owra sev le, nga muwra 'Nabur nga jinibb nga marokmajinge naim marungasi marwirre, niko vajin evi nabur nga murrul totoni naim m̄irterter. <sup>11</sup> Nanu ngel evi nanu nga miveli ji Numal e vini. Ko evi nanu nga mete kerr m̄ilesi taole m̄irres p̄elak.' " <sup>12</sup> Ko nir nga marwowomu re m̄eri Isrel nir arongwose nga ni owra nale rrongrongvi nga m̄itre

nir rengen, ko arwera parrul totoni; ko armetutue delung nir. Ko arlinglingi arivel lingi.

*Erres renge rrapwuli takis tevi Sisa, batu numal se m̄eri Rom nir?*

<sup>13</sup> Jinibb nga marlelep sopor arkoni Parasi sopor ko jinibb se Erot sopor arini ji Iesu nga parjiljilwer kerkerasi, nga puloli nir partor wos ni renge nale sen. <sup>14</sup> Nir arini jin ko arwera tevi ni, "Jinibb nevisvisenien, kem namrongwose nga nik komok-weretun; ko sete kuwer suri jinibb san, ko sete kumanun rragrrag renge no san, ko komok-visviseni sel se Atua weretunen. Ngok kupwera ta tevi kem, evi nanu nga m̄irres renge nale nesesreien se kerr nga rrapwuli takis tevi Sisa, rreknga ejki? Nablai tevi rreknga sete nablai tevi?" <sup>15</sup> Iesu orongwose nga nir marivel re sel eru, ko owrai tevir, "Suri sev nga kami kamrrowrrowe inu mirpok? Kaplai ta nevöt nen pisan vini jik, nga inu belesi ta." <sup>16</sup> Ko nir arla nevöt nen san tevi ni, elesi jile musuw, ko owrai tevi nir, "Ko isi le non ngel, ko nisen ngel?" Ko nir arwera lweni tevi arwera "Rrekma Sisa ko." <sup>17</sup> Ko Iesu owrai lweni tevir; "Nanu nga marivi se Sisa, kaplai lweni tevi Sisa. Ko nanu nga marivi se Atua ko kaplai lweni tevi Atua." Ko bbösa elair e.

*Errese renge daron nga jinibb mimaur luwi kele renge mijen*

<sup>18</sup> Satusi nir, nga marwera jinibb sete orongwos pimaaur luwi kele renge mijen, arini ji Iesu, ko arsuhi kerkerasi tevi ni arwera <sup>19</sup> "Jinibb nevisvisenien, Moses oli pa renga naul ne nale nesesreien se kerr erpel: 'Poro jinibb san tuwan pimij lingi nesen sen, ko natu nuru pijkie, ko ngok m̄ernen tasin p̄itkai keke tuwan nesen sen ko pivesi wani metka se tuwan nga mimij ngok.' <sup>20</sup> Ngok niko jinibb niaken ebute; ko m̄erwomu nen elesi nesevin san, mian ko emij lingi nesevin nen, ko natu nuru ejkie. <sup>21</sup> Erwen keke etkai vinnen, ko emij lingi keke, sete natu nuru otoo te ejki. Ko nir itolin keke, ko erpe keke bbong nga wumonen nuru. <sup>22</sup> Nir jile nga ebute ngok natun arjikie. Ngok vitunen vajin ko nesevin nen emij keke. <sup>23</sup> Ko ngok mirpok ngok, renge daron nga para-maur luwi keke re mijen, vinnen pivi nir si nen ko nesevin sen? Suri nir niaken nga ebute ngok jile nir artekai. Kupwera suri ta we!" <sup>24</sup> Iesu owrai tevi nir, "Suri nanu nga eru ngel le, kami kamsarr nga kamsarr lengleng, suri nga sete kamrongwose Naul On rreknga derteren se Atua. <sup>25</sup> Suri daron nga jinibb nga marmij parmaur luwi renge mijen, setemun norman ko nesevin moratotko keke, rreknga porleslesi nuru keke,

ejki mun. Porlik vajin porirpe anglo ne melrin nir. <sup>26</sup> Ko re devjen ne nga nir nga marmij, nga para-maur luwi kele, ngok kami sete kameve rengo naul se Moses rengo lat nga marsupe suri nai wel san nga muror, ko nabb sete eani? Renge nai ngok, Atua erij tevi Moses, owra 'Inu nuvi Atua se Epram, ko Atua se Aesak, ko Atua se Jekop.' <sup>27</sup> Ni sete evi Atua se jinibb nga marmij te ejki, evi Atua se nir nga marmaur. Suri derteren sen elep nga elep lingi mijen. Iok kami kamsarr nga kamsarr lenglengen ko nga kamok-wera jinibb sete orongwos pimaaur luwi kele re mijen."

*Nale neseseien se Atua ngabes nen evi drromon jer?*

<sup>28</sup> Ko san rengo jinibb nevisvisenien ne nale neseseien evini, ko omurrarronge nir jile marok-bburburir e nale, ko ornge nga Iesu okrij welir erres pelak. Ko osusi tevi ni owra "Nale neseseien se Atua ngabes nen evi drromon jer rengo nale neseseien minij nga ngok nen nir nga mirres asi nen nga rrapvijuri?" <sup>29</sup> Ko Iesu owra lweni tevi ni owra "Renge nale neseseien se Atua nga mivi drromsen jer renger erpel, 'O Isrel, kaprunge Iova Atua se kerr. Ni kobbong esan evi Iova. <sup>30</sup> Ko nik kupmerreni Iova Atua som tevi nolom jile, ko tevi mauren som jile, ko tevi norrorrmien som jile, ko tevi derteren som jile.' Ngel ko evi nale neseseien se Atua nga mivi drromon jer, nga miasa nga ngok nen jile nir. <sup>31</sup> Nga surie kele erpel, 'Nik kupmerreni jinibb nga marlik morie nik pirpe kumrreni lweni nik.' Setemun nale neseseien kele san osorsan tevi nga ngel nuru, ejki." <sup>32</sup> Mernen owra lweni tevi, "Omomsawos ko, Jinibb nevisvisenien, nik kuwra weretunen. Atua sansan kobbong, setemun san kele, ni kobbong esan rres. <sup>33</sup> Ko nga rrapmerreni ni rengo nolo kerr jile ko norrorrmien se kerr jile, ko derteren se kerr jile, ko nga rrapmerreni jinibb nga marlik morie kerr pirpe kerr, ngok erres womu re marsuli nanu tevi Atua." <sup>34</sup> Ko daron nga Iesu mulesi muwra lweni tevi ni mumomsawos, ko owrai tevi ni, "Nik sete kuruj ngasu rragrag rengo batun vanu se Atua." Vitunen rengo ngel ko setemun jinibb san osusi kele nanu san tevi ni, suri armetutu.

*Kristo sete evi bbong metka se Devet kis ko, ko evi kele wor Numal sen ko*

<sup>35</sup> Daron nga Iesu mok-visviseni jinibb nir rengo loloim ne Naim On e, ko owrai tevir, "Erpese jinibb nevisvisenien ne nale neseseien marwera 'Mesaea evi Devet natun'?" <sup>36</sup> Suri Devet Nemin On esilvi ko owra erpel: 'Numal Atua owrai tevi Numal

suk, "Kuplik rengo nevrekk rres, kuptiriv pijpari nga bololi devje nuval som nir parirpe lat nga kupbböt ren rengo nolon belam ngatan." ' <sup>37</sup> Devet lweni wor owra ni evi Numal sen, ko ngok ni evi natun erpese ko?" Jinibb elep nga marini arunge ni muwrai mirpok ko arir lengleng ren.

*Iesu erij tere jinibb nevisvisenien ne nale neseseien nir*

<sup>38</sup> Iesu evisviseni jinibb nir ko owrai tevir, "Kapmetmet rengo jinibb nevisvisenien ne nale neseseien nir, suri nir armerreni paruri sunsun nga marres nga marpepriv partutur tevir, ko delung jile partorir ko parsareni nevrer tevir rengo sel. <sup>39</sup> Armerreni parsakel rengo nai seksakel nga muto limjer womu mirres rengo Naim On, ko erpok kele armerreni parsakel rengo nai seksakel nga muto limjer womu mirres rengo lat ne nanen. <sup>40</sup> Arivi demij venao, arvenae petpeti nijor se nesevin nga diwen ser marmij lingir, ko rengo daron ngok ko pa arkerkerasi jinibb nir, arloli verusen nga marpepriv tevi Atua. Ngok Atua putor vitrangir nir pilep suri."

*Nesevin san nga mutuw nevöt sen*

<sup>41</sup> Iesu esakel rengo loloim on se Atua, morie lat nga bokis ne nevöt mutoe. Ko ok-meteni suri erpese nga jinibb maroktuwe nevöt van rengo bokis nen. Jinibb elep nga joror millep artuwe nevöt nga marlelep nir. <sup>42</sup> Ko rengo ie, nesevin san nga mivi beres, diwen sen mimij lingi, evini ko otuwe nevöt nga wowarrend eru. Nevöt nga wowarrend nen nuru korti ko evi wan selen ko. <sup>43</sup> Ko Iesu everuse jinibb sen nir arini jin, ko owrai tevir, "Nuwretun nuwrai tevi kami, nesevin nga ngel nga diwen sen mimij lingi ngel, ni otuw nevöt asie nir jijle nga martuwe nevöt van rengo bokis nen. <sup>44</sup> Suri lartul nga ngok nir joror elep, ko arlai bbong beblen ko artuwe, ko artori jere eleplep; ko vinel ma emarong putuw petpeti sev nga ni milngi, nga mivi liken sen petpeti."

## 13

*Iesu owra tweni nga jinibb sopor partingtinge Naim On se Atua*

<sup>1</sup> Daron nga Iesu mivare rengo Naim On se Atua e, ko jinibb sen san owrai tevi owra "Jinibb nevisvisenien, kupmeteni ta nevöt lepel nir, ko naim lepel nir, arinijinj nawone." <sup>2</sup> Ko Iesu owrai tevi, "Kulesi naim nga marlelep marinijinj nawone ngel e? Mian ko jinibb partingtinge petpetir. Setemun nevöt pisan pijngat jer kele rengo pisan, nga sete orongwos piwirr pimatun ngatan."

*Nanu nga m̄isij nga pia-vini*

<sup>3</sup> Iesu oksakel renge Botwen ne lolnai ne olip, ko oklu mawose Naim On se Atua. Ko Pita ko Jemes ko Jon ko Antru arususi silveni bbong tevi ni, <sup>4</sup> "Kupwovrai ta tevi kem, nanu ngel nir para-vini seveling ko? Ko sev ko parivi nelesien nga piviseni nga nanu ngel nir otomori parini?" <sup>5</sup> Ko Iesu owra lweni tevir, etipatun owra "Kapmetmet ko wor, jinibb tarkerkerasi kami. <sup>6</sup> Suri renge inu nisek nir pilep parini rengen, ko parwera 'Inu nuvi Kristo le,' ko parkerkerasi kele nir pilep pipok. <sup>7</sup> Daron nga kami kaprunge marval, ko jinibb nir maror e nuval, kami sete kapmetutu. Nanu ngok nir parini ko wor parasi womu, ko bongsi iel ngatan ejki ko wor. <sup>8</sup> Ngaim san putur imare ko pival tevi ngaim san, ko batun vanu san putur imare ko pival tevi batun vanu san. Ko nan̄i pin̄i renge vanu lele, ko numer puto renge vanu lele ne iel ngatan, jinibb parmer pilep. Nanu ngel nir arivi bbong batun nga jinibb nolor parrume.

<sup>9</sup> "Kami kapmetmet wor kami ko p̄irres. Suri partekai kami ko van renge kot ser nir, parwer lokloksi kami. Ko parvirrvirrali kami renge naim ne loten ser, ko kaptur renge no numal nga marwewarrend nir, ko numal nga marlelep nir. Suri kami kapsuŕe inu renge no nir. <sup>10</sup> Womunen parwerwer mun renge nosŕen nga m̄irres tevi jinibb jile nir renge vanu ne ngatan ngel jile nir. <sup>11</sup> Ko daron nga pareveji kami ko partekai kami van renge kot ser, ko sete kapmetutu womu suri sev nga kami kapa-werai. Suri sev nga Nem̄in On pia-lai tevi kami renge mete nial nen, ngok ko kami kapwerai. Suri sete kami kaprij, ko Nem̄in On nga m̄ilik renge kami p̄irij re norrorrmien se kami, ko kami kapwera tweni. <sup>12</sup> Ko niaken p̄itkai niaken sen ko p̄ilngi renge mijen, ko tata p̄itkai natun norman p̄ilngi renge mijen, ko bipiwar-reng partur imare ko partere tata ko tasu ser, ko parevji pinir parmij. <sup>13</sup> Ko jinibb jile nir parungasi kami suri inu nisek; ko m̄er nga putur p̄iterter pijpari bongsin, m̄ernen ko pia-la mauren.

*Nanu nga m̄isij milep renge Jerusalem*

<sup>14</sup> "Mian ko daron nga kami kaplesi atua se jinibb ne vare nir nga m̄isij nga m̄isij p̄erŕer parini parsireni putur renge lat nga muon (rrek kami nga kameve kaprongwose kobbong), ko ngok kami nga kamlik renge Jutia kapwolu van renge botwen e nir. <sup>15</sup> Ko nik nga kumlilik vare renge naim som, sete kupluwi kele van renge loloim som nga kupla nanu pisan, pijki, kupwolu ko pa. <sup>16</sup> Ko poro jinibb

san pian renge orsel, ko setemun pulwi kele vini renge naim sen nga p̄ila kele sunsun sen; puwlu ko pa. <sup>17</sup> Wurru pia-sij wor niko renge nesevin nga m̄itetaur, ko nesevin nga muloli natun musus renge nabong nen nir. <sup>18</sup> Ko kami kapverus ko wor van ji Atua nga puloli woluen se kami sete puto renge daron ne naus. <sup>19</sup> Nanu nga marsij pilep parini. Nanu nga jinibb nir setewor marlesi meter e nabong san, m̄itipatun renge daron nga Atua muloli iel ngatan e, mivini mijpari lelingen ngel. Ko setemun nanu nga m̄isij pipel pivini kele renge nabong san, ejki mun. <sup>20</sup> Numal Atua orrorrmi pa nga pia-ta tweni nabong nga marsij ngel nir; poro pijki, ko sete jinibb san mia-maur. Ko suri orrorrmi nir nga ni mutobbobbu pae nir, ko niko muloli nabong nen nir sete pilep p̄elak. <sup>21</sup> Renge nabong nen, poro jinibb pisan pia-werai tevi kami, 'Kaplesi Mesaea ngel!', rreknga 'Kaplesi ngokwan!', ko sete kaposuri. <sup>22</sup> Pian ko pia-irpok ko wor renge iel ngatan, Mesaea ne gerisen pilep paratur imare, ko propet ne gerisen nir pilep para-tur imare ko para-viseni nevisenien ko nelesien nga marlelep nir, nga parakerkerasi jinibb nir ko jinibb se Atua kele nir. Ko sete arvitere para-kerkerasi jinibb se Atua nga mutobbobbu nir. <sup>23</sup> Kaplesi, nuwra wowomue nanu jile le pa ngel nir tevi kami. Ko kami kapkulkulu metmet ko wor p̄irres.

*Mian ko Jinibb Mawos pia-vini*

<sup>24</sup> "Renge nabong nen nir, nanu nga marsij ngok nir parini parasi p̄etŕeti pusuw, ko daron nen vajin 'Ko nial pimot ko nav̄ol sete p̄iser. <sup>25</sup> Ko moju ne melrin nir parvitvitan ngatan, ko nanu nga marterter ne melrin nir paririr.' <sup>26</sup> Mian ko parlesi 'Jinibb Mawos pujubbul renge nabor vini' tevi derteren sen nga milep temijpal ko tevi nosr̄övien sen. <sup>27</sup> Mian ko ni pia-koni tweni anglo sen nir paran re iel ngatan bongsin ne ivij jile, tevi lat p̄etŕeti nir nga melrin m̄isalsal orer. Ko parser kortoni lartul nga ni mutobbobbue nir vini lat pisanan.

*Nanu ngel sete jinibb san orongwose daron nen*

<sup>28</sup> "Kami kamrongwos pae ko renge daron ne nai nir marok-jur. Daron nga rengsir martengriv luwi nga raor marpelari, ngok kami kamrongwose pae ko nga num̄os evini mori vajin. <sup>29</sup> Ko pipok ko, daron nga kami kaplesi nanu ngel nir parini parpelpelari parasi, ko kami kaprongwose nga inu Jinibb Mawos otomori beplari, erpe renge pa roro metali. <sup>30</sup> Nuwretun nuwrai tevi kami, Dul nga ngel nir setewor parmij p̄etŕeti ko, nir

sopor parmaur malum kobbong pijpari nga parlesi nanu ngel nir parpelpelari. <sup>31</sup> Melrin ko iel ngatan porjijki, ko nale suk ma nir sete mara-jijki. <sup>32</sup> Nabong nen sete jinibb san orongwose, ejki, ko anglo ne melrin nir kele arrelenge. Ko inu kele Jinibb Mawos sete nurongwose te. Tata suk kobbong esan orongwose.

*Kami kapkulkulu metmet ko wor ðirres*

<sup>33</sup> “Kami kapkulkulu metmet ko wor ðirres, suri sete kamrongwose nabong nen. <sup>34</sup> Suri inu Jinibb Mawos nurpe jinibb san nga mivél lingi naim sen ngok ko, nga mian renge vanu ñinij san ñilik rengen. Ko ñilai derteren tevi jinibb sen nir ko ñila majingen sisamis tevi nir sisamis. Ko owrai tevi ñer nga mutur metmet renge metali ni pukulkulu ko wor ðirres. <sup>35</sup> Pirok ko, kami kapkulkulu, suri kami kamrrerrenge daron mawos nga numal ne naim pulwi rengen vini. Pivini renge rivriv rreknga renge nat ðirrang, rreknga nato pukokroun, rreknga renge rorpong. <sup>36</sup> “Kapmetutu tia-luwi tingavil vini, ko tia-lesi kami taka-matur. <sup>37</sup> Ko sev nga mowrai tevi kami, nuwrai kele tevi jinibb jijle, nga parkulkulu ko wor ðirres.”

## 14

*Jinibb nga marwowomu renge ñeri Isrel nir arwera parevji pini Iesu*

<sup>1</sup> Nabong eru ma ojpon nga partori nanen ne asien ko nanen ne niv nga is mijki rengen. Ko batu jinibb ne sulsulen nir ko jinibb nevisvisenien ne nale neseseien nir arpejpej sel san nga parrul venaé Iesu rengen ko parevji pini. <sup>2</sup> Ko arwera “Sete rrama-loli renge daron ne nanen, suri jinibb tarkomrönir vini ko tarevji kerr.”

*Nesevin san ejvi senta renge batu Iesu*

<sup>3</sup> Iesu evan renge Betani ko elik renge naim se Saemon nga bonevis mimsi e mesien nga niber ñimemaual. Ko ni esakel mare ko eaan. Ko nesevin san evini jin, otori botel san nga marloli nevöt e san, nisen arwera alapasta. Renge botel nen senta nga marloli renge nart oto rengen, mapun erres elep ko nowlin elep kele. Ko vinnen obbri botel nen ko ejvi senta nen renge batu Iesu. <sup>4</sup> Ko jinibb sopor arlik ie, ko arlolarsi vinnen suri, ko arwerwerai lulweni tevir, “Owra erpese le, mulokloksi nawone senta ngel. <sup>5</sup> Poro parwulwule senta ngel ko rrek nowlin pivi nevöt pungut pivatul (300) ko, ko parlai tevi ñeres nir.” Nir artortori erpok. <sup>6</sup> Ko Iesu owrai tevir, “Kaplínglingi vinok! Erpese kami kamloli ni murnge ñisij? Ni ololi nanu san nga ñirres pelak renge

inu. <sup>7</sup> Kami kamlík tevi ñeres ngok nir tetajer ko pa, ko poro kapmerreni kaploli nanu san tevir, tetajer kobbong orongwos kaploli ðirres tevir. Ko inu ma sete mealik tetajer tevi kami. <sup>8</sup> Ko vinel evini iel, ololi pa nanu nga ni murongwos puloli ko, ni ejvi senta re nibek owomu etravi daron ne netivtavian suk. <sup>9</sup> Nuwretun nuwrai tevi kami, renge iel ngatan ngabes nen nga paran parwerwer renge nospen nga ñirres rengen, ie kele nanu nga nesevin ngel muloli tevik parsupe suri ren, pivi ni now sen.”

*Jutas eir nga pimaronge Iesu pian renge nevre devje nuval sen*

<sup>10</sup> Ko Jutas ne Iskariot evan ji batu jinibb ne sulsulen nir nga ðitkai kerasi Iesu tevir. <sup>11</sup> Daron nga marunge nale sen nga muwrai tevir, ko arir elep. Ko arloli rijrijen san tevi nga parlai nevöt sopen tevi. Ko ni epejpej daron ngabe ko ðirres renge ni ðitkai kerasi tevir.

*Jinibb se Iesu eru orloli nanu jile arto lilane terai nanen ne asien*

<sup>12</sup> Renge nabong womu ne niv nga is mijki rengen, nabong nga marevji nanu rrum nga parsulir renge nanen ne asien, ko jinibb sen arsusi tevi ni arwera “Numal, kumarong nga kem naban ngabe le nabloli lilane terai nga nik kuproi nanen ne asien rengen?” <sup>13</sup> Ko ni owrai tevi jinibb sen eru, “Kamru koporan renge Jerusalem, ko koporsewute jinibb san ie nga muwosi botel nuwi san nga muwun; ko koporvijuri ni. <sup>14</sup> Ko renge naim nga ni pian loloim rengen, kamru koporwerai tevi jinibb ne naim nen koporwera ‘Jinibb nevisvisenien owra “Nibení le loloim ne naim som nga borroi nanen ne asien ren tevi jinibb suk nir?”’ <sup>15</sup> Ko ñernen piviseni tevi kamru naim nen loloim nen nga milep san nga muto mare, nga nanu jile marto pa, marloli lilaner marres ren.” Ko ni okoni tweni nuru orivel oran. <sup>16</sup> Jinibb sen nuru orivel oran renge Jerusalem, ko orlesi erpe nga ni muwrai tevi nuru pa. Ko nuru orloli lilane nanen ne asien oto terai.

*Iesu owra tweni nga Jutas ðitkai kerasi ni*

<sup>17</sup> Renge nata mirivriv nen ko Iesu evini tevi jinibb sen esngavöl drromen eru. <sup>18</sup> Ko daron nga marsakel marok-aan vajin e, ko Iesu owrai tevir owra “Nuwretun nuwrai tevi kami, kami san ko ðitkai kerasi inu van renge nevre devje nuval suk nir. Kami san nga kamaan tevik ngel.” <sup>19</sup> Jinibb sen nir arunge lenglengé esij e, ko nir sisamis arsususi sisamise tevi ni, “Isi le? Inu ma ejki!” <sup>20</sup> Ko ni owrai lweni tevir, “Kami ko san renge jinibb suk esngavöl

drromon eru nga rramok-rrirri korti reнге бол нгел. <sup>21</sup> Inu Jinibb Mawos bean ko wor reнге mijen erpe nga Naul On muwrai suri inu, bemij ko wor rengen. Ko wi pisij ko reнге мier nga pitkai kerasi Jinibb Mawos. Erres pelak re mernen poro bbong sete pitkai te pijki."

*Iesu orro tuloni nanen ne asien tevi nir*

<sup>22</sup> Ko daron nga nir marok-urrurro ngavilvil nanen sopen, ko Iesu ela niv ko otori. Ko olot owra erres tevi Atua suri, obbri otvi ko esareni tevir, ko owra "Kaplai kapurroi, ngel evi nibek." <sup>23</sup> Ko ni ela keke biles san, ko daron nga muwra erres jile tevi Atua suri musuw ko esareni tevir, ko nir jijle armini. <sup>24</sup> Ko ni owrai tevir, "Nanu ngel evi inu drrak. Pisese suri jinibb pilep, ko puloli rijrijen se Atua putur. <sup>25</sup> Nuwretun nuwrai tevi kami, inu setemun numa-mini keke grep suwen ejki mun, pian pijpari nabong nga ngok nga inu bea-mini vajin nga mimerre reнге batun vanu se Atua." <sup>26</sup> Ko daron nga marla jile nubo san ko arivare arivel van reнге botwen ne lolnai ne olip e.

*Iesu owowrai nga Pita pivilvil ore puwra sete orongwose ni*

<sup>27</sup> Iesu owrai tevir, "Kami jile nolo kami pivitan suri inu. Suri Naul On owrai owra 'Mian ko inu berevji pini mner nga mok-metmete sipsip, ko sipsip nir parivel sarsarr.'" <sup>28</sup> Ko vitunen reнге inu bemaur luwi keke reнге mijen, ko bowowomu reнге Galili terai kami." <sup>29</sup> Pita owrai tevi ni, "Rreknga lartul ngok ma nir nolor pivitan, ko inu ma sete nolok mia-vitan te, ejki." <sup>30</sup> Ko Iesu owra tevi ni, "Nuwretun nuwrai tevi nik, lelingen reнге nata mupong ngel puwomu mian ko nato pia-kokkrout pivaru, nik kupvilvil orek pivatul, kupwera sete kurongwose inu." <sup>31</sup> Pita osur terter luwi tevi keke owra "Poro bemij tevi nik, ko sete numa-vilvil ore nik!" Ko nir jijle arwera erpok.

*Iesu evan reнге Getsemani olot*

<sup>32</sup> Ko nir aran reнге lat san nga nisen Getsemani. Ko Iesu owrai tevi jinibb sen nir, "Kami kaplik iel daron nga inu bean bolot." <sup>33</sup> Ko ni ela Pita ko Jemes ko Jon arpitevi ni. Ko ni nolon etipatun ngarr orrum, ornge lengleng esij elep. <sup>34</sup> Ko owrai tevir, "Nolok ornge lengleng esij elep, erpe beap nawone bemij. Kami kaplik iel, ko kapkulkulu metmet."

<sup>35</sup> Ko ni evel rujurj lingir sopen ko esrapo van ngatan, ematur reнге dan. Ko olot nga poro Atua orongwos puloli nanu nga reнге mete nial nen nir parasi reнге ni. <sup>36</sup> Ko ni owra "Apa" (erpe owra "Tata"), "nik kuloli wose nanu nga musuw ngok. Wurru

kupla tweni biles ne norongen nga misij ngel reнге inu. Ko ejki, sete kuma-loli inu marongen suk, ko kuploli ko wor pirpe nik marongen som." <sup>37</sup> Ko mian ko ni olwi keke vini jir, ko elesi nir armaturrvel. Ko owrai tevi Pita, "E Saemon, nik kumaturrvel keke? Sete kurongwos kupkulkulu reнге mete nial pisanan?" <sup>38</sup> Kami kapkulkulu ko wor ko kaplot, nga puloli sete nanu parini parrowrrow pelake kami. Nolor armerreni, ko niber armijmij." <sup>39</sup> Ko ni evel lingir, olwi keke van olot owra malum nale nga muwrai womu. <sup>40</sup> Ko mian ko daron nga mulwi keke vini ko elesir armaturrvel keke, suri meter arruwel. Ko nale nga parwerai tevi ni ejki mun. <sup>41</sup> Mian ko ni evel keke evan olot jile musuw, ko olwi keke vini jir evi vatolin le vajin, ko owrai tevir vajin owra "Erres, kapmaturrvel vajin, kapmosi pirres! Evter ko pa! Mete nial nen evini. Kaplesi inu Jinibb Mawos partekai kerask van reнге nevre jinibb nga marsij nir. <sup>42</sup> Kaptur imare, rrapiel van rraplesi mner nga pitkai kerasi inu evini pa ngel mori."

*Devje nuval se Iesu arini arrul reнге ni*

<sup>43</sup> Momsawos daron nga mnrj malum e ko pa ko Jutas, san reнге esngavöl drromon eru, evel ngavilvil vini, eptevi meling jinibb nga milep. Artori nesip nuval ko betiluk nir. Arivel ji batu jinibb ne sulsulen nir, ko jinibb nevisvisienien ne nale neseseien nir ko Birterawarrene ne Isrel nir vini. <sup>44</sup> Jutas, mner nga mitka kerasi ni, elngi pa nale jir osuw, owra "Mer nga ban jin borromji, ni evi mernen ko. Kaprrul totoni pitertter, kapiel tevi." <sup>45</sup> Mian ko reнге daron nga mivini e, ko evel mom-sawos pa Iesu ko evesane, ko owra "Jinibb nevisvisienien," ko orromji. <sup>46</sup> Ko nir arrul reнге Iesu, arwusi totoni etingtingin. <sup>47</sup> Ko nir nga mutur morie bbong san ela nesip nuval sen ko etai jinibb ne majingen se batu jinibb ne sulsulen san, ko eta vasi boron devjen. <sup>48</sup> Ko Iesu owrai lweni tevir, "Kami kamini tevi nesip nuval ko betiluk nir, ko kamrrul totonik erpe nibb nga mivevna ko mokrevrevji pipini jinibb nir. <sup>49</sup> Tetajer nomok-lik tevi kami reнге Naim On nomok-visviseni, ko kami sete kamrrul totonik te ejki. Ko ngel kamloli mirpel tevi inu nga puloli Naul On piplari." <sup>50</sup> Ko jinibb sen nir arwolu lingi ni arivel, ko ni otur jer.

<sup>51</sup> Ko jinibb melakel san evijuri Iesu, sete ori sunsun te ejki, ela bbong kalek san ko elavlave. Ko sopor arrul ren. Ko arrul rursi, <sup>52</sup> ko arrul rrawe lavlav sen. Ko ni owlu malmal, owlu lingir.

*Iesu otur womu reнге no gortien ser*

<sup>53</sup> Ko nir arpitevi Iesu van ji jinibb nga mivi drromo batu jinibb ne sulsulen nir. Ko renge ie batu jinibb ne sulsulen nir ko Birtarawarng nir ko jinibb nevisvisenien ne nale nesereien nir arlik korti jin. <sup>54</sup> Ko Pita evivitu suri ngasu jer, ko evan renge lolo naworr nga muwlu ore naim se batu jinibb ne sulsulen nir, ko ni ean elik tevi lartul nga marmajng se drromo batu jinibb ne sulsulen nir. Ko eteli renge nabb nga min. <sup>55</sup> Ko batu jinibb ne sulsulen nir ko nir nga renge gortien ser nga marlik loloim arpepej jinibb sopor nga parongwos parkerkeris e nga parwera Iesu loloi nanu nga misij san nga parlingi ni renge mijen suri. Ko sete arongwos parlesi san, <sup>56</sup> suri ewretun nir elep arsupe nale gerisen nir nga martere ni renger, ko nale ser sete arsorsan rragrrag te.

<sup>57</sup> Ko mian ko jinibb sopor artur imare ko arwera nale gerisen san van rengen, arkerkeris artere ni rengen, arwera <sup>58</sup> "Kem namrunge nga ni owra 'Inu bealokloksi Naim On se Atua nga ngel nga naver muloli, ko nabong pitul ko beli lweni minij kele san nga naver san sete pijpari sapon.'" <sup>59</sup> Ko gerisen ser ngok nir kele nga marwerair sete arsorsan, arsisamis petpeti.

<sup>60</sup> Ko drromo batu jinibb ne sulsulen nir mutur imare livõ rer, ko osusi tevi Iesu owra "Erpese nga nik sete kumwera nanu san? Sev le ngel nir lartul ngel nir martere nik surir ngel?" <sup>61</sup> Ko ni eperper nawon, sete owra lweni nanu san. Mian ko drromo batu jinibb ne sulsulen erij kele tevi owra "Erpese? Nik kuvi Mesaea, Atua nga rramok-surõvi Natun mawos?" <sup>62</sup> Ko Iesu owra "Inu le. Ko kaplesi inu Jinibb Mawos bea-sakel renge Atua nga derteren sen mutoe nevren rres. Ko bea-luwi re nabor ne melrin vini." <sup>63</sup> Ko drromo batu jinibb ne sulsulen nir ololar lengleng ko errersi sunsun sen, ko owra "Erpese rrappej kele wor sopor nga parwera nale sopor?" <sup>64</sup> Kami kamrunge pa nga ni mirij melmelas ko musopope pa Atua! Ko kamrorrmi erpese?" Ko nir jikle arwera "Ni erres renge pimij ko wor!" <sup>65</sup> Ko nir sopor arverae noltor e ni. Ko nir sopor arsere ore meten ko arlumati ko arwera "Nik kuvi propet! Kupwowrai ta mner nga mulmati nik ngok. Isi ko?" Ko batu jinibb ne sulsulen kele jinibb sen nir arvirrvirrali lengleng ni kele.

*Pita evilvil ore Iesu owra sete orngwose ni*

<sup>66</sup> Renge naworr nga muwlu ore laut on nen, Pita oklik renge live laut nen. Ko nesevin san nga mok-majng se batu jinibb ne sulsulen nir evini ie. <sup>67</sup> Ko elesi

Pita mok-tetli renge nabb ko owrai tevi, "E, sete nik kele kuptevi Iesu ne doNasret ngel?" <sup>68</sup> Ko ni evilvil ore owra "Inu nurrerleng, sete nurongwose nanu nga kumwera ngok!" Ko ni esil ivare renge devji evini vare ko ewit van otur renge metali. Ko nato okokroun vesan.

<sup>69</sup> Mian ko nesevin ne majngen nga emteni kele Pita, ko owrai tevi nir nga martur morie ni "Merel evi nir le san!" <sup>70</sup> Ko Pita evilvil ore kele eterter.

Mian ko vitunen beblen weli ma ko lartul nga martur tevi arwera tevi Pita, "Ewretun nik kuvi nir san. Nik kuvi mneri Galili!" <sup>71</sup> Ko Pita erij otot ojuji lengleng mare ko owra "Nurrerleng mnerel nga kami kamsupe ngel!" <sup>72</sup> Renge daron mawos ngok ko pa, ko nato okokroun varwen kele. Ko Pita orrorrmi wos nale se Iesu nga muwrai tevi ni, "Daron nga nato setewor pukokroun pivaru e ko, ko nik kupvilvil ore inu pivaru." Ko ngok daron nga murrormi wose, ko orng e sij, ko eting.

## 15

### *Iesu otur renge no Paelat*

<sup>1</sup> Renge rorpong susu, nat murrorrorr malum, ko batu jinibb ne sulsulen nir arevei gortien san. Arkorti tevi Birtarawarng nir ko jinibb nevisvisenien ne nale nesereien nir, ko nir nga renge gortien ser jikle nir. Ko arloli nale san, arwera jinibb sopor paran parsere totoni Iesu, ko parevei van ji Paelet. <sup>2</sup> Ko lartul nen nir aran arevei Iesu vini ji Paelat. Ko Paelat osusi tevi ni owra "Nik kuvi Numal se mneri Isrel nir?" Ko ni owrai lweni tevi, "Erpe nga kumwera." <sup>3</sup> Ko batu jinibb ne sulsulen nir arwera gerisen elep van renge ni. <sup>4</sup> Ko Paelat osusi kele tevi ni owra "Erpese nik sete kumwera nanu san tevir? Kuplesi nir arwera nanu elep artere nik renger." <sup>5</sup> Ko Iesu setemun owra kele nanu san, ejki mun, ko ngok loloi Paelat etaole.

### *Paelat owra Iesu pimij ko wor*

<sup>6</sup> Renge sia jile renge nanen ne asien ngok, Paelat okmaronge jinibb san nga milik renge naim ne nekaien pivel sisarow, ngok poro parngoni isi tama san tevi ni. <sup>7</sup> Ko jinibb sopor arlik renge naim ne nekaien, suri arevji pini jinibb sopor renge daron nga martur imare ko marval tevi Gavman. Ko san renge nir nisen Barapas. <sup>8</sup> Ko delung nga milep arini ji Paelat ko arngoni tevi ni nga ni puloi tevir pirpe nga tetajer mok-loli. <sup>9</sup> Ko Paelat owrai lweni tevir, "Kami kammarong nga inu borpaji tweni numal se mneri Isrel nir tevi kami nga ni pivel sisarow?" <sup>10</sup> Suri ni orng renge niben nen, ko orngwose nga batu jinibb

ne sulsulen nir arlingi Iesu van reнге nevre n suri nalol lelep ne lolaren ser kobbong. <sup>11</sup> Ko batu jinibb ne sulsulen nir aron tertere delung nir nga nir parngoni ma Barapas tevi ni nga ni pimaronge tevir. <sup>12</sup> Ko Paelat erij welir kele, owrai tevir, “Ko kami kamwera inu bololi sev tevi m̄er nga kami kamveruse numal se m̄eri Isrel nir?” <sup>13</sup> Ko nir arkail, arwerai eterter kele van mare arwera “Kuprruloni ni reнге nai pelaot!” <sup>14</sup> Ko Paelat owra lweni tevir, “Erpese? Ni ololi nanu nga m̄isij sev?” Ko nir arkail kele wor eterter van mare wor, arwera “Kuprruloni reнге nai pelaot!” <sup>15</sup> Paelat emrreni puloli nolo jinibb nir parres. Ko orpaji Barapas evel sisarow, ko owrai tevi jinibb nuval sen nir parvirrali Iesu. Ko ni etkai elngi reнге nevrer nga parruloni reнге nai pelaot.

*Jinibb nuval nir arpitevi Iesu ko arso-  
sop̄e*

<sup>16</sup> Ko jinibb ne nuval arpitevi tweni Iesu van reнге naworr nga muwlu rrale naim se Paelat e nga nisen Praetoriam. Ko arverus kortoni jinibb nuval jile nir arini jir. <sup>17</sup> Ko nir arloli ori sunsun san nga nulsen musongsong mirpe sunsun se numal, ko arjali nuvan moku san erpe nuvan se numal ko arlingi reнге batun ori. <sup>18</sup> Ko arij kerkerasi ni arwera “Erres wor, Numal se m̄eri Isrel nir!” <sup>19</sup> Ko arla mavir ko arvirrali batun e, ko arverae noltor e, ko arjipa ngatan jin arlotoe, arso-  
sop̄e. <sup>20</sup> Ko daron nga marsopsop̄ jile ni musuw, ko arla tweni sunsun sen nga muri nga musongsong ko arla lweni sunsun sen nga mok-uri wor ko arloli ori lweni. Ko arpitevi tweni van parruloni re nai pelaot.

*Arwuse Iesu reнге nai pelaot*

<sup>21</sup> Ko reнге sel arlesi m̄eri Saerin san nga mivi tata se Aleksanta ko Rupas, ni nisen Saemon. Evini owra pisip asi nir pian ngaim e, ko nir aron tertere ni arwera puwosi nai pelaot se Iesu. <sup>22</sup> Ko nir arpitevi Iesu van reнге lat san nga nisen Golkota, nga muwra puwra mirpel, Lat ne bongur. <sup>23</sup> Ko nir arla norro san nga markisi tevi mir nga puloli niben parpurus ko sete purnger parerer. Ko ni sete emni te, ejki. <sup>24</sup> Ko nir arruloni Iesu reнге nai pelaot. Ko artutweni sunsun sen evses nir, ko artuw daes suri, arwera parlesi reнге nir sisamis ta nir si nen pia-lai. <sup>25</sup> Evi mete nial esiw reнге rorpong nga marruloni Iesu reнге nai pelaot. <sup>26</sup> Ko reнге niriv nga muto pelaot mare aruli tweni nale san ngel suri nga marevji pini ni: NUMAL SE MERI ISREL NIR. <sup>27</sup> Ko nir arruloni kele jinibb eru nga morok-vevna ko morok-revrevji

jinibb orpitevi ni, arruloni tuwen reнге nevre n rres ko arruloni tuwen nen reнге nevre n mair e. <sup>28</sup> [Ko ngok Naul On evini eplari nga muwrai mirpel, “Ko ni arloli tevi ni erpe jinibb nga m̄isij san.”] <sup>1</sup>

<sup>29</sup> Ko jinibb nga marasasi reнге sel arijrij meten ko arbb̄obb̄oleni batur, arwera “Ai! Nik nga le kumwera kuplokloksi Naim On ko nabong p̄itolin ko kup̄ili lweni kele! <sup>30</sup> Kuploli lweni ta nik ta we kupmaur, ko kupjubbul reнге nai pelaot ta we, kupini ngatan e!” <sup>31</sup> Batu jinibb ne sulsulen nir ko jinibb nevisvisenien ne nale neseseiren nir, nir kele arso-  
sop̄e ni arwerwera lululweni tevir, “Ni okloli jinibb m̄inij nir armaur, ko ni sete bbong ololi lweni ni emaur niko! <sup>32</sup> Rraplesi ta Kristo Numal se m̄eri Isrel nir pujubbul reнге nai pelaot vini ngatan e, ko kerr p̄ilesi ko puosuri ni vajin.” Ko laru nga marruloni nuru tevi ni reнге nai pelaot, nuru kele orij esij tevi ni.

*Mijen se Iesu*

<sup>33</sup> Reнге levial mawos daron nga nial muwospit e, ko nat emalik reнге vanu jijle nir ejpari mete nial itul sopon. <sup>34</sup> Ko reнге mete nial itolin nat mirivriv vajin ko Iesu ekail drrelan elep van mare owra “Eloi! Eloi! Lama sapaktani?” nga muwra puwra mirpel “Atua suk Atua suk, erpese kumieli lingik?” <sup>35</sup> Ko jinibb sopor nga martur reнге lat nen arunge nale ngok nga ni muwrai ko arwera “Kaprunge, ni everuse Elaeja ko.” <sup>36</sup> Ko jinibb san owlu van ela nalum, ko elngi re venika nga pujm̄i puwun ren ko elai elngi re mavir, ko esareni van mare reнге jingo Iesu. Ko owra “Kaplinglingi, rraplesi ta poro Elaeja pivini ko pujri tweni vini ngatan e.” <sup>37</sup> Ko Iesu ekail drrelan elep lengleng ko osrow pini, emij. <sup>38</sup> Ko kalek nga murrul ore lat nga muon reнге Naim On eteri reнге ngatan ejpari mare devjen erue. <sup>39</sup> Batun ne jinibb nuval nir otur mawose Iesu non, ko daron nga r̄ilesi ni mimij mirpok, ko owra “Ewretun m̄erel evi Atua Natun.”

<sup>40</sup> Nesevin sopor nir Merri korti nuru, Merri ne Maktala ko Merri nga Jemes nga welili, ko Joses tasu se nuru, ko Salome, arok-tur ie ngasu wor sopon. Ko arok-kulu van arok-meteni. <sup>41</sup> Nir arok-vijuri Iesu reнге Galili, arok-pitevi ni reнге nanu nir. Ko nesevin m̄inij kele wor elep nga marvijuri suri ni vini reнге Jerusalem e.

*Josep etevni Iesu*

<sup>42</sup> Nat erivriv pa vini, nial evan ngatan. Ko suri nabong nen evi nabong nga marok-eseser ren, ko poro nial piwaj pini vajin ko

<sup>1</sup> 15:28 Nale nga muto re nolo [ ], rrek sete Mak oli, ko jinibb san ea-uli vitue daron nga muli tweni kopi san ne naul ngel.



osuw, nabong on ko, setemun san orongwos puloli mun nanu san, niko <sup>43</sup> Josep ne Aramatia evan loloim ji Paelat. Sete emtutu te, ongoni tevi nga pilai nibe Iesu. Josep nen evi jinibb san nga nir martori renge gortien ser mirres, ko ni kele oktirive nga pilai batun vanu se Atua pivini. <sup>44</sup> Paelat etaole nga murunge nga Iesu emij pa osuw, ko everuse batun ne jinibb nuval nir vini jin, ko osusi tevi ni owra "Emij pa pareng ko sapon, rreknaga?" <sup>45</sup> Ko batu jinibb ne nuval owra "O-o, emij pa parpareng ko sapon." Daron nga Paelat murunge lilane jile e mirres jin musuw ko emarong vajine nibe Iesu tevi Josep pian puwosi. <sup>46</sup> Ko Josep evan owli kalek nga miraprap nga mimalum mirres san, ko olwi vini ojri tweni nibe Iesu vini ngatan, ko onbe ore kalek nen e. Ko owosi van elngi renge nevöt san nga martai jile pa nolon mutoe, ko eitini nevöt nga milep san oto ore metali nen. <sup>47</sup> Ko Merri ne Maktala ko Merri nga tasu se Joses orlesi lat nga marlingi nibe Iesu rengen e.

## 16

*Nolo nevöt oto kiskis ko Iesu emaur luwi renge mijen*

<sup>1</sup> Mian ko mijpari renge mevinen vajin nat mirivriv, nial ean ewaj pini, ngok Sapat osuw ko vajin, ko Merri ne Maktala ko Merri nga tasu se Jemes ko Salome aran vajin arwuli rao nai sapor nga mapu suwer mirres, ngok nga paran parsesei renge ni niben. <sup>2</sup> Mevinen vajin renge rorpong susu malum daron nga nial miameraej e renge nabong womu nen ne wik, ko nir armermera tweni paran renge dubb. <sup>3</sup> Marivel renge sel ko arok-werwera lululweni tevir, "Wurru, si le pitini tweni nevöt tevi kerr warreng?" <sup>4</sup> Ko moro markulu tawij imare ko arkulu pej nevöt nga, setemun arlesi, san eitini tweni pa nevöt nga milep temijpal nga. <sup>5</sup> Ko arsil van renge lolo dubb e, ko arlesi melakel san nga muri sunsun nga muow raprap misakel renge devjen nga van re nevrer rres e. Ko armetutu lenglengen e. <sup>6</sup> Ko owrai tevir, "Sete kapmetutu te! Nurongwose kami kampej Iesu ne doNasret nga marruloni renge nai pelaot. Ni ejki iel. Ni emaur luwi pa renge mijen. Kapmeteni ta lat nga marlingi mimatur rengen. <sup>7</sup> Kami kapiel ma kapan, kapwerai tevi jinibb sen nir ko Pita, nga ni puwowomu terai kami renge Galili, ko renge ie kami kapa-lesi ni rengen." <sup>8</sup> Ko arsil ivare renge dubb ko arwolu lengleng, arwolu lingi, suri aririr

ko bbösa evan renger. Ko sete arwera nale san tevi jinibb san.

*Iesu eplari ji Merri ne Maktala*

<sup>9</sup> [Ko renge rorpong susu renge nabong womu ne wik, daron nga Iesu mimaur luwi renge mijen e, ni eplari womu ji Merri ne Maktala, vin nga nemän nga marsij ebut marsilvi ni ko Iesu muoji twenir ren. <sup>10</sup> Ko vinnen evan ko owrai tevi nir sapon nga marok-pitevi Iesu nga martaur ko marok-tengsi ni marrormi. <sup>11</sup> Ko daron nga marunge nga ni mimaur luwi ko Merri milesi, ko sete arosuri te, ejki.

*Jinibb se Iesu eru orlesi ni*

<sup>12</sup> Vitunen renge ngok, ko Iesu eplari kele ji jinibb eru orlesi ni renge daron nga morivel lingi ngaim. <sup>13</sup> Ko nuru orivel van orwerai tevi nir jijle, ko nir sete arosuri kele nale se nuru.

*Iesu eplari vajin ji jinibb sen esngavöl drromon san (11) arlesi ni*

<sup>14</sup> Ko vitunen Iesu eplari kele ji jinibb sen esngavöl drromon san, renge daron nga marsakel maraan e. Ko ni otortorir suri norrorrmien ser sete otoe ko sete marosuri lartul nga marwerai nga marlesi ni mimaur luwi renge mijen. <sup>15</sup> Ko ni owrai tevi jinibb sen nir owra "Kami kapiel kapan renge vanu nga musuw ngok, kapwerwer renge nospen nga mirres suk tevi jinibb jijle nga musuw ngok nir. <sup>16</sup> Mer nga muosuri ko mipaptaes, Atua pia-la mauren tevi; ko mër nga sete muosuri, Atua pia-tor vitrang. <sup>17</sup> Nelesien ngel nir parvijuri suri lartul nga marosuri. Renge inu nisek nir paroji tweni demij rengen, ko parongwos parij nale nga marmerr nir. <sup>18</sup> Nir parwosi numet ko parmini nuwi nga misij, ko sete purongwos pulolir parmij e. Ko parongwos parlingi nevrer re jinibb nga marmesi, ko jinibb nga marmesi nen nir parres luwi."

*Iesu olwi van renge melrin e*

<sup>19</sup> Ko daron nga Numal Iesu mirij jijle tevir musuw, ko vitunen vajin ko Atua elai Iesu van renge melrin e, ko ni esakel renge Atua nevrer rres. <sup>20</sup> Ko jinibb sen nir arivel aran arwerwer renge vanu nga musuw ngok. Ko Numal emajing tevir, ololi nelesien elep nga marviseni nga nale ser evi weretunen.]

¶ 16:20 Nale nga muto re nolo [ ], ngok meten 9 ejpari 20, rrek sete Mak oli, ko jinibb san ea-uli vitue daron nga muli tweni kopi san ne naul ngel.

**Nospen nga Mirres se  
Iesu Kristo nga  
LUK  
Muli  
Batu nale nga mivsvseni  
lut nga parmeteni naul  
ngel puto suri**

Naul ngel, ne nospen nga mirres se Iesu Kristo nga Luk muli, ospe suri Iesu, nga ni evi jinibb nga Atua muloli rijrijen sen tevi meri Isrel nir tuwi, nga ni muwra pia-koni vini nga pila mauren tevi nir ko tevi jinibb ne iel ngatan jijle nir. Luk oli tweni re naul sen ngel nga Iesu ngok, Nem̄in se Atua everuse nga “puwrai tweni nospen nga mirres sen tevi Beres (puaman) nir.” Ko iok ko ololi rramlesi nospen nga mirres nga Luk muli, owun saute jilweren nga marviseni nga Atua okrorrmi lenglengen jinibb nir nga marlesi norongen nga misij.

Luk nga muli naul ngel oli naul minij kele san nga nisen “Majingen se Aposol nir.” Naul ngok ospe suri jilweren nga marpelari vitu re daron nga Iesu mian mare re melrin e.

Jilweren sopor arpelari re naul ngel kis kobbong, ko sete arto re naul itul ngok ne nospen nga mirres se Iesu Kristo (Matiu, Mak ko Jon). Ngok jilweren nga muspe suri anglo nir marlai nubo (2:13,14), ko nga muspe suri nir nga marmetmet sipsip nga maran parlesi Iesu daron nga miak e (2:8-20), ko nga muspe suri daron nga Iesu mivi melakel malume ko mian re Naim On (2:41-50), ko nale rrongrongvi ne meri Sameria nga mirres ngok (10:25-37), ko nale rrongrongvi ne melakel nga mutur jabble sel (15:11-32).

Nanu nga marlelep nga Luk muspe surir milep re naul ngel erpe loten, Nem̄in On, majingen se nesevin nir nga marwilwil se Iesu, ko ospe suri kele nga Atua orongwose pitlasi tweni nololien se jinibb.

*Etipatun*

<sup>1</sup> Selek Teopilas, jinibb elep pa arpelak arwera paruli tweni jilweren ne nanu ngel nir nga marpelari ji kerr ngel nir. <sup>2</sup> Erpe rengo womu jer nen, nir arlesi rengo meter ko aruli tututweni nale nen nir rengo naul, ko arwerair tevi kerr. <sup>3</sup> Ko inu nulesi evi nanu nga mirres nga inu kele boli tututweni nale nen nir rengo naul tevi nik. Suri inu nomok-meteni suri nanu ngel nir bonevis le wor, ko nurongwos boli surir tevi nik pimawos; <sup>4</sup> ko puloli nga nik

kuprongwose nanu nga marvisisenir tevi nik arivi weretunen temijpal.

*Anglo owra tweni nga Jon Baptaes piak*

<sup>5</sup> Nanu ngel nir arpelari rengo daron se Erot, rengo daron nga mivi numal rengo jutia e. Ko rengo daron nen jinibb ne sulsulen san elik rengen, nisen Sekaraea. Ni evi san rengo meling jinibb ne sulsulen se Apaeja. Ko nesen sen Elisapet, ni kele evi metka se Eron san. <sup>6</sup> Nuru korti orivi jinibb nga mormawos mirres rengo no Atua. Orivel lilane rengo nale nesesreien se Atua nir ko nale nesesreien nir. <sup>7</sup> Ko nuru korti ortera pa osuw, sia se nuru elep pa. Ko Elisapet kele evi nesevin nga m̄im̄er, sete evasus, ko ololi natu nuru ejkie.

<sup>8</sup> Mian ko ejpari daron se Sekaraea gortien sen nir nga parloli majingen nga jinibb ne sulsulen nir marok-loli rengo nabong jile rengo Naim On se Atua. Ko ni kele evan. <sup>9</sup> Ko nir arwirr daes erpe murrun se jinibb ne sulsulen nir, nga parlesi nir si nen ko nga pian pusli nanu nga mapun mirres rengo naworr; ko daes orrum mawos re Sekaraea. Ko ni evan rengo lololim on se Atua nga pusulsul. <sup>10</sup> Delung artur jer vare, parlot rengo daron nga nanu nga mapun mirres pin e.

<sup>11</sup> Ko Sekaraea etaole anglo se Iova san ermali jin, ko otur rengo nawot van rengo devjen rres e. <sup>12</sup> Ko daron nga Sekaraea m̄ilesi, ko nolon opotpot lenglengen e ko emtutu elep. <sup>13</sup> Ko anglo owrai tevi, “Sete kupmetutu, Sekaraea; Atua ornge loten som, ko nesen som pivesi nik natum norman san. Ko nik kuplingi nisen piwaji Jon. <sup>14</sup> Nik kuprunge pirres ko kupir pilep daron nga ni piak. <sup>15</sup> Ko ni poro pilep vajin ko pivi jinibb nga milep rengo no Numal. Ko sete pimni norro rreknga nuwi nga m̄iterter, pijki. Ni puwun saute Nem̄in On tetajer, pitipatun rengo daron nga tasu sen pivesi e. <sup>16</sup> Ni puloli meri Isrel nir pilep parieni lweni van ji Iova Atua ser. <sup>17</sup> Ko ni puwowomue Mesaea non rengo nen̄in ko derteren se Elaaja, ko pirieni lweni tata ser nolor pirieni lweni van ji natur, ko parresres luwi tevir. Ko nir nga sete marosuri parivel vajin rengo norongwosien se nir nga marmomsawos, ko puloli lilane jinibb nga martiriv tera Numal nolor pirres.” <sup>18</sup> Ko Sekaraea owrai tevi anglo owra “Inu borongwos nanu ngel nir pirpese? Suri inu nuvi birtera pa, ko nesen suk kele sian elep pa osuw.” <sup>19</sup> Ko anglo erij luwi tevi owra “Inu nuvi Gapriel nga motur rengo no Atua, ko ni okoni inu nga bowrai tevim nospen nga mirres ngel. <sup>20</sup> Ko kuplesi, nik kupivi nabbut, sete kuprongwos kuprij kupwera nale pisan,

pitipatun lelingen ngel ko pijpari daron nga nanu ngel nir para-pelari e. Suri nga nik sete kuosuri nale suk nir, nga para-pelari renge nabong nen mawos."

<sup>21</sup> Ko renge daron nen artirive Sekaraea, ko arwera "E, erpese nga ni mīlik mipriv mirpok renge Naim On se Atua?", ko ngok ololi bbōsa elair e. <sup>22</sup> Marok-tiriv mian ko ni eivare renge Naim On vini vare e. Ko evi nabbut, sete orongwos pīrij. Ko ewirreni neveren tevir; ko nir arongwose nga ni elesi neñin san renge Naim On. <sup>23</sup> Mian ko nabong ne majingen sen nir osuw, ko ni olwi van renge naim sen e.

<sup>24</sup> Mian ko nabong sete elep mun ko nesen sen Elisapet ejien. Ko ok-lik tepi malume ejpari navōl elim, ko owra <sup>25</sup> "Nurongwose vajin nga Numal ko orrorrmi inu, ko niko ela tweni vajin nanu nga jinibb nir marok-meteni inu suri."

#### *Anglo owra tweni nga Iesu pīiak*

<sup>26</sup> Ko Elisapet navōl sen ouwon easi osuw, ko Atua okoni kele anglo Gapiel evan renge ngaim nga milep san renge Galili, nisen Nasret. <sup>27</sup> Ni otori nale nga pian puwrai tevi nesen mēlakel san nga nisen Merri. Merri nen setewor norman san evan jin, ko arwera pīlik ji mēr san nga nisen Josep, nga mivi metka se Devet san. <sup>28</sup> Ko anglo evan ji Merri renge loloim sen ko owrai tevi ni, "Erres, nik kupir. Numal ololi erres tevim ko eptevi nik." <sup>29</sup> Ko Merri nolon opotpot e ko orrorrmi karkare renge nale nga anglo muwrai ngok, owra "O, sev le ngel?" <sup>30</sup> Ko anglo owrai tevi ni, "Merri, sete kupmetutu, suri Atua erres tevim. <sup>31</sup> Ko kuplesi, nik kuptetaur, ko kupa-wosi natum norman san. Ko kuplingi nisen piwaji Iesu. <sup>32</sup> Ni pivi Jinibb nga milep ko parveruse Atua ne Drromsen Mare Natun. Ko Iova Atua puloli ni pivi Numal pirpe apu sen Devet tuwi. <sup>33</sup> Ni pivi Numal renge metka se Jekop nir tuwi ngok vini. Ko batun vanu sen sete purongwos pusuw." <sup>34</sup> Ko Merri owrai tevi anglo owra "O, ko inu sete nuvijuri wor norman san, ejki. Ko nanu ngel putoe pirpese le?" <sup>35</sup> Ko anglo owrai lweni tevi Merri owra "Neñin On ko pivini jim, ko derteren se Atua ne Drromsen Mare pivini pisalsal orem. Ko suri nanu ngel, jinibb parwerai bipi nga mīiak On, ko evi Atua Natun. <sup>36</sup> Ko kuplesi niaken som Elisapet. Ni evi nesevin nga mīmer; ko etra pa evi lekter osuw; ko etetaur vajin lelingenok, navōl sen ouwon le ngel vajin. <sup>37</sup> Suri sete nanu san rragrag nga Atua sete orongwos puloli." <sup>38</sup> Ko Merri owrai tevi "Inu nuvi nesevin ne majingen se Numal lebbong, ko erres kobbong, puto pirpe nga nik kumwerai ngok." Ko anglo evel lingi ni.

#### *Merri evan oklue Elisapet*

<sup>39</sup> Ko renge vitunen vajin, Merri ewit ngavilvil van renge botwen nga ngaim nga milep san ne Jutia muto rengen. <sup>40</sup> Ko esil van renge loloim se Sekaraea e, ko owra "Erres" tevi Elisapet. <sup>41</sup> Ko daron nga Elisapet moka-runge nale se Merri, ko bipi nga mimatur renge depain eir ko ewrir renge depain, ko Elisapet owun saute Neñin On. <sup>42</sup> Ko ekail drrelan elep van mare, ko owra "Atua erij erres surim renge nesevin mīnij nen jile nir, ko erij erres suri bipi nga kumsoloi renge depaim! <sup>43</sup> Ko erpese tasu se Numal suk mivini mīlesik? <sup>44</sup> Ko kuplesi, daron nga inu mornge nale som, ko bipi nga mosloi renge depaik eir e ko ewrir e. <sup>45</sup> Neiren renge nik, suri nga kumwuri nale nga Numal mukoni anglo sen muwrai tevi nik piplari."

#### *Merri osrōvi Atua*

<sup>46</sup> Merri owra <sup>47</sup> "Renge mauren suk totoklai nusrōvi Atua ne Drromsen Mare. Ko neñik eir suri Atua nga moklai mauren tevik, ko nga murrormi inu milep. <sup>48</sup> Suri ni orrorrmi terai inu nga mevi nesevin ne majingen sen ko nga mevi nesevin nga welili jer. Ko renge lelingen ngel ko tuwi ngok vini jinibb parveruse inu nesevin nga Atua mīlai neiren tevi, <sup>49</sup> suri nanu nga milep nga Atua nga derteren sen milep muloli tevi inu. Ni nisen On. <sup>50</sup> Eviseni merrenien sen tevi nir nga marmetutue ni renge dul nga tuwi pa ko nga lelingen ngel ko nga para-vini kele. <sup>51</sup> Eviseni derteren sen tevi delung arlesi. Ololi nir nga nolor mian mare arsarr suri norrorrmien ser. <sup>52</sup> Ni ela tweni nir nga marivi numal nga marlelep renge nai seksakel ser nga marsakel rer aran ngatan, ko ok-susi lartul nga maran ngatan van mare. <sup>53</sup> Jinibb nga numer mīajir, ni ololir arup erres. Ko jinibb nga joror milep, ni okoni twenir artotori nevrer kiskis arivel. <sup>54</sup> Otori rijrijen sen nga muloli tevi apu se kerr nir nga tuwi pa, ko orrorrmi kerr mēri Isrel, ni jinibb sen nir, <sup>55</sup> erpe nga muwrai pa tevi apu se kerr nir, ko Epram, ko metka sen nir nga para-vini vitunen suri ni, pian pijpari tuwi ngok vini."

<sup>56</sup> Ko Merri elik tevi Elisapet erpe navōl itul sopon, ko evel olwi kele van renge ngaim sen e.

#### *Jon Baptaes eak*

<sup>57</sup> Mian ko ejpari nabong nga Elisapet puwosi natun e, ko ni evasus; ko natun evi norman. <sup>58</sup> Ko selen nir ko niaken sen nir arunge nga Numal muloli mīrres tevi ni ko nga murrormi ni, ko nir arir elep tevi.

<sup>59</sup> Mian ko ejpari bongin owil, ko nir arini nga parloli ni pian renge movil

parevji parloli ni p̄ilalos. Ko arwera par-  
lengi ni nisen piwaji kele tata sen Sekaraea.  
60 Ko tasu sen owra “Ejki! Ni nisen piwaji  
Jon.” 61 Ko nir arwerai tevi ni, “Ko nik.  
Sete metka som san ewaji nais ngel.” 62 Ko  
nir arij e nevrer tevi tata sen nga ni puwra  
nisen piwaji isi. 63 Ko Sekaraea owra parla  
nanu nga marok-ulul ren san tevi ni. Arlai  
tevi, ko ni oli nisen owra “Ni nisen piwaji  
Jon.” Ko nir jile artaole. 64 Ko renga daron  
mawos nen ko pa erij luwi, ko osr̄ovi Atua.  
65 Ko nir nga marlik mori ni armetutu,  
ko bb̄osa elair e. Ko nos̄pen nen arsupe  
rrale ngaim nga marto rrale botwen ne  
Jutia e nir. 66 Ko jinibb jile nga marunge  
nos̄pen ne bipi ngel arrormi renga nolor  
ko arwera “Bipi ngel pia-ivi bipi nga pia-  
irpese le?” Suri oto limjer ngel nga Atua  
ne Drromsen Mare derteren sen eptevi.

*Sekaraea Neñin On esilvi ko evi propet*

67 Ko tata sen Sekaraea Neñin On evini  
esilvi, ko owun saute. Ko erij erpe propet  
owra 68 “Kerr rrapur̄ovi Atua se kerr m̄eri  
Isrel nir. Suri ni evini oklue kerr jinibb sen  
nir, ko orpaji tweni kerr rramiel sisarow  
vajin. 69 Elai jinibb nga derteren sen milep  
san tevi kerr nga p̄ila mauren tevi kerr; ni  
evi metka se Devet san. 70 Erpe Atua owrai  
pa tuwi renga jingo propet on sen nir, 71 ni  
erijrij pa nga p̄ijnge devje nuval se kerr  
nir renga kerr, ko pirvei tweni kerr renga  
nevre nir nga marungasi kerr nir. 72 Ko ni  
eviseni merrenien sen mawos apu se kerr  
nir nga tuwi, ko orrorrmi suri rijrijen on  
sen.

73 Ololi rijrijen nga m̄iterter renga ni nisen  
tevi apu se kerr nga tuwi Epram. 74 Ewer  
telasi tevi ni nga ni pirvei tweni kerr renga  
nevre devje nuval se kerr nir, ko kerr  
rraploli majingen sen nga sete rrapme-  
tutu rragrag vajin pijpari nga rrapa-mij.  
75 Rrapivi jinibb on sen ko rrapivi jinibb  
nga mummsawos m̄irres renga ni non  
renga nabong jile renga mauren se kerr.  
76 Ko nik bipi suk, parveruse nik nistem  
kupwaji Atua ne Drromsen Mare propet  
sen; suri nik kupwomom renga no Numal  
nga kuploli lilane sel sen. 77 Kupwer  
telasi sel sen limjer tevi jinibb sen nir, nga  
Atua p̄itlasi tweni nololien ser ko parmaur,  
78 suri merrenien nga milep se Atua se  
kerr. Ni pukoni moron ne melrin pivini  
puklue kerr; 79 ko pimor vaseni nir nga  
marlik tongmalik renga namol ne mijen;  
ko puloli b̄ela kerr parivel renga sel ne  
demat.”

80 Ko mian ko nanwarreng nga elep  
rujruj ma renga niben ko norrorrmien sen,  
renga nga p̄imajing se Atua. Ko tetajer  
ok-an ok-lik renga lolo merwer ok-tirive

nabong nga ni pia-vini limjer renga no  
m̄eri Isrel nir.

## 2

*Iesu eak*

1 Renge daron nen batu numal se m̄eri  
Rom nir nga nisen miwaji Sisa Okastas  
elngi nale neseseiren san, emrreni pareve  
jinibb jille nga ni mimetmete nir, purong-  
wose nir evis totoklai. 2 Ngel evi sensas nga  
womu nen, renga daron nga Kwaerinas  
mivi numal nga milep renga Siria. 3 Ko  
niko renga wosenen jinibb jille arlulwi wor  
van renga  
vanu ser e, nga norman nir paruli niser  
renga naul renga ngaim ser mawos.

4 Ko ngok niko Josep evel lingi ngaim ne  
Galili san nga nisen Nasret, lat nga m̄ilik  
e, ko evan renga ngaim ne Jutia san nga  
nisen Betliem. Ie evi lat nga numal Devet  
m̄iak e rengen tuwi. Ko niko Josep mulwi  
wor van ie, suri ni evi metka nga miplari  
renga metka se Devet san. 5 Josep eptevi  
nesen sen Merri, nuru oran nga parlai nise  
nuru. Orlik korti ma, ko Josep setewor  
ean jin. Ko Merri otomori pa pivesi natun.  
6 Ko renga daron nga morlik renga Betliem  
e ko evi daron mawos nga Merri puwosi  
bipi sen e. 7 Ko ni evesi womue natun  
norman eak rrongvi. Ko ni ela kalek  
nga mimalum m̄irres ko onbe ore e, ko  
evetri ematur ngatan renga narov san nga  
marok-wungani nanu rrum nir rengen.  
Suri naim nga jinibb marlik renger loloim  
nen nga markel ototvi sete evter nir, ko lat  
nga nuru porlik rengen ejki.

8 Ko renga lat nen jinibb ne ngaim nen  
sopor arlik orsel arok-metmete sipsip ser  
renga nat nga mupong nen. 9 Ko anglo se  
Iova san evini eplari jir, ko nosr̄övien se  
Iova omor rrreraler; ko nir armetutu elep.  
10 Ko anglo owrai tevir, “Sete kapmetutu  
te pijki! Kaplesi, inu nuvini tevi nos̄pen  
nga m̄irres nga bowrai tevi kami, nga p̄ilai  
neiren nga milep temijpal tevi jinibb jille  
nir. 11 Renge lelingen ngel, renga nata  
mupong nga ngel, renga ngaim ngel se De-  
vet, bipi san eak rengen nga p̄ilai mauren  
tevi kami. Ni evi m̄er nga Atua m̄irijrij nga  
pukoni, ni evi Mesaea ko Numal. 12 Nanu  
ngel le pivi nelesien nga piviseni tevi kami:  
kami kapan ko kaplesi bipi san nga mar-  
nube ore kalek nga mimalum m̄irres e, ko  
marlingi mimatur ngatan renga narov nga  
marok-wungani nanu rrum nir rengen.”  
13 Daron mawos nen ko pa anglo ne melrin  
nir arini arpitevi anglo nen, ko arla nub̄o,  
arsur̄ovi Atua ne Drromsen Mare, arwera  
14 “Nosr̄övien pian ji Atua ne Drromsen  
Mare! Ko renga iel ngatan ngel demat puto  
renga jinibb se Atua nga ni mimrenir.”

*Jinibb nga marok-metmete sipsip nir aran Betliem*

<sup>15</sup> Mian ko daron nga anglo marivel lingir e marluwi vajin van renge melrin e, ko jinibb nga marok-metmete sipsip arwerwera tevir, “Kerr pian ta Betliem rraplesi ta nanu nga miplari ngel nga Atua muwrai tevi kerr.” <sup>16</sup> Ko nir arwit lengleng van; ko arlesi Merri ko Josep ko bipi nen nga mimatur renge narov nga nanu rrum nir marok-wunganir rengen. <sup>17</sup> Ko daron nga marlesi jile bipi e, ko arsuṣuṣe tevi jinibb nir sev nga anglo nir marwera tevir suri bipi. <sup>18</sup> Nir jijle nga marunge nale ngel nir nga jinibb nga marok-metmete sipsip marsuṣe suri tevir artaol lengleng. <sup>19</sup> Ko Merri otori totkoni jile rijen nen nir ko elngir rengen nolon, orrorrmi surir eterter. <sup>20</sup> Ko jinibb nga marok-metmete sipsip arluwi, ko arsurōvi Atua, arwera erres tevi ni rengen nanu jile nga marunge ko marlesi mirpe nga anglo muwrai tevir.

<sup>21</sup> Mian ko bipi nen bongin owil, omom-sawos bongin nga parloli pian renge bae e, ko arloli evan renge bae. Ko arlingi nisen ewaji Iesu, nisen nga anglo mīlengi womue mian ko vitunen vajin ko Merri mia-soloi.

<sup>22</sup> Mian ko ejpari daron momsawos nen nga Josep ko Merri porloli murrin nga nale neseseien se Moses muwrai nga puloli nuru porwokwok re no Atua ko jinibb, ko orwosi Iesu van renge Jerusalem nga porla lweni tevi Iova. <sup>23</sup> Erpe aruli rengen nale neseseien se Iova, “Bipi norman jile nga miak rrongvi womu nen e aron, arivi se Iova.” <sup>24</sup> Ko porloli sulsulen pirpe nga nale neseseien se Iova muwrai parlai: “Wuñer p̄ieru, rreknga daro p̄ieru.”

*Simeon elesi Iesu renge Naim On se Atua*

<sup>25</sup> Ko B̄irtera san elik rengen Jerusalem rengen daron nen, nisen Simeon. Ni evi B̄irtera nga mumomsawos m̄irres, ko evi jinibb se Atua nga mimtutu ko etriv terai p̄ilesi m̄er nga p̄ilai mauren tevi m̄eri Isrel nir. Ko Nem̄in On se Atua eptevi ni, <sup>26</sup> eviseni tevi ni nga ni sete pimij mun, p̄ilesi mun Mesaea se Iova nga m̄irijrije puwoma. <sup>27</sup> Ngok Ner̄in On eptevi ni van rengen Naim On se Atua. Ko re wosenen mawos ko pa tasu se bipi ko tata sen orsale Iesu vini rengen Naim On nga porloli sulsulen tevi ni pirpe nga nale neseseien se Atua muwrai. <sup>28</sup> Ko Simeon elesi bipi, ko owosi esale rengen nevren ko osrōvi Atua owra <sup>29</sup> “Lelingenok kuplinglingi jinibb ne majingen som vajin pivel rengen demat, pirpe nale som muwrai. <sup>30</sup> Lelingen ngel metek elesi jinibb som nga pia-la mauren tevi jinibb nir <sup>31</sup> erpe nga nik kumloli lilane rengen no jinibb jijle ne iel ngatan

nir. <sup>32</sup> Moron nga pimor vaseni jinibb jijle ne vare nir, ko pivi nosrōvien se kem m̄eri Isrel nir nga namivi jinibb som.”

<sup>33</sup> Ngok tata sen ko tasu sen ortaole nale nga muwrai ngok nir suri ni. <sup>34</sup> Ko Simeon erij erres suri nir; ko owrai tevi tasu sen Merri owra “Kupmeteni! Atua otobbtobbue bipi ngel nga pulokloksi m̄eri Isrel pilep parvitan, ko p̄isa raji lweni nir pilep. Ko pivi nelesien nga m̄eri Isrel pilep parij tere. <sup>35</sup> Ko ngok niko pimor vaseni norrorrmien se jinibb pilep nga marok-silvenir marto teptepi parto limjer vajin. Ko nik nolom purnge p̄isij pirpe neval nga muso rengen devjen korti m̄isari rrrurungi nolom.”

*Ana elesi Iesu rengen Naim On*

<sup>36</sup> Ko rengen daron nen leker san evi propet, nisen Ana. Ni evi natu Panuel ko evi metka se Aser san. Bonevis, daron nga mivi nesen m̄elakel kobbong, ko elik ji diwen sen; ko orlik sia ebut, ko diwen sen emij lingi. Ko otur nawon sia elep lengleng. <sup>37</sup> Sian evi ngavōl owil drromon ivij (84) vajin. Ko sete elinglingi Naim On nabong san. Rengen rorong jile ko rivriv jile okorti tevi nir nga marok-lot ko marok-linglingi nanen suri. <sup>38</sup> Ko Ana evini rengen loloim ne Naim On rengen daron mawos nga Simeon m̄irij m̄irres suri bipi e. Ko omurrarrong suri nale nga muwrai suri bipi ngel, ko owra erres elep tevi Atua suri. Ko ospe suri tevi jinibb jijle nga martiriv tera Atua p̄itlasi tweni m̄eri Isrel nir.

*Merri ko Josep orwosi bipi arluwi van Nasret e*

<sup>39</sup> Merri ko Josep orloli nanu nga nale neseseien se Atua muwrai jile, ko orwosi bipi arluwi van rengen Galili e rengen ngaim ser Nasret. <sup>40</sup> Ko bipiwarrenge nen elep rujruj ma, ko jin eterter, ko owun saute norongwosien. Ko Atua erij erres suri ni.

*Iesu evan rengen Naim On se Atua daron nga mivi nanwarrenge malum e*

<sup>41</sup> Rengen sia jijle tata se Iesu ko tasu sen orok-pitevi nir nga marok-an rengen Jerusalem nga marok-tori nanen ne asien. <sup>42</sup> Daron nga Iesu sian mijpari esngavōl drromon eru malum e ko tata sen ko tasu sen orpitevi ni nir kes aran rengen nanen ne asien, erpe tetajer

marok-loli. <sup>43</sup> Mian ko ejpari nabong nga marlingi nanen ne asien puto renger arsuw, ko jinibb artipatun arluwi van rengen ngaim ser e. Ko Iesu elik jer rengen Jerusalem; tata sen ko tasu sen sete orongwose nga ni m̄ilik jer. <sup>44</sup> Orrorrmi rreknga ni eptevi pa meling ne jinibb nga ngok nen sopor nga marluwi van rengen ngaim ser e. Mian ko otomori pivi

vajin nabong totoklai san, ko ortipatun orkulkulu pej renge metka ser nir ko seler nir, <sup>45</sup> ko sete orlesi te ejki. Mian ko orluwi kele van renge Jerusalem e, orpej kele. <sup>46</sup> Mian ko renge nabong itolin vajin ko orsekai renge Naim On se Atua, mīlik tevi jinibb ne nevisvisenien se mīeri Isrel nir, ko ok-murrarong nir ko ok-susi lweni nale tevir. <sup>47</sup> Ko nir jile nga marunge nale sen bbōsa elair e, suri komrunge renge rijen sen nga mok-rij weli lweni nale se jinibb nevisvisenien se mīeri Isrel nir, nga norongwosien sen elep. <sup>48</sup> Daron nga tata sen nuru tasu sen morsekai ni e ko ormabbōs bbōsa elai nuru e, ko tasu sen owrai tevi, "Wurru natuk erpese kumloli mirpok tevi komru? Kuplesi tata som ko inu nomor-runge esij, nolo komru opotpot elep nga nomor-pej nik." <sup>49</sup> Ko Iesu owrai lweni tevi nuru, "Komor-pej inu suri sev? Sete komor-rongwose nga inu βelik renge naim se Tata suk ko wor?" <sup>50</sup> Ko nuru sete orongwose isev ko nga muwrai tevi nuru. <sup>51</sup> Ko Iesu evini ji nuru ko arluwi van renge Nasret e, ko ni tetajer ok-runge drrela nuru. Ko tasu sen orrorrmi suri nanu ngel nir tetajer, sete emalie nir. <sup>52</sup> Ko Iesu elep oruj renge niben ko norongwosien sen, ko Atua eir rengen, ko jinibb kele arir rengen.

### 3

#### *Werwren se Jon Baptaes*

<sup>1</sup> Renge sia esngavöl drromon elim (15) nga Taepirias Sisa mivi batu numal renge Rom, ko Ponjes Paelet evi numal ne Jutia, ko Erot Antipas evi numal ne Galili, ko tuwan Pilip evi numal ne Ituria ko Trakon-aetas, ko Lisantias evi numal ne Apilin, <sup>2</sup> ko Anas ko Kaeapas orivi batu jinibb ne sulsulen nir; ko renge daron nen ko nale se Atua evini ji Jon Sekaraea natun renge daron nga mīlik renge lolo merwer e. <sup>3</sup> Ko Jon evel βetβeti renge vanu nga marto mori Jortan nir, ewerwer renger, owra "Kaprieni lweni nolo kami renge nololien se kami nir, ko kappaptaes; ko Atua βitlasi tweni nololien se kami." <sup>4</sup> Erpe nga propet Aesea muli renge naul sen muwra "Jinibb san ekail renge lolo merwer, owra 'Kaploli lilane sel se Numal puto metmet terai, ko kaploli mesekle sel sen nir parmetet βirres. <sup>5</sup> Bbulwil nga marβerrparrorr van ngatan nir kaptevnir parsorsan, ko botwowout jile nir kapjurōni nir paran ngatan parsorsan, <sup>6</sup> nga jinibb jijle parlesi sel nga Atua βila mauren tevi jinibb nir." <sup>7</sup> Delung elep arivel sele Jon, nga ni pipaptaese nir. Ko ni owrai tevir, "Kamivi jinibb nga kamsij O! Kamirpe metka ne numet! Isi osusur metu tevi kami nga kapwolu lingi lolaren

se Atua nga pia-vini? <sup>8</sup> Poro nolo kami pulululwi, rrek erres kapviseni wenen nen. Sete kapwerwerai tevi kami lululweni, 'O, kem namivi metka se Epram, ko βirres bbong re kem.' Inu nuwrai tevi kami, Atua orongwos βila nevōt nawon nga ngel nir ko βirienir parivi metka se Epram. <sup>9</sup> Lelingen ngel artori batu deli oto metmet nga parta ototvi laβe nai nir; ko nai jile nga marsij, sete wener marres mun, parta twenir parwirr nir van renge nabb nga mīin."

<sup>10</sup> Ko delung, daron nga marunge nale sen, ko arsusu lweni tevi ni, "Ko kem nabloli sev ma?" <sup>11</sup> Ko ni owra lweni tevir owra "Mer nga sunsun sen mīeru βila tuwen tevi mīer nga sunsun sen mijkie; ko mīer nga nanen sen mutoe, ni kele puloli pipok puwngani sopen tevi mīer nga nanen sen mijkie."

<sup>12</sup> Ko jinibb nga marok-la nevōt ne takis nir arini jin nga ni pipaptaese nir, ko arsusu tevi ni arwera "Ko kem nabloli piprese?" <sup>13</sup> Ko ni owra lweni tevir, "Kami sete kaplai nevōt βiasi renge lat nga marlingi tevi kami nga kaplai rengen."

<sup>14</sup> Ko jinibb nuval nir arsusu tevi ni arwera "Ko kem nabloli piprese?" Ko ni owra lweni tevir, "Kami sete kapon tertere jinibb nga kapla nevōt jin, ko sete kapsusur metu tevir kapwera kaploli nanu san tevir nga puloli kami kapla nevōt jir. Ko kapir kobbong suri nowli kami."

#### *Mian ko Kristo pivini*

<sup>15</sup> Jinibb norrorrmien ser artipatun arunge erres suri Jon, ko arrorrmi rrekma ni evi Mesaea. <sup>16</sup> Ko Jon orongwose norrorrmien ser ko owra lweni tevir, "Inu nupaptaese kami e nuwi rres kobbong. Ko san ko ma niko pia-vitu suri inu vini, ni ean wor mare renge inu, ko inu sete nurres rragrag nuvter re βelasi tweni dil ne but sen. Ni ko ma pia-paptaese kami e Nerūn On ko nabb. <sup>17</sup> Ni otori nai juljule san renge nevren nga pujujule wene wit e nir, ko dokolvir parwirr lingi jelangir; ko βiser kortoni jelangir βilngir renge βeβeim sen, ko pusli dokolvir renge nabb nga sete san orongwos pivsi pini." <sup>18</sup> Ko ela nale lele kele wor elep tevir renge nga mīerwer tevir renge nospen nga mīirres.

#### *Jon Baptaes evan renge naim ne nekaien*

<sup>19</sup> Ko Jon otortori Numal Erot suri mītkai luwe nesen se tuwan Pilip, Erotias, ko suri kele wor nanu elep nga mulolir marsarr. <sup>20</sup> Ko nanu nga mīisij βerβer nen nga muloli evi vajin nga mīlgi Jon renge naim ne nekaien.

#### *Jon epaptaese Iesu*

<sup>21</sup> Ko daron nga setewor Erot m̄ilngi Jon re naim ne nekaien, ko Jon epaptaes jile jinibb nir osuw, ko vitunen vajin ko epaptaese Iesu. Ko renge daron mawos nga pa mipaptaese ngok ko, ko Iesu olot ko melrin eteri wukari et̄pir. <sup>22</sup> Ko Ner̄in On ojubbul vini; ko lololi niben otoa erpe wuñer, ko orow vini esakel renge Iesu. Ko Atua drrelan evel renge melrin vini erij tevi, owra “Nik kuvi Natuk nga numrenim elep. Nurnge erres elep surim.”

#### *Iesu metka sen nir*

<sup>23</sup> Iesu etipatun majingen sen renge daron nga sian pirpe pingavöl p̄itul (30) sapon. Ko jinibb arwera ni evi natu Josep, ko tata sen ko Josep. Ko Josep evi natu Eli <sup>24</sup> ko Eli evi natu Matat, ko Matat evi natu Livae ko Livae evi natu Melki ko Melki evi natu Janai ko Janai evi natu Josep. <sup>25</sup> Ko Josep evi natu Matataias ko Matataias evi natu Amos ko Amos evi natu Naum ko Naum evi natu Esli ko Esli evi natu Nakai. <sup>26</sup> Ko Nakai evi natu Maat ko Maat evi natu Matataias ko Matataias evi natu Semin ko Semin evi natu Josek ko Josek evi natu Jota. <sup>27</sup> Ko Jota evi natu Jonan ko Jonan evi natu Resa ko Resa evi natu Serupapel ko Serupapel evi natu Salatail ko Salatail evi natu Neri. <sup>28</sup> Ko Neri evi natu Melki ko Melki evi natu Ati ko Ati evi natu Kosam ko Kosam evi natu Elatam ko Elatam evi natu Er. <sup>29</sup> Ko Er evi natu Josua ko Josua evi natu Eliesa ko Eliesa evi natu Jorim ko Jorim evi natu Matat ko Matat evi natu Lipae. <sup>30</sup> Ko Lipae evi natu Simeon ko Simeon evi natu Jutas ko Jutas evi natu Josep ko Josep evi natu Jonam ko Jonam evi natu Eliakim. <sup>31</sup> Ko Eliakim evi natu Melea ko Melea evi natu Mena ko Mena evi natu Matata ko Matata evi natu Natan ko Natan evi natu Devet. <sup>32</sup> Ko Devet evi natu Jese ko Jese evi natu Opet ko Opet evi natu Boas ko Boas evi natu Salmon ko Salmon evi natu Nason. <sup>33</sup> Ko Nason evi natu Aminatap ko Aminatap evi natu Atmin ko Atmin evi natu Ani ko Ani evi natu Esron ko Esron evi natu Perej ko Perej evi natu Juta. <sup>34</sup> Ko Juta evi natu Jekop ko Jekop evi natu Aesak ko Aesak evi natu Epram ko Epram evi natu Tera ko Tera evi natu Nakor. <sup>35</sup> Ko Nakor evi natu Seruk ko Seruk evi natu Reu ko Reu evi natu Pelek ko Pelek evi natu Eper ko Eper evi natu Sela. <sup>36</sup> Ko Sela evi natu Kenan ko Kenan evi natu Apaksat ko Apaksat evi natu Sem ko Sem evi natu Noa ko Noa evi natu Lamek. <sup>37</sup> Ko Lamek evi natu Metusela ko Metusela evi natu Inok ko Inok evi natu Jaret ko Jaret evi natu Malalel ko Malalel evi natu Kenan. <sup>38</sup> Ko Kenan evi natu Inos ko Inos evi natu Set ko Set evi natu Atam, ko Atam evi natu Atua.

## 4

### *Demij orrowrowe Iesu*

<sup>1</sup> Ko Iesu owun saute Ner̄in On, ko evel lingi Jortan, olwi. Ko Ner̄in On owomue ni evan renge lolo merwer e. <sup>2</sup> Ko ni elik iok nabong ngavöl ivij (40) nga Demij purrowrowe ni. Ko renge nabong ngok nir, ni sete orro nanan san renger ejpari marsuw. Ko renge vitunen vajin ko ornge numer aji lenglengen. <sup>3</sup> Ko Demij owrai tevi ni owra “E, nik kuvi pa Atua Natun! Kupwera! tevi nevöt nawon ngel p̄irieni pivi niv.” <sup>4</sup> Ko Iesu owra lweni tevi owra “Ejki, Naul On owra ‘Jinibb sete orongwos pimaaur e niv kis pisan.’ ”

<sup>5</sup> Ko Demij eptevi ni ortongsa van mare sapon. Ko eviseni batun vanu ne iel ngatan totoklai tevi ni evesane erpe navil nga mivil. <sup>6</sup> Ko owrai tevi, “Bela derteren ne nanu ngel jile nir tevim ko nosrövien ner jile, suri arlair pa tevi inu, ko inu vajin belai tevi isi nga inu memrreni. <sup>7</sup> Ko niko poro nga nik kupjipa ngatan ko kuploteo inu, ko ngok nanu ngel jile parivi som.” <sup>8</sup> Ko Iesu owrai lweni tevi owra “Ejki, Naul On owra ‘Nik kuploteo Iova Atua kobbong, ko nik kuploli majingen se ni kobbong.’ ”

<sup>9</sup> Ko Demij eptevi ni kele van renge Jerusalem e ko elngi ni renge drromo Naim On mare jer, ko owrai tevi, “E, nik kuvi pa Atua Natun! Kuprow jubbul iel van ngatan e. <sup>10</sup> Suri Naul On owra ‘Atua pukoni anglo sen parmetmete nik.’ <sup>11</sup> Ko Naul On owrai kele, ‘Nir parwosim renge neverr mare suri nik tukjilaklak wos belam renge nevöt.’ ” <sup>12</sup> Ko Iesu owra lweni tevi, “Ejki, Naul On owra, ‘Sete kuprrowrowe Iova Atua som te, pijki.’ ” <sup>13</sup> Daron nga Demij murrowrow jile Iesu renge sel nga muwra purrowrowe ni rengen ko evel lingi mun, pian pijpari nabong sapon kele ko pia-luwi kele.

### *Iesu etipatune majingen sen renge Galili*

<sup>14</sup> Ko derteren se Ner̄in On esilvi Iesu, ko ni olwi van renge Galili e. Ko nosp̄en nen evel jile renge ie nir. <sup>15</sup> Ko evisiviseni jinibb nir renge naim ne loten ser nir, ko jinibb jile nir arsurövi ni.

### *Iesu aroji tweni renge Nasret*

<sup>16</sup> Ko Iesu olwi van renge Nasret e renge lat nga ni milep e bonevis. Ko renge nabong ne Sapat ni evan renge Naim On erpe tetajer mok-loli. Ko otur imare nga pieve Naul On. <sup>17</sup> Ko nir arla naul se Propet Aesea arsareni tevi ni. Ko ni elai eveve; ko elesi lat san, ko eve tevir. Lat nen owra erpel: <sup>18</sup> ‘Ner̄in se Iova elik renge inu, suri ni otobbobbue inu nga bewerwer renge Nosp̄en nga Mirres tevi Beres nir. Ni okoni inu nga bowra tweni tevi nir nga marlik

rengge naim ne nekaien parivel sisarow, ko bololi nir nga meter marrorr parkulu luwi, ko bololi nir nga marlik re nekaien parivel sisarow. <sup>19</sup> Ko bowra tweni sia nga Iova pia-la mauren tevi jinibb sen nir. <sup>20</sup> Ko daron nga mieve jile, ko ni olunggi lweni naul ko esareni lweni tevir ko esakel re lat ne werweren. Ko nir jijle nga marlik rengge naim ne loten arwang suri etingtingin. <sup>21</sup> Ko ni etipatun owra suri tevir, "Nale nga naul ngel muspe surir ngel nir nga kammurrarrong nir ngel, lelingen ngel Atua ololir arpelari." <sup>22</sup> Jinibb jile arunge nale sen nir arres pelak, ko bbosa elair e. Ko arwera "Ni evi natu Josep, rreknga?" <sup>23</sup> Ko ni owra lweni tevir, owra "Nurnge erpe kami kapwera nale san nga marok-werai ngel tevi inu, 'Dokta, kuploli nik lweni kuprres puwomu. Nanu nga kumloli rengge Kapaneam nir, kuplolir iel kele rengge sisom'." <sup>24</sup> Ko nuwretun nuwrai tevi kami, propet san, orongwos parosuri lat jijle nga mian e. Ko jinibb nga ma rengge sisen woswos sete mara-osuri pelake. Nanu ngok sete erres. <sup>25</sup> Ko rengge weretunen nuwrai tevi kami, nesevin elap rengge Isrel nga diwen ser marmij lingir rengge daron se Elaeja, rengge daron nga naus sete mus rengge sia itul totoklai ko rengge devje sia kele san, ko numer nga milep rengge vanu ngel petpeti. <sup>26</sup> Ko Atua sete okoni Elaeja van ji nir san, ejki. Ko okoni ni ma van rengge Saripat rengge vanu ne Saeton san, evan ji nesevin san nga diwen sen mimij lingi ie. <sup>27</sup> Ko jinibb elap nga marmesi e mesien nga niber nimmemaul rengge daron nga Elaesa mivi propet e rengge Isrel, ko nir san sete Elaesa ololi erres luwi, ejki, ko sansan kobbong Neman, nga mivi meri Siria." <sup>28</sup> Ko nir nga marlik rengge naim ne loten loloim marunge nanu ngel e ko arlolar lenglengge. <sup>29</sup> Ko artur imare ko arrul totoni Iesu, ko arevei van vare e. Ko arpitevi van rengge drromo botwen e nga marloli ngaim ser rengge jeljelin, arwera parsir jubble batun puwomu van ngatan e. <sup>30</sup> Ko ni evel rrurrngi bbong livõ rengge delung nir ko evel asi, evel, setemun arrul totoni.

*Iesu oji tweni nemin nga marsij rengge jinibb san*

<sup>31</sup> Ko Iesu evan rengge Kapaneam e, ngaim ne Galili san. Ko rengge nabong ne Sapat evan rengge naim ne loten, ko evisviseni jinibb nir. <sup>32</sup> Ko jinibb artaole nevisisenien sen, suri nale sen nir arrow erres. <sup>33</sup> Ko jinibb san nga nemin nga marsij marsisilvi elik ie rengge loloim ne naim ne loten. Ko ekail drrelan evan mare lengleng, <sup>34</sup> owra "E! Sev som oto nile iel,

nik Iesu ne do Nasret? Nik kuvini nga kuplokloksi kem? Inu nurongwose nik, nik kuvi jinibb on se Atua." <sup>35</sup> Ko Iesu otortori owra "Kupmurrarrong, kupsil ivare rengge ni!" Ko nemin nga misij evireni mernen ewajeni torrlai ngatan rengge livõ ne nir, ko evel lingi. Ko sete ololi niben sapon esij. <sup>36</sup> Ko bbosa nga milep elair e, ko arsuþsupþe lulweni nir e arwera "Aro, nale sev le ngel? Ni nale sen otutun, muwrai tevi nemin nga marsij ko arivare arvesane." <sup>37</sup> Ko nosþen ne nanu nga Iesu mulolir, jinibb arsuþsupþer owl jijle rengge vanu ne ie nir.

*Iesu ololi jinibb elap arres luwi rengge mesien ser*

<sup>38</sup> Ko Iesu eivare rengge naim ne loten ko evan rengge naim se Saemon e. Ko Saemon pilen lekter emsi e mesien dowalul nga miterter milep, ko arwerai tevi Iesu. <sup>39</sup> Ko ni evan otur mori ji Saemon pilen lekter ko ewer ore mesien dowalul, ko mesien dowalul elinglingi. Ko lekter emra kasi ko ela nanen tevir.

<sup>40</sup> Mian ko nial ewaj pini vajin, ko nabong on ser osuw. Ko jinibb nga seler marmesi artektekair vini ji Iesu. Ko elngi nevren nuru rengger ko ololi nir jile arres luwi. <sup>41</sup> Ko nemin nga marsij arivare lingi nir elap, ko arkail van mare arwera "Nik kuvi Atua Natun!" Ko Iesu otortorir ewer orer owra sete parij, suri arongwose ni evi Mesaea.

*Iesu ewerwer rengge naim ne loten nir*

<sup>42</sup> Ko rengge nat nga murorpong ko Iesu evel lingi ie ko evan rengge lolo merwer e, lat nga nat mubbubbil e. Ko delung arvivitu suri, arpej. Ko daron nga marlesi ko arloli lesi parwer ore ni sete pivel lingir. <sup>43</sup> Ko ni owrai tevir, "Inu bewerwer ko wor rengge nosþen nga murrres ne batun vanu se Atua rengge ngaim minij kele nir, suri nga nanu ngok ko Atua mukoni inu tweni nga bololi." <sup>44</sup> Ko ni evel suri ngaim ne Jutia nir, ko evan rengge naim ne loten nir ko ewerwer rengger.

## 5

*Iesu everuse jinibb nga marwomu marivi jinibb sen nir*

<sup>1</sup> Rengge nabong san ko Iesu ok-tur rengge jeli nuwito ne Genesaret (nga nisen tuwen marveruse nuwito ne Galili) ko ok-werwer. Ko delung elap arini mori jin arunge nale se Atua, ko arlilji ni. <sup>2</sup> Ko Iesu elesi drrav eru orrerrsi rengge jeli deþinan; ko jinibb nga marok-tutumun rengge nuru arivel lingi nuru aran arrawe niva ser. <sup>3</sup> Ko Iesu esa van rengge drrav nen tuwen, nga mivi se Saemon Pita nen, ko owrai tevi ni nga pusioni tweni þisal van ngalu beblen, þisal



lingi deŕinan. Ko ni esakel renge drrav ko evisviseni delung nir nga martur suri jeli nuwito.

<sup>4</sup> Ko daron nga Iesu m̄irij jile, ko owrai tevi Saemon “Kupsu rujoni drrav beblen van renge lat nga nuwi murrone, ko kapjurōni niva se kami van ngatan. Ko kaplesi ko, kaprevei nai vajin.” <sup>5</sup> Ko Saemon owra lweni tevi, “Numal, nam̄elak elep nata mupong, nam̄elak rrraren ko sete namla nai sansan rragrag. Ko suri nik kumwerai, ko inu bololi ta pirpe nga kumwerai.” <sup>6</sup> Ko nir arjurōni niva ser van ngatan renge nuwi; ko arevei lengleng nai, ololi niva ser otomori pimarrerr. <sup>7</sup> Ko aroluve selar nir renge drrav tuwen nen e nga parini parpiveir. Ko nir arini ko arlila tututweni nai re niva van renge nolo drrav e nuru, ko orwun saute vajin, otomori parrone. <sup>8</sup> Ko Saemon Pita etaol lenglengen e ko ejipa ngatan renge ðela Iesu ko owra “Numal wurru kupruj ngasue inu, suri nuvi jinibb nga m̄esij.” <sup>9</sup> Suri ni ko nuru nga morpitevi ni bbōsa nga milep elair e renge nga marlesi marevei lengleng nai mirpel. <sup>10</sup> Ko Jomes ko tasin Jon, Sepeti natun nuru nga morpitevi Saemon, nir jile bbōsa elair e. Ko Iesu owrai tevi Saemon, “Sete kupmetutu te. Etipatun le pa ngel, lelingen ngel ko p̄itajer tevi, nga nik kuprevei vajin jinibb pirpe nga lelingenok komok-revei nai.”

<sup>11</sup> Ko nir arsu e drrav ser van ngaut e, arrrrseni renge deŕinan. Ko arivel lingi, tevi joror jile nir nga maro rengen. Ko arvijuri Iesu, arivi jinibb sen vajin.

*Iesu ololi jinibb san nga m̄imsi mesien nga niber m̄imemaual erres luwi*

<sup>12</sup> Mian ko renge nabong m̄inij kele san Iesu elik renge ngaim san, ko jinibb san nga m̄imsi mesien nga niber m̄imemaual evini. Mesien ngok ololi p̄etp̄eti niben jile nir osuwuw. Ko m̄iernen elesi Iesu ko evini ejipa ngatan jin, ko owra “Wurru poro nga nik kupmarong, ko kuploli inu bowokwok.” <sup>13</sup> Ko Iesu owra “Ejki, numarong le pa. Kupwokwok!” Ko sete eringe mesien sen, esaro elngi nevren rengen. Ko ngavilvilsen mesien nga niber m̄imemaual evel lingi ni. <sup>14</sup> Ko Iesu ewer ore ni, owra “Kuplesi sete kupwera nanu pisan tevi jinibb pisan, ko kupvijuri sel som, kupasi ji batu jinibb ne sulsulen p̄ilesim. Ko kupla nanu nga Moses muwrai renge nale nesereien sen tevi ni. Ngok piviseni tevi jinibb nir nga kumwokwok pa.” <sup>15</sup> Ko nospen ne sev nga Iesu muloli ok-ruj ma elep renge vanu. Ko delung elep arok-ivel tweni nga parunge ni nale sen, ko pulolir parres luwi renge mesien lele ser nga marmesi e. <sup>16</sup> Ko evi murrone sen nga

reng nabong jile ok-ivel lingir, ko ok-san ok-an renge lolo merwer e, ok-lot mun ie.

*Iesu ololi jinibb san nga devje niben mimij emaur luwi kele*

<sup>17</sup> Mian ko renge nabong m̄inij kele san Iesu ok-visviseni jinibb nir. Ko Parasi nir ko jinibb nevisvisenien ne nale nesereien nir nga marivel renge ngaim jile nir ne Galili e vini, ko renge Jutia ko renge Jerusalem kele, arsakel ie. Ko derteren se Iova elep renge Iesu nga puloli lartul nga marmesi parres luwi. <sup>18</sup> Ko jinibb sopor arwosi jinibb san nga devje niben mimij renge maling sen vini, ko arpepej lat nga parasi van loloim e tevi, parlingi ji Iesu. <sup>19</sup> Ko sete lat san oto nga parasi rengen, ejki, suri jinibb elep p̄elak. Ko arwosi arsa tevi van mare e renge drru naim. Ko arrarre drru naim mare, ko arjurōni ni van loloim e renge livō ne jinibb nir ko renge Iesu non. <sup>20</sup> Ko Iesu etaole nga m̄ilesi nosurien ser ko owrai tevi, “E, m̄erel, nololien som nutlasi tweni pa osuw.” <sup>21</sup> Ko jinibb nevisvisenien ne nale nesereien ko Parasi nir arrorrmi sarrsarre renge nolor, arwera “Erpese m̄erel m̄irij mirpok? Erij melmelas ko osopsope Atua! Isi orongwose p̄itlasi tweni nololien nir? Atua kobong esan bbōlbōl!” <sup>22</sup> Ko Iesu orongwose norrorrmien ser, ko owrai tevir, “Suri sev kami kamrorrmi nanu ngel nir renge nolo kami nir mirpok?” <sup>23</sup> Evi nanu nga m̄isisarow bbong nga bowrai tevi m̄erel, ‘Nololien som nutlasi tweni pa,’ suri si p̄ilesi poro nuwretun rrek nukrekris kobong? Ko evi nanu nga m̄iterter kele wor asi ngok nga poro bowra ‘Kuptur imare kupla milngom ko kupiel van renge naim som e,’ suri jinibb jile parlesi lelingen poro piplari pirpe nga mowrai ngok. <sup>24</sup> Ko bololi vajin nanu nga m̄iterter nen, puloli kaprongwose kele nga inu Jinibb Mawos derteren suk otoo renge iel ngatan nga ðetlasi tweni nololien.” Ko ni owrai tevi m̄ier nga niben devjen mimij owra “Nuwrai tevi nik, Kuptur imare kuplai maling som kupwosi, ko kupiel van renge naim som e.” <sup>25</sup> Ko ni otur imare kasi ngavilvil, ko osrōvi Atua, ko owosi maling sen ko evel limjer renge nor, evan vare e. <sup>26</sup> Ko jinibb jile bbōsa nga milep elair e ko armetutu elep, ko arsurōvi Atua arwera “Aro, lelingen rramlesi nanu nga m̄inijnije san.”

*Iesu everus Livae pivijuri ni, pivi jinibb sen*

<sup>27</sup> Vitunen renge nanu ngel nir, ko Iesu evel kele, ko elesi jinibb san nga mok-la nevōt ne takis nga nisen miwajie Livae, ok-lik renge naim nga mok-majing rengen. Ko Iesu owrai tevi “Merel, kupvijuri inu

ko kupivi jinibb suk." <sup>28</sup> Ko ni otur imare, evel lingi joron jile nir arjipon ko evijuri Iesu.

<sup>29</sup> Ko mian ko Livae ololi nanen nga milep san renge naim sen nga mīāan ore ni e tevi Iesu. Ko nir elep nga marok-la nevōt ne takis arini renge nanen, ko jinibb elep kele wor nga marsakel tevi Iesu araan korti tevi ni renge tep. <sup>30</sup> Ko Parasi sopor ko jinibb nevisvisenien ne nale neseseien sopor nga marok-pitevir arwor suri Iesu tevi jinibb sen nir; arwera "Erpese kami kamaan ko kamminmin tevi jinibb nga marok-la nevōt ne takis nir ko jinibb nga marsij nir?" <sup>31</sup> Ko Iesu owrai lweni tevi nir; "Nir nga marres sete armerreni dokta, ko nir nga bbong marmesi ko. <sup>32</sup> Ko erpok ko, inu nuvini sete nga beverage nir nga tetajer marwera marres, ejki, ko nuvini tweni bbong beverage nir nga sete markerkeris, ko marwer limjere nga marsij, nga nolor pulululwi."

*Nosusien suri murrun nga parlinglingi nanen parvil*

<sup>33</sup> Ko mian ko jinibb sopor arwerai tevi Iesu "Jon jinibb sen nir arok-vil tetajer ko arok-lot, ko jinibb se Parasi kele nir arok-loli erpok; ko nik jinibb som, erpese maraan ko marminmin ko setemun marvil?" <sup>34</sup> Ko Iesu owrai tevir owra "Daron nga jinibb nga mutotko elik vane renge nanen tevi selen nir, ko kami kamrrormi nga nir parlinglingi nanen nga parvil? Ejki rres nawon! <sup>35</sup> Mian ko nabong nen piavini vajin, ko para-tekai tweni mēr nga mutotko jir. Ko ngok ko nir para-vil ko renge nabong nen nir."

<sup>36</sup> Ko ni owra nale rrongrrongvi mīnij nen kele san tevir, owra "Sete jinibb san orongwos pīrrerri tweni bebje sunsun nga mimerr sapon ko puwol ore lat nga mimarror e renge sunsun nga mītra e, ejki. Poro pipok ko ni olokloksi pa sunsun nga mimerr nen; ko sunsun nga mītra nen kele pīsij, suri bebje sunsun nga mimerr nen sete pusorsan pīrres tevi. <sup>37</sup> Ko erpel kele, sete jinibb san orongwos pujongjongi norro nga mimerr van renge botel nga mītra nga marloli nevlu nanikot e. Poro pipok ko norro nga mimerr tut, tuloli nevlu nanikot nga mītra tirreren ko tiap rrrerri, suri etra pēlak. Ko norro timejivjiv teplingi tisij, ko nevlu nanikot kele tisij. <sup>38</sup> Niko norro nga mimerr parlingi ko wor renge nevlu nani nga mimerr mimalum mīrres. <sup>39</sup> Ko sete jinibb san nga mokmini norro nga mītra emrreni norro nga mimerr; suri owra 'Norro nga mītra erres.'"

## 6

*Jinibb se Iesu nir arsesri wene wit renge nabong ne Sapat*

<sup>1</sup> Mian ko Iesu evel otvi naut ne wit san renge nabong ne Sapat. Eptevi jinibb sen nir; ko jinibb sen nir numer ajir, ko artipatun arsesri sursele wene wit nir ko arseser nga dokolvir parjiekie lingir, ko arlair arurrurroir. <sup>2</sup> Ko Parasi sopor arlesi, ko arwerai tevi ni, "Kuplesi ta, nir arloli nanu nga sete mumomsawos renge nabong ne Sapat!" <sup>3</sup> Ko ni owrai lweni tevir, "Aro, ejki ma, ko rreknga ma kami sete kameve renge Naul On, nanu nga Numal Devet muloli daron nga nanen ser mijkie, numer mīaji ni ko nir nga marlik tevi ni? <sup>4</sup> Ni ean renge Naim On se Atua, daron nga Apiata mivi batu jinibb ne sulsulen e, ko ni orro tama niv nga setete erres renge jinibb nga marivi jinibb nawon parurroi, evi kis bbong se batu jinibb ne sulsulen ko. Ko ni elai kele tevi nir nga marlik tevi arurroi." <sup>5</sup> Ko Iesu owrai kele tevir, "Inu Jinibb Mawos nuvi Numal ne Sapat."

*Iesu ete nevre jinibb san nga mīkati emetet luwi*

<sup>6</sup> Mian ko renge nabong ne Sapat mīnij kele san ko Iesu evan kele renge naim ne loten pivisviseni jinibb nir. Ko jinibb san nga nevren rres mīkati elik ie renge lolaim. <sup>7</sup> Ko renge ie jinibb nevisvisenien ne nale neseseien sopor ko Parasi sopor armeteni suri Iesu eterter nga poro nga ni puloli mēr nga nevren mīkati nen pīrres renge nabong ne Sapat, ko ngok nir partor sweri nanu san nga parevei Iesu pian re kot suri. <sup>8</sup> Ko Iesu orongwose norrrormien ser, ko owrai tevi mēr nga nevren mīkati, "Kupmera ta, kupini iel kuptur iel liven womu." <sup>9</sup> Ko Iesu owrai tevi nir, "Inu numrreni bosusi tevi kami: Renge devjen ne nale neseseien, erres nga parloli nanu nga mīrres re nabong ne Sapat? Poro pijki rreknga parloli pīsij? Erres nga parloli jinibb san pīrres luwi renge nabong ne Sapat? Poro pijki ko parlolkloksi jinibb rrek!" <sup>10</sup> Ko Iesu oklu emteni rrale nir jijle nga martur rrale ni, ko owrai tevi mēr nga nevren mīkati, "Kupete ta nevrem pime-tet." Ko ni ete nevren emetet, ko nevren erres luwi. <sup>11</sup> Ko nir arlolar lengleng ko arsupuē lululweni tevi nir nga parloli sev tevi Iesu.

*Iesu otobbtobbue jinibb sen esngavōl drromon eru*

<sup>12</sup> Renge daron nen Iesu otongsa van mare renge botwen nga pulot, ko ni elik rrarren renge ie nutpong san nga mulot

van ji Atua. <sup>13</sup> Ko daron nga nat mīrin vajin, ko ni everus jinibb sen nir vini jin; ko ni otobbtobbu tweni nir esngavöl drromon eru nga ni mīlengi niser marwajie aposol. <sup>14</sup> Nir le niser ngel: Saemon (nga ni mīlengi kele nisen miwajie Pita), ko Antru ni wor tasin, ko Jemes, Jon, Pilip, Batolomiu, <sup>15</sup> ko Matiu, Tomas, Jemes nga natu Alpeas, Saemon nga mivi pati nga marwera paroji tweni mēri Rom nir, ko Jutas nga natu Jemes, <sup>16</sup> ko Jutas ne Iskariot nga vitunen ko pia-teakai kerasi Iesu.

*Iesu evisviseni jinibb nir ko ololir arres luwi*

<sup>17</sup> Ko Iesu ojubbul tevi jinibb sen nir vini ngatan e renge numiv san ko otur rengen. Ko jinibb sen elep, ko delung elep ne Jutia ko Jerusalem, ko nga renge jeljeli dis ngalu renge Taea ko Saeton. <sup>18</sup> Nir ngel arini mori jin nga parunge nale sen, ko ni pulolir parres luwi renge mesien ser. Ko lartul nga nemin nga marsij marsisilvir, Iesu oji twenir renger ko ololir arres luwi. <sup>19</sup> Renge meling jinibb nga milep ngel, nir jijle arok-wera parjipari Iesu nga puloli derteren sen pian renger, ko pipok ko puloli nir jijle parres luwi.

*Jinibb nga marongwos parunge p̄irres ko jinibb nga marongwos parunge p̄isij*

<sup>20</sup> Iesu emteni jinibb sen nir ko owra “Neiren renge kami nga kamivi Beres; batun vanu se Atua evi se kami. <sup>21</sup> Neiren renge kami nga numer m̄iaji kami lelingen ngel; mian ko kami kapa-up. Neiren renge kami nga kamting lelingen ngel; mian ko kapa-ir ko, kapa-men. <sup>22</sup> Neiren renge kami renge daron nga poro jinibb nir arlesi nga kamivi jinibb se inu Jinibb Mawos, ko arungasi kami vajin, ko arla nale otot tevi kami, ko arsoni tweni kami renge gortien ser, suri bbong inu. <sup>23</sup> Kap̄ir renge nabong nen daron nga nanu ngok nir parpelari, ko kaprowrow e neiren, suri nowli kami elep renge melrin. Suri renge sel mawos ngok ko pa b̄irterawarrend ser arloli tevi propet nga tuwi nir.

<sup>24</sup> “Ko esij wor elep niko renge kami nga joro kami milep lelingen ngel, suri kamlik pa renge mauren nga mimalum, ko sete kamrongwos kaplik kele mun pipok re melrin. <sup>25</sup> Ko esij wor elep niko renge kami nga kamup n̄irres lelingen ngel; suri mian ko numer p̄iaji kami. Esij wor elep niko renge kami nga kammen lelingen ngel; suri mian ko kapting ko kaptaur. <sup>26</sup> Esij wor elep niko renge kami nga jinibb nir marsupsuḗe kami kamrres lelingen ngel, suri apu ser kele tuwi arok-loli sel mawos ngok ko pa tevi propet ne gerisen nir, arsuḗer arwera nawon arres.

*Kapmerreni devje nuval se kami*

<sup>27</sup> “Ko inu nuwrai tevi kami nga kam-murrarronge inu: Kapmerreni devje nuval se kami, kaploli p̄irres tevi nir nga marungasi kami. <sup>28</sup> Kaprij p̄irres tevi nir nga marij m̄isij tevi kami, ko kapverus van ji Atua suri nir nga marungasi kami. <sup>29</sup> Poro jinibb pisan puwje vasum devjen, ko nik sete kupwuje lweni kele, ko kuplinglingi kele ma vasum devjen tevi puwje kele. Ko poro jinibb pisan p̄ilai tweni kot som, ko kuplinglingi ni p̄ila kele sunsun som.

<sup>30</sup> “Kuplai tevi m̄er nga mungonim, ko m̄er nga m̄ilai joram, sete kupwera p̄ila lweni kele tevim. <sup>31</sup> Erpe nga kami kam-marong nga jinibb parloli nanu tevi kami, ko kami vajin kaploli pipok tevir.

<sup>32</sup> “Poro kami kapmerreni jinibb nga bbong marok-merreni kis kami, ko erpese? Iok sete evi nanu san, suri jinibb nga marsij kele arok-merreni nir nga marok-merreni. <sup>33</sup> Poro kapok-loli p̄irres tevi kis bbong nir nga marok-loli n̄irres tevi kami, ko erpese? Iok sete evi nanu san, suri nir nga marsij kele arok-loli kobong erpok. <sup>34</sup> Ko poro kaplai tevi nir kis bbong nga parkele lweni ko, ko erpese? Iok sete evi nanu san, suri nir nga marsij kele arok-loli bbong erpok tevi nir lululwi nga parok-kele lweni pusorsan. <sup>35</sup> Ko kami ma kapmerreni ko wor devje nuval se kami ko kaploli p̄irres tevir, ko kaplai tevi nir nga sete kaprrormri parlai lweni kele. Ko niko kami nowli kami pilep, ko kami kapivi Atua ne Drromsen Mare natun; suri ni erres tevi nir nga sete marok-wera erres tevi, ko nir nga marsij. <sup>36</sup> Kaprrormri jinibb nir, pipre Tata se kami orrorrmir.

*Sete kapwer lokloksi jinibb pisan*

<sup>37</sup> “Sete kapwer lokloksi jinibb pisan kapwera esij, pijki, ko Atua vajin sete piawera kami kamsij. Kami kaptelasi tweni nololien se jinibb n̄inij nir, ko Atua vajin p̄itlasi tweni nololien se kami. <sup>38</sup> Kaplai joro kami tevi jinibb n̄inij nir, ko Atua pia-kele lweni tevi kami; pijvi puwun saut p̄irres, puni van ngatan, pusurrsurrngoni p̄ij p̄irres, pijvi kele puwun saut, ko pimejivjiv nawon vajin.”

*Murru kami pumomsawos p̄irres*

<sup>39</sup> Ko Iesu owra nale rongrongvi n̄inij kele san tevir owra “Metrrorr sete orongwos puwowomue metrrorr pipetei renge sel, ejki. Poro pipok ko nuru korti poravitan van ngatan renge nolo bbulwil! <sup>40</sup> Ko erpok kele, m̄er nga marvisviseni ni sete orongwos p̄iasie jinibb nevisvisenien sen van mare e; pian pijpari wor pusuw ko renge marvisviseni, ko ngok ko ea-sorsan ko vajin tevi jinibb nevisvisenien sen. <sup>41</sup> Ko erpese kumlesi nate nato nga tuwam

mīkrae re nolo ßelan, ko sete kulesi suri nate buluk nga milep nga nik kumkeræ re nik nolo ßelan?<sup>A 42</sup> Ko poro pirpok, ko nik kupwerai pirpese tevi tuwam, 'Tuwak, kuplinglingi ßesre tweni nate nato nga kumkeræ re nolo ßelan,' daron nga nik sete kumleslesi nate buluk nga milep nga nik kumkeræ re nik nolo ßelan? O, nik nga kumiel rengo sel eru, tukbböt re aseni ni ßelan tuloli ni ßelan turro tiasi! Womujnen kupsere tweni nate buluk nga milep nga nik kumkeræ re nolo ßelan jile pusuw, ko kuplesi nolo ßelan owokwok erres, ko kurongwos kupa-sere tweni wajin nate nato nga tuwam mīkrae mibbölji ßelan.

### *Nai ko wenen nir*

<sup>43</sup> "Nai nga mīrres san sete orongwos piwen wenen nga mīsij, ko nga mīsij sete orongwos piwen wenen nga mīrres. <sup>44</sup> Nai jijle arongwose rengo wener. Jinibb sete orongwos pian pītawe wene nitapol rengo gra moku, ko sete orongwos pītawe wene drra rengo duru molulu. <sup>45</sup> Ko erpok ko, jinibb nga mīrres ok-wera tweni nanu nga marres nga mok-rorrmir marto rengo nolon; ko jinibb nga mīsij ok-wera tweni nanu nga marsij nga mok-rorrmir rengo nolon. Suri sev nga muwun saut rengo nolo jinibb, niko marpelpelari rengo jingo jinibb mok-wera tutwenir.

### *Jinibb eru nga morili naim*

<sup>46</sup> "Erpese kami kamveruse inu mīrres, 'Numal, Numal,' ko setete kamok-loli suri nanu nga mowrai tevi kami? <sup>47</sup> Nir jijle nga marini jik, ko marunge nale suk nir ko marlolir surie, inu beviseni tevi kami nir arirpe isi. <sup>48</sup> Nir arirpe jinibb san nga mīli naim sen rengo dan nga mīterter mīrres. Mili jile musuw wajin, ko mian ko daron nga naus mus ko nuwi muwlu ko miveji naim nen, ko sete ototo, suri eli pa eterter jile erres. <sup>49</sup> Ko mīer nga ma murunge nale suk ko sete mulolir, ni erpe mīer nga mīli naim sen rengo dan malum; ko sete eli nabur nen nir aran ngatan, arun jipoj nawon. Ko daron nga nuwi muwlu muti naim nen, ko evitan van ngatan, ko omosoksok pētpeti."

## 7

### *Iesu ololi jinibb ne majingen san erres luwi*

<sup>1</sup> Daron nga Iesu musuw rengo nale sen, ko evel van rengo Kapaneam e. <sup>2</sup> Ko rengo ie, batu jinibb ne nuval san se mīeri Rom nir, jinibb ne majingen sen san nga mīmrreni milep emsi lengleng, otomori

pimij. <sup>3</sup> Ko ni ornge nga Iesu mīlik ie, ko ni okoni ßirterawarrang ne Isrel sopor paran parwerai tevi ni nga ni pivini puloli jinibb sen pīrres luwi. <sup>4</sup> Ko nir aran ji Iesu ko arngoni tertere nga ni pian, ko arwerai tevi, "Ni evi mīer nga mīrres pēlak. Kupini ko wor kuploli nanu nga muwrai ngel. <sup>5</sup> Ni emrreni jinibb ne vanu se kerr nir, ko ni eli naim ne loten se kerr." <sup>6</sup> Ko Iesu eptevir aran.

Ko daron nga martomori parjipari naim nen, ko batun ne jinibb nuval okoni selen sopor arivel tersele aran jin, nga parwerai tevi, "Numal, sete kuplokloksim. Inu sete nurres nga kupini rengo loloim suk. <sup>7</sup> Ko inu kele nurrorrmi sete erres nga inu bevinuk jim. Ko kupwerai bbong nale, ko jinibb ne majingen suk pīrres luwi. <sup>8</sup> Suri jinibb nga marlelep rengo inu arlingik rengo derteren, ko arlingi kele jinibb nuval arlik tevik. Ko poro bowrai tevi nga ngel 'Kupan,' ko ni pian ko wor; ko poro bowra tevi nir san kele, 'Kupini,' ko ni pivini ko wor; ko poro bowrai tevi jinibb ne majingen suk san, 'Kuploli nanu ngel,' ko ni puloli ko wor." <sup>9</sup> Ko Iesu etaol lengleng nale ngel nir daron nga murnger e. Ko erieni oklu emteni delung nga marvijuri, ko owra "Nuwrai tevi kami, sete nulesi nosurien nga milep mirpel wor san, ejki. Renge Isrel kele ejki rres nawon."

<sup>10</sup> Ko jinibb nga batu jinibb ne nuval nen mukonir arluwi van rengo ngaim; ko arlesi nga jinibb ne majingen nen erres pa osuw.

### *Iesu ololi bipiwarreng san nga mimij emaur luwi*

<sup>11</sup> Musuw wajin ko sete epriv ko Iesu evan kele rengo ngaim nga welili san nga nisen Naen. Ko jinibb sen nir arpitevi ni, ko delung elep kele wor arpitevi ni. <sup>12</sup> Ko daron nga maran mori rengo ngaim nen metali ne naworr nen, ko arlesi jinibb sopor marwosi tweni bipiwarreng san nga mimij, paran partevni. Bipiwarreng wel nen, tasu sen diwen sen emij lingi pa osuw, ko vinnen natun sansan wel nen ko pa. Ko delung elep nga rengo ngaim nen arpitevi vinnen. <sup>13</sup> Ko daron nga Numal mīlesesi vinnen, ko orrorrmi lengleng, ko owrai tevi owra "Sete kupting te pijki." <sup>14</sup> Ko oruj van mori ko ejpari drav nga mimatur rengen, ko jinibb nga marwosi artur murrong tevi. Ko owra "Nanwarreng, nuwrai tevim, kupmera!" <sup>15</sup> Ko mīer wela nga mimij emra ko elik, ko erij luwi. Ko Iesu ela lweni mīer wela tevi tasu sen.

<sup>16</sup> Ko jinibb jijle nolor arwun saute metutuen. Ko arsurövi Atua arwera

<sup>A 6:41</sup> Erpe iel, Luk ospe suri nanu nga muto re mete jinibb, ko kem namrieni nga namvijuri murrun ne rijen ne nale nga iel.

“Propet nga milep san otur imare renge livö renge kerr!”, ko arwera kele “Atua evini nga ðila mauren tevi jinibb sen nir.”

<sup>17</sup> Ko nosþen ne sev nga Iesu muloli ngok, jinibb nir arsupsuþe owl þetþeti renge Jutia ko renge vanu jille nga marto rrerrale ie.

*Jon Baptaes osusi rongorngge tevi Iesu*

<sup>18</sup> Jon jinibb sen nir arsuþe suri nanu ngel nir tevi, ko ni everuse jinibb sen eru orini jin. <sup>19</sup> Ni owrai tevi nuru poran ji Numal porwerai tevi, “Jon owra ‘Nik kuvi pa m̄er nga pivini le, rreknga kem nabtiriv malume san kele wor?’ ” Ko ni okoni tweni nuru.

<sup>20</sup> Daron nga morini ji Iesu ko orwera tevi, “Jon Baptaes okoni komru owra nobor-susi tevim, ‘Nik kuvi pa m̄er nga pivini le, rreknga kem nabtiriv malume san kele wor?’ ” <sup>21</sup> Ko renge daron nen ni ololi nir elep nga marmesi mesien lele nir arres luwi, ko ololi nem̄in nga marsij arivare arwolu lingi jinibb nga marsisilvir, ko ololi nir elep nga meter marrorr arkulkulu luwi erres. <sup>22</sup> Ko ni owra lweni tevi laru nga Jon mukoni nuru, owra “Kopor-vijuri lweni sel se kamru, kopor-luwi ko kopor-wera tevi Jon isevev nga komor-lesir ko komor-runger: Metrrore nir arkulkulu luwi erres, naroj nir arivel luwi erres, niber m̄im̄emaual nir arwokwok luwi, borwon nir arongrong luwi erres, jinibb nga marmij armaur luwi kele, ko ðeres nir arwerwer renge nosþen nga m̄irres tevir. <sup>23</sup> Ko inu nuwrai erpel, neiren renge m̄er nga sete m̄ilesi nanu san renge inu nga puloli ni purnge þisij rengen.”

*Iesu osþe suri Jon Baptaes mauren sen*

<sup>24</sup> Daron nga jinibb nga Jon mukoni nuru morivel lingir, ko Iesu etipatun osþe suri Jon tevi delung nir, owra “Bonevis daron nga kamiell tweni Jon renge lolo merwer e, kamwera kaplesi sev ko? Mavir san nga ling muwi petpate m̄ia? <sup>25</sup> Ia, kaman kamwera kaplesi sev ko? Jinibb san nga muri sunsun nga m̄im̄au m̄irres? Ejki rres nawon. Lartul nga maruri sunsun nga mirpok araan erres ko arlik renge laut se numal nir. <sup>26</sup> Ia, ko kami kamwera kaplesi sev? Propet san? O-o, ko inu nuwrai tevi kami, ni elep asi wore propet. <sup>27</sup> Merel ko Naul On muli suri nga Atua muwra ‘Kapmurrong, bokoni jinibb suk san nga puwowomu re Mesaea ko puloli sel se ni pimetet.’ <sup>28</sup> Ko inu nuwrai tevi kami, Jinibb jille nga mariak renge iel ngatan, sete san elep ase Jon. Ko m̄er nga ma muwelili renge batun vanu se Atua ko, ni elep asi wore Jon.” <sup>29</sup> Ko delung nir ko jinibb nga marok-la nevöt ne takis nir, daron nga marunge ko arir

ko arsurövi Atua. Suri nir arpaptaes pa renge baptaesen se Jon. <sup>30</sup> Ko Parasi nir ko jinibb nevisvisenien ne nale neseseiren nir armusus parvijuri sel se Atua nga muloli pa tevir, suri armusus parpaptaes bonevis renge baptaesen se Jon.

*Iesu erij tere jinibb nir nga renge daron sen*

<sup>31</sup> “Sev ko niko bowra viringsi dul nga lelingen ngel e nir? Ko nir arirpese le? <sup>32</sup> Nir arirpe bipiwarreng sopor nga marlik renge mesa nga m̄irres sopon, ko markikail marververuse seler nir parini jir partetnij; arwera ‘Namuwi nabbu tevi kami, ko kammusus kapsew; ko namla nuho ne mijen, ko kammusus kaptinj. Kammusus kaptetnij detnijen ne neiren, ko detnijen ne dauren.’ <sup>33</sup> Ko erpok, kami dul nga lelingenok kami kele kammususe murru komru kes, Jon Baptaes ko inu. Jon Baptaes evini ko eaan wowarreng bbong, ko sete ok-mini norro; ko kami kamwera ‘Nem̄in nga m̄isij elik rengen.’ <sup>34</sup> Ko inu jinibb Mawos nuvini ko nomok-aan ko nomok-minmini norro, ko kami kamwera ‘Kaplesi leorr lep ko lemni kis norro. Ni evi sele jinibb nga marok-la nevöt ne takis nir ko jinibb nga marsij nir.’ ” <sup>35</sup> Ko Iesu owrai tevir, “Ko norongwosien sete eplari re sel sansan, eplari wor re sel elep ko. Ko komru Jon, komru kes nomor-vijuri.”

*Nesevin nga m̄isij san*

<sup>36</sup> Ko mian ko Parasi san everuse Iesu nga pian þiaan tevi. Ko Iesu evan renge loloim se Parasi nen, ko esakel ngatan ko eaan tevi. <sup>37</sup> Ko nesevin san nga renge ngaim nen nga mauren sen m̄isij ornge nga Iesu m̄ilik renge naim se Parasi nen m̄iaan tevi. Ko vinnen ela botel senta san nga nowlin elep. Ko botel nen arloli nevöt e san nga nisen alapasta.

<sup>38</sup> Ko vinnen evini otur renge ðela Iesu renge duren ko eting, ko suwen meten arjumjum van renge ðela Iesu. Ko ela rao batun ko etwasi ðela Iesu e, ko orromji ðela Iesu, ko ejvi senta renge ðelan. <sup>39</sup> Parasi nga miveruse Iesu nga pivini þiaan tevi m̄ilesi, ko orrorrmi renge nolon owra “Merel poro weretunen pivi propet, ko purongwose ko nesevin nga mirpese le ngel nga mijpari. Nesevin ngel evi vin nga m̄isij!” <sup>40</sup> Ko Iesu owra lweni tevi, “Saemon, inu nuwra bowra nanu le san ngel tevim.” Ko Saemon owra “Numal, kupwera ko wor.” <sup>41</sup> Ko Iesu owra “Numal san, jinibb eru orloli nivnon jin. Ngok nuru tuwen ela nevöt evi ongut valim (500) jin nga muloli nivnon e. Ko nuru tuwen nen ela nevöt ngavöl elim (50) jin nga muloli nivnon e. <sup>42</sup> Mian ko nuru korti sete orviter nga porkele lweni tevi. Ko ni erres

tevi nuru, elinglingi nivnon nen nuru korti orjipon, setemun porkele. Ko renge nuru ngok, nuru ngabes nen ko pimrreni wore ni piasa jer renge nuru?"<sup>43</sup> Saemon owra lweni tevi, "Inu nurrorrmi nganga muloli nivnon milelep nen ko jin, ni ko pimrreni piasie wor." Ko Iesu owra lweni tevi, "Kuwra momsawose erres."<sup>44</sup> Ko ni erieni emteni nesevin ko owrai tevi Saemon, "Kulesi vinel? Inu nuvini renge naim som, ko nik sete kutkaik erres, sete kurrawe belak. Ko vinel ma errawe belak e suwen meten, ko etwasi jomro batun e belak nuru ormes."<sup>45</sup> Nik sete kurromji inu, ko vinel ma daron nga mevini loloim e ko orromji belak, sete omosie.<sup>46</sup> Nik sete kujvi oel renge inu batuk, ko vinel ma ejvi senta nga mürresresi asi oel renge inu belak.<sup>47</sup> Ko suri mirpel ngel ko niko nuwrai tevi nik, nololien se vinel nga muwun saut nutlasi twenir pa, niko mimrreni inu milep suri. Ko isi ko nga murrormi nololien sen muwelili bbong, poro mētasi tweni ni, pimrreni inu bbong puwelili rrek."<sup>48</sup> Ko Iesu owrai tevi nesevin nen, "Nololien som nir nutlasi twenir pa osuw."<sup>49</sup> Ko nir nga marsakel tevi nga maraan tevi arrorrmi lweni e lolor arwera "Merel evi jinibb se lev nga orongwos pītasi tweni nololien nir?"<sup>50</sup> Ko Iesu owrai tevi nesevin "Nosurien som ololi nik kumrres luwi. Kupiel, kupluwi renge demat."

## 8

### *Nesevin nga marok-pitevi Iesu*

<sup>1</sup> Nanu ngel nir arasi osuw, ko renge vitunen sapon vajin ko Iesu otutur sapon evan renge ngaim nga marlelep nir ko renge ngaim nga wewararang nir. Ko ni ewerwer renge nospen nga mürres tevi jinibb nir, ko jinibb sen nir esngavöl drromon eru arpatevi ni.<sup>2</sup> Ko nesevin sopor nga nemin nga marsij marivare lingir, ko sopor nga marres luwi pa renge mesien ser nir, ngok Merri ne Maktala, nga nemin nga marsij ebut marwolu lingi pa musuw,<sup>3</sup> Ko Joana nesen se Kusa nga mivi jinibb san ne majingen se Numal Erot, ko Susana, ko nesevin elep kele wor nga marok-la joror tevi Iesu ko jinibb sen nir.

### *Nale rrongrrongvi ne m̄er nga m̄ijjireni jelangin*

<sup>4</sup> Mian ko delung elep ne ngaim lele nir arini arkorti ji Iesu. Ko ni owra nale rrongrrongvi san tevi nir, owra<sup>5</sup> "Jinibb nga mok-jjireni jelangin evan nga pijjireni. Ko daron nga m̄ijjireni e, ko jelangin sopor arwij asi van renge dan ne sel e, ko jinibb arivel rer ko arverasi lokloksir, ko numón arow vini ko artasi twenir."<sup>6</sup> Ko sopor kele arwij asi van renge dan ne jerev e;

ko daron nga maretiv imare ko armeli ngavilvil, suri laŕer sete ejpari nuwi te ejki.<sup>7</sup> Ko sopor kele arwij van renge liven ne lolo moku, ko daron nga moku m̄iejal mimaur oreŕ, ko emelngir, sete armaur.<sup>8</sup> Ko sopor ma arwij van renge dan malum nga m̄ürres, ko aretiv armaur erres ko arwen, wener ongut (100)." Ko Iesu ekail owra "Mer nga boron mutoe purnge re nolo boron!"

### *Iesu owra tweni omomsawos erpese nga ni mutuw nale rrongrrongvi*

<sup>9</sup> Ko jinibb se Iesu nir arsuŕi tevi ni, arwera "Nale rrongrrongvi ngel owra puwra iseŕ ko?"<sup>10</sup> Ko ni owrai teŕir owra "Kami ma arlai teŕi kami nga kaprongwose nanu nga maro teptepi renge batun vanu se Atua. Ko nale rrongrrongvi ma arlai teŕi nir jille ngok nga parlesi, ko sete parlesi wose, ko parunge ko sete parongwose; suri batur eterter ko armusus nolor pulululwi."

### *Iesu owra tweni vajin nale rrongrrongvi lat nga muto suri*

<sup>11</sup> "Nale rrongrrongvi nen, nile erpel ngel. Jelangin nen evi nale se Atua.<sup>12</sup> Ngok, jelangin nga marwij van renge dan ne sel arirpe jinibb nga marunge nale, ko demij mivini m̄illa tweni renge nolor, nga puloli nir sete parosuri ko sete parmaur.<sup>13</sup> Ko jelangin nga marwij van renge dan ne jerev arirpe jinibb nga marunge nale, ko arir nga parlai. Ko norrorrmien nen nga pirpe laŕe nai nga purrul totkoni renge nolor ejkie. Arosuri bebŕen, mian ko sete epriv daron nga nanu nga purrowrowe mivini, ko arŕitan.<sup>14</sup> Ko jelangin nga marwij van renge lolo moku arirpe jinibb nga marunge nale, ko marvijuri suri wor sel ser; ko norrorrmien ser, ko joror nir, ko nanu lele nga marmerrrenir renge mauren ser nir armelngir, ko sete arwen e wenen nga marres sopor.<sup>15</sup> Ko jelangin nga marwij van renge dan malum nga m̄ürres, arirpe jinibb nga nolon muwretun ko m̄ürres, ornge nale ko otori eterter ejpari nga m̄ilai wenen.

### *Laet nga martepŕis ore biles e*

<sup>16</sup> "Sete jinibb san orrunsi laet ko p̄ila biles piteplis ore e, rreknga p̄ilai p̄ilingi renge melve maling, ejki rres nawon. Pilingi ko wor mare renge lat nga mok-jinget rengen. Ko ngok jinibb nga parini renge loloim parlesi moron.<sup>17</sup> Nanu san sete orongwos piteptepi rragrag nga sete pia-pelari limjer, rreknga nanu tama san nga muto silsilveni nga sete orongwos pipari renge moron, ejki rres nawon. Nanu jile nga marirpok parpelari ko wor renge moron.

<sup>18</sup> “Kapmetmet renge nale suk nga kami kamok-runger. Poro nga jinibb pisan putor totonir, ko ngok m̄nernen Atua p̄ilai kele ko wor tevi. Ko poro jinibb san setete putori totonir, ko ngok m̄nernen Atua p̄ilai tweni ko ji ni sev nga murrormi mutori totoni.”

*Iesu tasu sen ko tasin nir arini parlesi ni*

<sup>19</sup> Iesu tasu sen ko tasin nir arini nga parlesi ni; ko sete arongwose paran jin mori te ejki, suri nga delung elep p̄elak. <sup>20</sup> Ko arwerai tevi Iesu, “Tasu som le ko tasim, nir le ngel vare armerreni parlesi nik.” <sup>21</sup> Ko Iesu owra lweni tevi nir, “Tasu suk ko tasik nir arivi nir nga marunge nale se Atua ko marosuri.”

*Iesu ewer ore ling serser nga mitewut milep san renge nuwito*

<sup>22</sup> Mian ko renge nabong san, Iesu owrai tevi jinibb sen nir, “Kerr puwlu asi van renge devje nuwito e.” Ko nir arsa re drrav ko arwolu van. <sup>23</sup> Ko daron nga marwolu e, ko Iesu ematurrwel. Ko ling serser nga milep san etewut eterter vini re nuwito, ko ejpari drrav ser. Ko nuwi ejjivi van renge nolo drrav, ko dungun elep nga elep; otomori parron, ko nolor opotpot e elep. <sup>24</sup> Ko aran ji Iesu ko arwuni arwera “Numal! Numal! Rrapmij le pa!” Ko ni emra ko ewer ore ling ko daptap ne nuwi nga marbburbbur milep marjivivi vini re drrav, ko nuru korti ormosi orsuw. Ie omol nawon vajin. <sup>25</sup> Ko Iesu owrai tevir, “Nibeni le nosurien se kami?” Ko nir armetutu ko artaol lengleng, ko arwerwai tevi nir lululweni arwera “Isi le ngel, ni ewer ore ling ko nuwi ko nuru orange ni?”

*Iesu oji tweni demij nir renge jinibb ne Gerasa san*

<sup>26</sup> Ko nir arwolu toku renge bongsin san renge vanu se m̄eri Gerasa nir renge nuwito. Ko Galili oto luwi van devjen e renge bongsin nen. <sup>27</sup> Ko daron nga Iesu mujubbul mian ngaut e, ko jinibb ne ngaim nen san evel vini ko esewute. Mernen demij arsisilvi, ko epriv pa nga sete mun ok-uri sunsun; ko setemun elik renge ngaim, ko ok-lik pa renge dubb ko, lat nga martivtavin e. <sup>28</sup> Ko daron nga m̄ilesi Iesu ko ekail van mare ko ejipa van ngatan renge non, ko erij drrelan ean mare jer owra “Sev som oto ni le iel, nik Natu Atua ne Drromsen Mare? Nungoni tevi nik sete kuplokloksik!” <sup>29</sup> Owrai erpok suri Iesu owrai pa tevi nem̄in nga m̄isij pivare lingi m̄nernen. Nabong elep bonevis mivini mijpari lelingenok nga nem̄in nga m̄isij mok-wowomue. Ko ewretun jinibb nir arsere nevren nuru ko belan nuru tevi dil

delrurr nir, ko ni ok-rerrerresir armotot. Ko nem̄in nga m̄isij okjeli van lolo merwer e. <sup>30</sup> Ko Iesu osusi tevi, “Nik nisen si?” Ko owra “Delung,” suri demij elep arsisilvi ni. <sup>31</sup> Ko demij nir arngoni tevi Iesu arwera “Warru sete kupkoni kem naban renge bbulwil nga nabbön mijkie, pijki!”

<sup>32</sup> Ko renge ie meling berper nga milep san arok-susung bbong renge jeljeli botwen. Ko nem̄in nga marsij arngoni tevi Iesu nga ni p̄ilinglingi nir parsilvi berper nir. Ko ni elinglingir. <sup>33</sup> Ko nem̄in nga marsij arivare lingi mer nga ko aran arsilvi berper nir. Ko berper nir arwolu jubbbubbul van renge jeljeli nuwito ko arowrow jubbbubbul van ngatan e renge nuwito, ko arron.

<sup>34</sup> Ko daron nga lartul nga maruwngani berper maroka-lesi sev nga miplari, ko arwolu van arwerai renge ngaim nga milep ko ngaim nga wewarrens nen nir. <sup>35</sup> Ko jinibb ne ngaim nen nir arivel tweni van, parlesi ivese nga miplari nen. Ko arini ji Iesu ko arlesi m̄er nga nem̄in nga marsij marivare rengen elik ngatan renge bela Iesu. Norrormien sen erres vajin, ko ori vajin sunsun. Ko daron nga marlesi, ko nir jille armetutu lengleng. <sup>36</sup> Ko nir nga marlesi nanu ngel nga Iesu muloli arsupe suri tevir erpese nga Iesu muloli pa mer nga nem̄in nga marsij marsilvi m̄irres luwi. <sup>37</sup> Ko nir jille nga marlik renge Gerasa ko nga marlik rrerale ie arsurtoni tertere Iesu pavel lingi vanu ser, suri armetutu elep. Ko Iesu evan esa van renge drrav, ko drrav etipatun nga puwlu. <sup>38</sup> Ko m̄er nga nem̄in nga marsij marivare lingi ongoni tevi Iesu nga poro nga ni piptevi ni. Ko Iesu okoni lweni owra <sup>39</sup> “Kupluwi van renge ngaim som e, ko kupwera sev nga Atua muloli pa tevim.” Ko m̄nernen evan renge ngaim jile nir ko ospe suri sev nga Iesu muloli tevi ni.

*Iesu ololi nesevin san nga drran muto m̄isij erres luwi, ko nesenwarrens san emaur luwi kele*

<sup>40</sup> Daron nga Iesu mian mijpari renge devje nuwi e, ko delung nir artur terai ko pa parwera erres tevi ni renge nga mivini, suri nir artiriv ko pa terai. <sup>41</sup> Ko jinibb san nisen Jaeras, evi jinibb nga mok-metmete naim ne loten, ni evini ji Iesu ko ejipa van ngatan renge bela Iesu ko ongoni tertere nga Iesu pivini renge naim sen. <sup>42</sup> Ni natun sansan bbong, ko evi nesevin, sian esngavöl drromon eru. Ko vin wel nen ematur renge maling, otomori pimij pa. Ko daron nga Iesu mian e ko delung elep arvijuri suri ni ko arlilji ni.

<sup>43</sup> Ko nesevin san nga mesien se nesevin nir ololi tetajer renge sia esngavöl

drromon eru. Vinnen olokloksi pētēpeti joron nir nga mīlŋgir tevi dokta nir, ko sete san orongwos puloli ni pīrres. <sup>44</sup> Ko vinnen esilvi delung nir reŋge Iesu duren vitu nen e, ko evini morie, ko ejpari bongsi sunsun sen. Ko ngavilvil mesien nga muloli vinnen drra nen emes evesane. <sup>45</sup> Ko Iesu owra “Isi mijparik?” Ko nir jijle arwera ejki, arvilvil ore. Ko Pita owra, “Numal, delung elep arututir mori nik ko arliljim.” <sup>46</sup> Ko Iesu owra “Ejki, san wor ejparik, suri nurŋge reŋge nibek nga derteren evel lingik.” <sup>47</sup> Ko vinnen elesi nga nanu nga muloli oto pa limjer, ko eririr lengleng ko evan ko ejipa ngatan reŋge no Iesu, ko ewer telasi reŋge no delung nir sev ko ololi nga ni mijpari Iesu bongsi sunsun sen, ko erpeŋe nga ni mīrres ngavilvilŋsen. <sup>48</sup> Ko Iesu owra tevi, “Natuk, nosurien som ololim kumrres jile. Kupiel reŋge demat.”

<sup>49</sup> Ko daron nga mok-rij malum e, ko jinibb san evel ko ewit lengleng reŋge naim se Jaeras vini, ko owrai tevi Jaeras, “Natum nesenwarreng emij pa osuw. Kупlingiŋgi Numal, sete kupkarkar reŋgen.” <sup>50</sup> Ko Iesu orŋge, ko owrai tevi mīrnen “Sete kupmetutu, sansan kobbong kuposuri, ko nesenwarreng pimaar luwi ko.”

<sup>51</sup> Ko daron nga marini reŋge naim e ko Iesu ewer ore jinibb nir san sete pivijuri van loloim, sansan kobbong Pita ko Jon ko Jemes ko tata se nesenwarreng ko tasu sen wor. <sup>52</sup> Ko jinibb nir artengsi vin wel nen, drrelar elep. Ko Iesu owra “Sete kaptiŋg, nesenwarreng sete emij te ejki, ematur kobbong.” <sup>53</sup> Ko lartul nen nir armen keraji e, suri arongwose nga nesenwarreng wel nen emij pa osuw. <sup>54</sup> Ko ni esaro ko orrul re nevre nesenwarreng ko everuse owra “Nesenwarreng, kuptur imare!” <sup>55</sup> Ngavilvilŋsen mauren sen olwi van reŋgen ko otur imare. Ko Iesu owrai tevir nga parla nanen sopen tevi purroi. <sup>56</sup> Ko tata sen ko tasu sen bbōsa nga milep elai nuru e. Ko Iesu ewer ore nuru nga sete porwerai nanu ngel tevi jinibb pisan, pijki.

## 9

*Iesu okoni jinibb sen esngavöl drromon eru aran parwerwer*

<sup>1</sup> Ko Iesu everus kortoni jinibb sen esngavöl drromon eru arini korti jin, ko ela derteren tevir nga paroji tweni nemīn nga marsij nir, ko parloli jinibb nga marmesi nir parres luwi reŋge mesien ser nir. <sup>2-3</sup> Ko ni ewer orer owra “Sete kaptori nanu pisan reŋge nivelen se kami reŋge sel, pijki; nejipij pijki, narr pijki, nanen pijki, nevöt pijki; ko sete kaptori sunsun pieru.

Ngabe nga kami kapan reŋgen, kapan reŋge naim, ko kaplik reŋge naim nen ko pa pijpari daron nga kapiel e. Ko poro reŋge ngaim san jinibb nen nolor pīterter, sete parlai kami pijki, ko ngok daron nga kami kapiel lingi ie, erres kapwirwirrleni tweni maw nga muto re but se kami, nga piviseni tevi nir nga marloli mīisij.” Ko ni okonir van parwerwer tevi jinibb nir suri batun vanu se Atua, ko parloli jinibb nir nga marmesi parres luwi reŋge mesien ser nir. <sup>6</sup> Ko nir arivel lingi, aran reŋge ngaim nir ko arwerwer reŋge nospēn nga mīrres tevi jinibb nir, ko reŋge iok jile arloli jinibb arres luwi.

*Numal Erot Antipas ošpe suri Iesu*

<sup>7</sup> Ko Erot Antipas evi numal ne Galili, ko orŋge nanu nga marpelari ngok nir nga Iesu mulolir. Ko nolon ekarkare elep, suri orŋge jinibb sopen arwera “Ngok Jon Baptaes ko otur imare luwi reŋge mijen.”

<sup>8</sup> Ko nir sopen arwera “Elaeja ko miplari ngok,” ko nir sopen kele arwera “Propet ko san nga tuwi emaur luwi kele.” <sup>9</sup> Ko Erot owra “Jon Baptaes, inu nuta otvi pa batun, ko si kele le ngel, nga inu morŋge kele nanu ngel kele nir suri mirpel?” Ko ni emrenni lenglengle pīlesi Iesu, pījiljilwer sopen tevi.

*Aposol se Iesu nga mukonir maran marwerwer arlululwi vini jin*

<sup>10</sup> Ko aposol nir, daron nga marlulwi vini ji Iesu, ko arsupe suri sev nga marlolir tevi ni. Ko ni eptevir arsan aran reŋge ngaim e san nga nisen Betsaeta. <sup>11</sup> Ko delung arongwose, ko arvijuri suri ni; ko ni owra erres tevir nir, ko ošpe suri batun vanu se Atua tevir, ko ni ololi nir sopen nga marmerrreni parres luwi arres.

*Jinibb evi nuvasngavöl valim (5000) Iesu ela nanen tevir*

<sup>12</sup> Ko nat erivriv pa otomori nial piwaj pini, ko jinibb sen nir esngavöl drromon eru arini jin ko arwerai tevi ni, “Kupkoni tweni jinibb nir parivel, ko paran reŋge ngaim nga wewarreng nir ko ngaim nga marlelep nga marto karkar ngok nir, ko parmatur ko parla nanen ser. Suri iel lat nga rramlik e ngel evi lolo merwer le.” <sup>13</sup> Ko ni owrai tevir, “Kami ko kapla nanen tevir parurroi.” Ko nir arwerai tevi, “Kem namtori bbong niv elim ko nai eru. Ko poro pipok ko kem naban nabwuli nanen ser kele wor, suri delung.” <sup>14</sup> Suri jinibb elep, evi nuvasngavöl valim (5000) totoklai nga marlik ie marunge nale se Iesu. Ko Iesu owrai tevi jinibb sen nir, “Kaploli jinibb parlik ngatan pivi meliŋg. Ko kaplingi nir pingavöl pilelmi (50) parlik reŋge meliŋg sisamis.”



<sup>15</sup> Ko nir arloli surie erpe nga muwrai ngok, arloli arlik ngatan. <sup>16</sup> Ko Iesu ela niv nga elim nga nir ko nai nga eru nga ka esarrerr imare emteni melrin, ko olot erij erres surir; ko obbri otvi niv nga nir ko nai nga nuru, ko elai tevi jinibb sen nir. Ko nir arlilai tevi jinibb nir. <sup>17</sup> Ko nir jile arurroi, ko nir jile arup. Ko jinibb se Iesu nir arsere lweni bebje niv nga marurroi linglingir ko nai nga marurroi linglingir van renga narresngavöl drromon eru arwun saut er.

*Pita owra tweni nga Iesu evi Mesaea*

<sup>18</sup> Mian ko nabong san Iesu kis bbong oklot, ko jinibb sen nir arini jin. Ko ni osusi tevir owra "Jinibb nir arwera inu nuvi isi?" <sup>19</sup> Ko nir arwera lweni tevi ni, "Sopor arwera Jon Baptaes, ko sopor arwera Elaeja, ko sopor arwera propet nga tuwi san emaur luwi kele." <sup>20</sup> "Ko kami kamwera inu nuvi isi?" Ko Pita owra lweni tevi ni, "Nik kuvi Mesaea se Atua." <sup>21</sup> Ko Iesu osur terter tevi nir nga sete parwovrai nale nen tevi jinibb pisan. <sup>22</sup> Ko owra "Jinibb Mawos purnge wor pisij ko renga nanu pilep, ko Birterawarreng nir, ko batu jinibb ne sulsulen nir, ko jinibb ne nevisvisenien ne nale neseseiren nir parungasi ni, parevji pini. Ko nabong pitul ko pimaur luwi kele."

*Jinibb se Iesu putor ore wor nanu nga ni mimrreni ko*

<sup>23</sup> Ko Iesu owrai tevi jinibb sen nir, "Poro jinibb san puwra pivijurik, ni putor ore nanu nga ni bbong mimrreni, ko nabong jile puwosi nai pelaot sen ko pivijurik. <sup>24</sup> Ko poro san puwra putor totoni mauren sen, mian ko pia-tor jabble; ko poro nga san pimaronge mauren sen suri mivijuri inu, ko mian ko pia-lai vajin mauren nga mirres. <sup>25</sup> Poro jinibb pisan pia-lai petpeti nanu ne iel ngatan ngel nir, ko putor jabble mauren sen pijijki, ko jilesi sev ko pirres rengen? <sup>26</sup> Ko isi san poro pimanune inu ko nale suk nir, ni kele Jinibb Mawos pimanune ni renga daron nga ni pia-vini e renga nosrovien se Tata sen tevi anglo on nir. <sup>27</sup> Nuwretun nuwrai tevi kami, sopor renga kami nga kamtur ngel setewor kaplesi mijen ko kaplesi batun vanu se Atua pivini."

*Iesu niben erieni enij kele e*

<sup>28</sup> Nabong owil asi osuw, vitunen ko Iesu ela Pita ko Jon ko Jemes arpitevi ni. Ko nir kis arsan artongsa van renga botwen nga ni pulot. <sup>29</sup> Ko renga daron nga mulot e ko non erieni enij kele e, ko sunsun sen owraprap titis. <sup>30</sup> Ko jinibb eru orpelari ie, Moses ko Elaeja, nuru orok-jiljilwer tevi ni. <sup>31</sup> Nuru orremali renga nosrovien ne melrin, ko orsupé suri mijen

sen nga otomori piplari Jerusalem. <sup>32</sup> Ko Pita ko laru nga morpitevi armatur pa, suri meter arruwel temijjal. Mian ko artaol ko arkulu vajin van ji Iesu e, ko arlesi nosrovien sen ko laru nga mortur pa tevi ni. <sup>33</sup> Mian ko laru nga ortipatun porivel lingi Iesu, ko Pita owrai tevi Iesu, "O, Numal, erres ma kem namlik pa iel; kem nabloli gorkoraim pitul, san pivi se nik, ko san pivi se Moses, ko san pivi se Elaeja." Ni owrai ma, ko errerrenge nale nga muwrai. <sup>34</sup> Ko daron nga mok-rij malum e mokerwai nanu ngel nir, ko nabor san esal vini esalsal orer, ko nir artur vajin renga namol nen. Ko armetutu elep. <sup>35</sup> Ko renga nabor nen drrelan san eplari rengen owra "Ni evi natuk nga memrreni, ko ni ko motobbtobbue. Kami kaprunge ni."

<sup>36</sup> Ko renga daron nga drrelan musuw, ko arlesi Iesu esan vajin. Ko sete arwowra nanu ngel tevi jinibb san renga nabong nen nir, armurrarrong ore ko pa.

*Iesu oji tweni demij renga nanwarreng san*

<sup>37</sup> Ko renga mevinen vajin nir arjubbul renga botwen, arluwi vini ngatan e. Ko delung elep arivel ore arini jin arlesi. <sup>38</sup> Ko jinibb ne delung nen san everus owra "Jinibb nevisvisenien, natuk sansan welele pa, ko nungoni nik, warru kupini kuplesi ni ta. <sup>39</sup> Ko kuplesi, nabong sapon nerin san esilvi ni, ko enger nga enger lengleng, ko eririr nga eririr ko melabbsen eia. Ko nerin nen eterter elep renga pivare lingi ni, ko ololi niben arerer elep. <sup>40</sup> Ko nungoni jinibb som nir paroji tweni, ko sete arongwos parloli." <sup>41</sup> Ko Iesu owra lweni tevir, owra "O, aro, kami dul ngel nosurien se kami ejkie! Belik tevi kami pijpari wor seveling, ko bololi nanu tevi kami?" Ko owrai tevi nernen, "Kuptekai natum vini iel ta." <sup>42</sup> Ko mer wel nga daron nga mivel malum e vini, ko nerin nga evivivrrule elep ko ololi ewajeni lengleng ngatan, ko ololi niben aririr elep. Ko Iesu otortori nerin nga misij nen ko ololi mer wel nga erres luwi, ko ela lweni tevi tata sen. <sup>43</sup> Ko nir jile bbösa nga milep elair e suri nanu nga mulolir renga derteren nga milep se Atua.

*Iesu owra lweni kele tevir mian ko ni pimij*

Ko daron nga bbösa milair malum e suri nanu nga mulolir ngel nir, ko Iesu owrai tevi jinibb sen nir, owra <sup>44</sup> "Nale nga bowrai ngel nir, kaplingi pian renga nolo boro kami nir ko kaprorrmir. Inu Jinibb Mawos partekai inu van renga nevre jinibb nir." <sup>45</sup> Ko jinibb sen nir arrelenge nale nga Iesu muwrai ngel lat nga muto suri. Atua esilveni renger nga

sete parongwose, ko nir armetutue parsusi lweni tevi ni.

*Isi pivi jinibb nga milep jer nen renge nir*

<sup>46</sup> Ko jinibb se Iesu nir arok-rij latlat lulweni tevir suri isi pivi jinibb nga milep jer renge nir. <sup>47</sup> Ko Iesu orongwose sev nga muto renge nolor, ko etkai bipiwarreng nga welili san ko elngi otur renge nelin devjen. <sup>48</sup> Ko ni owrai tevir, "Isi nga pitkai bipiwarreng nga welili san nga mirpel ngel renge inu nisek, ko erpe etkai inu ko pa. Ko isi nga mitkai inu, erpe sete etkai inu ko, ko etkai ni nga mukoni inu ko. Mer nga mivi jinibb nga welili jer nen renge kami, ko ngok ni ko evi jinibb nga milep jer nen."

*Mer nga sete mitre kami ko ngok ni evi kerrkerr ko*

<sup>49</sup> Ko Jon owrai tevi owra "Numal, namlesi jinibb san oji tweni demij san renge jinibb san renge nik nisek. Ko namwer ore, suri nga ni sete evijuri kerr." <sup>50</sup> Ko Iesu owrai tevi ni, owra "Sete kapwer ore ni. Mer nga sete mitre kami, ko ngok ni evi kamikami ko."

*Iesu etipatum pivijuri sel nga pian Jerusalem e*

<sup>51</sup> Mian ko otomori nabong nga Atua pitka lweni Iesu van mare e renge melrin, ko ni elngi non eterter evijuri sel van renge Jerusalem e.

*Meri Sameria armusus Iesu pian renge vanu ser*

<sup>52</sup> Ko Iesu okoni wowomu ngarre jinibb sopor nga marivi ni non, ko nir arivel aran renge ngaim san se meri Sameria nir nga parloli lilane ngarre tevi ni. <sup>53</sup> Ko nir armusus nga ni pivini renge vanu ser, suri ni elngi non emawos van Jerusalem e. <sup>54</sup> Ko daron nga jinibb sen ngel nuru Jemes ko Jon morunge, ko orwerai tevi, "Numal, kumarong komru nobor-werai nabb pivel renge melrin vini pianir?" <sup>55</sup> Ko ni erieni ko otortori nuru. <sup>56</sup> Ko nir setemun aran re ngaim nen, arivel asie van renge ngaim minij kele e san.

*Jinibb sopor armerreni parvijuri Iesu*

<sup>57</sup> Ko daron nga marivel suri sel malum, ko jinibb san evini ko owrai tevi Iesu, "Ngabe tama nga poro kupa-van e, ko inu bevijuri nik ko wor." <sup>58</sup> Ko Iesu owrai tevi, "Guli rrum nga wovarreng nir belaur ote, ko numon nir menuner ote; ko inu Jinibb Mawos milngek ejkie. Ngok, kuprormi nun pirres poro nga kumrreni kupvijuri inu."

<sup>59</sup> Ko mian ko Iesu owrai tevi jinibb minij nen san, "Kupvijuri inu!" Ko minnen owrai lweni tevi owra "Numal, kuplinglingik mun bean betevni tata suk puwomu." <sup>60</sup> Ko Iesu owrai tevi minnen owra "Kuplinglingi lartul nga sete marla mauren ko pa partevni nir nga marmij ser, ko nik kupan kupwerai batun vanu se Atua tevi jinibb jile nir."

<sup>61</sup> Ko nir minij nen san owrai tevi, "Beavijuri nik ko, Numal; ko kuplinglingik mun puwomu bean beremse nir nga marlik renge naim suk." <sup>62</sup> Ko Iesu owrai tevi, "Jinibb nga miale drav pulku van womue tetajer, sete pulku vitu kele. Mer nga mirpok sete erres renge batun vanu se Atua."B

## 10

*Iesu okoni tweni jinibb sen ngavöl ebut drromon eru (72) aran parwerwer*

<sup>1</sup> Vitunen renge nanu ngel nir marsuw vajin, ko Numal tobbtobbue nir minij kele sopor arivi jinibb sen. Nir ngavöl ebut drromon eru, ko ni okoni tweni nir ererwi arivel arwowomu renge ni van renge ngaim ko vanu jile nga ni pia-vivitu van renger. <sup>2</sup> Ko owrai tevir, "Lelingen ngel evi daron ne numos nga milep, ko jinibb nga marmajing rengen nir ewelili jer. Ko ngok kami kaplot, kapngoni pitertter tevi Numal ne numos nga ni pukoni kele jinibb ne majingen sen sopor nga parmajing renge orsel ne numos sen. <sup>3</sup> Kapiel, ko kaprongwose nga inu nukoni tweni kami kamsan kis kamirpe natu sipsip nir renge sel, paran renge livö ne guli rrum nir. <sup>4</sup> Sete kaptori baos rreknga narr rreknga but se kami, pijki; ko sete kaprij tevi jinibb pisan renge sel, pijki. <sup>5</sup> Ko renge naim ngabe nga kami kajan renge loloim nen, nanu womujnen nga kapwerai kapwera 'Demat puto renge naim ngel.' <sup>6</sup> Ko poro jinibb ne demat san pilik renge naim nen, ko ngok demat se kami pijon jer jin. Ko poro pijki, ko ngok pulwi kele vini ji kami e. <sup>7</sup> Ko renge naim mawos nen ko pa kami kaplik malum pa rengen ko. Sete kapan kele renge naim lele e nir, pijki. Ko kapro nanen sev ko kapmini nuwi sev nga marlair tevi kami. Suri erres nga jinibb ne majingen pila nowlin. Sete kapan renge naim ko naim. <sup>8</sup> Ko renge ngaim ngabes nen nga kami kapa-pelari rengen, ko poro jinibb nen nir parir nga partekai kami kapan jir, ngok kami kapurroi sev nanen ko nga nir parlair parlingi renge no kami. <sup>9</sup> Ko kami kaploli jinibb nga marmesi renge ngaim nen parres luwi renge mesien ser.

B 9:62 Erpe iel, Luk ospe nanu san nga mok-kiri dan nga buluk mirvei, ko kem namrieni nale nga puloli mining ne nale sen piplari limjer.

Ko kapwera tevi nir jile, 'Lelingen ngel batun vanu se Atua evini mori pa vajin ji kami.' <sup>10</sup> Ko renge ngaim ngabes nen nga kami kappelari rengen, ko poro jinibb nen nir sete parmarong nga partekai kami van jir nga kaplik tevir, ko ngok kapivare kapini renge sel ne ie ko kapwera <sup>11</sup> 'Erpe maw kele ne ngaim se kami nga mibbölji ßela kem, namtwasi twenir etre kami. Ko kaprongwose mae nanu ngel: Batun vanu se Atua evini mori pa ji kami.' <sup>12</sup> Nuwrai tevi kami, renge daron nga Atua pia-wera suri lat nga puto suri re jinibb jille, ko pi-asij wor pilep renge nir ne ngaim ngok pi-asie Sotom.

*Iesu otortori jinibb nga sete marosuri ni*

<sup>13</sup> "Wi kami mēri Korasin! Wi kami mēri Betsaeta! Kami nga kamok-ungasi jinibb ne vare nir, erpe mēri Taea ko mēri Saeton nir. Ko poro nga nelesien ngel nir nga mololir ngel nir nga kami kamlesir, poro parlolir pa renge Taea ko Saeton, ko jinibb ne iok nuru, nolor pululwi pa tuwi nen renge nololien ser, ko paruri sunsun tera nga marmerrmerris nir, ko parlik renge niavi nabb parpēpalos e, parviseni nga arrorrmi nanu nga marsij nga marloli sarrsarre nir. <sup>14</sup> Niko renge daron nga jinibb jile nir ne iel ngatan, Atua pia-wera suri lat nga puto suri rer, ko piator vitrang kami piāsie nga putor vitrang mēri Taea ko Saeton. <sup>15</sup> Ko kami mēri Kapaneam nir, kami kamok-wera kami ma kamres kapan renge melrin, ko ejki rres nawon. Kami parwirr tweni kami van renge bbulwil nga nabbön mijkie."

<sup>16</sup> Ko ngok Iesu owrai tevi jinibb sen nir owra "Mer nga murnge kami ko ngok erpe ornge inu ko, ko mēer nga mungasi kami ko ngok erpe ongasi inu ko. Ko mēer nga mungasi inu ko ongasi mēer nga mukoni inu ko."

*Jinibb se Iesu nir ngavöl ebut drromon eru arlulwi vini jin*

<sup>17</sup> Ngok nir ngavöl ebut drromon eru (72) arlulwi vini tevi neiren nga milep, ko arwerai tevi Iesu, "Numal, demij kele nir arunge drrela kem ko arloli nanu nga namwerrair renge nik nisem." <sup>18</sup> Iesu owrai tevir "Ok-irpok, ko inu numteni renge metek daron nga demij muwlu lingi melrin erpe navil evil." <sup>19</sup> Ko Iesu owrai kele tevir, "Kaplesi, inu nulai pa derteren tevi kami osuw. Asi pētpeti derteren se demij nir. Ko ngok niko, kami kamrongwose kapverasi nuñet ko netu nuñet, ko nanu san ejki rres nawon nga orongwos pulokdoksi kami. <sup>20</sup> Ko niko sete kañir suri nga nerñin nga marsij marloli nanu nga kamwerrair, ko kañir ma suri nise kami Atua olir renge naul ne melrin."

*Iesu eir elep ko owra erres tevi Tata sen*

<sup>21</sup> Renge wosenen, Nerñin On loloi Iesu nolon owun saute neiren, ko owra "Tata, nuwra erres tevi nik, O Tata Numal ne melrin ko iel ngatan, nga nik kumloli nanu ngel nir marto teptepi renge jinibb nga norongwosien ser milep ko nir nga marongrongwos milep, ko kuviseni tevi nir nga marivi bipi kobbong. Niko Tata, erpe erres ko wor renge nom." <sup>22</sup> Ko owra "Tata suk ela nanu pētpeti nir tevik, ko sete san orongwose rragrrage norrorrmien se inu, natun mawos. Tata suk kobbong esan bbölbööl orongwose. Ko sete san orongwose Tata suk, inu kobbong nga mevi natun mawos, ko nir nga inu motobbtobbue nir, nir kele arongwose." <sup>23</sup> Ko Iesu erieni mawose jinibb sen nir ko owra malum bbonge tevi nir kis bbong arunge, owra "Neiren renge nir nga marlesi meter e nanu nga kami kamlesir ngel nir. <sup>24</sup> Nuwretun nuwrai tevi kami, propet elep, ko numal nga marlelep owun saut armerreni parlesi nanu ngel nir nga kami kamlesir ngel, ko setete arlesir te, ko arwera parunge nanu nga kami kamrunger ngel, ko setete arunger te."

*Nale rrongrrongvi ne mēri Sameria nga mīrres*

<sup>25</sup> Ko jinibb ne nevsivsenien ne nale nesereien san otur mera ko owra purrowrowe Iesu, owra "Numal, inu boloi isev ko, ko ßela mauren nga tuwi ngok vini?" <sup>26</sup> Ko Iesu owra lweni tevi, "Naul On owra sev re iok? Kueve kulesi owra erpese?" <sup>27</sup> Ko mēernen owra lweni tevi Iesu, "Ko Naul On owra 'Nik kupmerreni Numal Atua som tevi nolom totoklai, ko mauren som totoklai, ko derteren som totoklai, ko tevi norrorrmien som totoklai; ko kupmerreni selem pirpe nik mawos.'" <sup>28</sup> Ko Iesu owra lweni tevi mēernen, "Nik kuwrai erres pēlak ko; ko nik kuploli piprop ko, ko kuplai mauren nga mutoto tuwi ngok vini." <sup>29</sup> Ko jinibb nevisvisenien ne nale nesereien emrreni wor piviseni nga ni mumomsawos, ko osusi kele tevi Iesu owra "Ko isi ko evi selek nen?"

<sup>30</sup> Ko Iesu owra lweni tevi renge nale rrongrrongvi ngel: "Jinibb san ojubbul Jerusalem van ngatan e Jeriko. Ko daron nga mivijuri sel mivini ko etaole jinibb venao nir marpelari jin. Ko arrul totoni ko arla joron nir, ko arevji emijmij, ko arivel lingi ematur jer renge jeli sel otomori pimij. <sup>31</sup> Mian ko sete epriv ko jinibb ne sulsulen san ojubbul kele renge sel nen vini. Mivini ko elesi mēernen; ko etaalev van renge devje sel e, ko easie evel lingi. <sup>32</sup> Ko erpok kele renge Livaet san. Ni kele evini, evini kele renge lat nen ko elesi

mñernen kele. Ko etalev kele van renge devje sel e, ko asie evel lingi. <sup>33</sup> Vitunen vajin ko mñeri Sameria san evel vini evijuri sel nen kele. Mivini renge lat nen, ko elesi mñernen mimatur mutomori pimij, ko orrorrmi lengenge. <sup>34</sup> Ko evan jin, ko ela oel ko norro, etwasi vaseni niben nga marmetmetvir e nir ko ekai orer. Ko owosi elngi esakel mare renge dongki sen, ko elai van renge naim san nga marok-mosi rengen, elngi elik rengen ko emetmete. <sup>35</sup> Ko renge mevinen renge rorpong susu nen vajin, ko oroni tweni nevöt sopor ko elair tevi mñer nga naim sen nen, ko owrai tevi, 'Kupmetmete mñerel ko pa iel. Ko poro nga kupa-lokloksi kele nevöt som sopor rengen, ko ngok daron nga bea-luwi vini ko bea-kele lweni tevim.' <sup>36</sup> Ko Iesu owrai tevi mñer nga mususi tevi nga, owra "Nik renge norrorrmien som, kurrorrmie erpese renge nir nga itul ngok? Kurrorrmie nir si nen ko erpe pivi selen e mñer nga jinibb venao marevji ngok?" <sup>37</sup> Ko mñernen owra "Rrek mñer nga murrorrmie ni nen ko." Ko Iesu owrai tevi mñernen, "Kupiel, ko kupan kuploli pirpok."

*Iesu evan renge ngaim se nesevin eru*

<sup>38</sup> Ko nir artutur suri sel ko arini renge ngaim san. Ko nesevin ne ie san, nisen ewajie Marta, vinnen etkair aran renge naim sen. <sup>39</sup> Ko vinnen tasin san nisen ewaji Merri. Ko Merri nen evini ko elik ngatan ji Iesu morie ðelan, ko omur-rarrong nale se Iesu nir. <sup>40</sup> Ko Marta ornge esij e nga majingen milep, ko ni bbong misan mñiplaker. Ko evini ji Iesu ko owrai tevi, "Numal, sete kurrorrmie nga tasik mível lingi inu, ko inu bbong mñesan mñeplak? Kupwerai tevi ni pivini piptevi inu." <sup>41</sup> Ko Numal owra lweni tevi, "Marta, Marta, nik kurnge esij suri nanu elep þelak ko pa ngok. <sup>42</sup> Ko nanu sansan kobbong erres temijpal. Ko ngok niko Merri otobbtobbue ngel, nga sete san orongwos þilal tweni kele jin."

## 11

*Verusen se Numal nga ni mivisviseni tevi Kerr*

<sup>1</sup> Nabong san Iesu esan evan olot renge lat san. Ko daron nga musuw vajin ko olwi vini ji jinibb sen e nir. Ko jinibb sen san owrai tevi, "Numal, kupvisviseni kem e loten, pirpe Jon mivisviseni jinibb sen e nir marok-lot." <sup>2</sup> Ko Iesu owrai tevir, "Daron nga kami kaplot e ko kapwerai pirpel: "Tata se kem, nisem on. Nammerreni jinibb jikle nir partorim þirres. Nammerreni nik batun vanu som pivini iel ngatan. <sup>3</sup> Ko kuplai nanen pivtere kem lelingen, nabaani. <sup>4</sup> Ko kuptelasi tweni

nololien se kem nir, pirpe kem namtelasi tweni nololien se nir nga marloli mñisij tevi kem. Ko sete kuploli nanu parini parrowrow þelake kem.' "

<sup>5</sup> Ko Iesu owra tevir, "Kami si poro selen otoe ko pia-van ji selen nen nat nga mñirrang vajin, ko puwrai tevi, 'Ai sile, kupla pa niv þitul tevik. <sup>6</sup> Suri selek san otutur vini jik eatur vitan ni le, ko nanen nga namro lingi sete sapon oþon jer nga ðelai tevi purroi.' <sup>7</sup> Ko selen nga mñilik loloim nen puwrai lweni tevi, 'Sete kupvijajeng rengok, nuplaji ore pa metali osuw, ko kem natuk nir namatur pa renge milnge kem osuw. Setemun nurongwos bemra ðela nanu san tevim.' <sup>8</sup> Nuwrai tevi kami, ewretun evi selen nga mñirres, ko pumusok ko nga pimra þilal tevi. Ko suri bbong mungoni malume mñiterter, mian ko ni pimra ko þilal tevi pusorsan tevi nga mñernen mimrreni. <sup>9</sup> Ngok niko inu nuwrai tevi kami, Kapngoni, ko Atua pia-lai ko tevi kami. Kappej, ko Atua pia-loli kaplesi ko. Kapututi, ko Atua pia-tasi metali nen tevi kami. <sup>10</sup> Suri nir jikle nga marok-ngoni para-lai, ko nir jikle nga marok-pej paralesi, ko nir jikle nga marok-ututi metali, para-tasi metali nen þitþir tevir. <sup>11</sup> Kami si nga mivi tata, poro natun pungoni niv tevi, ko ni þila nevöt tevi purroi? Rreknga poro pungoni mesal tevi, ko ni setemun þila mesal nen tevi, ko þila numñet tevi purroi? <sup>12</sup> Rreknga poro pungoni narrlu nato tevi, ko ni þila netu numñet tevi? Ejki rres nawon! <sup>13</sup> Ia ko kami kamivi jinibb nga marsij nir, ko kami kamrongwose kobbong nanu nga marres nir nga kapa-lair tevi natu kami nir. Ko ngok Tata se kami nga mñilik renge melrin, ni asi wore tata se kami nir. Ko ni pia-lai Nemñin On tevi nir nga marngoni tevi ni."

*Jinibb sopor arwera Iesu okloli nanu nir renge derteren se Demij*

<sup>14</sup> Nemñin nga mñisij san evi nabbut, ko esilvi jinibb san ko ololi mñernen sete okrongwos pok-rij. Ko daron nga Iesu muoji tweni nemñin nga mñisij nen renge mñernen, ko mñernen erij luwi vajin. Ko delung artaal lengenge. <sup>15</sup> Ko jinibb sopor arwera "Bielsepul ko, numal se demij nir, ela derteren ngok tevi, niko mok-oji tweni demij nir ngok e."

<sup>16</sup> Ko nir sopor arrowrowe ni arpej nelesien ne melrin renge ni nga puloli parlesi. <sup>17</sup> Ko Iesu orongwose norrorrmien ser ko owrai tevir, "Poro batun vanu san þiteri wukari þieru e, ko pipalpal luwi tevi ni, ko sete orongwos putur te. Ko poro metka san þiteri wukari þieru e ko þitre lweni ni, sete liken sen orongwos

þirres te renge nabong pisan. <sup>18</sup> Ko ngok poro Demij þiteri wukari pieru e ko þitre lweni ni, ko batun vanu sen putur þirpese? Suri kami kamwera inu nuoji tweni demij nir renge derteren se Belsipa. <sup>19</sup> Ko poro nga weretunen inu nomok-oji tweni demij nir renge derteren se Belsipa, ko kami natu kami nir arok-oji tweni demij nir renge derteren se isi? <sup>20</sup> Ko weretunen inu nomok-oji tweni demij nir renge Atua nevren ne derteren, ko ngok niko batun vanu se Atua evini pa ji kami ko osuw.

<sup>21</sup> “Daron nga jinibb nga miterter mutori joro nuval sen nir mutur metmete naim sen, ko ngok joron nir arto erres malum renge naim sen. <sup>22</sup> Ko daron nga jinibb nga miterter asie mernen mivini ko epalpal tevi mernen mianan ko oji tweni, ko ngok ela joro nuval sen nir nga ni mlngi nolon renger, ko ela joro mernen, ko owlulu tevi selen nir.

<sup>23</sup> “Mer nga sete mipevi inu, mernen etre inu ko, ko mer nga sete mipevik nomorser kortoni jinibb nir, oji tututwenir ko.

*Nein nga msij nen orongwos pulwi kele*

<sup>24</sup> “Nein nga msij san daron nga mivare lingi jinibb san ko evel þetþeti renge lat nga nuwi mijkie nir, epejpej lat san nga pumos rengen. Ko poro sete elesi lat san, ko owra ‘Bolwi kele wor van renge naim suk nga meivare ren nga mevel lingi.’ <sup>25</sup> Ko renge daron nga pulwi vini e, ko þilesi nga aruraki vaseni pa loloim nen erres, ko arlingi nanu jile nir arto jila pa erres rengen. <sup>26</sup> Ko nein nga msij nen pian vajin ko þilesi kele nein nga marsij ebut nga marsij asi wore ni, ko piptevir parluwi van marsilwi lweni mernen. Ko mernen mauren sen nga vitunen þisij þerþer vajin þiasi nga womunen.”

*Neiren weretunen*

<sup>27</sup> Daron nga Iesu muwra jile nanu ngel e nir musuw, ko nesevin san nga nir delung marlik erij drrelan elep van mare owra “Neiren renge nesevin nga mivesi nik, ko mila nasus tevim kumsus rengen.” <sup>28</sup> Ko Iesu owra “Rrek erpok ko, ko mare renge iok, neiren renge nir nga marunge nale se Atua ko martor totonir kele renge nolor.”

*Jinibb armerreni parlesi nelesien san*

<sup>29</sup> Delung elep nga elep arini korti ji Iesu, ko Iesu owra “Dul ngel arivi dul nga marsij, ko armerreni parlesi nelesien. Ko ejki rres nawon, sete mea-la mun san tevir. Sansan kobbong, nelesien nga miplari ji propet Jona tuwi. <sup>30</sup> Erpe Jona evi nelesien se meri Nineve nir tuwi, ko ngok þirpok ko Jinibb Mawos pivi nelesien se dul nga

lelingen ngel nir. <sup>31</sup> Ko nesevin nen nga mivi numal nga milep renge Saot pia-tur imare tevi jinibb ne dul ngel nir renge nabong nga Atua pia-wera suri lat nga puto suri tevi jinibb nir, ko pia-wer lokloksi bhong nir, puwra ‘O, kaplesi, inu nuvel renge bongsi vanu vini nga borng norong-wosien se Solomon, ko erpese kami sete kamrunge nale se san nga milep asi wor Solomon, ko mlilik tevi kami bhong?’ <sup>32</sup> Ko renge nabong nga Atua pia-wera suri lat nga puto suri tevi jinibb nir, meri Nineve nir para-tur imare ko tevi dul ngel nir ko parongwos parwer lokloksi bhong sel se kami nir, parwera ‘O, kaplesi, daron nga namrunge Jona mwerwer e tuwi, ko nolo kem olululwi renge nololien se kem nir. Ko erpese kami nolo kami sete olululwi daron nga kamrunge san nga milep asi wor Jona mwerwer tevi kami?’

*Nale rrongrongvi ne nasul*

<sup>33</sup> “Sete jinibb san osli jile nasul osuw mian ko otori ngatan, ejki; putori mare sapon, ko puloli jinibb jile parlesi moron. <sup>34-35</sup> Mete jinibb erpe moron ne niben. Poro nga metem þinerer, ko moron puwun saut re nibem totoklai. Ngok owra puwra, poro nga nolom þirres, ko mauren som totoklai kele þirres. Ko poro nga metem þisij, ko nemalek puwun saute nibem totoklai, suri metem erpe moron ne nibem. Ngok owra puwra, poro nga nolom pukul, ko mauren som totoklai kele þisij jile. <sup>36</sup> Ko poro mauren totoklai se kami parwun saute moron, ngok pimor vaseni þetþeti mauren se kami ko, sete lat sapon mara-jipon jer.”

*Iesu otortori Parasi sopor ko jinibb ne nevisisenien ne nale nesevren sopor*

<sup>37</sup> Daron nga Iesu mriir jile musuw vajin, ko Parasi san ongoni ni, owra ni pian þiaan tevi ni. Ko Iesu evan loloim esakel ean. <sup>38</sup> Ko daron nga Parasi nen rilesi mirpok, ko bbosa nga milep elai ni e suri. Suri nga Iesu sete ejevavöl owom mian ko vitunen ko ni pia-aan. <sup>39</sup> Ko Numal owrai tevi mernen, “Kami Parasi kamok-rrawe vare ne biles nir ko plet nir, ko renge nolo kami nir arwun saute nanu nga marsij nir. <sup>40</sup> O kami nga kamlengleng temijpal, sete kamrorrmi nga Atua nga muloli vare nen e, ni kele kobbong ololi nolon e? <sup>41</sup> Kami kapla nanu nga maro renge nolo biles se kami ko nolo plet se kami tevi beres nir, ko nanu jile nir parwokwok vajin ji kami.

<sup>42</sup> “Wi kami Parasi nir, pia-sij wor pilep niko renge kami, suri kami kamok-þelak milep suri nanu nga marþer jer, ko nanu nga marlelep nir nga moro kaplolir, kamlingi kurtwenir. Suri kamok-þelak suri nanu nga marþer jer, erpe roi warreng

nir erpe min ko ru, nga kapeveve ꞑetꞑetir, ko kamla tweni songovlör nga kaplair tevi Atua. Ko erpok erres kobbong kaploli; ko nanu nga müsij nen evi nga kamlingi kurtweni nanu nga marlelep nir, erpe murrun mawos ko merrenien nga kapmerreni lenglengen Atua.

<sup>43</sup> “Wi kami Parasi nir, pia-sij wor pilep niko renge kami. Kami kammerreni kapok-sakel renge nai seksekal nga mare nir renge loloim ne naim ne loten nir; ko kammerreni jinibb partori kami daron nga marsekai kami re lat ne nanen. <sup>44</sup> Wi pia-sij wor pilep niko renge kami. Kamirpe dubb nga sete marusi ore nivev rer, marto kiskis nawon, ko jinibb sete marongrongwos rragrag nir; ko marivel rer marbbötböt rer, ko ololi arrokitkit ꞑetꞑetie.”

<sup>45</sup> Ko san renge jinibb ne nevisvisenien ne nale neseseien owra lweni tevi Iesu owra “Jinibb nevisvisenien, daron nga kumwera nale ngok e nir, ko ngok kulokloksi kem kele.” <sup>46</sup> Ko Iesu owra “Wi pia-sij wor pilep niko renge kami kele jinibb ne nevisvisenien ne nale neseseien nir, suri kami kamok-jingteni nanu nga marrow milep renge birpari jinibb nir nga sete marongwos parwosi luwer, ko kami ma kammus lengleng kapjipari majingen ser sapon. <sup>47</sup> Wi pia-sij wor pilep niko renge kami, suri kamok-juroi dobbi propet nga tuwi nir, nga tata se kami nir marevji pinir marmij. <sup>48</sup> Tok kamviseni emawos nga kami kele kamkorti renge majingen nga marsij se tata se kami nir. Suri nir arevji pinir, ko kami vajin kamok-juroi dobbit. <sup>49</sup> Ko erpok Atua ospe suri pa renge norongwosien sen owra ‘Bea-koni propet nir ko aposol nir vini jir, ko nir sopor parevji pinir, ko nir sopor parloli ꞑisij tevir parojir.’ <sup>50</sup> Ko niko drra propet jile nir nga apu se kami nir marevji pinir tuwi, kami ko dul ngel kapa-la norongen nga müsij nen. <sup>51</sup> Nuwretun nuwrai tevi kami, mütipatun renge drra Apel, mivini mijpari drra Sekaraea nga marevji renge Naim On se Atua renge livö ne nawot ko lat nga muon. Nuwretun nuwrai tevi kami, kami ko dul nga lelingen ngel, kapa-la norongen nga müsij ne nanu ngok jile nir vajin.

<sup>52</sup> “Esij wor elep niko renge kami jinibb ne nevisvisenien ne nale neseseien nir, suri kami kamkikiore metali ne norongwosien ko kamsilveni ki nen. Ko kami kele sete kaman renge loloim nen, ko kamokwer ore jinibb nir nga marwera paran renge loloim nen.”

<sup>53</sup> Mian ko Iesu evel lingi naim nen, ko jinibb nevisvisenien ne nale neseseien nir ko Parasi nir arij esij tevi ko arsuji

nanu elep. <sup>54</sup> Nir arok-teravi Iesu nga poro puwra jabble nale pisan nga nir parlai ni rengen.

## 12

*Iesu erij tere murrun nga jinibb sel sen müeru e*

<sup>1</sup> Renge daron nen meling jinibb nga milep arini arser korti ji Iesu renge lat san. Nir evi nuvasngavöl vavis kis wor, ko artur lililjir ꞑelak nir, ko arbbötböt renge drrun Belar. Ko Iesu owra womue tevi jinibb sen nir owra “Kami kapmetmet ko wor renge is se Parasi ngel nir, renge murrun nga sel ser eru ngok e. <sup>2</sup> Ko nanu jile nga jinibb martawi ore nir, mian ko Atua piraji vasenir parto limjer. Ko nanu jile nga jinibb marsilvenir, mian ko Atua pulolir parto limjer, jinibb parongwoser. <sup>3</sup> Ko nanu jile nga kami kamok-super renge nat nga mupong, mian ko Atua puloli nga jinibb parsuper renge nat nga müirin. Ko nanu jile nga kami kamok-sur vijvije renge boro jinibb nir renge loloim, mian ko parkaile parwerai van mare jer.”

*Jinibb se Iesu sete erres re parmetutue jinibb nir*

<sup>4</sup> Iesu owra “Selek nir, inu nuwrai tevi kami, sete kapmetutue jinibb nir nga marongwose parevji pini bbong nibe kami nir, mian ko vitunen setemun arongwose parloli kele nanu pisan. <sup>5</sup> Inu bosusur metu le ngel tevi kami, bowrai tevi kami isi nga parmetutue. Parmetutue Atua kobbong. Ni kobbong orongwose pivevji pini jinibb, mian ko vitunen ni orongwos piwirre van renge lat ne nejikkien. Suri derteren sen otoo. Ngok ni ko ma kami kapmetutue.

<sup>6</sup> “Kami kamrongwos pae nga jinibb nir arok-wulwule numön nga wowarrang elim nowlir evi nevöt eru kobbong. Ko renge no Atua, sete ok-kulu jabble san emalie, ejki. <sup>7</sup> Ko kaplesi jomro batu kami ngok nir; Atua orongwos ꞑetꞑeti nir, sete san ejki. Atua tetajer emetmete kami erres ꞑelak. Ko ngok niko kami sete kapmetutu, ni emrenni kami elep nga elep, asi jer wore numön ngok nir.

*Mer nga muwowrai “Inu nuvi jinibb se Iesu.”*

<sup>8</sup> “Inu nuwrai tevi kami, Mer nga sete mimtutu nga puwowrai inu nisek renge no jinibb nir, inu kele jinibb Mawos beawowrai ni nisen renge no anglo se Atua nir. <sup>9</sup> Ko müer nga mimtutu ko mivilvil ore inu nisek renge no jinibb nir, ngok inu kele bea-vilvil ore ni nisen renge no anglo se Atua nir. <sup>10</sup> Ko müer nga mürij melmelas ko osopsope inu jinibb Mawos,

mian ko Atua orongwos p̄itlasi tweni ni. Ko m̄er nga m̄irij melmelas ko osopōpe Nem̄in On, m̄ernen Atua sete orongwos p̄itlasi tweni rragrage ni.

<sup>11</sup> “Ko inu nuwrai tevi kami: Mian ko jinibb para-revei kami van renge naim gortien ji numal nga marlelep nir nga nir parwera suri nanu nga kamloli, lat nga puto suri re kami. Ko kami sete kapmetutu kaprrormi p̄elake sev nale ko nga kami kapwera lweni. <sup>12</sup> Suri renge daron nen mawos malum ko pa, Nem̄in On pia-wera nale mawos nen tevi kami nga kami kapa-werai.”

*Jinibb nga marsar kortoni joror milep*

<sup>13</sup> Ko nir san renge meling jinibb ngel nir owrai tevi Iesu owra “Jinibb nevisvisenien, kupwera tevi tuwak nga ni puwngani joro tata se komru nir nga ni mimetmete nir, pivsese komru korti. Suri ni omusus puwnganir.” <sup>14</sup> Ko Iesu owrai tevi m̄ernen owra “E m̄erel, inu sete nuvini tweni nga bospe suri nanu nga marirpok.” <sup>15</sup> Ko mian ko ni owrai tevi jinibb nir owra “Kami kapmetmet wor kami ko p̄irres, ko kaptor ore nolo kami nga kamok-merrmerreni nijor e nir. Suri jinibb mauren sen weretunen sete arloli nanu ngok e ko nir, nga marivi joron ngok.”

<sup>16</sup> Ko Iesu owra nale rrongrrongvi san tevir, owra “Jinibb san nga joron milep, orsel sen nanen elep nga elep ren. <sup>17</sup> Ko ni orrorrmi ko owra ‘Inu bololi pirpe le vajin, suri bepe ne nanen suk ewelili pa. Bololi pirpese le vajin?’ <sup>18</sup> Ko ni orrorrmi renge nolon owra ‘A, nurongwose lat nga bololi surie; bololi pipel le, berrarre tweni bepe suk ko beli pilep lengleng vajin, ko belngi nanen suk nir ko jorok nga marres nir rengen. <sup>19</sup> Ko howrai vajin tevi nem̄ik, ‘Jorom nga marres elep nga elep lengleng, evter nga nik kuplik vajin sia pilep nga pilep lengleng. Kuḡaan ko kupminmin p̄irres, ko kupir vajin.’ <sup>20</sup> Ko Atua owrai tevi m̄ernen owra ‘O, nik nga kumlengleng temijpal! Suri nata mupong nga lelingen belai tweni nem̄in. Ko nanu nga kumajing nir ngok, ko nanu nga kumlingir ngok nir parivi se si ko vajin?’” <sup>21</sup> Ko Iesu owra “Pia-irpok ko renge jinibb nga marsar kortoni joror milep nga mivi se nir kis bbong, ko iok renge no Atua sete joror oto rragrage, ejki rres nawone.”

*Atua orongwose pimetmete kami p̄irres*

<sup>22</sup> Ko Iesu owrai tevi jinibb sen nir, “Suri nanu ngel ko inu nuwrai tevi kami, Sete erres nga kami kaprrormi p̄elake mauren se kami, ko kapwera ‘Mian ko rrapro sev le lelingen?’ Ko sete erres kele nga kami kaprrormi p̄elake nibe kami, kapwera ‘Mian ko rrapla sunsun nga rrapuri ngabe

le?’” <sup>23</sup> Mauren evi nanu nga milep wor, nanen evi bbong nanu nga welili. Erpok kele, nibe kerr evi nanu nga milep wor, sunsun evi bbong nanu nga welili. Ko Atua elai pa nanu nga morlelep nen nuru; ko suri sev kami kamrrormi sete orongwos p̄ila kele nanu nga wowarrendeng ngok nir tevi kami?

<sup>24</sup> “Kaplesi numön nir; sete nevrer artoe, sete aruw te, ko sete arok-tawe wenen nurrer te, ejki, ko bepe ser ejkie. Ko Atua ok-la wor nanen tevir. Ko ngok renge no Atua kami kamrres asi wore numön ngok nir.

<sup>25</sup> “Kami kamrrormi jinibb nga mok-p̄elak mok-rrormi mauren sen nga mumrol jer bbong, orongwos puloli mauren sen pipriv asi kele wor? Ejki! <sup>26</sup> Ko suri nga kami sete kamrongwos kaploli nanu nga marwowarrendeng ngel nir pirpe nga ngok nen nir, ko suri sev kami kamok-rrormi p̄elake nanu m̄inij nga ngak nen nir suri mauren se kami?

<sup>27</sup> “Kami kaprrormi ta nevngu sekavöl. Sekavöl sete emajing erpe jinibb, ko sete evitvit te. Ko inu nuwrai tevi kami, numal Solomon kele tuwi ori sunsun nga marres p̄elak nir, ko sete arres arirpe nevngu sekavöl ngok san. <sup>28</sup> Atua emetmete mösmös ne orsel nga parmaur lelingen ko mevinen mun parsulir ko pa; ko ngok ni pimetmete wor kami pilep p̄iasi wor womu renge mösmös, O kami nga nosurien se kami ewelili.

<sup>29</sup> “Ko sete kaprrormi p̄elake nanen nga kami kaproi, ko nuwi nga kami kapminir, rrenga kaprrormi nanu pilep p̄elak. <sup>30</sup> Nanu ngel nir jinibb jile nga marlik iel ngatan nir nga sete marosuri Atua arok-rrormi ko arok-pej. Ko Tata se kami ma orongwos pae sev nga nevre kami marmumrol ren. <sup>31</sup> Ko nanu nga milep nen nga kami kaploli, kapp̄elak nga kapsil van renge batun vanu se Atua. Ko ni pia-lai kobbong nanu ngok nir tevi kami. <sup>32</sup> Sete kapmetutu te, kami meling welili. Suri Tata se kami orongwose erres nga ni pia-la batun vanu sen tevi kami.

*Jinibb nga joron milep renge no Atua*

<sup>33</sup> “Kapwulwule joro kami, ko kaplai nevöt nen tevi beres nir. Ko re sel ngok ko, erpe kami kamvati narr se kami nga sete marongwos parmutmut, ko kamlingi joro kami parto renge melrin. Iok sete orongwos parsij, ko jinibb ne venao sete orongwos pian, ko momom sete orongwos pulokloksir. <sup>34</sup> Suri nga ngabe nga narr se kami puto rengen, ko ngok lat nen ko nolo kami puto rengen tetajer.”

*Jinibb se Iesu nir parmetmet ko wor tetajer terai Iesu pulwi vini*

<sup>35</sup> Ko Iesu owrai kele tevi jinibb sen nir “Kami kapmetmet ko wor tetajer terai inu bolwi vini. Ko kapserteni netatuw se kami piterter, ko kapsuli laet se kami pimor metmet. <sup>36</sup> Kami kapirpe jinibb ne majingen nga mīlik terai numal sen daron nga ni pulwi renge nanen ne totkoiē sen e vini. Ko daron nga pulwi vini ko pututi metali, ko nir partasi metali pivesane tevi ni. <sup>37</sup> Neiren renge jinibb ne majingen nen nir, suri nir sete armatur te renge daron nga numal ser mivini, ko nīlesi nir markulu metmet terai ni mulwi vini. Nuwretun nuwrai tevi kami, ni puloli pīrres pēlak tevir; pīla netatuw sen pītatuwe, ko puloli nir parlik ngatan, ko pīla nanen tevir paraani. <sup>38</sup> Ko poro pulolola sapon, pia-vini renge nat pīrrang sapon rreknga nat pīsāl pīrin, ko pīlesi lartul nen nir parok-teravi malume pīrpok, ko ngok neiren renge lartul nen nir. <sup>39</sup> Ko kami kaprongwose nanu ngel: Poro nga jinibb san purongwose daron mawos nga jinibb venao pivini e, ko ni sete orongwos pivel lingi naim sen; pimetmet ko wor, puloli mēnren sete orongwos pīasi van. <sup>40</sup> Ko pīrpok kele ko, kami kele kapmetmet ko wor, suri Inu Jinibb Mawos dea-vini renge daron san nga kami sete kaprrormi rragrrage nga inu bolwi vini rengen.”

*Nale rrongrrongvi ne jinibb ne majingen eru*

<sup>41</sup> Ko Pita owrai tevi Iesu owra “Numal, kuwra nale rrongrrongvi tevi kem kis lebbong, rreknga tevi jinibb jīle nir?” <sup>42</sup> Ko Numal owra lweni tevi “Ia, ko kuprunge ta nale ngel: Jinibb si nga mīlŋgi nolone re majingen nga numal sen nīla tevi, ko evi jinibb ne majingen nga norongwosien sen mutoe. Ni evi jinibb san nga numal sen pīlŋgi pimetmete naim sen jīle, ko pīla nanen tevi jinibb sen nir renge daron mawos nen. <sup>43</sup> Neiren renge mēnren daron nga Numal sen pulwi vini e ko pīlesi nga ni puloli pīrpok. <sup>44</sup> Nuwretun nuwrai tevi kami, mēnren ko numal sen pīlŋgi ni pivi batu jinibb nga pimetmete joron nir.

<sup>45</sup> “Ko poro jinibb ne majingen nen purrrormi renge nolone puwra ‘Numal suk ololola lengleng renge nga pulwi vini,’ ko pītipatun pivirrvirrali jinibb ne majingen nir, ko pian ko piminmin ko pivi jinibb ne botminmin. <sup>46</sup> Mian ko numal se jinibb ne majingen nen pulwi vini renge nabong san nga mēnren sete murongwos rragrrage. Ko numal nen piwirr tweni mēnren, ko puloli ni pian pīlik pīsij pēpē tevi jinibb nga marsij ko nga nosurien ser mijkie.

<sup>47</sup> “Jinibb ne majingen nga murongwose pa sev nga numal sen mimmreni nga ni puloli tevi ni, ko sete muloli te nanu nen, mēnren numal sen pia-virrvirrali temij-pale. <sup>48</sup> Ko mēn nga ma sete murongwose nanu nga numal sen mimmreni, ko muloli nanu nga musorsan tevi pa nga parvirrvirrali rengen pilep suri, ko ejki, parvirrvirrali puwelili kobbong suri. Erpok ko, jinibb si nga marla nanu milep tevi, mēnren parngoni nanu pilep jin; ko jinibb si nga Atua mīlŋgi pa nanu milep renge nevren, mēnren Atua emrreni pīmajing majingen nga marlelep.

*Iesu ololi jinibb nir arwij ngasngasu*

<sup>49</sup> “Inu nuvini nga bosor tweni nabb renge iel ngatan. Ko nabb nen ein pa, ko poro puror ko inu bololi sev? Inu bēir lengleng. <sup>50</sup> Ko nanu erwen le ngel, baptaesen san nga muto malum, nga inu bepaptaes rengen; ko inu nomok-runge esij e, pian pian pijpari nanu ngel pivini pīasi; ko osuw vajin. <sup>51</sup> Kami kamrrormi nga inu nuvini tweni nga bēla demat tevi iel ngatan? Ejki rres nawon! Inu nuwrai tevi kami, sete bēla demat, ko bowjuwje ma jinibb ko parwijwij ngasu nir. <sup>52</sup> Ko etipatun le pa ngel ko pītajer tevi le pa, metka san nir pielim parlik korti renge naim pisansan. Ko nir pītul partere nuru pīeru, ko nuru pīeru portere nir pītul. <sup>53</sup> Tata ko pītre natun norman, ko natun norman pītre tata sen. Ko tasu pītre natun nesenwarreng, ko natun nesenwarreng pītre tasu sen, ko leker pītre nesevinli sen, ko nesevinli sen pītre pīlen leker.”

*Jinibb nir parlesi wose wor nelesien ne daron se Iesu ko*

<sup>54</sup> Ko Iesu owrai kele tevi delung nir owra “Daron nga kami kamlesi nabor marimare marmot korti milep lat san, ko kamrongwos pae ko evesane, ko kamwera ‘Naus pus ko’, ko mian ko erpe nga kami kamwerai. <sup>55</sup> Ko daron nga kami kamlesi ling murrwurrweli tolu, ko kamwera ‘Nat pututun ko pilep’, ko mian ko erpe nga kamwerai. <sup>56</sup> Kami nga kamiel renge sel eru! Kamrongwos kapwera suri nelesien nga kamlesir renge iel ngatan ko renge melrin. Nanu nawon ngok nir kami kamlesi woser. Ko erpese renge daron se inu nga lelingen ngel? Erpese kami sete kamrongwose kaplesi wose nelesien nen te mijki?

*Jinibb se Iesu pian ko wor pīrij tevi mēn nga mītre ni*

<sup>57</sup> “Ko erpese nga kami lweni sete kamrongwose kapwera suri nanu nga marres nir marsorsan nga moro kaplolir? <sup>58</sup> Poro nik ko mēn nga kamru komorlat koporivel



korti koporan ji numal nga puspe lilane, ko daron nga komorivel reнге sel e, ko kupw-erai lilane tevi ni. Poro pijki, ko ni tilngim van reнге nevre numal, ko numal tilngi nik van reнге nevre polis, ko polis tilngi nik van reнге naim ne nekaien. <sup>59</sup> Nuwrai tevi nik, sete kurongwos kupivare reнге ie pijpari wor kupla jile ko nevot nga marlingi ko marwera kuplai.”

## 13

### *Jinibb nolor pululwi reнге nololien ser*

<sup>1</sup> Ko jinibb sopor arlik ie reнге daron nen ko arini ji Iesu. Ko arsupe suri mēri Galili sopor nga marloli sulsulen van ji Atua, ko Paelat otur imare ko erevji pinir re daron mawos nga marloli sulsulen. <sup>2</sup> Ko Iesu owra lweni tevir “Ko ngok suri mirpok ngok, kami kamrrorrmī mēri Galili ngel nir arsiј womu ne wor mēri Galili jijle nir, suri nga marpal mirpok? <sup>3</sup> Inu nuwrai tevi kami, Ejki. Poro kami sete nolo kami pulululwi reнге nololien se kami nir nga kamok-lolir, kami kele kapmij kapjijki pirpe nir. <sup>4</sup> Ko nir esngavol drromon owil (18) nga naim nga muwu mare reнге Saeloam mimav ko mirevji pinir; kami kamrrorrmī nir arsiј wor easie nir mīnij nen nir nga marlik reнге Jerusalem? <sup>5</sup> Ejki rres nawon! Inu nuwrai tevi kami, poro kami nolo kami sete pulululwi reнге nololien se kami nga kamok-lolir, kami kele kapmij pirpe nir marjijki ngok.”

### *Nale rrongrrongvi ne nai nga sete mīiwen*

<sup>6</sup> Ko Iesu owra nale rrongrrongvi ngel tevir, owra “Jinibb san orwi nai pik san reнге orsel sen. Mian ko evini epeј wenen reнге, ko sete eleisi san rragrag. <sup>7</sup> Ko owrai tevi mēr nga mimetmete dan sen, owra ‘Kuplesi, sia itul le pa mevini mepeј nai pik ngel wenen reнге, ko sete nulesi te san. Kupta bburi piravij ngatan, erpese mimni nawone suwe dan?’ <sup>8</sup> Ko mēr nga mok-metmete dan sen owra lweni tevi owra ‘Numal, kuplinglingi pa putur kele mun reнге sia ngel, ko inu βeli rrale bbulwil reнге batun, ko bololi lilane dan pirres reнге. <sup>9</sup> Ko poro nga pia-wen vajin reнге sia nga vitu, ko ngok erres ko. Ko poro nga pia-jiki, ko kupa-ta bburi ko pivitan ngatan.”

### *Iesu ololi dure nesevin san nga murru otur rramos luwi reнге nabong ne Sapat*

<sup>10</sup> Ko Iesu ok-visviseni reнге loloim ne naim ne loten san reнге nabong ne Sapat. <sup>11</sup> Ko nesevin san nga neñin nga mīsiј

mīsisilvi muloli mimsi sia esngavol drromon owil (18), nga duren murru jer, sete murongwos putur rramos reнге nabong san, elik ie. <sup>12</sup> Ko daron nga Iesu mīlesi vin-nen ko owra “Vineli! Kupres ko pa reнге mesien som nga muloli duren murru ngok.” <sup>13</sup> Ko Iesu elngi nevren reнге vin nga, ko erres evesane reнге duren nga murru nga, ko osrōvi Atua.

<sup>14</sup> Ko numal ne naim ne loten ololarsi lenglengē Iesu suri nga muloli vinnen mīrres reнге nabong ne Sapat, ko ni erij otortori delung nir, owra “Nabong ouwon kis nga jinibb puloli majingen reнге, ko kapini reнге nabong nen nir ko kami kapres reнге mesien se kami nir, ko sete nabong ne Sapat, pijki!” <sup>15</sup> Ko Numal owra lweni tevi owra “Kami nga kamiel reнге sel eru! Sete kami sisamis kamok-telasi buluk se kami rreknga dongki se kami reнге nabong ne Sapat, ko kamok-iler van reнге nuwi parminin? <sup>16</sup> Ko vineli evi metka se Epram san nga Demij mīstre totoni ni reнге sia esngavol drromon owil, ko erpese sete erres reнге ni piveli sisarow reнге nabong ne Sapat?” <sup>17</sup> Nale sen nga muwrai ngel nir arloli devje nuval sen nir nor eta dan. Ko delung arir elep suri nanu nga marres nga ni mulolir.

### *Nale rrongrrongvi ne jelangi nubek*

<sup>18</sup> Iesu owra “Batun vanu se Atua erpe sev, ko sev osorsan tevi nga inu bowra rrongrrongvi reнге? <sup>19</sup> Erpe jelangi nubek san nga muwelili jer, nga jinibb mīlai ko murwi reнге dan sen. Ko etiv pelari, ko emaur, evi nai nga milep san; ko numon ne mesa nir arow vini, ar-sakel reнге rengsin, ko arjali menuner reнге.”<sup>C</sup>

### *Nale rrongrrongvi ne is*

<sup>20</sup> Ko Iesu owra kele “Batun vanu se Atua erpe sev? Ko sev osorsan tevi nga inu bowra rrongrrongvi reнге? <sup>21</sup> Osorsan tevi is nga nesevin mīlai ko mīlngi reнге besin ne plaoa itul kis, mian ko mipau jijle vajin.”

### *Metali nga welili*

<sup>22</sup> Mian ko Iesu evel suri sel sen evel rrrurngi ngaim nga marlelep nir ko ngaim nga marwowarreng nir; ko ok-visviseni jinibb nir, ko ok-tajer tevi van reнге Jerusalem e. <sup>23</sup> Ko jinibb san osusi tevi ni owra “Numal, nir puwelili kobbong para-maur?” Ko ni owra lweni tevi owra <sup>24</sup> “Kami kapβelak temijpal ko wor tweni nga kapan kapsil reнге metali nga welili ko. Inu nuwrai tevi kami, nir pilep paramerreni nga paran parsil reнге, ko sete parongwos paran te, ejki. <sup>25</sup> Ko Numal ne

<sup>C</sup> 13:19 Erpe iel, Luk orrongrrongvi batun vanu se Atua erpe jelangi mastat, ko suri mastat ejki iel, namlingi nubek, nga puloli mining ne nale se Luk pipilari limjer.

naim tutur imare ko tian tikikiorore metali, ko kami tamoka-tur jer vini vare e. Ko kaptipatun kapututi metali, ko kapverus 'Numal, kuptasi metali tevi kem!' Ko ni tia-wera lweni tevi kami, 'Inu nurrerleng sisini kami. Kami kamivi mēri ngabe ko?'<sup>26</sup> Ko kami kaptipatun kapwera lweni tevi inu, kapwera 'Ejki ma, namok-aan tevim ko namok-minmin tevim, ko nik komok-visviseni kem lat nga kem!'<sup>27</sup> Ko ni puwra lweni kele tevi kami, 'Inu nurrerleng sisini kami. Kami kamivi mēri ngabe ko, kami nga kamok-loli nanu nga marsij nir.'<sup>28</sup> Ko kami kapting ko kaporrliw daron nga kaplesi Epram ko Aesak ko Jekop ko propet nir renge batun vanu se Atua, ko kami lweni parwirr tweni kami kapjikke.<sup>29</sup> Ko delung parivel renge vanu pētpeti ngok vini, ko parsakel tevi Atua renge batun vanu sen, paraan tevi.<sup>30</sup> Ko kaplesi renge ie nir nga marivi jinibb nga marwelili, mian ko para-ivi jinibb nga marlelep; ko nir nga marivi jinibb nga marlelep, mian ko para-ivi jinibb nga marwelili."

#### *Erot Antipas owra pivevji pini Iesu*

<sup>31</sup> Ko renge daron nen mawos ko pa Parasi sopor arini ji Iesu ko arwerai tevi "Kupiel lingi iel, kupan iok e sapon. Suri Erot emrreni pivevjim kupmij."<sup>32</sup> Ko Iesu owra lweni tevir owra "O, morok evi jinibb ne gerisen. Kapan kapwera tevi, ni pīlesi inu nuoji tweni nerīn nga marsij nir, ko bololi nir nga marmesi parres luwi lelingen ko mevi. Ko renge nabong itolin vajin ko bololi jile majingen suk.<sup>33</sup> Ko ngok niko inu bevijuri suri wor sel suk ko renge lelingen ko mevi ko teru, ko bejpari Jerusalem. Suri ewretun lenglengen, Jerusalem evi lat nga moro partori pīrres propet nir rengen; ko ejki mun, arok-revji pinir ma ren.

#### *Iesu etengsi mēri Jerusalem*

<sup>34</sup> "O Jerusalem, Jerusalem, nik nga kumrevji pini propet nir ko kumtuwe pini nir nga Atua mukonir vini jim! Momori inu numrreni bololi jinibb som nir parlik korti pirpe nato nga misrew ore natun nir, ko nik kumus. <sup>35</sup> Ko kuplesi, Atua evel lingi pa ngaim som oto kiskis. Ko kami sete kama-lesi inu te ejki, pian pijpari daron nga kami kapa-wera 'Atua, kuprij pīrres suri mēri nga mivini renge nise Iova.' "

## 14

*Iesu ololi jinibb nga mimsi san erres luwi*

<sup>1</sup> Renge nabong ne Sapat san ko Iesu evan nga pīaan tevi mērwomu ne Parasi nir san. Ko delung arujruj van mori jin, ko armeteni suri ni eterter. <sup>2</sup> Ko jinibb san

nga drru nevren nuru ko drru bēlan nuru morsosol pa nga pimij elik renge ie. <sup>3</sup> Ko Iesu elesi, ko osusi tevi jinibb ne nevisvisenien ne nale neseseien nir ko Parasi nir, owra "Renge nale ne neseseien se kerr emarong nga rraploli jinibb pīrres luwi renge nabong ne Sapat, rreknga ejki?"<sup>4</sup> Ko nir armurrarrong nawon, sete arwera nanu san. Ko Iesu eptevi tweni mēnren ko ololi erres luwi, ko elngilgi ni evel. <sup>5</sup> Ko Iesu owrai tevi jinibb nir, owra "Isi renge kami poro nga natun rreknga buluk sen otoo, ko osobbul van ngatan renge bbulwil ne nuwi renge nabong ne Sapat, ko mēnren sete orongwos pian mawos pirvei tweni renge wosenen?"<sup>6</sup> Ko nir armurrarrong nawon kele, sete arongwos parwera lweni kele nale san tevi ni.

#### *Norrormien se jinibb pian ngatan*

<sup>7</sup> Iesu owra nale rrongrrongji san tevi nir nga marsakel maraan, suri elesi nir arpepej lat seksakel nga marto womu. Ko owrai tevir owra <sup>8</sup> "Poro jinibb pisan pungoni nik nga kupan renge nanen ne totkoi sen, ko kupan, ko sete kupsakel womu renge lat seksakel nga mūrres. Suri mēri nga mungoni nik tungoni jinibb nga milep asie wor nik san tia-vivitu vini. <sup>9</sup> Ko poro pirpok ko mēri nga mungoni nik nen tia-vini jim ko tia-werai tevim, 'Kuptur iok, mērel pivinuk pīsakel iok re milngom,' ko ngok nik kupan kuplik ngatan, ko kupmanun pilep. <sup>10</sup> Ko poro daron nga parngonim e, ko nik kupan ko kuplik bbong ngatan. Ko ngok poro mēri nga mungonim pivini ko pīlesim, ko puwrai tevim 'Selek, kupini kupsakel mare.' Ko ngok ni puloli nolom pīr renge no jinibb nir nga kupan kupsakel mare tevi nir nga kaḡaan. <sup>11</sup> Suri mēri nga mīlgi lweni ni van mare, mian ko Atua puloli ni pivi jinibb nga pian ngatan jer. Ko mēri nga muloli ni mian ngatan, mian ko Atua puloli ni pian mare."

#### *Murrun nga parveruse jinibb nir parini paraan*

<sup>12</sup> Ko Iesu owrai tevi mēri nga miveruse ni nga pīaan tevi, owra "Poro nga nik kuploli nanen ne levial rreknga rivriv, sete erres kupveruse selem nir, rreknga tuwam nir rreknga metka som nir rreknga selem nga joron milep nga mīlik tevim bbong. Poro pirpok, ko nir parverus kele bbong nik, ko parkele lweni nanu nga kumloli tevir. <sup>13</sup> Ko poro daron nga nik kuploli nanen pisan, ko kupveruse beres nir ko jinibb nga marus karkar nir ko nir nga bēlar marsij nir ko metrorr nir. <sup>14</sup> Ko nik kuprunge pīrres, suri lartul nen nir sete arongwos parkele lweni tevi nik. Ko Atua vajin pia-kele lweni tevi nik renge daron

nga puloli jinibb nga marres nir parmaur luwi kele re mijen."

*Nale rrongrrongvi ne nanen nga milep*

<sup>15</sup> Ko san reнге nir nga marsakel tevi nga maraan murnge nanu ngel nir e, ko owrai tevi Iesu owra "Mer nga pian piaaan reнге batun vanu se Atua, ni purnge p̄irres pilep." <sup>16</sup> Ko ni owrai tevi m̄ernen owra "Jinibb san ololi nanen nga milep san, ko everuse jinibb elep parini reнге nanen. <sup>17</sup> Ko reнге daron ne nanen vajin, ko ni okoni jinibb ne majingen sen pian puwrai tevi lartul nga ni muwrai pa tevir nga para-vini, 'Kapini vajin, arloli nanu jile arsuw pa, arto metmet.' <sup>18</sup> Ko nir jile norrorrmi ser evi sansan e, ko artipatun arwera ore nanu sopor. Nir san nga womunen owra 'Inu nua-wuli bbong orsel san, ko inu numrreni bean mun ßelesi ta; sete numa-vinuk ko, ejki.' <sup>19</sup> Ko nir erwen nen kele owrai tevi, 'Inu nua-wuli bbong buluk nga marok-revei kat esngavöl, ko inu numrreni bean borrowrowe ta nir parmajing lesi ta. Sete numa-vinuk ko, ejki.' <sup>20</sup> Ko nir itolin kele owra 'Inu nua-lesi bbong nesevin suk, ko niko inu sete numa-vinuk ko, ejki.' <sup>21</sup> Ko jinibb ne majingen nen olwi van, ko owrai suri nale nga lartul nga marwerai tevi ni, tevi numal sen. Ko numal nen ololar lengleng, ko owrai tevi jinibb ne majingen nen, owra 'Kupsaro pingavil, kupan reнге sel nga marwoluo ototvi live laut ne ngaim ko sel lele kele nir. Ko kuptekai ßeres nir, ko nir nga niber marsij, ko metrorr nir, ko naroj nir; ko nir vajin parini reнге nanen.' <sup>22</sup> Ko ni evan, ololi jile, mian ko olwi ko owra 'Numal, inu nuloli pa erpe nga kumwerai osuw, ko loloim elep malum wor oto.' <sup>23</sup> Ko numal owrai tevi jinibb ne majingen sen owra 'Kupiel, kupan kele kupvijuri sel jile nga iok e nir, ko kupvijuri sel nga maran orsel e nir. Ko kupan kupsupe p̄irres tevi jinibb nir parini ko parsongni naim suk puwun saut. <sup>24</sup> Inu nuwrai tevi kami, jinibb nga mongoni womu nir ngok, nir san sete mia-vini mia-rroi nanen suk sopon.'

*Jinibb se Iesu puloli wor Iesu ko puwomu reнге ni*

<sup>25</sup> Delung jinibb nga milep arvijuri suri Iesu. Ko Iesu erieni lweni emtenir; ko owrai tevi nir owra <sup>26</sup> "Poru jinibb san emrreni pivini ji inu, ko m̄ernen pimrreni inu piasi jer wore mimrreni tata sen, ko tasu sen, ko ni wor nesen sen, ko natun nir, ko tuwan nir, ko jodin nir, ko ni kele wor mauren sen. Ko ngok m̄ernen orongwos pivi jinibb suk san vajin. <sup>27</sup> Ko isi nga sete muwosi nai pelaot sen ko mivijurik, ni sete orongwos pivi jinibb suk san.

<sup>28</sup> "Ko poro kami san pimrreni p̄ili naim nga muwu mare temijpal san, ko setemun p̄ilik ngatan te purrorrmi suri lat nga nowlin puto surie pirpese, ni evtete puwli jile rreknga ejki? <sup>29</sup> Poro pirpe nga ngok, ko ni titipatun bbong, ko tia-runge turrow reнге ni, tuloli bbong ngatan nen ko. Ko ngok sete tivter mun tia-loli jijle; ko jinibb nir tarlesi ko tarmen keraji ni reнге, <sup>30</sup> tarwera 'Merel emajinge naim ngel, ko setemun evtete nga pimajing jijle mun, omrrol ren.'

<sup>31</sup> "Ko poro nga numal san piptevi jinibb nuval pivi nuvasngavöl vasngavöl vesan (10,000), paran parval tevi numal minij san nga miptevi jinibb nuval mivi nuvasngavöl vasngavöl varu (20,000) mivini tevir nga parval tevi nir. Numal nen p̄ilik ko wor ngatan purrorrmi suri lat nga puto surie puwomu, poro nga ni eterter evtete nga pival tevi numal minij nen, rreknga ejki. <sup>32</sup> Ko poro pijki, ko ni pukoni jinibb sapon parivel ore numal nen tuwen nen, parsewute reнге sel reнге daron nga ni mivel malum ngasue, ko parngoni demat tevi." <sup>33</sup> Iesu ewer otvi nale sen, owra erpel le: "Ko erpok ko, poro kami san sete pivel lingi jile nanu nga marivi sen nir, m̄ernen sete orongwos pivi jinibb suk te, ejki.

*Sol nga dilten musuw reнге*

<sup>34</sup> "Sol erres; ko poro dilten nga mimelmel pusuw jer reнге, ko parloli lweni pimelmel luwi pirpese ko? <sup>35</sup> Sete erres rragrag mun reнге parloli nanu kele e san, nanu nga m̄irres rreknga nanu nga m̄isij. Parwirre kobbong p̄irresres. Mer nga boron mutoe, purnge re nolo boron."

## 15

*Nale rrongrrongvi ne sipsip nga mijki*

<sup>1</sup> Renge nabong san, ko jinibb nga marok-la nevöt ne takis nir ko jinibb nga marsij nga marwirr tweni nir arini armur-rarronge Iesu. <sup>2</sup> Ko Parasi nir ko jinibb ne nevisvisenien ne nale neseseien nir arlesi, ko artipatun arok-sur vijvij malum bbong arok-wor suri Iesu, arwera "Merel okorti tevi jinibb nga marsij nir ko eaan tevir." <sup>3</sup> Ko Iesu ornge marwerai, ko owra nale rrongrrongvi san tevir, owra <sup>4</sup> "Poru nga san reнге kami sipsip sen ongut vesan (100), ko san pijjiki lingir, ko erpese, ni sete orongwos p̄ilngilngi ngavöl esiw drromon esiw (99) ngok reнге lolo merwer parurro mösmös, ko ni pipej nga mijijki nen, pian pijjari nga p̄iska lweni? <sup>5</sup> Pian ko wor, ko daron nga m̄iska lweni, ko owosi elngi ejingteni reнге birparin, ko eir nga eir lengleng. <sup>6</sup> Ko daron nga muwosi lweni vini ngaim e, ko everus

kortoni selen nir nga marlik ngasue ni ko nga marlik mori bbong ni, ko owrai tevir, 'Kerr rrařir, suri nuska lweni pa sipsip suk nga mijijki nga.' <sup>7</sup> Ko inu nuwrai tevi kami, pirkok ko reнге melrin. Nir parir lengleng suri jinibb sansan nga řisij nga nolon mulululwi, řiasi ngavöl esiw drromon esiw nga marok-wera lweni kis pae nga marivi jinibb nga marres, ko armusus nolor pulululwi.

*Nale rrongrrongvi ne nevöt nga welili san nga mijijki*

<sup>8</sup> "Ko nesevin si reнге kami poro řilngi silva pisngavöl ko pisansan pijijki, ko erpe? Ni pusli laet ko puraki vaseni loloim, pipej pian pijpari nga piska lweni. <sup>9</sup> Ko daron nga vinnen řiskai lweni, ko everus kortoni selen nir nga marlik ngasue ni ko nir nga marlik mori bbong ni ko owrai tevir, owra 'Kerr rrařir, suri nuska lweni pa silva suk nga mijijki nga.' <sup>10</sup> Ko inu nuwrai tevi kami, pirkok ko reнге no anglo se Atua. Nir parir lengleng suri jinibb sansan bbong nga řisij nga mijijki nen, nga nolon mululwi mirpel."

*Nale rrongrrongvi ne řelakel nga murtor jabble sel*

<sup>11</sup> Ko Iesu owra "Jinibb san nga natun eru morivi norman. <sup>12</sup> Ko ngok řervitu nen evan ji tata sen ko ongoni tevi, owra 'Tata, kuptutweni jorom nga parivi se komru nen nir, pivsivse komru korti.' Ko ni otutweni joron tevi nuru korti. <sup>13</sup> Mian ko nabong sete elep mun, ko řervitu nen eser kortoni joron jijle nir ko evel evan reнге ngaim nga milep san nga muto ngasu. Ko elik ie, ko etipatan olokloksi řetřeti joron reнге norrorrmien sen nga sete murrormi řirres e.

<sup>14</sup> "Ko daron nga mulokloksi řetřeti joron e nir, ko numer nga milep eimare reнге ngaim nen; ko ejki mun, ni joron arsuwsuw řetřeti pa. <sup>15</sup> Ko ni lweni evan emajing se jinibb ne ngaim nen san. Ko řiernen okoni ni evan reнге orsel nga marok-wungani řerřer sen nir reнге, nga pok-wungani řerřer sen nir. Ko reнге marwungani řerřer, řeri Isrel nir arlesi evi majingen san nga řisij řerřer. <sup>16</sup> Ko ni numer aji lenglengen e, ko sete san ela nanen rragrag san tevi nga purroi; ko ngok ololi emrreni lenglengen e purro nanen se řerřer nir sopen, nga puloli pup e. <sup>17</sup> Mian ko nolon olwi, orrorrmi lweni tata sen vajin, ko owra 'Aro, jinibb ne majingen se tata nir elep wor, ko nanen evtere nir řetřeti, ko majbböl nen ojon; ko suri sev inu bemij e numer iel! <sup>18</sup> Erres ma inu bemra iel, ko bolwi van ji tata. Ko bowrai tevi ni, "Tata, inu nuloli esij reнге no Atua ko reнге no nik kele. <sup>19</sup> Ko

ngok inu setemun nures reнге nga jinibb parwera inu nuvi natum san, ejki mun. Ko kuploli inu ma bevi jinibb ne majingen som san.'" <sup>20</sup> Ko ni otur imare ko evel, pivini ji tata sen e.

"Ko daron nga mivel ngasu malum mivini, ko tata sen elesi. Ko orrorrmi temijpale. Ko owlu tersele ko pa, evan ko erake totoni, ko orromji. <sup>21</sup> Ko natun owrai tevi ni "Tata, inu nuloli esij reнге no Atua ko reнге no nik kele. Inu setemun nures reнге nga jinibb parwera inu nuvi natum san.'" <sup>22</sup> Ko tata sen everuse jinibb ne majingen sen nir, owra 'Kapsaro pingavil, kapla sunsun nga řirresřres asi nen, kaploli ni puri. Ko kapla ring suk ko kaploli řirae re bbösö nevren, ko kaploli řirae but. <sup>23</sup> Ko kapan kaprevji natu buluk san nga milep řirres; ko rrapurroi, ko kerr rrařir vajin. <sup>24</sup> Suri natuk ngel erpe emij le pa osuw, ko emaur luwi kele. Ni erpe ejijki le pa, ko nulesi lweni kele.' Ko nir artipatun arir vajin.

<sup>25</sup> "Ko ni natun norman nga wowomu nen ejkie nir, evel womu evan pa orsel e. Mian ko olwi vini ngaim e. Ko daron nga mivini morie naim, ko ornge drrelar marla nub ko marsew. <sup>26</sup> Ko ni everuse jinibb ne majingen se tata sen san vini jin, ko osusi tevi owra 'Sev ko ngok?' <sup>27</sup> Ko řiernen owra lweni tevi ni, owra 'O, tasim olwi vini ngaim, ko niko tata som erevji natu buluk nga milep řirres san reнге, suri ni řilesi natun mulwi vini mimaur malum bbong.' <sup>28</sup> Ko ni ololar e, omusus pian loloim. Ko tata sen eivare vini vare e ko evini jin, ko eiari ni nga pian loloim. <sup>29</sup> Ko ni owra lweni tevi tata sen, owra 'Kuplesi, inu numajing som sia sia, nurpe jinibb ne majingen som san. Ko sete nutor otvi nale neserrien som san, ejki rres nawon. Ko nik sete kula nanu san rragrag tevik. Sete kula nanani san tevik nga inu bololi nanen e san tevi selek nir ko nařir. <sup>30</sup> Ko daron nga ma natum ngel nga mulokloksi řetřeti joron nir tevi nesevin ne sel nir mivini e, ko nik kutur imare, kurevji natu buluk nga milep řirres reнге ni!' <sup>31</sup> Ko tata sen owra lweni tevi ni owra 'Natuk, nik kulik tevik tetajer ko pa, ko ngok nanu jile nga marivi suk arivi som ko pa. <sup>32</sup> Niko erres kerr rrařaan vajin ko rrařir, suri tasim ngel erpe emij ko pa ko emaur luwi; ko ejijki ko pa, ko rramlesi lweni kele.' "

## 16

*Nale rrongrrongvi ne burtur nga majingen sen sete muloli momsawos*

<sup>1</sup> Ko Iesu owrai tevi jinibb sen nir, owra "Numal san joron elep. Ko ni elngi jinibb ne majingen sen san nga pimmetete nijor

sen nir. Ko mian ko jinibb sopor arini ji numal nen, ko arwera 'O, jinibb som ngok olokloksi jorom nir.' <sup>2</sup> Ko numal nen everuse m̄er nga mivi burtur rengo joron nen vini jin, ko owrai tevi 'Sev le ngel nga inu morngwe rengo nik? Kupsuw ko pa, setemun kuma-ivi burtur rengo inu jorok nir. Kupan kupuli tweni lat nga komok-majing muto suri, ko san kele p̄ila wanim.' <sup>3</sup> Ko burtur nen orrorrmi rengo nolon, owra 'Inu bololi sev le, suri numal suk p̄ila tweni inu rengo majingen suk? Ko inu derteren suk sete ewter rengo nga b̄eli dan orsel, ko numanun kele rengo nga bongungun.' <sup>4</sup> Mian ko owra 'E! Inu nurongwos pae lat nga bololi surie rengo daron nga numal suk p̄ila tweni majingen suk jik, puloli jinibb nir parmarong kobbong nga inu bean loloim se nir.' <sup>5</sup> Ko ni everuse jinibb nga marloli nivnon ji numal sen arini jin. Ko osusi womue tevi nir san, owra 'Nik kuloli nivnon e sev ji numal suk?' <sup>6</sup> Ko m̄er nga mususi womu nen e tevi owra lweni tevi, owra 'Inu nuloli nivnon e dram oel ongut (100).' Ko burtur nen owra lweni tevi, 'Naul nen le ngel, kuplai ko kupuli pingavöl pielim (50) kobbong rengen.' <sup>7</sup> Ko osusi kele tevi nir san, owra 'Ko nik kuloli nivnon e sev?' Ko m̄ernen owrai tevi, owra 'Inu nuloli nivnon e bak wit evi nuvasngavöl vesan (1000).' Ko burtur nen owra lweni tevi 'Naul nen le ngel, kuplai ko kupuli ongut valim (500) kobbong rengen.' <sup>8</sup> Ko numal se m̄er nga mivi burtur nga sete muloli mumomsawos nga owra 'O, morok norrorrmi sen engavilvil nawon, orongwos kemkan̄e lat nga puloli surie!' Suri jinibb ne iel ngatan nir arongwose asie nir nga marlik rengo moron.

#### *Sel nga marwulwule nevöt*

<sup>9</sup> "Kami kele kaploli pirpe morok, kapla nijor ne iel ngatan nir, ko kaplair tevi jinibb nir. Ngok puloli nir parir suri kami, ko partekai kami van rengo naim nga rengo melrin nir rrek! <sup>10</sup> Ejki! Mer nga m̄irres rengo puloli nanu nga welili bbong, ngok ni p̄irres rengo puloli kele nanu nga milep. Ko m̄er nga sete erres rengo puloli nanu nga welili bbong, ngok ni sete mia-rres rengo puloli nanu nga milep kele. <sup>11</sup> Erpok ko, poro sete kamloli erres rengo nijor ne iel ngatan nir, ko si p̄ila nijor nga marres weretunen ne melrin tevi kami kapmetmeter? <sup>12</sup> Ko poro sete kamrres rengo kapmetmete nijor se jinibb m̄inij, si p̄ilai tevi kami nijor nga parivi se kami?"

*Jinibb san sete orongwose p̄imajing se numal pieru pivesane*

<sup>13</sup> "Sete jinibb san orongwose p̄imajing se numal pieru pivesane. Poro p̄irpok,

ko tungasi nuru tuwen, ko timrreni nuru tuwen nen. Erpok ko, sete Atua orongwos pukonim re majingen sen poro nevöt mukonim pa rengo majingen sen. Suri sete kurongwos kupmajing se nuru korti evesane."

#### *Parasi nir arok-merreni temijpale nevöt*

<sup>14</sup> Ko Parasi nir arok-merreni temijpale nevöt, ko daron nga marunge nanu nga Iesu muwrair ngok e nir, ko armen kerajie. <sup>15</sup> Ko Iesu owrai tevi nir owra "Kami ngok ko kamivi lartul nga tetajer kamwera kamrres rengo mete jinibb. Ko Atua orongwose nolo kami. Ko sev nga marloli mian mare rengo jinibb bbong, ngok sete evi nanu san rragrag rengo no Atua.

#### *Jinibb arpelak tweni nga paran rengo batun vanu se Atua*

<sup>16</sup> "Nale neseseiren oto ko pa, ko nale se propet nir arto ko pa, mian ko mivini mijpari daron se Jon Baptaes vajin. Ko rengo daron nen mawos ko vajin, marwerwer rengo nospen nga m̄irres; ko jinibb arpelak temijpal arwera paran rengo batun vanu se Atua. <sup>17</sup> Ko evi nanu nga m̄iterter rengo melrin ko iel ngatan porjijki; ko evi nanu nga m̄iterter kele wor m̄iasi san rengo bebje nale ne nale neseseiren ngel san pijijki.

<sup>18</sup> "Erpok ko, jinibb si nga p̄ilngi kurtweni nesen sen ko p̄itkai kele nesevin m̄inij san, erpe evitan re nesevin ngok ko vajin. Ko m̄er nga m̄itkai kele nesevin nga diwen sen m̄ilngi kurtweni, ni kele evitan re nesevin ngok."

#### *Nale rrongrongvi ne m̄er nga joron milep ko Lasros*

<sup>19</sup> Ko Iesu ela jilweren kele san erpel: "Jinibb san nga joron milep elik lat san. Ko ni tetajer ok-uri sunsun nga nulser marres p̄elak marsongsong, ko marow raprap titis, ko marmalum marres. Ko nabong jille eaan erres ko eir, elelea. <sup>20</sup> Ko jinibb san nga mivi b̄eres nga mok-ngun-ngun res nga miwajie Lasros elik ie rengo metali se m̄er nga joron milep nen. Ko m̄ernen niben nir arkar p̄etp̄eti. <sup>21</sup> Ko ni emrreni lengleng pok-rroi bebje nanen nga marvitvitan rengo tep se m̄er nga joron milep nen. Ko ejki; ko guli arok-ini arok-lomlomi niben nga markar nir. <sup>22</sup> Mian ko vitunen vajin ko b̄eres nga mok-ngun-ngun res nga emij. Ko anglo nir arwosi ni van rengo melrin ji Epram, ko elik lilji nelin. Mian ko vitunen vajin, ko m̄er nga joron milep nga ea-mij vajin, ko artevni. <sup>23</sup> Ko ni elik rengo lat ne mijen, ko ornge esij elep lengleng. Ko daron nga moro muklu, ko elesi Epram iokwan ngasu jer, ko Lasros emajil rengo morkon. <sup>24</sup> Ko ni ekail everus

owra 'Tata Epram, warru kuprroormi inu! Kupkoni Lasros pian purrurrongoni bbös nevrean pisansan renge nuwi, ko puloli pujum renge nemek, ko pimemrrali. Suri inu nurunge esij nga esij lengleng renge lomi nabb ngel.' <sup>25</sup> Ko Epram owra lweni tevi, owra 'Natuk, kuprroormi renge daron nga nik kummaur e. Nik kulesi nanu jile arres vinuk jim; ko Lasros ornge esij elep, elesi nanu jile arsij vini jin. Ko renge lelingen ngel vajin ni ela lol molmol, ornge erres; ko nik kulik renge lat ne norongen nga misij, kurnge esij. <sup>26</sup> Ko nanu san muto ngok liven ne kem ko kami, evi mesa nga milep. Ko ngok nir nga parwera parasi vinuk ji kami sete arloli wos parasi vinuk ji kami, ko kami sete kamrongwose kapasi vini ji kem iel.' <sup>27</sup> Ko mian ko mïer nga joron milep nga owra lweni tevi owra 'Tata, nungoni tevi nik, warru kupkoni Lasros pulwi kele van renge naim se tata suk. <sup>28</sup> Suri inu tasik elim, ko erres ma renge ni pian ko pusudur metu tevi nir, ko puloli nga nir sete parini kele iel renge lat nga inu morngë misij ngel e.' <sup>29</sup> Ko Epram owra lweni tevi mïer nga joron milep nga owra 'O, ejki, tasim nir, naul se Moses ko naul se propet nir arto pa jir. Naul ser nen ko pa nir parsudur metu tevir.' <sup>30</sup> Mer nga joron milep owra lweni tevi owra 'O, ejki, tata Epram, poro ma san pimaaur luwi ko wor renge mijen ko pian jir, ko ngok ko ma nir nolor pululwi ko renge nololien ser nir!' <sup>31</sup> Ko Epram owra lweni tevi, 'Poro nir sete parunge nale ne naul se Moses ko nale ne naul se propet nir, ko ngok nir parirpok kele kobbong renge nga poro san pimaaur luwi renge mijen; sete mara-osuri te, ejki.' "

## 17

*Jinibb nga muloli jinibb mïnij mijilaklak mivitan van renge nololien*

<sup>1</sup> Iesu owrai tevi jinibb sen nir owra "Nanu nga parloli jinibb parjilaklak parvitan van renge nololien parini ko wor, sete orongwos pijki. Iok ewretun, ko wi pia-sij wor niko renge mïer nga pia-la nanu ngok nir parpelari! <sup>2</sup> Erres ðelak poro nga parsaro puwomu pingavil parla nevöt nga milep ko san, ko parile dil renge mïernen nowen ko parjuröni ngalu renge dis mot, ðiasie nga poro puloli nir nga welili ngel san þijilaklak pivitan van renge nololien.

*Jinibb þitlasi tweni nololien se jinibb ko wor*

<sup>3</sup> "Kami kapmetmet lululweni kami lweni ko wor. Poro tuwam rreknga tasim

puloli þisij tevim, ko nik kupwera lilane ko wor tevi ni. Ko poro nolon pulululwi, ko kuptelasi tweni nololien sen. <sup>4</sup> Ko poro puloli þisij tevi nik pivavis kis renge nabong sansan bbong, ko ngok poro pulwi vini jim puwra nolon olululwi, ko ngok, nik kuptelasi tweni ko wor."

*Nosurien se jinibb nga muosuri Atua*

<sup>5</sup> Ko aposol nir arwerai tevi Iesu arwera "Numal, kuploli nosurien se kem puruj kele wor van mare." <sup>6</sup> Ko Numal owra lweni tevir owra "Po, ko poro nosurien se kami puwelili bbong pirpe jelangi nubek,<sup>D</sup> ko kamrongwos kapwerai tevi nai sik-mon nga milep ngel, 'Nik lweni kuprrangi twenim ko kupan kuptur renge dis,' ko ni puloli kobbong pirpe nga kami kamwerai ngok ko tevi.

*Murrun se jinibb nga mïmajing*

<sup>7</sup> "Ko isi niko renge kami poro jinibb ne majingen sen þimajing renge orsel þilawlaw rreknga pimete sipsip, ko poro pulwi vini ngaim e, ko nik kupwerai tevi, 'Erres, kupsaro pingavil, kuptajer ko pa kupaan.' <sup>8</sup> Ejki rres nawon, nik kupwerai ma tevi 'Nik kuploli nanen suk puto teraik, ko nik kupla netatuw som ko kuptatuwe ko kupselsale nanen suk daron nga inu ðeaan e, ko beminmin jile mun pusuw. Ko vitunen vajin ko nik ko kupa-aan ko kupa-minmin.' <sup>9</sup> Ko kami kamrroormi numal nen owra erres tevi jinibb ne majingen sen suri nga muloli nanu ngel nir nga ni muwrai? Ejki! Evi wor nanu nga puloli ko. <sup>10</sup> Ko kami kele kapirpok, kaploli nanu jile nga inu nuwrai tevi kami nga kaploli, ko ngok ololi kami kapwera vajin 'Niko erres ko wor, kem ngel namivi bbong jinibb ne majingen som le, osorsan ko wor renge nabloli þirpok.' "

*Iesu ololi jinibb esngavöl nga marmesi e mesien nga niber mïmemaual arwokwok luwi*

<sup>11</sup> Ko daron nga marivel suri sel nga paran Jerusalem e, ko Iesu eptevir arivel rrurungi renge liven ne Sameria ko Galili. <sup>12</sup> Ko aran laut renge ngaim nen san. Ko jinibb nga marmesi e mesien nga niber mïmemaual esngavöl arini ji Iesu. Ko sete arini morie, artur bbong ngasu. <sup>13</sup> Ko arverus van jin, arwera "Iesu, Numal, warru kuprroormi kem!" <sup>14</sup> Ko Iesu okdu van emtenir, ko owrai tevir "Kami kapan ji batun jinibb ne sulsulen ko kaploli ni pununri kami." Ko daron nga marok-ivel suri bbong sel malum e vini, ko nir jile arwokwok pa osuw. <sup>15</sup> Ko san renge nir nga esngavöl ngok mïlesi muwokwok ko

<sup>D</sup> 17:6 Erpe iel, Luk orrongrongvi nosurien ser erpe jelangi mastat; ko suri mastat ejki iel, namlingi nubek, nga puloli mining ne nale se Luk piplari limjer.

olwi vini ko osrövi Atua drrelan ean mare jer. <sup>16</sup> Ko daron nga mivini ji Iesu, ko ejipa van ngatan renge dan re ßela Iesu, ko owra erres tevi ni. Ko mñernen evi mñeri Sameria ko. <sup>17</sup> Ko Iesu osusi lweni owra “Nuwrate nga nuloli nir esngavöl ko arres arwokwok luwi, ko nibeni nir esiw? <sup>18</sup> Sete nir san orongwos pulwi vini pusrövi Atua, mñerel ßbong esan nga mivi jinibb neturvitan!” <sup>19</sup> Ko ni owrai tevi mñernen, “Kuptur imare ko kupvijuri sel som, ko kupluwi. Nosurien som ololim kumwokwok ko kumrres.”

*Batun vanu se Atua pivini seveling*

<sup>20</sup> Ko Parasi sopor arsuvi tevi Iesu arwera “Batun vanu se Atua pivini seveling?” Ko Iesu owra lweni tevir owra “Batun vanu se Atua sete orongwos pivini renge sel nga parlesi rengen. <sup>21</sup> Sete jinibb san puwrai tevi nik, ‘Kuplesi ngel’, rreknga ‘Kuplesi ngokwan,’ ejki. Batun vanu se Atua oto pa renge nolo jinibb.”

*Nabong se Jinibb Mawos pivini*

<sup>22</sup> Ko Iesu owrai tevi jinibb sen nir owra “Mian ko daron nen pia-vini nga kami kapmerreni kaplesi nabong se Jinibb Mawos, ko kami sete kamrongwos kaplesi. <sup>23</sup> Ko jinibb nir arongwos parwerai tevi kami, parwera ‘Kaplesi ngokwan!’, rreknga ‘Kaplesi ngel!’, ko ngok kami sete kapan kapkulkulu pej te, pijki. <sup>24</sup> Erpe navil nga mivil, daron nga mivil renge devje melrin ko mimor vaseni melrin ßetßeti mivesane mijpari devjen, nga jinibb jikle nir marlesi. Ko ngok pia-irpok renge inu Jinibb Mawos renge daron nga bea-luwi vini. <sup>25</sup> Ko womunen inu borngre ßisij renge nanu pilep renge dul nga marmaur lelingen ngel parloli tevik.

<sup>26</sup> “Erpe renge daron se Noa tuwi jinibb nir arlelea nawon, ko ngok piprok ko renge nabong se inu Jinibb Mawos. <sup>27</sup> Renge daron nen ko jinibb araan ko arminmin ko arlesi nesevin, ko armusos parunge nale se Noa, mianan mijpari daron nga Noa mian renge lolo drrav nga muwse; ko nuwi owlu ko ervei jinibb nir, ko armij ßetßeti. <sup>28</sup> Pirpe kele nabong se Lot. Jinibb araan ko arminmin ko arwulwul ko aruw ko arilili naim nir. <sup>29</sup> Ko mian ko mijpari daron nga Lot mivel lingi Sotom e, ko nabb ko nevöt nga marin arvitvitan renge melrin erpe naus nga mus, ko osli nir, arin ßetßeti arivi niavin. <sup>30</sup> Ngok nabong se inu Jinibb Mawos nga bevini rengen pusorsan tevi ko piprok.

<sup>31</sup> “Ko renge nabong nen, mñer nga mñililik vare renge naim sen ko joron marto renge loloim, ni sete pian kele mun ßila twenir.

Ko mñer nga mutur renge orsel, ni sete puwlu luwi kele mun van renge naim sen nga ßila joron. <sup>32</sup> Kaprrorrmu sev nga miplari ji nesen se Lot. <sup>33</sup> Si nga mimreni ßila se mauren sen, mñernen putor jabble mauren sen. Ko si nga ma mutor jabble mauren sen, ni pia-la lweni mauren sen. <sup>34</sup> Ko inu nuwrai tevi kami, renge nat nga mupong nen, jinibb ßieru pormatur renge maling pisansan; ko parteka tweni tuwen, ko nuru tuwen nen ßilik jer. <sup>35</sup> Ko nesevin ßieru porlik lat pisansan parvarrvarr; ko nuru tuwen parteka tweni, ko nuru tuwen ßilik jer. <sup>36</sup> [Jinibb ßieru pormajing renge orsel; tuwen parteka tweni, ko nuru tuwen ßilik jer.]<sup>E</sup> <sup>37</sup> Ko jinibb sen nir arwera lweni tevi “Ngabe ko, Numal?” Ko Iesu owra lweni tevir owra “Lat nen kapalesi wos ßbonge ko. Pirpe daron nga nanu san emij, ko numön nir nga maroktasi parmot rrале; orongwos kaplesi wose kobbong ngasu.”

## 18

*Nale rrongrrongvi ne nesevin san nga mok-julnñi suri numal san*

<sup>1</sup> Ko Iesu owra nale rrongrrongvi san tevi jinibb sen nir nga pivisvisenir e nga parlot tetajer, sete partibtibbot e. <sup>2</sup> Owra “Numal san elik renge ngaim san. Ko ni sete emtutu rragrag Atua, ko sete orngre jinibb san. <sup>3</sup> Ko renge ngaim nen nesevin san nga diwen sen mimij lingi elik rengen. Ko vinnen evini tetajer ko pa jin, ok-luni suri numal nen nga puloli lilane nanu nga muto jin ko ji devje nuval sen. <sup>4</sup> Ko numal nen omusus puloli. Epriv wor mian, ko vitunen vajin ni lweni orrorrmi lweni ko owra ‘Inu sete numtutu Atua ko sete nurngre jinibb san. <sup>5</sup> Ko suri vinel mutor momorie pa mivini ko mivijajeng jik, ko bololi ma nanu nga muwrai. Poro pijki, ko ngok puloli inu sete numa-lik mñrres rragrag, pivijajeng inu ko tetajer.’

<sup>6</sup> “Ko kami kamrunge sev nga numal nga mñisij nen muwrai. <sup>7</sup> Ko erpese renge Atua ko jinibb sen nir nga mutobbtobbue nir, nga marngir suri ni renge nata mñirin ko nata mupong? Kami kamrrorrmu ni orongwos pulolola renge puloli nanu nga marngir suri ngok e? <sup>8</sup> Inu nuwrai tevi kami, Atua pisaro pingavil, puloli lilane nanu nen tevir.

Ko inu Jinibb Mawos renge daron nga bea-luwi vini e, ko bea-lesi nosurien puto malum renge jinibb ne iel ngatan nir, rreknga ejki mun?”

<sup>E</sup> 17:36 Nale nga muto re nolo [ ], rrek sete Luk oli, ko jinibb san ea-uli vitue daron nga muli tweni kopi san ne naul ngel.

*Nale rrongrrongvi ne Parasi ko jinibb nga mok-la nevöt ne takis*

<sup>9</sup> Ko Iesu owra nale rrongrrongvi san tevi jinibb nir nga marok-linglingi lweni nir lweni marok-wera marres, ko marok-kulu wutan re jinibb m̄inij nen nir. <sup>10</sup> "Jinibb eru oran loloim renge naim ne loten nga porlot. Nuru tuwen evi Parasi, ko nuru tuwen nen evi jinibb nga mok-la nevöt ne takis. <sup>11</sup> Ko Parasi esan otur ko olot owra 'Atua, nuwra erres wor tevi nik, suri nga inu sete nurpe jinibb nga ngok nir nga marok-vevna ko marok-loli nanu nga sete marres, ko marok-loli m̄isij tevi nesevin nir. Ko inu sete nurpe kele m̄er nga mok-la nevöt ne takis ngel. <sup>12</sup> Renge wik jile inu nomok-linglingi nanen renge nabong nen eru, ko jorok nir, nomok-la songovlön tevi nik tetajer.'

<sup>13</sup> "Ko m̄er nga mok-la nevöt ne takis nen otur tuwi ngasu, ko sete oklu imare emteni melrin, ejki. Ko owjuwe morkon nga miviseni nga murnge m̄isij, ko owra 'Atua, kuprormi inu! Nuvi jinibb nga m̄isij.' <sup>14</sup> Ko Iesu owrai tevi nir, owra "Nuwrai tevi kami, m̄erel ko, daron nga morivare, ko ni ko evi m̄er nga mumomsawos renge no Atua nen, ko sete nuru tuwen nen. Suri m̄er nga m̄ilngi ni van mare, ko Atua puloli ni pian ngatan; ko m̄er nga m̄ilngi ni van ngatan, ko Atua p̄ilngi ni van mare."

*Iesu erij erres suri bipiwarreng*

<sup>15</sup> Ko jinibb sopor arpitevi bipiwarreng ser nir arini ji Iesu nga ni p̄ilngi nevren rer ko p̄irij p̄irres surir. Ko daron nga jinibb sen nir marlesi, ko arwer orer sete paran jin, pijki. <sup>16</sup> Ko Iesu everus nir paran jin. Ko owra "Kaplinglingi bipiwarreng nir parini jik, sete kapwer orer te, pijki. Suri batun vanu se Atua evi se nir ko nga nolor marirpe bipiwarreng ngok nir. <sup>17</sup> Nuwretun nuwrai tevi kami, Mer nga sete puloli nolon pivini pirpe bipiwarreng, ni sete orongwos pian renge batun vanu se Atua."

*Jinibb san nga joron milep emrreni p̄ila mauren nga muto tuwi ngok vini*

<sup>18</sup> Ko m̄erwomu san re m̄eri Isrel nir osusi tevi Iesu, owra "Wurru, jinibb nevisvisenien nga m̄irres, bololi pirpese ko bela mauren nga muto tuwi ngok vini?" <sup>19</sup> Ko Iesu owra lweni tuwi m̄ernen, owra "Erpese nik kumverus inu m̄erres? Sete san erres, Atua kobbong esan erres. <sup>20</sup> Ko nik kurongwose pae nale neseseien se Atua nga muwra 'Nik sete kupvenae nesevin, ko sete kuprevji pini jinibb, ko sete kupvevna, ko sete kupkerkeris, ko kuptori tata som ko tasu som.'" <sup>21</sup> Ko ni

owra "Nanu ngok nir, inu nulolir jile pa renge daron nga bbong mevi nanwarreng e ko mijpari lelingen ngel." <sup>22</sup> Ko daron nga Iesu murnge muwrai mirpok, ko owra lweni tevi owra "Nanu sansan kob-bong ojpon evi nga kummerreni malume. Jorom nir kupwulwul p̄etp̄eti nir, ko kup-tutweni nevöt ner tevi beres nir. Ko nik jorom pia-to renge melrin. Ko kupini kupvijurik."

<sup>23</sup> Ko daron nga m̄ernen murnge nale ngel e, ornge lengleng esij e. Suri ni evi jinibb nga joron milep san. <sup>24</sup> Ko Iesu elesi nga m̄ernen ornge lengleng esij e. Ko owra "Evi nanu nga m̄iterter milep nga jinibb nga joron milep pian renge batun vanu se Atua. <sup>25</sup> Erpe nato, eterter temijpal renge liwen pietiv.F Ko nga jinibb nga joron milep pian renge batun vanu se Atua, eterter temijpal wor asie ngok."

<sup>26</sup> Lartul nga marunge muwrai mirpok arwera lweni tevi, "Aro, poro pirpok ko isi ko ma p̄iasi pimaaur?" <sup>27</sup> Ko Iesu owra lweni tevir "Sev nga m̄iterter re jinibb puloli, sete eterter rragrrag renge nga Atua puloli." <sup>28</sup> Ko ngok ololi Pita owra lweni tevi, "Ko kuplesi, kem namiel lingi nanu jijle nga marivi se kem nir arjipon, ko namvijuri nik." <sup>29</sup> Ko Iesu owra lweni tevir "Inu nuwretun nuwrai tevi kami, m̄er nga mivel lingi naim sen, rreknga nesen sen, rreknga tuwan tevi tasin nir, rreknga tata sen tevi tasu sen, rreknga natun nir, suri batun vanu se Atua, <sup>30</sup> m̄ernen pia-lai pilep kele wor renge daron nga lelingen ngel; ko renge daron nga para-vini, ko ni pia-la mauren nga muto tuwi ngok vini."

*Iesu ospe sur mijen sen vatolin*

<sup>31</sup> Ko Iesu eptevi jinibb sen nir arsan kis, ko owrai tevir owra "Kaplesi, rramtongsa le van mare e renge Jerusalem. Ko nanu jile nga propet nir maruli tuwi suri inu Jinibb Mawos parpelari ko wor. <sup>32</sup> Partekai inu van ji jinibb ne vare, ko partetnije inu ko parlutövi inu. <sup>33</sup> Ko nir parvirralik ko parevji pinik. Ko nabong p̄itul, ko inu bemaaur luwi kele." <sup>34</sup> Ko jinibb sen nir arlleng sisini nale nga muwrai ngel, ko sete arongwose rragrrage sapon.

*Iesu ololi jinibb san nga meten murrorr oklu luwi*

<sup>35</sup> Ko Iesu otutur suri sel evan morie Jeriko. Ko jinibb san nga mok-ngun-ngun nga meten murrorr, elik renge jeli sel. <sup>36</sup> Ko daron nga m̄er nga meten murrorr nen murnge delung jinibb nga milep marivel asi renge sel, ko osusi owra "A, sev ko ngok?" <sup>37</sup> Ko nir arwera lweni tevi

F 18:25 Erpe iel, Luk ospe kamel p̄isil rrrrungi batu nitel san nolon. Ko suri kamel ejki iel, namsupe nato ela wani.



arwera “Iesu ne doNasret ko mīasi ngok.”  
<sup>38</sup> Ko daron nga murnge, ko ekail everus van mare owra “Iesu, nik Devet metka sen, kuprroirmi inu!”  
<sup>39</sup> Ko jinibb nga martur van womue renga lat nga non mimawos e arwera ore ni, arwera “Kupmurrarrong!”  
 Ko ni ea-verus temijpal kele ko ma van mare lengleng, owra “Nik Devet metka sen, warru kuprroirmi inu!”  
<sup>40</sup> Ko Iesu otur murrong, ko owra partekai ni van jin. Ko daron nga mivel vini mori ji Iesu, ko osusi tevi,  
<sup>41</sup> owra “Nik kumarong nga inu bololi sev tevi nik?”  
 Ko metrroir nen owra lweni tevi owra “Numal, numrreni kuploli metek puklu!”  
<sup>42</sup> Ko Iesu owra lweni tevi owra “Kupkulu! Nosurien som ololi nik kumrres.”  
<sup>43</sup> Ko meten oklu evesane. Ko evijuri Iesu, ko osrōvi Atua. Ko daron nga delung nir marlesi e, ko arsurōvi Atua.

## 19

### *Iesu ko Sakias*

<sup>1</sup> Ko Iesu evijuri sel van renga Jeriko e, nga piasa lingi ie vajin; <sup>2</sup> ko jinibb san nga nisen Sakias elik renga iok. Ko ngok renga nir nga marok-la nevōt ne takis, ni evi jinibb nga milep rer, ko evi jinibb nga joron milep kele. <sup>3</sup> Ni okluklu pej Iesu, owra pīlesi wose evi jinibb nga mirpese ko. Ko sete orongwos pīleslesi, suri ni evi jinibb nga mumrrol jer, ko delung elep pelak. <sup>4</sup> Ko owlu wowomu sie delung nir, ko ean esa renga druru nai san nga mirpe nai sikmon, emrreni pīlesi wose Iesu renga daron nga pia-asi renga sel nen.

<sup>5</sup> Ko daron nga Iesu mivel vini mumom-sawose lat nen, ko esarrerr imare emteni, ko owrai tevi owra “Sakias, kupsaro pingavil, kupjubbul vini ngatan e. Suri nga lelingen inu belik renga loloim som.”  
<sup>6</sup> Ko Sakias esaro ngavil, ojubbul vini ngatan e, ko eptevi Iesu. Ko eir lengleng.

<sup>7</sup> Ko daron nga delung marlesi e ko arwor surie, arwera “Ni evan renga naim se jinibb nga nīsij!”

<sup>8</sup> Ko daron nga marsakel vajin re naim se Sakias, ko Sakias otur mare ko owrai tevi Numal owra “Bela wukari jorok nir; devjen bea-lai tevi beres nir, ko devjen pivi suk. Ko poro nuvnae pa joro jinibb san, ko bea-la lweni nanu pivij bea-kele e.”

<sup>9</sup> Ko Iesu owra lweni tevi owra “Lelingen mauren easi vini renga naim ngel, suri nik kele kuvi Epram metka sen san.”  
<sup>10</sup> Suri inu jinibb Mawos nuvini nga nomok-pej nir nga marsarr marjijki nga bela ser.”

*Nale rrongrrongvi ne jinibb nga martori nevōt se numal ser*

<sup>11</sup> Ko daron nga marmurrarrong suri nanu ngel nir e, ko Iesu erij malum ko pa etajer tevi, owra nale rrongrrongvi san.

Suri ni evini mori pa renga Jerusalem e, ko suri nga nir arok-rrorrmī nga batu vanu se Atua pivini pīrmali pingavilvil. <sup>12</sup> Ko ni owra “Jinibb nga miwi jinibb nga milep san owra pian ngasu renga vanu nga milep san, nga parloli ni pivi batu numal ne vanu sen, ko pia-luwi vini.”  
<sup>13</sup> Ko ni everuse jinibb ne majingen sen esngavōl arini ji ni, ko ela nevōt san nga marwera mina esngavōl tevi nir sisamis. Ko owrai tevir, owra ‘Kapla nevōt ngel nir ko kapmajing rer, ko kaprevei kele nevōt sopor parto tevir, pian pijpari renga daron nga inu bolwi vini e.’  
<sup>14</sup> Ko ni evel lingi vanu sen. Ko jinibb sen nir nga renga vanu sen arungasi ni, ko arkoni jinibb sopor arvijuri ni nga parwera ‘Kem sete nammerreni mīerel pivi numal se kem, ejki.’

<sup>15</sup> “Ko daron nga mulwi vini e, nga mīla jile derteren sen erpe batu numal, ko everus jinibb ne majingen sen nen nir nga ni mīla nevōt tevir parini ji ni, nga ni purnge jir nga nir armajing re nevōt nen nir, ko evis nga marlai kele muto tevi. <sup>16</sup> Ko mīerwomu nen evini ko otur womu renga non, ko owra ‘Numal kuplesi, nevōt som le ngel. Ko inu numajing ren, ko nula kele esngavōl oto tevi nga kumlai tevik.’  
<sup>17</sup> Ko ni owrai tevi owra ‘Nik kuloli erres, kuvi jinibb ne majingen nga mīrres. Nik kuloli erres renga nanu nga welili jer bbong. Inu belngi nik kupmetmete ngaim nga marlelep pisngavōl.’  
<sup>18</sup> Ko nir erwen evini kele, ko otur womu renga non, ko owra ‘Numal, kuplesi nevōt som le ngel, ko inu numajing ren, ko nula kele elim oto tevi nga kumlai tevik.’  
<sup>19</sup> Ko ni owrai kele tevi mīernen, owra ‘Nik kele kupivi numal renga ngaim nga marlelep pielim.’  
<sup>20</sup> Ko nir itolin kele evini, ko owra ‘Numal, kuplesi nevōt som le ngel. Inu nulai ko nunbunbe ore e kalek e, ko nulngi oto.’  
<sup>21</sup> Suri numtutue nik; kuvi mīer nga murrum mīterter. Komok-la kele nanu nga nik sete kumlingi, ko komok-la kele nanu nga sete kumruwir.’  
<sup>22</sup> Ko ni owra lweni tevi mīernen owra ‘Nik kuvi jinibb ne majingen nga mīsij, inu bewer lokloksim suri nale som ngok ko nir. Suri nik kurongwose nga inu nuvi jinibb nga murruk mīterter, nomok-la nanu nga sete mīelngir, ko nomok-la nanu nga sete morwir.’  
<sup>23</sup> Ko erpese sete kumla nevōt suk ko kumlingi renga naim ne nevōt lat nga marok-to renga e? Ko daron nga inu bealuwi vini e, ko bea-la lweni nevōt suk tevi majbbōl nen.’  
<sup>24</sup> Ko ni owrai tevi lartul nga martur ie, owra ‘Kapla tweni nevōt nga mutorir jin, ko kaplai tevi mīer nga mutori misngavōl.’  
<sup>25</sup> Ko nir arwera lweni tevi arwera ‘Numal, ko ni otori pa esngavōl osuw!’  
<sup>26</sup> Ko ni owra lweni tevir, owra

'Inu nuwrai tevi kami, nir jile nga martori, parlai kele wor tevir. Ko nir jile nga sete martori, ko beblen nga martori, para-la tweni jir. <sup>27</sup> Ko jinibb suk ngel nir nga marungasi inu ngel, nga sete marmmerreni inu bevi numal ser ngok, kapreveir vini jik, ko kaprevji pinir renge inu nok.' "

*Iesu evan renge Jerusalem ko jinibb nir arsusi nisen van mare*

<sup>28</sup> Ko daron nga Iesu muwra jile nale ngel e, ko otonga wowomu van renge Jerusalem e. <sup>29</sup> Ko daron nga marini mori Betpaj e ko Betani renge botwen nga marveruse Botwen ne lolnai ne olip, ko ni okoni jinibb sen eru, <sup>30</sup> owra "Koporivel, koporwowomu van renge ngaim nga muto mawos kamru ngok. Ko koporlesi natu dongki san ni ko arile totoni otur nga jinibb san setewor esakel rrongvi rengen. Ko koportelasi tweni dalin ko koporile vini. <sup>31</sup> Ko poro jinibb san pususi tevi kamru, 'Erpese komortelasi?', ko kamru koporwera lweni tevi koporwera 'Numal emrreni.' "

<sup>32</sup> Ko laru nga Numal mukoni nuru nen orivel suri sel van, ko orlesi erpe nga Numal muwrai tevi nuru. <sup>33</sup> Ko daron nga mortelasi tweni dil ne natu dongki e, ko lartul nga ser arlesi ko arwera tevi nuru, arwera "Erpese kamru komortelasi tweni dil ne natu dongki?" <sup>34</sup> Ko nuru orwera lweni tevir orwera "Numal le emrreni." <sup>35</sup> Ko nuru orile vini ji Iesu. Ko nir arpelsenin sunsun ser renge drrun, ko arloli Iesu esa esakel rengen. <sup>36</sup> Ko daron nga mivel suri sel e ko nir sopor kele arla sunsun ser ko arpelsenir renge sel.

<sup>37</sup> Ko daron nga ni mivini mori Jerusalem e renge lat nga sel mujubbul van ngatan e renge Botwen ne lolnai ne olip e, ko delung jile nga marivi jinibb sen nir artipatun arir ko arsurövi Atua, drrelar elep van mare, suri nanu nga marinijnij nawone nir nga marlesir. <sup>38</sup> Ko arwera "Numal Atua, nik kurij pa erres tevi ni nga mivini renge nik nistem. Demat puto renge melrin ko nosrövien pian ji ni, Atua ne Drronsen Mare."

<sup>39</sup> Ko Parasi sopor renge meling jinibb nga milep ngel arij van ji Iesu, arwera "Jinibb nevisvisenien, kupwer ore jinibb som nir!" <sup>40</sup> Ko Iesu owra lweni tevir owra "Nuwrai tevi kami, poro nir parmurrarrong, ko nevöt nawon ngel nir vajin parkail van mare."

*Iesu etengsi Jerusalem*

<sup>41</sup> Ko daron nga Iesu mivini morie Jerusalem ko emteni, ko etengsi, <sup>42</sup> owra "Poro bbong kuprongwose nabong nga lelingen, ko nik kuprongwose nanu nga mivi demat ko! Ko ejki mun, lelingen ngel

metem sete orongwos ðilesi mun. <sup>43</sup> Mian ko nabong nen nir para-vini, ko nir nga marivi devje nuval som partuwe nawot nga puwlu rralem, ko parlik rralem ko parmetmet ore nik renge iok jijle. <sup>44</sup> Ko nir parjikkarre ðetpeti nik ko jinibb nga marlik tevim renge live laut ne nawot som, ko sete parlinglingi nevöt ne nawot nen san ðijnget jer renge pisan. Suri nik sete kurongwose daron nga lelingenok nga Atua muwra ðila som."

*Iesu evan renge loloim ne Naim On*

<sup>45</sup> Ko Iesu evan renge loloim ne Naim On. Ko ejeli tweni nir nga marwulwul, paran vare e. <sup>46</sup> Ko owrai tevir owra "Aruli erpel renge Naul On: Atua owra 'Naim suk parveruse naim ne verusen'. Ko kami kamtur imare vajin ko kamloli evi 'naim ne venao res.' "

*Atua kuprij ðirres suri Numal nga mivini*

<sup>47</sup> Ko renge nabong jijle Iesu ok-an ok-visviseni renge Naim On. Ko batu jinibb ne sulsulen ko jinibb ne nevisvisenien ne nale neseseieren nir armerreni parevji pini. <sup>48</sup> Ko arrelenge suri lat nga parloli suri e, sete artor sweri sel san nga parloli rengen. Suri delung jile arkomrönir suri, armurrarrong kemkame nale sen nir.

## 20

*Jinibb womu se mēri Isrel nir arsusi si ela derteren tevi Iesu*

<sup>1</sup> Mian ko errmali erpel: renge nabong san, daron nga Iesu mok-visviseni jinibb nir e renge Naim On ko mok-werwer renge nosþen nga mīrres, ko batu jinibb ne sulsulen sopor ko jinibb nevisvisenien ne nale neseseieren sopor ko birterawarrang sopor arkorti ko arini. <sup>2</sup> Ko arsusi tevi, arwera "Kupwera ta tevi kem, isi ko ela derteren ngel tevi nik, nga kumrres renge kuploli nanu ngel nir?" <sup>3</sup> Ko Iesu owra lweni tevir owra "Ko inu kele bosusi ta nale san ni le tevi kami, ko kami kapwera tevik. <sup>4</sup> Baptaesen se Jon evel ji Atua vini, rreknaga evel ji jinibb kobbong vini?"

<sup>5</sup> Ko nir arsupuþe suri lululweni tevi nir kis bbong ko arwera "Rrapwera pirpese? Poro rrapwera 'Evel ji Atua vini,' ko ni puwra 'Ko suri sev kami sete kamosuri Jon?' <sup>6</sup> Ko poro rrapwera 'Evel ji jinibb vini,' ko delung ngel nir parla nevöt nir ko partuwe pini kerr e. Suri nir artori Jon evi propet." <sup>7</sup> Ko nir arwera lweni tevi arwera "Tawo, kem namrrelenge lat nga mivel e vini." <sup>8</sup> Ko Iesu owra lweni tevir owra "Ko inu kele sete numa-wera tevi kami inu nula derteren ngel ngabe le nga mololi nanu ngel e nir."

*Nale rrongrrongvi ne jinibb sopor nga sete marmetmet lilane orsel se numal san*

<sup>9</sup> Ko Iesu etipatun owra nale rrongrrongvi ngel tevi delung nir, owra "Jinibb san orwi naut ne grep san. Ko elngi tevi jinibb sopor parmajing rengen, ko ni evel van rengen ngaim minij san, ko elik ie epriv val wor." <sup>10</sup> Ko renge daron mawos nga grep wenen marok-mirr e, ko numal nen okoni jinibb ne majingen sen san van ji lartul nga marmajing rengen, nga parla merrenien ne wenen nen sopen tevi. Ko lartul nen nir arvirrvirralli mñernen ko arkoni tweni ototori nevren, olwi kiskis tevi. <sup>11</sup> Ko numal nen okoni kele jinibb ne majingen sen minij nen kele san evan. Ko mñernen kele lartul nga arvirrvirralli, ko arloli esij tevi jile osuw, ko arkoni tweni ototori nevren, olwi kiskis kele tevi. <sup>12</sup> Mian ko numal nga okoni kele nir itolin van; ko mñernen kele lartul nga arevji lenglenge ko arwirre van vare e. <sup>13</sup> Ko numal ne naut ne grep nga owra 'Aro! Bololi pīrpese? Inu bokoni vajin natuk nga memrreni, ko ni ko ma nir partori pīrres ko.' <sup>14</sup> Ko daron nga lartul nen nir marlesi ni, ko arwerwera lululweni tevir, arwera 'Ngok natu numal nen ko ngok! Kerr pīrevji pini, ko orsel sen pivi vajin se kerr!' <sup>15</sup> Ko arrul totoni, ko arevi tweni re orsel van vare e, ko arevji pini emij."

Ko Iesu owra "Ko numal ngel pia-loli pīrpese tevir?" <sup>16</sup> Ni pia-revji pini lartul ngel nir parmij, ko pīlngi orsel ngel tevi jinibb minij nir."

Ko daron nga marunge nale ngel nir e, ko delung arwera "Ejki rres nawon!" <sup>17</sup> Ko Iesu oku mawos nir, ko osusi tevir owra "Ia, ko nale nga maruli rengen Naul On ngel owra sev le, nga muwra 'Nabur nga jinibb nga marok-majinge naim marungasi marwirre, ni ko vajin evi nabur nga murrul totoni naim mīterter.'"<sup>G</sup> <sup>18</sup> Si nga pusnge nabur ngel, niben pimabbur; ko si nga nabur ngel pīravij ren, niben pumoloplop pētpēti."

<sup>19</sup> Ko renge daron momsawos nen ko pa ko jinibb nevisvisenien ne nale nesereien nir ko batu jinibb ne sulsulen nir arloli lesi parevei Iesu. Suri arongwose nga ni owra nale rrongrrongvi ngok ewer lokloksi nir rengen. Ko armetutue jinibb nir, ololi setemun arrul totoni.

*Erres renge kerr rrapwuli takis tevi Sisa?*

<sup>20</sup> Ko nir arpejpej sel san nga poro pīrres renge nir nga puloli partor wos Iesu rengen, ko niko puloli nir parongwose

vajin parlingi ni van renge nevre numal, ko numal vajin pia-tor pini. Ko niko arwuli jinibb sopor nga paran parloli sel kerkerisi tevi ni, nga

puloli nir parla Iesu renge nale sen nir. <sup>21</sup> Ko lartul ngel nir arsusi kerkerasi tevi Iesu, arwera "Jinibb nevisvisenien, kem namrongwos iok, sev nga kumwerai ko kumvisviseni jinibb e nir arweretun temipjal. Ko sete komok-rrormi san, poro evi jinibb nga milep rreknga muwelili, ko kurij telair ko wor; komok-visviseni marongen se Atua weretunen tevi jinibb nir. <sup>22</sup> Ko nammerreni nabrongwose ta, Ia, erres kobbong renge nale nesereien se kerr nga poro rrapwuli takis tevi Sisa, batu numal se mñeri Rom nir, rreknga sete erres?" <sup>23</sup> Ko Iesu ewe nale gerisen ser nga marwerai nga markerkerasi e, ko owrai tevir owra <sup>24</sup> "Kapsareni ta nevōt nen tevik Belesi." Ko nir arlai san tevi. Ko ni owra "Isi le non ngel, ko nisen maruli rengen ngel?" Ko nir arwera "Rrekma Sisa ko." <sup>25</sup> Ko Iesu owra lweni tevir; owra "Ko niko nanu nga mivi se Sisa kapla lweni tevi Sisa. Ko nanu nga mivi se Atua, kapla lweni tevi Atua." <sup>26</sup> Ko lartul ngel nir sete arongwos parlai ni renge nale sen ngel nir rengo no jinibb nir. Artaole muwrai mirpok, ko armurrarong jer.

*Erpese renge jinibb pimaaur luwi renge mijen?*

<sup>27</sup> Ko Satusi sopor, nga marok-wera jinibb sete orongwos pimaaur luwi kele renge mijen, arini ji Iesu ko arsusi kerkerasi tevi <sup>28</sup> arwera "Ia, ko jinibb nevisvisenien, Moses oli pa renge nale nesereien se kerr nga muwra 'Poro jinibb san pimij, ko poro mñernen elesi nesevin san, ko natu nuru ejkie, ko ngok tasin pīlesi kele nesevin nga tuwan mimij lingi nga, ko pivesi wani metka se tuwan nga mimij ngok.'"<sup>29</sup> Ko ngok, jinibb niaken ebut; mīrwomu nen elesi nesevin, ko mian ko emij, ko natu nuru ejkie. <sup>30</sup> Ko mīervitu nen kele elesi. <sup>31</sup> Mian ko nir itolin kele elesi vinnen. Mian mian ejpari nir jile nga ebut nen arlesi vinnen. Ko nir jijle natur ejkie, ko armij lingi vinnen. <sup>32</sup> Vitunen vajin ko vinnen vajin emij. <sup>33</sup> Ko mirpok ngok, renge nabong nga Atua puloli jinibb nir parmaur luwi kele re mijen, nir si nen ko pia-ivi nesen sen e? Suri nir ebut jile ngok martekai vinnen. Kupwera ta we!" <sup>34</sup> Ko Iesu owra lweni tevir; owra "Renge iel ngatan ngel, norman nir ko nesevin nir arongwos partotko. <sup>35</sup> Ko nir nga Atua mīlesir arres re parmaur luwi re mijen rengo liken ne tuwi ngok vini, nir ko ma

<sup>G</sup> 20:17 Erpe iel, Luk ospe nevōt, ko murrun nga nir marili naim muto suri; ko kem namrieni erpe kerr rraffili naim iel, nga puloli mining ne nale se Luk piplari limjer.

sete arongwos parok-totko. <sup>36</sup> Nir arsorran tevi anglo nir, parmaur tuwi ngok vini, sete arongwos parmij kele mun. Nir arivi pa Atua natun, suri ni ololi nir armaur luwi kele renge mijen. <sup>37</sup> Ko renge devjen ne nir nga marmij, nga mivi weretunen nga marongwose parmaur luwi renge mijen, Moses kele nga kami kamtori, ni ko eviseni tweni nga evi weretunen. Suri renge jilweren ne nai welili nen nga nabb muroror ren ko sete ani, Moses oli nale se Atua nga muwra 'Inu nuvi Iova Atua se Epram, ko Atua se Aesak, ko Atua se Jekop.' <sup>38</sup> Ngok niko, ni sete evi Atua se nir nga marmij te ejki. Ni evi Atua se nir nga marmaur. Suri Atua derteren sen elep nga elep lingi mijen, ko jinibb jijle armaur kobbong renge ni." <sup>39</sup> Ko jinibb nevisvisenien ne nale neseseien sopor arwera "Ejki, aro, jinibb nevisvisenien, nik kuwra lweni omomsawos erres pelak." <sup>40</sup> Ko ngok ololi nir armetutue pae ko, armusus parsusi nanu kele mun san tevi.

#### *Nosusien suri Mesaea*

<sup>41</sup> Ko Iesu owra lweni tevir, owra "Erpese nir marwera Mesaea evi metka se Devet san? <sup>42</sup> Suri Devet lweni owrai renge naul ne Sam, owra 'Numal Atua owrai tevi Numal suk "Kupsakel iel renge nevrek rres ko kuptiriv <sup>43</sup> pijpari nga inu belngi devje nuval som parirpe lat nga kupbböt ren renge nolon belam ngatan." <sup>44</sup> Niko Devet owra niernen evi Numal sen. Ko poro pipok ngok, ko Mesaea evi metka sen erpese ko?"

*Iesu osur metutu tevi jinibb nir nga parmetutue jinibb nevisvisenien ne nale neseseien nir*

<sup>45</sup> Daron nga jinibb nir marmurrarrong e, ko Iesu owrai tevi jinibb sen nir <sup>46</sup> owra "Kapmetmet renge jinibb nevisvisenien ne nale neseseien nir. Suri nir armerreni paruri sunsun nga marres marpepriv partur tevir, ko delung jile partorir pirres ko parsareni nevrer tevir renge sel. Armerreni parsakel renge nai seksakel nga muto limjer womu mirres renge Naim On, ko armerreni parsakel renge nai seksakel nga muto limjer womu mirres renge lat ne nanen. <sup>47</sup> Nir arivi demij venao, arvenae petpeti nijor se nesevin nga diwen ser marmij lingir; ko renge daron ngok ko pa arkerkerasi jinibb nir, arloli verusen nga marpepriv nga partori nir pirres rengen. Ngok Atua putor vitrangir pitertter asi wor suri."

## 21

#### *Nesevin san nga mutuw nevöt sen*

<sup>1</sup> Iesu ok-meteni jinibb nga joror milep marok-tuwe nevöt ser renge bokis nen

renges Naim On se Atua. <sup>2</sup> Ko ni elesi nesevin san nga diwen sen mimij lingi, ko evi beres. Vinnen evini ko otuw nevöt nga wowarrens eru. <sup>3</sup> Ko Iesu owra "Nuwrai tevi kami, vin nga diwen sen mimij lingi ngel, ni otuw nevöt asi wore nir jijle nga martuw nevöt ser ngok e. <sup>4</sup> Suri lartul nga ngok nir joror elep temijpal ko arlai bbong beblen ko artuwe, ko artori jere wor elelep. Ko vinel ma emarong putuw petpeti sev nga ni milngi nga mivi liken sen petpeti."

*Iesu owra tweni nga jinibb sopor partingtinge Naim On se Atua*

<sup>5</sup> Ko jinibb se Iesu sopor arok-supsupe suri nevöt nga marlelep lengleng nga renges Naim On se Atua, ko nevöt nga marres kele nir nga marjuroi e, ko merrenien nir nga jinibb marlair. <sup>6</sup> Ko Iesu owra "Kami kamok-meteni nanu ngok nir? Mian ko daron nen pia-vini nga jinibb nir partingtinge nevöt ngok nir petpeti nga marlelep ngok nir nga renges naim ngok. Setemun san pijngat jer renges san, partingtinge petpeti."

#### *Nanu nga misij nga pia-vini*

<sup>7</sup> Ko nir arsusi tevi ni arwera "Jinibb nevisvisenien, nanu ngok nir para-pelari seveling ko? Ko sev nelesien ko piviseni nga nanu ngok nir otomori pa nga parremali?" <sup>8</sup> Ko Iesu owrai kele owra "Kami kapmetmet ko wor nga sete san pikerkerasi kami. Suri jinibb pilep parini renges inu nisek ko parwera 'Inu nuvi Mesaea le', ko 'Daron nen evini!' Ko kami sete kapvijuri nir te, pijki. <sup>9</sup> Ko daron nga kami kaprunge marval, ko jinibb nir parlatlat nir, ko sete kapmetutu te; suri nanu ngok nir parini ko wor, parasi puwomu, ko nabong nga vitunen ejki malum ko wor." <sup>10</sup> Ko ni owrai tevir owra "Ngaim san putur imare ko pival tevi ngaim san; ko batun vanu san putur imare ko pival tevi batun vanu san. <sup>11</sup> Ko nami nga marlelep nir parmij renges vanu lele ne iel ngatan nir. Ko numer nga marlelep nir parpelari renges vanu lele ne iel ngatan nir; jinibb parmer pilep. Ko mesien lele nir parini parlokloksi jinibb nir. Ko renges melrin nanu lele nir parpelari, parloli jinibb nir parmetutu, ko nelesien lele nga marlelep nir. <sup>12</sup> Nanu ngok nir setowor parpelari ko, ko jinibb parrul totoni womu pae kami ko. Ko parloli pisij pilep tevi kami, ko partekai kami van ji jinibb nga marmetmete naim ne loten nir. Ko parlingi kami van renges naim ne nekaien, ko parloli kami kaptur renges no numal nga marlelep nir ko no numal nga wowarrens nir, suri inu nisek muto renges kami. <sup>13</sup> Ngel pia-ivi daron

se kami nga n̄irres nga kapa-wera tweni nospen nga n̄irres. <sup>14</sup> Ngok niko suri nanu ngok nir, kami kaptor ore womu re norrorrmien se kami ko p̄iterter, nga puloli sete kaprorrmi nga kapa-wera 'O, rrapwera lweni nale sev le tevir?' <sup>15</sup> Suri inu ko bea-la nale ko norongwosien nen tevi kami nga kapwera. Ngok puloli sete nir san rengo devje nuval se kami purongwos p̄irij tere nale se kami rreknga puwra kamkerkeris. <sup>16</sup> Ko tata se kami nir ko tasu se kami nir ko tuwa kami nir ko niaken se kami nir ko sele kami nir parlingi kami van rengo nevre devje nuval se kami nir. Ko lartul nen nir parongwose parevji pini kami sopor. <sup>17</sup> Mian ko jinibb jikle nir parungasi kami suri kami kamtori inu nisek. <sup>18</sup> Ko jomro batu kami nir, sete pisansan pia-jijki. <sup>19</sup> Kami kaptur ko wor p̄iterter, ko kapla se nen̄i kami.

*Nanu nga m̄isij milep rengo Jerusalem*

<sup>20</sup> "Mian ko daron nga kami kapa-lesi jinibb nuval pilep parini parlik rrale iel Jerusalem, ko ngok kami kaprongwose nga sete pipriv ko parlokloksi p̄etp̄eti. <sup>21</sup> Ko daron nga kami kaplesi nanu ngel, ko kami nga kamlik rengo Jutia, kapwolu ko wor kapan kapteptepi rengo botwen. Ko kami nga kamlik Jerusalem, kami kele, kapwolu lingi wor ko. Ko kami nga kamlik rengo vanu nga marto rrale ngaim, setemun kamrongwos kapluwi kele van rengen. <sup>22</sup> Nabong ngel nir arivi nabong nga Atua pia-tor vitranḡi jinibb nir nga puloli nanu jile nga Naul On muwrai parini parpelari. <sup>23</sup> Wurr̄u pia-sij wor niko re nesevin nga n̄itetaur ko nesevin nga muloli natun musus rengo nabong nen nir. Atua lolaren sen pia-vini rengo jinibb nga iel nir. Ko nanu nga parsij nga parsij p̄erp̄er pilep parini parpelari rengo vanu ngel. <sup>24</sup> Jinibb sopor parmij e nesip, ko sopor parlair van parlik rengo naim ne nekaien nga marto rengo vanu sarrsarr ngok nir. Mian ko jinibb ne vare nir parlokloksi p̄etp̄eti Jerusalem parjijkarre p̄irres pelak, sete sapon pijpon jer. Pian pian pijpari jinibb ne vare nir parini rengo bongsi daron ser e nga marwomu.

*Mian ko Jinibb Mawos pia-vini*

<sup>25</sup> "Mian ko nelesien nir parto rengo nial, ko navöl, ko moju nir. Ko rengo iel ngatan jinibb ne vanu pilep parungo p̄isij pilep ko parmetutu dis bburbbur ko daptap nen nir. <sup>26</sup> Jinibb parungo p̄isij pilep nga partiriv terai sev nga piplari rengo iel ngatan totoklai. Suri derteren ne nanu nga marto rengo melrin mare, Atua pulolir paririr. <sup>27</sup> Mian ko jinibb nir parongwose parlesi inu Jinibb Mawos bevini beplari rengo nabor tevi derteren

nga milep ne nosrövien suri jikle. <sup>28</sup> Ko daron nga nanu ngel nir partipatun, ko kami kaptur rramos ko apkulu kapmeteni mare. Suri inu sel ne netlasien se kami otomori bevini."

*Sete jinibb san orongwos daron nen*

<sup>29</sup> Ko Iesu owra nale rrongrongvi san tevir owra "Erres rengo kami kaprorrmi nai pik ko nai n̄inij nen kele nga ngok nen nir. <sup>30</sup> Renge daron nga kami kamlesir martipatun martengriv luwi, ko kami kamrongwose nga daron ne numös evini mori pa. <sup>31</sup> Ko pia-irpe sel ngel ko, daron nga kami kamlesi nanu ngok nir marpelari, ko kapa-rongwose nga batun vanu se Atua otomori pa pivini. <sup>32</sup> Nuwretun nga nuwretun nuwrai tevi kami, dul ngel nir nga marmaur ngel nir setewor parmij ko, ko parlesi nanu ngel nir parpelari. <sup>33</sup> Melrin ko iel ngatan pian ko porjijki, ko nale suk ma sete orongwos pijijki nabong san.

*Kami kapkulkulu metmet ko wor p̄irres*

<sup>34</sup> "Kami kapkulkulu metmet ko wor p̄irres, suri norrorrmien se kami tilelea; kami tamok-oji nanen ko tamok-minmin tamok-lengleng, ko tamok-rrorrmi p̄elake mauren ne iel ngatan; ko ngok nabong suk tia-irpe nover, tia-tawi ore kami tivesane. <sup>35</sup> Suri nga nabong nen pivini ji jinibb jikle nga marlik rengo iel ngatan totoklai. <sup>36</sup> Ko niko rengo nabong jikle kami kapok-metmet ko wor p̄irres. Ko kami kapok-lot ko wor, nga puloli kami derteren se kami putoe nga puloli kami kapwolu lingi nanu nga marsij p̄erp̄er ngok nir, nga puloli kami kaptur p̄irres rengo no inu Jinibb Mawos."

<sup>37</sup> Renge nabong ngel nir Iesu ok-visviseni jinibb nir rengo Naim On se Atua. Ko rengo nat nga mupong jile ni ok-ivel lingi ie ok-tonga van rengo Botwen ne lolnai ne olip e. Ko ok-matur rrarren pa ie ko. <sup>38</sup> Ko rengo rorpong susu jikle jinibb arok-mermera vini jin rengo Naim On nga parmurrarrong suri nale sen nir.

## 22

*Jinibb nga marwowomu rengo m̄eri Isra-rael nir arwera parevji pini Iesu*

<sup>1</sup> Daron ne nanen nga marok-rro niv nga is mijki rengen, nga marveruse nanen ne asien, oruj mori. <sup>2</sup> Ko batun ne jinibb ne sulsulen nir ko jinibb nevisvisenien ne nale neseseien nir arpejpej sel san nga parevei silveni Iesu rengen, nga parevji pini pimij. Armusus parloli limjer, suri armetutu temijpale jinibb nir.

*Jutas eir rengo pimaronge Iesu pian rengo nevre devje nuval sen nir*

<sup>3</sup> Ko Demij evini esilvi Jutas nga miwajie Iskariot, nga mivi san rengen nir esngavöl drromon eru. <sup>4</sup> Ko Jutas evel lingir ko evan owrai tevi batu jinibb ne sulsulen nir ko miewomwu ne jinibb nuval nir ne Naim On se Atua, nga puloli sel nga ni purongwos pilngi Iesu rengen nevrer. <sup>5</sup> Ko lartul nen nir arunge erres e, arir lengleng, ko arloli rijrijen nga parla nevöt sopen tevi ni rengen. <sup>6</sup> Ko Jutas emarong. Ko orrorrmi pejpeje sel san nga poro pirres rengen ni nga pila Iesu pilngi rengen nevrer, ko sel nen jinibb jikle parrerrelenge.

*Jinibb se Iesu eru orloli nanu jile arto lilane terai nanen ne Asien*

<sup>7</sup> Mian ko ejpari nabong ne nanen nen nga marok-rroi niv nga is mijki rengen. Ko rengen nabong nen jinibb arok-revji natu sipsip nir nga parloli nanen ne Asien.

<sup>8</sup> Ko Iesu owrai tevi Pita ko Jon "Koporran koporloli lilane nanen ne Asien puto metmet ngarr terai kerr ko rrapa-uroi." <sup>9</sup> Ko nuru orsusi lweni tevi orwera "Ko kumarong nga komru noboran noborloli lilane ngarre puto terai kerr ngabe le?"

<sup>10</sup> Ko ni owrai lweni tevi nuru owra "Kopormurrarrong ta. Daron nga kamru koporan rengen laut ne ngaim nen, ko koporsewute jinibb san ie nga muwosi botel nuvi san nga muwun, mian tevi re naim sen e. Ko koporvijuri suri ni, ko koporan rengen naim nga ni pian rengen loloim nen. <sup>11</sup> Ko koporwerai lweni tevi miew nga naim sen nen, koporwera 'Numal, jinibb nevisvisenien le okoni komru, owra noborsusi tevim nibeni le loloim nga ni putori nanen ne Asien rengen?'. <sup>12</sup> Ko ngok mernen piptevi kamru van rengen loloim ne naim nen san nga milep temijpal nga muto mare, nga nanu jile marto pa rengen. Rengen ie ko koporloli nanu jile parto metmet ngarr pirres." Ko okoni nuru orivel.

<sup>13</sup> Ko nuru orivel oran, ko orlesi nanu jikle osorsan erpe nga Iesu muwrai tevi nuru. Ko nuru orloli lilane nanu jikle ne nanen ne Asien arto erres ngarr.

*Iesu orro tuloni nanen ne Asien tevi nir*

<sup>14</sup> Mian ko evini ejpari rengen mete nial nga marok-aani nanen ne Asien ren, ko Iesu evan esakel rengen milngen rengen tep, ko aposol nir arsakel arpitevi ni. <sup>15</sup> Ko ni owrai tevir owra "Numrreni lenglengen e borro nanen ne Asien ngel tevi kami puwomu ko vitunen vajin ko bea-runge pia-sij rengen nibek. <sup>16</sup> Inu nuwrai tevi kami, setemun numa-rroi kele nanen ne Asien ngel pian pijpari pia-pelari pumomsawos petpeti rengen batun vanu se Atua."

<sup>17</sup> Ko Iesu ela biles norro ko olot owra erres tevi Atua, ko owra "Biles ngel ko

kaplilai tevi kami. <sup>18</sup> Suri inu nuwrai tevi kami, setemun numa-mini kele mun norro ngel rengen lelingen ngel le pa ko pian pijpari batun vanu se Atua pivini." <sup>19</sup> Ko mian ko ni ela niv ko olot owra erres tevi Atua, ko obbur ototvi, ko elai tevi jinibb sen nir. Ko owrai tevir, "Ngel evi inu nibek nga mlalai misre kami. Kami kapok-loli nanu ngel pipok ko, ko kapok-rrorrmi inu." <sup>20</sup> Ko daron nga nanen musuw ko ni ololi erpok kele rengen biles; ela biles ko owra "Ngel evi inu drak nga pisaser suri kami ko puloli rijrijen nga mimerr se Atua pia-pelari.

<sup>21</sup> "Ko kaplesi jinibb san nga pia-teakai kerasi inu van rengen nevre devje nuval suk nir, ni esakel tevik ni le rengen tep. <sup>22</sup> Inu nuvi jinibb mawos, ko mian ko inu bemij ko wor pirpe nga Atua muwrai pa. Ko wi pia-sij wor pilep niko rengen miew nga mlngi inu van rengen nevre nir." <sup>23</sup> Mian ko nir arsusululweni tevi nir lweni, arwera "Isi nen ko rengen kerr nga ni puloli pipok?"

*Jinibb nga milep rengen nir*

<sup>24</sup> Ko mian ko jinibb sen nir arijrij latlat lululweni tevi nir lululweni bbong suri nir si nen ko pia-ivi jinibb nga milep asasi nen rengen nir. <sup>25</sup> Ko Iesu erij tevir owra "Numal nir ko jinibb nga marwowomu nir rengen jinibb ne iel ngatan nir, derteren ser otoo. Ko armerrreni nga jinibb nir parveruse nir parwera 'Mer nga mok-la se jinibb.' Ko tetajer arok-tor vitrangji jinibb ser nir. <sup>26</sup> Ko kami ma norrorrmien ngok pijki rengen kami, sete kaploli pipok. Ko miew nga mivi jinibb nga milep rengen kami, mernen puloli lweni wor ni pipre miew nga vitunen jerjer rengen kami. Ko miew nga mivi miewomwu rengen kami, ni puloli lweni wor ni pipre jinibb ne majingen se kami vajin. <sup>27</sup> Kaprunge ta rengen jinibb nga eru ngel nuru, nuru ngabes nen le eleplep rengen nuru: Mer nga misakel rengen tep miaan, rreknga miew nga mok-selsale nanen vini jin? Kami kamwera miew nga misakel ko mare rengen tep miaan. Ko inu nutur livö rengen kami nurpe miew nga mok-selsale nanen nen ko ma."

*Iesu ololi rijrijen tevi jinibb sen nir*

<sup>28</sup> Iesu ololi rijrijen tevi jinibb sen nir, owra "Kami kamlik tevik rengen daron nga nanu nir marini marpelari ji inu, nga marrowrowe inu. <sup>29</sup> Ko erpe inu Tata suk mlngi pa inu mevi Numal, ko ngok inu vajin nulngi kami <sup>30</sup> nga kami kapsakel tevik rengen batun vanu suk, kapaan ko kapminmin tevik rengen inu tep suk, ko kaplik rengen nai seksakel suk. Ko kapsupe lilane suri metil naim se miewi Isrel nir nga esngavöl drromon eru.

*Iesu owowrai nga Pita orongwose piav-  
ilvil ore ni*

<sup>31</sup> “Saemon, Saemon! kupmurrarrong ta, demij ongoni pa kami nga purrowrrowe kami pirpe jinibb nga mok-majing mok-jule tutweni dokolvin renge wit. <sup>32</sup> Ko inu nomok-lot suri nik Saemon nga nik nosurien som sete pivitan te. Ko daron nga kupa-rieni lweni nolom, ko kupvijuri lwenik kele vajin, ko kupwer jiljile tasim nir nga puloli norrorrmien ser p̄iterter kele.” <sup>33</sup> Ko Pita owra lweni tevi ni owra “Ejki ma, Numal, inu nomok-tiriv le vajin nga bean renge naim ne nekaien tevi nik ko bemij tevi nik!” <sup>34</sup> Ko Iesu owra lweni tevi owra “Nuwrai tevim Pita, lelingen nato sete pukokorot rragrag ko wor, ko nik kupvilvil ore womu pae inu ko pivatul nga kupwera sete kurongwose inu.”

*Baos ko narr ko nesip ne nuval*

<sup>35</sup> Ko Iesu owrai tevir owra “Bonevis nga daron nga mokoni kami van nga kapwerwer, ko nuwrai tevi kami nga kami sete kaptori baos ko narr ko but se kami. Ko erpese, kami nevre kami armumrrole nanu san?” Ko nir arwera “Ejki.” <sup>36</sup> Ko Iesu owrai tevir owra “Ko lelingenok vajin m̄er nga m̄ilngi baos ko narr, p̄ilai putori nuru. Ko m̄er nga sete m̄ilngi nesip nuval, ko p̄ila sunsun sen puwulwule, ko puwli san e. <sup>37</sup> Inu nuwrai tevi kami nale ne Naul On ngel nga muwra ‘Nir arlesi ni oto tevi m̄er nga mutot oti nale ne nale neseseien,’ ngok mian ko piplari ko renge inu. Suri nale nga maruli renge Naul On nga marsupe suri inu, parini ko wor parpelari.” <sup>38</sup> Ko jinibb sen nir arwerai tevi, arwera “Numal, nesip nuval eru le pa ngel!” Ko ni owra “Ngok epter ko pa!”

*Iesu otongsa evan renge Botwen ne  
lolnai ne Olip, olot*

<sup>39</sup> Ko Iesu evel lingi ngaim ko otongsa van renge Botwen ne lolnai ne Olip e, erpe tetajer mok-loli. Ko jinibb sen nir aratongsa vitu suri. <sup>40</sup> Ko daron nga mivini renge lat nen, ko owrai tevi jinibb sen nir, owra “Kami kaplot ko wor nga puloli kami sete kapvitan daron nga marrowrrowe kami.”

<sup>41</sup> Ko ni evel rujruj sapon ko ejipa van ngatan ko olot. <sup>42</sup> Owra “Tata, poro pivi marongen som, ko kuplai tweni bilas ne norongen nga m̄isij ngel renge inu. Ko sete pivijuri inu marongen suk te ejki, ko pivijuri wor nik marongen som.” <sup>43</sup> Ko anglo ne melrin san evini jin ko osusi lweni jile ni eterter. <sup>44</sup> Ko nolon ornge esij elep lengleng; ko eplak malum olot eterter, ko erat, ko raten sen ojumjum van ngatan renge dan erpe drra. <sup>45</sup> Ko daron nga mulot jile ko emra otur, ko olwi

van ji jinibb sen e nir. Ko elesi nga nir marmatur pa, suri arunge esij lengleng, ko norrorrmien ser arrow arto murrarrong. <sup>46</sup> Ko ni owrai tevir, “Suri sev kammatur? Kapmera ko kaplot, nga puloli kami sete kapvitan daron nga marrowrrowe kami.”

*Devje nuval se Iesu arini arrul renge ni*

<sup>47</sup> Daron nga Iesu mok-rij malum e, ko meling delung jinibb nga milep arini arpelari. Ko m̄er nga miwajie Jutas, nga m̄ivi nir san renge nir esngavöl dromon eru, owowomue nir evini. Ko evel vini mori ji Iesu nga purromji. <sup>48</sup> Ko Iesu owrai tevi Jutas owra “Nik kuptekai kerasi inu Jinibb Mawos renge nga kupromjik?” <sup>49</sup> Ko daron nga ni jinibb sen nga martur tevi marlesi wose nga sev piplari, ko arwera tevi arwera “Pirpe? Nabla nesip nuval se kem nappalpal e?” <sup>50</sup> Ko nir san ela nesip nuval sen, ko eta jinibb ne majingen se batu jinibb ne sulsulen, ko esipri oti boron rres. <sup>51</sup> Ko Iesu owra “E, pijki, epter ko pa!” Ko ela nevre ko eptongi renge m̄er nga boron ko ololi emaw erres luwi.

<sup>52</sup> Ko Iesu owrai tevi batun ne jinibb ne sulsulen nir, ko batun ne jinibb nuval nga marmetmete Naim On nir ko b̄irterawarngeng nga marini ie jin nga parevei ni, owra “Kami kamini tevi nesip nuval ko b̄etiluk. Kami kamrormi inu nurpe jinibb venao rreknga jinibb nga mok-revrevji pinpini jinibb?” <sup>53</sup> Ko renge nabong jile daron nga inu m̄elik tevi kami, ko inu nomok-visviseni jinibb nir renge Naim On se Atua, ko kami sete kamloli lesi nga kapreveik te ejki. Ko lelingen ngel evi daron se kami, ko evi daron nga derteren ne nemalik piplari rengen.”

*Pita evilvil ore Iesu owra sete orong-  
wose ni*

<sup>54</sup> Ko nir arrul totoni Iesu ko arpitevi van renge loloim se batu jinibb ne sulsulen nir. Ko Pita ok-vivitu surir ngasu wor sapon nga mok-vijurir. <sup>55</sup> Ko mian ko nir arsura nabb san renge liven renge naworr nga muwlu ore naim nen, ko arlik rrale; ko Pita evan ko elik renge liven jir.

<sup>56</sup> Ko nesenwarreng ne majingen san elesi nga nabb muror vaseni ni m̄ilik. Ko ok-meteni suri eterter mian ko owrai owra “Merel kele eptevi ni le!” <sup>57</sup> Ko Pita evilvil ore owra “Ejki! Vinel, inu sete nurongwose ni te.”

<sup>58</sup> Mian ko sete epriv kele mun ko jinibb kele san emteni ni ko owrai tevi “Nik kele kuvi nir ko san”. Ko Pita owra “Ejki ma m̄erel!”

<sup>59</sup> Ko vitunen vajin, erpe mete nial san asi pa osuw, ko jinibb m̄inij nen kele san osur terter tevi, owra “Ewretun le m̄erel eptevi le, suri evi m̄eri Galili le

san.”<sup>60</sup> Ko Pita owra “E, m̄erel, inu sete nurongwose rragrrag nanu nga kumwerai ngok!” Daron nga mok-rij malum mirpel ko nato kele okokroust evesane tevi momsawos daron nga mok-rij malum ngok e.<sup>61</sup> Ko Numal erieni ko oklu emteni Pita. Ko Pita orrorrmi sweri nale se Numal nga muwrai womu pae tevi, nga muwrai mirpel, “Lelingen kobbong, renge nata mupong nga lelingen, nato setewor pukokroust ko, ko nik kupvilvil ore inu pivatul ko pa pusuw.”<sup>62</sup> Ko Pita evel van vare, ko eting nga eting lengleng, ememasorr e.

### *Jinibb nuval nir artetnije Iesu*

<sup>63</sup> Ko renge daron nen jinibb nga marmetmet ore Iesu artetnije ni, ko arwuje.<sup>64</sup> Ko nir arka ore mete Iesu, ko arwerai tevi, “Kui propet san, ko kupwerai ta, Isi ko mivrralim ngok?”<sup>65</sup> Ko nale elep kele wor nga marsij nir, marwerair tevi.

### *Iesu otur womu renge nor renge gortien ser*

<sup>66</sup> Ko renge nata m̄irin nen vajin, ko B̄irterawarrang ne Isrel nir, ko batu jinibb ne sulsulen nir, ko jinibb nevisvisenien ne nale neseseiren nir arini korti lat sansan, ko artori gortien ser. Ko arwera Iesu pivini putur re nor.<sup>67</sup> Ko arsusi tevi arwera “Ia, kupwerai ta tevi kem. Nik kuvi Mesaea ko?” Ko Iesu owra lweni tevi nir owra “Poru bowrai tevi kami, ko kami sete kama-osuri inu, ejki.<sup>68</sup> Ko poro nga inu bosusi nanu san tevi kami, ko ngok kami sete kamrongwos kapwera lweni.<sup>69</sup> Ko etipatun le pa ngel, mian ko inu Jinibb Mawos bean Besakel ngatan renge Atua nevren rres, nga derteren sen mutoe.”<sup>70</sup> Ko nir jijle arsusi tevi arwera “Ia ko erpepe! Nik kuvi Atua natun?” Ko ni owra lweni owra “Kami kamwerai pa ngok. Inu ko.”<sup>71</sup> Ko nir arwera “Ngok! Niko vajin. Ko suri sev ko nga muloli kerr rramok-pejpej malume nale sopor nga parwilwil tere ni ren?”

## 23

### *Iesu otur renge no Paelet*

<sup>1</sup> Ko nir nga marlik renge gortien nen nir jijle artur imare ko artekai Iesu van renge no Paelet nga ni puwra suri lat nga putu suri renge Iesu.<sup>2</sup> Ko arini ji Paelet vajin ko artipatun arwera nanu ngel nir: “Kem namlesi m̄erel ololi jinibb se kem nir arlengleng. Ololi artere numal se kem, ko okwer ore kem, owra sete nabwuli takis tevi Sisa, batu numal se kami m̄eri Rom. Ko ok-wera ni evi Mesaea Numal.”

<sup>3</sup> Ko Paelet osusi tevi Iesu owra “Nik kuvi numal se m̄eri Isrel nir?” Ko ni owra lweni tevi, owra “Nik ko kumwerai ngok.”

<sup>4</sup> Ko Paelet owra lweni tevi batu jinibb ne sulsulen nir ko jinibb jijle nir, “Nulesi m̄erel sete otor otvi nale ne neseseiren san, ejki.”<sup>5</sup> Ko nir arij eterter arwera “Ejki, ni ololi jinibb arlik esij, evel p̄etp̄eti renge Jutia. Ko etipatun renge Galili ko evini ejpari iel nga mok-visviseni jinibb nir.”

### *Iesu otur renge no Erot Antipas*

<sup>6</sup> Ko daron nga Paelet murnge nale ngel, ko osusi owra “Ia, ko m̄erel evi m̄eri Galili le?”<sup>7</sup> Ko daron nga Paelet murnge marwera lilane nga Iesu mivel renge Galili e vini, ko okoni tweni van ji Erot e. Suri Galili evi vanu nga Erot mok-metmete, ko re daron nen Erot elik pa renge Jerusalem.<sup>8</sup> Ko daron nga Erot m̄ilesi Iesu ko eir nga eir lengleng. Suri nga ni ok-tiriv pa bonevis ko, emrreni p̄ilesi. Suri nga ni ok-runge nospen nen, ko orrorrmi nga renge nabong san ko p̄ilesi Iesu puloli nanu nga m̄inijinj nawone san.<sup>9</sup> Ko Erot osusi rongorange nale elep tevi Iesu. Ko Iesu sete owra lweni rragrrag nale san tevi ni.<sup>10</sup> Ko batu jinibb ne sulsulen nir ko jinibb nevisvisenien ne nale neseseiren nir artur ko arwer memsi Iesu.<sup>11</sup> Ko mian ko Erot ko jinibb nuval sen nir arongrong melas bbonge ni ko arsiy tevi. Ko Erot owra parloli puri sunsun san nga nulsen m̄irres ko parpivevi lweni van ji Paelet.<sup>12</sup> Ko Erot bonevis evi devje nuval sen e Paelet, ko Paelet bonevis evi devje nuval sen e Erot. Ko lelingen ngel vajin orloli sel.

### *Paelet owra Iesu orongwos pimij ko wor*

<sup>13</sup> Ko Paelet everus kortoni batun ne jinibb ne sulsulen nir ko numal se m̄eri Isrel nir, ko jinibb jile nir arini arkorti lat sansan.<sup>14</sup> Ko owrai tevir owra “Mer nga kami kamtekai vini jik ngel nga kami kamwera ni ololi jinibb nir arlengleng temijpal. Ko inu nurunge lilane pa nanu nen nir jin renge no kami, ko sete nulesi nanu nga kami kamwerai ngok san, nga m̄erel esij ren.<sup>15</sup> Ko Erot kele sete elesi nanu san esij rengen, suri mukoni lweni vini ji inu. Ko ngok oto vajin limjer nga m̄erel sete ololi nanu san nga ni pimij suri.<sup>16</sup> Ko inu bololi jinibb suk parvirvrrali, ko bea-linglingi ni ko vajin pivel sisarow.”<sup>17</sup> [Suri renge daron ne nanen ne Asien renge murrun ser Paelet p̄ilinglingi wor jinibb ser ko san nga m̄ilik renge naim ne nekaien pivel sisarow].<sup>H</sup> <sup>18</sup> Ko nir jile arkail arvesane van mare jer arwera “Kuppivevi tweni m̄erel van, kuprevji pini

<sup>H</sup> 23:17 Nale nga muto re nolo [ ], rrek sete Luk oli, ko jinibb san ea-ului vitue daron nga muli tweni kopi san ne naul ngel.



pimij! Ko kuplinglingi ma Barapas pivel sisarow pirpe kem nammerreni.”<sup>19</sup> Merel Barapas, mēri Rom nir arlingi renge naim ne nekaien suri nga muloli lartul nga marlik ie marpalpal tevi numal nga mīlik renge ngaim nen. Ko ni erevji pini kele wor jinibb emij.

<sup>20</sup> Ko Paelet emrreni pilinglingi Iesu pivel sisarow, ko erij tevi nir kele. <sup>21</sup> Ko nir arkikail lengleng van mare arwera “Kuprruloni renge nai pelaot!” <sup>22</sup> Ko ni erij luwi kele vatolin tevir, owra “Merel ololi sev esij? Inu sete nulesi ololi nanu san esij renge ni pimij suri. Ko inu bololi para-virrvirrali ni, ko βelinglingi ni pivel sisarow.” <sup>23</sup> Ko nir sete armosi re markail. Arkail kele eterter lengleng, drrelar evan mare jer arvesane, arwera “Kuprruloni! Kuprruloni renge nai pelaot!” Ko Paelet ornge drrelar, ololi surie erpe drrelar muwrai. <sup>24</sup> Ko emarong Iesu tevir nga nir parloli surie nga nir marmerrēni tevi ni pirpe nga nir marwerai. <sup>25</sup> Ko ni elinglingi Barapas, mēri nga mēri Rom nir marlingi renge naim ne nekaien suri nga muloli nir marpalpal tevi numal nga mīlik renge vanu nen, ko erevji pini kele wor jinibb. Ko elinglingi ni evel sisarow erpe nga mēriwomu se mēri Isrel nir marmerrēni.

#### *Arpitevi Iesu evel*

<sup>26</sup> Ko jinibb nuval sopor arpitevi Iesu evel van nga parruloni re nai pelaot. Ko arlesi jinibb ne Saerin san renge sel, nga nisen Saemon, otutur vini nga pian renge ngaim nga milep. Ko arrul totoni ni ko arjingteni nai pelaot se Iesu renge birparin, ko aron tertere nga ni puwosi pivitu. <sup>27</sup> Ko delung nga milep arvijuri suri Iesu. Ko nesevin sopor arpitevir, ko arting elep armesmasor e nga martengsi erpe ni mimij pa. <sup>28</sup> Ko Iesu erieni lweni ko owrai tevir owra “Kami nesevin ne Jerusalem nir, sete kaptengsi inu te, pijki. Ko kaptengsi lweni ma kami, ko natu kami nir. <sup>29</sup> Nabong nen nir para-vini nga jinibb nir para-wera ‘Neiren renge kami nesevin nga kammēri ko kami nesevin nga setewor kamvasus ko kami nesevin nga setewor kamloli bipi musus wor nabong san. Kami ngok ko kaprunge pīrres.’ <sup>30</sup> Ko renge nabong nen nir para-rongwos parwerai tevi botwen nga marlelep nir, ‘Kapmatop ko kapvitan renge kem!’, ko arongwos parwerai tevi botwen nga marwowarrēng nir, ‘Kapini kapteveni ore kem!’ <sup>31</sup> Kaplesi! Ara-tipatun lebbong ngel, ko arloli erpok. Pian ko paraloli pīsiŋ perper wor piasa ngel.”<sup>I</sup>

#### *Arwuse Iesu renge nai pelaot*

<sup>I</sup> 23:31 Erpe iel, Iesu ospe nai nga mimalum ko nai nga mukur, ko kem namrieni nga puloli mining ne nale sen piplari limjer.

<sup>32</sup> Ko nir arpitevi kele nuru eru. Laru nen nuru korti orivi jinibb nga morsij, ko niko marlingi nuru pormij tevi Iesu.

<sup>33</sup> Ko nir arini renge lat san nga marwera Golkota e, nga muwra mirpel, Lat ne bongur. Ko renge ie nir arwuse Iesu nevren nuru ko βelan nuru renge nai pelaot. Ko arwuse kele jinibb nga morsij nga nevre nuru ko βela nuru renge nai pelaot eru, nuru tuwen renge Iesu nevren rres, ko nuru tuwen renge nevren mair. <sup>34</sup> Ko Iesu owra “Tata, kuptelasi tweni nololien ser, suri sete arongwose rragrage nanu nga marloli.” Ko nir artututwēni sunsun sen tevir nga partuwe daes suri.

#### *Jinibb armen kerkerasi Iesu*

<sup>35</sup> Ko jinibb nir artur mori bbong. Ko arok-kulu arok-meteni daron nga mēriwomu se mēri Isrel nir marok-men kerkerasi Iesu, arwera “Ni ela pa se jinibb elep osuw; ko rraplesi vajin ni pīla se ni luwi vajin ta we, poro pivi Mesaea nga Atua mutobbtobbue.” <sup>36</sup> Ko jinibb nuval kele nir armen kerkerasi. Ko arini mori jin ko arla lesi norro nga mimilali pa tevi ni. <sup>37</sup> Ko arwera “Poro nik kupivi numal se mēri Isrel nir, ko kupla se nik luwi!” <sup>38</sup> Nale ngel le nir nga marulir mare renge nai pelaot: MEREL EVI NUMAL SE MERI ISREL NIR.

#### *Laru nga mormij tevi Iesu*

<sup>39</sup> Ko laru nga mormij tevi Iesu, nuru tuwen erij esij tevi, owra “E, poro nik kupivi Mesaea, ko kupla se nik ko komru!” <sup>40</sup> Ko nuru tuwen erij tevi suri, owra “Nik sete kumtute Atua rrek! Kuplesi nik ko inu, kerru rromorsere lweni wor nanu nga rromorloli ko, <sup>41</sup> ko niko renge kerru, erres ko wor. Suri kerru ma, rromorla mawos wore ko nanu nga moro rroporlai renge sev nga rromorlolir. Ko mērel ma sete ololi nanu san esij rragrag te.” <sup>42</sup> Mian ko ni owrai tevi Iesu owra “Iesu, poro nabong nga kupa-ivi Numal, ko warru kuprrormi inu.” <sup>43</sup> Ko Iesu owra lweni tevi owra “Nuwretun nuwrai tevi nik, lelingen kobong kuplik tevik renge lat nga mīrres asi jer, nga mivi drromdrromon jer.”

#### *Iesu emij*

<sup>44</sup> Ko omomsawos renge mete nial es-ngavöl drromon eru ko nial setemun esin. Lat emalik pētpeti renge lat jijle evini ejpari mete nial itul nat mirivriv vajin. <sup>45</sup> Ko kalek nga murrul ore lat nga muon nga muon temijjal renge Naim On se Atua loloim eteri wukari devjen eru e. <sup>46</sup> Ko Iesu everus temijjal van mare owra “Tata, nulngi nemīk renge nevrem!” Daron nga

muwrai jile nale ngel e ko osrow pini. <sup>47</sup> Ko daron nga batu jinibb nuval se mēri Rom nir mīlesi nanu nga miplari, ko osrōvi Atua suri. Ko owra “Ewretun le mērel evi jinibb nga mimawos mīrres!”

<sup>48</sup> Ko jinibb jille nga marini ie nga parmeteni, daron nga marlesi nanu ngel nir ko arieni lwenir van renge ngaim ser e, arunge esij lengleng, arwujwuje morkor suri. <sup>49</sup> Ko Iesu selen wor nir ko nesevin nga marvijuri Iesu renge Galili vini, nir ngok artur wor van ngasngasu sapon, ko armeteni nanu nga marpelari nir.

#### *Josep etevni Iesu*

<sup>50-51</sup> Ko mēri Armetia san elik ie, nisen Josep. Armetia evi ngaim ne Isrel san. Ko mērel Josep evi nir san renge gortien se nir nga marwowomu re Isrel nir. Ni evi jinibb nga mimawos mīrres, ko evi jinibb nga mok-teravi batun vanu se Atua pivini. Ko sete emarong renge nanu nga gortien ser ngok muloli tevi Iesu. <sup>52</sup> Ko mērel ko emawose no Paelet evan jin, sete emtutu te, ko ongoni nibe Iesu tevi. Ko Paelet emarong. <sup>53</sup> Ko Josep evan ojri tweni nibe Iesu renge nai pelaot, ko ela kalek nga mimalum mīrres san, ko onbe ore e. Ko owosi van elngi renge nevōt san nga marsavi nolon mutoe nga setewor arlingi jinibb san rengen nabong san. <sup>54</sup> Ko evi Praete, nabong nga marok-eseser e marok-la kortoni ngarre nanu nir. Ko otomori pa nial piwaj pini ko Sapat pivini. <sup>55</sup> Ko nesevin nga marvijuri Iesu renge Galili vini, nir arpitevi Josep, aran ko arlesi dubb nen, ko armeteni suri lat nga marlingi nibe Iesu muto suri. <sup>56</sup> Mian ko nesevin ngel nir arluwi van renge naim e, ko arla roi nga mapur mīrres ko pomat, arloli kortoni ngarre nir, mian ko para-lair van parsesei renge nibe Iesu. Ko nir armosi erpe nesesreien ne Sapat muwrai.

## 24

*Dubb oto kiskis, Iesu emra luwi renge mijen*

<sup>1</sup> Renge Sante rorpong susu malum, ko nesevin nen nir artori ro nai nga mapur mīrres, ko armermera tevi van renge dubb nga parsesei renge nibe Iesu. <sup>2</sup> Ko daron nga marini renge dubb, ko arlesi nevōt nga muto ore dubb martini tweni pa rengen mijkie. <sup>3</sup> Ko arjiol van ngatan ko arsil van renge lolo dubb, ko sete arlesi nibe Numal Iesu. <sup>4</sup> Ko nir artur lengleng vajin, arrelenge lat nga nanu ngel muto suri. Ko ngavilvilsen jinibb eru orpelari jir ortur tevir. Sunsun se nuru orow raprap titis. <sup>5</sup> Ko nir armetutu temijpal, ko arjiol vitan nor emawose dan. Ko laru nen nuru orwerai tevir orwera “Erpese kami kampej

mēr nga mimaur renge nir nga marmij pa? <sup>6</sup> Ni ejki iel, ni emaur luwi pa. Kami kamrongwose renge daron nga mīlik renge Galili wosenen ni owra sev nale tevi kami? <sup>7</sup> Ko ni owra ‘Partekai inu Jinibb Mawos van renge nevre jinibb nga marsij nir, ko nir parwuse inu renge nai pelaot ko parrulonik; ko nabong pītolin ko bemaure luwi kele.’ ”

*Jinibb se Iesu sete arosuri nale se nesevin nir*

<sup>8</sup> Ko nesevin nen nir arrormi sweri lweni nale nga muwrai nen nir. <sup>9</sup> Ko nir arivel lingi dubb ko arluwi van ji jinibb se Iesu nir esngavōl drromon san e (11); ko arsupe nanu pētpeti tevir. <sup>10</sup> Nesevin nen le ngel nir: Merri ne Maktla ko Joana ko Merri nga tasu se Jemes, ko nesevin mīniji nen kele wor sopor nga marpitevir. <sup>11</sup> Ko aposol nir arunge nale ser erpe nale gerisen bbong, ko sete arosuri.

#### *Pita esil van renge lolo nevōt*

<sup>12</sup> Ko Pita emra ko owlu van renge dubb e. Ko ejiol van ngatan, ko emteni ko elesi sunsun nga bbong marnuē e mīsan muto, ko setemun elesi kele nanu san. Ko evel olwi van renge naim sen e. Bbōsa nga milep elaie suri nanu nga miplari ngok.

*Jinibb se Iesu eru orivel suri sel van Emeas e*

<sup>13</sup> Renge nabong nen mawos ko pa, jinibb se Iesu eru orivel suri sel nga poran renge ngaim e san nga nisen Emeas. Ko oto wor ngasngasue Jerusalem sapon erpe evi kilomita esngavōl drromon san wor. <sup>14</sup> Ko daron nga morok-ivel suri sele morok-supsupe suri nanu nga marpelari nir tevi nuru lululweni wore, <sup>15</sup> ko Iesu evel vini mori ji nuru. Ko nuru orok-supe malume, ko Iesu evini pa ji nuru, arivel kokorti vajin. <sup>16</sup> Ko daron nga nuru morlesi ni ko orrelenge ni, sete orongwose, suri Atua opongi ore mete nuru. <sup>17</sup> Ko Iesu osusi tevi nuru owra “Sev ko komorok-supsupe renge sel nga komorivel ngok?” Ko nuru ortur murrarrong, no nuru evirrirtting. <sup>18</sup> Ko nuru tuwen nen nga nisen Kleopas osusi tevi, “Rreknga nik kusan kuvi jinibb nga kumlik renge Jerusalem ko sete kurongwose nanu nga miplari renge nabong evis lebbong nga marasi!” <sup>19</sup> Ko Iesu osusi tevi nuru owra “Isev ko nir?” Ko nuru orwera lweni tevi orwera “Nanu nga marpelari renge Iesu ne Donasret. Ni evi propet san, ko renge no Atua ko renge no jinibb nir, ni evi jinibb nga milep san renge majingen sen ko renge nale sen nir. <sup>20</sup> Ko batun ne jinibb ne sulsulen nir ko mērwomu se kerr nir arpitevi ni van ji mēri Rom nir,

nga nir parwera ni pimij ko wor. Ko nir arruloni ni renge ni pelaot. <sup>21</sup> Ko kem namlingi nolo kem renge ni eterter nga ni orongwos puloli kerr mēri Isrel nir rrapiel sisarow vajin. Ko mare nen renge nanu ngel nir, lelingen evi nabong itolin le pa osuw nga nanu ngel nir marpelari. <sup>22</sup> Ko nesevin sopor renge gortien se kem arloli bbōsa nga milep elai kem, renge daron nga marmemera rorpong susu van renge dubb nga jinibb marlingi ni niben rengen. <sup>23</sup> Ko sete marlesi nibe Iesu, ko arlulwi vini arwerai nga nir arlesi anglo eru orwerai tevi nir nga ni emaur luwi pa. <sup>24</sup> Ko sopor renge gortien se kem aran renge dubb ko arlesi nanu jile arirpe nga nesevin nir marwerai.

Ko sete arlesi ni." <sup>25</sup> Ko Iesu owrai tevi nuru owra "O, kami nga kamlengle, ko kamlolola lengle renge kaposuri nale se propet nir nga marwerai!" <sup>26</sup> Sete evi nanu nga Atua mīlŋgi pa nga piplari ko wor nga Mesaea purnge p̄sij renge nanu ngel nir, musuw ni pian renge nosrōvien sen?" <sup>27</sup> Ko Iesu owra lweni tevi nuru sev nga marwerai suri ni renge Naul On, etipatun renge naul se Moses ko etajer tevi vini ejpari nga propet nir marulir. <sup>28</sup> Mian ko nir aran mori renge ngaim nga nuru morwera poran rengen, ko Iesu ololi erpe ni p̄itajer kele wor. <sup>29</sup> Ko nuru orevei totoni ni ko orwera "Kuplik tevi komru. Suri nat erivriv pa, otomori nial piwaj pini." Ko ni emarong, ko ean loloim nga p̄ilik tevi nuru.

<sup>30</sup> Ko ni esakel renge tep tevi nuru nga paraan. Ko ni ela niv ko olot owra erres tevi Atua suri, ko obbri otvi niv, ko elai tevi nuru. <sup>31</sup> Ko mete nuru em̄erer vajin, ko orlesi wose ni. Ko ni ejijki renge mete nuru, orrerlengle lat nga mian e, setemun orlesi. <sup>32</sup> Ko nuru kis vajin orwerera lululweni tevi nuru, orwera "Po! Nile ma wor daron nga rramiel renge sel e ko muwra visviseni Naul On nir tevi kerru, ko nolo kerru eir." <sup>33</sup> Ko renge daron nen mawos ko pa, ortur imare ko orluwi van renge Jerusalem e, orlesi aposol nir esngavōl drromon san ko nir minij nen kele wor sopor. <sup>34</sup> Ko aposol nen nir ko nir nga marpitevir ngok arij womu tevi nuru, arwera "Numal emaur luwi weretunen! Ni eplari ji Saemon." <sup>35</sup> Ko nuru vajin orsupe suri nanu nga marpelari renge sel tevi nir, ko erpese renge daron nga ni mubbri otvi niv, ko nuru morlesi wose.

### *Jinibb se Iesu arlesi ni*

<sup>36</sup> Ko daron nga morok-supe suri nanu ngel e tevir, ko artaol lengle renge Iesu otur pelari renge liven jir, ko owra "Demat pipatevi kami." <sup>37</sup> Ko nir armetutu lengle,

arrorrmi rrenga ma arlesi nem̄in san. <sup>38</sup> Ko Iesu owrai tevir owra "Kami kammetutu sev ko? Suri sev norrorrmien nga marirpel ngel nir marini renge nolo kami?"

<sup>39</sup> Kapmeteni nevrek nuru ko ßelak, ko kapsareni nevre kami, ko kaprunge evi inu mawos le wor. Ko kaplesi, nem̄in sete niben otoa te ejki, ko jin sete otoa te ejki, erpe nga kami kamlesi inu ngel!" <sup>40</sup> Ni owra nanu ngel, ko eviseni nevren nuru ko ßelan nuru tevi nir armeteni. <sup>41</sup> Ko bbōsa elair e ko arir lengle; ko setewor arosuri erres te, ejki malum wor. Ko ni owrai tevir, "Kamtori nanen sopon ni ko?"

<sup>42</sup> Ko nir arla viso nai nga mimasos jile pa san ko arsareni tevi ni. <sup>43</sup> Ko ni esaro ko elai jir ko orroi renge nir jile nor.

### *Bongsi nale se Iesu tevi jinibb sen nir*

<sup>44</sup> Ko Iesu owrai tevir owra "Nanu ngel nir arivi nanu mawos nga mowrai pa tevi kami renge daron nga m̄elik malum tevi kami e. Renge bonevis nen nomokwerai pa nga nanu jile nga maruli renge naul se Moses ko renge nale se propet nir ko renge Sam nir nga marsupe suri inu parini ko wor parpelari." <sup>45</sup> Ko ni owni norrorrmien ser arkuo nga parongwose nale ne Naul On nir p̄irres. <sup>46</sup> Ko owrai tevi nir owra "Ngel evi sev nga maruli, nga Mesaea purnge ko wor p̄sij, mian ko pia-maur luwi kele renge nabong itolin. <sup>47</sup> Ko parwerwer renge vanu jille nir nga jinibb nir nolor parlululwi ko wor, ko Atua p̄itlasi tweni nololien ser vajin renge nise Mesaea. Ko womujen p̄itipatun womu renge Jerusalem. <sup>48</sup> Kami ko kamivi jinibb nga kapwera tweni nanu ngel nir. <sup>49</sup> Ko inu bokoni m̄er nga Tata suk m̄irijrij pae tevi kami nga pia-lai tevi kami. Ko kami kaptiriv wore ko renge ngaim pian pijpari daron nga derteren se Atua pivel renge melrin vini iel ngatan nga puloli kami kapterter."

### *Atua etkai lweni Iesu van renge melrin e*

<sup>50</sup> Ko Iesu eptei twenir arivel lingi ngaim nen. Ko arivel van arjipari Betani. Ko renge ie ni esareni nevren nuru van mare mawos nir, ko erij erres suri nir. <sup>51</sup> Ko daron nga mok-rij m̄irres surir ko Atua etkai tweni ni van mare e renge melrin. <sup>52</sup> Ko nir arlotoe ni, ko mian ko arlulwi van renge Jerusalem e tevi neiren nga milep renge nir nolor. <sup>53</sup> Ko nir aran renge Naim On ko arlotoe Atua, arwera erres tevi.

**Nospen nga Mirres se  
Iesu Kristo nga  
JON  
Muli  
Batu nale nga mivsivseni  
lut nga parmeteni naul  
ngel puto suri**

Naul ngel ospē suri Iesu nga ni evi Nale se Atua nga mivi jinibb, ko mīlik tevi kerr. Jon oli naul ngel nga puloli jinibb parongwose parosuri nga Iesu evi jinibb nga Atua muloli rijrijen (promes) nga pukoni nga pīla mauren tevi jinibb, ko ni evi kele natu Atua. Ko oli erpok nga nir arongwose parla mauren re nise Iesu, suri arosuri ni (20:31).

Nanu nga womujnen nga Jon muwrai tweni, owra Iesu evi nale nga tuwi nga tuwi jer elik ko pa osuw, ko eptevi Atua (1:1). Ko vitunen ea-supe suri nelesien (saen) nir nga Iesu mulolir nga arongwose puloli rraplesi wose nga Iesu evi weretunen natu Atua. Ko jinibb sopor arosuri Iesu ko arvivitu suri, ko sopor armusus parosuri ni.

Renge batun esngavöl drromon itul (13) ejpari esngavöl drromon ebut (17), Jon ospē suri nanu nga marremali nir re natpong nga devje nuval nir marini nga parrul totkoni Iesu. Re natpong ngok, Iesu ejiljilwer tevi jinibb sen nir nga puloli nir partur metmet re nanu nga parini parma-wos nir, ko owrai rrrungir e, nga pususi norrrrmien puto pīterter puwomu, ko vitunen devje nuval sen para-vini para-rul totkoni.

Re batun 18 ejpari 21, Jon ospē suri devje nuval nga marrul totkoni Iesu. Ko arlai van re kot, ko vitunen arlai van arwuse re nai pelaot, ko emij. Ko vitunen emaur luwi kele, ko jinibb sen nir arlesi ni.

Re naul ngel, Jon ospē suri mauren nga sete mia-suw nabong sopon, nga jinibb orongwose pīlai ji Iesu Kristo kobbong. Mauren ngok etipatun lelingenok ko etajer van ji nir nga marosuri Iesu nga ni kobbong evi sel, ko evi batu nale weretunen, ko evi mauren.

*Nale norongwosien se Atua*

<sup>1</sup> Tuwi nga tuwi jer Nale elik ko pa osuw. Nale ngok eptevi Atua. Nale ngok kele evi Atua. <sup>2</sup> Womu jer mian ko ngatan ngel pia-tipatun, ni elik ko pa osuw tevi Atua. <sup>3</sup> Nanu jille nga Atua mulolir Nale eptevi ni ren, nuru korti orlolir, sete Nale ejkie nanu san nga Atua muloli. <sup>4</sup> Mauren oto renge

ni, ko mauren ngok elai moron tevi jinibb nir. <sup>5</sup> Moron ngok omor re nemalik, ko nemalik sete evter rragrrage nga pimalik tevteveni.

<sup>6</sup> Atua okoni jinibb san vini, mēnren nisen Jon. <sup>7</sup> Ni evini nga pīrij se Moron ngok ko, owra lilane tevi jinibb nir, nga puloli jinibb nir parosuri. <sup>8</sup> Ni sete evi Moron nen te, ni evini nga bbong pīrij se Moron nen ko. <sup>9</sup> Nale ngok evi Moron weretunen, evini iel ngatan, omor vaseni jinibb jille nir.

<sup>10</sup> Ni elik iel ngatan, ko ni ololi ngatan ngel, ko jinibb ne ngatan ngel nir sete arlesi wose ni te. <sup>11</sup> Ni evini ji metka sen mawos nir, ko metka sen mawos nir sete artekai ni. <sup>12</sup> Ko nir elep ma nga marosuri ni, ko martekai ni vini jir. Nir ngel ko ma, ni elai derteren tevir arini arivi Atua natun. <sup>13</sup> Nir arivi Atua natun, sete erpe nga jinibb mīak renge drra, rreknga marongen se niben, rreknga marongen se jinibb, ejki. Nir arivi Atua natun suri Atua ko wor marongen sen.

<sup>14</sup> Nale ololi lweni ni evi jinibb, eplari limjer ko elik tevi kerr. Ko kem namlesi wose renge nosrōvien sen nga ni esan evi Atua natun mawos, owun saute nalol nga mīrres nga sete orongwos pīrieni.

<sup>15</sup> Jon erij sen, ekail owrai tevi jinibb nir, “Merel le nomok-supe suri nga nomok-wera, Inu nuwowomu nga bololi lilane sel sen, nga ni pia-vitu surik. Ko ni elep wor asi inu, suri ni elik wowomu ko pa mian ko inu mea-ia, ko niko ni elep asi wore inu.”

<sup>16</sup> Niko suri nolon owun saute nga mīm-rreni kerr, ko ololi ni mok-la nanu nir tevi kerr. Ko erpok malum, ok-lila malum wore nanu ko nir tevi kerr. <sup>17</sup> Nale neseseiren eplari re Moses, ko nalol nga ma mīrres nga sete orongwos pīrieni eplari renge Iesu Kristo. <sup>18</sup> Sete jinibb san elesi Atua renge daron san, ejki. Natun mawos kobbong, nga nuru Atua morsorsan mawos, nga morkorti mīrres morirpe mēlew, ni kobbong evel renge melrin vini, ko owra visviseni Tata sen tevi kerr.

*Jon owra tweni Iesu limjer*

<sup>19</sup> Nir nga marwowomue mēri Isrel nir nga marlik Jerusalem arkoni jinibb ne sulsulen sopor ko Livaet sopor vini ji Jon nga parsusi tevi, “Nik kuvi isi le?”

<sup>20</sup> Ko Jon sete evilvil orore ni, ejki, ewer limjere ni tevir, owra “Inu sete nuvi Mesaea te.”

<sup>21</sup> Ko ngok arsusi kele tevi ni, “Ia, ko nik kuvi isi, Elaeja?” Ko Jon owra “Ejki, inu ejki.”

Ko arwera “Ia, ko nik kuvi ma Propet nen?” Ko Jon owra “Ejki.”

<sup>22</sup> Ko nir arsusi lweni tevi, "Po! Ko nik ngok kuvi isi le? Kupwerai lweni nik tevi kem, puloli kem naban nabwera lweni tevi nir nga markoni kem vini. Nik kupwovrai lweni nik!" <sup>23</sup> Ko Jon owra "Inu nuvi bbong jinibb san nga propet Aesea musŕe suri, muwra 'Drrela jinibb san ekail reŕge lolo merwer, "Kaploli lilane sel se Numal pimetet." ' ' "

<sup>24</sup> Lartul ngok nir, Parasi ko nir arkonir van ji Jon. <sup>25</sup> Ko nir arsusi tevi Jon "Poro nga nik ngok sete kuvi Mesaea rreknga Elaeja rreknga propet nen, ko suri sev komok-loli baptaes?" <sup>26</sup> Jon owra lweni tevir, "Inu nomok-loli baptaes tevi nuwi lebbong, ko san ma ni ko pa otur livö reŕge kami, kami sete kamrongwose. <sup>27</sup> Ngok ni ko ma evi mernen mawos nga propet nga tuwi nir arwera pivitu suri inu. Ko ni elep asi jer wore inu, ko inu sete numomsawos nurres rragrrag kele re bbong ßejiol vitan ßetlasi tweni dil reŕge but sen."

<sup>28</sup> Nanu ngel nir arpelari reŕge Betani, ie oto roroni Jortan, lat nga Jon mok-loli baptaes ren.

#### *Iesu Natu Sipsip se Atua*

<sup>29</sup> Renge nabong mñinj nen san kele, Jon emteni Iesu mivel mawose vini. Ko owra "Kaplesi, natu sipsip se Atua nga ðila tweni nololien ne iel ngatan!" <sup>30</sup> Ngok! Niko mñer nga nomok-suŕe suri nga ko, mowra 'Inu nuwowomu le, nuloli lilane sel sen nga pivivitu surik.' Ko ni elep wor asi inu, suri ni elik ko pa, mian ko inu ngel mea-iak. <sup>31</sup> Inu kele sete nurongwose mñerel bonevis, ko erpok nuvini tweni nupaptaes tevi nuwi nga inu beviseni ni tevi mñeri Isrel nir."

<sup>32</sup> Ko Jon erij se ni owra "Nulesi Nemñin ojubbul reŕge melrin vini erpe wuñer ko esakel jer re ni. <sup>33</sup> Inu kele sete nurongwose mñerel, ko ni nga mukoni inu mepaptaes tevi nuwi owrai tevik, 'Mer nga kuplesi Nemñin pujubbul pian pisilvi ðilik jer ren, mñernen ko evi ni nga pipaptaes jinibb nir tevi Nemñin On.' <sup>34</sup> Ngok niko inu mñelesi ko nurij sen nga ni ngel ko evi Atua natun mawos."

#### *Iesu everus lartul nga marivi womu jinibb sen*

<sup>35</sup> Renge nabong mñinj nen san, Jon otur tevi jinibb sen eru. <sup>36</sup> Ko Jon emteni Iesu mivel, ko owrai tevi jinibb sen nuru, "Koporlesi, Natu sipsip se Atua ngel."

<sup>37</sup> Daron nga jinibb sen nuru morunge nga muwrai mirpok tevi nuru, ko orlingi tweni Jon otur jer ko orvijuri suri Iesu. <sup>38</sup> Iesu erieni emteni nga morvijuri, ko owrai tevi nuru, "Komorpej isev?"

Ko nuru orwerai tevi ni "Rabae (nais ngok reŕge nale se mñeri Isrel nir owra

jinibb nevisvisenien ko), nibeni lat nga kumlik e?"

<sup>39</sup> Iesu owrai lweni tevi nuru, "Koporini koporlesi." Ko nuru orvijuri, oran orlesi lat nga mñilik e. Ko orlik tevi ni ie, suri nat erivriv pa, erpe pirpe mete nial ivij.

<sup>40</sup> Renge nuru nga eru ngok nga morunge Jon muwra visviseni Iesu tevi nuru ko morvijuri ngok, nuru tuwen nisen ko Antru, Saemon Pita tasin. <sup>41</sup> Antru evel evan ko eska wowomue Saemon, ni tuwan, ko owrai tevi ni owra "Komru ma nomorlesi Mesaea" (nais ngok reŕge nale se mñeri Gris nir, arwera Kristo, ko owra puwra 'Jinibb nga Atua mñirijri pa nga pukoni nga ðila mauren tevi jinibb nir'). <sup>42</sup> Ko ngok Antru eptevi Saemon van ji Iesu.

Ko daron nga Iesu mñelesi, ko owrai tevi, "Nik Saemon, kuvi natu Jon. Nik parverus kele nisem Kepas." Nais ngok reŕge nale se mñeri Isrel nir owra ßereng ko. Ko nais ngok Pita reŕge nale se mñeri Gris nir, owra ßereng kele kobbong.

#### *Iesu everus Pilip ko Nataniel porvijuri*

<sup>43</sup> Renge nabong mñinj kele san, Iesu owra pian kele Galili e. Ko elesi Pilip ko owrai tevi, "Kupini kupvijurik, kupivi jinibb suk." <sup>44</sup> Antru ko Pita, ngaim se nuru ko Betsaeta, ko Pilip kele evi mñeri iok. <sup>45</sup> Pilip evel ko elesi Nataniel, ko owrai tevi, "Kem ma namlesi mñer nga Moses muli suri reŕge Naul ne nale neseseien tuwi, ko propet nir kele maruli suri. Nisen ko Iesu ne donasret, Josep natun."

<sup>46</sup> Nataniel owrai tevi "O, aro, ejki ma, nik kurrorrmi reŕge iok Nasret nanu nga mñirres san orongwos piplari ren e?"

Pilip owra lweni tevi, 'Iow, ko kupini kuplesi ta we."

<sup>47</sup> Daron nga Iesu mñelesi Nataniel mivel mawose vini, ko owra "Kaplesi morok, evi mñeri Isrel tera san nga sete orongwos ðikrekris."

<sup>48</sup> Nataniel owra lweni tevi, "Nik kurongwose inu erpese le?" Iesu owra lweni tevi, "Nurongwos wowomu nik ko pa osuw daron nga komok-tur re melve nai pik e, vitunen ko vajin Pilip mia-verus nik."

<sup>49</sup> Ngok Nataniel owrai lweni tevi, "O, jinibb nevisvisenien, nik kuvi Atua natun mawos, kuvi Numal se mñeri Isrel nir!"

<sup>50</sup> Iesu owra lweni tevi, "Niko suri nga inu mowrai tevim nga nulesim reŕge melve nai pik, nik kuosuri suri iok wolok kobbong? Ko kurongwos kupa-lesi nanu nga parlelep kele wor parasie ngok." <sup>51</sup> Ko Iesu owrai kele tevi ni, "Nuwretun nga nuwretun nuwrai tevi kami, vitunen suri ngel kapa-lesi melrin ðitðir ko anglo se Atua nir partongsa van mare reŕge melrin

ko parjubbul vini ngatan ji Jinibb Mawos."

## 2

### *Totkoién san reñge Kena*

<sup>1</sup> Renge nabong itolin vajin, totkoién san oto reñge Galili, reñge ngaim nen san nga nisen Kena. Ko reñge iok Iesu tasu sen owomu pa, elik tevir iok. <sup>2</sup> Arla nale kele van ji Iesu ko jinibb sen nir parini kele reñge totkoién nen. <sup>3</sup> Mian ko daron nga norro ser musuwsuw reñge nanen, ko Iesu tasu sen owrai tevi ni, "Norro ser osuwsuw."

<sup>4</sup> Ko Iesu owra tevi vinnen, "Kuwra bololi sev? Mete nial suk mawos nga inu ßemajing ren setewor evini."

<sup>5</sup> Mian ko tasu sen owrai tevi jinibb ne majingen ne nanen ne totkoién nir, owra "Kaploli sev tama nga puwrai tevi kami."

<sup>6</sup> Ko botel nga marlelep ouwon nga marlolir e nevöt arto ie nga jinibb parjejavöl e, nga mivijuri murrun tera se mïeri Isrel nir. Botel nen nir sisamis murrmurr nga marlelep nga martori nuwi rer eþari eru rreknga itul. <sup>7</sup> Iesu owrai tevi jinibb ne majingen ne nanen ne totkoién, "Kaptevtevangi nuwi van reñge botel ngok nir parwun." Ko nir artevtevangi nuwi van reñge botel nen nir arwun saut van mare reñge jingor. <sup>8</sup> Ko owra lweni kele tevir, "Kaptevangi tweni sopen, kaplai tevi mïer nga mimetmete nanen ne totkoién." Ko nir arloli erpok. <sup>9</sup> Daron nga mïer nga mimetmete nanen ne totkoién mimni rrongvi nuwi nga mïirieni pa mivi norro ngok, ko etaole. Ko errerleng lat nga mível e vini (ko jinibb ne majingen ne totkoién ma, nir nga martevangi tweni nuwi, arongwose). Ko everus jinibb nga mutotko, <sup>10</sup> ko owrai tevi, "Aro, jinibb jijle arok-la wowomue norro nga mïrres tevi jinibb nir, arok-mini wowomue, mian ko moro marmini jile musuw, ko arrleng suri dilten vajin lat nga muto suri, ko arokala nga sete mïrres armini vivitue. Ko nik ma lelingen kumtipatun kula nga mïrres, mijpari lelingen ngel ko kua-la nga mïrres jerjer nen oto ore."

<sup>11</sup> Ngel evi nelesien womujnen nga Iesu muloli reñge Kena reñge ngaim ne Galili san, nga miviseni nosrövien sen. Ko jinibb sen marosuri ni reñgen.

<sup>12</sup> Vitunen reñge ngel, ko ni evan ngatan e reñge Kapaneam, eþevi tasu sen ko tasin nir ko jinibb sen nir, ko arlik nabong evis ie.

*Iesu oji tweni jinibb nga markelkel reñge Naim On se Atua*

<sup>13</sup> Nanen ne asien, daron nga mïeri Isrel nir marok-rorormi lweni daron nga

marivel lingi norongen nga mïisij nga marok-runge Ijip, oruj mori. Ko Iesu otongsa luwi van mare e Jerusalem. <sup>14</sup> Ko elesi nir nga marwulwule buluk ko sipsip ko wuñer, ko nir nga markelkele nevöt, marsakel reñge Naim On loloim. <sup>15</sup> Ko ni ela dil wowarreng sopor, ko evirvirenir arto korti lat sansan, ko oji twenir e reñge Naim On, tevi sipsip ser ko buluk ser. Ko evatpus tep ser osutapoe van ngatan, ko nevöt ser nir arwera jrar! arwirr sarrsarr. <sup>16</sup> Ko owrai tevi nir nga marwulwule wuñer, owra "Kapla tweni nanu ngok nir! Kapiel tevir, sete kaploli naim se Tata suk pivi lat ne wulwulen se kami!" <sup>17</sup> Ngok jinibb sen nir arrorrmï wos nga aruli pa reñge Naul On, nga muwrai mirpel, muwra 'Inu numrreni Naim On som puwokwok tetajer. Norrorrmïen suk eterter tetajer iok, erpe nabb nga mïin re nolok.'

<sup>18</sup> Ko mïeri Isrel nir nga marlelep reñge nir arlesi esij ko arwerai tevi ni, "Nelesien sev nga nik kupviseni tevi kem nga nik kurres reñge kuploli pipel?" <sup>19</sup> Iesu owra lweni tevir, owra "Kapllokksi Naim On ngel, ko nabong þitul kobbong, ko bosusi raji lweni kele."

<sup>20</sup> Meri Isrel nen nir arwera lweni tevi ni, "O, laro, Naim On ngel ela sia ngavöl ivij drromon ouwon (46) nga kem nammajinge rer. Ko nik ma kurongwos kupsusi raji lweni nabong þitul bbölbööl?"

<sup>21</sup> Ko Naim On nga Iesu musþe suri ngok evi ni kobbong niben, nga Atua pia-loli pimaur luwi kele re mijen. <sup>22</sup> Vitunen vajin, daron nga ni mimaur luwi reñge mijen, jinibb sen nir arrorrmï sweri nga ni owrai pa nanu ngel tevir bonevis, ko arosuri Naul On ko nale nga Iesu muwrai tevir.

### *Iesu orongwose jinibb jijle nir nolor*

<sup>23</sup> Daron nga Iesu mïilik reñge Jerusalem reñge daron ne nanen ne asien, jinibb elep arosuri ni, suri marlesi nelesien nir nga ni mulolir. <sup>24</sup> Ko Iesu sete osurir, suri orongwose jinibb jijle nir nolor. <sup>25</sup> Ko sete emrreni jinibb san puwra tweni suri jinibb kele san, suri ni orongwos pae sev nga marto reñge nolo jinibb jijle nir.

## 3

### *Iesu ko Nikotemas*

<sup>1</sup> Parasi san elik iok, nisen Nikotemas. Evi jinibb san nga milep nga muwowomue mïeri Isrel nir. <sup>2</sup> Mernen mawos evini silveni ji Iesu reñge natamupong san. Ko owrai tevi, "Jinibb nevisvisenien, kem namrongwose nik kuvi jinibb nevisvisenien nga kumiél ji Atua vini, suri sete san orongwose puloli nelesien ngel nir nga nik

kumlolir ngel, poro nga Atua sete pipatevi ni."

<sup>3</sup> Iesu owra lweni tevi, "Nuwretun nga nuwretun nuwrai tevi nik, poro nga san sete p̄iak luwi kele, ko sete orongwos rragrage pian renge batun vanu se Atua nga pia-vini."

<sup>4</sup> Nikotemas owra lweni tevi Iesu, "Ai, jinibb p̄iak luwi kele p̄irpese, nga m̄itra pa? Sete orongwos pulwi kele van renge depai tasu sen, ko p̄iak luwi kele!"

<sup>5</sup> Iesu owra lweni tevi, "Nuwretun nga nuwretun nuwrai tevi nik, poro nga jinibb sete p̄iak luwi renge nuwi ko Nem̄in On, ko ni sete orongwose pian rragrag renge batun vanu se Atua. <sup>6</sup> Niko, nanu nga m̄iak renge niben evi niben kobbong, ko nanu nga m̄iak renge Nem̄in On evi nem̄in. <sup>7</sup> Sete kuptaole nga inu mowrai tevim mirpok ngok nga nik kūpiak kele. <sup>8</sup> Nik kurongwos kuprunge ling puwuw renge iok j̄jile nir vini, ko sete kurongwos lat nga m̄itipatun ren vini ko lat nga pian pusuw ren. Erpok kele renge nir nga mariak renge Nem̄in On."

<sup>9</sup> Nikotemas owra lweni tevi Iesu, owra "Ai, nanu ngel putoe p̄irpok p̄irpese ko?"

<sup>10</sup> Ko Iesu owra lweni kele tevi Nikotemas, "Nik kuvi jinibb ne nevisvisenien se m̄eri Isrel nir, ko suri sev sete kumrongwose nanu ngel? <sup>11</sup> Nuwretun nga nuwretun nuwrai tevi nik, inu nomok-sūpe suri nanu nga morongwose, ko nomok-rij suri nanu nga nulesi metek e. Ko kami sete kamosuri sev nga nuwrai. <sup>12</sup> Nuwra tweni nanu ne iel ngatan nir tevi kami, ko kami sete kamosuri te. Ko poro bowra vajin nanu ne melrin nir tevi kami, ko kami kaposurir p̄irpese? <sup>13</sup> Sete jinibb san otongsa van renge melrin nabong san. Inu kobbong sansan, Jinibb Mawos nga mojubbul renge melrin vini."

<sup>14</sup> Erpe Moses tuwi murr̄loni nūmet nga marmajing rrongrongvi e bras re nai san ko musi mutur imare renge lolo merwer, ngok p̄irpok ko renge inu Jinibb Mawos, jinibb nir para-r̄rulonik. <sup>15</sup> Renge iok, poro isi tama san pia-osuri inu, m̄ernen pia-lai mauren nga muto tuwi ngok ko wor vini. <sup>16</sup> Atua em̄reni temijpale jinibb ne iel ngatan nir. Ko niko muloli ni mukoni inu, nga m̄esansan mevi ni natun mawos, vini iel ngatan. Ngok poro isi san pia-osuri inu, m̄ernen sete mia-mij, ko pia-la mauren nga muto tuwi ngok vini. <sup>17</sup> Atua okoni inu Natun mawos vini iel ngatan, sete suri B̄ewer lokloksi jinibb ne iel ngatan nir, ejki, ko ñela ma mauren tevir."

<sup>18</sup> Ni nga muosuri inu, setemun Atua mia-wer lokloksi. Ko si nga sete muosuri inu, Atua ewer lokloksi ko pa osuw ngok, suri sete muosuri nise inu nga mevi

Atua natun mawos. <sup>19</sup> Atua ololi erpok suri nanu ngel le: moron evini pa iel ngatan osuw, ko jinibb sete armerreni te. Armerreni wor nemalik asie moron, suri nanu nga marok-lolir arsi. <sup>20</sup> Jinibb j̄jile nga marok-loli nanu nga marsij nir arok-ungasi moron, ko ololi sete armerreni parini renge moron. Armetutue moron, arunge moron tumor vaseni nanu nga marsij nga marok-lolir tarto limjer. <sup>21</sup> Ko si nga ma muloli sev nga mivi weretunen, okini ko wor renge moron, suri nga em̄reni puloli parlesi wos nanu nga mok-lolir nga marres, nga muosuri Atua rer."

#### *Jon Baptaes owra lilane Iesu*

<sup>22</sup> Vitunen vajin renge nanu ngel nir, Iesu eptevi jinibb sen nir aran renge Jutia. Ko arlik nabong evis wor iok, ko Iesu ok-paptaese jinibb nir ie. <sup>23</sup> Jon kele renge daron nen ok-paptaese jinibb nir renge Aenon mori Salim, suri nuwi elep renge iok. Ko jinibb nir aranan ji Jon ie, ko ok-paptaes nir iok. <sup>24</sup> Suri renge daron nen setewor arlingi Jon renge naim ne nekaien."

<sup>25</sup> Renge iok Jon jinibb sen sopor ko m̄eri Isrel san arsupūpe suri murr̄un ne lalosen, erpese nga jinibb san orongwos puwokwok renge no Atua. <sup>26</sup> Mian ko arini ji Jon arwerai tevi, "Jinibb nevisvisenien, kuplesi m̄er nga bonevis nga miptevim nga iokwan renge devje nuwi seser van luwi Jortan nga e, nga nik kumrij sen. Ni le ngel mok-paptaes jinibb nir renge nuwi seser. Jinibb p̄etp̄eti arinini jin."

<sup>27</sup> Jon owra "Erres kobbong. Sete jinibb san orongwos puloli majingen san poro Atua sete mukoni twenie. <sup>28</sup> Kami bonevis nga, kamrongwose nga inu mowra inu sete nuvi Mesaea. Atua okoni wowomu inu ko ma renge ni, vitunen ko ni pia-vini." <sup>29</sup> Ko Jon otuw kele nale ngel, owra "Jinibb san nga puwra p̄ilesi nesevin san, ko poro puwra pian mun lat san, ko p̄ilngi selen san nga pimmetete nesen sen sapon pijpari nga pia-luwi. Ko vinnen evi pa sen ko. Ko selen ngok, daron nga murnge drrela m̄ernen mivini, ko eir elep, sete orongwos purnge p̄isij e. Ko erpok ko, inu neiren suk elep temijpal vajin. <sup>30</sup> Ni pian mare jerjer, ko inu bean ngatan jerjer renge ni."

#### *Ni nga mivel renge melrin vini*

<sup>31</sup> Ni nga mujubbul mare renge melrin vini, ean mare jerjer renge jinibb nir. Ko m̄er nga miplari bbong renge iel ngatan evi pa jinibb ne iel ngatan, ko ok-sūpe suri bbong nanu ne iel ngatan nir. Ni nga ma mujubbul mare renge melrin vini, ni an mare jerjer ko wor renge jinibb nir. <sup>32</sup> Ni ok-sūpe sev nga ni murnge ko m̄ilesir re meten. Ko sete ma jinibb

san ea-osuri rragrage nanu nga muwrai ngok nir! <sup>33</sup> Ni nga ma muosuri sev nga inu mowrai eviseni vajin nga Atua nale sen arivi weretunen. <sup>34</sup> Mer nga Atua mukoni, ni ok-suŕe suri nale se Atua, suri Atua elai Neñin On sen tevi ni owun saut rrese. <sup>35</sup> Tata emrreni Natun, ko ela nanu jijle tevi, elngir reнге nevre. <sup>36</sup> Mer nga muosuri Natun elai pa mauren nga muto tuwi ngok vini. Ko m̄er nga sete muosuri Natun sete mia-la mauren nga muto tuwi ngok vini. Mernen lolaren se Atua oto malum ren.

## 4

### *Iesu erij tevi nesevin Sameria*

<sup>1-2</sup> Ko mian ko Parasi nir arunge nga Iesu jinibb sen nir milep m̄iasie Jon vajin, ko nga Iesu mipaptaese jinibb milep m̄iasie Jon. (Ko ewretun, Iesu sete epaptaese jinibb nir, ejki, ko jinibb sen kobbong nir arok-paptaese jinibb nir.) <sup>3</sup> Ko daron nga Iesu murongwose nga Parasi nir arunge pa nga ni jinibb sen milep m̄iasie Jon, ko niko muloli ni mivel lingi Jutia, ko mulwi kele van re Galili e.

<sup>4</sup> Ko reнге nivelen sen, evel oti sise m̄eri Sameria nir. <sup>5</sup> Ngok, evini reнге Sameria ngaim nga welwelili nen san nga nisen Saeka, morie orsel nga Jekop m̄ilai tuwi tevi natun Josep. <sup>6</sup> Renge ie evi lat nga Jekop m̄ili nuwi sen ren. Ko Iesu ornge lengleng esij reнге nivelen sen, ko evini esakel mori jeli nuwi nen. Erpe evi levial mawos, mete nial esngavöl drromon eru.

<sup>7</sup> Mian ko nesen Sameria san evini nga pitvangi nuwi ie. Ko Iesu owrai tevi vinnen, "Kupla nuwi ngok sapon tevik bemni." <sup>8</sup> (Renge daron nen jinibb sen nir arivel pa aran ngaim e parwuli nanen ser sapon.)

<sup>9</sup> Nesen Sameria nen etaol ko owrai lweni tevi, "Erpese nga nik kumivi m̄eri Isrel, ko kumngoni nuwi nga kupmini tevi inu, nga mevi nesen Sameria?" (M̄eri Isrel sete arok-korti tevi m̄eri Sameria nir.)

<sup>10</sup> Iesu owra lweni tevi vinnen, "Poro nga nik kuprongwose nelaien se Atua nga m̄ilai, ko isi le nga muwrai tevim nga kupla nuwi tevi pimni, ngok nik kurongwos kupngoni ni p̄ilai nuwi nga nik vajin kupmini. Ko kupmaur tuwi ngok vini reнге." <sup>11</sup> Vinnen owra lweni tevi Iesu, "O, ko nanu san ejki iel nga nik kuptevangi nuwi e, ko nuwi ngel evan ngatan lengleng. Ko reнге nuwi ne mauren nga tuwi ngok vini nga nik kumwera kuplai ngok, kuplai ngabe ko? <sup>12</sup> Birtera se kerr Jekop, ni le eli nuwi ngel; ni ko natun nir ko buluk sen nir armini nuwi ngel. Ko ni ko elai tevi kem. Ko erpese, nik kulep asi wore ni?"

<sup>13</sup> Iesu owra lweni tevi, "Isi nga pimni nuwi ngel, pian ko purnge kele kobbong nolon pimesmes. <sup>14</sup> Ko isi nga ma pimni nuwi nga inu bea-lai tevi, ni sete nolon mia-mesmes kele mun. Nuwi nen nga ßelai tevi nen pia-irpe mete nuwi nga muwowosi reнге ni, ko pia-lai mauren nga muto tuwi ngok vini."

<sup>15</sup> Vinnen owrai tevi ni, "Numal, kuplai nuwi nen tevik bemni, ko puloli nolok sete pimesmes kele, ko sete bevini kele mun betvangi nuwi iel."

<sup>16</sup> Iesu owra lweni tevi vinnen, "Kupan kupveruse diwen som pivini, ko nik kele kupluwi vini." <sup>17</sup> Vinnen owra lweni tevi Iesu, "Ejki ma, diwen suk ejkie."

Ko Iesu owra lweni tevi, "Kuwretun reнге kumwera mirpok, diwen som ejkie. <sup>18</sup> Suri nik diwen som nga reнге sel elim kis, ko m̄er nga nik kumlik jin lelingenok sete evi diwen som. Kuwretun ko wor reнге kumwera mirpok."

<sup>19</sup> Vinnen owra lweni tevi, "Numal, nurnge nibek nen nga nik kuvi propet san. <sup>20</sup> Birtera se kem nga tuwi nir arok-lotoe Atua reнге botwen nga ngel, ko kami m̄eri Isrel nir kamok-wera reнге Jerusalem ko wor evi lat nga jinibb parlotoe Atua reнге."

<sup>21</sup> Iesu owrai tevi vinnen, "Vinel, kuposuri inu, mete nial nen evini nga kami setemun kaplotoe Tata reнге botwen nga ngel, rrekgna reнге Jerusalem. <sup>22</sup> Kami m̄eri Sameria nir sete kamrongwose Atua nga kamlotoe, ko kem m̄eri Isrel namlotoe Atua nga namrongwose. Suri sel nga jinibb p̄ila mauren eplari ji m̄eri Isrel nir kobbong. <sup>23</sup> Mete nial nen evini ko eplari lelingen ngel, nga jinibb nga marweretun marlot, parlotoe Tata tevi neñin ko weretunen. Tata epej loten nga mirpok ko, nga parlotoe ni reнге. <sup>24</sup> Atua evi Neñin, ko jinibb nga marlotoe ni parlotoe ni ko wor tevi Neñin ko weretunen."

<sup>25</sup> Nesevin owra tevi ni, "Nurongwose nga Mesaea, nga pia-la mauren tevi jinibb nir, pia-vini ko wor ko pia-wera visviseni nanu jijle tevi kerr."

<sup>26</sup> Iesu owra lweni tevi vinnen, "Inu nen le pa ngel nga m̄erij tevim ngel, inu nuvi m̄ernen."

<sup>27</sup> Renge daron nen mawos Iesu jinibb sen arulwi vini. Ko artaole nga marlesi Iesu mok-rij tevi nesevin san. Ko sete nir san osusi tevi vinnen, "Kupej sev le?", rrekgna puwrai tevi Iesu, "Erpese kumrij tevi nesevin ngok?"

<sup>28</sup> Ko nesevin nga elngi tweni botel sen esiri jer, ko owlu suri sel olwi van ngaim nga milep ser e, ko owrai tevi delung ne ie nir, <sup>29</sup> "Lartul, kapini kaplesi ta jinibb san



ni le, mñernen owra jijle nanu nga nomok-lolir nir. Rreknga mñernen evi Kristo le?"  
<sup>30</sup> Ngok jinibb nga renge ngaim nen nir arivel tweni aran jin arlesi.

*Iesu ela nale rrongrrongvi ne numös*

<sup>31</sup> Renge daron nen jinibb sen nir arveruse ni, arwera "Numal, kupini mun kupaan sapon."

<sup>32</sup> Ko ni owrai tevir, "Nanen suk nga borroi oto wore nga kami sete kamrongwose."

<sup>33</sup> Suri muwrai mirpok ngok, ko jinibb sen nir arwerwera lululweni nir e, "Rrekma jinibb san ela nanen tevi ni nga purroi?"

<sup>34</sup> Ko Iesu owra lweni tevir, "Kami sete kamrongwose nanen suk. Nanen suk evi nga Bemajing jile marongen se Atua nga mukoni inu vini, bololi jijler."

<sup>35</sup> Kami kamok-wera, 'Navöl ivij ojpon malum mian ko daron ne numös pia-vini.' Ko kaplesi, inu nuwrai tevi kami, kapkulu ta imare kapmeteni naut ne orsel nir. Arkur arow jile, arviter partawer.

<sup>36</sup> Mer nga mok-tawe wenen ne numös ok-la nowlin. Ko ok-ser kortoni wenen nir, ngok erpe jinibb nir nga paran renge mauren ne tuwi ngok vini. Puloli nuru korti, mñer nga mok-jijreni ko mñer nga mok-tawe, porir kokorti. <sup>37</sup> Naul On owra, 'San purwi naut ne orsel, ko jinibb mñinij pia-tawe wenen ren vajin.' <sup>38</sup> Inu nukoni kami kaman renge naut ne orsel nga kami sete kamruwir, ko kamok-tawe wenen rer vajin. Jinibb mñinij nir arpelak nga maruwi naut nen nir, ko kami vajin kama-van kamtawe nawone wenen rer."

*Meri Sameria elep arosuri Iesu*

<sup>39</sup> Jinibb ne ngaim nen elep arosuri Iesu vajin, suri renge nale se nesevin nga muwrai tevir ngel, 'Owra nanu jijle nga nomok-lolir'. <sup>40</sup> Daron nen nga mñeri Sameria marini jin nen, arngoni tertere ni nga ni pilik mun tevir. Ko ni elik mun tevir ie nabong eru kele. <sup>41</sup> Ko renge mñilik tevir ie, nir elep kele wor arosuri ni renge marunge nale sen nir. <sup>42</sup> Ko lartul nen nir arwerai tevi nesevin nen, arwera "Lelingen ngel kem namosuri, sete suri nga nik kumwerai tevi kem, ko suri kem wor namrunge nale sen nir nga muwrai. Ko namrongwose ni evi mñer weretunen nga pia-lai mauren tevi jinibb ne iel ngatan nir."

*Iesu ololi natu numal san erres luwi*

<sup>43</sup> Iesu elik ie Sameria ejpari nabong eru asi osuw, ko evel kele van sisen e Galili. <sup>44</sup> Ko ni owra tweni wowomue pa renge nale sen, "Mer nga mivi propet, ko jinibb ne sisen nir sete arok-osuri ni." <sup>45</sup> Ko daron nga mivini mijpari lweni Galili e, jinibb ne ie nir artur terai, suri marlesi

nanu nga mulolir renge Jerusalem renge daron ne nanen ne asien; suri nir kele arini renge nanen nen.

<sup>46</sup> Mian ko Iesu olwi kele vini Kena e, nga mivi ngaim nga welili ne Galili san, lat nga bonevis mñirieni nuwi rres mivi norro e. Ko jinibb nga milep san elik iok. Mernen natun emsi, ko ematur jer wor Kapaneam. <sup>47</sup> Mernen daron nga murunge Iesu mivel lingi pa Jutia mivini renge Galili e, ko ean jin ko ongoni ni, owra pipitevi poran ngatan Kapaneam, puloli natun pñirres luwi. Suri otomori pa pimij. <sup>48</sup> Iesu owrai tevi mñernen, "Aro! Poro nga sete kaplesi nelesien nir, sete kama-osuri rragrage te."

<sup>49</sup> Jinibb nga milep nen owra "Numal, wurru, kupini wor pingavil puwomu, vitunen ko poro natuk pia-mij vajin!"

<sup>50</sup> Ko Iesu owra lweni tevi, owra "Kupiel. Natum emaur pa." Ko mñernen osuri nale nga Iesu muwrai, ko evel osri lweni sel olwi.

<sup>51</sup> Ko daron nga musri lweni sel mulwi van ngatan e Kapaneam, ko jinibb ne majingen sen sopor arivel tersele ko arsewute renge sel, ko arwerai tevi, "Ai, natum erres luwi pa!"

<sup>52</sup> Ko ni osusi tevir, owra "Momsawos mete nial sev nga ni mñitapatun mñirres luwi ren?" Ko nir arwera lweni tevi, "Momsawos mete nial sansan renge miniv levial, mesien dowalul elinglingi ni." <sup>53</sup> Tata sen orongwose evi mete nial mawos nga Iesu muwrai ko tevi ni rengen, 'Natum emaur pa.' Ko ni osuri, ko nir jijle nga marlik renge naim sen nir kele arosuri. <sup>54</sup> Ngel evi nelesien erwen nga Iesu muloli daron nga mivel lingi Jutia ko mivini Galili e.

## 5

*Iesu ololi jinibb san erres luwi renge nuwi ne Betsaeta*

<sup>1</sup> Vitunen renge nabong ngel, ko nanen san se mñeri Isrel nir vajin, ko Iesu otongsa evan Jerusalem e. <sup>2</sup> Ko renge iok Jerusalem, nuwito san oto ren nga mubbun rrerrale. Renge nale se mñeri Isrel nir, nisen ko Betsaeta. Evi lat ne lalosen, ko oto mori metali san renge naworr nga mñirrale Jerusalem nga marveruse metali ne sipsip. Lat nen, naim salsal elim artur ren. <sup>3</sup> Ko renge iok renge naim salsal ngok nir, jinibb elep nga elep temijpal armatur rer, nir ngok armesi e mesien lele nir. Nir sopor meter arorr; nir sopor arivi naroj, nir sopor devje niber armij. Ko arok-tiriv tera nuwi nen pñiterringring. <sup>4</sup> Suri nabong sapon anglo ok-jubbul vini ngatan ok-siksikeni nuwi nen, ko isi nga puwowomu van renge nuwi ngatan, mñernen

ko erres reнге mesien sev nga ni mimsi ren. <sup>5</sup> Renge ie jinibb san nga mimsi sia ngavöl itul drromon owil (38). <sup>6</sup> Daron nga Iesu mälesi mimatur, ko orongwose nga mesien ngok ololi wor tuwi ko. Ko owrai tevi, "Nik kumarong kupres?" <sup>7</sup> Mer nga owra lweni tevi, "Numal, inu sete jinibb nga puwosik van reнге nuwi otee. Moro daron nga nuwi mitterringringe, ko mowun tweni nga ban, ko jinibb mñinj san ojubbul womu van ngatan reнге nuwi." <sup>8</sup> Ko Iesu owrai tevi, "Kupmera kupuni milngom ko kupiel!" <sup>9</sup> Daron nen mawos ko pa, mñernen erres luwi. Ko oni milngen ko evel.

Renge nabong nen evi nabong on mawos. <sup>10</sup> Meri Isrel nga marlelep nir arwerai tevi mñer nga mñirres luwi nga, "E, lelingen evi nabong on, sete omomsawos reнге devjen ne nale neseresien nga nik kupuni milngom ko kupiel!"

<sup>11</sup> Ko ni owra lweni tevi nir, owra "Mer nga wor muloli inu ko mñerres luwi owrai tevik, 'Kupuni milngom ko kupiel.'"

<sup>12</sup> Ko nir arsuasi lweni kele tevi, arwera "Ia, ko isi ko nenen nga muwrai tevim nen, 'Kupuni milngom ko kupiel?'" <sup>13</sup> Ko mñer nga mñirres luwi sete orongwose isi ko mñernen, suri delung elep þelak ie. Ko Iesu kele evel tilper ko evel pa van lat mñinj e.

<sup>14</sup> Mian ko vitunen vajin sopen, Iesu otor sweri mñernen reнге Naim On se Atua. Ko owrai tevi, "Kuplesi, kurses pa ngok. Ko sete kuploli kele mun nololien, suri nanu nga tia-sij temijpal san tia-asi mesien som ngok tia-loli kele nik."

<sup>15</sup> Ko mñer nga eivare ko evan ji mñeri Isrel nen nir, ko owrai tevir, "Iesu le nga muloli inu mñerres luwi nga." <sup>16</sup> Ngel ko ololi nga mñeri Isrel nen nir marmmerreni para-rurrur otot tevi Iesu, suri ololi nanu ngok re nabong on.

<sup>17</sup> Ko Iesu owra lweni tevir, "Tata suk emajing tetajer erpok sete omosi, ko niko inu mñemajing, sete bomosi." <sup>18</sup> Renge muwrai mirpok ngok ko, ololi mñeri Isrel nen nir arpej kele wor reнге ni sel nga parevji pini ni rengen, sete suri kis nga mutor oti nabong on, ko suri kele nga muwra Atua evi ni Tata sen mawos, erpe ololi ni osorsan tevi Atua.

#### *Derteren se Atua Natun*

<sup>19</sup> Iesu owrai kele tevir, "Nuwretun nga nuwretun nuwrai tevi kami, sev nga mñelesir Tata suk mok-lolir, ko niko inu nomok-lolir. Inu sete nurongwos bololi nawone nanu pisan, ejki. Sev nga Tata mok-lolir kobbong, ko inu kele nomok-lolir. <sup>20</sup> Suri Tata emrreni inu, ni natun, ko eviseni nanu jijle nga ni mok-lolir tevi inu. Ko pia-viseni kele wor reнге inu majingen

nga wor parlelep parasie nga ngel, nga parloli kami kapa-taoler. <sup>21</sup> Erpe Tata suk muloli jinibb nga marmij nir armaur luwi kele reнге mijen, inu kele berpok, ko þela lweni mauren tevi si nga memrreni. <sup>22</sup> Tata suk sete owra suri lat nga puto suri tevi jinibb san, ko elngi majingen ngok oto reнге inu nevrek. <sup>23</sup> Niko puloli jinibb nir parosuri inu, nga mevi ni natun mawos, pirpe nga nir marosuri inu Tata suk. Mer nga sete muosuri inu te mijki, ni sete osuri Tata suk nga mukoni inu, ejki.

<sup>24</sup> "Nuwretun nga nuwretun nuwrai tevi kami, mñer nga murnge nale suk, ko muosuri Tata suk nga mukoni inu, elai pa mauren nga muto tuwi ngok ko vini. Atua setemun orongwos putor vitrangi, ko asi ko pa reнге mijen ean reнге mauren. <sup>25</sup> Nuwretun nga nuwretun nuwrai tevi kami, lelingen ngel mete nial nen evini nga jinibb nga marmij nir parunge drrela inu nga mevi Atua natun mawos; ko jinibb nga marmurronge inu, nir kele parla mauren. <sup>26</sup> Erpe Tata suk esansan bbölbööl kobbong evi batu mauren, ko erpok elai tevi inu nga inu kele þesansan bbölbööl bevi batu mauren. <sup>27</sup> Tata suk ela derteren tevik nga inu bowra lilane lat nga puto suri reнге jinibb nir, suri inu nuvi Jinibb Mawos. <sup>28</sup> Kami sete kaptaole nanu nga mowrai ngel, suri mete nial nen evini nga jinibb nga marmij nir para-runge drrelak <sup>29</sup> ko para-ivare reнге dobbir. Ko nir nga marok-loli nanu nga marres nir bonevis parmaur luwi ko paran reнге lat ne mauren. Ko nir nga ma marok-loli nanu nga marsij nir bonevis paran reнге lat ne norongen nga mñisij.

<sup>30</sup> "Inu sete nurongwos bowra nawone lat nga puto suri tevi jinibb san reнге inu derteren suk, ejki rres nawon. Nanu jijle nga nomok-werai, nurnger ko wor ji Tata suk. Ko nanu nga mowrari arivi weretunen, suri sete nomok-loli marongen suk, ko nomok-loli ma marongen se ni nga mukonik.

<sup>31</sup> "Poru inu þerij se inu lweni bbong, nale suk ngok sete evi weretunen. <sup>32</sup> Inu ngel, jinibb mñinj san erij se inu. Ko inu nurongwose nale sen nga mñirij se inu ren evi weretunen. <sup>33</sup> Bonevis nga kami kaman ji Jon Baptaes, kami kamsusi rongorngge tevi ni, ko ni owra tweni weretunen tevi kami. <sup>34</sup> Inu nomok-rij erpok ngok, sete suri nubibto re nale se jinibb san, ejki. Inu nomok-wera nanu ngel nir arirpel nga puloli kami kapasu van re mauren. <sup>35</sup> Jon evi nasul san nga mimor, moron mñirinrin wowomu bonevis; ko kami karñir, kammarrong kaplesi nasul sen. Ko ngok oto bbong omrrol. <sup>36</sup> Ko inu nanu kele san nga mñirij suk otee. Nenen

elep asie wor nga Jon ngok, nenen evi majingen nga Tata suk mülair tevik nga inu bemajing rer, bololi jijler. Majingen jijle nga mololir ngok nir arij se inu nga Tata suk okoni inu. <sup>37</sup> Ko Tata suk nga mukoni inu, ni kele erij se inu. Ko sete kami kamrunge drrelan renge nabong san, rreknga kamlesi niben renge nabong san. <sup>38</sup> Nale se ni sete kami kamlair kamtorir renge nolo kami nir, suri sete kamosuri inu, nga ni mukonik. <sup>39</sup> Kami kamok-pejpej sel renge Naul On, ko kamok-wera kami kamok-la mauren nga muto tuwi ngok vini ren. Ko Naul On nen kele erij se inu kobbong, <sup>40</sup> ko kammusus kapini jik ko puloli kapla mauren.

<sup>41</sup> "Sete numrreni jinibb nir parsurövi inu, ejki. <sup>42</sup> Ko inu nurongwose renge kami ngok, sete kamok-la merrenien se Atua kamok-tori renge nolo kami nir. <sup>43</sup> Inu nuvini renge nise Tata suk, ko kami sete kamtekai inu. Ko poro ma jinibb münij san pivini renge ni kobbong nisen, ni ko ma kaptekai. <sup>44</sup> Ngok kami kaposuri pirpese, suri kami kamok-lila lululweni nosrosövien renge kami kobbong, ko sete kamok-pej nosrovien nga mivel ji Atua nga mñisan kis mivini. <sup>45</sup> Sete kami kaprrormi nga kapwera inu bowowra tweni kami tevi Tata suk, pijki. Moses nga mivi mñer nga kami kamosuri, ko ni ko pia-wowrai tweni kami. <sup>46</sup> Poro pivi weretunen nga kami kamosuri Moses, ko ngok kami kaposuri inu ko, suri ni oli suri inu kobbong. <sup>47</sup> Ko suri kami sete kamosuri nale se Moses, ngok kaposuri nale suk nir pirpese?"

## 6

*Iesu owngani jinibb evi nuvasngavöl valim (5000)*

<sup>1</sup> Vitunen renge ngel, Iesu evel rujuj kele evan renge devjen ne nuwito ne Galili, nga nisen münij nen marwera nuwito ne Taepirias e. <sup>2</sup> Ko meling jinibb nga milep arvijuri arini jin, suri marlesi nelesien sen nir nga mulolir renge nir nga marmesi. <sup>3</sup> Ko Iesu otongsa van mare renge botwen san, ko elik tevi jinibb sen nir ie. <sup>4</sup> Renge daron nen, nanen ne asien se mñeri Isrel nir dabbun nen oruj mori.

<sup>5</sup> Daron nga Iesu muklu tawij, ko mñlesi meling jinibb nga milep marinini jin renge ie. Ko owrai tevi Pilip, "Kerr rrapwuli niv ngabe nga delung jinibb nga marinini ngel parurroir?" <sup>6</sup> Owrai erpel, owra bbong purrowrrowe Pilip ko ren. Suri ni orongwos pae sev nga ni pia-loli.

<sup>7</sup> Pilip owrai lweni tevi, "Nevöt pivi pungut pivaru (200) kis ngok puwelili kele kobbong, sete pivter malum pivi nowli niv

nga parurroi e; nir sisamis parurrurro bbong beblen ko."

<sup>8</sup> Ko san kele renge jinibb sen, nga nisen Antru, Saemon Pita tasin, owrai tevi ni owra <sup>9</sup> "Nanwarreng san ni le ielan otori niv wowarreng nga marlolli bale e elim, ko nai wowarreng eru. Ko erpese, jinibb ngok nir elep ko wor."

<sup>10</sup> Ko Iesu owra "Kaploli jinibb nir parlik ngatan." Ko renge ie mösmös elep ren; ko jinibb nen nir arlik ngatan. Ko norman nga marlelep kis kobbong nir totoklai ejpari nuvasngavöl valim (5000). <sup>11</sup> Iesu ela niv nen nir, ko owra erres tevi Atua surir. Ko owjuwje tevi jinibb nir nga marlik iok; ko ololi erpok kele renge nai nga wowarreng nga nuru. Ko nir jijle arla nanen evoer nir erpe marmarereni. <sup>12</sup> Ko daron nga maraan jile vajin musuw, ko Iesu owrai tevi jinibb sen nir owra "Kapsere lweni bebje nanen nir nga marurro linglingir marjipon, sete sapon parsij nawon." <sup>13</sup> Ko nir aran arsere kor-toni bebjen nga marurro linglingir renge niv nga elim wowarreng nga, ko arsongnir renge narr esngavöl drromon eru arwun saute. <sup>14</sup> Ko daron nga delung nen nir marlesi nelesien nga muloli, ko arwera "Merel evi propet nen weretunen le pa nga marwera pia-vini iel ngatan!" <sup>15</sup> Iesu ornge renge niben nen, orongwose nga parini paron tertere ni nga pivi numal ser. Ko ni evel esan evan renge botwen e.

*Iesu evel renge mare ne nuwi*

<sup>16</sup> Renge daron nga nat mirivriv e vini, ko jinibb sen nir arjubbul van ngatan e renge nuwito. <sup>17</sup> Ko aran arsa renge drrav, ko arwolu otvi nuwito, arluwi kele van Kapaneam e. Ko natopong pa vini, ko Iesu setewor evini jir. <sup>18</sup> Ko ling serser nga milep san etewut vini, ko ololi nuwito obburbur. <sup>19</sup> Ko jinibb sen arsu erpe ningaw evi nuvasngavöl valim (5000) rreknga wawon (6000) pa osuw, ko arlesi Iesu mivel renge mare ne nuwito vini, evini mori renge drrav. Ko nir aririr lengleng. <sup>20</sup> Ko Iesu owrai tevir, "Inu lebbong, sete kapmetutu!" <sup>21</sup> Ko nir armarong vajin pisa parengeni renge drrav. Ko drrav evesan rrese ejpari ngaut lat nga marwera paran ren.

*Delung arpej Iesu*

<sup>22</sup> Mevnen jinibb delung nga martur jer renge devje nuwito arlesi nga drrav sansan bbong nga mutur renge devje nuwito, ko arongwose nga Iesu sete mñisa tevi jinibb sen nir mijkie, ko arsan kis bbong arsa ko arwolu. Ko arrorrmi Iesu ni ko malum iok sapon. <sup>23</sup> Drrav münij sapor ne Taepirias arwolu veut morie lat nga meling jinibb nga milep marurroi niv

e nga Numal muwra erres rer womu tevi Atua, ko vitunen ko mara-urroir.

<sup>24</sup> Ko mian ko meling jinibb ngok nir marlesi nga Iesu mijki iok, ko jinibb sen kele nir, ko ngok arla kele drrav sopor arwolu kele arini Kapaneam e, arpej Iesu.

*Iesu niv ne mauren*

<sup>25</sup> Daron nga delung martor sweri ni renge devje nuwito e, ko arwerai tevi, "Jinibb nevisvisienien, kuvini iel e seveling le?"

<sup>26</sup> Ko Iesu owra lweni tevir "Nuwretun nga nuwretun nuwrai tevi kami, kampej inu sete suri kamrongwose suri nelesien suk nir, ko suri kamrro niv, ko kamup e mirpe nga kammerreni. <sup>27</sup> Sete kapmajing tweni nanen nga mian ko p̄sij, ko kapmajing tweni nanen nga pia-la mauren nga puto tuwi ngok vini tevi kami, nga inu Jinibb Mawos bea-lai tevi kami. Atua elngi nabil ne derteren nen pa renge inu."

<sup>28</sup> Ko nir arwurai tevi ni, "Kem nabloli sev ko, evi nga nammajing majingen se Atua?" <sup>29</sup> Iesu owra lweni tevir, "Ngel le evi majingen se Atua, nga kami kaposuri inu, nga ni mukonik."

<sup>30</sup> Ko nir arwerai tevi ni, "Nelesien sev nga nik kupviseni nga kem nablesi, ko nabosuri nik? Kuploli majingen sev? <sup>31</sup> Tata se kerr nir arurroi mana renge lolo merwer, erpe nga maruli renge Naul On, 'ni ela niv ne melrin tevir arurroi.' "

<sup>32</sup> Iesu owrai tevir, "Nuwretun nga nuwretun nuwrai tevi kami, Moses sete ela niv ne melrin weretunen tevi kami. Tata suk ko ma ok-la niv ne melrin weretunen tevi kami. <sup>33</sup> Ni nga mivel renge melrin vini iel ngatan evi niv se Atua, ko ok-lai mauren tevi iel ngatan."

<sup>34</sup> Ko nir arwerai tevi ni, "Numal, kopok-la niv nen ko pa tetajer tevi kem."

<sup>35</sup> Ko Iesu owrai tevir, "Inu nuvi niv ne mauren. Mer nga pivini jik, numer sete orongwos p̄aji kele; ko m̄er nga muosuri inu, ni sete purnge nolon pimesmes kele mun. <sup>36</sup> Ko nuwrai tevi kami, kami kamlesi mete kami e inu, ko sete kamosuri inu te. <sup>37</sup> Jinibb nga Tata n̄ilair tevik parini jik ko wor; ko m̄er nga mivini jik, setemun numa-oji tweni, ejki. <sup>38</sup> Suri inu nuvel renge melrin vini iel ngatan, ko sete nuvini tweni nga bololi marongen suk, ko nuvini tweni nga bololi marongen se ni nga mukoni inu. <sup>39</sup> Ngel ko evi marongen se Tata nga mukoni inu, nga jinibb j̄jle nga n̄ilair tevik, sete botor jabble san pijijki, bea-loli parmaur luwi kele renge nabong nga vitunen. <sup>40</sup> Ko ngel le evi marongen se Tata suk, nga jinibb j̄jle nga marlesi Natun ko marosuri ni, parla mauren nga muto

tuwi ngok vini. Ko inu bea-loli parmaur luwi kele renge nabong nga vitunen."

<sup>41</sup> Ko m̄eri Isrel nga marlelep nir arlolare renge Iesu muwrai mirpok, nga ni evi niv nga mivel renge melrin vini, ko arok-rij latlat malum bbonge suri. <sup>42</sup> Ko arwera "Po, m̄erel evi bbong Iesu le ngel, nga tata sen ko tasu sen rramrongwose nuru. Ni mivi bbong natu Josep! Ko erpese le ni muwra mivel renge melrin vini?"

<sup>43</sup> Iesu owra lweni tevir owra "Sete kaplolar kapok-supsupe lululweni malume p̄irpok renge kami lweni. <sup>44</sup> Sete jinibb san orongwose pivini jik, poro bbong Tata suk nga mukonik ko pirvei ni vini jik. Ko inu bea-loli pimaur luwi kele renge nabong nga vitunen. <sup>45</sup> Propet nir aruli renge Naul On erpel, 'Atua pia-visvisienir', ko jinibb j̄jle nga murnge Tata ko murongwose nanu vajin, pivini jik ko. <sup>46</sup> Sete jinibb san elesi Tata renge nabong san. Ni nga bbong mivel ji Atua ko, ni kobbong elesi Tata. <sup>47</sup> Nuwretun nga nuwretun nuwrai tevi kami, m̄er nga muosuri inu ela mauren ne tuwi ngok ko pa vini. <sup>48</sup> Inu nuvi niv ne mauren. <sup>49</sup> Tata se kerr nga tuwi nir arurroi mana renge lolo merwer, mian ko armij. <sup>50</sup> Ko ngel evi niv nga mivel renge melrin vini iel ngatan, nga poro jinibb san purroi, ko sete pimij. <sup>51</sup> Inu ngel nuvi niv ne mauren nga mevel renge melrin vini. Poro jinibb san purro niv ngel, ni pimaur tuwi ngok vini. Ngat nga inu βelai pivi mauren ne iel ngatan, evi inu nibek."

<sup>52</sup> Meri Isrel nen nir arlolare vajin, ko arsususi lululweni tevir, arwera "Merel p̄ila niben tevi kerr p̄irpese nga kerr rraproi?"

<sup>53</sup> Iesu owrai lweni tevir, "Nuwretun nga nuwretun nuwrai tevi kami, poro nga kami sete kaproi nibe Jinibb Mawos, ko kami sete kapmini drran, ko ngok mauren sete oto renge kami. <sup>54</sup> Ko isi nga murro nibek, ko mimni drrak, ela pa mauren nga muto tuwi ngok ko vini. Ko niko inu bea-loli pimaur luwi kele renge nabong nga vitunen. <sup>55</sup> Suri nibek evi nanen weretunen, ko drrak evi minminen weretunen. <sup>56</sup> Mer nga murro nibek ko mimni drrak, ni elik renge inu, ko inu nulik renge ni. <sup>57</sup> Erpe Tata nga mimaur tuwi ngok vini mukoni inu, ko inu numaur renge Tata, erpok kele m̄er nga murroi inu nibek, ni p̄irpok ko, pimaur renge inu. <sup>58</sup> Ngel evi niv nga mivel renge melrin vini iel ngatan. Sete erpe mana nen nga tata se kerr marurroi tuwi, ko mian ko marmij bbong. Mer nga murroi niv ngel pimaur tuwi ngok vini." <sup>59</sup> Owra nanu ngel nir renge naim kortien ser daron nga m̄ivisviseni renge Kapaneam e.

*Nale ne mauren ne tuwi ngok vini*

<sup>60</sup> Nir elep renge jinibb sen nir daron nga marunge nale sen ngel e, ko arwera “Nevisvisenien sen ngel eterter temijpal, isi ko orongwos pumurrarronge?”

<sup>61</sup> Iesu ni lweni orongwose nga jinibb sen nir arunge esij renge nanu nga muwrai ngok, arwerwera malum bbonge renge nir lululwi bbong. Ko owrai tevir, “Nale welel lebbong olokloksi kami?” <sup>62</sup> Ko pirpese ko vajin poro kami kaplesi Jinibb Mawos pisa tongsa luwi van mare renge lat nga milik e tuwi? <sup>63</sup> Nemün ko evi nga milai mauren, niben sete orongwos puloli nanu pisan. Nale nga mowrair tevi kami arivi nemün ko armaur. <sup>64</sup> Niko renge iok, kami sopor sete arosuri.” Suri Iesu orongwos wowomue pa siko nir nga sete marosuri, ko siko nga pia-te kai kerasi ni.

<sup>65</sup> Ko Iesu owrai kele: “Renge murrun ngok ko muloli nga inu mowrai tevi kami, Sete jinibb san orongwose pivini jik, poro nga bbong Tata suk ko pimarong.” <sup>66</sup> Ngok suri iok ngok ko, ololi jinibb sen elep arlulwi, setemun arpitevi ni. <sup>67</sup> Ko Iesu owrai tevi jinibb sen nir esngavöl drromon eru, “Erpese, kami kele kapluwi kapiel?”

<sup>68</sup> Ko Saemon Pita owra lweni tevi, “Numal, naban ji si kele e ko mun? Nik ko pa kutori nale ne mauren nga muto tuwi ngok vini!” <sup>69</sup> Kem namosuri ko namrongwose nga nik kuvi Jinibb On se Atua.”

<sup>70</sup> Iesu owrai lweni tevir, “Sete inu nubobbobbue kami nga esngavöl drromon eru ngok? Ko san renge kami evi demij!”

<sup>71</sup> Owra suri Jutas, natu Saemon Iskariot, san renge nir esngavöl drromon eru nga pia-te kai kerasi ni.

## 7

### *Iesu tasin nir sete arosuri ni*

<sup>1</sup> Vitunen renge nanu ngel, Iesu otutur suri renge Galili. Sete emrreni pian pututur renge Jutia, suri mēri Isrel

nga marlelep nir armerreni parevji pini.

<sup>2</sup> Ko nabong ne nanen ne devji se mēri Isrel nir oruj mori.

<sup>3</sup> Ko Iesu tasin nir arwerai tevi ni, arwera “Kupiel lingi iel, kupan Jutia e, puloli nga jinibb som nir kele parlesi majingen som nga komok-lolir.

<sup>4</sup> Poro jinibb san pimrreni putur limjer, sete orongwos pimajing silsilveni te. Poro kuploli nanu ngel nir, kupviseni wor nik lweni ko tevi jinibb jijle nir!” <sup>5</sup> Arij erpok suri nir, nga marivi tasin mawos wor nir, nir kele sete arosuri ni.

<sup>6</sup> Ko Iesu owrai tevir, “Daron suk setewor evini. Kami ma daron jijle evi pa se kami ko nir.” <sup>7</sup> Jinibb nir sete arongwos parungasi kami. Ko inu ma arungasik, suri mowra tweni majingen ser nga marsij. <sup>8</sup> Kami ma kapan renge nanen. Inu sete

numa-van rengen, suri daron suk mawos setewor evini.” <sup>9</sup> Owra nale ngok tevir jile, ko nir arivel. Ko ni elik jer renge Galili.

### *Iesu evan renge nanen ne devji*

<sup>10</sup> Tasin nir aran renge nanen ne devji. Vitunen vajin ko Iesu evivitu surir. Sete evel limjer te, ko evel silsilveni. <sup>11</sup> Meri Isrel nga marlelep nir arpej ni renge nanen, ko arsusi “Nibeni ni?” <sup>12</sup> Ko renge livö renge nir arsur vjivije arsupsupe suri ni elep. Sopor arwera ni evi jinibb nga mürres, ko sopor arwera “Ejki, okkerkerasi bbong jinibb ko nir.” <sup>13</sup> Ko sete san ejilwer suri ni re limjer, suri armetutue mēri Isrel nga marwowomu re nir.

<sup>14</sup> Ko mian vajin mijpari liven sopon ne nabong nir ne nanen nen, ko Iesu evini limjer vajin, ko evan renge Naim On se Atua ko evisviseni jinibb nir rengen. <sup>15</sup> Meri Isrel nga marlelep nen nir artaole, ko arwera “Merel sete bbong arvisviseni sopon, ko orongwose nanu ngel nir erpese?”

<sup>16</sup> Iesu owra lweni tevir, “Nevisvisenien suk sete evi nga inu, ko evi se ni nga mukoni

inu. <sup>17</sup> Poro jinibb san pimarong puloli marongen se Atua, mēnren pia-rongwose nevisvisenien ngel nga inu nomok-visviseni evel ji Atua vini, rreknga evi inu bbong nevisvisenien suk. <sup>18</sup> Mer nga muspe suri lweni bbong ni lweni, epej sel nga bbong pusrusrövi lweni bbong ni ko ren. Ko ni nga ma muwra pusrövi kis ni nga mukoni, mēnren ko ewretun, ko sete nanu nga nūsij san oto ren. <sup>19</sup> Moses elai pa nale neseseiren tevi kami. Ko kami san sete otori rragrage. Ko suri sev kamwera kaprevji pinik?” <sup>20</sup> Delung arwera lweni tevi, “Demij oto rem! Isi owra pirezvi pinim?”

<sup>21</sup> Ko Iesu owrai tevir “Nuloli majingen nga milep san, ko kami kamtaole. <sup>22</sup> Moses ela bae tevi kami (erpe sete Moses, ko apu se kami nir, metka ser nga wowomu nen nir.) Ko kami kamok-loli bipiwar-reng se kami nir arok-an renge bae, ko kamrongwos kaprevjir kele renge nabong on. <sup>23</sup> Kamok-loli arok-an renge bae renge nabong on erpok, nga nale neseseiren se Moses sete pimaot otvi. Ko erpese kami kamlolarsi inu nga mololi jinibb niben totoklai mürres renge nabong on? <sup>24</sup> Sete kaptor ngavilvil nga kapwer lokloksi nanu, ko kaprorrmi lilane mun, musuw ko kapa-wera suri vajin lat nga pia-to surie.”

<sup>25</sup> Ni evi Mesaea  
Nir sopon renge delung ne mēri Jerusalem nir arwera “Kules, mēr nga, nga marwera parevji pini nga le ngel!” <sup>26</sup> Kules,

ni le ngel: mutur limjer m̄irij ngel, ko sete san erij tere! Rreknga jinibb nga marlelep se kerr nir arongwose nga ni ewretun evi Mesaea. <sup>27</sup> Ko nanu ma san: m̄erel kerr rramrongwose lat nga mivel e vini. Ko daron nga Mesaea pia-vini e, sete san purongwose lat nga pia-pelari e.”

<sup>28</sup> Ko suri nga marok-werai mirpok, daron nga Iesu mivisviseni e renge Naim On se Atua, ko ekail van mare, owra “Ia, ko kami kamrongwose inu, ko kamrongwose ngabe nga mevel e vini? Ko inu sete nuvini suri bbong inu norrorrmien suk. Ni okoni inu, ni evi weretunen. Ko kami sete kamrongwose ni. <sup>29</sup> Inu ma nurongwose ni, suri nuvel ji ni le mevini. Ni ko okoni inu.” <sup>30</sup> Ngok ololi arwera parevei ni. Ko sete nir san orrul ren, suri mete nial sen setewor evini. <sup>31</sup> Ko delung elep arosuri ni. Ko arwera “Poru nga Mesaea ni ko malum setewor evini, ko ni pia-loli kele wor majingen nga para-lelep wor nir, piasie nga m̄erel mulolir ngel nir? Ejki, ni le pa!”

#### *Arkoni jinibb sopor parevei Iesu*

<sup>32</sup> Parasi nir arunge delung nir marok-sur vijvij malum marok-supe suri nanu nga Iesu mulolir ngok nir. Ko ngok nir ko batu jinibb ne sulsulen nir arkoni jinibb ne no nuval sopor paran parevei Iesu. <sup>33</sup> Ko Iesu owrai tevir, “Bepatevi kami ma beblen sete pipriv, ko bevel lingi kami, bean ji ni nga mukoni inu. <sup>34</sup> Kami kappej inu ko sete kapa-lesik, suri lat nga bean e, kami sete kamrongwose kapini ren.” <sup>35</sup> Ko m̄eri Isrel nen nir arwerwera lulwenir e, arwera “Owra pian ngabe nen e le, nga kerr sete rraplesi ngel? Pian lat san nga m̄eri Isrel nga marivel lingi kerr marlik e, ko pivisviseni m̄eri Gris nir?” <sup>36</sup> Owra erpese le muwrai mirpel ngel, ‘Kappej inu, ko sete kama-lesik, ko lat nga belik ren, sete kamrongwos kapini ren?’ Owra sev ko?”

#### *Mete nuwi wowosi ne mauren nga tuwi ngok vini*

<sup>37</sup> Renge nabong nga muto ore jere renge nanen ne devji se m̄eri Isrel nir, ngok evi nabong nga milep ko nga m̄irres nen jer, Iesu otur imare ko ekail, owra “Poru jinibb san nolon emesmes, pivini jik pimni nuwi! <sup>38</sup> Mer nga muosuri inu, m̄ernen ‘mete nuwi seser ne mauren nga tuwi ngok vini puwowosi peleplarie renge nolon’, erpe Naul On muwrai.” <sup>39</sup> Ngok Iesu ospe suri Nem̄in nga nir nga para-osuri paralai. Ko Nem̄in On nen setewor evini, suri Iesu setewor emra renge mijen, ko setewor evan renge nosrövien.

#### *Jinibb nir nolor eru e suri Iesu*

<sup>40</sup> Delung elep daron nga marunge nale sen ngel e, ko arwera “Weretunen, m̄erel evi propet nen.” <sup>41</sup> Ko nir sopon arwera “Merel evi Mesaea.” Ko nir sopor arwera “Mesaea piplari ko Galili? Ejki rres! <sup>42</sup> Renge Naul On owra Mesaea piplari renge metka se Numal Devet, ko pia-ak renge Betliem, lat nga Numal Devet.” <sup>43</sup> Ngok suri marij latlat mirpok ngok ko, ololi meling jinibb ngok nir nolor eru e. <sup>44</sup> Nir sopor armerreni parevei ni, ko sete san orrul totoni ni, ejki.

#### *Merwomu ne m̄eri Isrel nir*

<sup>45</sup> Jinibb ne no nuval nen nir arlulwi vini ji batu jinibb ne sulsulen nir ko Parasi nir. Ko nir arsusi tevir, arwera “Suri sev sete kamrevei ni vini?” <sup>46</sup> Jinibb ne no nuval nen nir arwera lweni tevir, “Sete nabong san jinibb san erij erpe m̄erel m̄irij.” <sup>47</sup> Parasi arwera lweni tevir, “Kami kele, ololi kami kamlengleng kele? <sup>48</sup> Ko erpese renge jinibb womu ne jinibb nir ko kem Parasi nir, sete san osuri ni! <sup>49</sup> Ko delung ngok nir nga marosuri ngok, sete arongwose nale nesesreien se Moses, ko lolaren se Atua oto rer.” <sup>50</sup> Ko Nikotemas, nir san nga mivini ji Iesu bonevis, owrai tevir, owra <sup>51</sup> “Renge devjen ne nale nesesreien se kerr, sete orongwose rrapసుpe suri lat nga puto suri renge jinibb san puwowomu, vitunen vajin ko rrapa-runge nale sen ko rrapa-meteni suri nanu nga mulolir.” <sup>52</sup> Ko nir arwera lweni tevi, arwera “Ko rrek nik kele kuvi m̄eri Galili rrek? Poru kuppej renge Naul On ko kuplesi ko, sete propet san orongwose piak renge Galili!”

## 8

#### *Nesevin nga muloli batun*

<sup>1</sup> Ko nir petpeti arlulwi vini renge naim ser e, ko Iesu otonga van renge Botwen ne lolnai ne olip e. <sup>2</sup> Ko mevinen renge rorpong susu, ko olwi kele van renge Naim On e. Ko delung elep arini kele jin, ko ni esak ko evisvisenir.

<sup>3</sup> Ko jinibb nevisvisenien ne nale nesesreien nir ko Parasi nir arpevei nesevin san vini, nga muloli batun. Ko arlingi otur renge livö renge nir. <sup>4</sup> Ko arwerai tevi, “Jinibb nevisvisenien, nesevin le san ngel ololi nanu nga m̄isij kele tevi norman m̄inij san nga sete mivi ni diwen sen. Lelingenok ko namrevei ko ren. <sup>5</sup> Ko renge nale nesesreien nga Moses m̄ilai tevi kerr, evi nga vinel pimij le, partuwe pini. Ko nik kuwra erpese?” <sup>6</sup> Arwerai erpel ngel nga bbong parrowrowe ni ko renge, puloli nga nir parla norrorrmien renge, ko parwer lokloksi ni ren. Ko Iesu ejjol vitan ko olul e bbös nevren renge dan, ololi erpe sete murnge nanu nga marwerai. <sup>7</sup> Ko

nir arpelak arsusi rongorng malume tevi; mian ko ni otur rramos ko owrai tevir, "Isi renga kami ngok poro nga sete ololi nanu nga misij nabong san, ni ko pila womue nevot ko putwe wowomue nesevin ngok."

<sup>8</sup> Ko ejjol luwi keke van ngatan, ko olul keke renga dan. <sup>9</sup> Daron nga marunge, ko nir sisamis arrorrormi lululweni rer. Mian ko armetaw sisamis arivel, mitipatun renga birtera ko evini ejpari nga vitu jer nen. Ko Iesu esan esapo jer vajin, ko nesevin otur malum renga liven nga mutur ren. <sup>10</sup> Ko ni otur rramos keke, ko setemun elesi san, nesevin bbong esan. Ko owrai tevi, "Vinel, nibeni lartul nga marpitevim nga nir? Sete jinibb san piwer lokloksi nik?"

<sup>11</sup> Ko vinnen owra "Numal, san ejki." Ko Iesu owrai tevi, "Inu keke sete numa-wer lokloksi nik. Kupiel, ko sete kupololi lweni keke mun nololien."

*Iesu evi moron ne iel ngatan*

<sup>12</sup> Iesu owrai keke tevir, "Inu nuvi moron ne iel ngatan. Mer nga pivijuri inu, ni pila moron ne mauren. Sete orongwos pivel renga nemalik."

<sup>13</sup> Ko Parasi nir arwerai tevi, "Nik komok-rij se nik lweni kobbong, ko niko nale som sete evi weretunen." <sup>14</sup> Iesu owra lweni tevir, "Erpok, poro nurij se inu lweni kobbong, ko nale suk evi weretunen, suri nurongwose lat nga mevel e vini ko lat nga bean e. Kami ma sete kamrongwose lat nga mevel e vini ko lat nga bean e. <sup>15</sup> Kami kamok-supsupe nanu erpe nga jinibb nir marok-supsupe. Ko inu ma sete nuspe suri lat nga puto suri re jinibb san. <sup>16</sup> Ko poro inu bospe suri lat nga puto suri re jinibb san, ko nospen suk evi weretunen, suri sete inu kis nusan, ko inu komru wor Tata suk ko nga mukoni inu, komru korti. <sup>17</sup> Aruli keke renga nale neseseiren se kerr nga nale se jinibb eru evi weretunen. <sup>18</sup> Inu nuvi san nga merij se inu lweni, ko Tata suk keke nga mukoni inu, ni ko erij se inu keke." <sup>19</sup> Ko nir arsusi lweni tevi ni, "Nibeni Tata som?" Ko ni owra lweni tevir, "Kami sete kamrongwose komru korti te; sete kamrongwose inu, ko sete kamrongwose Tata suk."

<sup>20</sup> Nale ngel nir Iesu owrai renga daron nga mivisviseni jinibb nir renga Naim On, renga lat nga marok-tuwe nevot renga. Ko sete san ervei, suri mete nial sen setewor evini.

*Sete kamrongwose kapini re lat nga bean e*

<sup>21</sup> Iesu owra lweni keke tevir, "Inu bea-ivel, ko kami kapa-pej inu, ko sete kaprongwos kaplesik; ko kapa-mij renga nololien se kami. Ko lat nga bean e, kami

sete kamrongwose kapini renga." <sup>22</sup> Meri Isrel nen nga marlelep nir arwera "Owra sev ko, muwra 'Sete kamrongwose kapini renga lat nga bean ngok e'? Rrek owra putor pini lweni ko, rrek!" <sup>23</sup> Iesu owra lweni tevir, "Kami kamivi ne iel ngatan, ko inu nuvi ne mare. Kami kamivi ne iel ngatan, ko inu sete nuvi ne iel ngatan. <sup>24</sup> Nuwrai tevi kami, kami kapmij renga nololien se kami nir, poro nga kami sete kaposuri nga inu nuvi mernen." <sup>25</sup> Ko nir arwera tevi ni, arwera "Aro, nik kivi isi?" Iesu owra lweni tevir, "Ko erpe nga nomok-werai tetajer tevi kami. <sup>26</sup> Nanu elep nga kamsarr rer nga inu nurongwose bowrair ko bospe surir re kami, ko ejki wor. Ko San nga mukoni inu, ni evi weretunen, ko inu nomok-wera suri bbong nanu nga morng jin nir iel ngatan." <sup>27</sup> Ko nir sete arongwose nga ni ospe suri Tata sen tevir.

<sup>28</sup> Mian ko Iesu owrai tevir, "Daron nga kami kapa-susi Jinibb Mawos pia-an mare, ko ngok kaprongwose nga inu nuvi mernen. Ko niko inu sete nusan nomok-loli nanu san, ejki. Inu nomok-supe bbong nanu nga Tata suk ko mivisvisenie inu. <sup>29</sup> Ko Mer nga mukoni inu eptevi inu, sete elinglingi inu nusan, suri tetajer nomok-loli kobbong nanu nga mirmrenir." <sup>30</sup> Jinibb elep nga marunge Iesu muwrai mirpel ko arosuri ni renga.

*Jinibb nga mivel sisarow ko demij maur*

<sup>31</sup> Iesu owrai tevi meri Isrel nir nga marosuri ni, owra "Poro kaplik tetajer malum ko pa renga nale suk, ko ngok kamivi jinibb suk weretunen ko. <sup>32</sup> Kaprongwose weretunen, ko weretunen pia-loli kami kapiel sisarow." <sup>33</sup> Ko nir arwera lweni tevi ni, "Aro, kem ma namivi metka se Epram kobbong, ko setewor namivi demij maur se jinibb san nabong san. Ko suri sev nik kumwerai ngok, Kem nabiell sisarow?"

<sup>34</sup> Ko Iesu owrai tevir "Nuwretun nga nuwretun nuwrai tevi kami, isi nga mok-loli nololien evi pa demij maur ne majingen se nololien ko. <sup>35</sup> Demij maur sete orongwose pilik tuwi ngok vini renga naim, ko natu mer nga naim sen ko ma pilik tuwi ngok vini. <sup>36</sup> Ko poro inu Atua Natun bololi kami kapiel sisarow, ngok kapa-ivel sisarow petpeti ko vajin. <sup>37</sup> Nurongwose kami kamivi metka se Epram. Ko kamwera kaprevji pinik, suri nale suk milngen ejki renga nolo kami. <sup>38</sup> Inu nomok-supe suri nanu nga mlesir ji Tata suk, ko kami ma kamok-loli sev nga kamlesir ji tata se kami."

<sup>39</sup> Ko nir arwerai tevi ni, "Po! Ko niko, Epram evi tata se kem!" Ko ni owrai

tevir, "Poro kapweretun nga kamivi metka se Epram, ko ngok kaploli majingen nga marres nga Epram mok-lolir ko. <sup>40</sup> Inu nga mowra weretunen tevi kami nga mornge ji Atua, ko lelingen ngel kamwera kaprevji pinik suri. Ko Epram sete ololi erpok. <sup>41</sup> Kamok-loli nanu mawos nga tata se kami mok-lolir." Ko nir arwerai tevi, "Aro, kem ma sete namivi bipi ne sel te ejki! Atua ko evi tata se kem, kem namivi natun weretunen!"

<sup>42</sup> Ko Iesu owrai tevir, "Poro nga Atua pivi Tata se kami weretunen, ko kapmerreni inu ko, suri nuplari ji Atua ko nga mevini ngel. Inu sete nuvini suri inu bbong norrrmien suk, ko ni ko wor okoni inu. <sup>43</sup> Suri sev sete kamrongwose nanu nga mowrair? Erpok ko wor, suri sete kami kamrongwos rragrrage nale suk. <sup>44</sup> Kami kamivi se tata se kami, Demij! Ko murrin nir nga marivi se tata se kami ko kamok-lolir. Ni erevji pini wowomu jinibb, ko eplak etajer tevi malume. Ko sete elik renga weretunen, suri weretunen ejki renga ni. Daron nga mīkrekris, ngok evijuri wor murrin nga ni ko, suri ni evi botgerisen, ko evi tata se botgerisen nir. <sup>45</sup> Suri nuwra weretunen tevi kami, ko niko kami sete kamosuri inu. <sup>46</sup> Isi renga kami orongwos ma puwra tweni nga inu nuloli nololien san? Ejki! Inu ma nomok-wera weretunen tetajer, suri sev sete kamosuri inu? <sup>47</sup> Mer nga mivi se Atua ornge nale se Atua. Ko niko kami sete kamrunge nale se Atua, evi suri kami sete kamivi se Atua."

#### *Iesu ko Epram*

<sup>48</sup> Meri Isrel nir arwera lweni tevi, arwera "Namweretun, namwera nik kuvi mēri Sameria, ko demij esisilvi nik!" <sup>49</sup> Ko Iesu owra lweni tevir, "Inu sete demij esisilvik te. Inu nuosuri Tata suk, ko kami sete kamosuri inu. <sup>50</sup> Inu sete nupej nosrōvien se inu lweni, ejki. Ko San ko ma niko ni ko p̄ia-lai nosrōvien tevi inu, ko pia-wer suri lat nga puto suri renga kami. <sup>51</sup> Nuwretun nga nuwretun nuwrai tevi kami, poro jinibb pisan putori totoni nale suk, sete mia-lesi mijen nabong san."

<sup>52</sup> Meri Isrel nen nir arwera lweni tevi ni, "A! Re iok vajin, nama-rongwose erres nga nik demij esisilvim. Epram emij pa, ko propet nir armij pa, ko nik kuwra poro san putori totoni nale som, ko mēnren sete mia-lesi mijen! <sup>53</sup> Erpee? Nik kulep lingi wor tata se kem Epram nga mimij pa, ko propet nga marmij pa nir? Ko kuwra kupwera nik kuvi isi kele?"

<sup>54</sup> Ko Iesu owra lweni tevir, "Poro inu bosrosrōvi lweni inu, ko evi nanu nawon. Ko ejki, Tata suk ko osrosrōvi inu. Ni ko

kamok-wera evi Atua se kami. <sup>55</sup> Ko kami sete kamrongwose ni, inu ma nurongwose. Poro nga bowra sete nurongwose ni, ko bevi jinibb ne gerisen pirpe kami. Ko ejki, nurongwose ni, ko nutori totoni nale sen. <sup>56</sup> Tata se kami Epram eir renga nga mīlesi nabong suk, ko renga daron nga mīlesi e, eir lengleng."

<sup>57</sup> Meri Isrel nen nir arwera lweni tevi ni, "Nik ngok setewor siam evi ngavōl elim (50) wor, ko kulesi Epram erpese?" <sup>58</sup> Iesu owra lweni tevir, "Nuwretun nga nuwretun nuwrai tevi kami, inu ngel nulik womu ko pa osuw, mian ko Epram mia-ia-k." <sup>59</sup> Ko nir arevei nevōt arwera partuawe e. Ko Iesu otur tevi jinibb nir, ko evel rrurrngi liven rer, ko esil ivare renga Naim On, evini vare e evel.

## 9

### *Iesu ololi mēer nga meten murrorr oklu luwi*

<sup>1</sup> Iesu otutur sapon ko elesi jinibb san nga mīiak ko meten murrorr ko pa. <sup>2</sup> Ko jinibb sen nir arsusi tevi ni, arwera "Jinibb nevisisenien, isi ko ololi nololien, ololi mīiak ko meten murrorr? ni, rreknga tata sen rreknga tasu sen?"

<sup>3</sup> Iesu owra lweni tevir, "Ngok sete evi nololien se ni, rreknga tata sen ko tasu sen, ejki. Ngok evi nga puloli majingen se Atua piplari ko rengen. <sup>4</sup> Nata mīrin evi daron nga rraploli ko wor majingen se ni nga mukonik rengen. Daron nga nata pupong pivini, setemun san orongwos mun puloli majingen san rengen. <sup>5</sup> Erpe lelingen ngel, inu nulik iel ngatan, ko nuvi moron ne iel ngatan."

<sup>6</sup> Daron nga muwrai mirpok, ko oltuv van renga dan, ko ekiskisi nolton tevi dan, ko elai nolton nga mikiskisi tevi dan ngok ko ebbōlji renga mete metrrorr. <sup>7</sup> Ko owrai tevi, "Kupan kupwirap renga nuwito ne Saeloam (nga marieni mirpel, Okoni). Ko mēnren osri sel evan ewirap vaseni meten, ko oklu luwi erres; ko olwi van sisen e."

<sup>8</sup> Ko lweni nir ko jinibb nga marok-lesi pa ni nga meten murrorr arwera "Sete mēer nga mok-lik ngun-ngun nga le ngel?" <sup>9</sup> Nir sopor arwera "Ewretun, mēer nga le ngel". Ko nir sopor nen arwera, "Ejki, ko morok erpe pini pa ni ko." Ko ni owrai tevir, "Pe, inu nen le pa ngel!" <sup>10</sup> Ko nir arsusi tevi ni, "Ta, ko metem oklu luwi erpese ko?"

<sup>11</sup> Ko ni owrai tevir, "Jinibb san nga marveruse nisen Iesu ekiskisi dan, ko elai dan ngok, ebbōlji renga metek nuru ko owrai tevik, 'Kupan renga nuwito ne Silam ko kupwirap.' Ko mean mewirap ko nuklu luwi." <sup>12</sup> Ko nir arsusi tevi ni, "Ko nibeni



mñernen?" Ko ni owra lweni tevir, "Iawo, sete nurongwose."

*Parasi nir armeteni suri renga nanu nga Iesu muloli nen*

<sup>13</sup> Arpitevi mñer nga bonevis meten murrorr nen van ji Parasi nir. <sup>14</sup> Renge nabong nga Iesu mikiskisi dan ngok ko muloli metrorr meten mñirres luwi ngok e, evi nabong on. <sup>15</sup> Ko Parasi nir arsusi tevi ni, arwera "Ko kuklu luwi erpese?" Ko ni owrai tevir, "Ela dan, ebbölji renga metek nuru, ko nuwirap, ko nuklu luwi erres."

<sup>16</sup> Ko nir sopor renga Parasi arwera "Mernen sete evi jinibb se Atua ko, suri sete orori nabong on." Ko nir sopor nen kele arwera "Ko jinibb ne nololien san sete orongwos puloli nelesien nga mirpel san!" Ngok ololi nir nolur eru e. <sup>17</sup> Ko Parasi nir arsusi kele tevi metrorr, arwera "Erpe nik, kumwera ololi metem nuru orres. Ko nik kurrormi mñernen evi isi ko?"

Ko metrorr owrai tevir, "Evi propet ko san."

<sup>18</sup> Parasi nen nir sete arosuri nga mñerel evi metrorr, ko oklu luwi kele. Artiriv wore parverus tata sen ko tasu sen porini. <sup>19</sup> Ko arsusi tevi nuru, "Merel evi natu kamru nga mñiak ko meten murrorr? Ko oklu luwi erpese le?"

<sup>20</sup> Mernen tata sen nuru tasu sen orwera "Ewretun nga ni evi natu komru, ko ewretun nga mñiak ko meten orrorr ko pa. <sup>21</sup> Ko erpese nga muklu luwi, komru sete nomor-rongwose te ejki. Ko sete nomor-rongwos kele mñer nga muloli meten morkulu luwi. Kapsusi tevi ni, puwrai ko tevi kami. Etra ko pa, evter puwra suri nanu nga miplari jin." <sup>22</sup> Tata sen nuru tasu sen orwera erpok suri ormetute mñeri Isrel nga marlelep nen nir. Suri arwera jile pa nga poro jinibb pisan puwra nga Iesu evi Mesaea, ko ngok puloli nir parla tweni mñernen renga naim gortien ser, pijkie rengen. <sup>23</sup> Niko muloli nga tata sen ko tasu sen morwera "ni etra ko pa, sian evter kapsusi ni e."

<sup>24</sup> Ko arverus lweni kele mñer nga meten murrorr nga vini jir, ko arwera tevi, "Nik kupsurövi Atua ko wor suri. Kem ma namrongwose mñerel evi jinibb ne nololien." <sup>25</sup> Ko ni owra lweni tevir, "Sete nurongwose te, mñernen pivi jinibb ne nololien, rreknga ejki. Nanu sansan kobbong nurongwose, nga metek murrorr ko lelingen ngel nuklu luwi." <sup>26</sup> Nir arsusi tevi ni, "Ololi erpese nik, ololi erpee ko ko metem morkulu?" <sup>27</sup> Ko ni owrai tevir, "E, nuwrai jile pa tevi kami, ko kami sete kammurrarronge. Erpee? Kami kammerreni kaprunge kele? Kami kele kammerreni kapivi jinibb sen, rrek?"

<sup>28</sup> Ko nir arsowri ni, ko arwera tevi ni, "Nik kuvi jinibb sen, kem namivi jinibb se Moses! <sup>29</sup> Kem namrongwose Atua erij tevi Moses. Ko morok, sete namrongwose evel ngabe ko vini!"

<sup>30</sup> Ko mñer nga owrai lweni tevir, "O, nanu nga rramtaole le, kami sete kamrongwose lat nga mivel e vini! Ko ni ololi metek orkulu luwi! <sup>31</sup> Kerr rramrongwose, Atua sete orongwose pumurraronge mñer nga muloli nololien, orongwos bbong mñer nga mutori ni ko, ko mñer nga muloli nanu nga ni mimmrenir, ni ko ma pumurraronge. <sup>32</sup> Mitipatun renga daron nga Atua muloli iel ngatan e mijpari lelingen ngel, setewor arunge jinibb san ololi mñer nga mñiak ko meten murrorr oklu luwi, ejki rres nawon. <sup>33</sup> Poro mñerel sete pivi se Atua, ko sete orongwose rragrrage puloli nanu pisan!" <sup>34</sup> Nir arwera lweni tevi, "Aro, nik kuak renga nololien, ko kuloli nololien tetajer malum, ko kuwra kupvisviseni kem?" Ko arwirr tweni ni renga naim gortien ser.

*Metrorr renga norrorrmien*

<sup>35</sup> Iesu ornge nga marwirr tweni mñernen renga naim gortien ser pa. Mian ko eskai ko owrai tevi, "Nik kuosuri jinibb Mawos?" <sup>36</sup> Ko ni owrai lweni tevi, "Numal, isi ko, nga poro inu bosuri renga ni?"

<sup>37</sup> Ko Iesu owra lweni tevi, owra "Nik kulesi jile pa mñernen, mñernen evi mñer nga mñirij tevim lelingen ngel." <sup>38</sup> Ko mñer nga owra "Numal, nuosuri!" Ko ejipa vitan ko olotoe.

<sup>39</sup> Iesu owra "Inu nuvini iel ngatan tweni nga bowra suri lat nga puto suri renga jinibb nga meten sete mukluklu, puklu luwi vajin, ko jinibb nga markulkulu parivi vajin metrorr nir."

<sup>40</sup> Ko Parasi sopor artur tevi ie arunge nga ni muwra nale ngok nir mirpok, ko arwera tevi, "Aro, kem kele namirpok, mete kem orrorr?" <sup>41</sup> Iesu owrai tevir, "Poro piwretun mete kami purrorr, ko nololien se kami sete putoe. Ko suri kami kamwera kamkulkulu, ngok nololien se kami otocoe."

## 10

*Nale rrongrrongvien ne mñer nga mimetmete sipsip*

<sup>1</sup> Iesu owra "Nuwretun nga nuwretun nuwrai tevi kami, mñer nga sete mñikali renga metali ne sipsip e ko mñisa tela naworr, mñernen evi jinibb venao ko. <sup>2</sup> Ko mñer nga mñikali renga metali e, ni evi mñer nga mok-metmete sipsip nir. <sup>3</sup> Ko mñer nga mok-metmete metali ne sipsip etasi tevi, ko sipsip arongwose ni drrelan; ko ni orongwose piverus sisamis niser, ko owomue nir parivare. <sup>4</sup> Daron nga miptevi twenir

ivare, owowomue nir; ko sipsip arvijuri ni, suri arongwose drrelan. <sup>5</sup> Sete arongwose parvijuri jinibb minij; parwolue ko, suri sete arongwose drrelan.” <sup>6</sup> Iesu owra nale rrongrongvien ngel tevi nir, ko sete arongwose isev ko muwrai tevir.

*Iesu evi jinibb metmeten nga m̄irres ꞑelak*

<sup>7</sup> Iesu owrai kele tevir owra “Nuwretun nga nuwretun nuwrai tevi kami, inu ngel nuvi metali ne sipsip. <sup>8</sup> Jinibb nga marwomue inu arivi jinibb venao kobbong nir. Ko sipsip sete arunge drrelar. <sup>9</sup> Inu nuvi metali. Mer nga m̄ikali ji inu e, ni piyasi van re mauren; ko pia-lik ꞑirres, ꞑirpe sipsip san nga sete nanu rrum san pulokloksi, ko nanen sen owun saut temijpal. <sup>10</sup> Jinibb venao evini bbong nga pivevna ko, ko ꞑirevji pini, ko pulokloksi ꞑetꞑeti. Inu ma nuvini nga belai mauren tevir nga parla ꞑetꞑeti vajin.

<sup>11</sup> “Inu nuvi jinibb metmeten nga m̄irres. Jinibb metmeten nga m̄irres ela mauren sen tevi jinibb nir, m̄ir surir. <sup>12</sup> Mer nga marlingi bbong pimemetete sipsip nga parwuli rengen, daron nga m̄ilesi guli rrum mivini, ko elngi kurtweni sipsip nir ko owlu lingir. Ko guli rrum ean aji terteri sopor, ko ojir arwolu sarrsarr. <sup>13</sup> Mer nga mok-metmete sipsip nga marwuli bbong ren, ko muwlu lingir ngok; suri ni mivi bbong m̄er nga marwuli bbong ren, ko niko sete muwor surir. <sup>14</sup> Inu nuvi jinibb metmeten nga m̄irres renge sipsip nir. Ko nurongwose sipsip suk nir, ko nir arongwose inu. <sup>15</sup> Erpe Tata orongwose inu, ko inu kele nurongwose Tata. Ko numarong nga bemij suri sipsip suk nir.

<sup>16</sup> “Sipsip minij kele wor sopor nga marivi suk, nga sete marivi ne laut ngel, belair vini rengen kele. Nir parunge drrelak; parivi meling pisansan, ko jinibb metmeten ser pisansan. <sup>17</sup> Tata suk emrrenik suri numarong belngilngi mauren suk, bemij sere jinibb nir. Ko mian ko beala lweni kele, bemaure luwi. <sup>18</sup> Sete jinibb san orongwos ꞑila tweni mauren suk jik, putor pinik. Inu kobbong numarong bemij. Derteren suk otoa nga belngilngi mauren

suk bemij, ko derteren suk otoa nga belai lweni kele mauren suk, bemaure luwi. Niko Tata suk owrai tevik nga bololi ꞑirpok.”

<sup>19</sup> Renge muwrai mirpok ngok, m̄eri Isrel nga marlelep nir norrrormien ser eru e kele rengen. <sup>20</sup> Nir elap arwera “Demij esisilvi ko epapa nawone! Erpese kami kammurrarronge?” <sup>21</sup> Ko nir minij nen nir arwera “Sete m̄er nga demij m̄isisilvi ok-rij erpok, ejki. Demij orongwose puloli metrorr san pulku luwi kele?”

*Meri Isrel nga marlelep nir arungasi Iesu*

<sup>22</sup> Evi daron ne nanen san se m̄eri Isrel nir, nga marok-rrormi lweni Naim On se Atua nga marloli muon luwi bonevis. Nanen ngel artori renge Jerusalem. Ko renge daron nen evi daron ne melas. <sup>23</sup> Iesu otutur sopon renge naim san nga mutur re jeli Naim On, nga marveruse Naim Salsal se Solomon. <sup>24</sup> Ko m̄eri Isrel nga marlelep nir arini jin, artur rrale ko arwerai tevi, “ꞑijpari seveling nga nik kopok-loli kem nabok-tiriv ꞑirpel? Namtirivtiriv ko ejki rres nawon. Poro nga nik kuvi Mesaea, kupwerai momsawose tevi kem vajin!”

<sup>25</sup> Ko Iesu owra lweni tevir, “Nuwrai pa tevi kami, ko sete kamosuri te. Ko majingen nga mololir renge nise Tata suk arij se inu. <sup>26</sup> Ko kami sete kamosuri, suri nga sete kamivi sipsip suk, erpe nga mowrai pa tevi kami. <sup>27</sup> Sipsip suk nir arunge drrelak; ko inu nurongwose nir, ko nir arvijurik. <sup>28</sup> Inu nula mauren nga muto tuwi ngok vini tevir, nga nir setemun parmij kele nabong pisan. Ko sete san orongwose ꞑiteseni twenir renge inu nevrek. <sup>29</sup> Tata suk nga m̄ilair tevik, ni eterter asie jinibb ꞑetꞑeti nir, ko sete san orongwos ꞑiteseni twenir renge ni nevren. <sup>30</sup> Ko Tata suk ko inu nomorivi sansan kobbong.”

<sup>31</sup> Meri Isrel nen nir arla kele nevõt arwera partuwe pini ni kele. <sup>32</sup> Ko Iesu owrai tevir, “Nuloli majingen elap nga marres tevi kami nga Tata suk m̄ilair tevik nga bololir. Ko renge majingen ngabe nen ko nga kami kamwera kaptuwek rengen?” <sup>33</sup> Ko m̄eri Isrel nir arwera lweni tevi, “Renge majingen nga m̄irres sete namrongwos nabtuwem suri, ko suri kuwer lokloksi Atua ko. Suri nik kuvi bbong jinibb, ko kumtur imare ko kumloli lweni nik lweni kumsorsan tevi Atua!”

<sup>34</sup> Ko Iesu owra lweni tevir, “Sete aruli renge Naul On owra ‘Kami kamirpe Atua?’ <sup>35</sup> Kerr rramrongwos nanu nga

Naul On muli surir, ewretun tetajer ko pa tuwi ngok vini. Ngok niko nir ngel nga Atua m̄ila nale sen van jir, Atua everuse nir ‘Atua’. <sup>36</sup> Ko inu ma nulep asi nir ngok ko. Ko Tata osusture inu, ko okonik vini iel ngatan. Ko erpese kami kamwera inu nuwer lokloksi Atua suri nga mowra inu nuvi Atua Natun? <sup>37</sup> Poro sete nomok-loli majingen se Tata suk nir, ko erres kobbong, sete kaposuri inu. <sup>38</sup> Ko poro bololir wor, ko pesveni poro sete kaposuri inu suri nale suk, ko kaposuri ma inu suri majingen suk nir, nga puloli kami kaprongwose. Ko kaplesi wose nga Tata suk elik renge inu, ko inu nulik renge Tata suk.”

<sup>39</sup> Vesan kele arloli lesi kele nga parrul totoni; ko evel easi reнге nevrer, evel lingir. <sup>40</sup> Evel luwi kele van reнге devje nuwi seser ne Jortan e, reнге lat nga Jon Baptaes mipaptaes womue ni reнге, ko elik ie. <sup>41</sup> Jinibb elep arini jin, ko arwera “Ewretun, Jon Baptaes sete ololi nelesien te ejki, ko nanu jile nga ma Jon Baptaes muspe surir reнге merel arweretun.” <sup>42</sup> Ko jinibb elep lengleng arosuri ni reнге ie.

## 11

### *Mijen se Lasros*

<sup>1</sup> Meri Betani san, nisen Lasros, emsi. Betani evi ngaim se Merri ko tuwan Marta. <sup>2</sup> Merri ngel evi vin nga vitunen ko mia-jivi senta nga mapun mirres reнге bela Iesu ko mia-tewasi jomro batun e. Vinel ko tuwan Lasros mimsi nen. <sup>3</sup> Ngok nesen niaken ngel ko nuru orla nale reнге van ji Iesu, “Numal, selem nga kumrreni milep emsi.”

<sup>4</sup> Daron nga Iesu murnge e ko owra “Mesien se Lasros ngok sete evi ne mijen, ko evi ma nosrovien se Atua, nga puloli parsurövi inu Atua natun mawos reнге.”

<sup>5</sup> Iesu emrreni lenglengle Marta ko tasin Merri ko Lasros. <sup>6</sup> Ko daron nga murnge nga Lasros mimsi, ko elik malum lat nen nga milik nen e nabong eru kele wor orasi. <sup>7</sup> Vitunen reнге ngel ko owrai tevi jinibb sen nir “Kerr pulwi kele van reнге Jutia e.”

<sup>8</sup> Ko jinibb sen arwerai tevi, “Ai, jinibb nevisvisenien, seveling nga kobbong meri Isrel nir nga marlik Jutia arwera partuwem, ko erpese kuwra kupan kele ie ko?”

<sup>9</sup> Iesu owra “Erpese, sete mete nial esngavöl drromon eru reнге nabong san? Ko poro jinibb pisan pivel reнге nata mirin, sete orongwos pijilaklak, suri elesi moron ne iel ngatan. <sup>10</sup> Ko poro pivel reнге nemalik, ko ngok pijilaklak ko, suri moron ejki ji ni.” <sup>11</sup> Iesu owra nanu ngel nir, mian ko vitunen owra “Sele kerr Lasros ematur, ko inu bean bowni

tweni pimra reнге meturen sen.” <sup>12</sup> Ngok jinibb sen nir arwerai tevi, “Numal, poro pimatur ko pirres luwi kobbong.” <sup>13</sup> Nga mirrij mirpok, ko Iesu ospe mijen se Lasros; ko nir arrormi rreknga owra emitmatur rres kobbong, omosi. <sup>14</sup> Ko Iesu owra momsawos vajine limjer tevir, “Lasros emij pa. <sup>15</sup> Ko inu nuir nga sete melik tevi ni ie, suri kaplesi vajin nanu nga pirres san reнге kami, nga puloli kami kaposuri. Kerr pian lat nga marlingi e.” <sup>16</sup> Ko Tomas nga marveruse mlelew owrai tevi jinibb se Iesu nga ngok nen e nir, “Pesveni, kerr kele

rrapvijuri ma, rrapan rrapmij rrapvesane ko pa tevi.”

### *Iesu evi batu meraien ko batu mauren*

<sup>17</sup> Daron nga Iesu mian vajin, ko elesi nga artevni Lasros nabong ivij pa arasi osuw. <sup>18</sup> Betani oto mori bbong Jerusalem sapon, erpe pirpe kilometa itul bbong sapon, <sup>19</sup> ko niko meri Isrel elep arini ji Marta ko Merri nga parla nale molmol tevi nuru suri reнге mijen se tuwa nuru.

<sup>20</sup> Daron nga Marta murnge nga marwera nga Iesu mivini, ko evel ore reнге sel. Ko Merri elik jer reнге naim. <sup>21</sup> Marta owrai tevi Iesu, “Numal, poro ma kuplik bbong iel, ko tuwa komru sete mia-mij welili, pijki ko. <sup>22</sup> Ko nurongwos mae lelingen ngel, poro kupngoni isev tama san tevi Atua, ko Atua pilai ko wor tevi nik.” <sup>23</sup> Ko Iesu owrai tevi, “Tuwam pimaur luwi kele kobbong.” <sup>24</sup> Ko Marta owrai tevi, “Nurongwose nga pia-maur luwi kele reнге nabong nga vitunen nga Atua puloli jinibb nir parmaur luwi.”

<sup>25</sup> Ko Iesu owrai tevi nesevin, “Inu nuvi batun ne mauren. Mer nga muosuri inu, poro pimij, ko pia-maur luwi kele ko wor. <sup>26</sup> Ko isi nga mimaur ko muosuri inu, sete orongwos pimij rragrag pijpari tuwi ngok vini. Kuosuri reнге iok?” <sup>27</sup> Nesevin owra lweni tevi, “O-o, Numal, nuosuri nga nik kuvi Mesaea, Atua natun mawos, ni nga propet nga tuwi nir arok-wera pia-vini reнге iel ngatan.”

### *Iesu eting*

<sup>28</sup> Daron nga vinnen muwrai jile mirpel ngel, ko evel evan everus silveni bbong tasin Merri, ko owrai tevi, “Jinibb nevisvisenien le ngel osusi nik.” <sup>29</sup> Daron nga Merri murnge, ko emra ngavilvil evan ji Iesu. <sup>30</sup> Iesu setewor evini reнге ngaim, ejki wor. Elik malum reнге lat nga Marta mian jin ren. <sup>31</sup> Meri Isrel nir nga marla nale molmol tevi Merri reнге naim marlesi nga Merri mimra kasi mivel, ko arvijuri suri. Arrormi rreknga nesevin pian reнге dubb, piting ie.

<sup>32</sup> Merri evini reнге lat nen nga Iesu milik e. Ko elesi ko ejipa van ngatan osusweni non reнге bela Iesu, ko owrai tevi, “Wurru, Numal, poro kuplik iel, ko tuwak sete mia-mij ko te ejki.” <sup>33</sup> Daron nga Iesu milesi nesevin miting, ko meri Isrel nir nga marpatevi nesevin marting, ko engavsi, ornge lenglengle esij reнге nolon, erpe piap nawone.

<sup>34</sup> Ko osusi tevir, “Nibeni lat nga kamtevni e?” Ko arwerai tevi, “Kupini ta numal, kuplesi.” <sup>35</sup> Iesu eting. <sup>36</sup> Meri Isrel arwera “Ai, emrreni lenglengle ma morok.” <sup>37</sup> Ko nir sopor nen arwera “Ai, merel ololi metrrore meter markulu bonevis.

Erpese sete orongwos puloli morok kele sete pimij?"

*Lasros emaur luwi*

<sup>38</sup> Vesan kele Iesu engavsi, ornge lengleng esij. Ko evan renge dubb. Evi bereng, ko aritini nevöt nga milep oto ore metali nen. <sup>39</sup> Iesu owra "Kapitini tweni nevöt." Ko Marta, joji m̄er nga mimij nen, owra lweni tevi "O, ejki, Numal, lelingen ngel opo le pa, suri bongin ivij le pa osuw!"

<sup>40</sup> Ko Iesu owrai tevi nesevin, "Sete nuwrai tevin nga poro kuposuri ko kupalesi nosrövien se Atua?" <sup>41</sup> Ko nir aritini tweni nevöt nen. Ko Iesu eleng raji meten oklu imare, ko owra "Tata, nuwra erres tevi nik nga komok-runge inu. <sup>42</sup> Nurongwose nga nik kurnge inu tetajer, ko nuwra nanu ngel suri lartul nga martur ngel nir, nga puloli parosuri inu nga nik kumkoni inu."

<sup>43</sup> Muwrai jile mirpel, ko everus temijpal van mare, owra "Lasros, kupivare!" <sup>44</sup> Ko m̄ernen nga mimij pa eivare vini. Ko nevren nuru ko belan nuru, kalek ne mijen nga marnuŋe e arto malum rer; ko sunsun nga markai renge non arto malum rengen. Ko Iesu owra "Kaptelasi twenir ren."

*Jinibb nga marlelep renge m̄eri Isrel arloli nale ne nga parevji Iesu*

<sup>45</sup> Meri Isrel elep nga marini marlesi Merri arlesi sev nga Iesu muloli, ko arosuri ni. <sup>46</sup> Ko nir sopen nen nir arluwi ko aran ji Parasi nir ko arsuŋe suri nanu nga Iesu mulolir tevir. <sup>47</sup> Ko Parasi nir ko batu jinibb ne sulsulen nir arkorti tevi gortien nga milep se m̄eri Isrel nir ko arwera "Kerr puloli piprese? Merel ololi nelesien nga marlelep nir. <sup>48</sup> Poro rraplingingi puloli sel ngok, ko jinibb jijle nir tarosuri ni; ko m̄eri Rom nir nga marrul totoni kerr tarlesi tisij ko tartingtinge Naim On se kerr, ko tarlokloksi jinibb se kerr jijle nir."

<sup>49</sup> San renge nir nisen Kaeapas; ni evi batu jinibb ne sulsulen nir renge sia nen. Owra "Kami sete kamrongwos rragrrage nanu san. <sup>50</sup> Sete kamrongwose nga evi nanu nga m̄irres nga jinibb pisansan pimij suri delung, pia-la wani jinibb jijle nir nga moro parmij?" <sup>51</sup> Errlengse sev nga muwrai ngok, ko erij wor nale se Atua, suri evi batu jinibb ne sulsulen ko renge sia nen: ni owra tweni nga Iesu pimij suri m̄eri Isrel nir. <sup>52</sup> Ko sete nir kis kobbong, ko pia-la lweni kele wor jinibb jijle se Atua nga marivel sarrsarr nir.

<sup>53</sup> Renge nabong nen m̄eri Isrel nga martori derteren renge nir arloli nale nga parevji pini Iesu rengen. <sup>54</sup> Ololi Iesu setemun evel limjer renge Jutia, evel lingi ie ko evan renge ngaim nga welili e san

nga nisen Eprem, morie lolo merwer. Ko elik tevi jinibb sen nir ie.

*Otomori daron ne nanen ne asien*

<sup>55</sup> Nanen ne asien se m̄eri Isrel nir oto mori. Ko jinibb elep arivel aran renge Jerusalem, arwera partaur parwokwok jile tera daron ne nanen ne asien. <sup>56</sup> Ko daron nga marini renge Jerusalem, ko arkulkulu pej Iesu ko arwerwera lululwenir e, "Kamrrorrm̄i erpese? Pivini ko renge nanen ne asien, rreknga sete orongwos pivini?" <sup>57</sup> Batu jinibb ne sulsulen nir ko Parasi nir arwerai pa tevi jinibb nir arwera poro san p̄ilesi Iesu lat nga m̄ilik e, ko puwrai tevir parongwose, ko paran parevei.

## 12

*Iesu everus renge Betani*

<sup>1</sup> Nanen ne asien nabong ouwon ojpon malum, ko Iesu olwi kele vini renge Betani e renge lat nga Lasros, nga ni muloli mimaur luwi kele renge mijen, lat nga m̄ilik e. <sup>2</sup> Renge ie artabbu nurre Iesu. Marta etabbu, ko Lasros evi san renge nir nga maraan tevi Iesu. <sup>3</sup> Mian ko Merri ela botel nga milep san ne senta nga mapun m̄irres p̄elak nga nowlin milep temijpal nga marloli e nart, ko ejvi p̄etp̄eti renge bela Iesu nuru, ko etwasi e jomro batun. Ko loloim ouwon saute mapu senta nen. <sup>4</sup> Jutas ne Iskariot, nga mian ko vitunen pia-tekai kerasi Iesu, owra <sup>5</sup> "Erpese kumlokloksi senta nga mapun m̄irres ngok? Poro kupwulwule ko nevöt nen pivi pungut pivatul (300) kis ko, ko orongwos rraplai tevi beres nir." <sup>6</sup> Owrai erpel sete suri orrorrm̄i beres ko nir; ko suri evi jinibb ne venao. Ko ni oksolo narr ser, ko ok-sesaroe nevöt nga muto renge nolon.

<sup>7</sup> Ko Iesu owrai tevi "Kuplingingi nesevin pisan, kuplingingi puloli metmete tera nga partevnik. <sup>8</sup> Beres ngok nir parlik tetajer ko pa tevi kami, ko inu ma sete numa-lik tetajer tevi kami."

*Jinibb nga marlelep renge m̄eri Isrel nir arloli nale nga parevji pini Lasros*

<sup>9</sup> Delung jinibb nga milep ne m̄eri Isrel nir arunge nga Iesu elik renge Betani, ko artutur van, sete suri kis Iesu, ko suri kele wor Lasros nga Iesu muloli mimaur luwi renge mijen. <sup>10</sup> Ko niko batu jinibb ne sulsulen nir arloli nale ne Lasros nga parevji pini kele. <sup>11</sup> Suri nga m̄eri Isrel elep arlesi nga Iesu muloli Lasros mimaur luwi, ko arlingi kurtweni m̄erwomu ser nir, ko arosuri Iesu vajin.

*Iesu evan renge Jerusalem ko jinibb arsurövi ni*

<sup>12</sup> Renge nabong m̄inij nen vajin meling jinibb nga milep nga marini renge nanen ne asien arunge nga Iesu mivel vini pivini renge Jerusalem. <sup>13</sup> Ko arvasi rengsi nini nir ko arivel aran artur ore, ko arkail arwera "Rapsurövi Atua! Atua p̄irij p̄irres suri ni nga mivini renge nise Iova, Numal se m̄eri Isrel nir!"

<sup>14</sup> Ko Iesu elesi natu dongki san ko esakel ren, erpe nga maruli renge Naul On: <sup>15</sup> 'Kami jinibb ne Saeon nir, sete kapmetutu. Kaplesi Numal se kami evini, esakel renge natu dongki.' <sup>16</sup> Jinibb sen nir sete arongwos wowomue nanu ngel nir; mian ko vitunen vajin daron nga Iesu mutur imare luwi renge mijen mian renge melrin m̄ila nosrövien sen, ko ngok ararormi sweri vajine nga aruli nanu ngel nir suri ni renge Naul On, nga jinibb nir parloli nanu ngel nir tevi ni.

<sup>17</sup> Lartul nga marpivevi ni renge daron nga miverus ko muloli Lasros mutur imare luwi renge mijen renge dubb arij suri nanu nga Iesu muloli miplari nen. <sup>18</sup> Nanu ngok ko muloli delung elep kele wor aran jin rengen, suri nga marunge nelesien nen nga muloli. <sup>19</sup> Ko Parasi nir arwerwerai lululweni tevir, "Kaplesi, setemun rramrongwos rraploli mun nanu pisan, suri jinibb jijle arvijuri pa ni."

#### *Meri Gris sopor arpej Iesu*

<sup>20</sup> Jinibb nga maran renge nanen ne asien renge Jerusalem, renge livö rer, m̄eri Gris sopor aran kele nga parlot. <sup>21</sup> Lartul nen arini ji Pilip, m̄eri Betsaeta ne Galili, ko arwerai tevi "E m̄erel, nammerreni nablesi Iesu." <sup>22</sup> Pilip ean owrai tevi Antru, ko Antru nuru vajin Pilip oran orwerai tevi Iesu.

<sup>23</sup> Ko Iesu owra lweni tevir, "Lelingen ngel mete nial nen mawos evini nga parsurövi inu jinibb Mawos. <sup>24</sup> Nuwretun nga nuwretun nuwrai tevi kami, Poro wene nai sete pukur pivitan ngatan renge dan, ko ngok esansan bbölbööl malum. Ko poro pukur ko wor, pivitan ngatan renge dan, pietiv ko pimaure kele, ko ngok ko pia-la wenen pilep ko vajin. <sup>25</sup> Mer nga mimrreni mauren sen iel ngatan putor jabble; ko m̄er nga ma sete mimrreni mauren sen iel ngatan, pia-tori tajere van renge mauren nga muto tuwi ngok vini. <sup>26</sup> Poro jinibb san pimrreni p̄imajing suk, ko pivijuri surik ko wor. Ngabe nga ßelik e, jinibb suk kele p̄ilik tevik ie. Ko poro nga jinibb san p̄imajing suk, Tata suk pia-susi van mare."

#### *Iesu owra suri mijen sen*

<sup>27</sup> Iesu owra "Lelingen ngel nolok ornge esij temijpal, ko bowra p̄irpese? Bowra, 'Tata, kupla twenik renge mijen ngel?' Ejki, sete nurongwos bowra p̄irpok, suri

nanu mawos ngel ko mevini tweni renge iel ngatan. <sup>28</sup> Ko bowra ma 'Tata, kuploli isev tama san nga pususi nik nisem van mare.'" Ko drrelan san evel renge melrin vini owra "Nususi pa evan mare osuw, ko bosusi kele wor pian mare pivesan."

<sup>29</sup> Delung nga martur ie marunge ko arwera "Belver ko san", ko nir sopor nen arwera "Ejki, anglo ko san erij tevi." <sup>30</sup> Ko Iesu owra lweni tevi delung nga martur ie, "Drrelan ngel sete evini suri inu, ko evini suri kami kaprunge. <sup>31</sup> Lelingen ngel evi daron nga Atua puwra suri lat nga puto suri tevi jinibb nir, ko pusor tweni demij, numal ne iel ngatan. <sup>32</sup> Ko inu daron nga parsusik imare ko bervevi jinibb jijle parini jik." <sup>33</sup> Owra nale ngel, eviseni sev mijen nga ni pimij rengen.

<sup>34</sup> Delung arwera lweni tevi, "Kem namrunge renge nale neseseien, owra Mesaea p̄ilik tuwi ngok vini. Ko nik kuwra erpese ko nga kumwerai mirpok ngok, 'Parsusi wor jinibb mawos ko mare?' Ko isi ko jinibb mawos ngok?" <sup>35</sup> Ko Iesu owrai tevir, "Moron ngel p̄iptevi kami beblen kele ma, ko sete mia-periv te. Daron nga moron ngel mimor e, ko kapiel ko wor rengen, nemalik tia-malik tevtevi kami. Suri ni nga mivel renge nemalik erlleng lat nga pian e. <sup>36</sup> Daron nga moron miptevi kami, ko ngok kaposuri moron, nga puloli kami kapivi jinibb ne moron." Iesu owra jile nanu ngel nir ko evel teptepe nir, sete parlesi.

<sup>37</sup> Ewretun ni ololi nelesien elep temijpal renge nor arlesi, ko sete arosuri ni te, ejki. <sup>38</sup> Osorsan tevi nale nga propet Aesea muwrai tuwi, owra "Numal, isi osuri nanu nga namwerair, isi elesi wose derteren som nga kumviseni?" <sup>39</sup> Erpe nga ngok ko, sete arongwos parosuri. Suri Aesea owrai kele vesan, owra <sup>40</sup> 'Lartul ngok nir batur eterter erpe nevöt. Ko niko Atua ololi meter arorr; ko ololi nolor arterter. Suri arwera "Ai, rratlesi renge mete kerr! Rratrongwose renge norromien se kerr! Rratrieni lweni kerr vini jin vajin ko ni tuloli kerr rrata-maur luwi!" ' <sup>41</sup> Aesea owrai nanu ngel nir, suri elesi nosrövien se Iesu, ko niko muspe suri ni.

<sup>42</sup> Ko ewretun, m̄eri Isrel elep arosuri Iesu, ko nir elep nga marlelep rer arosuri kele. Ko suri armetutu Parasi nir, ko sete arwerai tweni ni te ejki. Suri armetutu tarwirr twenir renge naim gortien ser. <sup>43</sup> Suri armerreni nga jinibb parsurövir easi renge nga Atua p̄usrövir.

#### *Iesu evi mauren ne iel ngatan*

<sup>44</sup> Iesu ekaül ko owra tweni "Mer nga muosuri inu, sete osuri inu kis ko, ko osuri m̄er nga mukonik kele. <sup>45</sup> Jinibb si nga

mũlesi inu, ngok elesi pa m̄er nga mukoni inu ko osuw. <sup>46</sup> Inu nuvi moron ne iel ngatan. Mer nga muosuri inu sete orongwos p̄ilik reŋge nemalik. <sup>47</sup> Poro jinibb pisan purnge nale suk, ko sete puosuri te, inu sete numa-wera suri lat nga puto suri re m̄ernen. Suri sete nuvini tweni bololi p̄irpok iel ngatan, nuvini tweni nga ðela mauren tevi jinibb nir. <sup>48</sup> Isi nga mungasi inu, ko sete muosuri nale suk nga mowrai, san nga pia-wera suri lat nga puto suri re m̄ernen oteo.

“Nale suk nga mowrai niko pia-wera suri lat nga puto suri re m̄ernen reŋge nabong nga vitunen. <sup>49</sup> Inu sete nuwra nawon nanu san. Tata suk nga mukonik ko wor owrai tevik nale neseseŋen sev nga inu bea-werair ko bospe surir. <sup>50</sup> Ko nurongwose nale neseseŋen sen evi mauren nga muto tuwi ngok vini. Ko niko nale suk nga mowrai, nuwrai osorsan tevi nga Tata suk muwrai tevi inu.”

### 13

#### *Iesu errawe ðela jinibb sen nir*

<sup>1</sup> Evi nabong nga muwomu nen, mian ko mevinen vajin pivi nabong ne nanen ne asien. Ko Iesu orongwose nga mete nial sen evini nga pivel lingi iel ngatan, pulwi van ji Tata sen e. Ni tetajer emrreni jinibb nga marivi sen reŋge iel ngatan, ko emrrenir ejpari bongsin jer.

<sup>2</sup> Iesu eptevi jinibb sen nir reŋge nanen. Ko Demij elngi womu pae reŋge nolo Jutas, Saemon ne Iskariot natun, nga ni p̄itkai kerasi Iesu. <sup>3</sup> Iesu orongwose nga Tata ela nanu p̄etp̄eti nir elngir reŋge nevren, ko ni orongwose nga ni evel ji Atua vini, ko pulwi kele ko wor van ji Atua e. <sup>4</sup> Ko ni emra reŋge nanen, ko ori tweni sunsun sen ejingteni oto, ko ela tawol, etatuwe reŋge ðin. <sup>5</sup> Ko ela nuwi ejvi van reŋge narov, ko etipatun errawe ðela jinibb sen nir, ko ela tawol nga mitatuwe ko etwasir e. <sup>6</sup> Mian ko evini vajin ji Saemon Pita. Ko Pita owrai tevi “Numal, sete omomsawos nga nik kuprrawe inu ðelak!”

<sup>7</sup> Iesu owra lweni tevi, “Sev nga mololi sete kuma-rongwose lelingen ngel, vitunen ko wor ko kupa-rongwose.” <sup>8</sup> Pita owra lweni tevi “Ejki rres nawon! Sete kumarrawe ðelak nabong san.” Iesu owrai tevi “Poro sete ðerrawe ðelam, ko nik sete kuma-ivi jinibb suk.”

<sup>9</sup> Ko Saemon Pita otur imare owrai tevi, “O, Numal, poro p̄irpok ko sete ðelak kis nuru, ko nevrek nuru ko batuk kele!” <sup>10</sup> Iesu owrai tevi “Ejki, m̄er nga m̄ilalos jile lelingen ngel sete orongwos pulwi p̄ilalos luwi kele, ðelan kis kobbong nuru; ko

ni owokwok p̄etp̄eti ko pa. Kami kamwokwok; ko sete kami jile kamwokwok.” <sup>11</sup> Suri orongwos womue pa nga isi pia-tekai kerasi ni, ko niko muloli nga mutuw nale ngok, “sete kami jile kamwokwok”.

<sup>12</sup> Vitunen reŋge m̄irrawe jile ðelar, ko ela lweni sunsun sen ko ori lweni, musuw ko esakel luwi reŋge milngen. Ko owrai tevir, “Kamrongwose sev nga mololi tevi kami?” <sup>13</sup> Kami kamveruse inu Jinibb Nevisvisenien ko Numal. Kami kamwerai momsawose inu ko, <sup>14</sup> inu nuvi Numal ko jinibb nevisvisenien se kami. Ko ngok, kami kele kaploli nolo kami pian ngatan, ko kaploli p̄irpok, kaprrarrawe ðela kami lululweni nir. <sup>15</sup> Inu nuloli rrongrongvi tevi kami ko lat nga kaploli suri e. Niko, kami kaploli p̄irpe nga mololi tevi kami ngok ko. <sup>16</sup> Nuwretun nga nuwretun nuwrai tevi kami, jinibb ne majingen sete ean mare lingi numal sen, ko erpok kele jinibb nga markoni sete ean mare lingi ni nga mukoni. <sup>17</sup> Poro kaprongwose nanu ngel, ko neiren reŋge kami poro kaploli.

<sup>18</sup> “Sete nuwra kami jile ngok ko. Nurongwose nir nga motobbobbuer. Ko Naul On pivini piplari weretunen ko wor, nga muwra ‘Mer nga murro nanen nuruk p̄irieni ko p̄itre kele inu.’ <sup>19</sup> Nuwra wowomue le ngel tevi kami, vitunen ko pia-pelari; ko poro pia-pelari, ko kami kapa-osuri vajin nga inu nuvi m̄ernen. <sup>20</sup> Nuwretun nga nuwretun nuwrai tevi kami, isi nga m̄itkai nir san reŋge nir nga mokoni ngel van re naim sen, ngok etka kele pa inu ko. Ko isi nga m̄itkai inu, ngok etkai kele pa ni nga mukoni inu ko.”

#### *Iesu ospe suri mijen sen*

<sup>21</sup> Daron nga Iesu muwra nanu ngel e ko ornge lengenge esij ko owrai tevir, “Nuwretun nga nuwretun nuwrai tevi kami, san reŋge kami pia-tekai kerasi inu.” <sup>22</sup> Jinibb sen nir armetmetenir e, arrelenge owra nir si nen ko. <sup>23</sup> San reŋge jinibb sen, ni nga Iesu mimrreni, elik mori bbong Iesu, elik lilji. <sup>24</sup> Ko Saemon Pita olongwis bbong tevi, owra “Kupsusi ta tevi ni, isi ko muwrai ngok.”

<sup>25</sup> Ngok m̄ernen oruj mori van jin ko osusi tevi, owra “Numal, isi ko m̄ernen?”

<sup>26</sup> Ko Iesu owrai tevi, “Mer nga bearrurrgoni niv ko bea-lai tevi. Ni ko evi m̄ernen.” Ko ela bebeje niv ko orurrgoni reŋge sup ko elai vajin tevi Jutas, Saemon ne Iskariot natun. <sup>27</sup> Daron nga Jutas moka-la niv e, ko Demij kele esilvi vajin. Ko Iesu owrai tevi “Sev nga kumwera kuploli ngok, kuploli pingavil.” <sup>28</sup> Nir nga marlik reŋge nanen, nir san sete orongwose rragrag suri sev nga Iesu muwrai mirpel tevi. <sup>29</sup> Arrorrm̄i rreknga

suri nga Jutas moksa narr ne nevöt, ko niko Iesu muwrai tevi pian puwli sev nga marmmerreni rengen nanen, rreknga pian pila nevöt tevi beres nir. <sup>30</sup> Ko Jutas ela jile niv ko esil ivare evel. Natopong ko pa osuw.

<sup>31</sup> Jutas ean pa vare ko osuw, ko Iesu owra "Lelingen ngel evi daron nga parsurövi inu Jinibb Mawos, ko rengen inu bosrövi Atua. <sup>32</sup> Poro nosrövien se Atua piplari rengen inu, ko Atua kele puloli nosrövien se inu kele piplari luwi kele ji inu, ko puloli pipok pivesane. <sup>33</sup> Nanwarreng suk nir, sete numa-lik tevi kami mia-periv mun. Sete pipriv mun mian ko kapa-pej inu; ko erpe mowrai pa tevi m̄erwomu se kerr m̄eri Isrel nir, ko lelingen ngel nuwrai le vajin tevi kami: Lat nga bean e kami sete kamrongwos kapini rengen. <sup>34</sup> Lelingen ngel ðela nale nesereien nga mimerr tevi kami, ngel: Kami kapmerrmerreni kami. Pirpe nga inu memrreni kami, kami kele kaploli pipok, kapmerrmerreni kami. <sup>35</sup> Poro kami kapmerrmerreni kami, ko ngok jinibb jille parongwose ko nga kami kamivi jinibb suk nir."

<sup>36</sup> Saemon Pita osusi tevi ni, "Kupan ngabe ko Numal?"

Iesu owra lweni tevi ni, "Lat nga bean e, lelingen ngel setete kurongwose kupvijurik rengen; ko kupa-vijurik vitunen vajin."

<sup>37</sup> Pita owrai tevi, "Numal, suri sev setete nurongwos bevijurim lelingen ngel? Numarong lweni inu nga bemij surim."

<sup>38</sup> Iesu owra lweni tevi, owra "Ia, nik kuwretun ko wor, nik kumarong nga kupmij surik? Inu bowra weretunen vajin tevim. Nato setewor pukokroun ko wor ko nik kupvilvil orek pivatul, kupwera sete kurongwose inu."

## 14

### *Iesu evi sel nga pian ji Tata*

<sup>1</sup> Ko Iesu owrai tevir, "Sete kaploli nolo kami parkarkar; kaposuri Atua ko inu kele. <sup>2</sup> Renge naim se Tata, loloim nen nga markel ototi rengen owun saut. Poro sete pipok, sete numa-werai le ngel tevi kami: Bean bololi lilane lat nga kami. <sup>3</sup> Bean bololi lilane jile pusuw, ko bolwi kele vini ðetkai kami, kaplik tevik rengen lat nga m̄elik e. <sup>4</sup> Ko kami kamrongwose sel nen nga bean e."

<sup>5</sup> Tomas owrai tevi "Numal, sete namrongwose te lat nga kupa e, kem nabrongwose sel nen pipese?"

<sup>6</sup> Ko Iesu owrai lweni tevi, "Inu nuvi batu sel, ko nuvi batu weretunen, ko nuvi batu mauren. Sete san orongwos p̄iasi nawon

van ji Tata ejki, p̄ikali wor ji inu e ko. <sup>7</sup> Poro kaprongwose inu, ko kaprongwose kele Tata suk. Kamlesi pa ni osuw, ko lelingenok kamrongwose ni." <sup>8</sup> Pilip owrai tevi owra "Numal, kupviseni ta Tata som tevi kem, nga puloli kem nabrongwos alje vajin." <sup>9</sup> Iesu owrai tevi, "E, nuptevi kami bonevis le wor, ko ejki malum wor, kurr̄leng malume inu Pilip? Mer nga m̄ilesi inu, ngok elesi pa Tata suk ko, ko suri sev nga kumwera "Kupviseni ta Tata som tevi kem"? <sup>10</sup> Sete kuosuri nga inu rengen Tata suk ko Tata suk rengen inu? Nale nga mowrai tevi kami, sete nuwrai rengen derteren suk. Tata suk ko wor nga m̄ilik rengen inu ololi majingen sen nir. <sup>11</sup> Kaposuri inu nga inu rengen Tata suk ko Tata suk rengen inu. Ko poro kaplesi p̄iterter nga kaposuri iok, ko kaprrormi majingen nga mololir, ko kapa-osuri ko vajin. <sup>12</sup> Nuwretun nga nuwretun nuwrai tevi kami, m̄er nga muosuri inu pia-loli majingen nga mololir, ko pia-loli nga wor marlelep nen jerjer, suri inu bolwi van ji Tata suk e. <sup>13</sup> Poro kapngoni ısev san rengen inu nisek, ko bea-loli ko, nga puloli nosrövien se Tata suk pia-viseni rurr̄ngi rengen Natun. <sup>14</sup> Nanu jille ngok nir, poro kapngoni rengen inu nisek, ko ngok bealolir ko."

### *Rijrijen ne Nem̄in On*

<sup>15</sup> "Poro kapmerreni inu, ko kaptori lilane nale nesereien suk nir. <sup>16</sup> Ko inu bea-ngoni tevi Tata nga ni pia-koni Nem̄in On vajin vini nga pok-wilwil se kami, ko pia-te kai kami tuwi ngok vini. <sup>17</sup> Ni evi Nem̄in ne weretunen, ko sete jinibb ne iel ngatan arongwos parlai ni, suri sete arlesi ko sete arlesi wos kele e. Ko kami ma kamrongwose ni, suri elik livö rengen kami, ko p̄ilik rengen kami tetajer. <sup>18</sup> Setete ðelinglingi kami kapsan te ejki, bolwi kele vini ji kami. <sup>19</sup> Sete ngasu te, ko jinibb ne iel ngatan ngel nir setemun parlesik. Ko kami ma kaplesik; ko suri numaur, ko kami kele kapa-maur. <sup>20</sup> Renge nabong nen, kami kaprongwose nga inu rengen Tata, ko kami rengen inu, ko inu kele rengen kami.

<sup>21</sup> "Mer nga mutori lilane nale nesereien suk nir ko muosuri; ni evi m̄er nga mimrreni inu. Ko m̄er nga mimrreni inu, Tata suk pimrreni ni; ko inu kele bemrreni ni, ko inu bea-viseni inu tevi ni."

<sup>22</sup> Jutas (sete Jutas ne Iskariot) owrai tevi ni, "Numal, kuploli pipese nga kupviseni nik lweni tevi kem, ko sete tevi jinibb ne iel ngatan jille nir?" <sup>23</sup> Iesu owra lweni tevi, "Poro nga jinibb san pimrreni inu, ko ngok ni pia-tori lilane nale suk. Ko Tata suk pia-merrreni ni, ko noborini jin, ko

noborlorli liken se komru tevi ni. <sup>24</sup> Mer nga sete mimrreni inu sete otori totoni nale neseseireien suk nir. Nale nga kamrunge ngok nir sete arivi suk, arivi se Tata suk nga mukoni inu. <sup>25</sup> Daron ngel nga ñelik tevi kami malum e, ko nuwra nanu ngel nir tevi kami. <sup>26</sup> Neñin nga pok-wilwil se kami, Neñin On nga Tata pia-koni renge inu nisek, pia-visviseni kami e nanu jijle, puloli kami kaprrormi sweri lweni nanu nga mowrair pa tevi kami.

<sup>27</sup> "Demat nga milep le ñelai tevi kami, evi inu demat suk. Sete demat suk osorsan tevi demat ne iel ngatan. Sete kaprong karkare te, puloli nolo kami ñisij, pijki, ko sete kapmetutu te. <sup>28</sup> Kamrunge nuwrai tevi kami le ngel, 'Inu bolwi le pa, ko beveni kele bbong ji kami ko.' Poro kapmerrenik ko kapir kobbong, suri nga bean ji Tata. Suri ni elep asi wore inu. <sup>29</sup> Inu nuwrai wowomue nanu ngel le nir tevi kami, mian ko vitunen para-pelari. Ko daron nga para-pelari e, ko kami kapa-osuri vajin.

<sup>30</sup> "Sete numa-rij periv tevi kami. Suri Demij, numal ne iel ngatan, otomori pivini. Derteren sen ejki rres nawone renge inu. <sup>31</sup> Ko inu nuloli surie erpe wor Tata ko muwrai tevik, puloli nga jinibb ne iel ngatan parongose nga inu numrreni Tata. Kapmera, kerr pivel vajin."

## 15

### *Iesu evi batu grep weretunen*

<sup>1</sup> "Inu nuvi batu grep weretunen, ko Tata suk evi ñer nga mimetmete. <sup>2</sup> Ko seken jijle nir nga renge inu nga sete marwen nen nir, oktevei tutwenir arjkie. Ko okvasi vaseni seken nga marwen nen nir, ko ngok puloli sete parmelmelngir, ko parejal sisamis ma ñirres, ko parwen lengleng. <sup>3</sup> Ko ololi vaseni kami kamwokwok ko pa osuw renge nale nga mowrair tevi kami ngel nir. <sup>4</sup> Ko kami kaplik renge inu, ko inu ñelik renge kami. Erpe seken sete orongwose pisan piwen, orongwos bbonge piwen ko renge nga poro pijijipti malum renge durun. Ko ngok erpok ko renge kami, sete kamrongwos kapwen poro sete kaplik renge inu.

<sup>5</sup> "Inu nuvi batun, ko kami kamivi seken nir. Si nga ñilik renge inu, ko inu renge ni, pia-wen temijpal kele wor. Suri sete kamrongwos kaploli rragrrage nanu pisan poro nga inu bejkie kami. <sup>6</sup> Poro nga jinibb pisan sete ñilik renge inu, parwirr tweni ko wor erpe seken, ko pukurkur. Ko arser kortoni seken ngok nir ko arwirr tweni nir van renge nab, ko arin. <sup>7</sup> Ko poro nga kaplik renge inu, ko nale suk puto renge kami, ko ngok ko poro nga kapngoni

sev nga kammerrenir, ko kaplair ko. <sup>8</sup> Ko jinibb pilep parsurövi Atua Tata suk, suri kapla temijpale wenen. Ko renge sel ngel ko, kami kapivi jinibb suk nir. <sup>9</sup> Erpe Tata suk emrreni temijpale inu, ko inu numrreni kami; niko kami kaplik renge inu merrenien suk malum. <sup>10</sup> Poro nga kami kaptor lilane nale neseseireien suk nir, ko niko kaplik renge merrenien suk, pirpe nga inu motori lilane nale neseseireien se Tata suk nir, ko ñelik renge merrenien sen.

<sup>11</sup> "Inu nuwrai nanu ngel nir tevi kami nga puloli neiren suk puto renge kami. Ko ngok puloli kami neiren se kami puwun saut. <sup>12</sup> Ngel evi nale neseseireien suk: Kami kapmerrmerreni lululweni kami, pirpe nga inu memrreni kami. <sup>13</sup> Merrenien nga milep temijpal nga jinibb puloli tevi selen nir, evi nga ñilngilngi mauren sen, pimij ñisrer. <sup>14</sup> Kami kamivi selek, poro nga kaploli sev nir nga mowrair tevi kami. <sup>15</sup> Inu setemun beverage kami 'jinibb ne majingen'. Suri jinibb ne majingen sete orongwose sev ko nga numal sen muloli. Inu beverage vajine kami 'selek nir'. Suri nuwra nanu jijle nir nga mornger ji Tata tevi kami. <sup>16</sup> Kami sete kamtobbobbue inu, inu ko ma nutobbobbue kami. Ko nulngi kami nga kapan kapla wenen pilep, wenen nen nga puto tuwi ngok vini. Ko ngok niko, isev nga poro kapngoni renge inu nisek van ji Tata suk, ni pia-lai ko tevi kami. <sup>17</sup> Ngel le evi nanu nga bowrai tevi kami: Kami kapmerrmerreni lululweni kami.

### *Jinibb ne iel ngatan arungasi jinibb se Iesu nir*

<sup>18</sup> "Poro nga jinibb ne iel ngatan nir parungasi kami, ko kami kaprongwose nga arungasi womue inu ko pa, vitunen ko mara-ungasi kami vajin. <sup>19</sup> Poro kami kapivi se iel ngatan, ko jinibb ne iel ngatan parmerreni kami ko, suri kamivi sen. Ko ejki, inu nutobbobbue kami renge iel ngatan. Kami sete kamivi sen. Suri iok ko niko mungasi kami suri. <sup>20</sup> Kaprrormi nale nga inu mowrai pa tevi kami: Sete jinibb ne majingen elep asie numal sen. Poro parloli ñisij tevi inu, ko parloli ñisij kele kobbong tevi kami; ko poro partori nale suk nga mowrair, ko partori kele bbong nale se kami ko nir. <sup>21</sup> Ko parloli nanu ngel ko nir tevi kami suri kami kamivi jinibb suk nir, suri nir sete arongwose ñer nga mukoni inu vini. <sup>22</sup> Poro nga inu sete beveni ko bowra nanu tevir, ko niko sete arongwose paron ko renge nololien ser. Ko lelingen ngel sete arongwose parkerkerise parwera nawone nanu san suri nololien ser, suri ñiejiljilwer pa



tevir, ko arongwos pae osuw. <sup>23</sup> Mer nga mungasi inu, ngok ongasi Tata suk kele ko. <sup>24</sup> Ko poro nga sete bololi majingen nga jinibb san setewor muloli ko reнге livõ reнге nir, ko ngok ko sete arongwose paron ko reнге nololien ser suri. Ko ejki, arlesi pa nanu nga mololir, ko arungasi wor komru korti, inu ko Tata suk. <sup>25</sup> Ngel evi nga puloli nale nga maruli reнге nesreien ser piplari, nga muwra 'Arungasi nawon bbonge inu, inu sete nuloli rragrag nanu nga müsij san.'

<sup>26</sup> "Nemün nga mokla ser pivini, Nemün ne weretunen, nga pia-ivel ji Tata vini. Inu bea-koni ji Tata pia-vini ji kami, ko ni pia-rij se inu. <sup>27</sup> Ko kami kele kapa-rij se inu, suri nga kami kamlik tevik reнге nga mietipatune mēmajing wowomu jer, mijpari lelingen ngel.

## 16

<sup>1</sup> "Nuwra nanu ngel nir nga puloli kami sete kapvitan te, pijki. <sup>2</sup> Jinibb nir parwirr tweni kami reнге naim gortien ker. Ko daron nen pia-vini nga jinibb parevji pini kami, ko jinibb nga marevji pini kami nir, parrormi arloli majingen se Atua ko. <sup>3</sup> Parloli nanu ngel nir tevi kami suri nga sete arongwose komru korti, Tata ko inu. <sup>4</sup> Nuwra wowomu pae nanu ngel le nir tevi kami ngel. Poro nga daron nen pia-vini vajin nga para-loli nanu nga ngel nir tevi kami, ko ngok, kami kaprrormi sweri nga nuwrai pa tevi kami osuw."

### *Majingen se Nemün On*

"Sete nuwra wowomue nanu ngel nir tevi kami reнге bonevis pa, suri inu mēlik tevi kami. <sup>5</sup> Ko lelingen ngel, bevel le pa, bolwi van ji ni nga mukoni inu e. Ko kami san sete osusi tevik "Kupan ngabe ko?" <sup>6</sup> Ko mowrai tevi kami nga bevel lingi kami, ko nolo kami arrum suri. <sup>7</sup> Ko nuwra weretunen ko tevi kami, ngok pia-ivi nanu nga nürres reнге kami; suri poro sete bevel, ko Nemün nga mok-la ser sete orongwos pivini ko. Ko poro bolwi ko van, ko bokoni Nemün On ko vini ji kami. <sup>8</sup> Ko daron nga pivini e, ko pia-wowrai jinibb ne iel ngatan nir nga marsarr reнге nololien, ko pia-wowrai suri sev nga mumomsawos, ko sev nga sete mumomsawos nga Atua pia-wer lokloksi jinibb suri. <sup>9</sup> Nir arsarr reнге nololien, suri nga sete marosuri inu. <sup>10</sup> Ko arsarr reнге inu mēr nga mololi mumomsawos nürres, suri inu bean ji Tata e, ko kami sete kaplesi kele mun inu. <sup>11</sup> Ko arsarr reнге erpese nga Atua pia-wer lokloksi jinibb suri, suri sete arongwose nga Atua ewer lokloksi jile pa Demij nga mivi mērwowu ne iel ngatan.

<sup>12</sup> "Nanu elep malum wor nga moro bowrai tevi kami, ko ejki mun, lelingen ngel setemun kamviter kaprongwos nir. <sup>13</sup> Ko daron nga Nemün ne weretunen vajin pia-vini, ko pia-wowomue kami van reнге weretunen jile nir. Ni sete pia-wera nawone nale pisan, ejki rres. Ni puwra bbong nanu nga murnger kis ko, ko puwora nanu nga para-vini nir tevi kami. <sup>14</sup> Ni pusrövi inu, suri pia-la nanu nga marivi suk nir, ko ni pia-werwerai twenir tevi kami. <sup>15</sup> Nanu jile nga marivi se Tata arivi suk; ngok ko ololi nga inu mowrai Nemün pia-la nanu nga marivi suk nir, ko pia-werwerair tevi kami vajin."

*"Beblen welili kele ma, ko kaplesi kele inu"*

<sup>16</sup> Ko Iesu owrai kele tevir, owra "Beblen welili kele ma, ko sete kaplesi mun inu; mian ko beblen welili kele ma vitunen reнге ngok, ko kapa-lesi kele inu."

<sup>17</sup> Jinibb sen sopor arwerai tevi nir sopor nen, "Owra sev le san nga muwrai mirpok ngok tevi kerr, 'Beblen welili kele ma, ko setemun kaplesi inu, mian ko beblen welili kele ma vitunen reнге ngok, ko kapa-lesi kele inu', ko, 'Suri nga inu bean ji Tata?'" <sup>18</sup> Ko jinibb sen nir arsususi lululweni tevi nir: "Owra sev le san nga muwra 'Beblen welili'? Sete rramrongwose owra sev ko."

<sup>19</sup> Iesu orongwose nga armerreni parsusi tevi ni, ko owrai tevir, "Inu mowra 'Beblen welili kele ma ko setemun kaplesi inu, mian ko beblen welili kele ma vitunen reнге iok, ko kapa-lesi kele inu'. Ngok ko, kamok-susi lululweni kami ngok e. <sup>20</sup> Nuwretun nga nuwretun nuwrai tevi kami, kapkail kaptiing, suwen mete kami pujumjum; ko jinibb ne iel ngatan nir parir, ko kami nolo kami parrum. Ko mian ko nolo kami nga marrum ngok parienir van reнге neiren. <sup>21</sup> Daron nga nesevin mutomori puwosi bipi sen, ko nolon orrum, suri daron sen evini nga puwosi bipi. Ko daron nga nesevin muwosi jile bipi, ko emalie norongen nga müsij sen vajin, suri bipi eak pa iel ngatan osuw. <sup>22</sup> Kami kamirpok ko lelingen ngel, nolo kami arrum. Ko bea-lesi kele kami, ko nolo kami puwun saute neiren. Neiren nen, setemun jinibb san orongwos pilai tweni mun ji kami.

<sup>23</sup> "Reнге nabong nen, setemun kamasusi rongorge nanu san tevik. Nuwretun nga nuwretun nuwrai tevi kami, poro nga kapngoni nanu san tevi Tata suk reнге inu nisek, kapngoni, ko ni pia-lai ko tevi kami. <sup>24</sup> Mijpari lelingen ngel, kami setewor kamngoni nanu san reнге inu nisek; kapngoni vajin ko kaplai, nga puloli neiren se kami puwun saut."

*Iesu easi renge nanu jijle nir ne iel ngatan ngel*

<sup>25</sup> “Nuwra nanu ngel nir tevi kami renge nale rrongrrongvi nir. Ko daron nen pia-vini nga inu setemun ßela nale rrongrrongvi, pijki, ko bowra momsawos Tata vajin tevi kami renge nale momsawos nir. <sup>26</sup> Nabong nen pia-vini ko kami kapngoni ni renge inu nisek. Sete nuwra inu bean se kami bongoni nanu san jin se kami, ejki. Kami ko wor kapan mawos ji Tata, <sup>27</sup> suri Tata ni lweni emrreni kami. Ni emrreni kami suri kami kammerreni inu, ko kamosuri nga inu nuvel ji Atua vini. <sup>28</sup> Inu nuvel ji Tata vini iel ngatan. Ko lelingen ngel, bevel lingi iel ngatan ko bolwi van ji Tata e.”

<sup>29</sup> Jinibb sen nir arwerai tevi ni, “Ngok kulesi, kuwra momsawose vajin, setemun kuwrai renge nale rrongrrongvi. <sup>30</sup> Kem namrongwose vajin nga nik kurongwose nanu jijle. Kurongwos kupsupsupe nanu þetþeti nir, tevi nanu nir nga setewor san mususi tevim. Ngel ololi nga kem namosuri nga nik kuel ji Atua vini.” <sup>31</sup> Ko Iesu owrai lweni tevir, “Kamosuri vajin lelingen ngel? <sup>32</sup> Mete nial nen evini, ejpari pa ngel, nga kami jijle kapwolu sisamis van renge ngaim se kami e. Ko inu ßesansan bbölböböl botur jer. Ko weretunen sete nusan, suri Tata eptevik. <sup>33</sup> Inu nuwra pa nanu ngel tevi kami, nga puloli kami kapkorti renge inu, ko kapla demat. Iel ngatan puloli kami kaprunge þisij; ko sete kapmetutu, inu nuasie pa nanu ne iel ngatan ngok nir jijle.”

## 17

*Iesu olot suri jinibb sen nir*

<sup>1</sup> Daron nga Iesu muwra jile nale ngel e nir, ko oklu imare emteni melrin, ko olot owra “Tata, mete nial nen evini. Kup-surövi natum, ko inu bosrövi nik. <sup>2</sup> Kula derteren tevik nga inu nuterter evter nga bololi sev nga memrreni tevi jinibb þetþeti nir. Ko ngok nurongwos ßelai mauren nga muto tuwi ngok vini tevi jinibb jijle nga kumlair tevik. <sup>3</sup> Nanu ngel le evi mauren nga muto tuwi ngok vini, nga jinibb parongwose nik kumsansan kumivi Atua weretunen, ko parongwose Iesu Kristo nga nik kumkoni vini iel ngatan. <sup>4</sup> Inu nusrövi nik renge iel ngatan, nuloli jijle majingen nga kumlair tevik nga bololir. <sup>5</sup> Lelingen ngel vajin Tata, kupsurövi inu renge nik nom renge nosrövien nga tuwi mivi suk, renge daron nga mielik tevi nik e womu mian ko vitunen vajin kuma-loli iel ngatan.

<sup>6</sup> “Inu nuwra visviseni nik nisek tevi jinibb ne iel ngatan nir nga nik kumla twenir marivi som, ko kumlair tevik vajin,

ko nir arosuri nale som. <sup>7</sup> Lelingen ngel nir arongwose vajin nga nanu jile nga kumlair tevik arivel jim vini. <sup>8</sup> Suri nale som nir nga kumlair tevik, inu nulair tevir. Ko nir arlair, ko nir arongwose vajin nga weretunen nga inu nuvel jim vini. Ko arosuri nga nik kukoni inu.

<sup>9</sup> “Inu nomok-lot suri nir; inu sete nomok-lot suri jinibb ne iel ngatan nir te ejki; nomok-lot suri bbong nir nga kumlair ko tevik, suri arivi som. <sup>10</sup> Nir jile nga marivi suk arivi som kele, ko nir nga marivi som arivi suk. Nosrövien suk nir ko arviseni eplari. <sup>11</sup> Lelingen ngel inu bevinuk pa jim e le, setemun numalik iel ngatan; ko nir ma parlik jer iel ngatan. Tata nga muon, kupmetmet nir nga kumlair tevik renge derteren ne nik nisek, nga nir parivi pisansan, pirpe nga keru sansan. <sup>12</sup> Daron nga mielik tevi nir nga kumlair tevik, numetmet nir renge derteren ne nik nisek. Numetmet lilane nir erres, sete nir san ejijki te; sansan kobbong, nga ni pipok ko wor, ni kobbong ejijki, nga puloli nale nga muto renge Naul On pipari. <sup>13</sup> Lelingen ngel inu bolwi le pa bevinuk jim e, ko nuwra nanu ngel nir tevir renge daron nga inu mielik ngatan malum le. Ngok puloli nir parla neiren suk renge nolor parwun saute. <sup>14</sup> Inu nula nale som tevir; ko jinibb ne iel ngatan nir arungasir, suri nir sete arivi ne iel ngatan, arsorsan tevi inu sete mevi ne iel ngatan. <sup>15</sup> Inu sete nungoni nik nga kupla twenir renge iel ngatan, pijki. Nungoni nik ma nga kuptor orer, parasi renge Demij nga müsij. <sup>16</sup> Nir sete arivi ne iel ngatan, arirpe inu sete mevi ne iel ngatan. <sup>17</sup> Kuplingi taleve nir, kuplolir paron renge weretunen som. Nale som evi weretunen. <sup>18</sup> Erpe nga nik kumkoni inu vini iel ngatan, ko inu kele nukoni nir van renge iel ngatan. <sup>19</sup> Inu nulngi taleve inu lweni nuon, nga puloli nir kele parlik talev, ko paron renge weretunen.

<sup>20</sup> “Inu sete nulot suri nir kis kobbong, ko nulot suri kele wor nir nga para-osuri kele inu vitunen suri nale se jinibb suk ngel nir. <sup>21</sup> Inu nulot suri nir, nga parivi pisansan e, pirpe nik Tata renge inu, ko inu renge nik. Ngok pipok ko, nir kele renge keru, puloli nga jinibb ne iel ngatan nir parlesii wose inu nga nik kumkoni inu. <sup>22</sup> Nosrövien nga kumlai tevik, nulai pa tevir nga nir parivi pisansan pirpe keru rromorivi sansan. <sup>23</sup> Inu renge nir, ko nik renge inu, ngok puloli nir parivi pisansan mawos, nga puloli jinibb ne iel ngatan nir parongwose nga nik kukoni inu, ko kumrreni nir osorsan tevi kumrreni inu.

<sup>24</sup> “Tata, numrreni nga nir nga kumlair tevik parlik tevik kele renge lat nga

Belik e, nga parlesi inu nosrövien suk nga kumlai tevik. Suri nik kumrreni womu inu, vitunen ko iel ngatan ngel mia-toe. <sup>25</sup> O, Tata nga mumomsawos, jinibb ne iel ngatan nir sete arongwose nik, ko inu ma nurongwose nik; ko nir ngel kele arongwose nga nik kumkoni inu. <sup>26</sup> Nomok-wera visviseni pa nik tevi nir, ko nir arongwos vajine. Ko bololi malume pirpok, nga puloli merrenien nga kummerreni inu e puto renge nir, ko inu kele renge nir.”

## 18

### *Arevei totoni Iesu*

<sup>1</sup> Vitunen renge Iesu mulot jile muwra nale ngel nir, ko eptevi jinibb sen nir arivare renge Jerusalem, arivel otvi belai nuwi ne Kitron. Ko aran renge lut san nga mivi lolnai olip. <sup>2</sup> Jutas nga pitkai kerasi ni orongwose lat nen, suri Iesu tetajer okkorti tevi jinibb sen nir ie. <sup>3</sup> Ko Jutas eptevi jinibb ne nuval sopor ne Rom ko jinibb ne nuval kele sopor nga marmetmete Naim On, nga Parasi nir ko batu jinibb ne sulsulen nir markonir. Artur korti evi meling jinibb nga milep ne nuval san. Artori laet ko nasul ko nijor ne nuval nir, ko arivel mawos ie. <sup>4</sup> Ko Iesu orongwose sev nga piplari renge ni; ko evel mawose nir van womue ko osusi tevir, owra “Kampej isi ko?”

<sup>5</sup> Nir arwera lweni tevi ni, “Iesu ne donasret.”

Ko Iesu owra lweni tevir, “Ko inu le ngel.” Ko renge ie Jutas nga nütikai kerasi ni otur tevir, ko ornge nale nga marwerai. <sup>6</sup> Renge daron nga Iesu moka-werai tevir mirpok e, “Inu le ngel”, ko nir arivel durer ko arwajenir van ngatan renge dan. <sup>7</sup> Ko Iesu osusi lweni kele tevir, “Kampej isi le?” Ko nir arwera “Nampej Iesu ne donasret.”

<sup>8</sup> Iesu owrai tevir, “Nuwra jile pa tevi kami osuw, ‘Inu le ngel’. Poro nga kampej inu ko, ko kaplingingi jinibb ngel nir parivel.” <sup>9</sup> Owrai erpel nga puloli nale sen nga muwrai piplari, “Tata, sete nutor jabble nir san nga kumlair tevik ejjiki.”

<sup>10</sup> Ko Saemon Pita etatuwe nesip nuval san, ko ervei tweni ko owun owra pita pini demij maur se batu jinibb ne sulsulen. Ko eta jabble, ko esipri otvi boron rres evesane. Demij maur nen nisen ko Malkas. <sup>11</sup> Ko Iesu owrai tevi Pita, owra “Pijki! Kuplingi lweni nesip nuval som renge milngen. Tata suk ko owra pila norongen nga misij ngel tevik. Kurrormi sete erres nga botor totoni nolok pitertter ren nga ban ren?”

### *Iesu otur renge no Annas*

<sup>12</sup> Meling jinibb nga milep ne nuval nen nir arrul totoni Iesu ko arsere totoni

nevren ko arile. <sup>13</sup> Womujnen arpotevi womue van ji Annas, suri ni evi pile Kaeapas, nga mivi batu jinibb ne sulsulen renge sia nen. <sup>14</sup> Kaeapas nen ko muwrai tevi mēri Isrel nir nga ‘Evi nanu nga mīrres nga jinibb pisansan pimij suri delung nir.’

### *Pita evilvil ore Iesu*

<sup>15</sup> Saemon Pita ko jinibb mīniji se Iesu kele san orvijuri suri Iesu tevi meling jinibb nga marile. Ko nuru tuwen nen eptevi Iesu oran renge lolo naworr ne naim se batu jinibb ne sulsulen e, suri mēnren batu jinibb ne sulsulen orongwose erres pelak. <sup>16</sup> Ko Pita otur jer renge metali vare e. Ko jinibb se Iesu tuwen nen olwi van ko ongoni tevi nesenwarreng nga mok-tur metmete metali nga ni piasa van vare e, piptevi Pita piasa vini live laut ne naworr e. <sup>17</sup> Ko daron nga nesenwarreng nen moka-lesi Pita, ko owrai tevi, “Rrek nik kele kuvi jinibb se mēn nga ngelan san.” Ko Pita owra “Inu? Ejki, sete nuvi san.”

<sup>18</sup> Nata mupong nen melas elep, ko jinibb ne majingen nir ko jinibb ne nuval nir arser kortoni bevla nir. Ko arsurer ko artur rrale ko artetli rengen. Ko Pita evan lat nen jir, ko otur tevir etetli.

### *Batu jinibb ne sulsulen osusi rongorngte tevi Iesu*

<sup>19</sup> Ko renge loloim batu jinibb ne sulsulen osusi rongorngte tevi Iesu, owra purongwose suri jinibb sen nir ko nevisvisenien sen. <sup>20</sup> Ko Iesu owra lweni tevi, “Tetajer inu nomok-wera nanu nir tevi jinibb jikle nir renge limjer. Nevisvisenien suk nomok-lolir renge naim gortien nir ko renge Naim On, lat nga mēri Isrel jikle marok-ini korti rengen. Inu sete nomok-wera silveni rragrrage nanu san, ejki. <sup>21</sup> Sete osorsan renge nale neseseien se kerr nga nik kupsusi rongorngte tevi inu. Kupsusi tevi ta delung nir nga marok-runge inu. Nir arongwose nanu nga mowrai.”

<sup>22</sup> Daron nga Iesu muwra nanu ngel e, ko san renge jinibb nuval nir owje, ko owrai tevi, “Erpe kumrij mirpel tevi batu jinibb ne sulsulen nga mian mare! Sete arok-rij erpok.” <sup>23</sup> Ko Iesu owra lweni tevi mēnren, “Poro inu nuwra nawone nanu san sete emawos, ko kupwera tweni lut nga mowrai sarrsarre. Ko poro nga nanu nga mowrai omomsawos, ko suri sev kumwujek?” <sup>24</sup> Mian ko Annas okoni tweni Iesu van ji Kaeapas, batu jinibb ne sulsulen. Ko dil nga marsere Iesu nevren e oto malum ren.

### *Pita evilvil ore Iesu kele*

<sup>25</sup> Saemon Pita otur malum renge lat nga ko etetli. Ko nir sopor nga martur

martetli tevi arwerai tevi, “Nik kuvi jinibb se morok san.” Ko Pita evilvil ore kele, owra “Ejki ma, inu sete nuvi jinibb sen san!”

<sup>26</sup> San renge jinibb ne majingen se batu jinibb ne sulsulen, nga mivi metka se m̄er nga Pita misipri otvi boron, owra “Sete nik ko, m̄elesim kumpitevi ni renge lolnai ne olip?” <sup>27</sup> Ko Pita evilvil ore kele, owra “Ejki ma!” Ko renge daron mawos ngok ko pa, nato okokrout.

*Iesu otur womu renge no Paelat*

<sup>28</sup> Nir arpitevi tweni Iesu renge naim se Kaeapas van renge naim nga milep se Paelat, nga mivi m̄eri Rom nen nga mivi batu gavman iok. Evi rorpong susu malum. Meri Isrel nir sete aran renge naim se Paelat te ejki, suri ni evi m̄eri Rom, ko poro paran ko ngok parrokkitk ko, ko sete parongwos parurroi nanen ne asien. <sup>29</sup> Ko niko Paelat eivare evini jir, ko osusi tevir owra “Sev ko kamlesi esij re m̄erel nga mulo kamvevi vini iel e jik?”

<sup>30</sup> Ko nir arwera lweni tevi ni, arwera “Po, ko poro m̄erel sete puloli majingen nga parsij, ko setete nama-pitevi ni vini!” <sup>31</sup> Paelat owra lweni tevir, “Kappitevi tweni, ko kami ko kapwera suri lat nga puto suri rengen renge nale nesereien se kami.” Meri Isrel nga marwowomu nir arwera lweni, “Ko kami ko m̄eri Rom nir kamwer ore nga sete namrongwos nabtor pini jinibb san!” <sup>32</sup> Nanu ngel eplari nga puloli nale se Iesu nga muwrai piplari, nga muwra suri mijen sev nga ni pia-mij rengen.

<sup>33</sup> Ko Paelat olwi van loloim e, ko everuse Iesu pivini jin. Ko Iesu evini jin, ko Paelat osusi tevi ni, “Ia, ewretun nik kuvi numal se m̄eri Isrel nir?”

<sup>34</sup> Ko Iesu owra lweni tevi, “Kususi rongorngre erpok suri nik kobbong norrorrmien som, rreknga sopor arsupe suri inu tevi nik?” <sup>35</sup> Paelat owra lweni tevi ni, “Po, kurrormi inu nuvi m̄eri Isrel rrek? Nik luwi ko wor jinibb som nir ko batu jinibb ne sulsulen nir artekai nik vini jik. Nik kuloli sev?” <sup>36</sup> Iesu owra lweni tevi, “Inu batun vanu suk sete evi ne iel ngatan. Poro nga bevi numal ne batun vanu san ne iel ngatan, ko jinibb suk nir parpalpal ore inu ko, nga sete mara-tekaik vini renge nevre m̄erwomu se m̄eri Isrel nir. Ko niko inu batun vanu suk sete evi ne iel ngatan.”

<sup>37</sup> Ko Paelat osusi kele tevi ni, “Ia, ko ewretun ko wor nik kuvi Numal san?”

Ko Iesu owra lweni tevi, “Kuwretun re kumwerai, ko rrek sete kurongwos suri nuvi numal nga mirpese san. Inu mevini iel ngatan m̄eak suri bbong majingen sansan, nga bospe suri weretunen. Isi nga

mivi jinibb ne weretunen pumurronge inu drrelak.”

<sup>38</sup> Ko Paelat osusi tevi, “Isev ko weretunen?”

*Paelat owra suri lat nga puto suri re Iesu*

Ko Paelat muwrai mirpok jile tevi Iesu, ko eivare olwi van ji m̄eri Isrel e nir. Ko owrai tevir, “Inu sete nulesi nanu nga m̄isij rragrag san renge ni. <sup>39</sup> Ko nanu san. Evi pa murrun se kami nga re sia jille re daron ne nanen ne asien, inu bemarkonge jinibb nga m̄ilik renge naim ne nekaijen san nga kammerreni pivel sisarow. Ko ngok kami kammarong nga inu bemarkonge Numal se m̄eri Isrel nir pivel sisarow?”

<sup>40</sup> Ko nir arkail lengleng arwera “Ejki rres nawon, kem sete nammerreni m̄erel! Kem nammerreni Barapas.” Ko Barapas nen evi m̄er nga mivi jinibb venao, ko mok-revrevji pinpini jinibb.

## 19

<sup>1</sup> Ko Paelat ela Iesu tevi jinibb nuval nir, ko arvirrvirrali. <sup>2</sup> Ko jinibb nuval nir arla dil moku ko arjali erpe nuvan se Numal san, ko arlingi renge batun ori. Ko arla sunsun nga musongsong mupongpong m̄irres ko arloli ori. <sup>3</sup> Ko armomori jin ko arkerkerasi, arwerai tevi “Nik kuplik pipriv, Numal se m̄eri Isrel nir!” Ko arwuje non.

<sup>4</sup> Ko Paelat eivare kele vini ji delung nir ko owrai tevir, “Kaplesi, beptei tweni le pa vini vare e ji kami, ko kaprongwos mae nga inu sete nutor sweri nanu nga m̄isij san renge ni nga puloli inu bospe suri ni rengen, ejki.” <sup>5</sup> Ko Iesu eivare vini vare e, ori nuvan nen nga marjali renge dil moku mirpe nuvan se numal san, ko ori sunsun nga musongsong. Ko Paelat owrai tevir, “Niko m̄ernen le ngel.” <sup>6</sup> Ko daron nga batu jinibb ne sulsulen nir ko jinibb nuval nir marlesi ko arkail mare, arwera “Kuprruloni ni renge nai pelaot! Kuprruloni ni renge nai pelaot!” Ko Paelet owrai tevir, “Kaptekai ni kapiel tevi, ko kami vajin kaprruloni renge nai pelaot. Inu sete nulesi on renge nanu san nga bospe suri ni rengen.”

<sup>7</sup> Meri Isrel nir arwera lweni tevi Paelet, arwera “Kem nesereien se kem otoa, ko nesereien nen owrai ni orongwos pimij ko wor!” Suri ni lweni elngi ni evi Atua natun.”

<sup>8</sup> Daron nga Paelat murngre mirpel, ko ni ea-metutu lengleng kele e ko. <sup>9</sup> Ko olwi van renge loloim sen kele e, ko osusi tevi Iesu, “Nik kuvi m̄eri ngabe le?” Ko Iesu sete owra lweni nanu san tevi ni.

10 Ko Paelat owrai kele tevi ni, “Sete kumawera nanu san tevik? Sete kurongwose nga inu derteren suk otoa nga bololi nik kupiel sisarow, ko borroloni nik renga nai pelaot?”

11 Ko Iesu owrai tevi, “Nik derteren som easi inu suri Atua kobbong elai tevi nik. Ko m̄er nga m̄ilai inu vini jim, ni ko ma on renga nololien nga m̄isij p̄er̄p̄er milep.”

12 Ko daron nga Paelat murnge nale ngel, ko epejpej sel kele san nga puloli Iesu pivel sisarow rengen. Ko m̄eri Isrel nir arkail van jin: “Poru kuploli ni pivel sisarow, ngok eviseni nga nik sete kuve se Sisa. Si nga m̄ilngi ni lweni mivi numal, ni evi devje nuval se Sisa ko vajin!”

13 Ko daron nga Paelat murnge nale ngel e nir, ko olwi van loloi e, ko etkai tweni Iesu eivare, ko ean re lat san nga martuwe mivi nawot (nga nale se m̄eri Isrel nir marwera nisen Gapata e), ko esakel renga nai seksakel nga mok-sakel ren daron nga mok-wera suri lat nga puto suri tevi jinibb nir. 14 Evi levial vajin renga nabong nga pareseser tera nanen ne asien e, mete nial engavöl drromon eru; ko Paelat owrai tevi m̄eri Isrel nir owra “Ni le, Numal se kami!”

15 Ko nir arkail van mare arwera “Kuppitei tweni, kuppitei tweni, kuprevji pini renga nai pelaot!”

Paelat owrai tevi nir, “Erpe, kami kammerreni inu berevji pini numal se kami renga nai pelaot?”

Ko batu jinibb ne sulsulen nir arwera “Numal se kem ejki ko ngok, Sisa ko ma!”

16 Ko Paelat elinglingi Iesu tevi nir vajin, p̄arevji ko parruloni renga nai pelaot.

#### *Iesu aruse orrul renga nai pelaot*

17 Ko arpitei tweni Iesu evel, owosi nai pelaot sen van renga botwen san nga marveruse nisen miwaji bongur (renga nale se m̄eri Isrel nir arveruse Kolkota).

18 Nir arruloni ni iok renga nai pelaot; ko nuru eru kele orpitevi, san renga devjen rres ko san renga devjen mair, ko Iesu renga liven. 19 Paelat oli nale sopor, ko elngi renga nai pelaot se Iesu. Areve erpel, ‘Iesu ne donasret Numal se m̄eri Isrel nir.’

20 Ko m̄eri Isrel elep areve nale nen, suri lat nga marruloni Iesu ren oto mori Jerusalem bbong. Aruli nale ngok renga nale se m̄eri Isrel nir, ko nale se m̄eri Rom nir, ko nale se m̄eri Gris nir. 21 Ko batu jinibb ne sulsulen se m̄eri Isrel nir arwerai tevi Paelat, “Sete kupuli ‘Numal se m̄eri Isrel nir’ pijki, ko kupuli p̄irpel: ‘Merel owra Inu Numal se m̄eri Isrel nir.’”

22 Ko Paelat owra lweni tevir, “Sev nga moli pa puto ko pa pirpe nga moli.”

#### *Jinibb nuval artututweni sunsun se Iesu*

23 Vitunen renga jinibb nuval marruloni jile Iesu renga nai pelaot, ko arla joron nir ko artutweni sisamise nir. Arlingi meling ivij e, evsese jinibb nuval nen nir ivij. Ko arla kele sunsun nga mok-uri ore womu niben e, ko arlesi nga marloli mivi pa sansane ko. 24 Ko jinibb nuval arwerwera lululweni tevi nir, “Sete rrapr̄r̄rsi te, pijki. Kerr putuw daes suri.” Ngel puloli nale nga Naul On muwrai piplari, ‘Ko nir arlai tweni jorok ko artututwenir e, ko artuw daes nga parlesi si p̄ilai sunsun suk’. Ngok jinibb nuval nir arloli surie erpok.

#### *Iesu ko tasu sen*

25 Ko mori bbonge nai pelaot sopen, Iesu tasu sen ko tasu sen tuwan, ko Merri nga nesen se Klopas, ko Merri nesen Maktala, artur. 26 Ko Iesu emteni tasu sen ko jinibb sen nga ni mimrreni temijpale mortur, ko owrai tevi tasu sen, “Ngok evi natum.”

27 Mian ko owrai kele tevi jinibb sen nga ni mimrreni temijpale, “Ngok evi tasu som.” Ko etipatun re daron nen, ko m̄ernen emetmete erres renga naim sen.

#### *Mijen se Iesu*

28 Iesu orongwose nga lelingen ngel nanu jikle arsuw jerjer pa, ko owra (nga puloli Naul On piplari) “Nolok emesmes.”

29 Besin san oto iok, owun saute norro nga mimilali. Ko ngok arla nalum san ko arrurrngoni rengen, ko arlingi renga mavir san, ko arsareni van renga nevlul jingon nuru. 30 Ko Iesu orromji lesi norro nen beblen, ko owra “Osuw jerjer vajin.”

Ko etmarru vitan ko emij.

#### *Arjuji neli Iesu*

31 Merwomu se m̄eri Isrel nir arngoni tevi Paelat nga pimarong parbburi βela jinibb nen nir, puloli parmij e, ko parjuri twenir renga nai pelaot nir. Arwera parloli p̄irpel suri evi Praete, ko sete armerreni niber parrul jipari nabong ne Sapat. Sapat nen evi Sapat nga muon milep, suri evi Sapat ne nanen ne asien. 32 Niko jinibb nuval nen nir arini ko arbburi luwe m̄er nga murrul tevi Iesu tuwen βelan, musuw ko aran kele arbburi kele nuru tuwen kele βelan. 33 Ko daron nga marini ji Iesu vajin, ko arlesi nga emij pa osuw, ko nir setemun arbburi ni βelan. 34 Ngok nir san renga jinibb nuval ela sir sen ko ouni renga neli Iesu. Ko drra ko nuwi oseser pelari orvesane. 35 San le ngel elesi nga mirpok, ko owrai erpok ko. Orongwose nga ni ok-wera weretunen, ko owra ‘Sev nga nomok-werair ewretun. Kami kele kaposuri.’ 36 Nanu ngel nir arpelari nga nale san nga muto renga Naul On pivini piplari, nga muwra ‘Sete jin san piama-bbur.’ 37 Ko nale kele san renga Naul

On owra 'Parmeteni ni nga jinibb maruni sir rengen.'

### *Arlingi Iesu renge dubb*

<sup>38</sup> Vitunen renge nanu ngel, Josep, nga mivi mēri Armetia, ongoni tevi Paelat nga poro orongwos puwosi tweni nibe Iesu. (Josep evi jinibb se Iesu ko pa san, ko okvilvil ore, suri emtutue mērwomu se mēri Isrel nir nga martori derteren renge nir.) Ko Paelat elinglingi tevi ni. Ko evan owosi tweni nibe Iesu. <sup>39</sup> Ko Nikotemas, nga bonevis mivini ji Iesu nat nga mupong, eptevi Josep, nuru oran. Ni ela senta nga nowlin mivi nevōt ongut vesan nga markisie mir ko alos, otori tevi ni. <sup>40</sup> Nuru orwosi nibe Iesu ko ornūbe sunsun nga mimalum e mīrres tevi mir ko alos nga. Meri Isrel nir lat nga marok-loli surie ko erpuk. <sup>41</sup> Mori iok lat nga marruloni Iesu rengen, orsel ne lolnai ne olip san oto mori bbonge. Ko renge lolnai ne olip ngok nevōt bereng san nga Josep mītai nolon mutoe oto rengen, nga sete arlingi rrongvi wor jinibb nga mimij san rengen. <sup>42</sup> Ko suri evi pa nabong se mēri Isrel nir nga marok-eseser rengen ko mevinen pivi nabong nga milep ser, ko lolo bereng nen mori bbong ie, ko orwosi Iesu orlingi rengen.

## 20

### *Dubb oto kiskis*

<sup>1</sup> Daron nga Sapat ser mīasi vajin, renge Sante rorpong susu nat murrorrormalam, Merri ne Maktala emremra van renge dubb. Ko elesi nevōt nga muto ore nolo bereng mijkie, arla tweni pa. <sup>2</sup> Ko nesevin owlui luwi van ji Saemon Pita e nuru jinibb se Iesu mīnij nen nga Iesu mimrreni nen. Ko owrai tevi nuru, "O laru, arwosi tweni Numal renge dubb, ko sete rramrongwose lat nga marlingi e!"

<sup>3</sup> Ko ngok Pita ko jinibb se Iesu mīnij nen otur imare kasi nga poran porlesi dubb. <sup>4</sup> Nuru korti orwolu van; ko jinibb se Iesu mīnij nen owlui eterer easie Pita, ko ejpari womue dubb. <sup>5</sup> Ko ejjol vitan ko okluklu; ko elesi sunsun nga marmalum marres marto, ko sete ma evan lolo bereng. <sup>6</sup> Vitunen vajin Saemon Pita muwlu vitu vini. Ko ni ma etajer evan lolo bereng, ko ni kele elesi sunsun nga marmalum marres marmatur marto. <sup>7</sup> Ko elesi kalek nga marmelji batun e mīsan muto, sete oto tevi sunsun nga marmalum marres te, ejki. Arlulngi esan oto. <sup>8</sup> Mian ko jinibb se Iesu mīnij nen nga muwowomu renge dubb nen, ni kele evan lolo bereng, ko elesi ko osuri vajin. <sup>9</sup> Nuru setewor orongwose Naul On nga muwra ni pimaur luwi renge mijen. <sup>10</sup> Mian ko jinibb se Iesu nen nuru orluwi van renge ngaim e.

### *Iesu eplari ji Merri ne Maktala*

<sup>11</sup> Ko Merri ne Maktala ok-tur malum vare renge dubb, eting. Ok-ting mianan, ko ejjol vitan oklu van renge lolo dubb e. <sup>12</sup> Ko elesi anglo eru oruri sunsun nga morow raprap, orlik renge lat nga Iesu marlingi niben muto rengen, nuru tuwen renge batun ko nuru tuwen renge belan. <sup>13</sup> Ko orsusi tevi vinnen, orwera "Nesevin, kuting suri sev ko?"

"Suri nga marla tweni Numal suk, ko sete nurongwose arlingi nibeni."

<sup>14</sup> Daron nga vinnen muwra mirpel e, ko moro mīrieni vajin, ko elesi Iesu mutur. Ko sete orongwose nga evi Iesu. <sup>15</sup> Iesu osusi tevi owra "Erpese nga nik kumting? Kupej isi ko?"

Vinnen orrorrmi rrenga evi jinibb nga mok-metmete nai olip nen nir, ko owrai tevi, "Merel, poro nga nik kuwosi tweni, ko kupwowrai tevik, ko inu bean bowosi lweni." <sup>16</sup> Ko Iesu owra Merri nisen renge nale se mēri Isrel nir; ko Merri etaole ko erieni mawose, ko owra "Raboni!" (nga renge nale se mēri Isrel nir owra 'jinibb nevisvisenien').

<sup>17</sup> Ko Iesu owrai tevi "Sete kuprrul to-tonik, suri setewor nuan ji Tata. Kupluwi ma van ji tasik nir, ko kupsupe suri inu tevir, nga inu botongsa van ji mun Tata suk, ko kami Tata se kami kele, van ji mun Atua suk ko Atua se kami kele."

<sup>18</sup> Ko Merri olwi van ko owrai tevi jinibb se Iesu nir, "O, lartul! Nulesi Numal!", ko ospe suri tevir nga ni owra nanu ngel nir tevi.

### *Iesu eplari ji jinibb sen nir*

<sup>19</sup> Renge nata mirivriv ko Iesu jinibb sen nir arkorti kele. Ko metal arkikior, suri armetutue jinibb nga marlelep renge mēri Isrel nir. Ko artaole Iesu otur pelari livō jir, ko owrai tevir, "Demat piptevi kami."

<sup>20</sup> Vitunen renge muwrai jile mirpel, ko eviseni milnge nel nuru renge nevren nuru ko milnge sir renge nelin. Ko jinibb sen nir arir renge marlesi Numal. <sup>21</sup> Ko Iesu owra lweni kele tevir, "Demat piptevi kami. Erpe inu Tata okonik, ko inu kele bokoni kami vajin." <sup>22</sup> Ko daron nga muwra nale ngel e, ko owi sowin van renge nir, ko owrai tevir owra "Ngok, Nerūn On esilvi pa kami. <sup>23</sup> Poro kami kaptelasi tweni nololien se jinibb pisan, ngok Atua etlasi tweni ko pa. Ko poro sete kaptelasi tweni, ko ngok Atua sete pitlasi tweni ko."

### *Iesu ko Tomas*

<sup>24</sup> Tomas, san nga renge jinibb se Iesu esngavōl drromon eru, nga marveruse miwajie mēlew, sete eptevir renge daron nga Iesu mivini jir. <sup>25</sup> Ko jinibb se Iesu mīnij nen nir arwerai tevi ni, "Kem ma

namlesi Numal!" Ko Tomas owrai tevi nir, "Ejki ma! Poro inu sete ßelesi nel milngen reнге nevreи nuru, ko sete ßelngi bbösö nevreк reнге milnge nel nolon ko ßelngi nevreк reнге milnge sir reнге nelin, ngok sete numa-osuri."

<sup>26</sup> Mian ko reнге nabong owil arasi osuw, ko jinibb sen nir arlik korti kele reнге naim; ko Tomas eptevir vajin. Ko metali arkikior. Ko Iesu otur pelari kele livö jir, ko owra "Demat piptevi kami."

<sup>27</sup> Ko owrai tevi Tomas "Kuplingi bbös nevreи iel ko kupmeteni nevreк nuru, ko kupsareni nevreи kuplingi reнге milnge sir reнге nelik. Sete nosurien som pijkie, ko kuposuri ma."

<sup>28</sup> Ko Tomas owra lweni tevi Iesu, "Numal suk ko Atua suk!"

<sup>29</sup> Ko Iesu owrai tevi Tomas, "Nik kuosuri inu suri kumlesik? Neiren reнге nir nga sete marlesik ko marosuri wor!"

#### *Naul ngel nanu nga murongwos puloli*

<sup>30</sup> Ko Iesu ololi nelesien minij nir elep kele wor reнге no jinibb sen nir, nga sete marulir reнге naul ngel. <sup>31</sup> Ko ngel le ma nir nga molir, nulir nga kami kaposuri nga Iesu evi Mesaea, Atua natun mawos; ko reнге nosurien ngok reнге nisen, kami kapla mauren reнге.

## 21

### *Iesu eplari ji jinibb sen ebüt*

<sup>1</sup> Vitunen reнге ngel, Iesu lweni eviseni ni kele vesan tevi jinibb sen nir reнге jeli nuwito ne Taepirias (Galili). Renge sel ngel ko ni miviseni ni lweni reнге, erpel: <sup>2</sup> Saemon Pita, Tomas (nga miwajie mñew), Nataniel (ne Kena reнге Galili) ko natu Sepet nuru, ko nuru minij nen kele eru arlik korti lat sansan. <sup>3</sup> Ko Saemon Pita owrai tevir, owra "Inu bean le pa botutumun." Ko nir arwerai tevi "Nabinuk, kerr." Ko nir arivel van, ko arsa reнге drrav.

Ko mian ko reнге nata mupong nen sete arla nanu san rragrrag. <sup>4</sup> Mian ko mijpari rorpong, nat nürinrin rranu malun, ko arlesi Iesu mutur reнге jeli nuwito reнге depinan. Arlesi ma, ko setewor arongwose nga mivi Iesu. <sup>5</sup> Ko Iesu vajin erij van jir, owra "Nanwarreng nir, kamla mesal?"

Ko nir arwerai tevi, "Ejki rres!"

<sup>6</sup> Ko ni owrai tevir "Kapjuröni niva van reнге drrav devjen rres e, ko kaprevei sopor ko." Ko nir arloli erpok, arjuröni niva van ngatan reнге nuwi; ko sete epriv ko nai aron temijpal ren, ololi setemun arongwos parevei lweni, orrow ßelak.

<sup>7</sup> Mian ko jinibb se Iesu nga mimrreni nen owrai tevi Pita, "O, Numal ko ngok!" Daron nga Saemon Pita moka-runge sweri

nga muwra ni mivi Numal, ko esaro ngavilvil, ela lweni sunsun sen ko etatuwe, suri ori tweni re marevei niva; ko orow jubbul van reнге nuwi. <sup>8</sup> Ko jinibb se Iesu minij nen nir arsaro ngavilvil arevrevei niva reнге drrav vini ngaut e, suri nai owun saut reнге. Sete aruj ngasue vanu, erpe ningaw ongut vesan bbong sopon. <sup>9</sup> Daron nga maran ngaut e, ko arlesi nabb min; ko nai marmasos reнге bevla nen, ko niv sopor arto. <sup>10</sup> Ko Iesu owrai tevir, "Kapla nai ngok nga kama-lai ngok bbong sopor vini."

<sup>11</sup> Ko Saemon Pita evan ervei rrrrseni niva vini lat nga mimes e vajin, owun saute nai nga marlelep nir. Nir jijle evi ongut vesan bbulin ngavöl elim drromon itul (153). Ko ngok niva owun saute nai nir, ko sete emarrerr re ejki. <sup>12</sup> Ko Iesu owrai tevir, "Kapini kaþaan." Ko jinibb sen nir armetutu nga parsusi tevi, 'Isi le nik?' Suri arongwose evi Numal. <sup>13</sup> Ko Iesu evini ela niv ko obbur ototvir, elai tevir, ko ololi erpok kele reнге nai.

<sup>14</sup> Ngel evi vatolin le nga Iesu miviseni ni lweni tevi jinibb sen nir vitunen reнге mimaur luwi kele re mijen.

### *Iesu ko Pita*

<sup>15</sup> Daron nga maraan jile, ko Iesu osusi tevi Saemon Pita, "Saemon Jonas natun, kumrreni inu asie nanu ngel nir?"

"O-o Numal, nik kurongwose nga inu numrreni nik." Iesu owrai tevi "Kupwungani sipsip suk." <sup>16</sup> Mian ko sete epriv ko Iesu osusi varwen tevi ni, "Saemon Jonas natun, kumrreni inu?" Pita owrai lweni tevi "O-o Numal, nik kurongwose nga inu numrreni nik." Ko Iesu owrai kele tevi, "Kupwungani sipsip suk." <sup>17</sup> Ko Iesu osusi vatolin tevi ni, "Saemon Jonas natun, kumrreni inu?"

Pita ornge lengleng esij e suri Iesu owrai vatul kis tevi ni, 'Nik kumrreni inu?' Ko owra lweni tevi, "Numal, nik kurongwose nanu nga musuw ngok nir, kurongwose nga inu memrreni niki!"

Ko Iesu owrai lweni kele tevi, "Kupwungani sipsip suk. <sup>18</sup> Ko nuwretun nga nuwretun nuwrai tevi nik, Daron nga kumivi mñelak e, ko kusre totoni netatuw som, ko kuan lat jile nga musuw ngok nga kummerreni kupan e. Ko daron nga kupativi ßirtera, ko kupa-sale nevreи nuru, ko jinibb san pia-sere totkoni nuru, ko pia-pitevim van lat nga sete kummerreni kupan e." <sup>19</sup> Ngel Iesu owrai suri mijen sev nga Pita pimij reнге, pia-la nosrövien tevi Atua. Muwrai jile nale ngel, ko owrai tevi Pita, "Kupvijuri inu."

*Iesu nuru jinibb sen nga ni mimrreni milep nen*

<sup>20</sup> Mian ko Pita erieni ko elesi jinibb se Iesu nga Iesu mimmreni milep womunen, m̄er nga m̄ilik lilji Iesu renge daron ne nanen nga maraan, ko mususi tevi, “Numal, isi ko p̄itkai kerasi nik?” <sup>21</sup> Daron nga Pita m̄ilesi, ko owrai tevi Iesu “Numal, ko pirpese re m̄erel?” <sup>22</sup> Ko Iesu owrai tevi Pita owra “Poru inu bemarong ni sete mia-mij ko p̄ilik pijpari nga inu bolwi vini, ko ngok erpese renge nik? Nik kupvijurik ko wor.”

<sup>23</sup> Ko nale ngel owlu elep vajin renge kalesia, nga jinibb se Iesu ngel sete pimij te. Ko Iesu sete owrai tevi Pita nga ni sete pimij, ejki, ko owrai bbong ‘Poru inu bemarong ni sete mia-mij ko p̄ilik pijpari inu bolwi vini, ko ngok erpese renge nik?’

<sup>24</sup> Inu nuvi m̄ernen le, jinibb se Iesu nga mowra nanu ngel nir, ko moli tututweni nanu ngel nir. Ko kami kamrongwose nale suk evi werweretunen.

*Bongsi nale*

<sup>25</sup> Nanu elep nga elep kele wor nga Iesu mulolir. Poru paruli nir p̄etp̄eti, inu nurrorrmi rreknga naul nen nir parsongni iel ngatan parto p̄etp̄eti rengen puwun saute, ko sete pivter kele e, sopor parjijpon.



## Majingen se Aposol nir Batu nale nga mivsviseni lut nga parmteni naul ngel puto suri

Naul ngel, Majingen se Aposol nir, Luk oli van ji jinibb san nga nisen Teopilas. Naul ngel evi naul nga Luk muli viv- itue (nga muli wowomue evi Nospēn nga mīrres suri Iesu Kristo nga Luk muli).

Renge naul ngel, Luk ospe suri majingen se aposol nir nga Nerūin On mītkai nir re majingen nen nga partewijreni nospen sen, pītpatun Jerusalem, ko re lat jille ne Jutia, ko re Sameria, ko pian pijpari iel ngatan pētpeti (1:8).

Re naul ngel, Luk emrreni piviseni nga nir nga marosuri sete artere batu numal ne Rom nga mimetmete lat jille re daron ngok. Ko emrreni piviseni nga nanu jille nga mēri Isrel marosuri womue, nir jille arpelari re nospen nga mīrres.

Nanu nga milep san nga naul ngel muspe suri evi majingen se Nerūin On. Daron nga aposol nir marlik malum Jerusalem, ko nabong ne Pentekos evini, ko Nerūin On esilvir, ko elai derteren tevir. Ko vitunen Nerūin On eptevi malum nir nga miwilwil ser re majingen ser. Re naul ngel kele, nale sopor arto nga aposol nir marwera tweni, ko eviseni nga nale nga marwerai tweni, derteren nen otoo nga orongwose pīrieni mauren se jinibb. Ko ewilwil se kalesia nir nga parkorti lat sansan.

<sup>1</sup> Selek Teopilas, renga naul suk nga womujnen, nulul tevin nga bejiljilwer suri nanu jille nga Iesu mulolir ko nga mivsviseni kele jinibb nir renger tuwi, <sup>2</sup> mian mian mijpari nabong nga Atua mītkai van re melrin e. Ko vitunen ko mia-van mare e, ko owrai nanu sopor renga derteren se Nerūin On tevi aposol nir nga mutobbobbuer. <sup>3</sup> Ko renga nabong ngavöl ivij (40) ko ni eviseni ni tevir, nga puloli parongwose pīrres nga ni emaur luwi renga mijen. Nir arlesi, ko ni ejilwer tevir suri batun vanu se Atua. <sup>4</sup> Ko daron nga nir jille marini lat sansan, ko owrai tevir owra "Setewor kapiel lingi Jerusalem wor, ko kaptiriv mun Tata nga pilai Nerūin On tevi kami erpe merrenien nga milep san tevi kami. Niko mowra pa tevi kami nga ni ololi pa rijijen nga puloli ko. <sup>5</sup> Jon ololi baptaes renga nuwi, ko re nabong pievis kele kobbong ko kami kappaptaes renga Nerūin On."

*Iesu ean renga melrin e*

<sup>6</sup> Daron nga aposol nir marini markorti lat sansan tevi Iesu, ko arsusi tevi arwera "Ia, Numal, evi pa daron le vajin nga nik kupivi batu numal ne Isrel?"

<sup>7</sup> Ko Iesu erij welir owra "Sete evi nga kami kaprongwose daron nga nanu ngok nir parremali ren; Tata kobbong esan elngir renga ni derteren sen. <sup>8</sup> Ko Nerūin On ma pilai derteren pivini puwun saut re kami, ko kami kapsupe suri vajin inu tevi jinibb nir renga Jerusalem, renga Jutia totoklai, Sameria, ko re lat jille ne iel ngatan." <sup>9</sup> Daron nga mīrij jile mirpok, ko nir arlesi meter e nga Atua ela lweni van re melrin e. Ko nabor san etevni ore, ko setemun arlesi kele.

<sup>10</sup> Ko daron nga mian mare e ko meter oto eterter malum re melrin, ko artaole marlesi jinibb eru ortur renga jelir tevi sunsun nga marow titis. <sup>11</sup> Orwera "Suri sev kami mēri Galili ngel kamok-tur iel, kamok-kulu van mare e renga melrin? Iesu ean pa re melrin e mare. Ko ni pia-rremali luwi kele osorsan erpe nga kamlesi mian mare e."

### *Gortien se aposol nir*

<sup>12</sup> Ko aposol nir arlinglingi botwen ngok nga marveruse 'Botwen ne lolnai ne olip', arluwi van Jerusalem e. Botwen ngok oto mori bbong ngaim erpe kilomita bbong san. <sup>13</sup> Mian ko arluwi van Jerusalem e re naim nga marok-lik ren mare. Nir ngok ko niser ngel: Pita, ko Jon, ko Jemes, ko Antru ko Pilip, ko Tomas, ko Batolomiu, ko Matiu ko Jemes nga mivi natu Alpeas, ko Saemon nga bonevis mukorti tevi lartul nga marmerrēni puwir tweni mēri Rom, ko Jutas nga tata sen Jemes. <sup>14</sup> Nir ngok arok-korti tetajer renga loten tevi nesevin nir, ko Merri, tasu se Iesu kele, tevi kele tasi Iesu nir.

### *San nga pila wani milnge Jutas*

<sup>15</sup> Nabong sopor arasi ko jinibb se Numal nir ejpari ongut vesan bbulin ngavöl eru (120) arser korti renga liken ser san. Mian ko Pita otur imera ko owrai tevir, <sup>16</sup> owra "Tasik ko jujuk nir, tuwi jer Nerūin On erij renga jingo Devet, owrai tweni Jutas ngok nga mītkai jinibb nir marini marrul totkoni Iesu. <sup>17</sup> Bonevis ni okorti tevi kem, suri Iesu otobbobbue ni kele nga pīmajing tevi kem.

<sup>18</sup> "Mian ko Jutas owli dan sapon renga nevöt nga marlai tevi renga sel nga mīsij nga muloli ngok tevi Iesu. Mian ko ewajeni pa iok ko, ko depain eap ko jinen arivare. <sup>19</sup> Ko daron nga mēri Jerusalem jille nir arongwose nanu ngok, ko niko arlingi vajin ie ewaji nais ngok Akeltama, nga renga nale ser owra puwra 'Lat ne Drra.'"

<sup>20</sup> Ko Pita etajer owra “Re Naul ne Sam nir, Devet owra nale san nga muwra ‘Naim sen puto kiskis, ko sete jinibb san pilik ren.’ Ko nale minij kele san oto nga muwra ‘Erres jinibb minij san pilai wani milngen re majingen sen.’

<sup>21-22</sup> Re iok, erres jinibb san pivini puko-rti kele tevi kem nga puwrai tweni Iesu, Numal se kerr nga mimaur luwi kele reнге mijen. Ko ni pivi wor san re nir nga mipitevi kem tetajer, etipatun re daron nga Jon muspe suri murrin ne baptaes, mivini mijpari daron nga Atua mila lweni Iesu van reнге melrin e.”

<sup>23</sup> Ko nir arlingi jinibb eru. Tuwen evi Josep nga marverus kele e Basapas (ko ni nisen tuwen nen evi Jastas), ko nuru tuwen nen nisen Matias. <sup>24</sup> Mian ko nir arlot arwera “Numal Atua, nik kurongwose norrorrmien se jinibb jijle nir. Kupviseni tevi kem nuru si nen re nuru ngel nik kutobbtobbue <sup>25</sup> nga putori majingen ngel ne aposol nga Jutas nilngi kurtweni pa ko mian re lat nga mumomsawos wor re ni pian ren.” <sup>26</sup> Ko arloli nanu san erpe arwirre daes nga parlesi purrum ji nuru si nen, mian ko nise Matias ermmali. Mian ko arsusture, okorti tevi aposol esngavöl drromon san (11).

## 2

### *Nemün On ermmali jir*

<sup>1</sup> Re nabong ne Pentekos (ngok nabong ne nanen nga milep se meri Isrel nir), jinibb se Iesu nir arser korti kele lat sansan. <sup>2</sup> Ko vesan rres, drrela nanu nga milep san ermmali reнге melrin vini, erpe ling nga mitenter; ko drrelan nen osongni petpeti naim nga marlik ren loloim. <sup>3</sup> Ko arlesi nanu san arirpe lomi nabb nga maror pelpelari. Lomi nabb nen nir aror jipari nir jijle nga marlik re naim nen. <sup>4</sup> Ko Nerün On owun saute nir jijle, ko artipatun vajin nga marij reнге nale lele nga Nerün mimarong nga parij ren.

<sup>5</sup> Ko meri Isrel elep nga marok-lot arivel reнге vanu jijle nir ne iel ngatan, arini arlik reнге Jerusalem re daron ngok. <sup>6</sup> Ko daron nga marunge drrelan nen, ko delung nga milep arser korti ie. Ko nir artaol ko aririr temijpal, suri arunge vajin jinibb se Iesu nir marjiljilwer reнге nale ser mawos. <sup>7</sup> Mian ko artaol lengleng ko arwera “E weta, lartul nga marok-rij mirpok ngok arivi meri Galili kobhong! <sup>8</sup> Suri sev rramrunge marok-rij reнге nale se kerr nir mirpok? <sup>9</sup> Kerr rramiel lat lele le vini. Sopor Patia, Mitia, ko Elam. Sopor arivi nga Mesopotemia, Jutia, Kapatosa, Pontas, Asia, <sup>10</sup> Prijia, Pampilia, Ijip, ko re lat sopon ne Lipia mori Saerin, ko

Rom, <sup>11</sup> Krit, ko Arepia. Kerr sopor arivi meri Isrel mawos, ko sopor arivi jinibb ne vare nga marlot tevi meri Isrel nir. Ko rramrunge nir marok-rij reнге nale ngok nir se kerr, ko marok-werai tweni majingen ngok nir nga marlelep nga Atua mulolir!” <sup>12</sup> Mian ko nir artaol lengleng e ko norrorrmien ser esis nawone, ko setemun arongwose lat nga muto suri; ko arsususi lululweni tevir arwera, “E, lartul! Sev ko san?” <sup>13</sup> Ko nir sopor armen keraji jinibb se Iesu nir ko arwera “O, lartul ngok arminmin ko!”

### *Pita erij tevi delung nir*

<sup>14</sup> Mian ko Pita otur tevi aposol nir esngavöl drromon san ko erij reнге drrelan nga mian mare tevi delung nir, owra “Selek nir, kami nga kamivi meri Isrel ko kami nga kamlik iel Jerusalem, kapmurrong inu pirres reнге sev nga bowrai visviseni tevi kami ngel. <sup>15</sup> Kami kamrongsarr ko nga kamwera namminmin. Suri ea-ivi bbong mete nial esiw ko nga rorpong. <sup>16</sup> Ko sev nga kamlesi ngel evi ma nanu nga propet Joel muspe wowomu pae tuwi muwra <sup>17</sup> ‘Atua owra Re daron ne nabong nga vitu ne iel ngatan pia-tomori, ko inu bejivreni Nemün suk tevi jinibb jijle, nga nir para-tor sweri derteren jijle reнге. Natu kami norman ko nesevin para-ivi propet, para-werai tweni sev nga inu belai tevir. Melak se kami nir parlesi bori nga inu bea-viseni tevir, ko birterawareng se kami nir parmatur lesi bori nir. <sup>18</sup> Ko reнге nabong ngok nir, inu bea-jivreni Nemün suk reнге jinibb suk nir totoklai, norman ko nesevin, ko nir para-werai tweni nale suk nga inu bowrai tevir. <sup>19</sup> Inu bololi nanu nga marinijnj nawone nir reнге melrin mare ko re kele iel ngatan. Ngok, drra ko nabb ko nousnngi nga milep kele puto. <sup>20</sup> Womujnen nial pirieni pumot nawon, ko navöl pirieni pusongsong pirpe drra. Ko vitunen nabong suk nga mevi Numal Atua nga mean mare pia-rremali vajin. <sup>21</sup> Ko reнге daron ngok ko vajin, Numal pia-lai mauren tevi nir nga marverus van jin.’

<sup>22</sup> “Ko erres kapmurrong vajin suri sev nga bowrai suri reнге Iesu ngok ne Nasret. Atua eviseni nga nilai pa derteren sen tevi Iesu suri nanu nga marinijnj nawone nir ko nelesien nir nga Iesu muloli reнге dert-eren se Atua. Kami kamrongwose erres nanu ngok nir, suri arpelari iel bbong re liven ne kami. <sup>23</sup> Ko oto pa re norrorrmien se Atua osuw nga ni mimreni pilngi Iesu reнге nevre kami. Ko kami vajin kamtor pini, suri kamloli jinibb nga marsij nir arwuse re nai pelaot. <sup>24</sup> Ko Atua ololi emaur luwi kele reнге mijen, ko ololi evel

sisarow renge derteren nen. Ko mijen sete derteren nen evter rrag rrag nga purrul totkoni Iesu, <sup>25</sup> suri Devet owrai nale san suri, owra 'Tetajer nulesi Numal elik mori tevik, ko oklik re nelik nga sete mea-metutu rragrrag. <sup>26</sup> Ko renge iok, nolok p̄ir temijjal; ko nale suk kele, neiren oto renger, ko nolok sete pivitan. <sup>27</sup> Suri Numal sete mia-marong nga nerñik pimij pin. Nuvi wor se ni nga muon le, ko sete mia-marong nga nibek pumutmut renge dubb, suri nuvi jinibb nga mon re majingen sen. <sup>28</sup> Kuviseni pa sel ne mauren nir osuw tevik, ko kuloli nuir nga komok-lik mori inu.'

<sup>29</sup> "Selek nir, evi norrorrmien nga musorsan nga bospe suri apu se kerr ngok Devet tevi kami. Emij ko pa ko artevni, ko dobbin oto malum iel. <sup>30</sup> Ko evi propet san, ko orongwose nga Atua ololi pa rijrijen san tevi nga sete mia-tor otvi. Owrai pa tevi nga nir san re metka sen mawos ngok nabong sapon pia-ivi batu numal pirpe ni. <sup>31</sup> Devet elesi nanu nga Atua pia-loli, ko niko ospe suri Mesaea nga pia-maur luwi re mijen. Nale sen erpel: 'Atua sete elinglingi renge dubb nga niben pumutmut.'

<sup>32</sup> "Kerr jikle rramlesi nga Atua ololi Iesu nen emaur luwi kele. <sup>33</sup> Iesu ean pa mare e nga mlilik vajin tevi Atua Tata sen renge nevren rres, ko Atua elai Nerñin On tevi, erpe nga ni nr̄irijrij pae musuw. Ko Iesu kele ejivreni Nerñin renge kem, ko ngok vajin lelingenok kamlesi ko kamrunge. <sup>34</sup> Devet sete ean renge melrin. Ko ni bbong owra nale ngok nga muwra 'Atua owrai tevi Numal suk owra Kupsakel re devjek rres, kuptiriv <sup>35</sup> nga inu belngi devje nuval som nir parirpe nanu san nga kupbbot ren.' <sup>36</sup> Re iok, erres nga kerr m̄eri Isret totoklai nir rraprongwose p̄irres nga ewretun nga Atua mlilai Iesu ngok nga womu kamwuse re nai pelaot, ko ni ololi evi Numal ko Mesaea se kerr vajin."

#### *Nir elep arosuri Iesu*

<sup>37</sup> Daron nga jinibb nir marunge jile nale ngok, ko arunge erpe ojuji lenglengen nolor. Ko arsusi tevi Pita ko aposol m̄inij kele nir arwera, "E, selek nir, kem nabloli pirpese nga nablesi mauren?"

<sup>38</sup> Pita owra lweni tevior owra "Kami kaprieni ko wor norrorrmien se kami suri nololien se kami, ko kami jikle kappaptaes renge nise Iesu Kristo, nga puloli Atua p̄itlasi tweni nololien se kami. Ko Atua pia-lai vajin Nerñin On ngok tevi kami. <sup>39</sup> Suri rijrijen ngok evi se kami, ko tevi natu kami kele nir. Ko evi se kele jinibb jikle nir nga Atua piveruse nir, poro arlik ngabe ngabe."

<sup>40</sup> Ko Pita owra visviseni nanu elep nga pirvei norrorrmien ser. Mian ko owra "Nuwrai eterter tevi kami nga kapwolu lingi lolaren nga pivini renge dul nga marsij ngel nir." <sup>41</sup> Ko re daron ngok ejpari nuvasngavöl nuvatul (3000) nga marosuri nale ko marpaptaes.

#### *Mauren se nir nga marosuri vajin Iesu*

<sup>42</sup> Ko nir arlai daron ser elep vajin nga martor sweri norrorrmien nga marmerr ji aposol nir; ko arirpe vajin niaken sorsan nir. Tetajer araan korti ko arlot korti. <sup>43</sup> Ko Atua emajing vajin rruurngi aposol sen nir re nanu elep nga marinijnin nawone nir ko nelesien nir, ko jinibb nir aririr temijjal suri. <sup>44</sup> Jinibb jikle nga marosuri arok-korti kemkam̄e, ko arok-vijngeni lululwenir kele re nanu jikle nga marto jir. <sup>45</sup> Nir arwulwule joror nir ko arlai nevöt nen, artutweni tevi nir si nga mumrole nanu san. <sup>46</sup> Nabong jikle arok-korti lat sansan, loloim re Naim On. Arok-aan kokorti renge naim sisamis, renge nolor nga marir ko maran ngatan. <sup>47</sup> Nir arok-surövi Atua, ko jinibb kele nir artorir. Ko nabong jikle Numal ololi jinibb kele sopor arlai mauren ko arini arkorti kele re gortien ser vajin.

### 3

#### *Mer nga belan m̄isij otur imera evel*

<sup>1</sup> Nabong san renge daron ne loten, evi mete nial itul rivriv, ko Pita ko Jon oran renge Naim On. <sup>2</sup> Ko jinibb san sete orongwos pivel, suri daron nga m̄iak e evi naroj. Nabong jikle selen nir arwosi vini ko arlingi re roro metali san ne Naim On nga nisen Metali nga m̄irinrin m̄irres. Ko okngoni nevöt ji nir nga marok-asi van loloim ngok. <sup>3</sup> Mernen elesi Pita ko Jon orini nga poran loloim, ko ongoni nga porlai nevöt sapon tevi. <sup>4</sup> Ko nuru orkulu mawos ni ormeteni, ko Pita owra "Kupmeteni komru!" <sup>5</sup> Mian ko oklu van ji nuru, orrorrmi nga p̄ilai nanu san ji nuru. <sup>6</sup> Ko Pita owrai tevi owra "Nevöt san ejki rragrrag jik, ko nanu ma san oto jik nile belai tevim. Renge nise Iesu Kristo m̄eri Nasret ngok, nuwrai tevim, kuptur imera ko kupiel!" <sup>7</sup> Mian ko orrul totkoni nevren rres ko ervei nga putur. Ko vesan rres nau re belan ko bbujin belan arres luwi, <sup>8</sup> ko otur imera kasi ko evivel. Ko evivitu suri nuru aran loloim re Naim On. Evel ko orowrow belan, osrövi vajin Atua. <sup>9</sup> Ko jinibb arlesi vajin nga ni mok-rowrow belan nuru ko mok-surövi Atua. <sup>10</sup> Ko daron nga marlesi wose nga mivi naroj nga tetajer mok-ngoni nevöt vare renge metali nga m̄irinrin m̄irres, ko nir artaol lenglengen suri nanu ngok nga m̄irrmali jin.

*Pita ejililwer tevi jinibb nir re Naim On*

<sup>11</sup> Mernen orrul totoni Pita ko Jon renga naim san nga mutur re jeli Naim On nga marveruse Naim Salsal se Solomon. Ko jinibb nir artaol lenglengen ko arwolwolu vini jir. <sup>12</sup> Ko daron nga Pita mulesi delung milep marini marsar rrale, ko owra "Selek nir, suri sev kamtaole nanu ngel? Suri sev kamok-meteni lenglengen kem? Kamrorromi komru nomor-majing re derteren se komru? Kamrorromi nomor-rongwos nobor-loli merel pivel suri bbong nomor-ivi jinibb nga nomor-rres?" <sup>13</sup> Ejki! Atua nga Epram, Aesak, Jekop ko Birterawarng se kerr nir elngi ni nosrovien sen tevi jinibb ne majingen sen ngok Iesu. Ni ko kami kamtekai kerasi van renga nevre meri Rom nir, ko kamtere ni daron nga mutur re no Paelet nir. Paelet kele owra puloli ni pivel sisarow, ko kami kammusus. <sup>14</sup> Kamungasi Iesu, nga muon ko mürres. Kamngoni tevi Paelet suri jinibb nga mirevji pini jinibb nga pivel sisarow, <sup>15</sup> ko kamrevji pini ni nga mitkai jinibb nir van re mauren. Ko Atua osustur lweni re mijen, kem namlesi! <sup>16</sup> Ko kaplesi naroj ngel. Derteren ne nise Iesu ko ololi derteren sen muto luwi. Nanu ngel nga kami kamlesi ko kamrongwose, nomor-loli suri nomor-osuri Iesu nisen. Niko nosurien ngok ko renga Iesu ko ololi merel mürres jile luwi, erpe nga kami jikle kamok-lesi vajin.

<sup>17</sup> "Ko selek nir, nurongwose nga sev nga kami tevi merwomu se kami nir marloli tevi Iesu, kamloli suri sete kamrongwose sev nga kamloli. <sup>18</sup> Ko ngok evi sel se Atua nga puloli nale nga muwrai tweni tuwi pa parremali. Renge nale se propet sen nir, owrai tweni pa osuw nga Mesaea pia-runge pisij, ko lelingenok otori totkoni rijrijen sen ngok. <sup>19</sup> Ko erres vajin nga kaprieni lululweni norrorrmien se kami suri nololien se kami, ko kapan ji Atua nga ni pitlasi tweni nololien se kami. Poro kaploli pipok, ko <sup>20</sup> daron nen pivini vajin nga Numal pia-lai derteren nga mimerr ko mürres tevi kami. Ko ni pukoni Iesu vinuk nga mivi Mesaea se kami nga ni mutobbobbue musuw. <sup>21</sup> Ko Iesu pilik mun re melrin puwomu pianan pijpari nanu jikle parmerr luwi kele, pirpe nga Atua muwrai tweni pa musuw re nale se propet sen nga maron ne tuwi. <sup>22</sup> Suri Moses owra 'Numal nga mivi Atua se kami pukoni san vini ji kami nga pia-ivi propet, osorsan erpe nga mukoni pa inu. Ni pivi san re kami kobbong. Kapvijuri ko wor pirres nanu jikle nga pia-werai tevi kami. <sup>23</sup> Jinibb nga sete mivijuri nale se propet ngok, ko Atua pia-lai tweni renga gortien sen ko puloli pijjiki.' <sup>24</sup> Ko Samuel kele tevi

propet minij nen nir nga marvitu suri arok-supsupe kele suri sev nga mürmali pa lelingenok. <sup>25</sup> Rijrijen nga Atua mlilai tevi Birtera se kerr nir tuwi arivi se kami, ko kami kamkorti pa renga rijrijen nen nir. Nale nga Atua muwrai tevi Epram owra 'Rurrngi renga nik metka som nir nga para-vini, inu berij pirres suri jinibb totoklai ne iel ngatan.' <sup>26</sup> Niko Atua otobbobbue jinibb ne majingen sen ko okoni womue vini ji kami. Suri Atua emrreni pirij pirres suri kami ko puloli kami jikle kaprieni lululweni kami renga sel nga marsij se kami."

#### 4

<sup>1</sup> Pita nuru Jon orok-rij malum tevi delung nir, ko jinibb ne sulsulen nir tevi merwomu se jinibb nir nga marok-metmete Naim On tevi Satusi nir arini ji nuru. <sup>2</sup> Arlolarsi nuru suri mor-visviseni delung nir, arwera Iesu emaur luwi kele re mijen, ko ngok niko ololi nga jinibb nir nga marmij arongwose parmaur luwi re mijen. <sup>3</sup> Ko arrul totoni nuru ko arlingi nuru re naim ne nekaien pijpari mevnen, suri rivriv jer pa. <sup>4</sup> Ko nir elep nga marunge nale se nuru ko arosuri. Ko norman nga marlelep nir nga marosuri oruj mori nuvasngavöl nuvalim (5000) sopen.

*Pita nuru Jon ortur re kot*

<sup>5</sup> Mevnen vajin ko jinibb nga marlelep nir se meri Isrel nir ko Birterwarng ser nir ko jinibb nevisvisenien ne nale neserrien nir arkorti Jerusalem. <sup>6</sup> Arkorti tevi batu jinibb ne sulsulen, nga nisen Annas, ko Kaeapas, ko Jon, ko Aleksanta, ko nir minij nen kele nir nga marivi metka se batu jinibb ne sulsulen. <sup>7</sup> Ko arlingi nuru ortur re liven ne nir, ko arsusuri tevi nuru, arwera "Re derteren se siko rreknga re nise siko komor-loli nanu ngok ren?"

<sup>8</sup> Ko Pita owun saut e Nerin On, ko owrai tevir owra "Kami jinibb nga marlelep nir se kerr meri Isrel nir ko Birterwarng nir, <sup>9</sup> kamok-susie komru erpese re majingen nga mürres ngok nga nomor-loli renga naroj ngel, erpese Belan erres luwi. <sup>10</sup> Erres kami ko meri Isrel jikle nir kaprongwose nanu ngel: nomor-loli re nise Iesu Kristo doNasret, nga kami kamtor pini re nai pelaot, ko Atua ololi emaur luwi re mijen. Niko re ni nisen ko, merel mürres luwi pa mutur re no kami ngel. <sup>11</sup> Iesu ngel evi mer nga Naul On muspe suri, ngel: 'Nabur nga kami jinibb nga marmajinge naim kamlesi esij ko kamwirre, evi vajin nabur nga murrul totoni naim mäterter.' <sup>12</sup> Ko sete san kele orongwos pila mauren tevi kerr, ejki. Suri

nais p̄et̄p̄eti ne iel ngatan nir san ejki kele nuru nga kerr rrapmaur ren.”

<sup>13</sup> Ko daron nga marlesi Pita nuru Jon sete ormetutu mirpok ko artaole, suri nuru orivi jinibb nawon, ko sete arsesre p̄elak nuru bonevis. Ko arlesi wose vajin nga morok-pitevi Iesu. <sup>14</sup> Ko sete arongwos parwera mun nanu san tevi nuru ren, suri marlesi bbong m̄er nga n̄irres luwi jile pa mutur tevi nuru. <sup>15</sup> Ko arkoni twenir ivare lingi gortien ser, ko nir kis arsan vajin armurri suri. <sup>16</sup> Ko arwerwerai tevir, “Rraploli sev tevi jinibb ngel nuru? Suri nir jijle nga marlik iel Jerusalem arongwos pae nanu nga milep nga morloli. Sete rramrongwos rrapvilvil ore mun. <sup>17</sup> Ko nga rraplor ore, setemun p̄iasasi kele van ji m̄eri Isrel p̄et̄p̄eti nir, rrapusus metu tevi nuru nga setemun porsuḡe kele nais ngok tevi jinibb san.”

*Arlinglingi tweni nuru orivel sisarow vajin*

<sup>18</sup> Ko arverus nuru vajin vini. Ko arwera eterter tevi nuru nga setemun porsuḡe ko setemun porvisviseni kele nise Iesu, pijki. <sup>19</sup> Ko Pita nuru Jon orwera lweni tevir: “Erpese? Erres re no Atua nga nobor-vijuri nale se kami, rreknga nobor-vijuri nale se Atua? Erres kami kaprunge suri kami tevi. <sup>20</sup> Ko komru ma, sete nomor-rongwos nobor-lingi kurtweni sev nga nomor-lesir ko sev nga nomor-runger. Ejki, nobor-wera twenir ko wor.” <sup>21</sup> Ko mian ko artortori nuru eterter kele sopon, ko arlinglingi tweni nuru vajin, orivel. Sete arongwos partor sweri sel san nga partor alje nuru ren, suri delung nir arlesi sev nga morloli erres p̄elak, ko arsurōvi Atua rengen. <sup>22</sup> Suri m̄er nga nanu nga milep ngok miplari ren nga morloli m̄irres nen evi jinibb tera pa sopon, sian asi ngavōl ivij (40).

*Loten se kalesia nir*

<sup>23</sup> Orivel sisarow vajin, ko ormauos kele kalesia nir sopon, ko orwera tweni nanu nga batu jinibb ne sulsulen nir ko b̄irterwarreng nir marwerai tevi nuru. <sup>24</sup> Ko kalesia nir, daron nga marunge nale se nuru ngok, ko arlot korti van ji Atua, arwera “Numal nga mian mare, nik nga kummajing melrin ko iel ngatan ko dis ko nanu jijle nga marto rer. <sup>25</sup> Renge derteren se Neñin On kurij rrurrngi renge Devet apu se kem, nga mivi jinibb ne majingen som, re nale ngel: ‘Suri sev jinibb ne vare nir arlolar p̄elak erpok? Suri sev armurri nanu nga marsij, nga sete marongwos parivi nanu san? <sup>26</sup> Numal ne iel ngatan nir artur korti tera nuval, ko jinibb nga marlelep nir kele arini lat sansan tera nuval, artere Numal Atua ko Mesaea sen

nga mutobbobbue.’ <sup>27</sup> Ewretun, eplari pa erpok bonevis renge ngaim ngel mawos, nga Erot nuru Ponjes Paelat nuru tevi jinibb ne vare nir ko m̄eri Isrel nir kele arini lat sansan, arkorti artere Iesu nga mivi Mesaea som, nga kumtobbobbue. <sup>28</sup> Ko arloli bbong sev nga derteren som ko marongen som morlingi wowomu pae nga piplari. <sup>29</sup> Ko lelingenok, Numal Atua, kupmeteni suri nale ne balpalen ser, ko kuploli kem jinibb ne majingen som, no kem p̄iterter ko nabwera tweni nale som. <sup>30</sup> Ko kupsareni nevrem ko kupjipari jinibb nga puloli jinibb parres luwi, ko nga majingen nga marlelep marres nir parpelari renge nise jinibb ne majingen som nga muon, Iesu.” <sup>31</sup> Daron nga marlot jile musuw, ko narñi eterure naim nga marlik ren. Ko nir jijle arwun saut e Neñin On, ko ololi nor eterter vajin nga parwera tweni nale se Atua.

*Artututweni joror*

<sup>32</sup> Ko kalesia nir, nolor ko neñir arivi sansane. Ko setemun nir san orrorrmi joron arivi se ni esan, ko arwera joror evi se nir jijle. <sup>33</sup> Ko aposol nir arwera tweni nga Numal Iesu emaur luwi re mijen tevi derteren nga milep, ko Atua erij erres p̄elak suri nir jijle. <sup>34</sup> Ko sete nir san nevren omrrol rragrrage nanu san. Suri nir jile nga joror milep, erpe dan ko naim, ko arwulwuler, ko arlai nowli nanu nga marwulwul ngok e nir, <sup>35</sup> ko arlai tevi aposol nir. Ko nir artututweni tevi jinibb si nga nevren mumrrol.

*Banapas*

<sup>36</sup> Ko jinibb san nga nisen Josep, metka se Livae san, nga miak renge Saepras. Ko aposol nir arlingi nisen m̄inij kele san, arveruse Banapas, nga muwra puwra ‘jinibb nga moksusi nolo jinibb nir mian mare.’ <sup>37</sup> Ko re murrun ngok, ni owulwule bebje dan sen, ko ela nowlin vini ko elai tevi aposol nir.

## 5

*Ananaeas nuru Sapaera*

<sup>1</sup> Ko jinibb san nisen Ananaeas nga nesen sen nisen Sapaera owulwule bebje dan se nuru san. <sup>2</sup> Ko elngi jer nowlin sopor ojpon, ko elai sopor bbong vini tevi aposol nir. Ko nesen sen kele orongwose sev nga muloli ngok. <sup>3</sup> Ko Pita owrai tevi, “Ananaeas, erpese Demij musongni nolom nga kumkerkerasi Neñin On, ko kumlingi jere nowli dan som sopon? <sup>4</sup> Daron nga setewor kumwulwul wore dan, ko evi som ko. Ko daron nga kumwulwul pae, ko nowlin oto re nik nevrem malum nga

kuploli sev nga kummerreni e, erres kob-bong. Ko suri sev norrrmien ne gerisen mivini muto re nolom? Sete kukrekrasi jinibb nir, ko kukrekrasi Atua kele.”<sup>5</sup> Ko Ananaeas, daron nga murnge nale sen ngok, ko eil jubbul vitan, ko emij pin. Ko nir nga marunge nanu ngel, metuen nga milep evini rer suri.<sup>6</sup> Ko mēlakel nir arnube ore, ko arwosi tweni van ko artevni.

<sup>7</sup> Vitunen vajin, erpe mete nial itul arasi, ko nesen sen evini loloim. Mivini ko sete orongwose sev nga miplari ji diwen sen.<sup>8</sup> Ko Pita owrai tevi, “Kupwera! ta tevik. Ngel evi nowli dan totoklai le pa nga komor-wulwule?” Ko ni owra “O-o, ngok ko.”<sup>9</sup> Ko Pita owrai tevi, “Erpese kamru korti komor-marong komor-wera kopor-rrowrrow silveni Nemīn se Numal? Kuprunge dan βela nir nga martevni diwen som arini pa roro metali, ko parwosi tweni nik kele.”<sup>10</sup> Ko vinnen eil jubbul evesane ngatan renge Pita βelan, ko emij pin. Ko mēlakel ngok nir arini loloim, ko arlesi nga ni mimij pa; ko arwosi tweni ivare, ko aran artevni tevi diwen sen.<sup>11</sup> Ko metuen nga milep evini renge kalesia jijle nir suri, ko renge nir jijle nga marunge.

*Majingen nga marinijnij nawone nir*

<sup>12</sup> Ko aposol nir arok-loli majingen nga marinijnij nawone nir elep tevi jinibb nir. Ko nir jijle arkorti renge naim salsal se Solomon nga muto ore Naim On.<sup>13</sup> Jinibb jijle nir arsurōvir, ko nir jijle nga sete marivi kalesia armetutu nga paran parkorti tevir.<sup>14</sup> Ko gortien ne kalesia nir nga marok-osuri Numal, ngok norman ko nesevin nir, okruj van mare tetajer.<sup>15</sup> Suri nanu ngok nir, ko jinibb nir arwoswosi jinibb nga marmesi nir vini re sel nir, ko arlingi nir sopor re maling, ko nir sopor renge boriti nga marpelsenir. Armerreni nga poro Pita piasī, ko poro bbong nemīn pīsal van pijpari nir sopor.<sup>16</sup> Ko delung elep ne nir nga marlik renge ngaim wowarung nga marto rrale Jerusalem kele arwoswosi jinibb nga marmesi vini, tevi nir nga nemīn nga marsij marsisilvir; ko nir jijle arres luwi.

*Arloli esij tevi aposol nir*

<sup>17</sup> Ko batu jinibb ne sulsulen, ko nir nga markorti re gortien sen, nir ngok ko Satusi nir, nolore eleplep temijpal. Ko artur imare,<sup>18</sup> ko arrul totoni aposol nir, ko arwirrer van re naim ne nekaiēn.<sup>19</sup> Ko anglo se Numal san evini nat mupong, ko etasi metali ne naim ne nekaiēn ko eptevi twenir ivare. Ko owrai tevir:<sup>20</sup> “Kapan kaptur renge Naim On ko kapwera tweni pētēpeti nale ngel ne mauren tevi jinibb nir.”<sup>21</sup> Ko daron nga marunge nale

ngok musuw, mian ko nat ea-rinrin rranu vajin, ko arini re Naim On, ko artipatan arvisviseni jinibb nir.

Mian ko batu jinibb ne sulsulen tevi gortien sen nir arververus kortoni gortien nga milep se Bīrterwarung nir nga marwowomue mēri Isrel nir arini lat sansan. Ko arkoni jinibb ser sopor paran re naim ne nekaiēn ko parpitevi aposol nir parini.<sup>22</sup> Ko daron nga jinibb nen nir maran, ko sete arlesir re naim ne nekaiēn. Ko arluwi vini jir kele, ko arwera arwera<sup>23</sup> “Daron nga namjipari naim ne nekaiēn, ko namlesi metali nen arkikiore erres pēlak, ko lartul nga martur metmete artur metmete erres rengo roro metali. Ko daron nga namtasi metali vajin, ko sete namlesi jinibb san loloim.”<sup>24</sup> Ko daron nga batu jinibb nga mok-metmete Naim On tevi batu jinibb nga marsulsul nir marunge nale ngok, ko norrrmien ser ekarkar, ko arrelenge sev ko eplari jir.<sup>25</sup> Mian ko jinibb san evini ko owrai tevir, “E lartul! Jinibb ngok nir nga kamlingir re naim ne nekaiēn artur lelingenok re Naim On ko arok-visviseni jinibb nir.”<sup>26</sup> Ko batu jinibb nga mok-metmete Naim On eptevi jinibb sen sopor aran ko arpitevi twenir. Ko sete aron tertere nir, suri armetutue delung nir tartuwtuwer e nevōt.

<sup>27</sup> Arpitemir van ko arloli artur re no gortien ser. Ko batu jinibb ne sulsulen erij tevir, owra<sup>28</sup> “Namwera! pa eterter tevi kami nga sete kami kapvisvisenir rengo nais ngok. Ko erpese? Kamloli iel Jerusalem owun saute nevisvisenien ngok! Ko rrek kammerreni kaploli drra Iesu pibbōlji kem!”

<sup>29</sup> Ko Pita tevi aposol nir arwera lweni tevir: “Nabosuri wor Atua ko womu ne jinibb.<sup>30</sup> Numal se tata se kerr nir lolli Iesu emaur luwi re mijen, nga kami kamrevji re nai pelaot.<sup>31</sup> Atua elngi ni esakel mare re nevren rres, nga ni puwomu re kerr ko pīla mauren tevi kerr, nga kerr mēri Isrel nir nolo kerr purongwos pulululwi, ko nga pītasi tweni nololien se kerr.<sup>32</sup> Ko kem namok-rij sen rengo nanu ngel nir, tevi Nemīn On nga Atua mīla tevi nir nga marosuri ni.”

<sup>33</sup> Ko daron nga nir nga markorti ngok nir marunge nale ngok, ko arlolar lengleng ko arwera parevji pinir.<sup>34</sup> Ko Parasi san nga mok-korti tevir rengo gortien ngok, nisen ko Gameliel, evi jinibb ne nevisvisenien ne nale ne neseseien san nga jinibb jijle nir arsurōvi ni. Ko ni otur imare ko owra partekai tweni mun aposol nir van vare e beblen.<sup>35</sup> Musuw, ko owrai vajin tevi selen nir, owra “Meri Isrel nir, rraprrormi pīrres pēlak ko wor re sev nga rramwera rraploli tevi lartul ngok nir.

<sup>36</sup> Suri rramrongwose bonevis sopen, san otur imare, nisen ko Tutas. Ni elngi lweni ni evi jinibb san. Ko jinibb elep sopen, ejpari ongut vavij (400) sopen arpatevi. Ko mian ko mñernen arevji pini, ko jinibb sen nir arwolu sarrsarr; ko ngok evi vajin bongsi majingen sen. <sup>37</sup> Ko vitunen Jutas, mñeri Galili ko san, otur imare re daron nga marok-eve jinibb e nir. Ko ni ervei tweni jinibb sopor arvijuri ni. Ko mian ko ni kele arevji, ko nir jikle nga marvijuri ni arivel sarrsarr. <sup>38</sup> Ko ngok, re nanu nga miplari ngel vajin, nuwra bowrai tevi kami: sete rraploli nanu san tevi jinibb ngok nir. Rraplinglingir parivel. Suri poro nga norrorrmien ser ko majingen ser eplari re jinibb kobbong, ko pivitan kobbong. <sup>39</sup> Ko poro ma eplari re Atua, ko sete rramrongwos rraplokloksir. Poro pipok ko kerr rratpalpal kobbong tevi Atua." Ko nir armuronge erres.

<sup>40</sup> Ko arveruse aposol nir arini kele jir, ko artelmajir ko arwerai eterter tevir nga setemun parsupe nise Iesu; ko arlinglingir arivel. <sup>41</sup> Ko nir arivare lingi gortien ser nen ko arir kobbong nga Atua elesi nir arviter nga jinibb artelmajir suri nise Iesu. Ko sete armanun rragrage. <sup>42</sup> Ko re nabong ko nabong, sete armosi nga parvisviseni ko parwera tweni nospen nga mñirres suri Iesu nga mivi Kristo nga Atua mutobbobbue, renge Naim On, ko renge naim nir.

## 6

*Arlingi jinibb ebut parmajing tevi kalesia nir*

<sup>1</sup> Jinibb se Iesu elep malum arini. Ko mian ko laten san eplari jir. Renge devjen evi mñeri Isrel nga marok-rij nale se mñeri Gris nir, ko renge devjen evi mñeri Isrel nga marok-rij nale ser wor. Ko nir re devjen nga marok-rij nale se mñeri Gris nir artere nir re devjen, arwera sete armeteni suri nesevin ser nir erres re daron nga martututweni nevöt ko nanen nabong jikle tevi nesevin nir nga diwen ser marmij lingir. <sup>2</sup> Ko aposol esngavöl drromon eru arverus kortoni kalesia jikle nir, ko arwerai tevir: "Sete erres re nga kem nablinglingi kurtweni majingen ne nale se Atua ko nabpelak nga nabmetmete nevöt. <sup>3</sup> Ko niko, niaken se kem nir, kaplingi jinibb piebut re kami nga jinibb nir martorir, ko nga marwun saute Nemñin On ko norongwosien, ko kem nablingi nir parla majingen ngel. <sup>4</sup> Ko kem ma, nabmajing tetajer renge majingen ne verusen ko ne nale se Atua."

<sup>5</sup> Ko kalesia jikle nir arlesi nale ser ngok erres, ko arlingi Steven, jinibb san nga

muwun saute nosurien ko Nemñin On, ko Pilip, ko Prokoras, ko Nikeno, ko Timon, ko Pamenas, ko Nikolas nga mivi mñeri Antiok san, nga womu evi jinibb ne vare san ko vitunen ea-korti vajin tevi mñeri Isrel nir ko oklot tevir. <sup>6</sup> Ko kalesia nir arpatevi nir ngok, arlingir artur re no aposol nir, ko nir arlot ko arlingi nevrrer.

<sup>7</sup> Ko nale se Atua ok-asasi, ko jinibb se Iesu nir nga renge Jerusalem elep temijpal malum arini, ko delung elep ne jinibb ne sulsulen nir arosuri kele.

### *Arrul totoni Steven*

<sup>8</sup> Steven ngok evi jinibb san nga Atua mñirij mñirres suri, ko elai derteren nga milep tevi. Ko ololi majingen nga marini-jnij nawone nir re no jinibb nir. <sup>9</sup> Ko sete epriv, jinibb sopor artur imare ko artere. Nir arivi jinibb ne naim gortien san se mñeri Isrel nir nga bonevis marivi pa demij maur, ko lelingenok arivel sisarow vajin. Ko niko arverus naim gortien ser, arwera 'Naim gortien se nir nga marivel sisarow'. Nir ko arivi mñeri Isrel nga marivel Saerin ko Aleksantria vini. Ko mñeri Isrel sopor kele nga marivel Silisia ko Esia arkorti kele tevir, ko arlat tevi Steven. <sup>10</sup> Ko Nemñin On ololi Steven norongwosien sen elep, ko daron nga mñirij e, nir sete arongwos parasi ni re rijen sen. <sup>11</sup> Mian ko arkonkoni silveni jinibb sopor nga paran parwerai, "Namrunge pa ni erij esij tere Moses ko tere Atua." <sup>12</sup> Arok-rij erpok mian, ko arserranu re nolo jinibb nir ko firterwarreng nir ko jinibb nevisvisenien ne nale neseseien nir; ko nir vajin artur imare ko aran arrul totoni Steven, ko arevei van re naim gortien se numal ser nir. <sup>13</sup> Ko arlingi jinibb sopor partur ko parij re nale gerisen ser. Ko lartul nen arwera "Merel okrij tetajer tere Naim On ko tere nale neseseien se Atua. <sup>14</sup> Ko namrunge ni owrai Iesu ne Nasret ngok pulokloksi Naim On ngel ko piriien liken nga Moses mñila tevi kerr pa." <sup>15</sup> Ko nir nga marlik re naim gortien ngok armet teretre Steven; ko arlesi ni non erpe no anglo san.

## 7

<sup>1</sup> Ko batu jinibb ne sulsulen osusi tevi Steven owra "Evi weretunen ko wor?" <sup>2</sup> Ko Steven erij weli lweni owra "Tuwak ko tata nir, kapmurrong inu! Womunen ko apu se kerr ngok Epram mia-van nga pilik Aran, daron nga mñilik malum re vanu ngok Koltia nga muto re vanu nga milep ngok Mesopotamia, <sup>3</sup> ko Atua ne nosrövien eplari jin; ko owrai tevi owra "Kupiel lingi vanu som ko metka som nir ko kupan re vanu san nga bea-viseni tevim." <sup>4</sup> Mian ko Epram evel lingi vanu sen ko ean etipatun

liken sen Aran. Ko vitunen ko tata se Epram ea-mij, ko Atua ololi Epram evel oruj vini re vanu ngel nga rramlik ren lelingenok. <sup>5</sup> Ko renge daron ngok Atua sete elai rragrag bebje dan sapon tevi Epram, ejki, ko ololi ma rijrijen tevi nga pia-lai dan nir tevi. Ko owra dan nir parivi se ni tevi metka nga para-rremali renge ni. Ko daron nga muwrai ngok e, ko Epram natun ejki wore ko! <sup>6</sup> Ko ngel evi nale se Atua nga muwrai tevi, owra 'Metka som nir para-ivel lingi iok ko paran parlik renge vanu minij nga parivi demij maur ie, ko parlik renge nekaien nga miterter pijpari sia pungut pivavij (400).' <sup>7</sup> Iok ospe suri Ijip. Ko Atua owra 'Inu bea-virrvirrali nir nga marmajing ser, ko metka som nir para-ivel lingi vanu ngok ko parluwi parsurövik iel.' <sup>8</sup> Ko Atua elai murrin ne bae tevi Epram, nga miviseni nga Epram evijuri vajin sel se Atua. Natun Aesak ean re bae daron nga bongin muowil e. Ko Aesak kele ololi tevi Jekop nga milai van re bae, ko Jekop kele ololi erpok nga milai natun esngavöl drromon eru maran re bae, nir ngok nga marivi birtera se kerr ne tuwi.

*Steven ospe suri birtera ser nir*

<sup>9</sup> "Jekop natun nir nolor eleplep tevi tasir Josep, ko arwulwule nga pian pivi demij maur renge vanu ngok Ijip. Ko Atua emetmete Josep, <sup>10</sup> ko etkai lilane erres; ko ololi easi renge daron nga marteter nir nga marok-pelari jin. Daron nga Josep mivini vajin mutur re no batu numal se meri Ijip nir, ko Atua ololi norongwosien sen ean mare tevi murrin nga mirres pelak sen. Ko numal nen ololi Josep evi jinibb nga mian mare temijpal, nga pimete Ijip totoklai ko pimete majingen ne naim sen kele.

<sup>11</sup> "Sete epriv daron nga miterter san ejpari Ijip ko Kenan, nga nanen ejki. Ko birtera ngok se kerr nir arunge esij lengleng suri nanen ejki. <sup>12</sup> Ko daron nga Jekop murnge nga nanen muto Ijip, ko okoni natun nir, birtera ngok se kerr nir, aran. Ngok evi womujnen nga mara-van rrongi ie. <sup>13</sup> Ko renge daron minij kele nga maran, ko Josep eviseni ni limjer vajin tevi tuwan nir, ko numal se meri Ijip nir ornge jilweren suri metka se Josep nir. <sup>14</sup> Mian ko Josep elai nale van ji tata sen Jekop nga pipete metka sen nir parini parlik Ijip. Renge gortien ngok nir ejpari ngavöl ebut drromon elim (75) renge nir totoklai. <sup>15</sup> Ko Jekop tevi birtera ngok se kerr nir ne tuwi arivel lingi lat nga marlik e ko aran arlik Ijip; ko arlik ie ejpari daron nga mara-mij e. <sup>16</sup> Ko arwosi lweni niber van Sekem e, ko artevnir lat nga marok-tivtavin e san

nga Epram muwli tweni pa tevi metka se Amoro nga renge vanu ngok Sekem.

*Steven ospe suri Moses*

<sup>17</sup> "Ko daron evini mori vajin nga Atua puloli rijrijen sen ngok nga milai pa tevi Epram pirrmali. Renge daron ngok, metka se birtera se kerr ngok nir arvasus ko emaur elep kele.

<sup>18</sup> "Ko eanan ejpari nga jinibb minij kele mivi batu numal kele ne Ijip, nga sete murrormi tutune Josep. <sup>19</sup> Osur terter ko ekrekrasi birtera ngok se kerr nir, ko osulngatir nga parwosi tweni bipi ser nir renge naim ser ko parling twenir vare nga parmij. <sup>20</sup> Ngok evi daron mawos nga bipi nga mirres pelak ngok Moses miak ren. Tata sen ko tasu sen ormetmete erres renge naim ser ean ejpari navöl itul, <sup>21</sup> mian ko orlingi tweni vare erpe nga neseseien se batu numal muwrai. Mian ko natu numal nesevin eskai, ko otori tweni ko emetmete, ko elai erpe natun mawos vajin. <sup>22</sup> Arvisviseni renge norongwosien se meri Ijip nir, ko evini evi jinibb nga milep renge rijen ko re majingen kele.

*Moses ololi lesi nga piwilwil se meri Isrel nir*

<sup>23</sup> "Daron nga Moses sian mijpari ngavöl ivij (40) ko orrorrmi wor nga pian pilesi otvi lat nga meri Isrel nir liken ser muto suri. <sup>24</sup> Mian ko elesi meri Ijip san nga mirevji jinibb nga nir san; ko ean erevji pini meri Ijip nen. <sup>25</sup> Ni orrorrmi metka sen nir parongwose nga Atua pimajing rurrngi ni nga puloli nir parivel sisarow. Ko nir sete arongwose. <sup>26</sup> Ko mevinen kele, elesi meri Isrel eru orpalpal, ko evan nga pijnge nuru. Ko owra "E, erpese komor-ivi niaken bbong, ko komor-palpal lululweni kamru mirpok?" <sup>27</sup> Ko wela nga mokloli misij tevi nuru tuwen osoni tweni Moses ko owrai tevi owra "Erpese, si elngi nik nga nik kuptur womue kem, ko nga kupwera suri lat nga puto suri tevi kem? <sup>28</sup> Rrek kumrreni kuprevjik pirpe kumrevji pini meri Ijip ngok miniv?" <sup>29</sup> Daron nga Moses murnge nale ngok, ko owlu lingi Ijip. Ko ean elik erpe jinibb neturvitan renge vanu ne Mitian. Ko natun nuru ora-iaak ko ie.

*Moses ornge nale se Atua*

<sup>30</sup> "Sia ngavöl ivij (40) easi, ko anglo san ermmali ji Moses renge duru nai nga welili san nga min, mori botwen nga Sinae. <sup>31</sup> Moses etaol lenglengen re sev nga milesi, ko oruj van mori nga pilesi lilane. Ko etaol nga Atua erij tevi, <sup>32</sup> owra "Inu nuvi Atua se birtera som nir. Inu nuvi Atua se Epram, Aesak ko Jekop." Mian ko Moses eririr temijpal ko emtutu nga pimteni. <sup>33</sup> Ko Atua owrai tevi Moses owra "Kuplai



tweni but nga kumrae reнге nolo ßelam, suri lat nga kumtur ngok e evi lat nga muon ko. <sup>34</sup> Nulesi ko pa nga jinibb suk nga marlik Ijip nir arunge lengleng esij, ko norongwose norongen nga muto jir, ko nuruni nga ßelai twenir. Ko kupini, bokonim van Ijip.

*Meri Isrel arungasi Moses*

<sup>35</sup> “Ngok Moses nen kele kobbong nga ñeri Isrel marungasi ko marwirr nale nga muwra “Erpepe, si elngi nik nga kuptur womue kem ko kupwera suri lat nga puto suri tevi kem?”, Atua kobbong osusture ni. Okoni anglo nga miplari ji Moses reнге nai ngok nga nabb muroror rengen mare nga pususture ni pivini pivi jinibb nga milep ser, ko nga piwilwil se nir. <sup>36</sup> Moses ngok ololi nanu nga marinijnij nawone nir Ijip, ko etkai tweni ñeri Isrel nir Ijip van re dis nga musongsong e. Ko etkair kele sia ngavöl ivij (40) van reнге lolo merwer, ko ololi nanu nga marinijnij nawone nir kele wor. <sup>37</sup> Ko Moses ngok kobbong nga muwrai tevi ñeri Isrel nir nga muwra ‘Atua pususture propet san re kami pirpe nga mususture inu. Ko ni pivi kele san re kami san.’ <sup>38</sup> Moses ngok ko etkai jinibb nir ko eser kortonir reнге lolo merwer, mian ko anglo erij tevi reнге botwen ngok nga Sinae. Iok ko, Atua elai nale ne mauren tevi nga pivini pivijngeni tevi kerr.

<sup>39</sup> “Ko ßirterawarrang se kerr nir armusus parosuri Moses. Arong tweni nale sen ko arorrmil lenglengen nga parluvi kele van Ijip e. <sup>40</sup> Ko arwera tevi Eron arwera “Wurru, kupmajing ta atua sopor nga parwowomu ko kerr rrapok-vijuri. Suri Moses ngok nga ñitkai tweni kerr Ijip nga rrapini iel, ko rramrreleng vajine, erpepe rengen.” <sup>41</sup> Renge daron ngok ko armajing nanu san nga marrongrrongi re natu buluk nga parsurövi erpepe atua ser, ko arevji nanu rrum ko arloli nanen nga milep san. Arsurovi sev nga nevrer bbong ñimajinge. <sup>42</sup> Ko Atua esir duren tevir ko elinglingir arsurövi moju nir. Ngok erpepe nga Naul On muwrai re naul se propet nir muwra ‘Meri Isrel nir, tetajer reнге sia ngavöl ivij (40) reнге lolo merwer kamok-revji nanu rrum nir nga kaploli sulsulen rengen, ko sete kamsurövi inu, ejki. <sup>43</sup> Tetajer kamok-wosi devji ngok ne atua ñinij ngok Molok tevi pija ne moju se atua ngok se kami Repan. Molok ko Repan ngok kamok-surövi nuru. Renge murrun ngok, inu boji tweni kami kapan ngasue re devjen van ngasu ngasue Babilon.

*Tuvi ko pa vini, Atua okwilwil se ñeri Isrel nir*

<sup>44</sup> “Devji nga ßirterawarrang se kerr nir nga marok-surövi Atua rengen otur

tevir kele reнге lolo merwer. Devji ngok kobbong Atua owrai tevi Moses nga ñimajinge, ko armajinge suri norngov nga Moses ñilesi. <sup>45</sup> Vitunen, daron nga ßirterawarrang se kerr nir marvitu suri Josua, arini nga parlai dan gel. Ko nir arlai devji se Atua ngok tevir. Renge daron ngok, Atua oji tweni jinibb nir, ko arwolu lingi ßirtera se kerr nir. Ko devji se Atua ngok oto osorsan ean ejpari daron nga Devet mivi batu numal. <sup>46</sup> Atua eir suri Devet, ko Devet ongoni nga poro orongwose ñimajing naim rres san nga ñeri Isrel nir parok-surövi Atua rengen vajin. <sup>47</sup> Ko mian ko Devet sete emajinge, ko Solomon ma emajing naim nen tevi Atua.

<sup>48</sup> “Ko ewretun, Atua ngok nga mian mare temijpal sete orongwose ñilik reнге naim nga jinibb ñimajinge, erpepe nga propet muwrai daron nga ñirij reнге nise Numal muwra <sup>49</sup> ‘Melrin evi nai seksakel suk, ko iel ngatan evi lat nga ßejingteni ßelak ren. Naim nga mirpepe ko san kuwra kupmajinge tevik? Ngabe mawos ko inu bea-mosi ren?’ <sup>50</sup> Inu numajing nanu totoklai nir.’

*Meri Isrel sete arosuri Atua*

<sup>51</sup> “O, batu kami eterter ñelak, norormien se kami erpepe bbong jinibb ne vare nir! Sete kamrongwose kaprunge nale, ko kamsorsan tevi ßirtera se kerr nga tetajer kamok-palpal tere Nerñin On. <sup>52</sup> Birterawarrang se kerr nir arloli sel nga ñisij milep tevi propet ñetpiti ne tuwi nir. Arevji pini propet nga muwra visviseni ñer nga muosuri Atua nga pia-vini vitu, ko lelingenok kamtere ni ko kamrevji pini. <sup>53</sup> Anglo nir arlai nale neseseien se Atua vini tevi kami, ko setewor kamosuri.”

*Artuwe pini Steven*

<sup>54</sup> Ko daron nga jinibb ne gortien ngok marunge nale se Steven, nolor eirarsi ko arorrliv tevi. <sup>55</sup> Ko Steven owun saut e Nerñin On, ko oklu van mare reнге melrin; ko elesi nosrövien se Atua, ko Iesu kele nga mutur reнге devjen rres ji Atua. <sup>56</sup> Mian ko owra “Inu nulesi metali ne melrin etpiti, ko jinibb Mawos otur reнге devjen rres ji Atua.” <sup>57</sup> Mian ko jinibb ne gortien ngok arkikail van mare ko artop ore boror, ko arwolu mawose Steven. <sup>58</sup> Ko arrul totkoni musuw, ko arevei tweni reнге ngaim ngok, ko arok-tuwtuwe nevöt e vajin. Ko nir nga marij tere Steven aruri tweni sunsun ser sopor ko arlai tevi ñelakel san, nisen Sol, nga ni pimmetete; mian ko artuwe vajin Steven. <sup>59</sup> Ko daron nga jinibb nir marok-tuwtuwe suri kele, ko Steven everus owra “Wurru Numal Iesu, kuprunge drrelak ko kuplai inu ñeniik pivinuk piptevim.”

<sup>60</sup> Mian ko ejipa van ngatan ko ekail van mare owra "Numal, sete kupvirrvirrali nir renge sev nga marloli ngok." Daron nga muwrai jille mirpok musuw, ko osrow pini.

## 8

*Sol ok-ojoi jinibb se Atua nir*

<sup>1</sup> Ko Sol elesi erres kobbong nga mar-tuwe pini Steven. Ko renge nabong mawos ngok, Sol tevi mēri Isrel nir artipatun nga parloli pīsij pilep tevi kalesia nir nga marlik Jerusalem. Ko kalesia nir arwolu lingi ngaim ngok ko arwolu van renge vanu karkar nga Jutia ko Sameria, ko nir esngavōl drromon eru nga marivi aposol kobbong arlik jer Jerusalem. <sup>2</sup> Ko mēri Isrel sopor nga marvijuri lilane Atua arunge esij suri Steven, ko arlai niben ko artengsi ko aran artevni. <sup>3</sup> Ko Sol olokloksi torlai kalesia nir, ko etkai jinibb sen nir arivel karkar Jerusalem renge naim nir ko arrul totoni kalesia nir, norman ko nesevin kele, ko arlingir van renge naim ne nekaien.

*Jinibb arwera! tweni nospēn nga mīrres se Iesu Sameria*

<sup>4</sup> Ko daron nga Steven mimij, jinibb se Atua nir arwolu lingi Jerusalem, aran lat karkar ko arvisviseni suri nise Iesu. <sup>5</sup> Ko jinibb san, nisen Pilip, ean kele renge ngaim nga milep ne Sameria ko ewerwer suri nise Iesu, nga mivi Mesaea. <sup>6</sup> Ko jinibb pētḗti renge ngaim nen armerreni parunge lilane nale se Pilip, suri arunge nale sen nga mīrres ko arlesi nelesien nir nga ni mulolir nga marviseni derteren se Atua tevir iok. <sup>7</sup> Nir elep neḗnin nga marsij marsisilvir, ko neḗnin nga marsij nen arkail van mare ko arivare lingir arivel. Mian ko Pilip ololi nir elep nga devje niber marmij arres luwi, ko nir nga sete marongwose parivel arivel luwi kele. <sup>8</sup> Ko nir nga marlik iok daron nga marlesi ko arir lenglengen.

*Jinibb ne botut san, nisen Saemon*

<sup>9</sup> Ko renge ngaim ngok kele, jinibb san nisen Saemon elik iok nga muloli botut sen, jinibb marok-taole bonevis pa. Ko okwera kele erpok "Inu nuvi jinibb mīnij san tevi derteren lele nir." <sup>10</sup> Ko nir jille renge ngaim ngok nga marivi jinibb ko nga marivi jinibb nawon kele, arosuri sev nga muwrai, mian ko arwera "O, ewretun morok derteren se Atua eptevi." <sup>11</sup> Ko arok-murronge ni daron elep pa nga ni mokloli marok-taole nanu nga mokloli nir. <sup>12</sup> Ko vitunen, daron nga Pilip mian mīwerwer tevir suri batun vanu se Atua nga pīpelari ko suri Iesu Kristo, arunge nale sen. Ko ni epaptaese nir, ngok nesevin ko

norman. <sup>13</sup> Ko Saemon kele osuri nale se Pilip, ko arpaptaese ni. Ko ngabe nga Pilip mian e, ko Saemon kele eptevi; ko daron nga mīlesi nanu nga marinijnij nawone nir nga miviseni derteren se Atua nga Pilip muloli, ko etaol ko eririr.

<sup>14</sup> Ko aposol nir esngavōl drromon eru nga marlik iok Jerusalem arunge nale suri mēri Sameria nga marosuri pa nale se Atua osuw, mian ko arkoni Pita ko Jon nga poran jir. <sup>15</sup> Mian ko oran jir, ko daron nga morpelari jir, ko orlot nga Atua pīlai Neḗnin On tevir. <sup>16</sup> Suri Pilip epaptaese nir renge nise Iesu Kristo kobbong, ko Neḗnin On setewor ean renger. <sup>17</sup> Ko Pita ko Jon orlingi nevre nuru renge batu nir, mian ko Neḗnin On ean esilvir vajin.

<sup>18</sup> Ko Saemon daron nga mīlesi aposol ngel nuru morlingi nevre nuru renge batu nir ko Neḗnin On mīsilvir, otur mera ko elai nevōt nga milep vini ko esareni tevi Pita ko Jon ko owra tevi nuru owra <sup>19</sup> "Ei, koporlai kele derteren ngok tevik bevel tevi, ko jinibb si nga bēlgi nevreng rengen, ko ni kele Neḗnin On pīsilvi."

<sup>20</sup> Mian ko Pita owrai lweni tevi owra "E, nik kurongwose kupwuli sev nga Atua mīlai nawone tevi jinibb? Nik tevi nevōt som koporan korti renge nejjikien! <sup>21</sup> Sete kuma-pitevi kem rragrag renge majingen ngel, suri nolom sete osorsan renge no Atua. <sup>22</sup> Kuprieni nolom renge sev nga komok-loli ngok, ko kuplot van ji Atua nga ni pītasi nik renge murrun nga komok-loli mirpok. <sup>23</sup> Suri inu nurongwose nga lol lelep nga marsij elep arto nga demij muloli markikair renge nolom." <sup>24</sup> Mian ko Saemon owrai tevi Pita ko Jon owra "Wurru laru, koporlot suri inu nga Atua pīlai se inu, nga nanu nga mīsij nga komorwera! ngok sete pīrmali ji inu."

<sup>25</sup> Mian ko aposol nga nuru orsuḗe nale se Atua tevi jinibb nir ko sev nga morlesi Numal muloli, ko vitunen morsuw, orivel lingi ie ko orluwi van Jerusalem e. Ko daron nga morivel suri sel, orok-werwer suri nospēn nga mīrres se Iesu Kristo renge ngaim elep nga Sameria.

*Pilip erij tevi mēri Etiopia san*

<sup>26</sup> Ko anglo se Atua san eplari ji Pilip ko owra "Pilip, kupan iak ko kupiel van renge sel nga mītipatun Jerusalem ko mian Gasae." Sel ngok easi renge lolo merwer. <sup>27</sup> Mian ko otur mera ko evel van. Daron nga miplari, ko elesi mēri Etiopia san esakel renge lemētiti sen, ko okwolu suri sel vini. Mernen arvevi evi demaw, ko evi jinibb nga milep san nga mokmetmete nevōt se kwini nga Etiopia nga marveruse nisen kele san Kantes. Mernen ean Jerusalem nga pulot tevi Atua.

28 Ko daron nga musuw ko esakel reнге leñetiti nga pulwi, ko okeve naul se propet Aesea. 29 Mian ko Nemñin On erij tevi Pilip owra “Pilip, kupan mori leñetiti ngok ko kupiel jelin.” 30 Ko Pilip ean ko okivle mori leñetiti nen. Ko ornge mñernen mokeve nale se propet Aesea. Mian ko Pilip owra tevi mñer nga owra “E, nik kurongwose, nale nga komok-eve ngok owra puwra sev?”

31 Ko mñer nga owra “Borongwose pir-pese? Poro jinibb san pivisviseni tevik, ko borongwose ko. Kupsa vini mare, ko kupvisviseni murru nale ngel tevik”. 32 Ko nale se propet Aesea nen le ngel: ‘Erpe sipsip san nga marlai nga parevji pini, erpe natu sipsip nga martevei tweni silvin ko sete murongwose piting, ko mñernen sete orongwose puwrai nanu san, ko omurrong kobbong. 33 Ko nir arwer rrerarre reнге sel nga mñisij. Mñernen sete orongwos natun putoe, suri artor otvi mauren sen.’

34 Mian ko mñeri Itiopa nen osusi tevi Pilip owra “Kupwerai ta tevik, isi ko ngok nga propet ngok moksufe suri ngok? Ok-supe ni kobbong, rrenga oksupe jinibb mñinij kele san?” 35 Ko Pilip esa jingon ko ospe suri nale se Aesea ngok ko suri nospen petpeti nga mñirres suri Iesu Kristo. 36 Orjilwer ortajer orini, ko orremali reнге nuwi seser nga welili san. Ko mñer nga osusi tevi Pilip owra “E, kulesi, rromor-pelari reнге nuwi le ngel. Ko nik kurrormi erpese? Sev ejki nga poro parpptaese inu?” 37 [Mian ko Pilip owrai tevi “Poro weretunen wor nga nosurien oto reнге nolom, ko erres nga inu bepptaese nik.” Ko mñer nga owra “O-o, o-o, inu nuosuri nga weretunen jerjer, Iesu Kristo evi Atua natun.”]A

38 Daron nga muwrai jikle musuw ko owrai tevi mñer nga mokdai leñetiti nga pumosie mun, mian ko nuru Pilip orjubbul ko oran ngatan re nuwi. Ko Pilip epaptaese ni. 39 Ko daron nga morivel lingi nuwi vini lat nga mimes e, ko Nemñin On eteseni tweni Pilip evel, ko mñer nga setemun elesi. Mian ko ean esakel luwi reнге leñetiti sen, ko nolon eir nga eir vajin daron nga leñetiti mokwolu tevi mñitajer. 40 Mian ko Pilip etaole nga mijpari ngaim nga Asot. Ko etajer kele nga mokwerwer e nospen nga mñirres se Atua reнге ngaim mñinij nga marto surusrir iok, ko etajer malum van ko ejpari vajin ngaim nga Sisaria.

## 9

*Atua erieni murru Sol nga pivi jinibb se Iesu*

A 8:37 Nale nga mutore nolo [ ], rrek sete Luk oli, ko jinibb san ea-uli vitue daron nga muli tweni kopi san ne naul ngel.

1 Ko reнге daron ngok, Sol oksur terter nga pirevji pini nir nga marok-osuri Numal. Ean elesi batbatu jinibb ne sulsulen, 2 ko osusi tevi, mian ko batbatu jinibb ne sulsulen oli naul sopor se nir nga marok-metmete naim gortien nir reнге ngaim nga Damaskas, ko elair tevi Sol. Ko nale nen erpel: ‘Nukoni mñerel Sol nga pivinuk pilesi norman rrenga nesevin si nga mivijuri sel nga mimerr ngok, ko pisre totkonir ko piptei lwenir vini Jerusalem e.’

3 Ko Sol elinglingi Jerusalem nga pian Damaskas e. Ko daron nga mivini morie ngaim ngok, ko etaole moron nga milep san miplari reнге melrin vini, ko mumor vaseni lat nga mivel e. 4 Ko ewajeni ngatan, ko ornge drrelan san owrai tevi owra “Sol o, Sol! Suri sev komok-loli mñisij tevik mirpok?” 5 Ko Sol osusi lweni, owra “Wurru, Numal, nik si ko?” Ko drrelan nga owra lweni, “Inu le Iesu nga komok-loli mñisij tevik. 6 Ko kupmera, ko kupan ngaim Damaskas, ko iok jinibb san ni ko puwrai tevim sev nga kupa-loli.”

7 Ko nir nga marok-ivle tevi Sol artur murrong, sete arwerai nale san. Nir kele arunge drrelan ngok, ko sete arlesi jinibb san. 8 Ko Sol otur mera eleng raji meten, ko meten omot. Ko selen nir arevi ko arpitevi van reнге ngaim nga Damaskas e. 9 Ko Sol meten orrorr erpok ejpari nabong itul, sete orongwos pileslesi nanu san. Ko daron ngok kele, sete ean ko sete eminmin.

10 Ko reнге ngaim ngok Damaskas, jinibb san nga mok-osuri Iesu, nisen Ananaeas. Ni elesi bori san nga Numal muwra tevi “Ananaeas!” Ko Ananaeas orrum, owra “Inu le ngel, Numal.” 11 Ko Atua owrai tevi “Kupmera ko kupvijuri sel nga mivel otvi liven ne ngaim ngel nga nisen Sel nga mimetet, ko kupan re naim se Jutas. Ko kupsusi mñeri ngaim ne Tasas san, nisen Sol. Mñernen oklik ko oklot. 12 Ko ni kele elesi bori san, ko elesi nga nik Ananaeas kuan kujpari meten, ko meten erres luwi kele.” 13 Ko Ananaeas owrai lweni, “Wurru, Numal, nir elep pa marok-supe suri morok, nga ni oklokloksi jinibb se Atua nir nga marlik Jerusalem. 14 Ko reнге iel Damaskas kele elai derteren sen ngok ji batbatu jinibb ne sulsulen nir nga pivini purrul totkoni jinibb si nga muosuri nik.” 15 Ko Numal owrai tevi owra “Kupiel, suri inu nulngi ni nga pimajing se inu, ko puloli nisek pian mare ji jinibb ne vare nir ko numal nir ko ji mñeri Isrel kele. 16 Ko daron nga puloli majingen suk, inu bowrai

visviseni sel nga m̄isij sev nga pia-sekai iok."

<sup>17</sup> Ko Ananaeas ornge nale ngok nir, ko otur imare ko ean ji Sol renge naim se Jutas. Ean loloim ko elngi nevren re batu Sol, ko owrai tevi, "Niaken Sol, Numal nga mivi Iesu, nga miplari jim renge sel le, okoni inu nga bevini bololi kupkulu luwi kele, ko nga Ner̄in On kele puwun saut renge nolom." <sup>18</sup> Ko vesan rres nanu san erpe berte nai orvitan renge mete Sol, ko meten orkulu luwi vajin. Otur mera, ko sete epriv Ananaeas epaptaese. <sup>19</sup> Ko eaan luwi ko jin eterter luwi vajin, ko elik nabong sapon kele tevi kalesia nir Damaskas.

*Sol ewerwer e nale nga m̄irres Damaskas*

<sup>20</sup> Ko sete epriv nga Sol etajer kele van renge naim gortien nir se m̄eri Isrel, ko etipatun nga p̄iwerwer suri Iesu nga ni evi natu Atua. <sup>21</sup> Ko nir jikle nga marunge ni artaole ko arwera "E, m̄er nga moktorrrlai kalesia nir Jerusalem ngok, ko evini tweni nga purrul totkonir ko p̄itkair van ji batu jinibb ne sulsulen nir!" <sup>22</sup> Ko Sol derteren ne nale sen emaur elep, ko eviseni nir e erres nga Iesu evi Mesaea. Ko m̄eri Isrel nir nga ie arwera parij otvi nale sen, ko arunge nale se Sol eterter p̄elak ko norrorrmien ser omrrol, ko arbbut kobbong.

<sup>23</sup> Ko nabong elep arasi, ko m̄eri Isrel sopor nga marlik iok arlolarsi Sol elep, ko armurri suri nga parevji pini. <sup>24</sup> Ko nutrin ko nutpong kele, nir artirive Sol renge metalı ne nawot nga milep nga n̄irrale ngaim ser, nga parevji pini. Ko jinibb san ean owrowra tweni w̄omue norrorrmien ser tevi Sol. <sup>25</sup> Ko natpong san jinibb se Sol nir arpitevi ko arsongni renge narr nga milep san, ko arjur̄oni rurrngi renge lat nga n̄it̄pir e san renge nawot van ngatan e. Erpok ko Sol eivare ko owlı.

*Sol iak Jerusalem*

<sup>26</sup> Ko Sol evel lingi Damaskas ko olwi van Jerusalem e. Ko owra pukorti tevi jinibb se Iesu nir; ko nir sete arosuri nga ni evi kalesia, ko arwij ngasue. <sup>27</sup> Ko Banapas ewilwil sen, ko eptei van liven ji aposol nir. Ni owra visviseni tevir erpese nga Sol m̄ilesi Numal renge sel, ko nga Numal kele m̄irij tevi. Ni owrai kele tevir erpese nga Sol sete mimtutu nga pus̄pe suri nise Iesu iak Damaskas. <sup>28</sup> Ko Sol elik tevir ko arongwose vajin, ko arkorti tevi vajin. Ko evel lat p̄et̄peti Jerusalem, ko sete emtutu nga poksūpe suri nise Numal. <sup>29</sup> Sol ewerwere nale kele sopor tevi m̄eri Isrel nir nga marlik ngasue vanu ser nga marongwose nale se m̄eri Gris nir, ko

vitunen marini marlik Jerusalem. Ko nir sete armerreni nale se Sol ko arlatlat tevi suri. Ko sete epriv nir arlolari ko arwera parevji pini. <sup>30</sup> Ko daron nga kalesia marunge nale nga m̄eri ie marwera parevji pini Sol, ko artekai van ko arlingi elik talev Sisaria. Ko vitunen arkoni tweni van sisen e Tasas.

<sup>31</sup> Ko renge daron nen, kalesia nir nga marlik sarrsarr renge vanu ne Jutia, Galili ko Sameria arlik renge demat. Ko Ner̄in On elai derteren tevir, ko nir arlik eterter nga marosuri Numal. Ko nir elep temijpal malum arini nga marosuri Numal vajin.

*Pita iak Lita ko Jopa*

<sup>32</sup> Ko Pita otutur errale lat sapon, ko daron san evan ji jinibb se Atua nir ne ngaim ngok Lita. <sup>33</sup> Re ngaim ngok, eskai jinibb san nga niben mimij mijpari sia owil ko pa osuw nga sete orongwose pivel, ko okmatur kobbong re maling sen. Mernen nisen Aeneas. <sup>34</sup> Mian ko Pita owrai tevi owra "Aeneas, kelengen wolok ko pa Iesu Kristo puloli kuprres luwi. Kuptur mera kuplulngi maling som!" Ko vesan rres Aeneas otur imare. <sup>35</sup> Ko nir jikle nga marlik re ngaim ne Lita ko re kele vanu ne Saron, daron nga marlesi, ko arieni norrorrmien ser ko arvijuri Numal se kerr.

*Tapita*

<sup>36</sup> Ko nesevin san elik re ngaim ngok Jopa, nisen Tapita (nais ngok owra puwra die, nanu rrum san. Re nale se m̄eri Gris nir, arveruse Dokas). Vinnen osuri Atua ko tetajer okloli majingen nga marres nir ko okwilwil se kele nir nga joror marjikke. <sup>37</sup> Re daron ngok mesien san ololi, mian ko emij. Ko arrawe lilane niben, ko arlingi renge loloim san kele mare renge naim sen tera nga partevni.

<sup>38</sup> Ko Jopa oto mori bbong Lita ko sapon; ko daron nga jinibb se Iesu nga Jopa marunge nale nga Pita m̄ilik Lita, ko arkoni nuru eru oran jin tevi nale ngel nga muwra "Wurru kupsaro ta pingavilvil sapon, kupini kuplesi kem iel." <sup>39</sup> Mian ko Pita otur imare ko eptevi nuru aran. Daron nga marjipari ie, ko arpitevi van re loloim ne naim nen mare. Tok, nesevin nga diwen ser marmij lingir arser rrale, ko arok-ting ko arok-sareni sunsun ko nijor nga Dokas m̄imajinge daron nga mimaaur malum e. <sup>40</sup> Mian ko Pita okoni twenir, ko ejiol vitan ko olot. Olot jile ko erieni non mawos vin nga mimij nga ko everuse, owra "Tapita, kupmera!" Tapita eleng raji meten, ko daron nga m̄ilesi Pita, ko emra elik. <sup>41</sup> Ko Pita otori nevren, esa raji nga putur. Mian ko everuse jinibb se Iesu nir tevi nesevin nga diwen ser marmij lingir, ko elngi lweni vin nga mimaaur luwi nga

tevir. <sup>42</sup> Nosþen ne nanu ngok owlu þetþeti re ngaim ngok Jopa, ko jinibb elep kele arini arosuri Numal. <sup>43</sup> Ko mian ko Pita elik eprepriv kele sapon Jopa tevi m̄er san nga mokmaginge nanu nir reнге nevlul buluk, nga nisen Saemon.

## 10

### *Pita ko Konilias*

<sup>1</sup> Ko reнге ngaim ngok Sisaria, m̄eri Rom san elik nga nisen Konilias, nga mimetmete jinibb nuval nir ongut (100) se m̄eri Rom nir, nga marivi ne gortien nga marveruse gortien ne Itali. <sup>2</sup> Ni evi jinibb san nga mukorti pa tevi m̄eri Isrel nir mok-surövi Atua, tevi jinibb nir ne naim sen kele; ko oklai kele merrenien elep tevi m̄eri Isrel nga joror ewelili. Ko tetajer oklot van ji Atua.

<sup>3</sup> Ko nabong san, otomori pivi mete nial itul nga rivriv, omomsawose daron ne verusen, ko elesi nanu san erpe bori. Renge bori nen elesi oto limjer nga anglo se Atua san evini loloim sen ko everuse, owra "Konilias". <sup>4</sup> Konilias emet teretre anglo ko emtutu lenglengen, ko owra "Wurru, Numal, kupej sev ko san?" Ko anglo erij weli owra "Atua eir temijpal reнге loten som ko majingen ne merrenien som, ko etriv nga piwilwil som.

<sup>5</sup> "Ko kupkoni jinibb sopor paran Jopa ko parveruse jinibb san nga pivini mun iel. Mernen nisen arveruse Saemon Pita. <sup>6</sup> Elik tevi jinibb san nga mokmaginge nanu nir reнге nevlul buluk, nga nisen kele Saemon. Naim sen oto ngatan mori jeli dis." <sup>7</sup> Mian ko anglo evel lingi. Ko Konilias everuse jinibb ne majingen sen eru vini, ko jinibb nuval nga mokmaging sen ko nga moklot kele, nga nir þitul parini jin. <sup>8</sup> Ewer visvisen suri sev nga m̄irrmali, ko okoni tweni nir itul ngok van Jopa e.

<sup>9</sup> Ko reнге nabong m̄inij nen, arvijuri sel vini re ngaim ngok Jopa. Ko re daron mawos nen, Pita esa van mare reнге drru naim nat milival nga pulot. <sup>10</sup> Mian ko numer eaji elep, ko emrreni lengleng purroi nanu san. Ko daron nga marok-loli nanen ser e, ko ni elesi bori san nga Atua miviseni tevi. <sup>11</sup> Elesi melrin etþir, ko boriti nga milep san, artori reнге bongsin nga ivij, ko arjuröni reнге melrin vini iel ngatan e. <sup>12</sup> Renge boriti nen, netun vanu jille nir ko numön jille nir arto ren. <sup>13</sup> Ko drrelan san ermali ko owrai tevi owra "Pita, kuptur imare, kuprevji nanu ngok nir ko kupurroir." <sup>14</sup> Ko Pita erij weli owra "Numal, sete mea-loli mirpok, suri setowor nurroi lesi nanu san nga murrokitkit, ko sete musorsan mirpok nga borroi." <sup>15</sup> Mian ko drrelan nen eplari kele

jin owra "Sev nga inu Atua mowrai pa tevim nga owokwok, nik sete kurongwose kupwera orrokitkit kele." <sup>16</sup> Drrelan nen owra lweni nale nen vatul musuw, ko boriti nen emtaw lingi ko olwi van re melrin e.

<sup>17</sup> Pita nolon orrum malum suri bori ngok, owra purongwose sev nga Atua miviseni tevi ngok. Ko jinibb itul nga arsusi rongorngge pa naim se Saemon lut nga mutur e, arongwose, ko re daron nen mawos nga Pita murrormi bori sen, artur rremali reнге metali. <sup>18</sup> Ko arsusi arwera "Moi, Saemon Pita elik niko iok rrenga ejki?" <sup>19</sup> Mian ko Nerñin On owrai tevi Pita owra "Jinibb itul arini pa nile, arpej nik. <sup>20</sup> Kupсарo pingavilvil, kupjubbul van ngatan e. Sete kuprrormi nanu san, suri inu ko nukonir." <sup>21</sup> Pita ojubbul, ean ngatan e, ko owrai tevir owra "Inu nen le nga kamok-peje inu. Suri sev kampej inu?" <sup>22</sup> Ko nir arwera lweni arwera "Numal Konilias ko okoni kem. Evi jinibb nga m̄irres nga moksurövi Atua. Meri Isrel kele armerreni ni. Anglo se Atua nga muon ko san owra Konilias pukoni kem vinuk jim nga puloli purnge sev nga kupwera." <sup>23</sup> Ko Pita etkair arlik tevi ko armatur tevi.

Ko rorpong nen, Pita tevi m̄eri Sisaria nen itul arlinglingi ngaim ne Jopa, arivel kele, ko nir sopor nga marosuri Iesu reнге vanu ngok arpitevir kele. <sup>24</sup> Renge nabong m̄inij nen arjipari Sisaria; ko Konilias etriv terair ko pa. Erijrij kele metka sen ko selen nga marres nir nga parkorti partiriv Pita. <sup>25</sup> Daron nga Pita m̄irrmali vajin, ko Konilias otur imera ko evini ejjol vitan jin. <sup>26</sup> Ko Pita owrai tevi owra "O, sete kuploli pipok tevik, kupmera, inu nuvi kele bhong jinibb le!" Ko Pita ervei nevre Konilias otur rramos. <sup>27</sup> Ko Pita okjiljilwer tevi Konilias, ko orivel korti oran loloim e. Ko Pita elesi erpe jinibb elep aran pa loloim e. <sup>28</sup> Ko owrai tevir owra "Kamrongwose erres nga m̄eri Isrel reнге gortien ser sete arongwose parkorti rrenga parpelari ji jinibb ne vare nir. Ko Atua eviseni tevik nga sete nurongwose þelesi jinibb sopor erpe arrokitkit rrenga arsj. <sup>29</sup> Niko ololi daron nga kamverus nga bevinuk, ko sete nuloli kele nale san, ko nutur imera ko pa ko nuvini. Ko nuwra bosusi tevi kami, kamverus inu suri sev ko?"

<sup>30</sup> Ko Konilias erij weli owra "Nabong itul le pa easi, erpe pivi mete nial itul natmirivriv san, ko nomok-lot iel reнге naim suk. Ko vesan rres jinibb san sunson sen arinrin nawon evini otur reнге nok. Ko owrai tevi inu owra <sup>31</sup> "Konilias, Atua ornge pa verusen som ko okrorrmi elep suri merrenien som nga komok-lai tevi

jinibb nir nga joror mijkie. <sup>32</sup> Kupkoni jinibb sopor paran Jopa, parlesi jinibb san nisen Saemon Pita. Elik renge naim se jinibb san nga nisen kele Saemon, nga mivi jinibb nga mokmajinge nanu nir renge nevlul buluk. Naim sen oto mori jeli dis ngalu." <sup>33</sup> Ko nusaro ngavilvil ko nukoni jinibb suk arinuk jim, ko erres wor nga kumrunge sev nga marwerai ko kuvini. Kem jijle namlik korti vajin renge no Numal Atua ko nabrunge vajin sev nga kupwerai."

#### *Pita ewerwer tevi Konilias*

<sup>34</sup> Ko Pita esa jingon owra "Lelingenok inu nua-lesi wose vajin nga weretunen Atua ololi osorsan kobbong tevi jinibb jijle. <sup>35</sup> Atua eir temijpal tevi si nga musrövi ni ko muloli sev nga musorsan nürres, poro evel renge vanu ngabe tama san. <sup>36</sup> Nale ngok kele kobbong Atua elai tevi jinibb sen nir neri Isrel, daron nga mukoni Iesu Kristo Numal se jinibb jijle nir nga pilai demat tevi nir. <sup>37</sup> Ko rrek kamrongwose sev nga miplari ji Iesu Kristo lat jijle re vanu ne Jutia. Nanu ngok jijle artipatun Galili, daron nga Jon muwra jinibb jijle nir parpaptaes. <sup>38</sup> Atua elai Nemiin On ko derteren tevi Iesu doNasret, ko Iesu daron nga mokivel rrale mokloli majingen nga marres nir, ko ololi nir nga marlik renge derteren se Demij nir arres luwi kele. <sup>39</sup> Kem jijle namlesi sev nga Iesu muloli Isrel ko re ngaim nga Jerusalem kele. Ko jinibb nga marlelep se nir arwuse re nai pelaot nga pimij. <sup>40</sup> Ko nabong itul easi, ko Atua ololi emaur luwi kele re mijen. Ko eviseni ni tevi kem nga milngi kem nga nabsupsupe ni tevi jinibb nir. <sup>41</sup> Atua sete eviseni ni tevi jinibb jijle nir, ko tevi kem kis kobbong daron nga mimaur luwi renge mijen, ko kem namaan korti ko namminmin korti tevi ni. <sup>42</sup> Ko Atua owrai nga nabwerai tweni ko wor nospen nga nürres tevi jinibb nir. Ko kem nabwerai tweni ko wor nga Atua elngi pa ni nga pia-wera suri lat nga puto suri tevi jinibb jijle nir, ngok nir nga marmaur malum lelingenok, ko nir nga marmij pa musuw. <sup>43</sup> Ko propet jijle arok-rrormi ni kobbong, ko arwera suri nga nise Iesu kobbong, derteren nen otoo; ko jinibb nga marosuri ni, Atua pia-telasi tweni nolilien ser."

#### *Nemiin On ean ji jinibb ne vare nir*

<sup>44</sup> Daron nga Pita mokrij malum e, ko Nemiin On ojubbul vitan ko esilvi nir nga marok-murronge nale sen. <sup>45</sup> Ko neri Isrel nga marosuri Iesu nga marlinglingi Jopa tevi Pita artaol ko aririr lengleng renge sev nga miplari, suri Atua elai Nemiin

On tevi jinibb ne vare nir erpe merrenien nga milep san tevi nir. <sup>46</sup> Artaol temijpal suri arok-runge nir ngok arok-rinj renge nale lele, nga marok-surövi nise Atua. Mian ko Pita owra <sup>47</sup> "Nir ngok arlai Nemiin On pa erpe kerr rramlai pa musuw. Ko siko orongwose piwer orer nga sete parpaptaes nir?" <sup>48</sup> Ko Pita owrai tevir nga parpaptaes nir renge nise Iesu Kristo. Mian ko nir arngoni nga poro Pita orongwose pilik mun beblen kele tevir.

## 11

### *Nale se Pita tevi kalesia nga renge Jerusalem*

<sup>1</sup> Ko aposol tevi tuwa kerr ko joji kerr nir re lat jijle re vanu nga Jutia arunge nospen nga jinibb ne vare kele arlai pa nale se Atua kele osuw. <sup>2</sup> Ko daron nga Pita mian Jerusalem e, ko neri Isrel sopor artortori, arwera jinibb ne vare nir nga marivi kalesia paran ko wor re bae. <sup>3</sup> Arwera "E, suri sev komok-pitevi nir nga setewor maran re bae ko komok-aan kele tevir?"

<sup>4</sup> Mian ko Pita owrai tweni vajin tevir nanu mawos nen nga nürmmali, <sup>5</sup> owra "Daron nga nomok-lot renge ngaim ngok Jopa, mian ko numatur, ko nulesi bori san. Nulesi nanu san nga mirpe boriti nga milep san, artori renge bongsin nga ivij ko arjuröni renge melrin vini iel ngatan e, ko evini mori inu. <sup>6</sup> Numteni lilane nolo boriti ngok, ko nulesi netun vanu jijle nir ko numön jijle nir. <sup>7</sup> Mian ko sete epriv nurnge drrelan san owrai tevik owra "Pita, kuptur imera, kuprevji ko kuproi." <sup>8</sup> Ko inu nuwra "Ejki Numal, ejki rres. Nanu ngok sopor sete arsorsan ko sete arwokwok nga borroi, ko setewor nurroir nabong san." <sup>9</sup> Ko sete epriv, nurnge drrelan nen eplari kele vini owra "Nanu nga inu Atua mowrai pa musuw nga owokwok, nik sete kurongwose kupwera orrokkitkit kele." <sup>10</sup> Drrelan ngok errmali erpok vatul osuw, ko boriti nen tevi nanu jijle arevei lweni kele van re melrin e. <sup>11</sup> Ko renge daron mawos nen, jinibb itul arini re naim nga nulik ren. Meri Sisaria san okonir nga parini partekaik nga bolwi tevi nir. <sup>12</sup> Ko Nemiin On owrai tevik sete bongasi nir ko bemarkong ma bolwi tevir. Ko tuwa kerr nga ouwon ngok kele arpitevi inu. Ko daron nga nampelari Sisaria, ko kem jijle naman loloim re naim se mearka Konilias. <sup>13</sup> Mian ko ni owrai tevi kem nga ni elesi anglo san evan otur renge loloim sen, ko anglo owrai tevi owra "Kuplai nale van re ngaim ngok Jopa nga parveruse jinibb san nga nisen Saemon ko nisen kele Pita. <sup>14</sup> Ni pia-wera nale tevi nik nga pila mauren

tevi nik ko tevi nir nga renge naim som kele".<sup>15</sup> Ko mian ko daron nga m̄etipatun vajin nga m̄erij tevir, ko Nem̄in On evini esilvir osorsan erpe nga mivini re kerr bonevis.<sup>16</sup> Mian ko nurrorrmi jipari nale nga Numal muwrai tuwi nga muwra, 'Jon ololi baptaes tevi nuwi; ko sete mia-periv, Atua pia-paptaese kami renge Ner̄in On.'<sup>17</sup> Ko oto limjer nga Atua elai merrenien ngok kobbong tevi jinibb ne vare nir, erpe nga m̄ilai tevi kerr daron nga rramosuri Iesu Kristo e. Ko erpese, inu nurongwose bololi lesi nga bewer ore Atua, rrek?"

<sup>18</sup> Daron nga Pita m̄irij jile musuw, ko nir arlingi kurtweni norrorrmien karkar ser, ko nolor emra e ko arsurövi Atua arwera "Rrek Atua elai kele tevi jinibb ne vare nir norrorrmien ne parieni lululwenir ko parmaur vajin."

### *Kalesia nir ne Antiok*

<sup>19</sup> Daron nga Steven mimij, ko jinibb nir aroji kele nir nga marosuri, ko nir arwolul sarrsarr. Sopor aran arjipari Ponisia ko Saepas ko Antiok ko arok-werai tweni nospen nga m̄irres, sete tevi m̄eri m̄inij, ko tevi m̄eri Isrel kobbong.<sup>20</sup> Ko nir sopor kele nga marivi m̄eri Saepas ko Saerin aran Antiok ko arwera tweni nospen nga m̄irres se Iesu Kristo, Numal se kerr, tevi jinibb ne vare kele nir.<sup>21</sup> Derteren se Numal epetevir, ko jinibb elep arieni nolor arosuri Atua vajin.<sup>22</sup> Ko nospen ne nanu ngok owlu kele evan ejpari kalesia nga Jerusalem, mian ko nir arkoni Banapas van Antiok e.<sup>23</sup> Daron nga ni mian jir ko m̄ilesi erpese nga Atua m̄irij m̄irres suri jinibb ne ie nir, ko ni eir temijjal, ko owrai tevir nga partur p̄iterter renge nosurien ser ko weretunen renge Numal tevi nolor totoklai.<sup>24</sup> Banapas evi jinibb nga m̄irres, nga muwun saute Ner̄in On ko nosurien, ko ervei jinibb elep arini ji Numal se kerr.

<sup>25</sup> Mian ko Banapas ean kele Tasas e nga pipej Sol.<sup>26</sup> Ko daron nga m̄iskai, ko etkai oran Antiok e. Ko renge sia totoklai san, nuru orok-jiljilwer tevi kalesia ne ie ko orvisviseni nir elep kele renge gortien ngok. Ko renge ngaim ngok ko Antiok, arlingi womue nais ngok 'Kristin' re kalesia nir.

<sup>27</sup> Ko renge daron ngok, propet sopor kele arivel lingi Jerusalem aran Antiok.<sup>28</sup> Nir nen san nisen Akapas, otur imera renge derteren se Nem̄in On ko ewer rrungrngi tevir nga daron ne numer nga m̄iterter san sete ngasu p̄irmali renge ngatan ngel totoklai. Ko numer nen erm̄ali erpe nga muwrai renge daron nga Klotias mutori batu numal ne Rom.

<sup>29</sup> Mian ko jinibb se Iesu nir armurri poro erres jinibb sisamis p̄ilai wor merrenien pilep van nga piwilwil se seler nir nga marlik Jutia.<sup>30</sup> Mian ko arloli erpok, ko arlai nevöt sopon. Ko arlai tevi Banapas ko Sol nga poran porlai tevi jinibb nga marlelep se kalesia nir nga Jerusalem.

## 12

### *Numal Erot Akripa 1 erevji kalesia sopor*

<sup>1</sup> Ko renge daron ngok kele, Numal Erot Akripa etipatun nga puloli p̄iterter kele tevi kalesia sopor.<sup>2</sup> Okoni jinibb sen nir nga paran parrul totkoni Jemes tasi Jon ko partai otvi batun.<sup>3</sup> Ko suri nanu ngok ololi m̄eri Isrel nir arir, ko etajer kele ololi nale tevi jinibb sen nir nga parrul totkoni Pita. Nanu ngok erm̄ali mawos re daron ne nanen ne niv nga is mijki ren.<sup>4</sup> Elngi Pita re naim ne nekaien, ko elngi gortien ivij ne jinibb ne nuval sen nir nga parlik metmete. Norrorrmien sen evi nga poro daron ne nanen gortien p̄iasi, ko ni pia-wera suri lat nga puto suri tevi ni re no delung nir.<sup>5</sup> Mirpok ko Pita m̄ilik re naim ne nekaien. Ko kalesia nir arlot eterter van ji Atua suri ni.

### *Anglo etkai tweni Pita re naim ne nekaien*

<sup>6</sup> Re natpong nen, ko vitunen nga Erot pia-wera suri lat nga puto suri tevi Pita renge no delung nir, Pita ematur liven re jinibb ne nuval nga mormetmete ni re naim ne nekaien tevi kele dil delrurr eru nga markai nevren e, ko jinibb ne nuval eru kele ortur metmete metali. Ko Pita ematurrwel.<sup>7</sup> Ko vesan rres anglo se Atua san otur pelari ie, ko moron omor vaseni jijle naim ne nekaien ngok. Ko esesaro ejpari neli Pita ko owni, ko owra "Kupsaro pingavilvil, kupmera." Ko vesan rres, dil delrurr ngok nuru orjiki re nevre Pita ko orvitan.<sup>8</sup> Ko anglo owrai kele tevi owra "Kuptatuwe netatuw som ko kuprae but som, ko kupini rroporivel." Pita ololi sev nga anglo muwrai, mian ko anglo owrai kele owra "Erres, ko kupuri kot som ko kupvivotu surik."<sup>9</sup> Ko Pita evivotu suri. Etlā van vare e renge naim ne nekaien. Ko orrorrmi nga nanu ngok nir arirpe bbong ematur lesi bori ko.<sup>10</sup> Mian ko orini orasi gortien eru ne jinibb ne nuval, ko orini vajin renge metali delrurr nga muto ore jer ngaim nga jinibb pian vare e vajin. Ko metali nen esan etpir, ko oran vare e. Orok-vijuri sel vini, ko vesan rres anglo emtaw lingi Pita, evel.

<sup>11</sup> Ko Pita elesi wose vajin sev nga m̄irmali, ko owra "O, nulesi wose ko vajin nga Numal suk okoni anglo sen vini nga

pitkai tweni inu re derteren se Erot ko re nanu jijle nga jinibb nga marlelep se mēri Isrel nir marrormi nga parloli tevik.”

<sup>12</sup> Ko ean re naim se Merri, nga mivi tasu se Jon nga nisen tuwen nen marveruse Mak. Ko nir elep nga marok-vijuri Numal arser korti ie nga parlot. <sup>13</sup> Pita evini otuti metali vare. Ko nesenwarreng nga mokmetmete naim, nga nisen Rota, evini owra pitasi. <sup>14</sup> Ko ni etaole drrela Pita, ko orongwose evesane, ko eir temijpal suri. Ko setemun etasi metali, ko owlu luwi kele van ji nir sopen e nga marlot. Ko owrai tevir owra “E, lartul, Pita le ngel moktur vare renge metali!” <sup>15</sup> Ko nir arwerai lweni tevi arwera “Ai, kulengleng!” Ko ni otur eterter owra “Ejki, nuwretun ko wor!”. Mian ko nir arwera “Ejki ma, rrekma nemin ko.”

<sup>16</sup> Ko Pita nga eplak malum, otuti metali, mianan ko artasi ko vajin. Ko daron nga marlesi ko artaol lenglengen. <sup>17</sup> Ko Pita obbōlbbōleni nevren tevir nga parmurong, ko owra visviseni tevir erpese nga Numal se kerr mūlai tweni ni re naim ne nekaien. Ko okonir vajin owra “Kapwerai kele tevi Jemes ko kerr sopor kele sev nga mūrmali”. Mian ko evel lingi ie van elik talev re lat minij kele san.

<sup>18</sup> Mevinen vajin, ko jinibb ne nuval nir ara-taole arlesi Pita mijki; ko arrormi sarrsarre, arok-sususir e vajin arwera “E, Pita nga ean ngabe e?” <sup>19</sup> Ko Erot okoni kele jinibb ne nuval sen nir nga paran parpej tevi, ko sete arlesi rragrage te. Ko osusi kele norrorrmien elep tevi nir nga marmetmete, mijki mun, mian ko ololi arevji pinir. Mian ko sete epriv ko Erot evel lingi Jutia nga pian pilik sopen Sisaria.

### *Mijen se Erot Akripa*

<sup>20</sup> Mian ko Erot ololarsi mēri Taea ko Saeton nir. Suri iok, nir ne ngaim nga eru ngok arkorti lat sansan nga paran parlesi. Ko womunen, arevei womue jinibb san nga mokmetmete majingen ne naim se Erot nga piptevir van, nisen Blastas. Ko nir arini ji Erot ko arngoni nga poro ni orongwose puloli demat, suri nir ne vanu ngok arok-wuli bbong nanen ser ko ji jinibb ne vanu se Numal Erot. <sup>21</sup> Mian ko Erot elngi nabong san nga pia-lesi nir ren. Ko re daron nen vajin, Erot ojkjok erres temijpal re nijor se numal ko ean esakel re nai seksakel se numal, ko elai vajin nale tevir. <sup>22</sup> Ko nir arkikail van mare arwera “O, sete jinibb ko mīrij ngok, ko atua ko wor san.” <sup>23</sup> Ko vesan rres, anglo se Atua san ololi Erot eil jubbul ngatan. Suri emrreni jinibb partori ko parsurōvi ni pirpe kele atua san. Mian ko doto nir apelari ko arurroi jinin, ko emij.

<sup>24</sup> Ko nale se Atua easasi elep kele, ko jinibb elep arini arosuri kele. <sup>25</sup> Ko Banapas ko Sol oran orvinvini ore jijle majingen nga marlingi nuru tweni. Mian ko orivel lingi Jerusalem vajin orluwi. Orpitevi lweni Jon Mak tevi nuru.

## 13

*Arsusture Banapas ko Sol nga poran porloli majingen*

<sup>1</sup> Ko kalesia sopor ne Antiok arivi propet ko jinibb nevisisenien. Banapas, ko Simeon nga marveruse nibmotmot, ko Lusias kele nga mivi mēri Saerin, ko Manaen nga bonevis marmetmet kortoni ni ko Erot Antipas renge naim sansan, ko Sol kele. <sup>2</sup> Ko daron san arlingi kurtweni nanen ko arsurōvi Atua. Mian ko Nemūn On erij tevir owra “Kapsusture Banapas ko Sol nga porloli majingen nga inu motobtobbue nuru tweni.” <sup>3</sup> Mian ko nir artajer nga arlingi kurtweni nanen, ko arlot. Ko sete epriv nir jijle arlingi nevren renge nuru, ko arkoni tweni nuru nga poran porloli majingen.

### *Banapas ko Sol orwerwer Saepras*

<sup>4</sup> Ko niko Nemūn On okoni nuru, ko orjubbul van ngatan e Selusia. Ko orsa re drav san, ko drav owlu tweni paran re sale san nisen Salamis nga muto re norour nga Saepras. <sup>5</sup> Ko daron nga nuru morjipari vajin Salamis, ko orokwerai tweni nale se Atua re naim loten se mēri Isrel. Ko Jon Mak eptevi nuru nga mīmajing se nuru. <sup>6</sup> Ko nir nga itul ngok arivel otvi norour ngok van devjen e Papos. Ko renge ie, arlesi jinibb ne botut san, nisen Bajisas. Ni evi mēri Isrel san, ko evi propet ne gerisen san. Ko nisen kele san re nale Gris arwera Elimas. <sup>7</sup> Ko ni evi kele jinibb se Sejas Polas nga mimetmete norour ngok Saepras, nga batun muwlu milep. Ko Sejas Polas ngok everuse Banapas ko Sol nga poran jin, suri emrreni purgne nale se Atua. <sup>8</sup> Ko daron nga marini ko marij, ko mēer ne botut ngok Bajisas, nga nisen tuwen nen Elimas, erij tere nuru ko ololi lesi nga piriēni norrorrmien se numal Sejas Polas, nga sete puosuri Atua. <sup>9</sup> Ko Sol nga nisen tuwen nen Pol, owun saute Nemūn On, ko emet teretre jinibb ne botut ngok, <sup>10</sup> ko owra “A, nik natu demij, kuvi botgerisen ko sel som arkipkaṗil, ko kuvi devje nuval se nanu jijle nga mīrres! Seveling vajin kupa-suw re komok-rij tere sel weretunen se Numal?” <sup>11</sup> Lelingnok ko pa Atua putor aljem nga metem pumot, ko setemun kuma-lesi moron pipriv sopen.”

Ko vesan rres nanu san nga mirpe nousnin nga mumotmot san evini ousni ore



non, ololi meten omot; ko evel esesaro karkar epej jinibb san nga pok-tekai ni.<sup>12</sup> Ko daron nga Sejas Polas mīlesi sev nga mīrrmali ngok, ko etaol; ko eir temipal re nale se Numal se kerr nga nuru morvisiseni tevi, ko osuri vajin Atua.

*Banapas ko Pol orwerwer e nospen nga mīrres re ngaim ngok Antiok iak Pisitia*

<sup>13</sup> Ko Pol tevi selen nir arlai drav san Papos ko aran Pampilia, arwolu toku re ngaim ngok Peka. Ko renge ie, Jon Mak evel lingir ko olwi van Jerusalem e.<sup>14</sup> Arivel lingi vajin Peka, ko arjipari Antiok nga mori vanu ngok Pisitia. Ko renge nabong on, orsil van re naim loten se mēri Isrel nir ko orsakel ngatan.<sup>15</sup> Ko daron nga mareve jijle Naul On musuw, ko nabur ser arkoni nir san van ji Pol ko Banapas ko osusi tevi nuru owra “E selek, poro norrorrmien nga mīrres san oto niko nga komor-merreni kopor-werai nga piwilwil se jinibb nir, ko erres kopor-werai”.<sup>16</sup> Ko Pol esareni nevren tevir nga parmurrong, mian ko owra “Meri Isrel nir ko kami jile nga kamok-surōvi Atua, kapmurrong.<sup>17</sup> Atua se mēri Isrel nir otobbtobbue apu se kerr ne tuwi nir, ko osusi nir van mare daron nga marlik mirpe jinibb neturvitan re vanu ne ljip. Ko tevi derteren nga milep jerjer sen, etkai twenir arivel lingi ie.<sup>18</sup> Ko erpe sia ngavōl ivij (40) sapon erpok, ko arlik re lolo merwer, ko arok-loli batur sapon. Ko Atua sete emet twenir,<sup>19</sup> ko ololi metil ngaim ebut re vanu ngok Kenan armij ko elai dan ser tevi jinibb sen nir; ko arlik ren,<sup>20</sup> evini ejpari sia ongut vavij bbulin ngavōl elim (50).

Ko vitunen Atua osusture numal nir sopor nga parmetmete nir, eanan ejpari daron se propet Samuel.<sup>21</sup> Ko marngoni kele batu numal san, mian ko Atua elai Sol nga mivi natu Kis re metka ngok Benjamin nga pivi batu numal ko putori vanu ser. Ko ni otori ejpari sia ngavōl ivij (40).<sup>22</sup> Ko daron nga Atua mīlai tweni kele, ko osusture vajin Devet nga pivi batu numal. Ko Atua owrai norrorrmien sapon suri Devet owra “Nulesi Devet natu Jesi evi jinibb nga nolon oto suri inu nolok. Evi jinibb nga puloli nanu jijle nga inu memrreni puloli.”

<sup>23</sup> “Ko osorsan erpe nga Atua mīrijrij pae musuw, ni osusture metka se Devet san nga nisen Iesu nga ni pia-la mauren tevi mēri Isrel nir.<sup>24</sup> Ko daron nga Iesu sete miplari wor, ko Jon okwerwer pae ko tevi mēri Isrel nir owra ‘Kami kaprieni wor kami ko renge nololien se kami nir, ko kami jijle kappaptaes ko wor’.<sup>25</sup> Daron nga Jon mivini mori vajin renge bongsi majingen sen, ko oksusi okwera ‘Kami

kamok-rrorrmī inu nuvi isi le? Inu sete nuvi mēri nga kamok-tirive. Ko kapmurrong ta. Jinibb san pivini ni ko nga inu sete nuvter rragrrage nga βetlasi tweni dil renge but sen.’

<sup>26</sup> “Tasik ko jodik nir, kami nga kampelari renge metka se Epram ko kami jinibb ne vare nir nga kamok-surōvi Atua se kerr, kerr ngok ko, Atua elai pa nale nga pītasi sel nga pīla mauren tevi kerr jijle.<sup>27</sup> Daron nga Iesu mivini, ko mēri Jerusalem nir ko nabur ser nir arrelenge. Ko sete arongwose nale se propet kele nir nga marok-eve renge nabong on jijle nir. Iok ko ololi nir arlingi Iesu pian re mijen, mian ko arwera ni pimij ko wor, erpe nga propet nir marwerai wowomu pae musuw.<sup>28</sup> Ko sete artor sweri sel san nga norrorrmien nen purrow puloli nga Iesu pian re mijen, ko artur imera ma ko arngoni tevi Numal Paelet nga pirevji pini.<sup>29</sup> Ko daron nga marevji pini jijle re nai pelaot erpe nga Naul On muwrai, ko arjurōni vini ngatan e vajin, ko aran artevni renge dubb.<sup>30</sup> Mian ko sete epriv nga Atua ololi emaur luwi kele renge mijen.<sup>31</sup> Ko re daron elep, Iesu ermmali ji jinibb sen nir nga moktutur tevir Galili van Jerusalem e, ko lelingenok vajin nir arok-wera tweni Iesu tevi mēri Isrel nir.<sup>32</sup> Atua ololi pa rijrijen nen tevi apu se kerr nir osuw, ko kem namvijuri le vajin nga nabwerai tweni nospen nga mīrres nen tevi kami.<sup>33</sup> Ko ololi pa tevi kerr nga rramivi metka nen daron nga muloli Iesu emaur luwi kele renge mijen. Erpe Naul On muwrai pa renge naul erwen ne Sam, muwra ‘Etipatun lelingen nik kivi natuk woswos, ko lelingen inu bevi tata som woswos.’<sup>34</sup> Ko iok ko Atua muwrai pa re Naul On sen suri Iesu pimaaur luwi kele re mijen nga ni sete mia-mij kele nabong san nga niben pian pupo, ejki. Ko erpe nga muwrai kele muwra ‘Bololi tevim rijrijen nga muon ko mimerr osorsan erpe nga mololi tevi Devet.’<sup>35</sup> Ko renge naul ne Sam kele san, Nale On owra ‘Atua sete mia-marong rragrrag nibe jinibb on sen pupo nawon.’<sup>36</sup> Daron nga Devet mimaaur e, ko osuri Atua. Ko daron nga mimij e, ko artevni erpe βirtera sen nir, ko niben ean opo.<sup>37</sup> Ko Iesu ma nga Atua muloli mimaaur luwi kele renge mijen, niben sete opo, ejki.

<sup>38</sup> “Tasik ko jodik nir, kaprongwos lilane ko wor nale ngok nga nomok-werai nir tevi kami. Suri re Iesu Kristo kobbong sansan, Atua orongwose pītiasi tweni nololien nir se kami.<sup>39</sup> Kami kaprongwos wore ko nga Iesu Kristo kobbong orongwose puloli nir nga marosuri ni parivel sisarow renge nololien ser. Ko sete evi nale neseseiren se Moses nga murongwose puloli kapiel

sisarow reнге nololien se kami, ejki. <sup>40</sup> Ko suri iok, kami kapmetmet ko wor p̄irres. Poro pijki ko nale se propet nir tirmali ji kami <sup>41</sup> nga muwra 'Kami nga kamok-sopsope Atua, lelingenok ko kaptaole ko kapa-van re mijen suri. Suri sev nga bololi lelingen evi nanu nga kami sete kama-osuri. Rrek poro san puwra lilane tevi kami, ko iok kele sete kama-osuri rrek.' "

<sup>42</sup> Ko daron nga Pol nuru Banapas morivel lingi naim ne loten vajin, ko jinibb ne ie arngoni kele tevi nuru arwera "Wurru, poro orongwose kopora-luwi kele vini, kopor-wer visivisen kem e nale ngok reнге nabong on nga vitu." <sup>43</sup> Ko daron nga jinibb martela vare re naim ne loten vajin, ko nir elep arvijuri kele Pol ko Banapas.

Nir sopor arivi m̄eri Isrel, ko nir sopor womujnen arivi jinibb ne vare nir, mian ko vitunen mara-tori vajin nosurien se m̄eri Isrel nir. Ko Pol ko Banapas orwera eterter tevir, orwera "Kaprrul totkoni ko wor murrun ngok se Atua p̄iterter nga mokwilwil se kami reнге nolon nga m̄irres p̄elak."

*Pol ewerwer e nospen nga m̄irres tevi m̄eri Antiok nir*

<sup>44</sup> Ko re nabong on nga suri nen kele, otomori nir jijle re ngaim ngok arini kele lat sansan nga parunge nale ngok se Numal se kerr. <sup>45</sup> Ko daron nga m̄eri Isrel nir markulu marmeteni delung ngok nir, ko nolor eleplep temijpal. Mian ko arok-rij esij ko arok-rij tere vajin nale se Pol. <sup>46</sup> Ko Pol nuru Banapas orloli norrorrmien se nuru eterter kele ko orwera "Nobor-wera womue ko wor nale se Atua tevi kami m̄eri Isrel nir. Ko kami kamrong tweni nale nen. Ngok eviseni nga sete kammerreni kaptor sweri mauren nga sete mia-suw nabong sopen. Ko lelingenok rrek nablingi kurtweni kami, ko naban vajin ji jinibb ne vare nir. <sup>47</sup> Ko ngel evi nale nga Numal m̄ilai tevi kem, nga Naul On muwra 'Inu nususture nik nga nik kupirpe moron san nga pumor jipari jinibb ne vare nir, tweni nga jinibb ne lat jijle ne iel ngatan parasi van re mauren.' "

<sup>48</sup> Nale ngok ololi jinibb ne vare nir arir temijpal ren, ko arsurövi lengleng Numal re sev nga marunge. Ko nir nga Atua mutobbtobbu pa nir musuw nga parlai mauren nga sete mia-suw nabong sopen, arosuri ni vajin. <sup>49</sup> Ko murrun ngok ololi vajin nale se Numal easasi van lat jijle reнге ngaim ngok.

*Meri Isrel sopor aroji tweni Pol ko Banapas*

<sup>50</sup> Ko m̄eri Isrel sopor arivel rrerrale ji nesevin ne loten nir ko nabur se nesevin

ko jinibb nga marlelep ne ie, ko areveir nga paran partere Pol nuru Banapas. Mian ko aroji tweni vajin nuru re siser. <sup>51</sup> Ko Pol nuru Banapas orwajwajeni tweni maw re beta nuru nga piviseni tevi jinibb ne ie nga nuru orsir dure nuru tevi nir. Mian ko orivel lingi ie, ko oran Ikoniam e. <sup>52</sup> Ko jinibb se Numal nir ne Antiok arir temijpal, ko arwun saute Nerin On.

## 14

*Pol ko Banapas iak Ikoniam*

<sup>1</sup> Pol ko Banapas orwerwer reнге nospen nga m̄irres tevi jinibb nir ne Ikoniam, osorsan erpe nga morloli Antiok; ko m̄eri Isrel ko m̄eri Gris elep arlingi nosurien ser reнге Numal. <sup>2</sup> Ko m̄eri Isrel nga nosurien ser mijkie artere nir, ko arloli jinibb nir ne ngaim nen arlolar ko artere jinibb se Atua. <sup>3</sup> Ko aposol nuru orlik daron sopen kele ie. Ko nosurien se nuru oto eterter re Numal, ko nolo nuru eterter nga morwera i tweni nale sen. Atua elai derteren tevi nuru nga pormajing nanu nga marinijnij nawone nir. Ko eviseni nga nospen nga m̄irres nga muspe suri Atua nolon nga m̄irres evi weretunen. <sup>4</sup> Mian ko m̄eri Ikoniam arteri wukari nir evi meling eru e; devjen arvijuri m̄eri Isrel, ko devjen arvijuri aposol nuru. <sup>5</sup> Mian ko jinibb ne vare sopor tevi m̄eri Isrel sopor ko nabur ser nir arloli norrorrmien nga parevji ko partuwe pini Banapas ko Pol. <sup>6</sup> Daron nga morunge norrorrmien ngok, ko orwolu oran reнге ngaim nga morlelep ngok nuru Listra ko Depe re vanu ngok Likaonia. <sup>7</sup> Ko reнге ngaim ngok ko nuru ko lat sopor nga marto rrare, orok-werwer tweni nospen nga m̄irres se Iesu Kristo.

*Pol ko Banapas iak Listra*

<sup>8</sup> Ko jinibb san elik Listra, ko daron nga m̄iak e ko pa ko sete orongwose pivel, beta orkati. <sup>9</sup> Ko ni oklik ie ko okmurrongre nale se Pol. Pol elesi nga nosurien sen eterter wor nga emrreni p̄irres luwi, mian ko oklu van jin <sup>10</sup> ko ekail van mare, owra "Kuptur rramos!" mian ko m̄er nga otur imera kasi ko etipatun nga pivivel vajin. <sup>11</sup> Ko daron nga delung marlesi sev nga Pol muloli, ko artipatun arkaile re nale ne ie Likaonia, arwera "O, atua nir arirpe jinibb kele, ko arjubbul vitan vini ji kerr kele!" <sup>12</sup> Ko arlingi nise Banapas ewaji Sus (nga mivi batbatu numal atua ser nir), ko arlingi Pol ewaji Emis (nga mivi atua ser san nga mokwosi nale se atua ser nir). <sup>13</sup> Ko naim ne loten se Sus oto mori bbong ngaim ser ko, vare sopen. Ko jinibb nga moksulsul tevi Sus tevi delung ngok nir armerreni parloli sulsulen tevi Banapas

ko Pol; mian ko aran arevei buluk nga marjoroj tevi nevgun vini re jeli metali.

<sup>14</sup> Ko daron nga Pol ko Banapas morarongwose vajin sev nga nir marwera par-loli, ko orrererrrsi sunsun se nuru nga piviseni nga orunge esij pelak. Ko orwolu van liven re jinibb nir ko orkikail van mare jer, <sup>15</sup> orwera "E, lartul, suri sev kamok-loli sel ngok? Komru nomor-ivi jinibb erpe kami kobbong. Namini iel nga nabwera tweni nospen nga mirres nga pirieni kami rengo sel nga misij, ko kapluwi van ji Atua nga mimaaur nga muloli melrin, iel ngatan, dis ko nanu jikle nga marto rengen. <sup>16</sup> Tuwi elinglingi jinibb jikle arvijuri lweni norrorrmien ser sisamis, <sup>17</sup> ko eviseni ma nga okpitevi kami re nanu jikle nga marres nga muloli. Atua elai naus rengo melrin vini nga muloli wini marres. Elai nanen tevi kami ko ololi nolo kami eir." <sup>18</sup> Pol ko Banapas orwerai tweni nale nen erpok ko pa, orpelak epriv sopen, mian ko orate vajin norrorrmien se delung nir nga setemun parloli sulsulen van ji nuru.

<sup>19</sup> Ko mian ko nabur ne Isrel sopor nga marivel Antiok ko Ikoniang arevei norrorrmien se delung nir arasi vini devjen ser e. Artekai Pol ko artuwe ko arevei tweni van vare e re ngaim ngok ko arkurtweni, arrorrmii nga ni emij ko pa. <sup>20</sup> Ko daron nga jinibb se Iesu nir marini martur rrale Pol, ko Pol emra, ko olwi kele van rengo ngaim ngok. Ko mevinen ko nuru Banapas orivel kele van Depe e.

*Pol ko Banapas orivel otvi kele iok nir nga poran ngaim e*

<sup>21</sup> Pol ko Banapas orwerwer e nospen nga mirres re ngaim ngok Depe, ko orevei jinibb elep arini arivi jinibb se Iesu. Mian ko orluwi van Listra e ko Ikoniang, mian ko ortajer van Antiok rengo Pisitia e. <sup>22</sup> Orsa raji nolo kalesia nir, ko orwerai eterter tevir nga parrul totoni nosurien ser puto piteter; mian ko orwerai tevir orwera "Kerr rraprunge ko wor pisij pilep puwomu, ko orongwose rrapa-sil van re batun vanu ne melrin." <sup>23</sup> Ko re Naim On sisamis orok-susture elta nga morok-lingi kurtweni nanen ko morlot milep van ji Atua surir nga Numal se kerr pimmetete nir pirres. <sup>24</sup> Mian ko Pol ko Banapas orivel otvi kele Pisitia e van Pampilia e.

<sup>25</sup> Ko rengo ie, orwerwer kele rengo ngaim wel san nga Peka, mian ko orjubbul van ngatan e Atalia. <sup>26</sup> Daron nga morsuw vajin iok, ko orsa luwi van re drav e ko orwolu luwi van Antiok rengo Siria e. Lok ko evi lat nga Atua mususture nuru bonevis ko muwrai nga pimmetete nuru pirres rengo nalol nga mirres sen mijpari

nga morvinvini ore jikle vajin majingen sen.

<sup>27</sup> Daron nga morjipari Antiok, ko orveruse kalesia jikle arini arkorti lat sansan. Orwera tevi jinibb nir sev nga Atua miwilwil se nuru nga morloli, ko erpese ni murongwose puloli nga jinibb ne vare nir kele parosuri. <sup>28</sup> Mian ko orlik eprepriv kele ie tevi jinibb se Iesu nir.

## 15

*Nabur se kalesia nir arkorti Jerusalem*

<sup>1</sup> Ko jinibb sopor arivel lingi Jutia ko arini Antiok e. Ko arok-wer sesesre tasi kerr, arwera "Poru sete kapan re bae pirpe nale neseseiren se Moses muwrai, ko Atua sete mia-la mauren tevi kami." <sup>2</sup> Ko Pol ko Banapas orij latlat elep tevir suri neseseiren ngok. Ko mian ko kalesia nir nga Antiok arkoni tweni Pol ko Banapas tevi nir sopen kele van Jerusalem e nga parsusi rongorngge iok tevi aposol ko elta nir. <sup>3</sup> Ko daron nga markonir jile ko arivel otvi Ponisia ko Sameria. Arsupe suri erpese nga Atua mirvei jinibb ne vare nir nga parini parivi jinibb se Atua. Nospen ngok ololi jinibb se Numal nir arir temijpal.

<sup>4</sup> Ko daron nga marremali Jerusalem e, ko kalesia nir tevi aposol ko elta nir arwera erres tevir. Ko arwerai tweni nanu jikle nga Atua miwilwil se nir nga marlorir. <sup>5</sup> Ko nir sopor nga marivi Parasi ko marosuri Iesu, artur imera ko arwera "O, nir ngok nga sete marivi meri Isrel paran wor re bae ko. Ko kapvisvisenir ko wor nga parvijuri nale neseseiren se Moses."

<sup>6</sup> Mian ko aposol tevi elta nir arlik korti nga parjiljilwer suri norrorrmien ngok suri jinibb ne vare nir, lat nga parloli putu suri. <sup>7</sup> Arjiljilwer suri epriv sopen, mian ko Pita otur imera ko owra "Selek nir, kamrongwose nga tuwi jer pa, Atua orrorrmi nga pilngi inu erpe san re gortien ngok se kerr nga piwerwer rengo nospen nga mirres tevi jinibb ne vare nir. Atua ololi erpok nga nir parunge ko parosuri ni. <sup>8</sup> Ko Atua nga murongwose nolo jinibb jikle nir eviseni norrorrmien sen tevi jinibb ne vare nir daron nga milai Nemain On sen tevir, osorsan erpe nga milai tevi kerr. <sup>9</sup> Norrorrmien nga Atua muloli tevi nir osorsan kobbong erpe norrorrmien nga muloli tevi kerr. Arlingi nosurien ser rengo ni, ko ni ololi nolor owokwok jikle erres. <sup>10</sup> Ngok, ko suri sev kamwera kaploli Atua pulolar? Suri kamwera kaplingi kele soloslo nga murrow rengo nir ngok nga marosuri. Soloslo ngok orrow pelak rengo kerr meri Isrel nir, ko re kele apu se kerr nir. <sup>11</sup> Ko Numal se kerr Iesu okres pelak

tevi kerr, ko rramasi renge nosurien renge ni kobbong, osorsan erpe jinibb ne vare nir."

<sup>12</sup> Nir jille arlik murrarrong ko armur-rong, mian ko Banapas ko Pol vajin orsupe suri erpe nga Atua mīlai derteren tevi nuru nga pormajinge nelesien nir ko nanu nga marinijnij nawone nir tevi jinibb ne vare nir.

*Jemes evinvini ore nale*

<sup>13</sup> Daron nga morwerai jille nale se nuru musuw, ko Jemes otur imera ko evinvini ore nale, owra "Tasik ko jojik nir, kapmurrongre nale suk pīrres." <sup>14</sup> Saemon Pita eawer visviseni lebbong erpe nga womu Atua murrormi jinibb ne vare nir, ko nga mīlai tweni nir sopor marini jin e. <sup>15</sup> Iok osorsan tevi sev nga propet maruli: <sup>16</sup> 'Inu Numal, bea-luwi kele ko ßemajing lweni naim se Devet nga mumutmut jile pa mīsiij. Inu bosusture lweni kele. <sup>17</sup> Ko jinibb lele ne iel ngatan nga inu meveruse nir pa nga partori totkoni nisek, parlesi wose nga inu nuvi Atua. <sup>18</sup> Nale ngel evi se inu Atua nga mololi jinibb marongwose tuwi pa vini."

<sup>19</sup> Ko Jemes etajer nga muwra "Evi nale suk nga bowrai suri: sete erres nga rraplingi soloslo nga murrongwose ke re jinibb ne vare nir nga marieni lwenir pa vini ji Atua e. <sup>20</sup> Ko erres rrapuli naul san van jir, ko rrapwerair e nga nir parvijuri ko wor nale sopor nga marto renge nale neseseien se Moses, nir le ngel: Setemun parurroi nanen nga marloli sulsulen e van ji atua mīnij nir, ko sete parloli pīsij tevi nesevin, ko sete parurro nanu san nga marwusi ore ßirislan nga pimij ko drran sete mīseser asi te. <sup>21</sup> Suri tuwi jer pa vini, renge naim ne loten se mēri Isrel nir re nabong on, jinibb sopor arok-tur imare ko arok-eve neseseien se Moses, ko jinibb arok-werai tweni nale sen re ngaim jille."

*Aposol ko elta nir arlai naul san pian ji jinibb ne vare nir*

<sup>22</sup> Aposol tevi elta ko kalesia nir armurri suri nga parkoni kele jinibb sopor van Antiok e nga parpitevi Pol ko Banapas. Arlingi Saelas ko Jutas Barsapas nga morivi nabur eru re gortien se Numal. <sup>23</sup> Aruli naul san nga muwra mirpel: 'Kem aposol ko elta nir, namwerai erres pelak tevi kami jille jinibb ne vare nir nga kamivi jinibb se Numal nir re Antiok, Siria, ko Silisia.

<sup>24</sup> 'Namrunge nga jinibb sopor re gortien se kem arinuk ji kami ko arlokkoksi kami re nale nga sete kem namkonir e. <sup>25</sup> Ngok ololi kem namlik korti le, ko namini tevi norrormien nga nablingi jinibb ne majingen eru ko nabkoni nuru vinuk ji

kami. Nuru porpitevi Banapas ko Pol nga nammerreni nuru milep. <sup>26</sup> Nir nga namlingir ngok arlai pa nolor ko mauren ser ko tweni majingen ngok. <sup>27</sup> Ko niko namkoni Jutas ko Saelas, nga pora-werai kele nanu ngok kobbong nga kem namuli.

<sup>28</sup> 'Nemīn On eviseni tevi kem nga sete nabjngteni soloslo nga murrongwose ke re jinibb ne vare nir, ko nga mīlai tweni nir sopor marini jin e. <sup>29</sup> Iok osorsan tevi sev nga propet maruli: <sup>30</sup> 'Inu Numal, bea-luwi kele ko ßemajing lweni naim se Devet nga mumutmut jile pa mīsiij. Inu bosusture lweni kele. <sup>31</sup> Ko jinibb lele ne iel ngatan nga inu meveruse nir pa nga partori totkoni nisek, parlesi wose nga inu nuvi Atua. <sup>32</sup> Nale ngel evi se inu Atua nga mololi jinibb marongwose tuwi pa vini."

<sup>33</sup> Niko nir ivij ngok arivel lingi Jerusalem ko aran Antiok e. Mian ko arkortoni kalesia totoklai nir, ko arlai vajin naul ser tevir. <sup>34</sup> Nale ne naul nen osongni nolor e neiren, ko osustur kele norrormien ser. <sup>35</sup> Ko Jutas ko Saelas kele orivi propet, ko orjiljilwer epriv tevir, ko orsustur e norrormien ser ko orwilwil ser. <sup>36</sup> Meri Jerusalem ngok orlik kele behlen Antiok, ko daron nga morivel lingi nga porluwi van ji nir nga markonir e, ko kalesia nir ne ie arwera "Demat piptevi kamru re sel se kamru nga kopor-luwi e." <sup>37</sup> [Ko Saelas elik jer ie.]<sup>B</sup> <sup>38</sup> Ko Pol ko Banapas orlik kele Antiok, ko nuru tevi kalesia elep kele wor arvisviseni ko arwerwer suri Numal renge ie.

*Pol ko Banapas orivel sisamis*

<sup>39</sup> Ko sete epriv, Pol owrai tevi Banapas owra "Rrek rrapluwi kele van rraplesi jinibb se Numal nir renge ngaim jille nga rramwerwer renge nale sen rer. Ngok puloli rraprongwose lat nga marlik ren muto suri." <sup>40</sup> Ko Banapas emarong, ko emrreni pītakai kele Jon nga nisen tuwen nen Mak. <sup>41</sup> Ko Pol sete emrreni pīrpok, suri Mak evel lingir seveling nga Pampilia ko omusmus pīmajing tevir. <sup>42</sup> Sete epriv ko Pol ko Banapas orlat, mian ko orsisamis. Banapas etkai Mak ko orwolu renge drav van Saepreas e. <sup>43</sup> Ko Pol etkai Saelas; ko jinibb se Numal nir arngoni nga Numal se kerr purongwose pimetmete nuru renge nalol nga mīrres sen. Mian ko orivel. <sup>44</sup> Orivel van, orremali Siria ko Silisia, orok-wilwil se kalesia nir nga parterter.

## 16

*Timoti evivitu kele suri Pol ko Saelas*

<sup>1</sup> Pol etajer kele van Depe ko Listra e, lat nga jinibb san nga mivi kalesia nga nisen Timoti mīlik e. Tasu sen kele evi

**B 15:34** Nale nga muto re nolo [ ], rrek sete Luk oli, ko jinibb san ea-uli vitue daron nga muli tweni kopi san ne naul ngel.

kalesia nga mivi nesen Isrel, ko tata sen ma evi mēri Gris. <sup>2</sup> Tasi kerr ko joji kerr nir nga Listra ko Ikoniam arwera evi jinibb nga mīrres pēlak san. <sup>3</sup> Pol emrreni pītakai piptevi, mian ko ololi ean re bae. Ololi erpok suri mēri Isrel pētēti nga marlik ie arongwose nga tata se Timoti evi mēri Gris. <sup>4</sup> Ko daron nga Pol tevi selen ngok nir marok-tutur mītajer re ngaim ko ngaim nir, arwerai tweni tevi kalesia nir sev nga aposol tevi elta nga Jerusalem marwerai. Ko arwerai eterter nga nir parrul totkoni ko wor norrorrmien ngok nir. <sup>5</sup> Ko kalesia nir arini eterter kele rengo nosurien. Ko nabong jijle, jinibb evinvini, ololi nir esa van mare tetajer.

*Pol elesi bori san iak Troas*

<sup>6</sup> Pol tevi selen nir arivel otvi Prijia ko Galesia. Ko Nemīn On sete emarong nga nir parwerwer re vanu ne Esia. <sup>7</sup> Vitunen ko arremali kele rengo vanu ngok Misia; ko arloli lesi nga paran mare kele Bitinia e, ko Nemīn se Iesu sete emarong. <sup>8</sup> Mian ko arivel otvi ma Misia, mian ko arjipari Troas. <sup>9</sup> Ko re natmupong nen bbong, ko Pol elesi bori san suri mēri Masetonia san nga mutur ko mungoni tertere muwra “Kupini wor iel Masetonia ko kupwilwil se kem.” <sup>10</sup> Daron nga Pol mīlesi jijle bori ngok, ko kem nampejpej sel nga naban Masetonia e. Suri namrongwose nga Atua everuse kem nga naban nabwerwer rengo nospēn nga mīrres sen iok.

*Litia evini evi jinibb se Numal*

<sup>11</sup> Namwolu lingi kele Troas rengo drav, ko naman mawos Samotres e. Ko mevinen, namjipari Neapolis. <sup>12</sup> Ko rengo iok namtajer kele van Pilipae e, lat nga mēri Rom milep marloli liken ser rengen, ko mivi kele ngaim nga muto womu re vanu ngok Masetonia. Namlik nabong sopor ie.

<sup>13</sup> Ko re nabong on, namivare re ngaim ngok van re jeli nuwi seser san, nga namrorrmi evi lat nga mēri Isrel nir marok-ser korti e tweni loten. Namlik ngatan ko namtipatun namjiljilwer tevi nesevin nir nga markorti ie. <sup>14</sup> Nesevin nen san nga mokmurrong nen nisen Litia, nga mokwulwule nijor nga nowlin milep ko musongsong mupongpong mīrres re ngaim ngok Taeatira. Ko ni evi vin nga moksurovi Atua. Numal etasi nolon nga mīlengi norrorrmien sen vajin eterter re nale se Pol. <sup>15</sup> Ko daron nga vinnen tevi naim sen nir marpaptas jijle, ko everuse kem owra “E, kapini kaplik rengo naim suk, poro nga kaprorrmi nga inu nuvi weretunen jinibb se Numal”. Mian ko kem nammarong re sev nga muwrai, ko naman.

*Arlingi Pol ko Saelas re naim ne nekaien*

<sup>16</sup> Nabong san rengo sel se kem van re lat ne loten e, namsekai nesenwarren demij maur san. Ni nemīn san oto rengen nga mīlai derteren tevi nga puwrai tweni sev nga pia-rremali vitu. Ervei nevōt elep daron nga mokloli majingen ngok e tevi nir nga marmetmete ni. <sup>17</sup> Vinok evijuri Pol tevi kem sopor kele, ko ok-kail van mare owra “Lartul ngel arivi jinibb se Atua nga mian mare temijpal nga marvisviseni kami rengo sel ne mauren!”

<sup>18</sup> Vinok olōni lweni norrorrmien ngok nabong sopon kele, mian ko Pol ornge esij e. Ko otur imera ko erij tere nemīn nga, owra “Renge nise Iesu Kristo, kuplinglingi vajin vinel!” Ko vesan rres nemīn nga mīsij nen elinglingi vin nga.

<sup>19</sup> Ko daron nga nir nga marok-metmete vinel marongwose vajin nga martor jabble sel ser nga marok-loli nevōt milep ren, artur imare ko arrul totkoni Pol ko Saelas. Ko artekai nuru van ortur rengo ngaim ngok re maket, lat nga marok-wer sesesre lat nga puto suri tevi jinibb nir. <sup>20</sup> Ko artekai nuru van ortur rengo no mēri Rom eru nga morivi gavman, mian ko arwera “Laru ngel orivi mēri Isrel, ko orok-loli sel nga marsij rengo sise kerr. <sup>21</sup> Orvisviseni murrun nga sete musorsan. Ko murrun nga morwerai kele sete evijuri nale neseseien se kerr, ko kerr rrammajing rengo nise numal gavman ne Rom ko sete orongwose rrapvijuri nuru.” <sup>22</sup> Ko delung aran kele re norrorrmien ngok, ko artere Pol ko Saelas.

Ko jinibb ne nuval nir arrerrersi joro nuru ko arlai nale nga parevji nuru re nai. <sup>23</sup> Daron nga marevji lenglengen nuru musuw, ko arlingi nuru van re naim ne nekaien. Ko arlingi nale tevi mēri nga mimetmete naim ne nekaien nga pimteni suri nuru pīrres nga sete porwolu. <sup>24</sup> Daron nga morok murrge nale ngok, ko otur mera ko etkai nuru van lat san lolaim jer kele, ko eplaji totkoni ñela nuru e nai nga milep san.

<sup>25</sup> Ko mian ko daron nga nat mīrrang, ko Pol ko Saelas orlot ko orlai nubo van ji Atua, daron nga nir kele sopor re naim ne nekaien marok-murronge. <sup>26</sup> Sete epriv ko narūi nga milep san eterure naim ne nekaien elep. Metali nir artetpīr, ko dil delrurrur nga markai rengo nevrer arvitvitatan rengo nevre nir jijle nga marlik re naim ne nekaien. <sup>27</sup> Daron nga mēri nga mokmetmete nir mītaol ko mīlesi metali martetpīr, ko orrorrmi nir nga marlik lolaim arwolu van vare e; otur mera ko elai nesip ne nuval sen nga pīsari lweni e. <sup>28</sup> Mian ko Pol ekail owra “E, sete kupsari lwenim! Sete san owlū ivare, ejki.”

<sup>29</sup> Mian ko mñernen ongoni laet san, ko owlu van loloim re naim ne nekaien. Eririr temijpal, ko evini ejjol vitan re no Pol ko Saelas. <sup>30</sup> Ko etkai tweni nuru re naim ne nekaien, ko osusi tevi nuru owra “Wurru, bololi pirpese ko bela mauren?” <sup>31</sup> Oriji weli nale sen, orwera “Kuplingi nosurien som rengo Numal Iesu, ko ngok kurongwose kupla mauren, nik ko nir nga marlik rengo naim som.”

<sup>32</sup> Mian ko Pol ko Saelas orjilwer vajin tevi ni ko nir jille nga marlik rengo naim sen suri Numal Iesu. <sup>33</sup> Re daron ngok kobbong natmupong nen, ko mñer nga mokmetmete nir re naim ne nekaien ngok etkai nuru van, errawe vaseni lat nga marevji nuru rengo nibe nuru, mian ko ni tevi jinibb jille nir nga marlik rengo naim sen arpaptaes. <sup>34</sup> Mian ko etkai lwani Pol ko Saelas vini re naim sen e, ko ela nanen sapon tevi nuru. Ni ko jinibb ne naim sen nir, neiren nga milep oto rengo nolor suri arini nga marosuri vajin Atua.

<sup>35</sup> Daron nga nat mñirin vajin, ko numal nesereien okoni polis sopor van ji ni nga mokmetmete naim ne nekaien tevi nale san nga muwra “Kuplinglingi laru ngok nuru porivel sisarow.” <sup>36</sup> Mer nga owrai tevi Pol owra “Jinibb nesereien elai nale ngel nga nik ko Saelas kopor-ivel. Komor-rongwose kopor-ivel ko vajin rengo demat.” <sup>37</sup> Ko Pol owrai tevi polis nen owra “E, erpese ko, komru nomorivi mñeri Rom, ko laru ngok setemun orloli nomorkot, ko arevji komru re no jinibb nir, mian ko arwirr komru van re naim ne nekaien. Ko lelingenok ormerreni porlai tweni silveni komru. Sete mia-irpok, sete erres porlai nale re sel, ko porini ko wor porlai tweni komru iel.”

<sup>38</sup> Daron nga polis muwrai tweni tevi numal nen nuru nga Pol ko Saelas orivi mñeri Rom, ko numal nen nuru ormetutu lenglengen. <sup>39</sup> Mian ko orini ko orwera warru tevi nuru, ko ortekai tweni nuru re naim ne nekaien, mian ko orngoni nga porivel lingi ngaim ngok. <sup>40</sup> Ko daron nga morivel lingi ie ko oran mawos re naim se Litia, ko iok ko orlesi kele jinibb se Numal nir ren, ko orsusture kele nosurien ser. Mian ko orivel lingi vanu ngok.

## 17

### *Pol ko Saelas oran Tesalonaeka*

<sup>1</sup> Ko Pol ko Saelas orivel van, ko orremali re ngaim ngok Ampipolis ko Apolonia; mian ko ortajer van orjipari Tesalonaeka. Ko naim ne loten se mñeri Isrel nir san oto ie. <sup>2</sup> Ko erpe nga mokloli pa tetajer, ko Pol ean loloim nen nga pusrövi Atua. Ko okloli erpok ean ejpari nabong on itul ko

pa nga ni mokwerwer tevi jinibb nir ie. Ko oklai nale <sup>3</sup> ne Naul On nga miviseni tevir nga Mesaea purnge jisij ko wor pijpari pimij, ko Atua pia-loli pia-maur luwi kele rengo mijen. Pol owrai kele tevir nga Iesu evi Mesaea nga ni mokwerwer suri. <sup>4</sup> Nir sopor arosuri sev nga Pol muwrai, ko arini kele arvivitu suri Pol ko Saelas. Ko jinibb ne vare kele nir elep nga marok-surövi Atua, ko nesevin nga marwowomu re nesevin nir arini kele arpitevir.

<sup>5</sup> Ko mian ko jinibb nga marlelep se mñeri Isrel nir nolor elelep, ko aran arpej but-terter nga marok-ivel suri nawon sel, ko arwera tevir nga parloli balpalen karkar. Arwera parevei Pol ko Saelas van jir; ko aran rengo naim se jinibb san nisen Jeson, ko arbburbburi metali sen nga marok-pej Pol ko Saelas. <sup>6</sup> Ko daron nga setemun marlesi nuru, ko arrul totoni Jeson tevi tasi kerr sapon, areveir vini artur rengo kot re no jinibb nga marlelep ie. Mian ko arkail van mare temijpal arwera “Laru ngok nuru Pol ko Saelas orloli nanu nga marsij elep rengo lat elep. Ko lelingenok orini iel kele!” <sup>7</sup> Mian ko Jeson ngok etkai nuru oran loloim sen e. Nir jille artor otvi nale nesereien se Sisa, batu numal se mñeri Rom nir. Nuru orwera nga batu numal mñinj kele san oto, nga nisen Iesu.” <sup>8</sup> Ko daron nga mñeri Isrel tevi jinibb nga marlelep ne ie marunge nale ngok, ko arunge lengleng esij suri. <sup>9</sup> Mian ko arloli Jeson ko tasi kerr nen nir parlai nevöt sopor tevir puloli parivel sisarow e. Ko nir arloli erpok, ko arivel sisarow vajin.

### *Pol ko Saelas oran Berea*

<sup>10</sup> Renge natpong nen kobbong ko tasi kerr nir arkoni tweni Pol ko Saelas oran re ngaim ngok e Berea. Ko daron nga morremali ie, ko ortajer ko pa van re naim loten se mñeri Isrel nir. <sup>11</sup> Jinibb ne ngaim ngok Berea arresres asi nir ne Tesalonaeka, ko nir arir nga parunge nale. Ko nabong jille armeteni pepej rengo Naul On poro nga nale nga Pol muwra arsan tevi nga marto re Naul On, rreknga ejki. <sup>12</sup> Ko mian ko nir elep arlingi nosurien ser rengo Numal. Ko nesevin elep nga marwowomu re nesevin nir ne Gris ko norman nen kele elep arosuri.

<sup>13</sup> Ko daron nga mñeri Isrel nir nga marlik Tesalonaeka marunge nga Pol mokwera tweni nale se Atua tevi mñeri Berea nir, iok ololi nir aran ie ko arevei kortoni delung sopor arser korti; ko arwera suri tevir, ko ololi nolor ololarsi Pol. <sup>14</sup> Ko ngavilvil, tasi kerr nir arkoni tweni Pol tevi selen kele sopor arjubbul van ngatan e rengo jeli dis (ko Saelas ko Timoti orlik jer Berea). <sup>15</sup> Ko arpitevi Pol aran arjipari Athens. Ko daron

nga marivel lingi Pol nga parluwi van Borea e, ko Pol elai nale tevir nga paran parwerai tevi Saelas ko Timoti nga nuru porsaro pingavilvil vini porpitevi kele.

### *Pol elik Atens*

<sup>16</sup> Daron nga Pol mokteravi nuru reнге Atens, ko ornge esij nga n̄ilesi atua ser nga marsavir reнге nai ko nevõt muwun saut. <sup>17</sup> Ko ean reнге naim gortien se m̄eri Isrel nir nga p̄ijiljilwer tevi nir ko tevi jinibb ne vare kele nga marsurövi Atua. Ko nabong jijle, okjiljilwer kele tevi jinibb jijle nga m̄ilesir reнге maket. <sup>18</sup> Ko m̄eri Gris nir sopor arvijuri neseseien se nir san nga nisen Epikurus, ko sopor arvijuri neseseien se nir san nga nisen Seno. Ko nir nen sopor arjilwer tevi Pol. Ko nir sopor arwera “O, morok erij se lenglengen! Ni oksuḗ sev ko?” Ko nir n̄inij arwera “Namrunge erpe moksuḗ atua ne vanu n̄inij ko.” Arok-rij erpok suri Pol oksuḗ suri Iesu ko owrai tweni nga Atua ololi emaur luwi reнге mijen.

<sup>19</sup> Mian ko arverus Pol nga pivini putur reнге no gortien ser san nga marveruse Ereopakas, ko arwera “Nammerreni nabrongwose nevisvisenien nga mimerr som erpese ko?” <sup>20</sup> Namrunge kuwrai nanu sopor nga namtaol lenglengen, ko nammerreni nabrongwose kuspe sev ko?” <sup>21</sup> Ko suri evi norrorrmien tera se m̄eri Atens nir ko se neturvitan kele nir ne ie nga tetajer marmerreni parilik ko par-murronge nale nga mimerr ko parjiljilwer reнге norrorrmien nga marirpok.

<sup>22</sup> Mian ko Pol otur imera re no delung nir ko owra “Meri Atens, inu nulesi pa erpe kamok-surövi atua se kami nir erres p̄elak. <sup>23</sup> Daron nga nomok-ivel suri sise kami, ko nomok-meteni nanu nir nga kamok-surövi, ko nulesi pa nale san nga kamuli reнге nawot san nga muwra ‘Ngel oto tweni nga parsurövi Atua san nga setewor rramrongwose’. Kami sete kamrongwose ko kamsurövi ma, ni le vajin mowra tweni ngel tevi kami. <sup>24</sup> Atua ngok emajinge iel ngatan ko nanu jijle nga marto reнге. Evi numal ne melrin ko iel ngatan kele. Sete elik reнге naim loten nga jinibb n̄imajinge. <sup>25</sup> Sete ongoni jinibb san p̄ila sen nga p̄irij. Elai mauren, sowin ko nanu jijle tevi jinibb nir. <sup>26</sup> Etipatun re jinibb sansan kobbong, ni ololi jinibb totoklai nir nga marmaur iel ngatan. Ko owjuwje vajin lat ne liken ser sisamis, ko owra suri kele daron nga para-maur jipari. <sup>27</sup> Atua ngok ololi erpok nga puloli kerr jijle rraploli lesi nga rrappej ni; ko rrek daron nga rramok-totong karkar, ko orongwose rrapsekai ni. Ko ewretun temijpal nga ni sete oruj ngasu rragrag ji kerr. <sup>28</sup> Ko erpe

jinibb san muwrai pa tuwi muwra ‘Suri rramkorti reнге Atua kobbong ololi rramla mauren, ko rramok-tutur ko rramloli nanu jijle’. Ko erpe kele kami san nga mok-koji nubo muwrai pa muwra ‘Kerr kele rramivi natun.’ <sup>29</sup> Ko suri rramivi natu Atua, ko sete orongwose rrapwera ni erpe nanu nga marmajinge re gol rrek silva rrek nevõt. Sete evi nanu san nga jinibb murongwose p̄imajinge re nevren rreknga norongwosien sen, ejki. <sup>30</sup> Ko re daron ne tuwi nga jinibb sete murongrongwos, ko Atua etlasi tweni bbong sev nga marloli, suri norongwosien ser ejkie. Ko lelingenok vajin okwerai tevi kerr jijle re lat jijle, owra ‘Kami jijle kaprieni norrorrmien se kami suri nololien se kami.’ <sup>31</sup> Suri elngi pa nabong nga pia-wera suri lat nga puto suri tevi jinibb jijle ne iel ngatan reнге sel nga musorsan kobbong. Atua otobbobbu pae isi nga ni puloli pia-wera suri lat nga puto suri tevi jinibb nir. Ko eviseni nga evi weretunen nga puloli pirpok re nga muloli pa m̄ernen emaur luwi kele reнге mijen.”

<sup>32</sup> Ko daron nga Pol muwra jinibb san mimaur luwi kele re mijen, ko nir sopor armen keraji. Ko nir sopor ma arwera “Nammerreni naba-runge kele nale som suri norrorrmien ngok.” <sup>33</sup> Mian ko Pol evel lingir; <sup>34</sup> ko nir sopor arini arkorti tevi ko arosuri Iesu. Renge nir ngok, jinibb san nisen Denis nga mivi san re gortien ngok Ereopakas, ko nesevin kele san nga nisen Damaris, ko norman n̄inij kele sopor.

## 18

### *Pol ean Korin*

<sup>1</sup> Pol evel lingi Atens ko ean kele re ngaim ngok Korin. <sup>2</sup> Ko iok, eskai m̄eri Isrel san nga mivel Pontas, nga nisen Akwila. Ko bonevis ean elik Itali re ngaim nga milep ngok Rom. Ko sete epriv batu numal ne Rom nga nisen Klotias, owrai nga m̄eri Isrel parivel lingi Rom ko wor. Mian ko Akwila tevi nesen sen Prisila orivel lingi Rom ko orini orlik Korin. Sete orlik epriv, mian ko Pol ermmali nga mivini n̄ilesi nuru. <sup>3</sup> Ko elik tevi nuru. Okorti tevi nuru reнге majingen se nuru, suri ni kele majingen sen osorsan tevi nuru; nir arivi jinibb nga marilile nevlul buluk. <sup>4</sup> Ko tetajer reнге nabong on Pol tevi m̄eri Isrel nir ko m̄eri Gris nir arok-loli jiljilweren elep reнге naim loten, suri Pol emrreni pirveir nga parosuri Iesu.

<sup>5</sup> Ko vitunen Saelas ko Timoti orivel lingi Masetonia vini; ko daron nga morremali ie, ko Pol elngilngi majingen nga mok-ilile nevlul buluk, ko ean vajin re majingen nga reнге nospen nga m̄irres, ko okwerai lilane tevi m̄eri Isrel nir nga Iesu evi

Mesaea. <sup>6</sup> Ko nir ne ie artere ni ko arij esij tevi ni. Mian ko ni ewirrwirrleni tweni maw re sunsun sen, nga piviseni tevir nga esir duren tevir, mian ko owra "Poro kapjiki, ko evi nga kami kobbong, sete numrreni inu borongwose. Ko etipatun lelingenok inu bean bowrai tweni nale suk tevi jinibb ne vare kobbong." <sup>7</sup> Mian ko evel lingi nir, ko ean elik re naim se jinibb san nga mivi jinibb ne vare nga moksurövi Atua, nga nisen Titias Jastas. Naim sen oto bbong jeli naim ne loten se mēri Isrel nir.

<sup>8</sup> Ko Krispas, mēer nga mokmetmete naim ne loten ngok, tevi nir nga marlik rege naim sen, arosuri Numal se kerr. Ko jinibb münij kele elep ne Korin, daron nga marunge nale se Pol ko arosuri vajin Iesu, ko arini vajin ko arpaptaes.

<sup>9</sup> Ko natpong san Pol elesi nanu san erpe bori san nga Atua miviseni tevi ko owra "Sete kupmetutu, ko kuptajer ko wor nga kupwerwer. Sete kupmosi. <sup>10</sup> Inu beptevim, ko sete san mia-lokloksim, suri nir elep re ngaim ngel arivi suk ko." <sup>11</sup> Ko iok ololi Pol elik iok Korin ejpari sia san ko navöl ouwon, nga mivisviseni nale se Atua tevi jinibb nir.

#### *Meri Isrel artekai Pol van rege kot*

<sup>12</sup> Renge daron ngok, mēri Rom nir arsusture kele jinibb san nga nisen Galio nga pivi batu gavman se mēri Akaea nir. Ko gortien ne mēri Isrel arini ko arrul totkoni Pol, ko artekai van re kot, ko arwera <sup>13</sup> "Merel okloli lesi nga puloli jinibb se kem nir parsurövi Atua rege sel nga mître nale neseseien se kem!" <sup>14</sup> Vitunen ko Pol pia-tur imera nga p̄irij, ko Galio owrai tevir owra "Meri Isrel, kapmurrong. Poro ewretun mērel ololi nanu san nga sete osorsan, rreknga otor otvi nale neseseien, ko kamrongwos pae nga inu borng ko wor kami. <sup>15</sup> Ko suri evi laten kobbong ne nale, ko nais ko nanu ne nale neseseien se kami, ko oto ji kami kobbong nga kaploli lilane. Inu sete nuir rragrag nga bowra suri norrrormien san nga mirpok." <sup>16</sup> Mian ko ejeli twenir arivel lingi kot. <sup>17</sup> Ko delung nir arrul totkoni Sostinis, nga mivi nabur ne naim loten san, ko arevji temijpale re pa roro metali ne naim ne kot ko. Ko Galio sete ma owor suri rragrag nir.

#### *Pol olwi vini Antiok e*

<sup>18</sup> Vitunen ko Pol elik beblen kele tevi jinibb se Numal nir Korin, mian ko eremse nir ko elai drav van kele Siria e tevi Akwila ko Prisila. Ko vitunen ko mia-linglingi ie, etvei tweni rao batun omus iak Kenkrea, nga piviseni rijrijen san nga muloli tevi Atua. <sup>19</sup> Ko mian ko arjipari ngaim ngok Epesas, ko Pol evel lingi Akwila ko

Prisila. Mian ko ean loloim rege naim ne loten se mēri Isrel nir nga p̄ijiljilwer tevi jinibb nir ie. <sup>20</sup> Elilik sapon mian ko arngoni nga p̄ilik piprepriv kele tevir, ko ni omusus. <sup>21</sup> Eremse nir ko owra "Poro Atua pimarong ko inu bea-luwi kele".

<sup>22</sup> Ko ejpari Sisaria rege drav, ko etajer van Jerusalem e, ko owrai erres tevi kalesia nir. Mian ko etajer evan Antiok e. <sup>23</sup> Elik eprepriv sapon ie, mian ko evel lingi kele, ko evel otvi Galesia ko Prijia nga pususture nosurien se jinibb se Iesu nir nga parini parterter kele.

#### *Apolos iak Epesas ko Korin*

<sup>24</sup> Ko mēri Isrel san evini Epesas nga nisen Apolos. Apolos eak rege ngaim ne Aleksantria, ko evi jinibb nga m̄irres san ne rijen, ko orongwose erres nale ne Naul On. <sup>25</sup> Arvisviseni pa osuw sel se Numal se kerr, ko tetajer okrunge erres nga pokwerwer ko nga pokvisviseni jinibb nir rege nale weretunen se Iesu. Ko orongwose bbong baptaes se Jon. <sup>26</sup> Ko okwerwer loloim re naim loten se mēri Isrel nir nga norrrormien sen sete eririr rragrag. Ko daron nga Prisila ko Akwila morunge nevisvisenien sen, ko orpitevi van re naim se nuru ko orwera visviseni sel se Atua erres vajin tevi. <sup>27</sup> Vitunen ko Apolos owra pian Akaea, mian ko tasi kerr ko joji kerr ne ie Epesas arwilwil sen nga maruli naul san van ji jinibb se Iesu nir ne ie. Arngoni nga poro arongwos partekai Apolos pian loloim re naim ser. Ko daron nga m̄irmali Akaea ko ewilwil se nir nga re nalol nga m̄irres se Atua arivi kalesia. <sup>28</sup> Suri Apolos evi jinibb nga m̄irij m̄iterter, ko rege nale ne Naul On eviseni erres nga Iesu evi Mesaea. Ko rege no jinibb nir, okwer ore nale se mēri Isrel nir.

## 19

#### *Pol evini Epesas kele*

<sup>1</sup> Daron nga Apolos m̄ilik malum Korin e, ko Pol evel otvi vanu vini Epesas e; ko ie, eskai kele jinibb se Numal nir rengen. <sup>2</sup> Ko osusi tevir owra "Daron nga kamlingi nosurien se kami rege Iesu, ko Nem̄in On esilvi kami rreknga ejki?" Ko nir arij weli arwera "Ejki, setewor namrunge rragrage sapon suri Nem̄in On." <sup>3</sup> Mian ko Pol owra "Ko kamla baptaes nga m̄irpese san?" Ko nir arij weli arwera "Ko namla baptaes se Jon." <sup>4</sup> Mian ko Pol erij welir kele, owra "Jon epaptaese jinibb nir nga nolor pulululwi. Ko owra kele nga san pia-vitu kele wor re ni nga jinibb nir parosuri. Ko Iesu ko evi m̄ernen nga Jon moksufe suri ngok."

<sup>5</sup> Daron nga nir marunge jikle sev nga Pol muwrai ngok, ko nir jikle arpaptaes re nise



Numal Iesu. <sup>6</sup> Mian ko Pol elngi nevrén renger, ko Neñin On esilvir; ko arij rengen nale lele. Ko arok-werai tweni sev nga Atua muwrai tevir, erpe propet. <sup>7</sup> Ko re gortien ngok, nir erpe esngavöl drromon eru (12) totoklai.

<sup>8</sup> Ko evi navöl itul totoklai nga Pol moka re naim liliken se ñeri Isrel nir ko mokjiljilwer sopen tevir suri batun vanu se Atua. Ololi lesi nga pirveir parini. <sup>9</sup> Ko nir sopor batur eterter ko armusus parosuri, ko arok-rij esij tere sel weretunen se Atua re no jinibb nir. Pol evel lingir ko etkai jinibb se Iesu nir. Ko nir arvivitu suri van re naim nga marok-korti ren san se ñer san nga nisen Tiranasa. Ko nabong jijle Pol okjiljilwer tevir, ko nir armurri suri lat nga puto suri. <sup>10</sup> Ean epari sia eru, mian ko ñeri Isrel ko jinibb ne vare jijle ne vanu ngok Esia arunge vajin nale se Numal.

#### *Natu Skeva nir*

<sup>11</sup> Atua elai derteren tevi Pol nga puloli majingen nga marinijnij nawone nir. <sup>12</sup> Jinibb arlai bbong sunsun ko nijor nga Pol niben mijparir, ko aran arlingi re jinibb nga marmesi nir, ko arres luwi e; ko neñin nga marsij arwolu lingir.

<sup>13</sup> Ko ñeri Isrel kele sopen nga marok-ivel sarra nga paroji tweni demij arloli lesi vajin nga paroji demij nir renger nise Numal Iesu. Arwerai tevi demij nir arwera "E, namrij tevi kami renger nise Iesu ngok nga Pol mokwerwer renger." <sup>14</sup> Ko ñeri Isrel ebut nga marivi natu jinibb ne sulsulen san nga nisen Skeva, arloli lesi nga parloli pirpok. <sup>15</sup> Mian ko neñin nga misij ngok owrai tevir owra "Iesu ngok, nurongwos pae, ko Pol kele nurongwose; ko kami ma, sete nurongwos rragrage kami." <sup>16</sup> Ko ñer nga neñin nga misij misilvi ngok otur mera ko oti siksenir, mian ko nir arwolu ivare lingi naim sen tevi niber sopen nga marrerra ko sunsun ser kele armererrerr. <sup>17</sup> Daron nga ñeri Isrel ko ñeri Gris nga marlik Epesas marunge sev nga miplari ngok, ko armetutu ko aririr temijpal. Mian ko jinibb nir arok-susi nise Iesu Numal se kerr van mare kele wor.

<sup>18</sup> Ko nir elep nga marok-osuri vajin Iesu artur mera ko arwerai tweni vajin re no jinibb nir nga tuwi nir arok-loli majingen ngok nir ne botut ko nanu nga pulokloksi mauren se jinibb nir. <sup>19</sup> Ko nir elep nga marok-loli mirpok arlai naul ser vini ko arsulir renger no jinibb nir. Naul nen elep sopen, erpe nowlir pian pijpari bebje silva 50 000. <sup>20</sup> Ko re sel nga marirpok nga derteren ner mutoe, nale se Numal ean epari lat jijle, ko ean eterter kele wor tetajer.

#### *Laten nga milep iak Epesas*

<sup>21</sup> Daron nga nanu jijle musuw vajin ie, ko Pol orrorrmi nga pñeslesi Masetonia ko Akaea re sel sen van Jerusalem e. Mian ko owra "Poro bosuw Jerusalem, ko ban kele ko wor Rom e." <sup>22</sup> Mian ko okoni jinibb nga morok-wilwil sen eru, Timoti ko Erastas, van Masetonia e. Ko ni elik mun sopen Esia.

<sup>23</sup> Re daron mawos ngok ko, laten nga milep san eplari iak Epesas suri sel ngok se Numal se kerr. <sup>24</sup> Laten ngok eplari erpel: Jinibb san elik nga mok-majenge nanu renger silva, nga nisen Dimitrias. Ko renger ie jinibb nir arok-surövi atua ser san nga mivi nesevin, nga nisen Artemis. Dimitrias emajing natu naim wowarreng nir re silva nga marrongrongi naim loten se Artemis. Ko ni ko nir nga marok-majenge nanu ngok nir arok-la nevöt elep re daron nga marwulwuler.

<sup>25</sup> Dimitrias ervei kortoni nir jijle nga marok-loli majingen ngok ko owra "Selek nir, kamrongwose nga rramok-loli lilane liken se kerr re sev nga rramloli ngel. <sup>26</sup> Ko rrek kamlesi ko kamrunge pa suri morok Pol nga oksusur metutue jinibb ko ervei tweni nir elep, sete re Epesas kis ko otomori renger lat jijle iel Esia. Okwera tweni nga atua nir nga jinibb marloli nevrer e sete arivi atua weretunen ko, ejki. <sup>27</sup> Ko niko ololi jinibb jijle arrorrmi esij suri kerr vajin, ko suri nanu nga rrammajing ngok e nir. Ko naim ne loten se atua se kerr ngok Artemis tivini tiva naim nawon vajin, ko jinibb nir setemun tarsurövi erpe atua san. Iok sete erres, suri lelingenok jinibb elep arok-surövi, re Esia ko re lat elep kele ne iel ngatan."

<sup>28</sup> Daron nga jinibb nen nir marunge iok, ko arlolar ko arkail van mare arwera "Artemis nga mivi atua ne Epesas, ni elep!" <sup>29</sup> Mian ko arvijajenge elep erpok, errale lat jijle re ngaim ngok. Ko nir sopor arul totkoni ñeri Masetonia ngok nuru, Gaeas ko Aristakas nga morpitevi Pol vini, ko arevei nuru van re lat nga marok-lilik e nga milep ser.

<sup>30</sup> Ko Pol emrreni pian pijiljilwer sopen tevi jinibb nir, ko kalesia nir sete armarong. <sup>31</sup> Ko nir sopor nga martori majingen se numal gavman ne vanu ngok Esia arivi seler e Pol, ko arlai nale van nga Pol sete pian.

<sup>32</sup> Ko delung arkarkar temijpal. Nir sopor arvijajenge nanu san ko nir sopor arvijajenge nanu san, ko nir elelep arrenge ko arvijajeng mae. <sup>33</sup> Ko ñeri Isrel nir arkoni nir san nga nisen Aleksanta nga pian putur re no nir. Ko jinibb arrorrmi nga ni evi ñernen ko, suri ñeri Isrel nir marloli mian mutur re nor. Ko

osusi nevren van mare nga puloli par-murrong. Owra puwra suri nelesien sen renge sev nga miplari. <sup>34</sup> Ko daron nga delung nir marongwose nga Aleksanta evi mēri Isrel, ko nir arkail kele van mare, arwera “Atemis nga mivi Atua ne Epesas, ni elep!” Arok-ḡelak nga markail mirpok ejpari mete nial eru totoklai.

<sup>35</sup> Mianan ko jinibb se numal gavman ne ngaim ngok san ea-loli delung nir armurrong, ko owrai tevir owra “Meri Epesas, jinibb jijle ne iel ngatan arongwose nga evi majingen se kerr ko nga rram-metmete naim ne loten ngok se Atemis nga nisen mian wor mare, ko nevöt on nen nga murrongrrongvi ni, nga mivitan re melrin vini iel. <sup>36</sup> Sete san orongwos rragrag pikerkeris re iok. Ko niko erres ma nolo kami pumolmol, pian ngatan. Ko sete erres batu kami piterter pirpok. <sup>37</sup> Kamtekai laru ngok vini, ko sete orvnae nanu san renge naim ne loten se kerr, ko sete orok-rij tere kele Atua ngok se kerr. <sup>38</sup> Poro Dimitrias tevi selen nir arlesi nanu san tere jinibb san, ko kot oto pa niko, ko numal nen nir arlik kele. Erres parloli nir wor parsupsuḡe. <sup>39</sup> Rreknga poro kamwera kapwera nanu kele san, ko erres rraploli re gortien san nga mivijuri sel mawos nen kobbong. <sup>40</sup> Suri emlas bbong tarevei kerr van re kot suri laten nga kamlat e milep lelingen, ko kapa-wera pirpese suri?” <sup>41</sup> Daron nga muwrai jijle mirpok, ko okoni tweni jinibb nir arivel.

## 20

### *Pol evel rrrurngi Masetonia ko Gris*

<sup>1</sup> Daron nga laten ngok musuw vajin, ko Pol everus kortoni jinibb se Iesu nir nga parini lat sansan. Elai rijen tevir nga puloli norrorrmien ser piterter, mian ko eremser, ko evel lingi ie van Masetonia e. <sup>2</sup> Evel rrrurngi ie, ko oklai nale elep nga puloli norrorrmien se jinibb piterter, mian ko etajer kele van Gris e. <sup>3</sup> Ko elik navöl itul ie, oktiriv nga ḡilai lweni drrav san ko pulwi van Siria e. Ko ornge nga mēri Isrel sopor arlingi nale ne ni nga parevji pini; mian ko erieni kele norrorrmien sen ko evijuri suri bbong ngaut renge sel nga mīasi Masetonia. <sup>4</sup> Ko Sopata, mēri Berea ngok nga mivi natu Piras, evivitu suri, ko mēri Tesalonaeka ngok Aristakas tevi Sekantas, nuru kele orvijuri. Meri Depe ngok Gaeas nuru Timoti ko mēri Asia ngok nuru, Tikikas nuru Tropimas, orvivotu kele suri. <sup>5</sup> Lartul ngok nir arpitevi kem, mian ko arwowomu kem vajin aran artiriv kem Troas. <sup>6</sup> Ko daron ne nanen nga is mijki ren ngok mīasi, ko namsa re drrav san, namlinglingi Pilipae, ko namwolu

namjipari Troas; ela nabong elim totoklai. Namkortu tevi nir ne ie ko namlik wik san totoklai.

### *Pol ejilwer tuloni tevi kalesia ne Troas nir*

<sup>7</sup> Re nabong nga womujnen re wik, namser kortu kele nga nabsurövi Atua ko nabaan kortu. Pol ejiljilwer tevi kalesia nir ejpari nat mīrrang, suri re rorpong nen bbong ko ni pia-ivel. <sup>8</sup> Ko re loloim nga muto mare jer nen e nga namlik ren, laet esaut arto ren. <sup>9</sup> Ko mēlakel san nisen lutikas oklik re winto nen. Ko daron nga Pol mokrij mirpok, ko lutikas meten orrwel, mian ko ematurrwel; mian ko evitan ko ewaji ngatan re dan. Naim nen arloli evi naim itul e. San oto ngatan, san oto mare nen, ko san oto mare jer. Ko ni evitan re nga mare jer nen; ko daron nga maran nga parlesi, ko ni emij pin jer pa. <sup>10</sup> Pol kele ean ngatan ko esaro ngavil, ejjol vitan ji lutikas ko erake ko owra “Sete kaprrormi, ni emaur luwi le pa!” <sup>11</sup> Mian ko Pol olwi van kele mare e ko namaan kortu jile, ko ejiljilwer tevir eanan ejpari nat emaoḡ nga ḡirin; ko namiel lingir vajin. <sup>12</sup> Mian ko arpitevi mēer wel nga mimaur luwi nga van re naim sen e, ko arir temijpal suri.

### *Namlinglingi Troas naman Maelitas e*

<sup>13</sup> Pol orrorrmi nga ni pivel kele van lat san nga nisen Asos. Ko kem namwowomu renge drrav nga naban nabtirive ni ie. <sup>14</sup> Ko okorti kele tevi kem ie, ko esa re drrav. Ko namwolu kele van Mitilen e. <sup>15</sup> Ko mevnen namini lat san mori Kios, ko nabong mīinj nen namjipari Samos. Ko mevnen vajin namjipari Maelitas, ko naman ngaut ie. <sup>16</sup> Pol orrorrmi nga nabwolu asi Epesas, suri sete emrreni nga putur periv Asia. Otor ngavilvil, suri emrreni ḡilik Jerusalem renge daron ne Pentekos.

### *Pol ejilwer tuloni tevi mērwomu nir ne kalesia nir ne Epesas*

<sup>17</sup> Re Maelitas, Pol elai nale van Epesas e, ko everus mērwomu nir ne kalesia nir nga parini parlesi ni. <sup>18</sup> Daron nga marjipari ie ko owrai tevir owra “Kamrongwose nanu jijle nga mololi nga meptevi kami daron nga mea-vini taole Asia. <sup>19</sup> Meri Isrel nir sopor arok-loli norrorrmien san parlloklosik, ko arloli nurnge esij elep. Ko inu nutajer bbong, numajing se Numal, ko nuloli nolok ean ngatan. Ko nabong elep suwen metek orurus. <sup>20</sup> Daron nga mewerwer renge no delung nir, rreknga re naim se kami sisamis, ko sete norrorrmien suk emtutu renge sev nga bowrai nga piwilwil se kami. <sup>21</sup> Nuwrai tevi mēri

Isrel ko jinibb ne vare nir nga parlinglingi nololien ser ko parieni lweni van ji Atua e, ko parosuri Numal Iesu.

<sup>22</sup> “Ko sete nurongwose sev pia-rremali jik re Jerusalem, ko bosuri ta Nerñin se Atua ko bean ie. <sup>23</sup> Ko re ngaim jijle nga botutur e, Nerñin On owra tevik nga bean re norongen nga m̄isij milep, ko parlingi inu re naim ne nekaien. <sup>24</sup> Ko sete nurrorrmi p̄elak sev nga p̄irrmali jik, ko nuwra ta ma bevinvini ore jijle majingen nga Numal Iesu m̄ilai tevik nga bololi. Ko majingen ngok evi nga bowrai tweni nos̄pen nga m̄irres suri nolo Atua nga m̄irres p̄elak.

<sup>25</sup> “Nuvel ji kami jijle, mewerwer tevi kami suri batun vanu se Atua. Ko lelingenok nurongwose nga sete kami san orongwose p̄ilesi kele nok. <sup>26</sup> Ko niko bowra nanu nga m̄iterter san tevi kami, ngel: Poro kami san pijijki, ko sete kamapiri inu e, ejki; <sup>27</sup> suri nuwrai nanu jijle ko pa nga Atua mimrreni kaprongwose. <sup>28</sup> Kapmetmet kami p̄irres ko nir nga Nerñin On m̄ilngi re nevre kami. Kaptor pipi kalesia se Atua nir, suri Atua owli tweni nir ko pa re drra Natun. <sup>29</sup> Nurongwose nga poro bevel lingi kami, ko sopor para-vini ji kami pirpe guli rrum nga parlokloksi kami. <sup>30</sup> Kami luwi kele kobbong sopor parvisviseni gerisen nga parlai tweni jinibb se Numal nir. <sup>31</sup> Kapmetmet, ko kaptur p̄iterter! Kaprrorrmi, natpong ko natrin ejpari sia itul totoklai nga nomok-visviseni tetajer kami e nga suwen metek mokjumjum suri.

<sup>32</sup> “Ko lelingenok vajan nulngi kami rengo nevre Atua, ko nulai nale se Atua tevi kami nga muwra nolon nga m̄irres orongwose piwilwil se kami. Nale ngok orongwose puloli kapterter ko p̄ilai nanu nga marres parremali ji kami, erpe rijrijen sen muwrai pa. <sup>33</sup> Ko inu sete nuvi jinibb nga nolok mimrreni nev̄ot rreknga nijor se jinibb m̄inij nir. <sup>34</sup> Kamrongwose nga inu nomok-p̄elak tevi nevre mawos nga belai sev nga inu tevi selek kele nir, nevre kem murrrol ren. <sup>35</sup> Renge nanu jijle nga mololi, nuviseni erpese nga kami kapvijuri nga piwilwil se nir nga niber mimelisna. Kaprrorrmi suri nale se Numal Iesu nga muwra ‘Neiren elep rengo kerr re rramlai nanu tevi jinibb, easie nga poro rraplai nanu ji jinibb.’ ”

<sup>36</sup> Daron nga Pol mivinvini jijle nale sen, ko ejjipa vitan tevi nir jijle ko olot. <sup>37</sup> Nir jijle arunge esij nga p̄ilinglingir, ko arting ko arlopope, ko arromji ko aremsen. <sup>38</sup> Arunge esij elep suri owrai tevir owra

“Sete kama-lesi kele inu nok.” Mian ko arpitevi van rengo drrav.

## 21

### *Pol ean Jerusalem*

<sup>1</sup> Vitunen nga namremser ko namsa re drrav, ko namwolu mawos van Kos e. Ko mevinen namjipari Roj, ko namtajer van, namjipari Patara. <sup>2</sup> Ko rengo ie, namlesi drrav kele san owra pian Ponisia e; ko namsa ren ko namwolu kele. <sup>3</sup> Namini vajin nga namleslesi norour nga milep ngok Saepras m̄iraji, mian ko namasi re devjen rres e; mian ko namwolu nga nabini Siria. Drrav ejpari iok re Taea nga pujubbl niyor ie, mian ko naman ngaut e. <sup>4</sup> Namsusi pejpej jinibb se Iesu nir ie, ko namlik tevir ejpari wik san. Ko Nerñin On owrowrai tevir nga parwerai tevi Pol nga setemun pian Jerusalem.

<sup>5</sup> Ko daron nga wik nen m̄iasi vajin ko namtipatun kele sel se kem. Jinibb totoklai tevi nesen ser ko natur nir arpitevi kem re ngaim ean ejpari jeli dis. Namjipa vitan rengo deñinan ko namlot. <sup>6</sup> Mian ko kem jijle namremremse kem sisamis; ko kem kobbong namluwi kele van re drrav e, ko nir ma arluwli van siser e.

<sup>7</sup> Ko drrav owlu lingi Taea, owlu kele vini rengo Toleme e. Ko naman ngaut, namlesi kele tasi kerr nir ne ie. Namlik nabong totoklai san tevi nir. <sup>8</sup> Ko mevinen naman Sisaria ko namlik tevi Pilip, nga mivi jinibb werweren. Evi san re nir ebut nga marlingi bonevis Jerusalem nga parmetmete nev̄ot. <sup>9</sup> Ko natun nesevin nir ivij nga setewor marlik ji norman, ko nga marokwerai tweni nale nga Atua m̄ilai tevir erpe propet. <sup>10</sup> Namlik Sisaria nabong sopor, mian ko jinibb san nga mivi propet, nisen Akapus, mivel jutia vini ji kem. <sup>11</sup> Evini ji kem ko elai netatuw se Pol ko eka lweni belan tevi nevre, ko owra “Ngok nale se Nerñin On nga muwra, Merwomu ne Isrel nga Jerusalem parkai jinibb nga netatuw sen ngel re murrun ngel kobbong, ko parlingi ni re nevre jinibb ne vare nir.” <sup>12</sup> Daron nga namrunge nale ngok ko kem jijle namok-werai eterter tevi Pol nga sete pian Jerusalem. <sup>13</sup> Ko Pol erij weli kem owra “Suri sev kamting ko kamtor otvi nolok? Sete numarong kis nga parlingi inu re naim ne nekaien suri Numal Iesu, ko numarong kele wor nga bemij suri ni iak Jerusalem.” <sup>14</sup> Ko niko sete nama-revei norrorrmien sen, ko namlinglingi kobbong. Ko namlot kobbong nga puto ko pa pirpe nga Numal se kerr mimrreni.

<sup>15</sup> Namlik eprepriv sopen ie, ko namser kortoni kele joro kem, mian ko namiel

namini Jerusalem e. <sup>16</sup> Jinibb se Iesu kele nir sopor ne Sisaria arpitevi kem. Ko artekai kem van re naim se jinibb san, nisen Nason, ne Saepras, nga miwi jinibb se Iesu tuwi ko pa. Ko namlik renge naim sen.

*Pol okluklue Jemes*

<sup>17</sup> Ko daron nga namjipari Jerusalem, ko jinibb se Numal nir arir temjipal nga parlai kem. <sup>18</sup> Mevinen vajin ko Pol emrreni pukluklue Jemes, ko kem nampitevi. Ko nir nga marivi m̄erwomu se kalesia nir arlik jikle ie. <sup>19</sup> Pol owra erres tevir, ko ewer visviseni tevir erpese nga Atua m̄ilai ni nga piwilwil se jinibb ne vare nir.

<sup>20</sup> Nir jikle nga marunge nale ngok arsurövi Atua. Ko arwerai tevi Pol arwera "Sele kem, nik kulesi pa nga jinibb nuvasngavöl vavis kis ne m̄eri Isrel nir marini marosuri. Ko nir jikle artori malume nale nesesreien se Moses erres p̄elak. <sup>21</sup> Ko nir arrorrmi nga nik kuvisviseni m̄eri Isrel nir nga marlik karkar re vanu se jinibb ne vare nir nga sete parosuri nesesreien ngok. Arwera nik kuwer orer nga natur norman nir setemun parvijuri sel ne tuwi se m̄eri Isrel nir, ko nga sete natur paran re bae.

<sup>22</sup> Ko rraploli p̄irpese le vajin, suri jinibb se kerr nir arongwos pae nga nik kumlik iel? <sup>23</sup> Ko kuploli ma sev nga nabwerai ngel: Jinibb se kem ivij arloli rijrijen sisamis ser tevi Atua. <sup>24</sup> Kupkorti ma tevir mevi rengen loten ser nga puloli nir parwokwok re no Atua. Ko kuplai nevöt nga nir parwuli nanu e nir rengen nabong ser nen, ko nir vajin parongwos parkiri batur. Ko ngok piviseni tevi jinibb nir nga sev nga marsupsupe suri nik sete arivi weretunen, ko jinibb jikle parongwose vajin nga ewretun nik kuvijuri ko wor nesesreien se Moses. <sup>25</sup> Ko daron sapon pa, namwerai rrrurngi jinibb ne vare e nir nga marivi kalesia, sev nga nir parloli. Namwerai rrrurngir e nga sete parurroi sev nga marlot e tevi atua m̄inij nir, sete parurroi vison nga drra muto malum ren, rreknga nanu rrum nga sete martevei otvi ßirisan nga drra puwlu tweni, ko sete kele parloli pisji tevi nesevin."

<sup>26</sup> Ko Pol emarong, ko mevinen eptevi nir ivij nen, arivel. Ko arloli verusen nga puloli parwokwok re no Atua. Ko Pol ean loloim re Naim se Atua nga puwrai tevi jinibb ne sulsulen suri nabong evis nga parvinvini ore majingen ne nir elim ngok nga parini parwokwok luwi re no Atua. Suri nir ngok parevji sisamis wor nanu rrum ko.

*Arrul totkoni Pol*

<sup>27</sup> Ko daron nga wik nen mutomori pusuw, ko m̄eri Isrel nga marivel Esia vini

markulu sweri Pol loloim re Naim On. Ko arser kortoni delung jinibb nir ko artur imera ko arrul totkoni Pol. <sup>28</sup> Arkikail, arwera "E, sele kem nir, m̄eri Isrel, kapini kapwilwil se kem! Merel okivel karkar lat jikle, okwerai nanu nga marsij nir tere kerr m̄eri Isrel nir ko tere nale nesesreien se Moses ko tere kele Naim On ngel. Ko ololi Naim On orrokitkit vajin suri eptevi jinibb ne vare nir vini ren." <sup>29</sup> Arwerai erpok suri arrorrmi Pol eptevi Tropimas nga miwi jinibb ne vare, m̄eri Epesas san, van re Naim On; suri arlesi nuru Pol re ngaim ie.

<sup>30</sup> Ko iok ololi kele laten nga milep san ermali re ngaim ngok. Ko arrul re Pol ko arteseni tweni re Naim On vini vare e; ko jinibb ne sulsulen nir arkikior luwi re metali. <sup>31</sup> Nir ngok armerreni parevji pini Pol; mian ko nale ejpari burtur se jinibb nuval ne Rom nir, ornge nga laten nga m̄ikarkar san ermali rengen Jerusalem totoklai. <sup>32</sup> Ko ngavilvilsen elai jinibb nuval tevi m̄erwomu ser nir sopor, arwolu van lat nga nat m̄ikarkar muto ren. Ko daron nga jinibb nir markulu marmeteni burtur tevi jinibb nuval sen nir, ko setemun arevji Pol. <sup>33</sup> Ko burtur ean morie Pol ko ololi jinibb sen nir arrul totkoni, ko arkai totkoni nevren tevi dil delrurr eru. Mian ko osusi tevir owra "Merel evi si le san? Ololi erpese le?" <sup>34</sup> Nir sopor arkail arwera nale san, ko nir m̄inij arwerai nale m̄inij. Arkarkar elep nawon, ko burtur elesi eterter nga purongwose sev evi batu laten. Mian ko okoni kele jinibb sen nir nga partekai Pol van re naim se jinibb ne nuval nir. <sup>35</sup> Daron nga martipatun nga partongsa van re naim nen, ko jinibb nir arlolar p̄elak, ololi jinibb ne nuval nir arwosi Pol van mare ko arivel tevi, <sup>36</sup> suri delung nir arvitu ko arkikaile elep arwera "Kaprevji, kaprevji pini!"

*Pol erij tevi delung*

<sup>37</sup> Otomori jinibb ne nuval nir parwosi Pol van loloim re naim ser, mian ko Pol ongoni tevi burtur owra "Wurru, orongwose ßejiljilwer tevim beblen?" Burtur osusi tevi owra "Erpese? Kurongwose kuprij nale se m̄eri Gris?" <sup>38</sup> Inu nurrorrmi nik kuvi m̄eri Ijip nen nga mutur imera ko m̄itre batu gavman ko m̄itkai jinibb nuval nir nuvasngavöl nuvavij (4000) ko nir maran marlik rengen lolo merwer."

<sup>39</sup> Ko Pol erij weli owra "Ejki, inu nuvi m̄eri Isrel. Nuak Silisia, re Tasas, nga miwi ngaim nga milep. Wurru kupmarong inu nga ßerij tevi delung ngok nir." <sup>40</sup> Burtur emarong, ko Pol otur ko oblöni nevren van mare nga nir parmurrong; mian ko ni erij tevir vajin re nale se m̄eri Isrel nir.

## 22

1 Ko Pol owra “Selek nir, mēri Isrel tata suk nir ko tuwak nir, wurru kapmurrong ko bowrai visviseni mauren suk tevi kami.” 2 Ko daron nga mēri Isrel nen nir marunge nga ni mokrij tevir renge nale mawos ser; ko nir armurrong kemkanie kele. Mian ko ni erij etajer, 3 owra “Inu nuvi mēri Isrel. Nuak Silisia re ngaim ngok Tasas. Numaur ko nulep ie. Nulai norongwosien suk ji jinibb nevisvisenien ngok Gamaliel. Evisviseni inu erres pelak re neseraien se bīrterawarrang se kerr nga bevijuri. Ko re daron ngok nuterter elep re majingen se Atua, erpe kami ngok nir lelingen. 4 Ko nomok-oji jinibb nga marvijuri sel se Iesu, nga berevji pinir. Nurrul totkoni norman ko nesevin nga mēlmgir re naim ne nekaien. 5 Ko ngok batu jinibb ne sulsulen tevi nir ne kaonsel se kerr arongwose parwerai nga evi weretunen. Re daron ngok nutori naul nga maruli paran ji tasi kerr ngok nir nga marivi mēri Isrel iak Damaskas. Nuan iok nga besre totkoni kalesia nir ko beptevi lwenir vini Jerusalem e nga parvirralir.

*Pol owrai tweni erpese mivini mivi jinibb se Iesu*

6 “Otomori pivi levial re daron san, nomok-tutur suri sel vini mori Damaskas, ko moron nga milep san omor vini re melrin ejparik. 7 Nuil jubbul ngatan re dan, ko nurnge drrelan san muwra tevik muwra “Sol, Sol, suri sev nik komok-loli esij tevi inu?” 8 Ko nususi tevi nuwra “Numal, nik kuvi isi le?” Ko ni owra lweni tevik owra “Inu le Iesu mēri Nasret ngok nga komok-loli esij tevik.” 9 Nir nga marivel korti tevik arlesi moron ngok ko sete ma arunge drrelan nga mīrrmali. 10 Mian ko nususi nuwra “Numal, kumrreni inu hololi sev?” Mian ko owrai lweni tevik owra “Kuptur imera ko kupan Damaskas e. Ko daron nga kupjipari ie, ko jinibb san pīwer visviseni tevim nanu jille nga Atua mīlmgir nga kupa-loli.” 11 Moron ngok omor temijpal ko ololi setemun nurongwose bokluklu, ko nir nga marvivitu suri inu artotke nevrek van Damaskas e. 12 Renge ngaim ngok, jinibb san elik ie nga nisen Ananaeas nga muosuri ko mutori neseraien se Moses nir mīrres, ko nga mēri Isrel nir nga marlik ie martori ni muon mīrres suri. 13 Evinī jik ko owrai tevik owra “Sol, selek, lelingenok kurongwose kupkulu luwi vajin!” Ko vesan rres, nuklu luwi ko numteni. 14 Mian ko owrai tevik owra “Atua nga apu se kerr nir marok-surōvi otobbtobbu nik nga kuprongwose nanu nir nga ni mimrrenir, ko nga kuplesi jinibb ne majingen se Atua nga mumomsawos mīrres, ko kuprunge

ni mawos drrelan. 15 Ko kupwerai tweni ko wor tevi jinibb jille sev nga kumlesi ko kumrunge. 16 Ko suri sev komok-tiriv? Kuptur mera, kuppaptaes, kupverus van ji Atua re loten nga ni pīrrawe tweni nololien som.”

*Atua okoni Pol nga puwrai tweni nospen nga mīrres se Iesu tevi jinibb ne vare nir*

17 “Nulwi vini Jerusalem e. Ko daron nga nomok-lot loloim re Naim On, ko nulesi nanu san erpe bori nga Atua miviseni tevik, 18 nga mēlesi Numal suk. Owrai tevik owra “Pingavilvilsen, kupiel lingi Jerusalem lelingen wolok ko pa, suri nir ne iel setemun mara-runge nale som suri inu.” 19 Ko nurij weli nuwra “Numal, nir arongwose nga renge lat ne liliken elep pa, nurrul re jinibb ko nurevji jinibb nga nosurien ser muto renge nik. 20 Ko daron nga kele marevji Steven e nga muwrai tweni nik nisem, nuir bbong, ko nutur tevir ko nomok-metmete joro nir nga marevji.” 21 Mian ko Numal owrai tevik nga bevel, ko erijrij inu nga pukoni twenik van ngasu jer ji jinibb ne vare nir.”

22 Delung nen arok-murronge nale se Pol erres ean ejpari vajin muspe suri jinibb ne vare nir. Ko daron nga moka-supe jinibb ne vare nir, ko artipatan nga markarkar orore vajin; arkail van mare arwera “Kaptekai tweni morok, kaprevji pini, sete erres nga pimaui!” 23 Ko arok-kikail lenglengen van mare, ko arwirrwirrwir sunsun ser, ko arserake maw ko arwirr karkare nga piviseni nga nir arunge lengleng esij. 24 Ko burtur se jinibb nuval ne Rom nir owrai tevi jinibb sen nir nga partekai Pol van loloim ko parvirrali nga puloli puwrai tweni suri sev mēri Isrel nir marok-kail tere mirpok. 25 Ko daron nga markai totkoni vajin nga parvirrali, ko Pol owrai tevi mērwomu ser nga moktur ie owra “E, inu nuvi mēri Rom le san. Ko setewor nukot. Sete kamrongwos kapvirralik!”

26 Daron nga mērwomu nen murronge nale ngok, ko ean owrai tweni tevi burtur owra “E, rrek kurrleuge, ko morok evi mēri nga kerr ko san!” 27 Mian ko burtur nen evini osusi tevi Pol owra “E, kupwerai pīrres, kuwretun le wor nga nik kuvi mēri Rom san?” Ko Pol eweli nale sen owra “O-o, nuwretun ko wor.” 28 Mian ko burtur nen owra “O, inu nuwirr pa nevōt nga milep san nga mevini vajin mevi mēri Rom.” Ko Pol erij weli owra “Ko inu nulai suri nuvijuri bbong tata suk.”

29 Ko nir nga marwera parevji Pol arjui luwi, ko burtur kele emtutu, suri otor

jabbe pa nga m̄ika totoni m̄eri Rom san re dil delrurr.

*Pol otur re no jinibb nga marlelep ne Isrel*

<sup>30</sup> Ko nabong m̄inij nen m̄erwomu emrreni purongwos mawos nale nga numal se m̄eri Isrel nir martere Pol ren. Mian ko orpaji dil delrurr ko ololi Pol evel sisarow, ko erijrij jinibb batu sulsulen nir totoklai nga parlik. Ko ololi artekai Pol van ko ololi otur liven re nor.

## 23

<sup>1</sup> Pol oklu mawos re nor ko owra “Tasik ko jojik nir, tetajer mijpari lelingenok, numajng se Atua rengo sel nga muon, ko nuwokwok erres.” <sup>2</sup> Ko batu jinibb ne sulsulen ngok Ananaeas owra tevi nir ngok nga marok-tur mori Pol nga nir san puwje jingo Pol. <sup>3</sup> Mian ko Pol owra tevi Ananaeas owra “Nik nga kumwokwok m̄irres, Atua pia-wuje nik ko! Kulik iok nga kupwera sere lat nga puto suri tevi inu rengo nesereien se Moses, ko kutur otvi nale nesereien nga kumwera parwujek!” <sup>4</sup> Ko jinibb nga martur mori Pol arwera “E, erpese kumrij tere batu jinibb ne sulsulen se Atua mirpok?” <sup>5</sup> Mian ko Pol erij weli owra “O, sete nurongwose nga ni mivi batu jinibb sulsulen. Ko Naul On owra sete erres rraprij nale nga m̄isij tere m̄erwomu se kerr san.”

<sup>6</sup> Ko mian ko daron nga Pol m̄ilesi nga nir ne gortien ngok sopor arivi Satusi nir ko sopor arivi Parasi nir, ko ekail van mare owra “Selek nir, inu nuvi Parasi san, ko nuvi kele natu m̄eri Parasi san. Ko armerreni parrowrowe inu iel lelingen suri inu nuosuri temijpale nale nga muwra jinibb nga marmij para-maur luwi kele.”

<sup>7</sup> Daron nga Pol muwra jilje mirpok musuw ko Parasi ko Satusi nir arlatlat lululwenir re gortien ser, ko arteri wukarir wajin evi meling eru e. <sup>8</sup> Satusi nir setemun arosuri anglo nir ko nenin nir, rreknga mijen nir nga parmaur luwi kele, ko Parasi nir ma arosuri nir totoklai. <sup>9</sup> Mian ko nat ekarkar temijpal. Ko jinibb nevisisenien ne nesereien se Moses sopor nga marivi Parasi nir artur imera ko arwerai eterter tevir arwera “Sete namlesi rragrag nanu san esij ji morok. Rrek ewretun nenin san rreknga anglo san erij tevi!” <sup>10</sup> Ko laten ser ean elep. Ko burtur emtutu nga tarevei Pol ko tarrerrersi niben sopen, mian ko erijrij jinibb sen nga partekai tweni. Ko nir aran artekai tweni van elik talev re naim ser.

<sup>11</sup> Re natpong nen, Numal otur re jeli Pol ko owra “Sete kuprormi nanu san! Erpe kumjiljilwer pa suri inu iel Jerusalem, ko kupjiljilwer kele piprok suri inu iak Rom.”

*Armurri suri nga parevji pini Pol*

<sup>12</sup> Ko re mevinen rorpong, m̄eri Isrel nir easi ngavöl ivij (40) arser korti ko arlingi nale san, ko arijrij tevi Atua arwera <sup>13</sup> “Sete nabaan ko sete nabminmin pijpari wor nabrevji pini Pol!” <sup>14</sup> Ko nir sopor aran ji batu sulsulen ko m̄erwomu ser ko arwera “Namloli pa rijrijen pa tevi Atua nga sete nama-urroi nanu san pijpari nabrevji pini wor Pol.” <sup>15</sup> Ko kami nir ne kaonsel, kaplai nale van ji burtur se m̄eri Rom nir. Kaplun̄i lwon ko kapngoni poro orongwose pitkai lweni Pol pulwi vini ji kami nga kapsusi rongonge kele tevi. Ko kem nabtiriv terai live sel sopon nga nabrevji pini nga setemun pijpari iok.”

<sup>16</sup> Ko metulu se Pol ornge nale ngok, ko ean owraie. <sup>17</sup> Mian ko Pol owrai tevi nir san owra “Kuptekai m̄elakel ngel van ji burtur. Emrreni puwrai nanu san tevi.” <sup>18</sup> Ko m̄er nga etkai m̄elakel nga van ji burtur, ko owra “Pol nga m̄ilik re naim ne nekaien okonik nga beptevi m̄elakel ngel vinuk jim, suri emrreni puwrai nanu san tevim.” <sup>19</sup> Burtur etkai m̄elakel nga van devjen e sopon, ko osusi tevi owra “Kuwra kupwera sev le tevik?” <sup>20</sup> Melakel erij weli owra “Meri Isrel sopor arloli pa nale san, ko mevi parngoni tevim nga kupa-pitevi Pol van ngatan re gortien ser. Parkerasim nga gortien ser emrreni kele purongwose sopon suri nanu ngok. <sup>21</sup> Ko warru, pijki setemun kuploli nanu nga parwerai ngok. Suri nir easi ngavöl ivij (40) nga parteptepi terai parevji Pol. Arloli pa rijrijen nga sete paraan ko sete parmini nanu san pijpari nga parevji pini. Ko lelingenok, artiriv pa nirka nga parloli ko nga parunge lweni sev nga kupwera lweni.” <sup>22</sup> Burtur owrai tevi owra “Sete kupwerwai tevi jinibb san purongwose sev nga kumwerwai tevik ngok.” Ko okoni tweni evel.

<sup>23</sup> Ko burtur nen everus jinibb sen eru, ko owrai tevi nuru owra “Koporan koporlesi jinibb ne nuval nir ongut varu (200) ko koporwai tevir nga nir partiriv parmetmet nga paran Sisaria. Koporlai nir ngavöl ebut (70) nga parsakel sisamis re os ser, ko nir ongut varu (200) kele nga parivi ne sir kis. Ko parlingingi iel re mete nial piesiw nat pupong. <sup>24</sup> Kaplingi os san puto metmet terai Pol. Ko kapmetmete p̄irres pian pijpari ji batu gavman ngok Piliks, nga sete nanu san pulokloksi rengo sel.” <sup>25</sup> Ko burtur oli naul san nga muwra:

<sup>26</sup> Neiren evel ji inu Klotias Lisias ko ean ji numal gavman Piliks. <sup>27</sup> Morok m̄eri Isrel arrul totkoni pa osuw ko otomori parevji pini. Ko daron nga mornge nga ni evi m̄eri Rom san, ko nutkai jinibb nuval suk nir van nga betkai tweni jir. <sup>28</sup> Numrreni bemteni otvi wor sev nga

marlolarsi ni suri, mian ko nutkai van re Kaonsel ser. <sup>29</sup> Ko nulesi nga ni sete ololi rragrrag nanu san nga ni pimij rreknga pian re naim ne nekaien suri. Nale nga marwerai ren evi bbong murrin ne nesereien ser kobbong. <sup>30</sup> Ko daron nga san mivini muwrai tevik nga m̄eri Isrel armurri suri nga parevji pini, ko niko nurrorrmi erres nga bokoni tweni vinuk jim. Nuwrai mawose tevi nir nga marlolarsi, nga poro nir arongwose parwerai tweni sev nga ni muloli m̄isij, renge nik nom.”

<sup>31</sup> Jinibb nuval nir arosuri nale se burtur ser, ko re natpong mawos nen kobbong, artekai Pol van re ngaim nga Antipatris e. <sup>32</sup> Ko mevinen, jinibb nuval nga os ser mijkie arivel luwi βelar van lat nga nir e, ko jinibb nuval nga os ser kobbong mutoe artajer tevi Pol. <sup>33</sup> Ko daron nga marini Sisaria ko arlai naul nen tevi numal Piliks, ko arlingi Pol renge nevren. <sup>34</sup> Piliks eve naul nen, ko osusi tevi Pol owra “Nik kuvi m̄eri ngabe?” Ko daron nga murrnge nga Pol mivi m̄eri Silisia <sup>35</sup> ko owrai tevi owra “Daron nga jinibb marini nga parwerai tweni sev nga marlesi rem, ko inu beamurronge nik.” Ko owrai tevi jinibb nuval nga parrul totkoni pa Pol ko renge naim ne nekaien nga muto ji ni.

## 24

*Meri Isrel arwerai tweni sev nga marlesi esij renge Pol*

<sup>1</sup> Nabong elim easi, ko batu jinibb sulsulen ngok Ananaeas ean Sisaria tevi m̄erwomu se m̄eri Isrel nir ko tevi kele jinibb ne nesereien san nga nisen Tetalas. Aran ji numal Piliks nga parwera tweni sev nga marlesi esij renge Pol. <sup>2</sup> Arverus Pol vini loloiem e, ko Tetalas owra tweni vajin nale se nir.

Owra “Numal, weretunen nik kuan mare, ko kuloli liken ne demat nga m̄irres oto epriv ji kem. Erres ma nik, ko kumloli nanu se Kerr muto m̄irres βelak. <sup>3</sup> Kem jijle namok-runge erres tetajer suri sev nga kumloli. <sup>4</sup> Sete numrreni bolokloksi daron som, ko nungonim ma nga kuprorrmi kem ko kupmurrong ta nale se kem welel nga nabwerai ngel. <sup>5</sup> Namtor sweri pa osuw nga morok evi jinibb nga m̄isij, ko evi batu liken nga m̄isij. Okdoli pa laten nga marlelep nir tevi m̄eri Isrel nga marlik rrale iel ngatan, ko evi m̄erwomu re lenglengen gortien san nga marvivitu suri m̄eri Nasret san. <sup>6</sup> Ololi lesi nga puloli naim se Atua purrokitkit re no Atua, ko namrrul totkoni. [Ko kem namtur metmet nga nabwera tweni lat nga puto

suri tevi renge sel ne nale nesereien se kem. <sup>7</sup> Ko numal gavman ngok Lisias eteseni tweni ji kem, <sup>8</sup> ko owrai nga si nga mimrreni puwra nanu san tere Pol parini ko parwerai tevi nik.]<sup>D</sup> Ko poro kupsusi tevi, ko kuprunge mawose nga sev nga namwerai evi weretunen ko wor.” <sup>9</sup> Ko m̄eri Isrel nen nir arkorti re nale ngok se Tetalas, ko arwera arivi weretunen p̄etpeti.

### *Pol erij ore nir*

<sup>10</sup> Ko numal gavman otungun tevi Pol nga p̄irij; mian ko Pol etipatun owra “Nurongwose nik komok-wera suri lat nga puto suri tevi jinibb ne vanu se kem nir evini ejpari lelingen ngel sia elep pa, ko inu nuir nga βerij ore nale ser ngok re nom. <sup>11</sup> Ko poro kupmeteni lilane nale suk, ko kuplesi nga setewor easi nabong esngavöl drromon eru (12) nga mean mosrövi Atua Jerusalem. <sup>12</sup> Ko m̄eri Isrel ngok nir sete arlesik nga m̄elat tevi jinibb sopor loloiem re Naim On, rreknga re naim loten ser san, rreknga renge lat kele san Jerusalem. <sup>13</sup> Ko iok eviseni nga nale nga marwerai tevim lelingenok arivi gerisen. <sup>14</sup> Ko sansan kobbong ewretun, ngel: nusrövi Atua se batu tata se kem renge sel san nga nir marwera m̄isarr. Ko nuosuri ma nanu p̄etpeti nga muto renge nale nesereien se Moses ko renge Naul se propet nir. <sup>15</sup> Ko inu norrorrmien suk oto eterter renge no Atua erpe nir kele, nga Atua pia-loli jinibb jijle parmaur luwi kele re mijen, ngok nga m̄irres ko nga m̄isij. <sup>16</sup> Ko suri iok, niko nuvlak tetajer nga bevijuri sel nga mumosawos m̄irres renge sev nga mololi tevi Atua ko tevi jinibb kele.

<sup>17</sup> “Ko nuvel lingi Jerusalem sia elep pa sopon easi, niko memrreni bolwi kele van nga βelai merrenien san sopon tevi nir nga nijor ser mijkie ne vanu suk, ko bololi sulsulen sopor van ji Atua. <sup>18</sup> Ko nomok-loli malum norrorrmien ngok, ko mian ko marsekai inu re loloiem se Atua, daron nga mololi jile nanu san nga muloli nuwokwok. Ko sete jinibb elep arlik tevik, ko laten kele ejki jik. <sup>19</sup> Ko m̄eri Isrel sopor nga marivel Esia vini arlik loloiem re daron ngok. Ko poro nir arlesi nanu san esij renge inu, ko erres parini parwerai tweni renge nom; <sup>20</sup> rreknga poro pijki, ko nir ngok ma parwerai tweni sev nga m̄isij nga mololi. Suri daron nga motur re no gortien ser, ko sete artor sweri rragrrag nanu san nga m̄isij renge inu. <sup>21</sup> Ko nale sansan kobbong arongwos parwerai, ni le: Daron nga motur renge nor ko nukail temijpal nuwra “E, kamloli nukot lelingen

<sup>D</sup> 24:8 Nale nga muto re nolo [ ], rrek sete Luk oli, ko jinibb san ea-ului vitue daron nga muli tweni kopi san ne naul ngel.

suri nuosuri nga jinibb nga marmij paramaur luwi kele rengen mijen.”

<sup>22</sup> Ko Piliks orongwos erres sopen sel se Numal. Mian ko ewer otvi nospen ser ko owra “Bea-werai lweni wor nale san daron nga burtur Lisias pia-vini e.”

<sup>23</sup> Mian ko owrai tevi jinibb ne nuval sen nga parmetmete Pol, ko sete parloli pilik talev pelak, ko sete parwer ore nga poro jinibb sen san pimrreni pivini pila nanu san tevi.

#### *Jinibb nuval armetmete Pol*

<sup>24</sup> Nabong evis arasi osuw ko Piliks nuru nesen sen Drusila, nga mivi nesen Isrel, orini lat nga marmetmet Pol e; ko Piliks owrai nga partekai Pol vini jin. Ko omurronge vajin Pol mokjilwer suri nosurien sen renga Iesu Kristo. <sup>25</sup> Ko daron nga Pol mijiljilwer suri murrin nga mirres, ko nga jinibb piwer ore sev nga ni kobbong mimrreni, ko nabong nga Atua pia-wer sesre lat nga puto suri tevi jinibb nir, ko Piliks emtutu ko owra “Kupiel vajin! Bealesi nabong minij kele san ko bea-verus lwenim kele vini.” <sup>26</sup> Ko ni orrorrmi nga putor sweri nevot sopen ji Pol nga puloli Pol pivel sisarow. Ko niko nabong elep okwera Pol pokini jin nga porok-jiljilwer.

<sup>27</sup> Ko sia eru easi, ko Piliks osuw vajin renga nga mivi numal gavman. Ko elinglingi Pol elik malum renga naim ne nekaien, suri emrreni puloli meri Isrel nir parunge pirres re ni. Mian ko Posias Pestas evini ela wani vajin milngen.

## 25

#### *Pol emrreni Sisa pia-wer sesesre lat nga puto suri tevi*

<sup>1</sup> Ko Pestas elai majingen sen ejpari nabong itul easi, ko evel lingi Sisaria van Jerusalem e. <sup>2</sup> Ko ie batu jinibb sulsulen nir ko numal se meri Isrel nir arwer visvisenie suri nale nga nir marlingi tere Pol. Ko arngoni kele tevi Pestas <sup>3</sup> poro orongwose pimarong partekai Pol vini Jerusalem e. Arngoni erpok suri arloli pa nale san nga parevji pini Pol renga live sel. <sup>4</sup> Ko Pestas owrai tevir owra “Pol pilik ko pa re naim ne nekaien iok Sisaria, ko sete mia-periv, inu bolwi kele van iok. <sup>5</sup> Ko poro ewretun ololi nanu san nga misij, ko kaplingi merwomu se kami sopor parpitevik nga parwera tweni renga nospen nen nanu san nga pitre ni ie.” <sup>6</sup> Pestas elik kele nabong owil rreknga esgavol musuw ko mia-van vajin Sisaria e. Ko mevinen vajin ko esakel re kot sen ko owrai nga partekai Pol vini jir. <sup>7</sup> Ko daron nga Pol misasi vini lolaim, ko meri Isrel nir ne Jerusalem arser rrake ko arwerai tweni nale nga martarter milep

tere Pol. Ko sete nale ser arrow rragrrag erpe nga arweretun. <sup>8</sup> Ko Pol eweli nale ser owra “Inu sete nuloli rragrrag nanu san tere nesereien se meri Isrel, rreknga tere Naim On rreknga tere Sisa, batu numal ne Rom.”

<sup>9</sup> Ko suri Pestas emrreni kobbong puloli meri Isrel nir parunge pirres ren, niko mususi tevi Pol muwra “Erpese? Nik kumrreni kupan Jerusalem nga parsupsufe nanu nir nga marlingi renga nie?” <sup>10</sup> Pol erij weli nale sen owra “Inu nutur pa re kot se Sisa san, ko osorsan kobbong nga ni kobbong kot sen puspe inu. Kurongwose erres pelak nga inu sete nuloli nanu san nga pulokloksi meri Isrel nir. <sup>11</sup> Poro ewretun nutor otvi nale nesereien ko nuloli nanu san nga musorsan nga bemij suri, ko erres kobbong pipok, numarong. Ko poro nale ser ngok nga marlingi renga inu parivi gerisen, ko san sete orongwose pilngik renga nevre. Ko inu numrreni bean botur re kot se Sisa iak Rom!”

<sup>12</sup> Ko daron nga Pol muwrai jile mirpok, ko Pestas ejiljilwer sopen tevi nir ne gortien sen musuw, ko owrai tevi Pol owra “Poro nik kumrreni kupan kuptur re nospen se Sisa, ko erres kobbong, kupan ko.”

#### *Pol otur re no batu numal Erot Akripa*

2

<sup>13</sup> Nabong sopen arasi van, ko batu numal Erot Akripa nuru jopin Benis orini Sisaria nga porlesi Pestas ko porwera erres tevi re nga mia-vini. <sup>14</sup> Orloli jile erpok, mian ko eprepriv ko pa sopen mian ko Pestas mia-supe Pol tevi batu numal Akripa. Ko owrai tevi owra “Daron nga Piliks musuw re majingen sen ko elinglingi jinibb san elik jer iok re naim ne nekaien. <sup>15</sup> Ko daron nga mean Jerusalem e ko jinibb sulsulen nir tevi merwomu se meri Isrel nir arini arwerai tevik nga bea-wera suri lat nga puto suri tevi. <sup>16</sup> Ko nuwrai tevir nga sete evi sel se kem meri Rom nga belngi nawone jinibb san van re nevre nir nga marok-tere ni re nospen; womujnen, daron sen puto wore ko nga ni putur re no jinibb nir nga puwrai tweni weli nale sen re sev nga nir marok-werai tere ni. <sup>17</sup> Ko daron nga lartul nen marpelari iel ko nusaro ngavilvil, ko mevinen mawos, nuan nulik re kot ko nuwrai tevi jinibb suk nir nga partekai Pol vini. <sup>18</sup> Ko daron nga jinibb martur imera nga parwera nale ser tere Pol, sete arwerai rragrrag nale san nga inu nulesi mivi nanu nga murrow, ejki rres. <sup>19</sup> Arij latlat kobbong tevi Pol suri nosurien ser ko wor meri Isrel nir, ko suri kele jinibb san nga nisen Iesu nga mimij, ko nga Pol muwra emaur luwi kele renga



mijen. <sup>20</sup> Ko reнге murrun nga mirpok, sete nurongwose pelak sel nen erres. Ko iok ololi nususi tevi Pol nuwra “Erpese? Nik kumrreni kupan Jerusalem nga inu bevinuk borngе nospen surim ie?” <sup>21</sup> Ko Pol ongoni nga bokoni van Rom nga batu numal ne Rom ngok Sisa pia-wera suri lat nga puto suri tevi ni ie. Ko iok ololi nuwrai tevi jinibb suk nir nga parmetmete pijpari ßelesi daron san nga bokoni van ji Sisa.” <sup>22</sup> Ko batu numal Akripa owrai tevi Pestas owra “Inu keke numrreni borngе nale se morok.” Pestas erij weli owra “Iow, ko rrek mevi ko pa.”

<sup>23</sup> Ko re nabong minij nen, batu numal Akripa nuru Benis orini re kot ser. Ko batbatu jinibb nuval nir ko nir nga maran mare re ngaim ngok arloli keke sel ser nga marok-tori batu numal ren. Mian ko Pestas elai nale nga partekai Pol vini loloim e, <sup>24</sup> ko owrai tevir owra “Batu numal Akripa ko kami jile nga rramkorti lelingen, kapmeteni morok! Meri Isrel jijle nir ne Jerusalem ko Sisaria arok-ini jik ko arloli nale suri, ko arkail arwera sete erres bololi morok pimaур. <sup>25</sup> Ko inu sete nulesi ololi nanu san esij nga pimij suri. Ko suri ongoni nga pian wor puloli Sisa piwer sesesre lat nga puto suri tevi, niko nurrormi bokoni tweni van ji Sisa Rom. <sup>26</sup> Ko sete nutor sweri rragrrag norrorrmien san suri nga boli van ji Sisa. Iok ko ololi melai vini mutur keke re no kami ko no nik batu numal Akripa keke. Nuwra kaplai tweni norrorrmien sopen ren nga boli van ji Sisa Rom. <sup>27</sup> Suri daron nga markoni jinibb san van ji Sisa, ko sete parkoni nawone, ko parwera suri wor nanu san nga misij nga muloli.”

## 26

### *Pol erij ore nir*

<sup>1</sup> Ko batu numal Akripa owrai tevi Pol owra “Iow, numarong vajin nik luwi kup-supe lweni nik.” Mian ko Pol ete tweni vajin nevren ko erij ore nir nale ser, owra

<sup>2</sup> “Batu numal Akripa, nulesi erpe daron suk nga mirres le san lelingen, suri nik kumlik ko inu daron suk oteo nga berij ore nale se meri Isrel nir re nom. <sup>3</sup> Suri kurongwose lilane erres murru kerr meri Isrel nir, ko latlaten se kem. Ko niko nun-gonim nga nolom pipriv nga kupmurrong sev nga bowrai.

<sup>4</sup> “Meri Isrel jile nir arongwose lilane murruk erres, etipatun re pa daron nga mewelili malum e ko. Arongwos pae murruk reнге vanu suk mawos ko re keke Jerusalem. <sup>5</sup> Arongwose erres nga daron nga mevi malum melakel e ko nukorti tevi gortien ngok se kerr nga marivi Parasi nga

murrurr mirterter keke wor, ko inu keke nuvi san. Ko meri Isrel

arongwose parwera nale ngok evi were-tunen. <sup>6</sup> Ko lelingenok nutur pa iel nga parsupsupe inu nospen nek, suri inu nulngi norrorrmien suk oto eterter reнге rijri-jen nga Atua muloli pa tevi birterawarrang se kerr nir ne tuwi. <sup>7</sup> Rijrijen ngok kobbong nga metka esngavol drromon eru (12) se kerr ngok marok-surövi Atua nutpong ko nutrin nga parтор sweri. <sup>8</sup> Batu numal Akripa, suri nanu ngok mawos kobbong, meri Isrel ngel nir arlingi nale tere inu lelingen. Ko meri Isrel nir, suri sev sete kamrongwos kaposuri nga Atua murongwose puloli jinibb pimaур luwi keke re mijen?

<sup>9</sup> “Tuwi nulesi erres nga bololi nanu jijle nga puore nise meri Nasret ngok Iesu. <sup>10</sup> Nuloli womue Jerusalem, ko jinibb sulsulen ko nir arlai derteren tevik nga melngi jinibb se Atua milep van re naim ne nekaien. Ko daron nga numal nir marwera nga nir parmij ko wor, ko inu keke nuwrai erres, parmij ko wor. <sup>11</sup> Daron elep nomok-ivel suri naim ne loten nir, nomok-virralir, ko nuloli lesi nga bololi parij pisij tere Iesu. Nulolarsi temjpal nir ko nuojir van ngasu nga borrrul totkonir reнге vanu minij nir nga bololi pisij tevir.”

### *Pol ospe suri erpese mivini mivi jinibb se Atua*

<sup>12</sup> Ko Pol owra “Niko nabong san nuvel re sel van Damaskas e tevi derteren nga batu sulsulen mlai tevik. <sup>13</sup> Ko levial re sel, nulesi moron nga milep san eplari re melrin nga mumor vaseni inu tevi nir nga marvivitu surik. Moron nen omor easi nial. <sup>14</sup> Ko kem jijle namvitan re dan. Ko nurngе drrelan san re nale se meri Isrel nir owrai tevik owra “Sol, Sol, suri sev komok-loli misij tevik mirpok? Sete erres kopok-loli terter nanu tere inu.” <sup>15</sup> Ko nususi tevi nuwra “Wurru, Numal, nik isi le?” Ko Numal erij welik owra “Inu nuvi Iesu le nga komok-loli misij tevik ngel. <sup>16</sup> Ko kupmera, kuptur. Inu nurrmali jim erpel nga bosusture nik nga kupivi jinibb ne majingen suk. Nik kupwera tweni ko wor tevi jinibb nir sev nga kumlesi lelingen suri inu, ko nanu nga keke beaviseni tevim. <sup>17</sup> Inu bemetmet nik pirres nga meri Isrel tevi jinibb ne vare nir sete arongwos parlokloksim. <sup>18</sup> Kupa-loli jinibb ne vare nir parmeteni wose. Kuprieni norrorrmien ser nga parlinglingi nemalik ko parini re moron. Kuprienir nga parlinglingi derteren se Demij ko parini vajin re derteren nga milep se Atua,

ko Atua ꝑitlasi tweni vajin nololien ser. Ko nosurien ser reнге inu ꝑitkair vajin nga parini parivi jinibb nga maron se Atua.”

<sup>19</sup> Ko Pol owra kele, “Batu numal Akripa, evi nale se wor ni nga mīlik reнге melrin le mosuri ngel. <sup>20</sup> Womujnen, nuwerwer tevi jinibb nir iak Damaskas, mian ko nutajer kele van Jerusalem e ko lat jille ne Jutia, ko mian ko ji kele jinibb ne vare nir. Nuwrai tevi jinibb nir nga parieni norrorrmien ser suri nololien ser, ko parosuri Atua. Ko murrur piviseni ko wor nga arieni pa norrorrmien ser osuw. <sup>21</sup> Ko suri majingen ngok ko, daron san nga mēlik re Naim On Jerusalem ko, mēri Isrel martur imera ko marrul totkonik, ko marloli lesi nga parevji pinik. <sup>22</sup> Ko Atua ewilwil se inu tetajer elep ejpari lelingen ngel, ko niko inu nutur iel, ko nurij tevi kami jille, jinibb nawon ko jinibb nga marlelep nir. Nale nga mowrair ngok arivi pa nale nga propet nir ko Moses kele marwerai tweni pa womu nga ꝑirmali, ngel: <sup>23</sup> Mesaea purnge ꝑisij ko wor reнге niben, ko pivi mērwomu jer kele nga pimaur luwi reнге mijen. Ko pusꝑe suri moron tevi mēri Isrel nir ko tevi kele jinibb ne vare nir.”

<sup>24</sup> Ko daron nga Pol mīrij mirpok mian ko Pestas ekail van jin owra “E, Pol, kulengleng! Norrorrmien som owlu ꝑelak, ko ololi batum erpe poklengleng pa.” <sup>25</sup> Ko Pol erij weli owra “Numal nga mīrres, inu sete nulengleng. Nale ngok nga mowrai arvijuri wor sel nen ko, ko arweretun. <sup>26</sup> Ko nanu ngel jille sete arremali re lat san nga muto teptepi. Nurongwose nik kurongwose sev nga mosꝑe suri ngok. Niko nurongwose nga sete kutor jabble nanu ngok san. <sup>27</sup> Numal Akripa, nik kuosuri nale se propet nir? Nurongwose erres nga nik kuosurir.”

<sup>28</sup> Akripa osusi tevi Pol owra “Erpese, rrek daron beblen welel lebbong kumrreni kupreveik nga bevinu bevi kalesia?” <sup>29</sup> Ko Pol erij weli owra “Rrek daron nga mipriv rreknga daron nga mumrrol, ko inu nulot tevi Atua, sete suri nik kobbong, ejki, ko suri kami jille nga kamok-murronge nale suk ngel, ko numrreni lenglengen nga kami jille kapirpe bbong inu ko. Re bbong dil delrurr suk pijki, sete numrreni kapruj mori ko kapan ren.”

<sup>30</sup> Mian ko batu numal Akripa, ko batu gavman nen, ko Benis, tevi nir mīnij kele artur imera <sup>31</sup> arivel, ko arwerwerai tevir arwera “Morok sete ololi nanu san esij nga pimij suri rreknga pian re naim ne nekaien suri.” <sup>32</sup> Ko batu numal Akripa owrai tevi Pestas owra “Poro nga sete Pol owrai pa nga murrreni pian putur re kot se Sisa, ko pivel sisarow kobbong.”

## 27

### *Pol owlu lingi Sisaria van Rom e*

<sup>1</sup> Ko arlingi pa nale osuw nga nabwolu van Itali e, mian ko arlingi Pol tevi jinibb kele sopor ne naim ne nekaien reнге nevre mērwomu san nga mimetmete jinibb nuval ongut vesan (100), nga nisen Julias. Ni evi ne gortien ngok nga marveruse Gortien se Batu Numal. <sup>2</sup> Drrav san elinglingi Atramitiam evini iel, ko owra pulwi kele van re ngaim ne Esia e nir. Ko naman namsa re drrav nen; ko mēri Masetonia kele san eptevi kem, nga sisen Tesalon-aeka ko nisen Aristakas. <sup>3</sup> Ko mevinen namjipari Saeton. Julias ololi erres tevi Pol ko ololi ean ngaut nga ꝑilesles i selen nir sopon, ko selen nen nir armetmet ni erres. <sup>4</sup> Daron nga namwolu lingi Saeton, ko namwolu tere ling ko namwolu van mori norour nga Saepras van devjen nga muruv e. <sup>5</sup> Ko namwolu lingi ngaut, naman re dis mot vajin van reнге devjen ne saot ne Silisia ko Pampilia, mian ko namjipari Lisia re ngaim ngok Maera. <sup>6</sup> Ko iok, mērwomu se jinibb nuval nir elesi drrav kele san nga mīlinglingi Aleksantria ko pian Itali e, ko ololi kem namsa re drrav ngok.

<sup>7</sup> Namwolu tere malum ling mirpok mian ejpari nabong evis wor nga namtor sweri ling nga marterter; mian ko nama-wolu jipari ngaim ngok Nitas. Ko ling eser elep ꝑelak, ko daptap elep, ololi setemun namrongwose nabwolu tajer. Mian ko namrieni drrav, namwolu pelaot nga naban re norour ngok Krit; ko namwolu asie bongsin nga marwera Salmone, ko namwolu sere devjen nga muruv e. <sup>8</sup> Namꝑelak elep namwolu seresre namtajer van, ko namjipari lat san nga marwera Sale Malum e nga muto mori ngaim ngok Lasea.

<sup>9</sup> Ko namlik iok eprepriv sopon; mian ko nivelen ne dis setemun erres, suri evi pa daro ling ravij. Ko nanen se mēri Isrel kele nir, nga marveruse Nabong nga marloli lilane nololien e, easi kele pa, ngok re Oktoba ko, mian ko Pol erij tevir nga puwnir. <sup>10</sup> Owra “Lartul, kapmurrong ta. Poro rrapwolu lelingenok, ko drrav se kerr tevi nijor nen nir parsij ꝑetꝑeti, ko mauren kele pilep pijiki.” <sup>11</sup> Ko Julias emrreni bbong pumurronge mērwomu ne drrav nale sen tevi mēri nga drrav sen nen, easie pumurronge nale se Pol. <sup>12</sup> Ko suri sale ngok sete evi sale nga mīrres ꝑelak re daron ne ling, ko otomori kem jille naꝑir nga poro nabwolu lesi kele van re sale mīnij ne Krit e san, nga nisen Piniks, nga nablik ie reнге daron ne ling. Piniks evi sale nga mīrres, bongsin eru, tuwen

emawos re not wes, tuwen emawos re saot wes.

*Ling serser nga milep san ejpari drrav ser*

<sup>13</sup> Sete epriv ko ling narrosiw nga m̄irres san etipatun eserser. Mian ko nir arrorrmi erres ko pa nga parloli sev nga marrorrmī. Mian ko arevei angka vini mare, arwolu. Arok-wolu seresre jeli botunmal.

<sup>14</sup> Ko sete epriv ko ling serser nga milep san nga nisen Merri etewut ngaut evini. <sup>15</sup> Daron nga ling nen mirevji kem, ko sete namrongwos nabwolu tere; ko namrieni lweni drrav namwolu suri ling, namesrete dis. <sup>16</sup> Ko namasi re norour ngok Kaota renge devjen ne saot, ololi namoruv e beblen. Erpe elai daron tevi kem nga nablingi lilane drrav nga welili puto p̄irres, ko jinibb nga marmajing re drrav nir arpelak elep sapon <sup>17</sup> nga parevei vini mare. Ko arevei dil sopor arselabe drrav e ngatan ko arm̄elji totkonir nga purrul totkoni drrav. Ko nir armetutu sapon, suri van ngalu jer re Lipia sou sopor arto ren, ko nir armetutu drrav tires ren. Ko iok ololi arjurōni nabin vini ngatan ko arlinglingi bbong drrav esal ling. <sup>18</sup> Ko ling eterter elep malum, ololi mevinen, nir arwirr tututweni kele nanu nga marengenir sopor van renge dis e. <sup>19</sup> Ko re mevinen kele, nir arwirr tututweni kele nijor ne drrav nir sopor arivel.

<sup>20</sup> Ko nabong elep setemun namlesi nial; ko natmupong kele, setemun namlesi moju nir. Ko tetajer ling okser lenglengen. Ko ololi norrorrmien se kem evitan vajin, ko namrorrmi rrekma setemun namrongwose nabmaur. <sup>21</sup> Ko nabong evis kis vajin nga sete kem san eaani nanen, mian ko Pol otur imera ko owrai tevir owra “Selek nir, poro kapmurrong pa nale suk nga mowrai womu pa, ko rrek sete rrama-wolu lingi Krit, ko sete rrama-tor jabble nanu nir mia-irpok. <sup>22</sup> Ko lelingenok nuwrai eterter tevi kami nga sete kapmetutu. Kerr san mauren sen sete mia-jijki, ko drrav ngel kobbong pijijki. <sup>23</sup> Suri natmupong, anglo se Atua san evini jik. Ngok anglo se Atua nga mevi jinibb sen, ko nga nomok-surōvi. <sup>24</sup> Ko owra ‘Pol, sete kupmetutu, nik kupan ko wor kuptur re no Sisa iak Rom. Ko renge Atua nalol nga m̄irres sen eir bbong nga puloli kami p̄etp̄eti nga kamsa renge drrav kapmaur.’ <sup>25</sup> Ko niko, selek nir, sete kapmetutu! Nuosuri Atua nga nanu jijle p̄irrmali pusorsan pirpe nga ni muwrai ngok. <sup>26</sup> Ko womujnen, ling ngok puti pepteni drrav se kerr renge norour san.”

*Aruj mori norour san*

<sup>27</sup> Ejpari nutpong esngavōl drromon ivij (14) nga dis mokuti karkar kem ngok

rengē dis ne Metiterenian, ko oruj mori nat p̄irrang vajin sapon, ko jinibb nga marmajing re drrav nir arrorrmi vajin nga otomori nabjipari ngaut san. <sup>28</sup> Mian ko arkai delrurr san rengē dil ko arjurōni van re nabbō dis; ko arlesi ningaw nen evi bbong ngavōl eru (20). Artiriv beblen mian ko arjurōni kele, ko arlesi ejpari vajin ningaw esngavōl drromon elim (15). <sup>29</sup> Ko armetutu nga drrav tumoworwor re nevōt, ko arjubblī angka ivij vitu re drrav aran ngatan. Ko arok-lot van ji atua ser nga nat p̄irin pingavil. <sup>30</sup> Ko jinibb nir nga marmajing re drrav arloli lesi nga parwolu lingi drrav; arjurōni natu drrav van ngatan ko arkerkeris arwera paran parjurōni kele angka m̄inij womu. <sup>31</sup> Ko Pol owrai tevi burtur se jinibb ne nuval nir tevi jinibb nuval sen nir owra “Poro jinibb nga marmajing re drrav sete parlik re drrav, ko sel kele san ejki nga rrapasi ren.” <sup>32</sup> Mian ko jinibb ne nuval nir artevei otvi dil nga murrul totkoni natu drrav ko arloli evitan van re dis e.

<sup>33</sup> Ko otomori vajin nat p̄isal p̄irin, ko Pol erij eterter tevir nga paraan. Owrai tevir owra “Ejpari nabong esngavōl drromon ivij (14) pa, nolo kami orrum p̄elak, ololi sete kamurroi rragrrage nanu san. <sup>34</sup> Nuwrai eterter tevi kami nga poro kapmerreni kapmaur, ko erres nga kapaan ko wor, puloli kami jijle kapterter nga sete san pijijki. Sete kami san niben p̄isij sapon.” <sup>35</sup> Daron nga Pol muwrai jile mirpok musuw ko elai bongsi niv san ko owra erres tevi Atua rengē no nir jile, ko obbri otvi ko orroi. <sup>36</sup> Mian ko norrorrmien ser evini erres luwi kele, ko nir jijle arlai nanen ko arurroi. <sup>37</sup> Kem p̄etp̄eti rengē drrav ejpari ongut varu bbulin ngavōl ebut drromon ouwon (276). <sup>38</sup> Ko daron nga nir toklai maraan jijle musuw, ko arwosi tweni bak wit nga maro re drrav ko arwirre van re dis nga puloli drrav p̄isisarow.

*Drrav emawor ngaut*

<sup>39</sup> Daron nga nat m̄irin vajin ko jinibb nga marmajing re drrav nir arlesi ngaut. Ko sete arlesi wose, ko arlesi ma sale san nga dep̄inan muto ren. Ko arrorrmi nga poro arongwose parloli ko parlai drrav pian ngaut ie. <sup>40</sup> Ko artevei otvi dil ne angka nga ivij ngok ko arlinglingir arjipon rengē dis, ko arupaji dil nga marrul totkoni niwos nga martori alale drrav e; mian ko arevei nabin nga womu, nga ling puwi drrav nga pian ngaut. <sup>41</sup> Ko no drrav osongti re sou dep̄inan san, ko eres jer; ko dis bburbur erpe paruti worwor drrav batun.

<sup>42</sup> Ko jinibb ne nuval nir arlingi nale nga parevji pini jinibb ne naim ne nekaien nir, suri arorrmi tarilong toku ko tarwolu. <sup>43</sup> Ko m̄erwomu ser em̄rreni p̄ila se Pol, ko ewer ore nororr̄m̄ien ser ngok; ko owrai tevi jinibb nir nga si nga murongwos p̄ilong purow jubbul womu van reнге dis ko p̄ilong van ngaut e. <sup>44</sup> Ko owrai tevi nir m̄inij nen nir nga sete marilong wos nga partori niriv parilong surir reнге niriv ko bebje drrav nga marmawor tweni. Ko iok ololi kem jille namjipari dep̄inan nga sete kem san ejjiki.

## 28

### *Pol elik Molta*

<sup>1</sup> Daron nga naman ngaut musuw ko nammosi erres vajin. Ko nama-runge arwera norour ngok nisen ko Molta. <sup>2</sup> Nir ne ie arloli erres p̄elak tevi kem. Re daron nen, naus ous ko melas elep; ko arsurre nabb nga nabbetli ren, mian ko armetmet lilane kem. <sup>3</sup> Ko Pol esresre joro nabb sopor, okwirr̄wirr nir van re nabb. Mian ko nūet san ornge nabb erangi p̄elake, ko eplari, ko eaji nevre Pol. <sup>4</sup> Ko daron nga jinibb ne ie marlesi nga nūet murrurrul re nevre Pol, ko arlongwis lululweni tevir arwera “O, kulesi rramwerai, morok evi wor jinibb nga mokrevji jinibb ko! Ko easi bbong sete orron re dis, ko melrin nga musorsan sete emarong nga ni pimaur.” <sup>5</sup> Ko Pol ewir̄rreni tweni nūet kobbong evitan luwi van re nabb e; ko sete milnge liwen sapon oto re nevre. <sup>6</sup> Ko jinibb nen nir arorr̄mi nga nevre pusol, poro pijki ko ni pivitan ngatan pivesane pimij pin. Arok-meteni suri epr̄iv, ko setemun nanu san eplari jin; mian ko arieni nororr̄m̄ien ser ko arwera “O, morok evi atua ko san!” <sup>7</sup> Ko batu jinibb ne norour ngok nga nisen Puplias, ni dan sen sapon oto mori ie. Puplias evi jinibb nga m̄irres p̄elak, ko ni eptevi kem van re naim sen. Ko namlik jin nabong itul. <sup>8</sup> Tata sen ematur re maling nga mesien dowalul muloli, ko nolon kele owlu eptiptevi drra. Ko Pol ean okuklue, elngi nevre renge ko olot tevi, ko ololi erres luwi vajin. <sup>9</sup> Ko vitunen, nir totoklai re norour ngok artekai nir nga marmesi vini ji Pol, ko ni ololi arres luwi. <sup>10</sup> Ko nir arlai merrenien elep tevi kem; ko daron nga namwolu vajin, ko nir arla nanen elep arlingir reнге drrav nga pia-ivi mas se kem reнге drrav.

### *Pol elinglingi Molta van Rom e*

<sup>11</sup> Namlik navol̄ itul arasi osuw, mian ko nama-sa re drrav san nga mitepi ie reнге daron ne ling. Drrav nen evi nga Aleksantria re Ijip, ko arveruse arwera ‘Atua m̄ilew’ (suri ewaji nise atua eru

ngok nga morivi m̄ilew, Kasto ko Polakis). <sup>12</sup> Namwolu vini namjipari Saerakus, ko namlik nabong itul ie. <sup>13</sup> Mian ko namwolu kele, ko namini re ngaim ngok Rejiam. Ko mevinen ling evi narrosiw nga m̄irres, mian ko namwolu kele ejpari nabong eru, ko namjipari ie Puteoli. <sup>14</sup> Iok namlesi tasi kerr ko joji kerr sopor; ko arngoni kem arwera nablik tevir kele wik san. Mian ko vitunen nama-jipari vajin Rom.

<sup>15</sup> Tasi kerr ko joji kerr ne Rom arunge nos̄pen suri kem, ko arivel ore kem nga parsewute kem reнге sel. Namesesewut re lat nga Apias m̄ili naim nga marok-wulwule nanen ren, ko re kele lat nga naim liliken mosien itul arto ren. Ko daron nga Pol m̄ilesir ko owra erres tevi Atua surir, ko nororr̄m̄ien sen evini eterter kele wor.

<sup>16</sup> Daron nga namjipari Rom vajin arlinglingi Pol p̄isan p̄ilik reнге naim san tevi jinibb nuval san nga pimetmete.

### *Pol ewerwer ie Rom*

<sup>17</sup> Namlik ie ejpari nabong itul arasi, ko Pol everus kortoni m̄erwomu se m̄eri Isrel nir ne ie, ko owrai tevir owra “Selek nir, sete nuloli rragrrag nanu san nga pulok-loksi jinibb se kerr nir; ko sete kele nutre nesereien se B̄irterawarrens se kerr nir. Ko nir nga Jerusalem ma arrul totkonik ko arlingik van re nevre m̄eri Rom nir. <sup>18</sup> Meri Rom arsusi nale elep tevik, mian ko armarong vajin nga bevel sisarow kobbong, suri arlesi sete nuloli nanu san nga puloli inu bemij suri. <sup>19</sup> Ko m̄eri Isrel nir armusus. Ko iok osonik nga mowra kele botur re no Sisa nga pia-wera suri lat nga puto suri tevik. Ko setemun nanu san oto nga B̄erij tere jinibb ne vanu suk nir reнге. <sup>20</sup> Iok ko ololi meverus kami nga B̄ejiljilwer sapon tevi kami suri nororr̄m̄ien ngok nir. Ewretun lenglengen, arkai totonik reнге dil delrrur mirpel suri m̄er nga kerr m̄eri Isrel nir rramtirive.” <sup>21</sup> Ko nir arij weli arwera “Sete san reнге Jutia ela naul san vini nga mus̄pe nik, ko sete nir san evini iel nga pus̄pe lokloksi nik sapon. <sup>22</sup> Ko nammerreni nabmurronge sev nga kupwerai. Suri namrongwose nga jinibb reнге lat jille arok-rij tere gortien nga mimerr ngok nga nik kumkorti reнге.”

<sup>23</sup> Mian ko arlingi nabong san nga parini parunge Pol p̄ijiljilwer tevir. Ko nir elep arini re wosenen re naim sen. Etipatun rorpong, ko evini ejpari nata mupong, Pol ejilwer elep tevir suri batun vanu se Atua. Ela nale tevir nga marto reнге nale nesereien se Moses ko re kele propet nir nga puloli nir parosuri Iesu. <sup>24</sup> Nir sopor arwera erres reнге sev nga Pol muwrai, ko sopor ejki, sete arosuri te. <sup>25</sup> Ko niko

arteri wukari nir eru e. Ko mian ko daron nga parivel vajin, ko Pol owra nale san tevir owra "E, nale ngok nga Nem̄in On m̄ilai tevi propet Aesea nga puwrai tevi Birterawarrang se kerr, osorsan erres, suri owra <sup>26</sup> 'Kupan kupwerai tweni tevi jinibb ngel nir: 'Kaprunge nga kaprunge, ko sete ma kama-rongwose. Kaplesi nga kaplesi, ko sete ma kama-lesi wose nabong sopon. <sup>27</sup> Suri nir jijle batur eterter. Boror arirpe maruti ore metipo, ko arpil ore meter. Poro pijki, ko batur parongwose, ko boror parunge, ko meter pimteni, ko parieni lwenir vini jik, ko inu bololi parres luwi.' "

<sup>28</sup> Ko Pol evinvini ore nale sen owra "Kami kaprongwose ko wor nga Atua elai pa nale ne mauren van ji jinibb ne vare nir. Nir ko parunge!" <sup>29</sup> Pol m̄irij jile musuw, ko nir arij latlat lululwi tevir suri nale nga Pol ko muwrai tevir, ko arivel sisamis.

<sup>30</sup> Ko renge sia eru totoklai Pol elik re naim san nga marok-wuli re navöl. Ko eir tama re jinibb jijle nga mimrreni pivini p̄ilesi ni. <sup>31</sup> Ni sete emtutu nga miwerwer suri batun vanu se Atua, ko okvisvisenir keke suri Numal Iesu Kristo, ko sete san ewer ore sopon.

**Naul nga Pol Muli tevi  
Kalesia Nir renge  
ROM  
Batu nale nga mivsivseni  
lut nga parmeteni naul  
ngel puto suri**

Jinibb arlesi Pol evi jinibb nga milep re kalesia nir, asi kalesia minij nir, ne tuwi ko mijpari lelingenok. Womu, ko ni oji kalesia nir eterter, mian ko ne daron nga ni mulesi Iesu rengen sel ne Damaskas, ko nolon olwi. Ko ni emajing vajin erpe Aposol, rreknga jinibb san nga Iesu mukoni, asi sia ngavöl eru (20). Ko re daron ngok ko ni ospë suri nospen nga mirres re vanu petpeti nir nga Rom mutorig. Ko ni oli kele naul elep tevi kalesia nir. Kerr kele rramrong-wos rrapmeteni naul ngok nir esngavöl drromon itul (13) nga marto malum, ko nga marlingir re Naul On. Ko naul nga ni muli tevi kalesia nir rengen Rom ospë erres pelak suri nospen nga mirres nga Pol mokwerwer suri re majingen sen. Ni owra jinibb jikle nir, meri Isrel nir ko jinibb ne vare nir, arlik re derteren ne nololien. Ko jinibb nir arongwos parmomsawos parres re bbong nosurien ser nga marosuri Iesu Kristo, daron nga marlingi nolor miterter rengen ni. Ko nir nga marosuri arlik vajin rengen demat tevi Atua, ko Nemän On ololi nir arivel sisarow rengen nololien ko mijen.

*Pol owra "erres" tevi nir*

<sup>1</sup> Inu Pol, nuvi jinibb ne majingen se Iesu Kristo. Atua everuse inu tweni nga bevi aposol, ko okonik suri nanu sansan bbong: nospen nga mirres sen. <sup>2</sup> Nospen ngok, Atua erijrij womu pae tevi jinibb sen nir rengen jingo propet nir, ko aruli tweni rengen Naul On. <sup>3</sup> Nospen ngok ospë suri Atua Natun, Iesu Kristo nga mivi Numal se kerr. Re devjen ne jinibb, ko ni eak rengen metka se Devet. <sup>4</sup> Ko re devjen se Atua, Atua eviseni rengen derteren nga milep sen nga Iesu evi ni Natun, suri nga muloloi ni mimaur luwi kele re mijen. <sup>5</sup> Ko rengen Iesu Kristo Atua ololi nuvi aposol san rengen nalol nga mirres sen, ko okonik nga bololi jinibb ne vare nir rengen vanu jikle nir parosuri ko parvijuri Iesu Kristo, puloli nga jinibb pilep parsurövi vajin ni nisen. <sup>6</sup> Ko niko majingen suk ejpari kami kele nga kamluk re Rom, nga Atua miveruse kami nga kapivi jinibb se Iesu Kristo.

<sup>7</sup> Nomok-uli naul ngel tevi kami nga kamluk Rom nga Atua mimmreni kami, ko miverus kami tweni nga kapivi jinibb nga

kapon pirres. Nurongwose, Atua Tata se kerr ko Numal Iesu Kristo porok-wilwil se kami ko porlai demat tevi kami rengen nalol nga mirres se nuru.

*Pol owra pian puklue nir*

<sup>8</sup> Womunen, nuwra bowra erres wor tevi Atua suk rengen nise Iesu Kristo suri kami jikle. Suri nosurien se kami arok-supsupe rengen iel ngatan petpeti. <sup>9-10</sup> Ko Atua orongwose numrreni temijpal bevinuk boklue kami. Nomok-majing sen tevi nolok petpeti rengen nospen nga mirres se Natun. Ko Atua orongwose nomok-rorrormi kami tetajer nabong jikle nga poro bolot, ko nomok-ngoni poro nga lelingenok vajin Atua pimarong ko borongwos vajin bevinuk ji kami. Suri nutriv tuwi le wor tweni nga bololi pipok. <sup>11</sup> Numrreni temijpal belesi kami pipok ngok, suri nuwra Bela merrenien se Nemän On san tevi kami nga puloli kaptur wor piterter. <sup>12</sup> Merrenien ngok nga mospe ngok evi nga rrapwer jiljile kerr tevi inu nosurien suk ko tevi kami nosurien se kami. <sup>13</sup> Ko niaken suk nir, nuwra kaprongwose nga vavis kis le pa, nuwra bevinuk ji kami; ko ejpari lelingenok, sete nurongwos wore. Nuwra betawe wenen sopen ji kami pipre nga mololi pa ji jinibb ne vare minij nir. <sup>14</sup> Suri Atua elngik pa nga ban wor ji jinibb petpeti nir, jinibb ne dis, ko jinibb ne liven vanu; nir nga norongwosien ser mutoe, ko nir nga norongwosien ser mijkie. <sup>15</sup> Ko niko numrreni lenglengen bewerwer suri nospen nga mirres tevi kami kele nga kamluk Rom.

*Derteren ne nospen nga mirres*

<sup>16</sup> Nuosuri nospen nga mirres ngok sete orongwos piasa nawon daron nga mewerwer e, suri derteren nga milep se Atua oto ren nga moklila mauren tevi jinibb jikle nir nga marosuri. Erpok re meri Isrel nir womu, mian ko vitunen re jinibb petpeti nir vajin. <sup>17</sup> Ko Atua eviseni sel sen nga ni puloli jinibb parmomsawos pirres rengen. Sel nen etipatun re nosurien ko owlu kis bbong re nosurien, ejpari bongsin mawos nga marmomsawos mirres petpeti vajin. Naul On owrai erpok re nga muspe mirpel: 'Ni nga mumomsawos mirres suri nosurien sen kis kobbong, mernen ko pimaur.'

*Jinibb nir arivel lingi Atua pa osuw*

<sup>18</sup> Atua eviseni pa lolaren sen re melrin vini iel ngatan. Lolaren sen ngok oto tere murrun nga marsij nir se jinibb nir nga marvilvil ore weretunen suri nololien ser nga marsij. <sup>19</sup> Lolaren sen oto terer erpok suri oto limjer ko pa nga parongwose Atua. Erpe Atua eviseni pa ni tevir.

<sup>20</sup> Sete arleslesi Atua, ko arlesi mawos mae erres renga nanu nir nga Atua mulolir, mītipatun nga muloli iel ngatan renga derteren sen nga sete orongwos pusuw. Arongwos pae erres p̄lak nga Atua ko ololi nanu ngok nir. Ko niko gerisen ser ejkie. <sup>21</sup> Suri arongwos pae Atua, ko sete artori erpe Atua, ko sete arwera erres wor tevi. Norrorrmien ser owlu elep, ko sete ejpari nanu san. Ko norrorrmien ser arlengleng vajin ko armalik. <sup>22</sup> Nir arwera norongwosien ser elep, ko arnganga nawon temijpal. <sup>23</sup> Ko arkelkele Atua nga mimaaur tuwi ngok vini, ko nga nosrövien sen milep, ko arsurövi wanie vajin nanu nga jinibb mulolir re nevren nga misavi rrongrrongvi jinibb, rreknga numön, rreknga numet, nanu nga marmaur mumrrol kobbong, pian ko parmij kobbong.

<sup>24</sup> Ko niko Atua elngilngir nga parloli sev nga marsij nga nolor marmerrrenir, ko arok-loli nanu nga marsij tevi nir sisamis lululweni. <sup>25</sup> Atua elngilngir erpok suri arkelkele weretunen suri Atua ko arla vajin nga mivi gerisen ela wani. Ko arlot tevi ko arvijuri sev nga Atua mulolir kobbong, ko Atua ejki. Ko Atua ni esansan kobbong erres osorsan nga parsurövi tuwi ngok vini. Piprok ko.

<sup>26</sup> Ko ngok Atua elngilngir nga parvijuri nanu nga marsij nga nolor marmerrreni karkare nir. Nesevin nir arkelkel arla wani milnge diwen ser nir, ko ngok arlokloksi murrun nga musorsan. <sup>27</sup> Ko erpok kele re norman nir. Nir arlinglingi sel nga musorsan nga parkorti tevi nesevin, ko armerrmerreni temijpal lululweni nir, ko arok-loli nanu nga marsij tevi nir lululweni. Ko Atua erpe otorrlai pa nir renga sev nga miplari pa jir suri nanu nga marsij nga marlolir.

<sup>28</sup> Ko suri armusus partori norrorrmien suri Atua, ko niko Atua vajin elngilngir renga norrorrmien ne lenglengen ser ko nololien nga marsij ser. <sup>29</sup> Nolor owun saute nanu lele nir nga marsij, nolor ela nanu jijle, arok-ungasi jinibb. Nolor owun saute lol leplep, murrun nga marevji pini jinibb, balpalen, gerisen, murrun nga marloli nawone m̄sij tevi jinibb, ko arivi jungwarwar. <sup>30</sup> Arok-linglingi nawon nale gerisen, arok-ungasi Atua, arok-rij teweswasi, batur eterter, arok-rij melmelas, armurri suri parloli p̄sij, arok-rong tweni tata ko tasu ser nir. <sup>31</sup> Norrorrmien ser ejkie, ko arok-tor otvi rijrijen ser, ko sete arrorrmii rragrag jinibb. <sup>32</sup> Arongwos pae nale nesereien se Atua nga muwra nir nga marok-loli mirpok parmij ko wor, ko arok-loli malum wore ko. Ko mare nen

kele, arok-rij erres suri nir nga kele marloli mirpok.

## 2

*Atua p̄wer sesesre lat nga puto suri tevi jinibb nir renga sel nga mumomsawos*

<sup>1-2</sup> Rramrongwose, Atua ololi nanu nga mumomsawos kobbong daron nga mutor vitrangij jinibb nir nga marok-loli nanu nir nga marirpok. Ko nik vajin nga komokwer lokloksi jinibb m̄n̄ij nir, nik lweni kupasi p̄pese? Suri daron nga komokwer lokloksi jinibb m̄n̄ij, komokwer lokloksi lweni nik, suri nik lweni komok-loli nanu mawos nen nir. <sup>3</sup> E selek, nik komok-loli nanu mawos nen b̄hong nga komokwer lokloksi jinibb m̄n̄ij nir suri! Ko kurrorrmii nik ma Atua sete orongwos p̄wer lokloksi nik? P̄pese? <sup>4</sup> Rrek nik kurrorrmii Atua p̄itlasi tweni nawon tama nololien som? Ewretun, Atua oktori selsale jinibb nir erres temijpal, ko oktori totoni nolon epriv temijpal. Ko sete kurongwose Atua nolon nga m̄rres ngok owra b̄hong p̄rvei lweni nik nolom pulululwi? <sup>5</sup> Ko nik nga nolom m̄iterter ko mumusus pulululwi, komok-ser kortoni kobbong nanu nir nga Atua pia-wer lokloksim surir renga nabong nga ni pia-wera suri lat nga puto suri tevi jinibb nir renga murrun mawos sen, ko lolaren sen pia-rremali. <sup>6</sup> Re nabong nen, Atua pia-wuli jinibb sisamis nir pusorsan tevi majingen sisamis ser. <sup>7</sup> Nir nga martori majingen nga marres ser marterter, ko niko marok-p̄lp̄lak suri nga Atua p̄ilesir erpe parres ko pusröv̄ir ko p̄ilai mauren nga sete orongwos pusuw, tevi nir nga ngok ko Atua p̄ilai mauren ne tuwi ngok vini tevir. <sup>8</sup> Ko nir ma nga marok-rrorrmii lweni kis nir lweni ko sete arvijuri weretunen, ko arvijuri b̄hong murrun nga m̄sij, tevi nir nga ngok ko Atua p̄ilai lolaren nga milep sen tevir. <sup>9</sup> Ko jinibb jijle nir nga marok-loli m̄sij parla norongen nga m̄sij ko norongen karkar nga marsij nir, womujnen re m̄eri Isrel nir, ko vitunen re jinibb p̄tp̄eti nir vajin. <sup>10</sup> Ko jinibb jijle nir nga marok-loli m̄rres parla demat ji Atua, ko Atua pusröv̄ir ko puosurir, womujnen re m̄eri Isrel nir, ko vitunen re jinibb p̄tp̄eti nir vajin. <sup>11</sup> Suri Atua ololi omomsawos osorsan kobbong tevi jinibb jijle nir.

<sup>12</sup> Jinibb ne vare nir arrelenge nale nesereien se Moses. Arok-loli esij, ko arok-mij ko wor suri iok kobbong; Atua sete pivijuri nale nesereien se Moses daron nga pia-wera suri lat nga puto suri tevir. Ko m̄eri Isrel ma nir nga martori nale nesereien se Moses ko nga marok-loli m̄sij, ko Atua pia-wera suri lat nga puto suri tevi

nir reнге nаle nesesreien ngok. <sup>13</sup> Suri sete jinibb san orongwos pumomsawos p̄irres re nga mok-runge nawone nаle nesesreien, ko re bbong nga mok-vijuri nаle nen. <sup>14</sup> Ewretun, jinibb ne vare nir sete arongwose nаle nesesreien. Ko daron nga marvijuri bbong nir nolор ko arloli osorsan tevi nаle nesesreien, erpe artori pa nаle nesesreien, weretunen sete jinibb san elai tevir. <sup>15</sup> Murrur ngok eviseni nga Atua elngi nаle nir nga nаle nesesreien muwrair oto pa reнге nolор. Norrorrmien ser keke eviseni keke nanu ngok, suri nabong sopen arongwos pae nga marloli m̄isij, ko nabong sopen arongwos pae nga marloli m̄irres. <sup>16</sup> Ko pia-irpok reнге nabong nga Atua pia-wera suri lat nga puto suri tevi jinibb nir nga nomok-werwer suri reнге nospen nga m̄irres. Re nabong nen, Atua pia-koni Iesu Kristo pia-wera suri lat nga puto suri tevi jinibb nir pusorsan tevi norrorrmien ser nga muto silveni pa re nolор.

*Nale nesesreien sete orongwos p̄ila nawone se m̄eri Isrel nir*

<sup>17</sup> Ko kami m̄eri Isrel nir, rrek sete erres p̄elак re kami. Kambibto re nаle nesesreien, ko kamrij melmelas re nga kamrongwose Atua. <sup>18</sup> Ko kamrongwos pae marongen se Atua, ko kamlesi wos pae sev nga m̄irres, suri marvisviseni pa kami reнге nаle nesesreien. <sup>19</sup> Ko kamok-wera eterter nga kamivi m̄erwomu re metrrorr nir, ko kamivi moron se nir nga marlik re nemalik, <sup>20</sup> ko kamivi jinibb nevisvisenien se lartul nga marlengleng ko se nir keke nga sete marongwose nanu san. Suri reнге nаle nesesreien nga kamtori ngok, aruli tweni p̄etp̄eti pa norongwosien ko weretunen. <sup>21</sup> Nanu ngok arivi weretunen nir. Ko erpese kami nga kamok-visviseni jinibb m̄inij nir, sete kamok-visviseni lweni kami nir? Kamok-werwer tere venao, ko erpese kami kamok-vevna? <sup>22</sup> Kamok-wer ore murrun nga marok-venae nesevin, ko erpese kami kamok-venvenae nesevin? Kamok-ungasi atua m̄inij nir, ko erpese kamok-evna reнге naim on ser nir? <sup>23</sup> Kamok-rij melmelas reнге nаle nesesreien, ko kamok-tor ototvi keke kobbong. Erpok kamok-lokloksi nise Atua. <sup>24</sup> Re iok eplari erpe Naul On muwrai pa, ngel: 'Jinibb ne vare nir arok-rij esij suri Atua suri bbong kami.'

<sup>25</sup> Ko re nga kaman pa reнге bae se m̄eri Isrel nir, ko kamlik erres, poro bbong kaptori nаle nesesreien ser. Ko poro nga kamok-tor otvi nаle nesesreien, ko kamsorsan vajin tevi jinibb ne vare nir nga sete maran reнге bae. <sup>26</sup> Suri poro nga jinibb ne vare san nga sete mian re bae otori sev nga nаle nesesreien se m̄eri Isrel

nir muwrai, erpe ean pa re bae ko osuw. <sup>27</sup> Ko nir vajin nga sete marevji niber reнге bae ko nga marosuri ma nаle nesesreien parwer lokloksi kami nga nаle nesesreien ko bae muto ji kami, ko kamok-tor ototvi nаle nen nir. <sup>28</sup> Si evi jinibb weretunen se Atua? Sete evi nir nga martori kis bbong nanu ne vare nir, erpe bae nga marloli vare re nibe jinibb. <sup>29</sup> Ko jinibb weretunen se Atua rramlesi wose reнге nolон. Ni ko bae sen oto re nolон, reнге nem̄in ko sete reнге niben. Ko ni ko sete jinibb nir arij erres suri, ko Atua ma.

### 3

*Muru Atua omomsawos erres tetajer*

<sup>1</sup> Ko poro pipok, nga m̄eri Isrel nir keke arivi jinibb ne nololien osorsan tevi jinibb ne vare nir, ko m̄eri Isrel nir nga martori bae ser, liken ser erresreng reнге jinibb ne vare nir erpese? <sup>2</sup> Ejki, arlik ko pa erresreng reнге nanu elep. Womujnen, Atua elai nаle sen tevir. <sup>3</sup> Weretunen, nir sopen sete arosuri. Ko murrun ser ngok orongwos puloli Atua p̄il nḡingir? <sup>4</sup> Ejki rres nawon! Jinibb jijle arongwos parkerkeris, ko Atua sete orongwos p̄ikrekris. Suri Naul On owra 'Niko parlesi wose nga nik Atua kummomsawos daron nga kumrij, ko kupasi daron nga marwera parwer lokloksi nik.'

<sup>5</sup> Ko poro βerij vajin pipre jinibb rres nurongwos bowra "O, sel nga m̄isij se kem m̄eri Isrel nir ololi jinibb nir arongwose parmeteni viringsi p̄irres p̄elак tevi sel nga m̄irres p̄elак se Atua. Ko niko sete osorsan nga Atua p̄iwer lokloksi kem suri sel nga m̄isij se kem." <sup>6</sup> Ejki rres nawon! Poro pipok, ko Atua pia-wera suri lat nga puto suri tevi jinibb nir ne iel ngatan piprese? Suri jinibb jijle nir arisj arirpe kem.

<sup>7</sup> Ko poro pivi weretunen nga weretunen se Atua eplari elep p̄elак suri gerisen suk, ko suri sev marwer lokloksi inu merpe malum jinibb nga m̄isij? <sup>8</sup> Ko poro pipok, vesan keke ko jinibb san tuwra "Bololi p̄isij, ko nanu nga m̄irres piplari reнге." Nir sopor arij pa esij suri inu arsupsupe pa nga inu nomok-rij mirpok. Erres p̄elак nga Atua pia-tor vitranḡi nir suri nаle ser ngok.

*Jinibb san ejki rres nawon nga mumomsawos m̄irres*

<sup>9</sup> Ko piprese vajin? Kem m̄eri Isrel nir nammomsawos asie jinibb ne vare nir? Ejki. Suri erpe nga mowrai pa, kem m̄eri Isrel nir ko jinibb ne vare nir keke rram-sorsan, rramlik re derteren ne nololien. <sup>10</sup> Suri Naul On owra 'Sete san omomsawos, ejki rres nawon. <sup>11</sup> Sete san orongwose, sete san eplак tweni nga purongwose Atua. <sup>12</sup> Nir p̄etp̄eti arivel lingi pa



Atua, nir jikle arloli esij. Sete san okloli erres, jinibb san ejki rres. <sup>13</sup> Birislar erpe dobbo jinibb san nga setewor martevni ore, ler armotot; nemer arok-kerkeris, nevlul jingor arsiy arirpe numet korpila, nale ser arengis. <sup>14</sup> Jingor owun saute rijen nga marsij nga marpelari rengo nolor nga markarkar, <sup>15</sup> nevrer esisarow nga parevji jinibb. <sup>16</sup> Lat jikle nga maran e, arlokloksi petpeti nanu nir, <sup>17</sup> ko arrelenge sel ne demat. <sup>18</sup> Ko metutuen se Atua sete oto sapon re nolor.'

<sup>19</sup> Ko rramrongose nga nale jikle ne nale nesereien owrai tevi nir nga marlik rengen, ngok mēri Isrel ko nir. Ko niko nir jikle jingor arwonwon vajin, setemun arongwos para-wera keke nanu san. Atua pia-tor vitrangi nir, ko jinibb petpeti nir, suri nololien nga marsij ser.

<sup>20</sup> Berij otvi vajin, bololi nale suk pumrrol: jinibb san ejki rres nawon nga murongwose pumomsawos p̄irres re no Atua re nga mivijuri nale nesereien nga Moses nūlai tevi mēri Isrel nir. Renge ma nale nesereien arlesi wose nololien ser.

*Jinibb san orongwos pumomsawos p̄irres rengo nosurien kis kobbong*

<sup>21</sup> Ko Atua eviseni vajin sel sen nga puloli jinibb pumomsawos p̄irres. Sete eplari rengo nale nesereien, ejki. Ko nale nesereien ko propet nir arjuji tweni. <sup>22</sup> Atua puloli jinibb petpeti parmomsawos parres poro bbong parosuri Iesu Kristo. Suri kerr jikle rramorsan kobbong. <sup>23</sup> Kerr jikle rramololi nololien ko rrammumrrol re nosrōvien se Atua. <sup>24</sup> Ko rrammomsawos rramrres nawon suri nalol nga m̄irres sen kobbong, erpe sete rramololi nanu san suri. Iesu Kristo kobbong ojri lweni kerr. <sup>25</sup> Atua elngi Iesu Kristo nga pimij nga puloli sel rengo drra ne mijen sen nga pitlasi tweni nololien nir se jinibb nir nga marosuri. Iok eviseni nga Atua ololi omomsawos erres re nga mimalie nololien se firterwarreng nga womu sapor, <sup>26</sup> suri nolon nga mipriv. Atua eviseni tevi kerr lelingenok nga ni mumomsawos m̄irres re nga sete m̄iwer lokloksi nir ngok, suri Iesu Kristo emij esre nir.

<sup>27</sup> Si vajin orongwos p̄irij melmelas? Sete jinibb san. Ko suri sev? Ko suri kerr sete rrammajing tweni liken mawos se kerr re nga rramvijuri nale nesereien, ko re bbong nga rramosuri Iesu Kristo. <sup>28</sup> Suri nomok-wera i eterter nga jinibb san orongwos pumomsawos p̄irres rengo nosurien kobbong, sete rengo majingen ne nale nesereien. <sup>29</sup> Ko evi weretunen nga mēri Isrel arok-wera "Atua evi Atua se kem kis kobbong"? Ejki, evi keke Atua se jinibb ne vare nir. <sup>30</sup> Suri Atua esansan

bbong, ko okloli osorsan tevi mēri Isrel nir nga maran pa rengo bae ser, ko tevi jinibb ne vare nir, nga sete maran re bae. Nuru korti, Atua okloli ormomsawos erres suri bbong nosurien se nuru. <sup>31</sup> Ko re iok nuwra bejkie nale nesereien suri nosurien? Ejki rres nawon, nutori ko wor mare.

## 4

*Epram omomsawos suri bbong nosurien sen*

<sup>1</sup> Ko pirpese vajin re Epram, batu tata se kem mēri Isrel nir? <sup>2</sup> Poro nga Epram omomsawos erres suri nga mivijuri nale nesereien, ko orongwos p̄irij melmelas suri. Ko ejki, ni sete orongwos p̄irij melmelas re no Atua. <sup>3</sup> Suri Naul On owra 'Epram osuri Atua, ko Atua elesi vajin erpe ni omomsawos erres.' <sup>4</sup> Poro jinibb san p̄imajing tweni nowlin, ko parlai wor nowlin ko suri majingen sen ngok, sete parlai pirpe merrenien san. <sup>5</sup> Ko poro jinibb san sete p̄imajing, nanu nga marlai tevi vajin pivi merrenien. Erpok ko, jinibb san poro puosuri Atua nga mokloli jinibb nga marsij marmomsawos m̄irres, ko poro m̄iernen sete p̄imajing suri majingen ne nale nesereien, ko Atua vajin p̄ilesi ni omomsawos erres suri nosurien sen ngok kobbong. <sup>6</sup> Erpok keke Numal Devet erij erres suri jinibb san nga Atua m̄ilesi mumomsawos m̄irres sete rengo nga mivijuri nale nesereien: <sup>7</sup> 'Jinibb nga Atua m̄itlasi tweni nololien sen ko musuw, elik pa erres vajin. <sup>8</sup> Jinibb nga Atua m̄itlasi nololien sen elik erres.'

<sup>9</sup> Ko rijen nga m̄irres ngok oto re nir nga maran pa re bae se mēri Isrel nir, rreknga re nir nga sete maran? Erpese re Epram? Suri erpe nga rramlesi pa, Naul On owra 'Atua elesi erpe ni omomsawos erres'. <sup>10</sup> Ko re wosenen, daron nga Atua muloli mirpok, ko Epram ean pa re bae, rreknga ejki wor? Ejki ko wor, setewor ean wor. <sup>11</sup> Ni bae sen evi pa nelesien ko san nga mivini vitu nga miviseni limjer nga ni omomsawos pa erres. Ko ni omomsawos erres erpok suri bbong nosurien sen, daron nga setewor mian re bae sen. Ko niko ni evi batu tata se nir nga marosuri ko nga sete maran re bae se mēri Isrel nir, ko nga Atua m̄ilesir marmomsawos m̄irres suri nosurien ser. <sup>12</sup> Ko evi keke batu tata se nir nga maran pa rengo bae se mēri Isrel nir, ko nga marvijuri keke bbōtō Epram re nosurien sen nga muto pa jin daron nga ni setewor ean re bae.

*Atua ololi rijrijen sen tevi Epram suri Epram nosurien sen*

<sup>13</sup> Rijrijen nga Atua muloli tevi Epram ko tevi metka sen, nga nir para-lai iel ngatan, sete eplari renge nale neseseien se mēri Isrel nir, ko eplari bbong suri Epram omomsawos erres renge nosurien sen. <sup>14</sup> Ko poro nga nir nga marvijuri nale neseseien se mēri Isrel nir para-lai iel ngatan, ko niko nosurien vajin evi nanu nawon, ko rijrijen ngok se Atua evitan nawon. <sup>15</sup> Ko ejki, nale neseseien ervei bbong lolaren se Atua. Suri poro nga nale neseseien pijki, ko nololien kele pijki. <sup>16</sup> Ko niko rijrijen ngok se Atua oto renge nosurien, ko evi vajin merrenien. Ko ngok, metka ngok nir pētḗpeti para-lai, sete nir kis nga renge nale neseseien se mēri Isrel nir, ko nir pētḗpeti nga nosurien ser mutoe mirpe Epram. Ko evi vajin Epram evi vajin batu tata se kerr pētḗpeti. <sup>17</sup> Erpe Atua muwrai renge Naul On: 'Nulngi nik kuvi batu tata se jinibb ne vanu pilep.' Ko re no Atua nga Epram muosuri, rijrijen ngok otur. Atua ngok nalol nga mīrres sen erres pēlak. Ni okla mauren tevi nir nga marmij, armaur luwi kele, ko okloli nanu nga sete marto, arpelari arto. <sup>18</sup> Ko rijrijen se Atua nga mīlai tevi Epram owrai nga ni metka sen pilep lenglengen, ko erpok ni pivi batu tata se jinibb ne vanu pilep.

Ko Epram osuri nale ngok eterter, ko etravi eterter nga pia-pelari. <sup>19</sup> Nosurien sen ngok sete otor wolwolue sapon, ejki, otori totoni vane, ewretun ni etra temijpal ko ni orrorrmi ni sete orongwos pivasus. Niben etra lenglengen, osorsan erpe pimij, suri sia sen oji ongut (100). Ko Sera kele emēr. <sup>20</sup> Ko Epram sete elngilngi nosurien sen, ko sete orong tweni rijrijen se Atua. Ko ni oksurōvi Atua, ko okrujrujoni kele nosurien sen pīterter re Atua. <sup>21</sup> Ni orongwos kemkamē nga Atua nga mīla rijrijen ngok tevi ewter temijpal ko pa nga puloli suri. <sup>22</sup> Ko re nga Epram muosuri Atua mirpok, ko Atua elesi ni erpe ni omomsawos erres, erpe nga Naul On muwrai.

<sup>23</sup> Ko nale ngok sete aruli suri ni kis, <sup>24</sup> ko aruli kele suri kerr jijle nga Atua pia-lesi nosurien se kerr pirpe rrammomsawos mīrres. Kerr rramosuri Atua nga muloli Numal se kerr Iesu Kristo mimaaur luwi kele renge mijen. <sup>25</sup> Iesu ngok, arlingi re mijen suri nololien se kerr, ko Atua ololi emaur luwi kele re mijen nga puloli kerr rrapmomsawos pīrres.

## 5

### *Demat ko neiren*

<sup>1</sup> Ko ngok, rrammomsawos erres pa suri nosurien se kerr, ko sete suri rramvijuri nale neseseien se mēri Isrel nir. Ko

rramlik vajin renge demat tevi Atua suri Numal se kerr Iesu Kristo. <sup>2</sup> Suri Kristo kele, rramjipari pa mauren ngel se Atua nga rrammaur rengen. Ko rramīr vajin suri rramrongwose rrapa-jipari nosrōvien se Atua. <sup>3</sup> Ko sete re iok kis kobbong, ko rramīr kele suri norongen nga mīsij nga jinibb nir marok-loli tevi kerr. Rramīr, suri rramrongwose norongen nga mīsij ngok puloli nolo kerr pīterter; <sup>4</sup> ko ngok vajin nalol nga mītra mīrres puto renge kerr. Ko ngok, norrorrmien se kerr pīterter kele wor vajin re Atua renge sev nga rramteravi jin. <sup>5</sup> Ko rramrongwose rrapa-lai ko pa nanu ngok nir nga rramteravir ji Atua, suri Atua ejivreni merrenien sen renge nolo kerr re nevre Nemīn On sen nga mīla tevi kerr.

<sup>6</sup> Renge daron nga rramtor pot malum, erpe sete rramrongwos rraploli lweni nanu san se kerr, ko Kristo emij sere kerr jinibb nga rramsij nir. Ko ololi erpok re daron momsawos nga Atua nūlgi. <sup>7</sup> Renge devjen ne jinibb, eterter nga san pimij suri jinibb san, poro mīnen pivi jinibb nga mumomsawos. Rrek poro nga mīnen pīrres pēlak, rrekma san pia-mij ko wor suri. <sup>8</sup> Ko Atua ma eviseni ni merrenien sen nga mīmreni kerr temijpal, re nga Kristo mimij suri kerr daron nga rramivi jinibb nga rramsij malum. <sup>9</sup> Ko lelingenok vajin rrammomsawos erres suri drra ne mijen sen. Ko rramrongwos kemkamē vajin nga ni pia-loli rrapa-asie lolaren se Atua vajin, suri ngok erpe nanu nga mīsisarow vajin renge kerr. <sup>10</sup> Suri daron nga rramivi malum devje nuval se Atua, ko mijen se ni Natun ololi rramivi vajin sele Atua. Ko evi vajin nanu nga mīsisarow nga rrapa-asi, suri rramivi pa sele Atua, ko Kristo emaur luwi pa renge derteren. <sup>11</sup> Rrapa-asi ko wor, ko rrapīr kele renge Atua suri Numal se kerr Iesu Kristo, nga mivi nevre Atua nga muloli rramivi vajin sele Atua.

### *Atam ko Iesu Kristo*

<sup>12</sup> Erpok ko, nololien mivini iel ngatan renge jinibb sansan kobbong, Atam, ko nololien ngok ololi mijen kele mivini. Ko mijen mian vajin re jinibb jijle, suri jinibb jijle arloli nololien. <sup>13</sup> Ko ngok, nololien oto womu ko pa iel ngatan osuw, ko vitunen nale neseseien se mēri Isrel nir mia-vini vajin. Ko sete areve nololien poro nale neseseien mijki. <sup>14</sup> Ko ewretun, mijen orul totkoni jinibb pētḗpeti nir, mītipatun re Atam mijpari daron nga Moses mīla nale neseseien. Nir pētḗpeti armij, ewretun nir nololien ser sete arlelep jipari nga Atam, nga mutor oti nale mawos se Atua. Ko re

nga Atam n̄isan muloli nololien mivini iel ngatan, rramlesi rurrngi Kristo nga p̄isan pia-la tweni nololien ngok.

<sup>15</sup> Ko merrenien se Kristo elep asi wor nololien se Atam. Ewretun, jinibb elep armij rengo nololien se Atam esan. Ko merrenien ma se Atua ko nelaien nawon nga Iesu Kristo n̄isan m̄ilai suri ni merrenien sen tevi jinibb elep, ngok elep p̄elak asi. <sup>16</sup> Ko nelaien ngok wenen sete erpe wenen ne nololien se jinibb sansan ngok. Suri wenen ne nololien sansan ngok evi nga Atua putor vitrangir; ko wenen ma ne nelaien ngok ololi jinibb armomsawos, ewretun nololien ser sete sansan, elep ko wor. <sup>17</sup> Ewretun, mijen orrul totkoni jinibb nir suri jinibb sansan bbong nga muloli nololien sen. Ko ewretun temijpal, kerr nga rramlai merrenien nga muwun saut se Atua ko nga rramivi vajin jinibb nga rrammomsawos nawone ren, kerr vajin rraprur totkoni mauren ko rrapbb̄ot rengo nololien suri Iesu Kristo esan.

<sup>18</sup> Ko erpok ko, nololien se jinibb sansan kobbong ololi ewter nga Atua putor vit-rangi jinibb j̄ile nir. Ko erpok kele, ma-jingen nga mumomsawos m̄irres se jinibb sansan kobbong ololi jinibb j̄ile nir parasi re iok ko parlai mauren nga mumomsawos m̄irres. <sup>19</sup> Ko niko, jinibb elep arini arivi jinibb ne nololien suri jinibb sansan otor otvi nale. Ko erpok kele, jinibb elep arini arivi vajin jinibb nga marmomsawos m̄irres suri jinibb sansan otori suri nale.

<sup>20</sup> Atua ela nale nesereien nga puloli jinibb parlasi wose limjer nololien ser nga muwun saut. Ko merrenien ma se Atua owun saut asi temijpale vajin. <sup>21</sup> Tuwi, nololien orrul totkoni kerr rengo mijen. Ko lelingenok vajin merrenien se Atua orrul totkoni kerr, ko suri Iesu Kristo Numal se kerr rrammomsawos erres, ko rraplai mauren na tuwi ngok vini.

## 6

### *Rrammij j̄ile re nololien*

<sup>1</sup> Ko pirpese vajin? Rraploli rengo nololien, nga merrenien se Atua piplari puwun saut? <sup>2</sup> Ejki rres nawon! Kerr rrammij j̄ile, ko niko rramtor otvi derteren ne nololien. Ko pirpese vajin rrapok-maur malum rengo nololien ngok? <sup>3</sup> Rrek sete kamrongwose nga rengo daron nga marpptaese kami nga kapivi se Iesu Kristo, ko arpaptaese kami kele rengo mijen sen. <sup>4</sup> Erpe rengo baptaesen se kerr, erpe artevni kerr tevi ni rengo mijen sen. Oto erpok nga kerr kele rramrong-wos rrapmaur rengo mauren nga mimerr, pirpe Iesu Kristo mimaur luwi kele re mijen suri nosr̄ovien ne derteren nga

milep se Tata sen. <sup>5</sup> Ko suri rramlik erpe artevni kerr tevi ni re mijen sen, ko niko rramrongwos pae nga rrapa-maur luwi kele re

mijen pirpe ni, rrapa-korti tevi ni. <sup>6</sup> Ko rramrongwose, mauren nga m̄itra se kerr emij tevi Kristo rengo nai pelaot, ko ngok olokloksi nibe kerr nga mokloli nololien. Ko niko setemun vajin rrapivi demij maur ne nololien. <sup>7</sup> Suri si nga mimij, evel sisarow vajin re devjen ne nololien.

<sup>8</sup> Ko suri rrammij tevi Kristo, ko niko rramosuri nga rrapa-maur kele tevi. <sup>9</sup> Ko rramrongwose Kristo, nga Atua muloli mimaur luwi kele pa re mijen, setemun pia-mij kele, suri mijen setemun orrul totkoni. <sup>10</sup> Re mijen nga mimij ren, ko emij vesansan kobbong, ko otor otvi derteren ne nololien ko osuw. Ko mauren sen nga mimaur rengen vajin, ko emaur korti luwi tevi Atua. <sup>11</sup> Ko kami, kapmeteni lululweni kami erpe kammij ko kamtor otvi derteren ne nololien, ko kammaur korti luwi tevi Atua suri Iesu Kristo.

<sup>12</sup> Ko niko, sete kaplingi nololien purrul totkoni nibe kami, nga kaposuri nanu nga marsij nga nibe kami marmerrenir. <sup>13</sup> Ko sete kaplinglingi murrmmurr ne nibe kami san pivi nevre nololien, pijki. Ko kaplai kami p̄etp̄eti tevi Atua erpe kammaur luwi re mijen. Ko murrmurru kami vajin nir parivi nevre Atua nga parok-loli pumomsawos p̄irres. <sup>14</sup> Ko niko nololien setemun purrul totkoni kami, suri setemun kamlik re nevre nale nesereien, ko kamlik vajin rengo nevre merrenien se Atua.

### *Demij maur rreknga slev ne murrn nga mumomsawos*

<sup>15</sup> Ko pirpese vajin? Rrek rraploli nololien suri setemun rramlik re nevre nale nesereien ko rramlik re nevre merrenien se Atua? Ejki rres nawon. <sup>16</sup> Rrek sete kamrongwose nga poro nga kammarong kapivi demij maur se jinibb san, ko setemun kaniel sisarow vajin, ko kapvijuri wor m̄nernen ko. Ko erpok ko, poro nga kapmarong kapvijuri sel ne nololien, ko derteren nen orrul totkoni vajin kami ko pa, jki kapa-mij ren. Ko poro nga ma kapmarong kapvijuri nale se Atua, ko kapa-asi ko, kapa-momsawos p̄irres. <sup>17</sup> Ko rramwera erres wor elep tevi Atua suri kami. Suri womu kamivi demij maur ne nololien, ko lelingenok vajin kamvijuri tevi nolo kami nevisisenien nga m̄irres nga marvisiseni kami ren. <sup>18</sup> Murrn ne nololien setemun orrul totkoni kami vajin, ko kamivi vajin demij maur ne murrn nga mumomsawos.

<sup>19</sup> Nomok-rij rrongrrongvi suri demij maur nir ngok nga puloli kaprongwose

ḡirres. Ko niko, kapmarong vajin kapvijuri ḡetḡeti ḡirres sel nga mumomsawos, pirpe demij maur san mivijuri ḡetḡeti numal sen. Ko ngok puloli kapa-on ḡirres. Ko setemun kapirpe bonevis nga kamok-vijuri sel nga sete muwokwok ko nololien se kami muwun saut ren. <sup>20</sup> Suri re wosenen, kamirpe demij maur ne nololien, ko murrin nga mumomsawos derteren nen ejki re kami. <sup>21</sup> Ko lelingenok vajin, no kami esij suri nololien ngok nir. Ko wene nir arirpese re wosenen? Suri bongsir para-vini re mijen. <sup>22</sup> Ko lelingenok vajin, murrin ne nololien derteren nen ejki re kami, ko kamirpe vajin demij maur se Atua. Ko wenen nga kaplai vajin evi murrin nga muon n̄irres, ko bongsin pia-vini re mauren ne tuwi ngok vini.

<sup>23</sup> Bowra ototvi vajin, bololi nale suk pumrrrol: nowli nololien evi mijen. Ko merrenien ma se Atua evi mauren ne tuwi ngok vini, rurrungi Iesu Kristo Numal se kerr.

## 7

### *Nale rrongrrongvien ne totkoi*

<sup>1</sup> Niaken suk nir, kami kamrongwose nale neseseien se m̄eri Isrel nir. Ko niko kamrongwose nga nale neseseien derteren nen oto re jinibb san daron nga mimaur malum. <sup>2</sup> Ko erpok, re nesevin san nga m̄ilik ji diwen sen, ko nale neseseien esre totoni tevi diwen sen daron nga diwen sen mimaur malum. Suri owra nir nga marlik pa ji diwen ser sete arongwos parkorti tevi norman m̄inij. Ko poro nga diwen sen pimij vajin, ko erpe artelasi tweni vinnen vajin renge nale neseseien nen nga m̄isre totoni tevi diwen sen. <sup>3</sup> Ko poro nga diwen sen mimaur malum ko vinnen pukorti tevi norman m̄inij, ko ngok otor otvi pa nale neseseien nen vajin, ololi pa esij. Ko poro nga diwen sen emij, ko nale neseseien nen setemun orrul totkoni vajin, ko ni sete ololi esij poro pukorti tevi norman m̄inij.

<sup>4</sup> Ko kami niaken suk nir, kamirpe vinnen. Ko kami kammij re devjen ne nale neseseien rengen mijen se Kristo. Ko erpe kamkorti vajin tevi diwen m̄inij vajin, nga kamkorti tevi Kristo. Ko Kristo emaur luwi re mijen nga kami kapwene wenen se Atua. <sup>5</sup> Daron nga rramlik malum rengen mauren tera se kerr, ko norrorrmien nga marsij se kerr nga nale neseseien mukonkonir armajing rengen nibe kerr, nga rrapwene wenen ne mijen. <sup>6</sup> Ko lelingenok vajin, artelasi tweni kerr rengen nale neseseien, erpe rrammij lingi, ko setemun orrul totkoni kerr. Ko rramm̄ejmajing vajin rengen sel nga mimerr se Nen̄in On,

ko sete rengen sel nga m̄itra, sel ne nale neseseien.

### *Nololien evi nanu nga m̄isij ḡerḡer*

<sup>7</sup> Ko rrapwera pirpese vajin? Rrapwera nale neseseien esij? Ejki rres nawon! Poro nga nale neseseien pijki, ko sete borongwose nanu nga m̄isij. Erpe poro nga nale neseseien nen pijki nga muwra 'Sete kupmerrmerreni karkar nanu san se jinibb m̄inij', ko sete borongwose vajin nga murrin ngok esij. <sup>8</sup> Ko nololien eska sel sen rengen nale neseseien, ko emajing vajin rengen inu merrenien karkar lele nir. Ko poro nale neseseien ejki, ko nololien emij vajin, derteren nen ejki rres nawon. <sup>9</sup> Ko bonevis, daron nga nale neseseien ejki wor, ko inu numaur. Ko nale neseseien evini vajin, ko nololien emaur vajin, <sup>10</sup> ko inu numij. Ko nale neseseien nga muwra ḡila mauren tevi jinibb, ejki mun, ela mijen vajin. <sup>11</sup> Erpe nololien eska sel sen rengen nale neseseien ko ekrekrasik ko otor pinik rengen nale neseseien.

<sup>12</sup> Ko iok rramlesi wose nale neseseien on ko nale nen nir aron ko armomsawos erres ḡelak. <sup>13</sup> Ko niko, nale neseseien, nga mivi nanu nga m̄irres, ela mijen tevi inu rrek? Ejki rres nawon! Ko nololien, nga m̄imajing rengen nanu nga m̄irres ngok, ololi numij. Ko ngok rramlesi wose nololien evi nanu nga m̄isij ḡerḡer, ko rengen nale neseseien evan ḡelak rengen sel nga m̄isij sen.

<sup>14</sup> Ngok rramrongwose nga nale neseseien erres, ko evel ji Atua. Ko inu ma nuvi jinibb kobbong, derteren suk ejkie, ko nurpe demij maur ne nololien. <sup>15</sup> Ko sete nurongwose nanu nga nomok-lolir. Suri nanu nga memrreni, sete nomok-lolir, ko nanu nga mongasir, ngok ko nomok-lolir. <sup>16</sup> Ko suri nomok-loli nanu nga sete memrreni bololir, ko ngok nurongwos bowra ewretun, nale neseseien erres kobbong. <sup>17</sup> Ko setemun evi inu nga nomok-loli m̄isij ngok, ko nololien nga m̄ilik rengen inu. <sup>18</sup> Suri nurongwose nga sete nanu san nga m̄irres elik rengen inu, erpe rengen nibe ngel. Suri nomok-marong nga bololi ḡirres, ko sete nurongwos bololi luwe. <sup>19</sup> Suri sete nomok-loli sev nga memrreni, ko nomok-loli nanu nga marsij nga numusus bololir. <sup>20</sup> Ko suri nomok-loli nanu nga numusus bololir, ko ngok erpe setemun inu nga nomok-loli nanu ngok nir, ko nololien nga m̄ilik rengen inu, ni ko ololir.

<sup>21</sup> Nulesi erpok tetajer ko: daron nga nuwra bololi nanu nga m̄irres, ko nanu nga m̄isij evini mori inu. <sup>22</sup> Nuir rengen nale neseseien se Atua rengen nolok; <sup>23</sup> ko nulesi tetajer, nololien nga m̄ilik rengen

nibek okval tevi norrorrmien suk nga mīrres ngok. Ko ololi vajin nololien nga orrul totkonik tetajer. <sup>24</sup> O, nulik esij pēpēpē. Siko pītka tweni inu rengo nibek ne mijen ngel? <sup>25</sup> Nuwra erres wor tevi Atua nga muloli mirpok rrrurrngi Iesu Kristo Numal se kerr.

Bowra ototvi vajin, bololi nale suk pumrrrol: poro nga inu besan, ko norrorrmien suk kobbong orongwos pivijuri nale nesereien se Atua. Ko nibek ma emelisna ko tetajer evijuri nololien.

## 8

### *Mauren nga Nem̄in On m̄ilai*

<sup>1</sup> Ko ngok Atua setemun orongwos puwra kerr nga rramkorti pa tevi Iesu Kristo rramsij kele mun, suri rramasi pa. <sup>2</sup> Suri derteren se Nem̄in On etlasi tweni kerr rengo nololien ko mijen nga m̄ika totoni kerr, ko ela mauren tevi kerr nga rramkorti tevi Iesu Kristo. <sup>3</sup> Ko nale nesereien, derteren sen ejkie nga pītasi tweni kerr rengo nololien ko mijen, suri nibe kerr ololi emelisna. Ko Atua okoni ni Natun, niben erpe nibe kerr nga marsij, tweni nga p̄ila tweni nololien suri mijen sen nga niben mimij rengo. <sup>4</sup> Atua ololi erpok tweni nga kerr nga rramok-vijuri Nem̄in On ko setemun rramvijuri nibe kerr nga marsij, rrapirpe vajin rramloli pēpēti pa sev nga nale nesereien muwrai. <sup>5</sup> Nir nga marok-vijuri niber nga marsij arok-rrorrm̄i suri niber nanu nen nir. Ko nir nga ma marok-vijuri Nem̄in On arok-rrorrm̄i suri Nem̄in On nanu sen nir. <sup>6</sup> Nga marok-rrorrm̄i suri niber erpok evi sel ne mijen, ko nga marok-rrorrm̄i suri Nem̄in On evi sel ne mauren ko demat. <sup>7</sup> Suri murr̄un nga marok-rrorrm̄i suri niber ololi arivi devje nuval se Atua, ko nir nga maripok sete arok-osuri nale nesereien se Atua, suri sete arongwose. <sup>8</sup> Ko nir nga marok-vijuri niber nga marsij ngok setete arongwose parloli Atua purngo p̄irres surir, ejki.

<sup>9</sup> Ko kami ma setemun kamvijuri nibe kami, ko kamvijuri Nem̄in On, suri Nem̄in On se Atua elik pa rengo kami. (Ko si nga Nem̄in On sete m̄ilik rengo, ni sete evi jinibb se Kristo.) <sup>10</sup> Ko suri Kristo elik rengo kami, ewretun nibe kami armij suri nololien, ko Nem̄in On emaur rengo kami, suri kammomsawos erres pa re no Atua. <sup>11</sup> Ko niko Atua, nga muloli Iesu mimaur luwi kele re mijen, Nem̄in On sen elik pa re kami. Ko derteren sen nga milep temijpal ngok puloli nibe kami kele parmaur rengo nev̄e Nem̄in On sen nga mimaur rengo kami.

<sup>12</sup> Ko niko, niaken suk nir, rrapvijuri ko wor Nem̄in On, ko setemun rrapvijuri nibe kerr nga marsij. <sup>13</sup> Suri poro nga kapvijuri nibe kami nga marsij ko kapmij. Ko poro nga ma kaprevji pini murr̄un ne nibe kami nga marsij re nev̄e Nem̄in On, ko kapmaur vajin. <sup>14</sup> Suri nir pēpēti nga Nem̄in On se Atua mokwowomue nir arivi pa natu Atua ko. <sup>15</sup> Suri Nem̄in On se Atua nga kamlai ngok setemun mialoli kele kapivi kele demij maur rreknaga kapmetutu, ko ololi kamivi natu Atua. Ko Nem̄in On ngok ololi rramok-verus Atua erpe "Tata". <sup>16</sup> Nem̄in On se Atua erij se nem̄i kerr nga muwra rramivi natu Atua. <sup>17</sup> Ko suri rramivi natu Atua, ko niko rrapa-korti tevi Kristo ko rrapa-la nanu nga marres nir se Atua. Ko rrapkorti ko wor tevi Kristo rengo norongen nga m̄isij ne ngatan ngel nir, tweni nga rrapa-korti kele tevi rengo nosr̄övien sen.

### *Nosr̄övien nga rrapa-lai*

<sup>18</sup> Re inu nelesien suk, nulesi nga norongen nga m̄isij nga rramok-runge m̄isij rer lelingen ngel arivi nanu nawon daron nga rrammetenir tevi nosr̄övien nga Atua pialai tevi kerr. <sup>19</sup> Suri nanu pēpēti nir nga Atua mulolir arok-tiriv malume eterter terai nga kerr rrapala pēpēti milnge kerr vajin nga rrapivi natu Atua. <sup>20</sup> Suri nga Atua elngi nanu pēpēti nir parvasil nawon. Ko iok sete suri nanu nir armarong p̄irpok, ko suri Atua ko wor emarong. Ko Atua elngi kele nga nanu nir partiriv tweni <sup>21</sup> nga Atua p̄ila twenir rengo murr̄un ngok nga marvasil nawon, erpe nga marok-maur m̄irres mian ko tetajer marok-mij pin ko marpo. Ko nanu nir para-asi vajin re iok ko para-korti tevi kerr natu Atua nir rengo nosr̄övien se Atua. <sup>22</sup> Suri rramrongwose, ejpari lelingen ngel, nanu pēpēti nir arirpe nesevin san nga m̄ingirr re nga puwosi natun. Suri nanu nir arok-tiriv eterter nga para-asi p̄irpok. <sup>23</sup> Ko kerr kele, rramirpok kele. Rramlai ma Nem̄in On, nga mirpe wenen womunen ne sev nga rrapa-lai, ko nolo kerr engirr vane rengo norongen nga m̄isij ngel. Ko rramok-tiriv nga Atua pia-juri lweni nibe kerr ko rrapa-ivi natun mawos vajin. <sup>24</sup> Ko Atua ewilwil se kerr nga rraptiriv tweni nanu ngok. Ewretun, setewor rramlesi; ko poro rraplesi, ko setemun rrama-tiriv vajin. Sete san oktiriv tweni nanu san nga m̄ilesi pae meten musuw. <sup>25</sup> Ko kerr rramok-tiriv tweni nanu san nga setewor rramlesi, nga rrapa-ivi Atua natun mawos. Ko rramlingi no kerr eterter mawose nga rrapa-lai ko.

<sup>26</sup> Ko erpok kele, Nem̄in On kele ewilwil se kerr rengo lolmijmij se kerr. Suri kerr

sete rramrongwose kele lut nga rraplot puto suri, ko Nerñin On ongun-ngun se kerr ji Atua. Ko engirr bbonge, suri nale san sete evter nga puwra tweni iok. <sup>27</sup> Ko Atua nga murongwos alje nolo jinibb orongwos kele norrorrmien se Nerñin On, suri nga Nerñin On okngun-ngun se kalesia nir osorsan tevi marongen se Atua.

<sup>28</sup> Ko rramrongwose nga Atua okloli nanu njile nir nga marpelpelari ji kerr arres bbong re kerr njile, suri rrammerreni Atua, ko Atua everus pa kerr suri norrorrmien sen nga muto tuwi pa. <sup>29</sup> Erpe Atua otobbtobbu wowomue kerr tuwi pa nga rrapa-ivi sen, ko elngi kerr nga rrapasorsan p̄et̄p̄eti ko wor tevi ni Natun. Ko Natun nen niaken sen pilep vajin, ko ni puwowomu re nir, pivi tuwar. <sup>30</sup> Ko kerr nga Atua m̄ilngi kerr nga rrapa-sorsan p̄et̄p̄eti tevi ni Natun, Atua everus tweni kerr pa osuw. Ko ololi kele rrammomsawos erres osuw, ko ela kele pa nosrövien sen tevi kerr osuw. Ko iok rramasi vajin re nanu p̄et̄p̄eti osuw.

*Merrenien se Atua nga mimrreni kerr e*

<sup>31</sup> Ko rrapwera p̄irpese vajin? Atua ko otur tevi kerr, ko si mun p̄itre kerr vajin? <sup>32</sup> Atua sete orull totkoni jere Natun mawos, ko okoni tweni vini, emij suri kerr jijle. Ko suri sev sete orongwos p̄ila nanu p̄et̄p̄eti tevi kerr vajin, suri ololi jile pa nanu nga m̄iterter nen osuw? <sup>33</sup> Ko si mun orongwos p̄ilngi nanu nga m̄isij san re kerr nga Atua miverus tweni kerr? Suri Atua ko ololi rramasi, okwera rrammomsawos jile pa erres osuw. <sup>34</sup> Si ni mun puwra rramsij? Iesu Kristo ejki. Suri ni emij suri kerr, ko emaur luwi kele osuw, ko elik vajin re Atua nevren rres, ko okngun-ngun vajin tevi Atua suri kerr. <sup>35</sup> Ko sev p̄irvei tweni kerr re merrenien se Atua nga mimrreni kerr e? Norongen nga m̄isij? Mauren nga m̄iterter? Daron nga jinibb marojoji sarrsarr kerr? Numer? Daron nga nanu san ejki nga rrapuri ore nibe kerr? Daron nga rramlik re liven ne mijen? Nuval? Ejki rres nawon! <sup>36</sup> Erpe Naul On muwrai, 'Suri namivi jinibb som, Atua, ko jinibb arwera parevji pini kem nabong jile. Arlesi kem erpe sipsip nga parpal.' <sup>37</sup> Nanu ngok nir ewretun arto tetajer ji kerr, ko rramasi kemkam̄e p̄et̄p̄eti rer. Atua nga mimrreni kerr ololi rramasie nir. <sup>38</sup> Suri nurongwose erres, sete nanu san orongwos p̄irvei tweni kerr re merrenien se Atua nga mimrreni kerr e, poro pivi mijen, rreknga mauren, anglo nir rreknga derteren tama san re melrin, rreknga nanu tama san ne lelingenok, rreknga nanu tama san nga pia-vini <sup>39</sup> rreknga nanu tama san re mare, rreknga nanu tama san rege lat nga jinibb nga

marmij marlik ren, rreknga nanu kele san nga Atua muloli, ko ejki. Sete nanu san orongwos p̄irvei tweni kerr re merrenien se Atua nga mimrreni kerr e rrrurngi Iesu Kristo Numal se kerr.

## 9

*Atua otobbtobbu m̄eri Isrel nir tuwi pa*

<sup>1</sup> Inu nuvi jinibb se Kristo weretunen. Sete nukrekris ko, ejki. Ko norrorrmien suk kele, Nerñin On owowomue ko owrai tevik, ko nurongwose nga inu sete nukrekris ko. <sup>2</sup> Norrorrmien suk nga morrorrmie ololi tetajer nurnge esij elep temijjal. Ololi nolok erpe p̄iap nawone. <sup>3</sup> Suri nga m̄eri Isrel ngok nir arivi inu metka suk nir, drra sansan, ko arlik malum ngasue Kristo. Inu nurrorrmi poro bololi nanu san ko puloli nga nir parongwos parini ji Kristo e. Rrek poro mijki, ko parla twenik ma ji Kristo, puloli Atua pulolarsik e, poro p̄irpok orongwos bololi sel ser san. <sup>4</sup> Suri nir arivi pa Atua jinibb sen, ko Atua ololi pa nir arivi ni natun ko eviseni pa nosrövien sen tevir. Ko ololi pa rijrijen sen nga marterter milep tevir osuw, ko ela nale neseseien tevir, ko loten weretunen. <sup>5</sup> Ko nir arivi metka se jinibb se Atua nga tuwi pa nir. Ko Kristo kele rege mauren sen nga mimaure e iel ngatan, ni evi metka ser nen san. Ko ni elep asi wore nir ko jinibb jijle, suri evi pa Atua. Ko kerr rrapusi nisen van mare tetajer tuwi ngok vini. P̄irpok ko!

<sup>6</sup> Ko bosusi ta: Suri m̄eri Isrel arlik ngasue Atua erpok ngok, ngok rijrijen se Atua suri m̄eri Isrel nir evitan? Ejki, suri sete m̄eri Isrel jijle nir arivi m̄eri Isrel weretunen se Atua. <sup>7</sup> Erpok kele, sete nir jijle nga marivi metka se Epram arivi Atua natun, ejki. Suri Atua owrai tevi Epram owra 'Renge Aesak kis kobbong, metka som nir nga m̄erijrij ngel e tevi nik para-iaak jin.' <sup>8</sup> Ko niko, rege bipi nga mariak, sete nir jile arivi Atua natun, ejki, bipi nga bbong mariak ko rege rijrijen se Atua arivi ni natun mawos. <sup>9</sup> Atua ololi rijrijen sen erpel le, owra 'Renge daron mawos nen ko, inu bea-luwi vini e. Ko ngok ko Sera pia-wosi bipi norman sen san.' Ngok niko rijrijen se Atua suri Aesak. <sup>10</sup> Ko sete ngok ko pa ko osuw, ejki. Suri Repeka natun norman eru nga morivi m̄ilew, nuru kele tata se nuru mawos ko apu se kem Aesak. <sup>11-12</sup> Ko suri bbong rege norrorrmien se Atua ko, owra putobbtobbu bipi nen nuru tuwen. Ko ngok, rege daron nga setewor moriak e, ko setewor morloli nanu san nga m̄irres ko nga m̄isij, ko Atua erij tevi Repeka owra 'Natun nga mivi m̄erwomu nen pokmajing se natun

nga miak vitunen.' Murrnun ngel eviseni nga daron nga Atua mutobbtobbue jinibb nir, ololi sete suri majingen ser, ejki, ko suri bbong norrormien se ni ko. <sup>13</sup> Erpe nale on se Atua muwrai, 'Numrreni Jekop ko nungasi Iso'.

#### *Atua okloli erres kobbong*

<sup>14</sup> Ko pirpese, rrapwera Atua ololi esij? Ejki rres nawon, ololi wor erres ko. <sup>15</sup> Suri owrai pa tevi Moses osuw, owra 'Poro nga inu borrorrmi jinibb san, ko inu bololi ko wor pirpe morrorrmi. Ko poro nga inu berres tevi jinibb san, ko inu bololi ko wor pirpe morrorrmi.' <sup>16</sup> Ko niko lat nga puto suri tevi jinibb nir sete evijuri sev nga nir marmerrni rrek marloli, ko sansan kobbong, evijuri norrormien se Atua nga murrormi jinibb e. <sup>17</sup> Renge Naul On Atua owrai tevi numal ne Ijip, owra 'Inu nulngi nik suri nanu sansan kobbong, nga nabong sapon, bololi nanu nga marlelep tevi nik, beviseni derteren suk, nga jinibb nga iel ngatan totoklai parlesi wose derteren suk.' <sup>18</sup> Ko niko Atua orrorrmi si nga ni murrormi ko wor, ko Atua ololi esij tevi si nga ni mimrreni puloli pisij ko wor tevi.

<sup>19</sup> Poro kami san puwrai tevik, puwra 'O, poro nanu ngel pirpok, ko Atua puwra jinibb san esij pirpese? Isi purongwos piwer ore nanu nga Atua mimrreni puloli? Sete san orongwos piwer ore marongen se Atua!' <sup>20</sup> Ko inu bowra lweni: 'Ko isi ko nik selek, nga kumrij weli Atua mirpok? Sete sopen dan san orongwos pirij tevi m̄er nga mumoli tweni ni renge dan pirpel, "Erpese nik kumlolik merpel?"' <sup>21</sup> Suri ewretun lenglengen, m̄er nga mokmoli dan mivi sopen esansan kobbong elesi suri lat nga puloli surie. Orongwos pumoli tweni sopen pieru renge dan san. Pumoli tweni tuwen pumomsen pirres pelak nga pivi ne nabong nga milep, ko pumoli tweni tuwen pivi ne nabong jikle.

<sup>22</sup> Ko erpok kele, sev nga Atua muloli, sete san orongwos pususi kele. Suri emrreni nga piviseni lolaren sen, ko puloli parongwose derteren sen. Ko ni ololi nolon epriv tevi nir nga mulolarsij nga paran renge mijen nga pia-vini. <sup>23</sup> Ko ni emrreni piviseni kele batun ne mete nosrovien sen nga muwon saut piplari, nga pimejivjiv vini renge kerr nga murrormi kerr, ko rraplai nosrovien sen. <sup>24</sup> Suri kerr rramivi jinibb nga ni miveruse. Sete renge m̄eri Isrel kis kobbong, ko ejki, renge kele jinibb ne vare nir. <sup>25</sup> Ngel evi nale nga muwrai renge Osea: 'Jinibb nga sete marivi suk, inu bea-verus nir 'jinibb suk'; ngaim nga sete memrrenir inu bea-verus nir 'Inu numrreni lengleng nir'.' <sup>26</sup> Ko

reng vanu jikle nga mowra 'Kami sete kamivi jinibb suk te', renge ie bea-wera 'kami kamivi jinibb suk'; renge ie beaveruse nir arivi Atua nga milik tuwi ngok vini natun.' <sup>27</sup> Ko Aesea ospe suri m̄eri Isrel nir, owra 'Poro nir pimauro pilep lengleng pirpe deḡinan nga ngalu renge dis, ko nir pievis kobbong Atua pia-lai ser para-maur. <sup>28</sup> Suri oto mori pa nga Atua putor m̄eljeni iel ngatan petpeti nir nga marsij, sete pisansan pijpon.' <sup>29</sup> Erpe Aesea nale sen nga muwrai tuwi pa renge daron nga nanu ngok nir setewor marini marpelari e, ko owra 'Poro Atua ne drromsen mare nga derteren jikle muto jin sete pilingling metka se kerr sapon parmaur jer, ngok rrapmij petpeti pirpe jinibb ne Sotom ko jinibb ne Komora nir. Ko ejki, suri ni orrorrmi kerr.'

#### *Meri Isrel elep sete arongwose nospen nga m̄irres se Kristo*

<sup>30</sup> Ko niko vajin kerr rramwera jinibb ne vare nir nga sete marpelak tweni parloli nir lweni parres re no Atua, nir arres vajin renge no Atua renge bbong nosurien ser ko. <sup>31</sup> Ko m̄eri Isrel nir nga marpelak milep nga parloli lweni nir parres renge no Atua renge sel ne nale nesereien se Moses, sete artor wos. <sup>32</sup> Ko suri sev nga nir sete martor wos mirpok? Suri sete armajil renge nosurien, ko armajil bbong renge sev nga nir kobbong marloli. Ko niko marjilaklak renge nevot nga marok-jilaklak e. <sup>33</sup> Ngok Atua ospe suri pa renge nale on, owra 'Inu nusi nevot san renge Saeon nga puloli jinibb parjilaklak ren, ko nir pilep parvitan ren. Ko jinibb nga puosuri nevot ngok, ko nevot ngok sete orongwos pulokloksi rragrage.'

## 10

<sup>1</sup> Selekt nir, renge inu ma nolok numrreni lengleng wore nga poro Atua p̄ila se jinibb suk nir parmaur. Ko niko inu nomok-pelak, nomok-lot suri nir. <sup>2</sup> Nurongwos bowrai tevi kami nga nir armerreni Atua elep; ko armerreni ma erpok, ko arrelenge sisini sel weretunen nga parlesi Atua rengen. <sup>3</sup> Ko arreleng sel nga Atua puloli jinibb pumomsawos pirres renge ni non, ko arloli sel ser ela wani milngen; ko armusus parvijuri sel se Atua. <sup>4</sup> Suri Kristo evnivni ore pa nanu nga nale nesereien se Moses muto tweni. Ko niko jinibb jile nga marosuri ni arres ko pa osuw renge no Atua.

#### *Atua elai mauren tevi m̄eri Isrel nir ko jinibb ne vare nir*

<sup>5</sup> Moses oli suri ngel, erpel: owra nga jinibb nga mimrreni pumomsawos pirres renge no Atua renge sel ne nale nesereien

se Moses pivijuri wor nale ne neseseieren ko, nga muwra 'Isi tama san nga pivijuri nanu nga nale neseseieren muwrai, mernen pimaui ko wor.' <sup>6</sup> Ko jinibb si nga mimrreni pumomsawos p̄irres renge no Atua renge sel ne nosurien p̄irpel ma: 'Sete kapsususi lululweni tevi kami lweni kapwera "Isi ko pian renge melrin?" (nga p̄ilai Iesu vini iel ngatan). <sup>7</sup> Rreknga kapwera "Isi pian ngatan ji jinibb nga marmij nir ko p̄ila lweni Iesu ji jinibb nga marmij nir vini?". Ejki, suri Iesu evini pa iel ngatan, ko emaur luwi pa renge mijen. <sup>8</sup> Ko sev nga marwerai ngok ni le ngel, "Nospen nga m̄irres se Atua oto mori bbong, renge jingo kami ko nolo kami." Nospen nga m̄irres ngok evi nospen ne nosurien nga kem namwerwer rengen pa tevi kami, erpel: <sup>9</sup> Poro nga kami kapwera tweni tevi jingo kami nga Iesu evi Numal, ko kaposuri renge nolo kami nga Atua ololi ni emaur luwi kele renge mijen, ko kami kapmaur ko pa. <sup>10</sup> Suri renge nosurien se kerr ko, renge nolo kerr, niko Atua ololi kerr rramomsawos erres ko pa renge ni non. Ko rramwera tweni nale ngok nir renge jingo kerr, ko niko kerr rrammaur ko pa osuw. <sup>11</sup> Naul On owra 'Isi tama san nga puosuri Atua sete orongwos pimanun te, ejki rres nawon.' <sup>12</sup> Ko nale ngel etawi ore jinibb jile nir. Suri sete enije renge m̄eri Isrel nir ko jinibb ne vare nir. Atua evi Numal se jinibb jile nir, ko erij erres suri jinibb jile nga marveruse ni. <sup>13</sup> Erpe Naul On owra 'Jinibb jijle nga parverus van ji Numal, ni pia-lai mauren tevir.'

<sup>14</sup> Ko nir parverus van jin p̄irpese ko poro sete parosuri? Ko nir parosuri ni p̄irpese ko poro sete parunge nospen nen? Ko nir parunge p̄irpese poro nospen nen sete parsuṣuṣuṣe tevir? <sup>15</sup> Ko parwerai nospen nen p̄irpese, poro sete parkoni san pian tweni nga puwrai? Erpe Naul On owra 'Erres p̄elak nga jinibb nga marok-konkoni mivini nga p̄ila Nospen nga m̄irres tevi jinibb nir.' <sup>16</sup> Ko sete jinibb jijle armerreni nospen nga m̄irres; Aesea ko owra 'Numal, isi osuri nospen se kem?' <sup>17</sup> Ko erpel ko, nosurien evini renge marunge nospen nen. Ko parunge daron nga parwerwer renge nospen se Kristo.

<sup>18</sup> Bosusi kele mun, Evi weretunen ko nga nir sete arunge nospen nen? Ejki rres nawon ma, nir arunge ko pa osuw. Suri Naul On ospe suri nir nga marwerwer renge nospen se Kristo, ko owra 'Drrelar owlu jile pa van renge ngatan jijle, ko nale ser ejpari pa renge bongsi ngatan totoklai osuw.' <sup>19</sup> Bosusi lweni kele mun, Evi weretunen ko wor nga m̄eri Isrel nir sete arongwose? Ejki rres nawon ma, nir arongwose ko pa; Moses ko evi m̄er

nga muwra wowomue: 'Mian ko beakoni jinibb nga marsij nir para-loli jinibb suk nir nolor pilelep. Bea-koni jinibb nga marlengle ngobong nga parloli kami kaplolar.' <sup>20</sup> Aesea owra rujrujoni kele owra 'Lartul nga sete marpej inu nabong san, nir arlesi inu pa. Lartul nga nabong san sete marverus inu, inu nuplari pa jir osuw.' <sup>21</sup> Ko Atua ospe ma suri m̄eri Isrel nir owra 'Renge nabong totoklai ngel pian pijpari nial piwaj pini, nusale nevrek nuru roroni m̄eri Isrel nir, nuwra Berake totonir, ko armusus. Sete arosuri inu, ko artere inu tetajer.'

## 11

### *Atua emrreni malume m̄eri Isrel*

<sup>1</sup> Inu numrreni bosusi kele ta, Atua elngi kurtweni m̄eri Isrel nir nga ni mutobbto-bbu wowomue nir tuwi jer pa? Ejki rres nawon! Suri inu ngel nuvi m̄eri Isrel le san, nga mevi metka nga meplari renge metka se Benjamin san, nga miplari re metka se Epram. <sup>2</sup> Ejki, Atua sete elngi kurtweni jinibb sen nir nga ni mutobbto-bbu womu nir tuwi jerjer pa. Kami kamrongwose sev nga Naul On muwrai renge nale nga Elaaja m̄irij tere m̄eri Isrel nir rengen tevi Atua <sup>3</sup> nga muwra "Numal, lartul ngel nir arevji pini propet som nir, ko artingtingi nawot som ne sulsulen. Ko inu le vajin nusansan nujpon jer, ko nir arloli lesi kele nga parevji pini inu." <sup>4</sup> Ko Atua owra lweni tevi erpese? Owra "Inu numetmete jinibb suk nir evi nuvasngavöl vabut (7000) nga sete marlotoe Atua keris ngok Bal." <sup>5</sup> Ko erpok kele, lelingenok, ni evis bbong nga Atua mutobbto-bbu nir, suri ni bbong merrenien sen. <sup>6</sup> Ni otobbto-bbu nir renge bbong ni ko merrenien sen, sete renge sev nga nir marok-majjenge. Poro Atua putobbto-bbu jinibb renge sev nga marmajjenge, ngok ko merrenien sen setemun pivi merrenien.

<sup>7</sup> Ko erpese? Meri Isrel nir setemun arlesi sev nga marpej. Nir evis kobbong nga Atua mutobbto-bbu arlesi. Nir jijle nga ngok nen e nir arjimje ore boror renge verusen se Atua. <sup>8</sup> Erpe Naul On owrai owra 'Atua ololi norrormien ser ko nolor arsiror pa, mivini mijpari lelingen ngel. Sete arongwos parkulkulu ko parungrunge.' <sup>9</sup> Ko erpe kele Devet owrai owra 'Poro bbong parlair e niva ko nimet renge nanen ser, poro bbong parvitan, ko poro bbong Atua putor vitrangir. <sup>10</sup> Poro bbong meter parror ko puloli sete parkulkulu, ko poro bbong durer parru tetajer renge solosloen ser.'

*Mian ko Atua p̄ila lweni m̄eri Isrel nir*



<sup>11</sup> Bosusi kele: Daron nga m̄eri Isrel nir marjilaklak ko arvitan, ko arvitan jer? Ejki ma, suri marloli nololien ko ololi Atua ela mauren tevi jinibb ne vare nir, nga puloli m̄eri Isrel nir nolor pilelep tevir e vajin. <sup>12</sup> Nololien se m̄eri Isrel nir ololi Atua ela nanu nga marres nir tevi jinibb totoklai ne iel ngatan nir. Ko suri m̄eri Isrel nir marvitan, ko ngok ololi Atua ela nijor nga marres nga marivi se Nem̄in tevi jinibb ne vare nir. Ko poro p̄irpok, ko pia-lai kele wor pia-asi jere ngok nir daron nga pia-la lwenir vajin.

*Atua ela mauren tevi jinibb ne vare nir*

<sup>13</sup> Lelingen ngel inu nurij tevi kami jinibb ne vare nir. Daron nga Atua m̄ilngi inu mevi aposol renge jinibb ne vare nir, ko nomok-sursurōvi majingen suk. <sup>14</sup> Nomok-loli erpok tweni nga bololi metka suk sopor nolor pilelep ko parini vajin, ko p̄irpok ko inu borongwose βela se nir sopon. <sup>15</sup> Ko daron nga Atua m̄isir duren tevi nir, ko ololi jinibb m̄inij nir nga marivi devje nuval se Atua arivi selen e vajin. Ko pia-irpese vajin poro Atua p̄ila lwenir? Pia-irpe marmij ko marmaur luwi kele!

<sup>16</sup> Poro kuloli niv sopor, ko kula san tevi Atua, ko niv p̄etp̄eti nen nir arivi vajin se Atua. Ko poro kuwer ore batu nai san, evi se Atua, ko rengsin p̄etp̄eti nir arivi vajin se Atua. <sup>17</sup> Nai olip ne orsel san rengsin emabbur tweni, ko Atua ela rengsi nai olip ne lolmarrul ko ejipipteni wanie. Ko kami jinibb ne vare nir kamirpok ko, kamirpe nai olip ne lolmarrul ngok, ko kamijipipti vajin renge nai olip ne orsel. Ko niko lelingen ngel vajin kami kamlai mauren nga m̄irres nga mivi se m̄eri Isrel nir. <sup>18</sup> Ko niko erpok ko, sete kapungasi lartul nga marirpe rengsi nai nga marmabbur tweni ngok nir. Kaplololie kami p̄irpese? Kami kamirpe bbong rengsin nir. Kami sete kamlau suwen tevi durun, ejki, durun ko ma ela suwen tevi kami.

<sup>19</sup> Ko nik kupwera "O-o, ko rengsin ngel nir nga marmabbur twenir ngel nir arloli inu milnguk." <sup>20</sup> Ngok ewretun, ko armabbur twenir suri sete arosuri. Ko kami ma kamosuri, ko kamluk malum. Ko sete kaplololie kami e te pijki, ko kapmetutu ma. <sup>21</sup> Atua ela tweni rengsi nai olip ngok nir. Ni eseri vasenir. Ko kapmetmet, kami kele takok-irpok, tisesri tweni kami kele tirpe nir. <sup>22</sup> Iel rramlesi erpese nga Atua murrin m̄irres, ko erpese nga murrin m̄iterter. Ni eta tweni nir nga marvitan, ko ololi erres tevi kami, poro kami kaplik tetajer p̄irres renge merrenien sen. Ko poro sete kaploli p̄irpok, ko kami kele, tita tweni kami. <sup>23</sup> Meri Isrel ngok nir, poro parlingi tweni murrin nga sete

marosuri ngok e, ko Atua p̄ilngi lwenir renge milnger. Suri Atua orongwos puloli p̄irpok. <sup>24</sup> Kami nga tuwi kamivi jinibb ne vare, kami kamirpe nai olip ne lolmarrul ngok rengsin. Ko Atua ejipipteni kami tevi nai olip ne orsel sen san, nga sete kamsorsan p̄elak tei. Ko m̄eri Isrel ma arirpe rengsi nai olip weretunen ne orsel ngel, ko evi nanu nga m̄isisarow nga ni p̄ijipteni lweni nir renge batur mawos kele.

*Atua orrorrmi jinibb jikle*

<sup>25</sup> Selek nir, nale weretunen kobbong san ngok nga Atua muloli muto teptepi ngok, inu numrreni kami kaprongwose, suri nga esij nga kami kaprorrmi kami wor norongwosien se kami easi nale nen. Evi nga muspe suri butterter se m̄eri Isrel nir sete evi murrin san nga puto tetajer, ejki. Murrin ngok orongwos puto renge nir pian pijpari bbong jinibb ne vare totoklai nga Atua mutobbobbu nir nen parini ji Atua. Ko murrin ngok pia-suw vajin. <sup>26</sup> Ko m̄eri Isrel nir p̄etp̄eti para-lai mauren vajin, erpe Naul On owrai owra 'Ni nga mokla mauren tevi jinibb nir pivel Saeon e vini ko pia-la tweni nanu nga marsij nga metka se Jepok marloli. <sup>27</sup> Bea-loli rijrijen ngel tevir daron nga inu βetlasi tweni nololien ser.' <sup>28</sup> Suri nga nir marsir durer tevi nosβen nga m̄irres, m̄eri Isrel nir arivi devje nuval se Atua, ko ngok erres re kami jinibb ne vare nir. Ko suri nga marivi jinibb nga pa Atua mutobbobbu nir, ko niko nir arivi pa sele Atua, suri renge apu ser nga tuwi pa nir. <sup>29</sup> Atua sete orongwos p̄irieni norrorrmien sen renge sev nga ni mutobbobbu pa ko m̄irij m̄irres suri pa. <sup>30</sup> Ko erpe renge kami jinibb ne vare; bonevis sete kamosuri Atua, ko lelingen ngel vajin Atua orrorrmi kami, daron nga m̄eri Isrel arsir durer tevi, nga sete arosuri. <sup>31</sup> Ko niko renge sel ngel ko, suri Atua orrorrmi kami pa osuw ko, m̄eri Isrel nir nga sete arosuri Atua, nir kele Atua pia-rrorrmir. <sup>32</sup> Jinibb jikle sete arosuri, ko Atua ololir arivi demij maur suri, nga ni pia-loli jinibb jikle parivel sisarow.

*Murru Atua erres p̄elak*

<sup>33</sup> Atua murrin erres nga erres elep tevi jinibb nir. Norrorrmien sen ko norongwosien sen oran ngasu nga ngasu lengleng. Si orongwos puwra suri norrorrmien sen? Isi orongwos purongwose sel sen nir? <sup>34</sup> Erpe nga Naul On muwrai muwra, 'Isi orongwos norrorrmien se Iova? Isi orongwos puwra nanu san tevi?' <sup>35</sup> Nanu jikle ngok nir, isi pa ela san tevi Atua, ko ngok ni puwli lweni tevi?' <sup>36</sup> Nanu jikle Atua kobbong ololir, ko nanu jikle

nga marto nir arto bbong renga ni ko marongen sen, ko arivi sen. Nosrövien pian ji Atua tuwi ngok vini. Pirpok ko.

## 12

### *Loten weretunen se kalesia nir*

<sup>1</sup> Niko selek nir, suri nga Atua murrormi kerr milep, ko niko inu nuwrai eterter tevi kami nga kapla kami lweni tevi Atua pirpe sulsulen san nga mimaaur ko nga muon, ko nga ni p̄ir ren. Ngel ko evi loten weretunen nga kami kaplai. <sup>2</sup> Sete kapvijuri norrorrmien se jinibb ne iel ngatan nir, ko kaplinglingi ma Atua p̄irieni norrorrmien se kami p̄etp̄eti parmerr kele, ko puloli kami kapviter nga kaprongwose sev nga Atua mimrreni, sev nga marres renga Atua non, ko sev nga ni purnge p̄irres renger, ko nga parsorsan parres p̄etp̄eti.

### *Norrorrmien se kami pian ngatan*

<sup>3</sup> Ko suri Atua erres temijpal tevi inu, ko inu vajin nuwrai tevi kami jijle: sete kaploli norrorrmien se kami pian mare jer. Kaploli norrorrmien se kami pian ngatan, ko kapmeteni lululweni kami renga norngov ne nosurien nga Atua m̄ilai pa tevi kami sisamis musuw. <sup>4</sup> Nibe kerr kalesia sansan kobbong, ko murrurmurr nen elep wor. Ko renga murrurmurr ngok nir armajing majingen lele ko wor. <sup>5</sup> Ko ngok osorsan tevi kerr: kerr elep ko wor, ko rramivi sansan bbonge, suri rramijp̄ipteni kerr renga murrurmurr ne nibe Kristo. Ko niko rramivi pa sansan ko. <sup>6</sup> Ko niko kerr jijle rrapmajing renga derteren lele ngok nga Atua m̄ilai tevi kerr ngok, pusorsan tevi nga m̄ilai. Poro nga derteren nga m̄ilai tevi kerr evi nga rrapwer tweni nale sen, ko rrapwerai pusorsan tevi nga rramosuri. <sup>7</sup> Poro nga derteren nen nga m̄ilai tevi kerr evi nga rrapmajing se kalesia nir, ko rrapmajing wor se kalesia nir. Ko poro nga derteren nen nga m̄ilai tevi kerr evi nga rrapvisviseni, ko rrapvisviseni wor. <sup>8</sup> Ko poro derteren nen pivi nga rrapwer jilijle jinibb, ko rrapa-loli ko wor; ko isi nga moklai merrenien tevi jinibb m̄inij nir, puloli ko wor tevi nolon nga m̄ir m̄irres; ko isi nga muwowomue nir, p̄imajing wor p̄iterter; ko isi nga moklai tevi nir nga nevrer marmumrrol re nanu san, puloli wor tevi nolon nga m̄ir.

### *Murrun nga marmerrreni temijpale jinibb*

<sup>9</sup> Kami kapmerreni wor jinibb ko nir re weretunen, sete kapmerreni kerkeris bbonge nir. Ko tetajer kapungasi nanu nga m̄isij, ko kaprrul totoni ma nanu nga m̄irres. <sup>10</sup> Kami kapmermerreni kami

lululwi p̄iterter pirpe kalesia nir, ko tetajer kapresres tevi kami lululwi ko wor. <sup>11</sup> Kapmajing p̄iterter ko wor, sete nibe kami pimijmij e. Ko kaploli majingen se Numal tevi nolo kami p̄etp̄eti, sete sapon pijpon jer. <sup>12</sup> Kaplingi norrorrmien se kami puto p̄iterter renga Atua, ko kap̄ir. Ko daron nga poro nanu nga m̄isij piplari ji kami e, kaptor totoni wor nolo kami ko p̄iterter. Ko renga nabong jijle, kaplot. <sup>13</sup> Kami kaptututweni joro kami nir tevi jinibb nga marivi kalesia nir nga joror muwelilil, ko kaptasi metali ne naim se kami tevi jinibb neturvitan nir.

### *Jinibb nga marivi kalesia nir parmerrreni devje nuval ser*

<sup>14</sup> Kapngoni tevi Atua nga p̄irij p̄irres tevi jinibb nga marloli m̄isij tevi kami. O-o pirpok ko, kapngoni ni p̄irij p̄irres surir, sete kapwerai tevi nga pulokloksi nir. <sup>15</sup> Ko kami kap̄ir kobbong tevi jinibb nga marir nir, ko kapting tevi jinibb nga marting nir. <sup>16</sup> Kami norrorrmien se kami pivi sansan bbonge ko tevi jinibb nir. Sete kaplololie kami te, ko kaploli ma sel tevi nir nga marivi jinibb malum. Ko sete kaprrormi kami kamivi jinibb nga norongwosien se kami milep.

<sup>17</sup> Poro jinibb san ololi esij tevi kami, ko sete kaploli lweni p̄isij tevi, kapkele e. Ko kaploli lesi ma kaploli sev nga p̄irres renga jinibb jijle nir. <sup>18</sup> Kaploli nanu jile p̄irres renga devjen nga kami nen, nga puloli kami kaplik p̄irres renga demat tevi jinibb totoklai nir. <sup>19</sup> Poro jinibb san ololi esij tevi kami, ko kami sete kaploli lweni kele pirpok tevi. Kaplinglingi puto. Atua piator vitrangi m̄ernen. Suri Naul On owra 'Murrun ngok nga jinibb puloli lweni tevi jinibb nga muloli m̄isij, inu kobbong nusan nurongwos bololi, ko ßekle lweni tevi.' <sup>20</sup> Erpe Naul On owrai kele, 'Poro devje nuval som numer ajil, kupla nanen tevi; ko poro nolon emesmes, kupla nuwi tevi pimni. Renga nga kuploli pirpok ko puloli ni pimanune.' <sup>21</sup> Sete kaplinglingi nanu nga marsij parevei tweni kami, ko kaploli ma nanu nga m̄irres p̄ila tweni nanu nga m̄isij.

## 13

### *Kalesia parosuri wor numal ko nir*

<sup>1</sup> Kalesia parosuri wor numal nga maratori derteren ko nir, suri numal nir arwaji nais ngok suri bbong nanu sansan ko, suri Atua kobbong elai tevir. Ko erpok numal nga marlelep nga marlik, Atua kobbong elngir. <sup>2</sup> Poro jinibb san p̄itre numal nga marlelep ngok nir, ni etre sev nga Atua muloli pa. Ko ngok poro jinibb san ololi

wor erpok, ko ni lweni ololi nga partor vibrangi. <sup>3</sup> Jinibb nga marok-loli mīrres sete arongwos parmetutu numal nir, ko jinibb nga marok-loli mīsij arongwos parmetutu numal nir. Ko poro kami kapmerreni nga sete kapmetutu numal nir, ko ngok kaploli nanu nga marres nir, ko puloli numal nir parsurōvi kami. <sup>4</sup> Suri nir arivi jinibb ne majingen se Atua, armajing suri nanu nga parres renge kami. Ko poro nga kami kaploli nanu nga sete parres, ngok iok kami kapmetutu ko wor. Suri nir derteren ser otoo nga partor vibrangi kami. Iel ewretun le, suri nga nir arivi jinibb ne majingen se Atua. Arla wani milnge Atua nga marvirrvirrali jinibb nir nga marloli nanu nga marsij. <sup>5</sup> Suri nanu ngel ko, niko kami kaposuri wor numal nga martori derteren ko nir. Ko sete erres nga kami kaploli pipel suri bbong nga kami kammetutue nga Atua pia-virrali kami; ejki, kami kaposuri wor numal nir nga puloli norrorrmien se kami sete pulokloksi kami. <sup>6</sup> Ko ngok erpok ko muloli kami kamwuli takis. Suri numal nir arivi jinibb ne majingen se Atua daron nga marloli majingen ser. <sup>7</sup> Ko erpok ko kami kaplai wor nevōt ne takis lele nir nga numal nir marwera kaplair; ko kaptorir van mare ko kaposuri nir.

*Jinibb nir parmerreni tuwar ko tasir*

<sup>8</sup> Sete erres nga kami kaploli nivnon ji jinibb pisan; ko nanu kobbong san nga kami kaploli pirpe pivi nivnon se kami, evi merrenien nga kami kapmermerreni kami lululweni. Isi san nga puloli pipel erpe osuri nale neseseiren ko pa. <sup>9</sup> Nale neseseiren nga marto ngel, 'Nik sete kupvenaē nesevin, Nik sete kuprevji pini jinibb, Nik sete kupvevna, Nik sete kupmermerreni joro jinibb nir', nale neseseiren nga mowrair ngel nir, ko nale neseseiren nga marjijpon, sete mowrair nen nir, nale neseseiren sansan kobbong etawi ore nir jijle, ni le ngel: 'Kupmerreni selem pirpe nik luwi kobbong'. <sup>10</sup> Poro kupmerreni jinibb mīniji nir, ko sete kumaloli mīsij rragrrag tevir. Niko nga jinibb pimrreni jinibb pipok, erpe otori nale neseseiren jijle ko pa nir osuv.

*Kerr rramivi jinibb ne moron*

<sup>11</sup> Kami kaploli pipel, suri kamrongwose daron evini nga kaptaol vajin renge meturen se kami nga kammatur e, kapmera. Suri daron nga rrapla mauren evini mori jer vajin, asie nga womu daron nga rrama-osuri e. <sup>12</sup> Nat nga mupong otomori pa piasia, nat erin le pa ngel. Niko setemun rraploli nanu nga marsij nga marivi se nemalik, ko rrapla nijor ne nuval nga rrapval renge moron vajin.

<sup>13</sup> Erres ma kerr rrapok-loli nanu nga marok-rres nir pirpe jinibb nga marlik pa renge moron ne nat nga mīrin. Ko sete rraploli dabbuen nga pīsij, ko sete rrapmini pēlake norro rreknga nuwi nga mīterter nga puloli rrapleng. Ko sete rraploli pīsij tevi nesevin, rreknga rraploli murrun nga marsij. Ko sete rraplat, ko sete nolo kerr pileplep. <sup>14</sup> Ko rraplai Numal se kerr Iesu Kristo erpe sunsun ne nuval se kerr nga orongwos puto ore nanu jijle nga marsij. Ko setemun kapok-rrormi murrun nga marsij nir nga norrorrmien se kami muwra purrorrmir.

## 14

*Sete kapwer lokloksi tuwa kami nir ko tasi kami nir*

<sup>1</sup> Kami kapmarong ko wor nir nga nosurien ser muwelili ngok parini ji kami. Ko sete kaprij tevir suri norrorrmien ser. <sup>2</sup> Jinibb sopor renge norrorrmien ser arosuri nga nanen jijle arres kobbong renge parurroir. Ko jinibb sopor nga nosurien ser muwelili, nir arurroi kis bbong nanen ne orsel ko nir, ko sete arurroi nanu nga visor mutoe. <sup>3</sup> Jinibb nga marurroi nanen jijle ngok nir, sete erres nga nir parmeteni pīsij renge nir nga sete marurro nanen jijle ngok nir. Ko jinibb nga marurroi kis bbong nanen ne orsel ngok nir, sete erres nga nir parwer lokloksi jinibb nga marurroi nanen jijle ngok nir, suri Atua emarong pa nir maran jin. <sup>4</sup> Nik kuvi isi, nga kupwer lokloksi jinibb ne majingen se jinibb mīniji? Ngok oto pa renge Numal ser ko nga piawerai suri tevir, arloli erres rreknga arloli esij. Ko nir para-loli pīrres ko, suri Numal ser orongwose puloli para-loli pīrres.

<sup>5</sup> Jinibb sopor arorrmi nabong sopor aron wor arasi nabong mīniji nen nir, ko jinibb sopor arorrmi nabong jile ngok nir arsorsan kobbong. Re iok, ko kerr sisamis rraprorrmi ko wor pīrres, sete norrorrmien se kerr pieru e. <sup>6</sup> Jinibb nga marrorrmi ko martor tutune nabong ngok nir van mare, arloli wor erpok renge marosuri Numal ko. Ko jinibb nga marurro nanen jijle ngok nir arloli erpok renge wor marosuri Numal ko. Suri arwera erres pa tevi Atua renge nanen ngok. Ko jinibb nga marmusos weretunen nga parurroi vison ngok nir, arloli erpok renge wor marosuri Numal ko, ko nir kele arwera erres tevi Atua. <sup>7</sup> Sete kerr san nga mauren sen evi se ni kobbong, ko sete san mijen sen evi se ni kobbong. <sup>8</sup> Poro kerr rrapmaur, evi se Numal nga kerr rrammaur. Ko poro kerr rrapmij, ko evi se Numal nga kerr rrapmij. Erpok ko, poro rrapmaur rreknga rrapmij, evi se Numal.

<sup>9</sup> Suri Kristo emij pa ko emaur luwi kele pa renga mijen nga pivi Numal se nir nga marmaur ko se nir nga marmij pa. <sup>10</sup> Ko niko, erpe kami nga kamaani nanen ne orsel kobbong nir, suri sev kami kapwer lokloksi jinibb m̄inij nir? Ko kami nga kamrro nanen jikle nir, suri sev nga kami kammeteni p̄isij renga sele kami bbong nir? Kerr jile rrapatur renga no Atua, nga pia-wera suri lat nga puto suri tevi kerr. <sup>11</sup> Suri Naul On owrai nga Atua ojuji lweni ni ko owrai owra 'Nale ngel ewretun erpe inu numaur; Jinibb jikle parjipa ngatan jik parsurōvi inu, parwerwera i nga inu nuvi Atua'. <sup>12</sup> Ngel erpe owra kerr jikle rrapatur renga no Atua ko rrapowra tweni nanu nga marres ko nanu nga marsij nga rramlolir.

*Sete rrapololi sele kerr nir parvitan*

<sup>13</sup> Ko niko setemun rrapok-supsuṽe lokloksi lululweni kerr nir p̄irpok; rrap-supsuṽe suri ma lat san nga p̄ila wani, nga puloli setemun rrapok-loli sele kerr nir parjilaklak rreknga parvitan van renga nololien. <sup>14</sup> Inu nukorti pa tevi Numal Iesu, ko ngok ololi nurongwose nga ewretun nanen jijle arres kobbong, sete san orro. Ko poro nga san puosuri nga nanen san orro, ko ngok erpok ko pa, orro ko pa rengen. <sup>15</sup> Ko poro san nga mirpok ornge esij daron nga m̄ilesi nik kurro nanen san, ko ngok setemun kuvijuri sel nga kumrreni ni e ko. Sete kuploli nanen nga kumrroi pulokloksi jinibb san nga Kristo mimij suri pa. <sup>16</sup> Sete kuploli jinibb nir parworworsur suri nanu nga kumlolir marres, ko parwer lokloksir parwera arsj. <sup>17</sup> Suri nga batun vanu se Atua sete evi ne nanen ko minminen, ko evi ne ma murrin nga marres, ko demat, ko neiren nga Ner̄in On m̄ilair. <sup>18</sup> Renge daron nga kuploli majingen se Kristo renga sel ngel, ko ololi Atua ornge erres e ko, ko jinibb kele nir arlesi erres e.

<sup>19</sup> Ko ngok niko, kerr tetajer rrapvijuri sel nga m̄ilai demat, ko ngel puloli kerr rraplila lululweni se kerr nir. <sup>20</sup> Kami sete kaploli nanen pulokloksi sev nga Atua muloli pa musuw. Nanen jikle parurroir kobbong, ko esij ko ma renga parurroi san nga pulokloksi jinibb san pivitan van renga nololien. <sup>21</sup> Nanu nga m̄irres nen ma nga nik kuploli evi nga nik sete kupro vison, ko sete kupmini norro, rreknga sete kuploli nanu m̄inij nen kele san nga puloli selem pivitan van renga nololien. <sup>22</sup> Nik nosurien som oto livō renga Atua ko nik. Ko inu nosurien suk oto livō renga Atua ko inu. Nik sete kupon tertere inu bevijuri nik renga vison, ko inu sete bon tertere nik kupvijuri inu. Ko neiren ma renga nir nga sete norrorrmien ser eru e re daron

nga marvijuri norrorrmien ser nga muwra nanu ngok evi nanu nga m̄irres. <sup>23</sup> Ko poro norrorrmien se kami daron nga kamrroi p̄ieru e, ko Atua p̄iwer lokloksi kami nga kamurroi. Suri kami sete kamloli renga nosurien te. Ko nanu jikle nga sete muto renga nosurien evi nololien.

## 15

*Sete rraprorrmi kerr kis kobbong, kerr rraprorrmi wor jinibb m̄inij ko nir*

<sup>1</sup> Kerr nga nosurien se kerr m̄iterter pa musuw, rrapla se wor nir nga nosurien ser muwelili, ko sete rrapololi nanu nga parres renga kerr kis bbong nir. <sup>2</sup> Ko rrapololi ma p̄irpel: rraprorrmi sele kerr nir, nanu nga nir marmerrrenir, nga puloli nir nosurien se nir parterter kele wor. <sup>3</sup> Suri Kristo kele sete ololi nanu nga m̄irres renga ni luwi bbong, ko erpel ma, erpe Naul On muwrai muwra 'Nale ser nga marsij nir, nga marok-werair tevim, nir kele le ngel marwerair tevi inu.' <sup>4</sup> Nanu jikle nga maruli renga Naul On, arulir suri nga parvisviseni kerr, nga puloli norrorrmien se kerr p̄iterter. Suri nale on nga marto renga Naul On arloli kerr rramrunge erres, ko ololi nosurien se kerr pipriv. <sup>5</sup> Atua okloli nosurien se kami arperiv ko kamrunge erres. Ko ngel evi verusen suk, nga ni puloli kami jile norrorrmien se kami parivi sansan bbonge. Suri kami kamvijuri pa sel se Iesu Kristo. <sup>6</sup> Ko ngok puloli nga kami jile kaprongwos kapsurōvi Atua Tata se Numal se kerr Iesu Kristo renga drrelan sansan.

*Meri Isrel nir ko jinibb m̄inij nir parini wor lat pisansan ko*

<sup>7</sup> Kami kaprevei wor sele kami ko nir parini ji kami kapkorti lat pisansan, p̄irpe Iesu Kristo mirvei kami vini lat sansan, kamkorti m̄irres tevi ni. Renge sel ngok ko ololi nosrōvien van ji Atua. <sup>8</sup> Nuwrai tevi kami renga mauren se Iesu renga daron nga m̄ilik iel ngatan e emajing se m̄eri Isrel nir, nga piviseni nga Atua ololi jile rijrijen sen nga muwrai pa tevi apu ser nga tuwi nir arpelari. <sup>9</sup> Ko ni ololi erpok nga puloli jinibb ne vare ni kele parsusi Atua nisen van mare suri murrormir, erpe nga Naul On owrai nga muwra 'Ko inu bea-susi nisen van mare ji jinibb ne vare nir mian ko βela nubo bosusi nisen van mare.' <sup>10</sup> Ko Naul On owrai kele, 'Kami jinibb ne vare nir, kappitevi jinibb se Atua nir, kap̄ir korti tevir.' <sup>11</sup> Vesan kele, Naul On owra 'Kami jinibb ne vare nir, kappitevi jinibb jikle nir, kapsusi Atua nisen pian mare.' <sup>12</sup> Ko vesan kele Aesa owra 'Mian ko metka se Jese san pia-pelari. Ni pivini nga pivi m̄erwomu renga jinibb ne vare nir,

ko nir para-lingi norrorrmien ser rengen piterter.' <sup>13</sup> Selek nir, ngel evi verusen suk, nga Atua nga rramlingi nolo kerr rengen nga rrapla nanu nga rramtirive jin, ni pia-songni neiren ko demat renge nolo kami nga kamosuri ni. Ko ngok renge derteren se Nem̄in On puloli nolo kami pututun suri malume nanu nga kamtiriv tweni.

*Majingen se Pol nga m̄imajing se jinibb ne vare nir*

<sup>14</sup> Selek nir, inu nurongwose nga kami kamwun saute murrun nga m̄irres ko norongwosien, ko kamrongwos kapvisviseni kami lululwenie nir. <sup>15</sup> Renge naul suk ngel inu nula nale nga marterter sopen tevi kami, nga puloli kami kaprrorrmī malume nale nga namwerair pa tevi kami. Inu nurij eterter erpok suri wor Atua ko elngi inu. <sup>16</sup> Ni elngi inu nga bevi jinibb ne majingen se Iesu Kristo, nga Bemajing se jinibb ne vare nir. Bemajing pirpe jinibb ne sulsulen san nga Bewerwer renge nospen nga m̄irres se Atua. Ko pirpok ko nga puloli jinibb ne vare nir parirpe sulsulen san nga Atua pilai, ko Nem̄in On puloli nir paron. <sup>17</sup> Inu nukorti pa tevi Iesu Kristo, ko niko rreknga inu nurongwos bosrosr̄ovik e sopen renge majingen se Atua; <sup>18</sup> ko bosrosr̄ovik suri bbong sev nga Kristo m̄ilngi renge inu bololi nga puloli jinibb ne vare nir partori Atua, renge nale nga mowrair ko renge nanu nga mololir. <sup>19</sup> Ko Kristo emajing renge derteren ne nanu nga marinijnij nawone nir, ko emajing renge derteren se Nem̄in On se Atua. Ko niko renge daron nga mevel suri sel renge Jerusalem mevini mejpari Ilirikam, tetajer renge sel inu nomok-wera tweni nospen nga m̄irres se Kristo p̄etp̄eti. <sup>20</sup> Tetajer norrorrmien suk eterter nga bowra tweni nospen nga m̄irres renge vanu nga jinibb nen nir setewor marunge. Numusus Bemajing naim nga jinibb m̄inij m̄ilil tur jile pae. <sup>21</sup> Erpe nga Naul On muwrai muwra 'Jinibb nga sete marunge nospen nen parlesi ko, ko jinibb nga sete marunge nospen ne ni wor parongwose.'

*Pol orrorrmī nga pian pukluklu Rom*

<sup>22</sup> Nabong elep nga nomok-wera nobok-inuk nobok-kulkulue kami, ko majingen suk nir arok-to ore. <sup>23</sup> Ko lelingen ngel inu numajing jile pa majingen suk nir nga iel nir, ko numrreni lengleng wor nga bevinuk bokluklu kami renge sia elep pa arasi osuw. <sup>24</sup> Ko niko lelingen ngel nurongwos bololi le vajin. Ko numrreni bokluklu kami renge daron nga bean Spen e, ko belik beblen tevi kami. Ko renge daron nga bokluklu jile kami, renge daron nga bevel e, ko kami sopor parpitevik renge

sel. <sup>25</sup> Ko renge lelingen ngel inu bean mun Jerusalem, bololi majingen se jinibb se Atua sopor nga marlik ie. <sup>26</sup> Suri kalesia ne Masetonia ko kalesia ne Akaea arsupsupe nga parlai merrenien sopen tevi jinibb nir nga joror mijkie renge Atua jinibb sen nir renge Jerusalem. <sup>27</sup> Norrorrmien ngok evi wor nga nir ko, nga parloli pirpok. Ko erpe norrorrmien ngok ewretun. Suri m̄eri Isrel nir arla nale nga m̄irres se Atua tevi jinibb ne vare nir, ko ngok niko erres jinibb ne vare nir parloli lweni pirpok, parla joror sopor nga Atua m̄ilai tevir tevi m̄eri Isrel nir nga never marmurrrol. <sup>28</sup> Ko renge daron nga bosuw renge majingen ngok, nga belā nev̄ot nga jinibb ne vare marlai ngel tevir pusuw, ko bevijuri sel nga bean Spen e ko bea-asi ji kami, bokluklu kami. <sup>29</sup> Nurongwose renge daron nga bevinuk ji kami, ko bea-la nanu pilep lengleng nga marres se Kristo tevi kami.

<sup>30</sup> Selek nir, renge nise Numal se kerr Iesu Kristo ko renge merrenien nga Nem̄in On m̄ilai pa tevi kerr, inu nungoni tevi kami nga kappitevik renge loten suk, nga kami kaplot surik van ji Atua p̄iterter. <sup>31</sup> Kami kapngoni tevi ni p̄iterter nga ni putor totoni nolo jinibb ne Jutia nir nga sete marosuri, nga puloli nir sete parevjjik, ko puloli nga majingen suk nga bololi Jerusalem, jinibb se Atua nga marlik ie parlesi p̄irres. <sup>32</sup> Ko inu beir pilep nga bokluklu kami vajin, poro nga Atua pimarong, ko beir pilep nga belik ji kami, puloli nga inu beteter kele. <sup>33</sup> Ngel le evi verusen suk tevi kami, nga Atua nga mivi batu demat se kerr, ni pilik tevi kami jijle. Pirpok ko.

## 16

*Pol nale sen nga muwra erres tevi jinibb nir*

<sup>1</sup> Nusr̄ovi joji kerr nga m̄imajing se kalesia nir nga Kenkria nga nisen Pipi. Ni evi nesevin nga m̄imajing m̄irres milep san. <sup>2</sup> Ko niko kami kaptekai ni van renge naim se kami nir renge nise Numal se kerr, pirpe jinibb se Atua nir marloli. Ko poro nga ni emrreni nanu san ji kami, ko kami kaplai ko wor tevi ni. Suri nga ni ololi sel tevi delung elep, ko evi nesevin san nga m̄irres tevi jinibb nir, ko tevi inu kele.

<sup>3</sup> Ko nuwra erres tevi Akwila ko nesen sen wor Prisila, nga nuru m̄orpitevik pa, kem nammajing renge majingen se Iesu Kristo. <sup>4</sup> Nuru ormarong pa pormij suri inu bonevis. Ko niko inu nuwra erres nga erres temijpal wor tevi nuru; ko sete inu kis nusan ko, nir kalesia nga marivi jinibb ne vare kele wor nir arunge erpok.

<sup>5</sup> Ko nuwra erres kele tevi kalesia nir nga marok-korti renge naim se nuru.

Ko nuwrai erres kele wor tevi inu wor selek nga memrreni Epaenetas. Ni evi n̄er nga muosuri womue Kristo renge jinibb ne Esia nir. <sup>6</sup> Nuwra erres tevi Merri, renge nga m̄iplak temijpale kami. <sup>7</sup> Nuwra erres tevi laru ngel nuru, Antronikas ko Junias. Ko m̄eri Isrel nga itul ngel ko, namlik renge naim ne nekaien namvesane. Laru ngel nuru, aposol nir arongwose nuru erres, ko orivi kalesia owowomu mian ko vitunen vajin ko inu.

<sup>8</sup> Inu nuwra erres elep tevi Ampliatu san nga mukorti pa tevi Numal. Ni evi selek nga memrreni milep. <sup>9</sup> Nuwra erres tevi Opanas nga mukorti pa tevi kami renge majingen se Kristo, ko Stakis nga inu memrreni lengenge. <sup>10</sup> Nuwra erres tevi Apeles, n̄er nga miviseni nga ni nosurien sen eterter weretunen renge Kristo. Ko nuwra erres kele tevi metka se Aristopolas nga marlik renge naim sen. <sup>11</sup> Inu nuwra erres tevi Erotien m̄eri Isrel ngok, ko tevi nir nga markorti pa tevi Numal se kerr nga marlik renge naim se Nasisas. <sup>12</sup> Nuwra erres tevi nesevin ngel nuru Tritaena ko Triposa nga morok-majing milep renge majingen se Numal se kerr, ko tevi Persis kele, selek nga memrreni milep nga m̄iplak milep renge majingen se Numal se kerr. <sup>13</sup> Nuwra erres tevi Ropus. Ni evi jinibb san nga m̄imajing milep renge majingen se Numal se kerr. Ko nuwra erres wor tevi tasu sen, nga ni mimetmete inu m̄irres erpe wor nga ni mivesik. <sup>14</sup> Nuwra erres tevi lartul ngel nir, Asinkritas ko Relkon ko Eremes ko Patropas ko Eremas, ko kalesia m̄inij nen kele nir nga marok-lik tevir iok. <sup>15</sup> Nuwra erres tevi Pilolokas ko vinel Julia, ko Nereas ko jojin wor, ko Olimpas ko jinibb se Atua nga marok-lik tevir iok. <sup>16</sup> Kapwera erres tevi kami lululwi tevi merrenien ko demat. Ko kalesia nir se Kristo kele nir arwera erres tevi kami.

*Bongsi nale se Pol tevi nir*

<sup>17</sup> Selek nir, inu nuwrai eterter tevi kami nga kami kapmetmet ko wor renge jinibb nga marwera parloli kami kapser wirrwirr, ko armerreni parllokloksi nosurien se kami, ko artere nesesreien nga kem namlai tevi kami. Kami kapwij wor ngasue nir ko. <sup>18</sup> Lartul nga marloli nanu ngok nir sete armajing se Kristo Numal se kerr; nir arok-vijuri bbong norrorrmien ser nga marsij ko nir, ko arok-rij nale melmelas nir ko nale nga marrun nir. Ko arok-kerkeris, ko arevei tweni jinibb sopor nga sete arloli nanu nga m̄isij san nabong

san. <sup>19</sup> Jinibb jile arunge pa nga kamtur m̄iterter renge nospen nga m̄irres, ko suri murrun ngel ko ololi inu nuir renge kami. Ko numrreni kami kaprongwose sev nga marres ko sev nga marsij, ko niko kami sete kapan renge nanu nga marsij nir, pijki rres nawon. <sup>20</sup> Sete ngasu nga ngasu rragrag te nga Atua ne batu demat se kerr puni Demij van ngatan renge nolon bela kami kapbböt ren. Ngel evi verusen suk, merrenien se Numal se kerr Iesu piptevi kami tuwi ngok vini.

<sup>21</sup> Timoti nga mok-majing tevik, ni owra erres tevi kami. Ko m̄eri Isrel nga itul ngel, Lusias ko Jeson ko Sosipata, nir kele arwera erres tevi kami. <sup>22</sup> Inu le Tosias nuli tweni Pol nale sen nga muwrair renge naul ngel, ko inu kevi nuwra erres tevi kami nga kerr rramivi pa kalesia, rramkorti pa tevi Numal se kerr Iesu.

<sup>23</sup> Jinibb san nga nisen Gaeas nga inu Pol nomok-lik renge naim sen, ko kalesia nir marok-ini jin marok-korti renge naim sen, ni owra erres tevi kami. Ko Erastas nga mivi n̄er nga mok-metmete nevöt ne ngaim ngel, ko tasi wor kerr Kwotas, nuru korti orwera erres tevi kami. <sup>24</sup> [Ko ngel evi loten suk, nga merrenien se Numal Iesu Kristo piptevi kami. Pirpok ko.]<sup>A</sup>

*Nale ne parsurövi nise Atua pian mare*

<sup>25</sup> Kerr rrapsturövi Atua nisen pian mare. Ni kobbong esan orongwos puloli kami kaptur p̄iterter renge nosurien se kami. Nale ngok osorsan tevi nospen nga m̄irres nga nomok-werwer rengen suri Iesu Kristo, ko osorsan tevi nale nga Atua m̄ilngi silveni tuwi jer pa, ko lelingen ngel vajin ololi oto limjer erres. <sup>26</sup> Atua nga mimaur tuwi ngok vini, ni emajing renge nale nga propet sen nga tuwi jer pa nir maruli nga parwowrai nale nga Atua m̄ilngi silveni ngel tuwi jer pa, piplari vajin limjer. Ko ni owrai eterter nga nale ngel puwlu jile renge vanu nga musuwsuw ngok nir, ko puloli jinibb parosuri ni, ko partori ni. <sup>27</sup> Atua sansan bbong, ko esan norongwosien sen otoa, ko niko kerr rrapsturövi ni renge nise Iesu Kristo tuwi ngok vini. Pirpok ko.

<sup>A</sup> 16:24 Nale nga muto re nolo [ ], rrek sete Pol oli, ko jinibb san ea-uli virtue daron nga muli tweni kopi san ne naul ngel.

**Naul nga Pol Muli Womue  
tevi Kalesia Nir renge  
KORIN  
Batu nale nga mivsivseni  
lut nga parmteni naul  
ngel puto suri**

Naul (leta) nga Pol muli womue van ji kalesia ne Korin nir, oli suri nanu lele elep arok-imare re mauren se kalesia nir ie, ko owra piwilwil se nir. Pol ko evi m̄erwomu nga mian Korin, ko ololi womu m̄eri Korin nir arivi kalesia.

Korin evi ngaim nga milep se m̄eri Gris nir ko evi kele ngaim womu ne vanu ngok Akaea nga Rom mimetmete. Jinibb ne vanu lele elep arlik ie, ko evi kele lat nga jinibb elep marongwose re devjen ne bisnes, ko re devjen ne kastom ser kele, ko re devjen ne murrun nga m̄isij kele, ko re kele sel nga marloli nosr̄ovien van ji atua lele nir.

Nanu nga marlelep nir nga Pol m̄ijilwer suri renge naul ngel arirpel: os̄pe suri murrun nga kalesia nir marok-sisamis e, ko murrun nga marok-loli m̄isij tevi ne-sevin. Nir arsusi womu pa nanu sopor tevi Pol, ko renge naul ngel ni erij welir, ko os̄pe murrun ne totkoien, ko pirpese re nanen nga jinibb marlai tevi atua m̄inij nir. Ko eviseni sel mawos nga parvijuri re Naim On re daron nga markorti, ko derteren nir nga Nem̄in On m̄ilai tevi kalesia nir, ko murrun nga jinibb pimaaur luwi kele.

Re batun esngav̄öl dromon itul (13) os̄pe suri murrun nga rrapmerreni lenglengen Atua ko jinibb nir nga evi nanu nga m̄irres temijpal nga jinibb se Atua nir parvijuri.

<sup>1</sup> Inu Pol nuvi aposol se Iesu Kristo nga Atua miveruse inu, ko mimrreni Bemajing re majingen ngel. Ko Sotinis nga mivi niaken se kerr, <sup>2</sup> nomorwera erres tevi kami, jinibb nga marosuri Atua iak Korin. Kami, Iesu Kristo ololi kamon ko kamivi jinibb sen. Ko Atua everus kami nga kapkorti tevi jinibb sen m̄inij kele nir. Renge lat jille iel ngatan, nir arlot van ji Iesu Kristo nga mivi Numal se kerr ko nga mivi Numal se nir kele. <sup>3</sup> Ngel evi loten suk, nga Atua Tata se kerr tevi Numal Iesu Kristo porwilwil se kami renge nalol nga m̄irres, ko porlingi demat puto tevi kami tetajer.

*Pol owra erres tevi Atua*

<sup>4</sup> Tetajer nomok-werai erres tevi Atua suri kami, renge nalol nga m̄irres nga ni m̄ilai nga muloli kamkorti pa tevi Iesu Kristo. <sup>5</sup> Ko suri gortien se kami tevi Kristo ololi kamasasi rengo norongwosien, ko kamrongwose kapwer rerrarre nanu jille puto limjer. <sup>6</sup> Nale nos̄pen nga marsūpe suri Kristo evini pa oto eterter rengo kami, <sup>7</sup> ololi kamlai merrenien elep ji Nem̄in On daron nga kamok-tirive Iesu Kristo Numal se kerr pia-rremali vini. <sup>8</sup> Ni purull totkoni kami p̄iterter nga sete nanu san p̄isij re kami, pianan pijpuri nabong nga Numal se kerr Iesu Kristo pia-luwi kele ren. <sup>9</sup> Atua nga miveruse kami ko mukortoni mauren se kami tevi mauren se Iesu Kristo Numal se kerr; okloli suri erpe nale sen muwrai tetajer.

*Kalesia nir arwirr sarrsarr*

<sup>10</sup> Renge nise Iesu Kristo Numal se kerr, inu nuwrai eterter tevi kami tasik nir, nga wurru kapivi sansane kobbong. Sete erres kapwij sarrsarr van rengo gortien wowarrend nir. Murru kami ko norrormien se kami pivi sansane kobbong. <sup>11</sup> Suri metka se Kloe sopor arwera tweni tevik nga kami kamok-laflat lululweni kele kami. <sup>12</sup> Nuwrai erpok suri kami sisamis kamsūpe nale sisamis m̄inij. San okwera, "Nuvijuri Pol", m̄inij ok-wera "Nuvijuri Apolos", san kele ok-wera "Nuvi se Pita", ko sopor kele arok-wera "Namivi se Kristo". <sup>13</sup> Erpese? Kami kamrormi kamrongwose kaptor otvi Kristo pipok ngok? Kamrormi inu Pol numij rengo nai pelaot nga bewilwil se kami? Kami sete kampaptaes rengo inu nisek, ejki! <sup>14</sup> Nuwrai erres tevi Atua nga inu sete nupaptaese rragrag kami san, ko Krispas ko Gaius kobbong. <sup>15</sup> Niko sete san orongwos puwra "Renge nise Pol arpaptaese inu." <sup>16</sup> O, ko nupaptaese kele Stepanas tevi metka sen kele nir, ko nurrlengo, nupaptaese kele san rreknga ejki. <sup>17</sup> Kristo sete okoni inu nga bepaptaese jinibb nir, ko okoni inu nga bowrai tweni nos̄pen nga m̄irres sen. Ko sete okoni inu nga bewerwer rengo nale norongwosien se jinibb, ejki, ngok puloli mijen se Kristo rengo nai pelaot pivi nanu nawon.

*Kristo, derteren ko norongwosien se Atua*

<sup>18</sup> Nale nga muwrai tweni mijen se Kristo rengo nai pelaot evi nale lenglengen kobbong ji jinibb nejikien. Ko tevi kerr nga Atua mok-la mauren tevi kerr, nale nen eviseni derteren sen. <sup>19</sup> Ko Naul On se Atua owrai owra 'Norongwosien se jinibb nga marwera marongrongwos, inu bololi parjiki jer. Ko norrormien

ne norongwosien bololi parivi nanu nawon.' <sup>20</sup> Jinibb ne norongwosien nirbe? Nibeni jinibb nga marongrongwos? Nibeni jinibb nga marok-rij melmelas suri nanu ne iel ngatan nir? Arjiki rres. Atua ololi pa norongwosien ser pivini pivi nale lenglengen vajin. <sup>21</sup> Atua, norongwosien sen elep p̄elak, ko ololi jinibb sete arongwos parongwose Atua reŋge sel ne nir norongwosien ser. Ko emrreni puloli nale nga rramok-werai tweni ngok, nga jinibb marwerai evi nale lenglengen, nale nen ko p̄ila mauren tevi nir nga marosuri ni. <sup>22</sup> Meri Isrel armerreni wor parlesi reŋge meter majingen nga marinijnij nawone se Atua, ko m̄eri Gris armerreni parunge nale norongwosien. <sup>23</sup> Ko kerr ma kalesia, rramok-werwer suri Kristo nga marevji re nai pelaot. Nale ngok, m̄eri Isrel nir nolor sete erres suri, ko jinibb ne vare nir arunge erpe nale lenglengen kobbong. <sup>24</sup> Re ma kerr korti, m̄eri Isrel ko m̄eri Gris nga Atua miveruse kerr, Kristo ngel evi derteren se Atua ko norongwosien nga milep se Atua. <sup>25</sup> Murrun se Atua nga jinibb m̄ilesi mivi lenglengen, ni kele easi wor norongwosien se jinibb. Ko murrun se Atua nga jinibb marlesi derteren nen mijkie, derteren nen elep kele wor easi derteren se jinibb.

<sup>26</sup> Tasik ko jojik nir, kaprormi ta daron nga Atua miveruse kami, kamivi jinibb sev ko? Reŋge no jinibb nir sete kami elep kamrongrongwos, sete kami elep derteren se kami oteo, ko sete kami elep kamivi jinibb nga marlelep. <sup>27</sup> Ko Atua otobbobbue nanu nga jinibb ne iel ngatan marwerai evi lenglengen, puloli nir nga marongrongwos parmanun. Ko otobbobbue nanu nga jinibb ne iel ngatan marok-werai nga derteren nen ejkie, puloli nir nga derteren ser martoe parmanun. <sup>28</sup> Ko otobbobbue si nga jinibb ne iel ngatan marlesi erpe niser ejkie, ko otobbobbue sev nga jinibb ne iel ngatan marlesi arivi nanu nawon, nga puloli sev nga nir marlesi arivi nanu nga marlelep parini vajin parivi nanu nawon. <sup>29</sup> Ngok niko sete jinibb san orongwose p̄irij melmelas reŋge no Atua. <sup>30</sup> Ko kami, Atua okortoni pa kami tevi Iesu Kristo, ko elngi Iesu nga pivi norongwosien se kerr. Ololi rramon ko rramivi jinibb sen, ko owli tweni kerr rramasi pa reŋge nololien nga marok-kai totkoni kerr. <sup>31</sup> Ko erpok, erpe Naul On muwrai, 'Jinibb nga mimrreni p̄irij melmelas, p̄irij melmelas bbong suri nanu nga marres nir nga Numal muloli tevi ni.'

## 2

*Pol owrai tweni mijen se Kristo*

<sup>1</sup> Tasik ko jojik nir, nuvinuk ji kami seveling pa iok nga bowrai tweni nororrmmien se Atua nga womu miteptepi. Sete nuvinuk nga bowrai tweni reŋge rijen melmelas rrek reŋge nale norongwosien se jinibb, ejki. <sup>2</sup> Ko daron nga meptevi kami, nuloli nororrmmien suk nga bemalie nanu jijle, ko nanu sansan kobbong hospe suri, evi Iesu Kristo, tevi mijen sen reŋge nai pelaot. <sup>3</sup> Re wosenen derteren suk ejki rrese, tetajer numtutu ko nuririr. <sup>4</sup> Ko werweren suk sete eplari reŋge norongwosien se jinibb nga pirvei kami ren, ejki. Ko werweren suk evi nga piviseni derteren ne Nerñin On, <sup>5</sup> nga puloli batu nosurien se kami sete puto reŋge nale norongwosien se jinibb, ko puto reŋge derteren se Atua kobbong.

*Nerñin se Atua okloli rramrongrongwose norongwosien se Atua*

<sup>6</sup> Ko ewretun, kem namok-wer visviseni nale norongwosien tevi nir nga nolor m̄itra pa reŋge mauren ne kalesia. Ko sete evi norongwosien nga mivi ne iel ngatan, rreknga derteren ne iel ngatan san, ejki. Derteren ngok nir para-jijki ko para-sij nabong sapon. <sup>7</sup> Ko norongwosien ma nga kem namwera tweni ngok, Atua sansan kobbong orongwose, ko esilveni nga jinibb nir sete parongwose. Evi nororrmmien nga Atua murrormi ko pa nga pia-susi kerr van mare, mian ko mia-loli iel ngatan. <sup>8</sup> Jinibb nga marlelep ne iel ngatan san sete orongwose norongwosien ngok. Ko poro parongwose, setemun mara-revji Numal ne melrin reŋge nai pelaot. Ko sete artor sweri norongwosien ngok. <sup>9</sup> Ko Naul On owra 'Atua elngi lilane nanu elep oto metmet tweni nir nga marmerreni ni milep. Setewor jinibb arlesi nanu ngok nir reŋge meter, setewor arunge nale ner reŋge boror, ko setewor arorrormi nir reŋge nororrmmien ser, ejki wor.' <sup>10</sup> Ko Atua elai Nerñin On sen nga piviseni nanu ngok nir tevi kerr. Nerñin On sen ngok orongwose p̄iskai nanu nga miteptepi. Nororrmmien se Atua nga jinibb sete murongwose p̄iskai, ko Nerñin On orongwose p̄iskai kobbong. <sup>11</sup> Ko evi nerñi jinibb kobbong nga muto reŋge ni, orongwose piviseni nga miernen erpese. Ko erpok kele, Nerñin On se Atua kobbong orongwose puwra tweni kele nga Atua erpese. <sup>12</sup> Ko kerr kalesia, Nerñin On rramlai pa sete evi nerñin nga miplari iel ngatan, ejki. Evi Nerñin nga Atua mukoni vini nga puloli rraprongwose nelaien nga marres nir nga Atua m̄ilai tevi kerr.

<sup>13</sup> Ko erpok, nale nga namrij reŋgen sete eplari reŋge norongwosien se jinibb, ejki, ko namlai nale nga Nerñin On mivisviseni kem e. Ko namok-werai tweni nale weretunen sen reŋge nale nga m̄ilai tevi nir



nga Nemîn sen mîlik renger. <sup>14</sup> Ko si nga Nemîn On sete mîlik rengen, sete orongwose pîlai derteren lele nga Nemîn On mîlai. Ko mîernen meten orrorr nga sete mia-rongwose nanu nen nir, elesi erpe arivi nanu ne lenglengen, suri Nemîn On kobbong orongwose puloli jinibb purongwose nanu nen nir. <sup>15</sup> Ko jinibb nga Nemîn On se Atua mîlik rengen orongwose sev nga mîrres ko sev nga mîsij, ko sete jinibb mînij san orongwose puwra suri jinibb nga mirpok san. <sup>16</sup> Erpe Naul On muwrai, 'Sete san orongwose norrorrmien se Atua, sete san orongwose pîsere ni.' Ngok ewretun, ko kerr rramlai pa norrorrmien se Kristo osuw.

### 3

#### *Jinibb se Atua*

<sup>1</sup> Ko tasik ko jojik nir, rijen nga mîelai tevi kami seveling nga daron nga mîelik tevi kami, sete erpe rijen nga moro belai tevi nir nga Nemîn mîlik renger, ejki; nurij tevi kami erpe kami kamivi malum jinibb nawon ne iel ngatan, rrek erpe bipiwar-reng nga mara-iaak renge kalesia nosurien ser. <sup>2</sup> Erpe kamsus malum, ko sete nurongwose belai nanen nga mîterter tevi kami, suri sete kamvitere. Ko kamirpok malum ejpari lelingenok. <sup>3</sup> Suri murru kami evijuri malum murru jinibb ne iel ngatan. Lol lelep muto renge kami, ko kamoklatlat lululweni kami. Ko ngok eviseni nga kamirpe malum jinibb ne iel ngatan, ko kamvijuri murrin ne iel ngatan, ko kamilik malum erpe jinibb ne iel ngatan marlik. <sup>4</sup> Daron nga kami sopor marwera, "Namvijuri Pol", ko mînij kele marwera "Namvijuri Apolos", ngok kamirpe jinibb mawos ne iel ngatan ko pa.

#### *Jinibb ne majingen se Atua, majingen ser*

<sup>5</sup> Kaplesi. Apolos evi si? Ko inu Pol nuvi jinibb si? Komru kes nomorivi bbong jinibb ne majingen se Atua ko, nga nomorpitevi kami vini kamosuri Kristo. Kerr sisamis okloli majingen ngok bbong nga Numal mîlai tevi nga puloli. <sup>6</sup> Erpe inu mîlai dan ko morwi jelangin, ko Apolos evsi jelangin nen nir. Ko Atua kobbong ololi jelangin nen marmera mîrres. <sup>7</sup> Jinibb nga murwi ko jinibb nga mivsi orivi nanu nawon kobbong, ko batu majingen ngok oto ji Atua; suri ni ololi jelangin emra ko wenen otoa. <sup>8</sup> Ko inu nga merpe jinibb nga murwi jelangin, ko Apolos nga mirpe jinibb nga mivsi jelangin ngok, nomorsorsan kobbong; ko Atua pia-wuli komru

pusorsan tevi majingen nga nomorloli. <sup>9</sup> Erpe komru nomorkorti tevi Atua nga noborloli majingen sen. Ko kami kamirpe orsel se Atua, ko kamirpe kele naim san nga ni mîmajinge. <sup>10</sup> Ko numajing suri ko wor derteren nga Atua mîlai tevik, ko numajing erpe metusu rrek jinibb nga mokmajinge naim, ko nuli nabur nen. Ko jinibb mînij evini etajer tevi majingen nen. Ko jinibb si nga mîtajer renge majingen nen purongwos wore, ko pimetmet pîrres erpese nga mîmajing renge naim ngok. <sup>11</sup> Suri Atua elngi pa Iesu Kristo erpe esan rres kobbong nga mivi nabur nga murrul totoni naim mîterter, ko nabur nga mirpok ejki kele mun nga marongwose parili. <sup>12</sup> Renge naim ngok, sopor arongwose parmajinge renge narrong, jeli, ko niat nga mîrres, nga puloli puto pipriv. Ko jinibb sopor ma parlai nevnu, wirip, ko botrro.<sup>A</sup> <sup>13</sup> Ko nabong nga milep se Kristo pia-viseni majingen se jinibb jikle nir limjer. Renge nabong ngok nabb piarrowrow lesi majingen totoklai se jinibb nir. Daron ngok, nabb pia-viseni limjer si majingen sen erres ko si majingen sen esij. <sup>14</sup> Poro jinibb san majingen sen erres ko otur jer malum daron nga nabb musuw e, ko morok pia-lai nowli majingen sen ko. <sup>15</sup> Ko poro san majingen sen pia-in nivniv, ko otor jabble joron ko pa osuw; ko otomori pîn tevi joron nir, ko Atua puloli puwlu lingi tevi nevren kiskis.

#### *Kalesia nir arirpe naim se Atua*

<sup>16</sup> Rrek kami kamrongwos pae nga kami kamirpe naim se Atua nga Nemîn se Atua mîlik pa re kami musuw. <sup>17</sup> Ko poro san pulokloksi naim se Atua, ko Atua pulokloksi mîernen. Suri Atua naim sen on elep, ko nik ko inu, kerr jikle rramivi naim se Atua.

#### *Jinibb sete pîrij melmelas suri majingen sen*

<sup>18</sup> Jinibb nga ni murrormi lweni murongwose rengo no jinibb nir pimetmet ni pîrres. Sete erres nga ni pîkrekrasi lweni ni. Erres ma ni pimteni lweni ni pirpe bbong lenglengen san, ko iok puloli norongwosien pivini jin vajin. <sup>19</sup> Suri norongwosien se jinibb ne iel ngatan nir, Atua elesi arirpe lenglengen kobbong. Naul On owra 'Atua ololi jinibb norongwosien ser arongsarr, ko aron luwi rengo norongwosien ser.' <sup>20</sup> Ko Naul On owrai erpel kele owra 'Numal Atua orongwos pae norrorrmien se jinibb ne norongwosien, ko owra arivi nanu nawon kobbong.' <sup>21</sup> Ko erpok, sete erres

<sup>A</sup> 3:12 Erpe iel, Pol ospe nevöt, ko murrin nga nir marili naim muto suri, ko kem namrieni erpe kerr rramili naim iel, nga puloli mining ne nale se Pol pipilari limjer.

nga kapok-rij melmelas suri sev nga jinibb muloli, suri nanu jijle arivi se pa kami osuw. <sup>22</sup> Inu Pol tevi Apolos ko Pita, namivi se kami. Ko iel ngatan evi se kami, ko nanu ne mauren nga m̄irres ko derteren nga kapasi re mijen, ko nanu jijle nga marto pa, ko nanu jijle nga para-pelari keke, nir jijle arivi se kami. <sup>23</sup> Ko kami, kamivi se Kristo, ko Kristo evi se Atua.

#### 4

##### *Aposol se Kristo nir*

<sup>1</sup> Rrek erres kapmeteni kem pipel: namivi bbong jinibb ne majingen se Kristo. Atua elngi kem nga nabwera tweni majingen sen nga womu marto teptepi. <sup>2</sup> Ko daron nga numal ne majingen m̄ilngi majingen renge si nga pimetmete, norrorrmien nga milep evi nga m̄ernen pimetmet ko wor p̄irres ko puloli suri ko wor sev nga numal sen muwrai tevi. <sup>3</sup> Poro kapmerreni kapwer lokloksi inu, rrek poro botur renge no numal nir nga parwera suri inu majingen suk, ko sete nurrormi evi nanu san, ko sete numtutue. Ko inu keke sete nurongwose bowra suri lweni inu majingen suk. <sup>4</sup> Renge inu nelesien suk numajing erres; ko sete nurongwose bowrai poro nuwretun iok rreknga ejki. Jinibb sansan kobbong pia-wera suri inu majingen suk, ngok evi Numal ne melrin. <sup>5</sup> Ko erpok, sete erres kapwera suri majingen se jinibb san renge setewor mivi daron mawos nen. Rraptiriv ko wor pijpari daron nga Numal pia-luwi e vini. Ko ni vajin pia-la tweni norrorrmien ne nemalik nga jinibb marsilvenir parini limjer. Ko renge daron ngok, Atua puloli nise jinibb pian mare pusorsan tevi lat nga m̄irres ren.

##### *Meri Korin arkowkwrir elep*

<sup>6</sup> Tasik ko jojik nir, nuloli komru Apolos nomorvijuri nale ngok nir nga mowrair ngok, ko ngok kami vajin kamrongwos kaploli suri pipre nga komru nomorloli pa. Ko niko kaprongwose vajin murrin ne nale ngel, nga muwra 'Kaprrul totkoni ko wor nale nga maruli pa musuw'. Sete erres nga kapsurōvi jinibb nga kamokvijuri ko kaprrormi p̄isij suri jinibb m̄inij nir. <sup>7</sup> Si ololi kami kaman mare re jinibb sopor? Atua kobbong, suri ni ela nanu jijle tevi kami. Niko sete erres kamsursurōvi lweni kami, erpe kammeteni kami bbong kamsan kamloli. <sup>8</sup> Ia, ko nanu jijle nga kammerreni, kamtor swerir pa osuw? Ko kamimare pa renge kalesia mauren se kami, a? Kamivi pa numal nir, a? Ko kem ejki rres wor, namto malum ngatan! O, ko poro evi weretunen kamivi numal, ko nabir pilep. Suri poro pipok ko kem keke nabkorti tevi kami, ko kerr jijle vajin

rrapivi numal nir. <sup>9</sup> Ko nulesi Atua elngi kem aposol namvivotu jerjer. Namirpe jinibb nga marsuŕe suri pa musuw nga naban vajin re mijen, renge no jinibb jijle nir ko re keke no anglo nir. Namok-tur renge no anglo ko no jinibb ne iel ngatan keke nga parmeteni nekaian se kem. <sup>10</sup> Suri namivi se Kristo, ololi jinibb armeteni kem erpe namivi lenglengen kobbong. Ko kami ma kamkorti pa tevi Kristo, ko kamwun saut pae norongwosien osuw. Kem nammelisna, ko kami ma kamterter! Jinibb arkulu wutan re kem, ko artori ma kami. <sup>11</sup> Ko tetajer numer aji kem, ejpari lelingen ngel; ko tetajer nolo kem emesmes, ejpari lelingen ngel. Sunsun se kem armer-rerrerr. Jinibb arevji kem, ko sise kem ejkie nga nablik rengen. <sup>12</sup> Nammajing elep tevi nevre kem nga nabla nanen se kem. Daron nga jinibb marij m̄isij tevi kem, ko namrij erres bbong surir. Daron nga marloli m̄isij tevi kem, ko kem sete namloli nanu san. <sup>13</sup> Daron nga marwer lokloksi kem, ko kem namrres bbong tevir. Jinibb armeteni kem erpe nanu nawon kobbong, ko evini ejpari lelingenok, nir arlesi kem namirpe nubus ne iel ngatan.

##### *Wurru, kapvijuri murrin suk*

<sup>14</sup> Nuli nale ngok tevi kami, sete evi nga puloli kaprunge p̄isij, ejki, ko nga puloli kaprongwose. Suri kamivi natuk nga memrreni kami milep. <sup>15</sup> Rrek delung jinibb elep wor niko nga marvisiseni kami renge mauren nga kamkorti tevi Kristo; ko jinibb sansan kobbong nga mivi tata se kami. Ko renge mauren kortien se kami tevi Iesu Kristo, inu le nuvi tata se kami nga m̄elai womu nosŕen nga m̄irres tevi kami. <sup>16</sup> Ko niko nuwrai eterter tevi kami nga kapvijuri ko wor murrin suk. <sup>17</sup> Nukoni Timoti vinuk ji kami nga piwilwil se kami renge sel ngok nir. Renge kalesia mauren sen, ni evi natuk nga memrreni milep, nga mokterter renge majingen ngok nir. Ni piwer visviseni kami renge murrin nga mevijuri renge mauren nga mimerr nga miplari ji Iesu Kristo. Evi murrin nga mevisviseni jinibb e nir renge lat jijle.

##### *Pol norrorrmien sen nga pian keke Korin*

<sup>18</sup> Kami sopor arwera "O, setemun Pol mia-vini mia-lesi kerr", ko norrorrmien ser evan mare p̄elak. <sup>19</sup> Ko poro pivi marongen se Numal, ko sete mia-periv, ko bevinuk ko ji kami. Ko ŕelesi vajin nir nen nga nolor mian mare nga marok-rij melmelas, poro derteren ser osorsan tevi nale ser. <sup>20</sup> Suri batun vanu se Atua sete evini re rijen nawon, ko evini re derteren

mawos se Atua. <sup>21</sup> Ko kami kammerreni pirpese? Inu bevinuk ßelesi kami ko bevrrali kami? Rreknga kaplinglingi norrorrmien se kami nga mian mare, ko bevinuk vajin bewilwil se kami rengo murrun nga mumolmol pirpe nga memrreni kami milep.

## 5

*Jinibb nga mivi kalesia san ololi nanu nga ñisij san*

<sup>1</sup> Ko nale san ermali nga muwra san re kami ngok ololi nanu nga ñisij ðerðer. Ololi nanu nga jinibb ne vare kele nir marlesi sete musorsan. Mernen sel nga ñisij, ok-matur tevi tata sen mawos nesen sen tuwen. <sup>2</sup> Ngok, suri sev norrorrmien se kami mok-an mare ðelak? Suri sev kam-kowkowri kami? Erres ðelak ma kami kapting ko kaprunge ðisij suri nanu ngok. Ko erres nga kami kapwirr tweni jinibb nga muloli ñisij ðelak mirpok nga setemun pukorti tevi kami. <sup>3-4</sup> Ko ewretun nuvel lingi kami rengo nibek, ko rengo nemik, nulik malum tevi kami rengo. Ko rengo nise Iesu Kristo Numal se kerr, nuwer lokloksi jile pa ñernen osuw rengo sev nga muloli, erpe nga inu nulik pa tevi kami. Ko daron nga kamkorti rengo nise Iesu Kristo Numal se kerr, ko inu nukorti tevi kami rengo nemik; ko rengo derteren se Iesu, ko <sup>5</sup> kami kaplingi mernen van rengo nevre demij. Ngok puloli niben pijiki, ko Atua ðia-la ma mauren tevi nemun rengo nabong nga vitu daron nga Numal se kerr pia-wer sesesre lat nga puto suri tevi jinibb ðetðeti nir ren.

*Kami kaplai tweni ko wor jinibb nga marloli nololien tetajer*

<sup>6</sup> Ko sete erres nga kaploli norrorrmien se kami pian mare ðelak pirpok. Kami kamrongwos pae nga is beblen kobbong orongwose puloli niv ðipau. <sup>7</sup> Kami kapsuw vajin re kamok-loli nololien, erpe kapwirr tweni ko pa is nga mitra, puloli kapirpe plaoa nga marloli niv ne nanen ne asien nga is mijki ren. Ko arevji pa Kristo erpe natu sipsip san nga marloli terai nanen ne asien e; ko niko nanu jille oto metmet pa. <sup>8</sup> Ko niko rraploli nanen ne asien, ko poro is nga mitra rreknga nololien ko murrun nga sete musorsan oto malum rengo kerr; ko rrapla tweni, ko kerr rrapvijuri ko wor murrun nga muwokwok ñirres ko mivi weretunen, puloli rrapirpe vajin niv nga is mijki ren.

<sup>9</sup> Renge naul nga moli womu pa tevi kami musuw, nuwrai tevi kami nuwra 'Sete kapkorti tevi jinibb nga marloli murrun nga ñisij tevi nesevin.' <sup>10</sup> Lok nuwrai bbong nir nga marwera marivi kalesia

kobbong sopor ko marok-loli kele ñisij mirpok. Suri jinibb nga sete marivi kalesia ko marok-loli mirpok owun saut. Nir nga marok-loli murrun nga ñisij tevi nesevin, nir nga nolor mukul ko nga marmmerreni lenglengen nanu nir; nir nga marvevna, ko nir nga marlot tevi atua ñinij nir, nir kele owun saut. Ko poro kapmerreni sete kapkorti tevi nir ngok nabong sapon, ko kapiel lingi ko wor iel ngatan! <sup>11</sup> Ko rengo nale nga mowrai norrorrmien nen erpel: sete kapkorti tevi jinibb nga marwera arivi kalesia, ko marok-loli malum nololien. Poro parloli ðisij tevi nesevin, rreknga nolor pukul, rreknga parlot tevi atua ñinij, rreknga parok-worworsur, rreknga parok-minmin ðelak rreknga parvevna. Sete kapan kapkorti tevi nir; ko sete kapan kaplik tevi jinibb nga marirpok nir nga kapaan tevir. <sup>12-13</sup> Sete evi inu majingen suk nga bewer sesesre lat nga puto suri tevi jinibb ne vare nir; Atua ko wor puloli nanu ngok. Ko poro san nga mukorti pa tevi kami muloli murrun nga ñisij, ko kami kamrongwos wore kapwer sesesre lat nga puto suri tevi ñernen. Suri Naul On owrai owra 'Kami kapkur tweni jinibb nga mok-loli nololien tetajer, nga setemun pukorti tevi kami.'

## 6

*Sete erres jinibb ne vare nir parsuðe otvi lolaren se kalesia nir*

<sup>1</sup> Kami kamok-loli erpese ko? Daron nga kami san ñilat tevi selen kalesia san, suri sev ñilai norrorrmien ngok tevi nir nga sete marivi kalesia nga parsuðe otvi? Suri sev sete mimrreni puloli jinibb se Atua nir parsuðe otvi? <sup>2</sup> Rrek sete kamrongwose nga jinibb se Atua nir parwer sesesre lat nga puto suri tevi jinibb ne iel ngatan ðetðeti nir? Ngok, ko poro kamrongwos kapviter nga kapwer sesesre lat nga puto suri tevi jinibb ne iel ngatan nir, ko kamviter kele nga kapwer sesesre murrmurrun wowarrene kele pirpok. <sup>3</sup> Rrek sete kamrongwose nga kerr rrapwer sesesre lat nga puto suri tevi anglo nir? Ko poro pirpok, ko murrmurrun wowarrene re mauren ne iel ngatan emalum kobbong nga rrapuðe otvi. <sup>4</sup> Ko ejki! Suri daron nga laten nga mirpok mimare, kamtur imare ko kaman kamwerwai tasi kami tevi nir nga sete marivi kalesia, nga nir ngok ma parloli lilane. <sup>5</sup> Wi, sete kammanun suri nanu ngok? Erpese, kami san ejki nga norongwosien sen mutoe, nga murongwos puloli lilane laten ngok nga jinibb ñilat tevi tasin kele? <sup>6</sup> Sete erres nga kalesia eru porij latlat rengo kot nga jinibb ne vare nir parwera suri lat

nga puto suri tevi nuru. <sup>7</sup> Ko nga laten nga marirpok nir arto re kami eviseni limjer nga kamvitan pa osuw. Suri sev sete kamrongwos kaplinglingi kobbong san nga muwra puloli p̄isij tevi kami? Suri sev sete kamrongwos kaplinglingi kobbong san nga muwra p̄ikrekrasi kami? <sup>8</sup> Ko ejki ma! Suri kami kobbong kamok-loli esij. Kami kobbong kamok-kerkerasi jinibb, ko sete jinibb nawon nir, ko jinibb nga marivi kalesia tasi kami. <sup>9</sup> Kapmetmet! Suri kamrongwos pae osuw nga jinibb nga marok-loli mirpok sete mara-sil van loloim rengo batun vanu se Atua. Sete kaprongsarr rengo norrormien. Jinibb nga mok-ojoi nesevin, ko jinibb nga moklot tevi atua m̄inij, sete orongwos pian loloim rengo batun vanu ngok. Jinibb nga mimatur tevi nesen se jinibb m̄inij, ko nesevin nga muloli m̄isij tevi diwen sen, ko norman nga mok-matur tevi norman m̄inij keke, ko nesevin nga mimatur tevi nesevin m̄inij keke, sete arongwose paran loloim rengo batun vanu se Atua. <sup>10</sup> Jinibb venao, ko jinibb nga mimrreni nanu milep, ko jinibb nga mok-minmin ko batun m̄ilenglang, ko jinibb nga moklokloksi nise jinibb m̄inij keke, ko jinibb nga muloli murrun lele nga pivnae nevõt rengen, sete mia-van loloim rengo batun vanu se Atua. <sup>11</sup> Tuwi kami sopor arirpok, ko lelingenok Atua errawe tweni nololien se kami ko ololi kamwokwok. Ololi kamon ko kamivi jinibb sen. Ololi kammomsawos erres rengo non suri nise Iesu Kristo Numal se kerr, ko rengo Nem̄in se Atua se kerr.

*Kami kapmetmet nibe kami nga kapsusi nise Atua van mare*

<sup>12</sup> Jinibb sopor arwera "O, erres kobbong nga rraploli nanu p̄etp̄eti nir". Erres, ko sete nanu jijle nga kerr rramrres ren. Rramrongwose rrapwera "O, erres kobbong nga rraploli nanu p̄etp̄eti nir", ko sete rrapmarong te nga nanu ngok nir san pirvei tweni norrormien se kerr, ejki rres. <sup>13</sup> Jinibb sopor arwera "O, nanen evi nga pusongni depai kerr, ko depai kerr evi nga p̄ilai nanen." Ewretun, ko nanu ngok korti nuru, pian ko pora-suw nga Atua pia-lai tweni nuru. Ko erpok keke, nibe kerr sete evi nga rrapoji nesevin e, ko evi nga rraportori puon nga rrapurõvi Atua rengen, ko Atua p̄ilai sev nga nibe kerr mimrreni. <sup>14</sup> Atua esa raji Numal Iesu rengo mijen, ko rengo derteren sen keke ni pia-loli kerr keke rrapa-maur luwi keke rengo mijen. <sup>15</sup> Kami kamrongwos pae nga nibe kami erpe murrmurru nibe Kristo. Ko erpok, sete nurongwos bean bematur tevi nesevin ne sel. Kami kamrormi erres nga parkortoni murrmurru ne nibe

Kristo san tevi nesevin nga mirpok? Ejki rres nawon! <sup>16</sup> Ko kami kaprongwose ko wor nga daron nga jinibb san mian mimatur tevi nesevin ne sel san, nuru orirpe nibe jinibb sansan kobbong. Ngok erpe nga Naul On muwrai muwra 'Nuru korti, nibe nuru pivi sansane'. <sup>17</sup> Ko si nga mukortoni mauren sen tevi Numal se kerr, ko nuru ngok erpe evi sansane ko pa. <sup>18</sup> Setemun kaploli murrun nga m̄isij tevi nesevin. Nololien lele nga jinibb muloli sete olokloksi niben, ko daron nga jinibb muloli m̄isij tevi nesevin, ololi esij ko pa tevi niben, erpe olokloksi niben pa. <sup>19</sup> Erpese sete kamrongwose nga nibe kami evi naim se Ner̄in On? Ner̄in ngok, Atua elai pa elik tevi kami osuw, ko oto vajin ji kami. Ko niko nibe kami sete evi se kami, ko evi se Atua vajin. <sup>20</sup> Suri Atua owli tweni pa kami osuw. Ko ngok kapmetmet nibe kami ko wor rengo sel nga pususi nise Atua pian mare.

## 7

### *Arsusi rongorngoe totkoien*

<sup>1</sup> Nuwra bowrai vajin tevi kami suri sev nga kamsusi daron nga kamulul vini jik. Ewretun, jinibb nga sete m̄itkai nesevin ololi murrun nga m̄irres p̄elak. <sup>2</sup> Ko suri jinibb elep arok-loli esij, erres ma nga norman, nesen sen putoe, ko nesevin, diwen sen putoe. <sup>3</sup> Ko norman pukortori ko wor p̄irres tevi nesen sen rengo murrun nga musorsan ne totkoien nga morlik korti rengen, ko nesevin keke puloli pirpok keke tevi diwen sen. <sup>4</sup> Ko sete nesevin kis emetmete niben, ko diwen sen keke. Ko rengo murrun ngok keke, sete diwen sen emetmet kis ni niben, ko nesen sen keke. <sup>5</sup> Sete kopor-musmuse kamru lululwi tevi kamru. Ko poro kamru korti komor-marong, orongwos kopor-ivel ngangasu mun kamru sapon nga kopor-lot mun sapon, ko erres, mian ko vitunen kopora-vini ko wor nga kopora-korti luwi keke. Poro pijki ko demij orongwose p̄iskai sel nga p̄ikrekrasi kamru rengen, suri sete komorterter.

<sup>6</sup> Nale ngok nga mowrai tevi kami sete nuwra nga kaptotko ko wor, ko nuwra bbong nga poro pirpok kamtotko, ko kapvijuri lat nga mowrai ngok. <sup>7</sup> Poro jinibb jijle sete partotko, ko pirpe inu kobbong, ngok erres p̄elak. Ko Atua elai derteren lele tevi jinibb. Elai derteren ne norrormien tevi san nga puloli nanu san, ko elai derteren ne norrormien tevi san nga puloli nanu san.

<sup>8</sup> Ko tevi nir vajin nga sete martotko wor, ko tevi nir nga diwen ser marmij lingir, nuwrai tevi kami, erres nga kami kaplik

pirpe inu kobbong. <sup>9</sup> Ko poro kami san purnge nga nolon mimrreni lenglengen wor nga putotko, ko erres, putotko. Erres nga putotko asi nga poro pilik nawon ko tetajer nolon ok-venae nesevin.

<sup>10</sup> Ko norrorrmien san ngel, sete evi nga inu kis ko evi se Numal, ko pian ji nir nga martotko pa musuw. Ko owrai owra 'Nesevin sete pilinglingi diwen sen. <sup>11</sup> Poro nesevin pilinglingi diwen sen, ko pilik nawon pirpok, nga sete putotko kele; rrek poro pijki ko pulwi ma pukorti tevi diwen sen kele. Ko norman sete pilngi kurtweni nesen sen.'

<sup>12</sup> Tevi kami minij nir vajin, ngel evi norrorrmien suk lebbong, sete evi se Numal: poro kalesia norman san nesen sen otoa nga sete mivi kalesia, ko vinnen emarong nga pilik tevi mernen, mernen sete pilngi kurtweni. <sup>13</sup> Ko poro kalesia nesevin san ototko tevi norman nga sete mivi kalesia, ko mernen emarong nga pilik tevi, vinnen sete pilngi kurtweni. <sup>14</sup> Suri norman nga sete mivi kalesia ngok, on re no Atua daron nga mukorti mïrres tevi nesen sen; ko nesevin nga sete mivi kalesia ngok kele, on kele re no Atua daron nga mukorti mïrres tevi diwen sen. Poro sete pirpok, ko bipi se kamru nir parirpe bipi ne vare kobbong. Ko ejki, bipi ngok aron vajin. <sup>15</sup> Ko poro nuru tuwen nga sete evi kalesia owra pivel lingi nuru tuwen nga mivi kalesia, ko kalesia nen sete piwer ore, pilinglingi kobbong. Ko kalesia norman rreknga nesevin ngok pimarong bbong nga pivel lingi, sete nolon pisij tevi suri. Suri Atua everus kerr nga rraplik rege liken nga mumolmol mïrres. <sup>16</sup> Poro nik kuvi nesevin san, ko suri sev kurrormi nga sete kurongwose kuplai se diwen som nga nabong san pivini pivi kalesia? Ko poro nik kuvi norman san, ko suri sev kurrormi nga sete kurongwose kuplai se nesen som nga nabong san pivini pivi kalesia?

*Kaplik pirpe nga Atua miveruse kami*

<sup>17</sup> Kerr sisamis purrul totkoni ko wor pirres murrun nga Numal Atua milai tevi kerr daron nga miveruse kerr, ko rraplik malum rege liken nga rramlik pa ren womu. Ngok evi nale nesesreien nga nomok-visviseni tevi jinibb nga marokkorti rege Naim On ijile. <sup>18</sup> Poro jinibb san pian pa re bae daron nga Atua miveruse, ko sete erres nga ni pian puloli lesi pirieni kele nanu ngok. Ko poro san setewor ean re bae daron nga Atua miveruse, ko sete ni pian re bae kele. <sup>19</sup> Suri poro jinibb pian re bae rreknga poro sete pian, osorsan kobbong, evi nanu nawon. Ko nanu nga milep nen evi nga jinibb pivijuri ko wor nesesreien se Atua.

<sup>20</sup> Ko poro rrapivi demij maur rreknga jinibb nga mivel sisarow daron nga Atua miveruse kerr, ko erres nga rraplik pirpok kobbong. <sup>21</sup> Rrek kuvi demij maur se jinibb san daron nga Atua miveruse nik, ko erres kobbong, sete kuprormi. Ko poro sel san oto nga kurongwos kupini kupivi jinibb nga mivel sisarow, ko erres, kuplai, ko kupiel sisarow vajin. <sup>22</sup> Daron nga Kristo miveruse jinibb san nga mivi demij maur, ni erpe evel sisarow ko vajin rege Kristo. Ko erpok kele, poro Kristo piveruse jinibb san nga mivel sisarow, ko mernen pivini ko vajin pirpe demij maur se Kristo. <sup>23</sup> Ko rege iok, Atua owli tweni pa kerr osuw, ko sete emrreni nga rrapini rrapivi kele demij maur kele suri murrun nir se jinibb. <sup>24</sup> Ko niko, tasik ko jujuk nir, rege kalesia mauren se kerr, kerr sisamis pilik malum ko wor rege liken nga milik ren womu, daron nga Kristo miveruse.

*Arsusi suri sel se nir nga sete martotko ko nir nga diwen ser marmij lingir*

<sup>25</sup> Ko kamsusi kele suri nir nga sete martotko wor. Sete nutor sweri nale san nga miplari ji Numal se kerr nga muspe suri. Ko bowrai bbong norrorrmien suk. Ko suri Numal se kerr okwilwil se inu rege nolon nga mïrres, ko kaposuri ko wor nale suk. <sup>26</sup> Rrek erres nga jinibb parlik suri mun marlik, suri lelingenok evi daron nga miterter san. <sup>27</sup> Nik nga kumtotko pa musuw, sete erres nga kuptor otvi totkoi en som. Ko nik nga sete kumtotko wor, sete erres nga kuptotko kele. <sup>28</sup> Ko poro kuptajer rege norrorrmien nga kurrreni kuptotko, ko ngok sete evi nololien. Ko poro nesenwarreng san putotko, ko ngok sete evi nololien. Ko suri nanu wowarreng tetajer arok-vijajeng re jinibb nga martotko, niko nuwra erres nga parsan kobbong parlik. <sup>29</sup> Tasik ko jujuk nir, nale nga mowrai ngok erpel le: Suri daron setemun mia-periv, ko erres nga jinibb nga mutotko pilik ko pa pirpe jinibb nga sete mutotko. <sup>30</sup> Ko jinibb nga mokting, erres nga pilik pirpe jinibb nga dengen mijki jin. Ko jinibb nga mokir, erres nga pilik pirpe jinibb nga sete mokir. Ko jinibb nga mok-wulwul, erres nga pilik pirpe jinibb nga nijor sen mijkie. <sup>31</sup> Ko jinibb nga mok-majing suri norrorrmien ne iel ngatan, erres nga sete puloli nanu ngok nir parevei totkoni. Nomok-rij erpok suri otomori le pa iel ngatan tevi murrun lele nen nir parjiki. <sup>32</sup> Inu numrreni lenglengen e nga sete nanu san pirvei tweni norrorrmien se kami. Suri jinibb nga sete mutotko orrorrmie wor elep suri majingen se Numal nga puloli Numal sen pir rengen, <sup>33</sup> ko jinibb nga ma mutotko

ok-rrormi elep suri nanu ne iel ngatan, ko owra pipej sel nga puloli nesen sen p̄ir rengen. <sup>34</sup> Ko norrorrmien sen ngok evijuri sel eru. Ko erpok kele, nesevin nga sete mutotko rreknga nesenwarreng, ok-rrormi elep suri majingen se Numal se kerr. Emrreni nga niben tevi norrorrmien nuru korti porwokwok nga porivi se Atua. Ko nesevin nga ma mutotko ngok epejpej sel nga puloli kobbong diwen sen p̄ir.

<sup>35</sup> Nomok-werai nale ngok nir nga par-wilwil se kami, ko sete numrreni parrowsi kami, ejki. Ko numrreni nga kapvijuri murrun nga musorsan ko kaploli majingen se Numal nga sete norrorrmien san pirvei totkoni kele kami.

<sup>36</sup> Ko poro nesevin san nuru norman san orloli rijrijen nga ormerreni portotko, mian ko norrorrmien sapon eplari kele nga muloli porlik sisamis mun, setewor portotko. Ko mian ko poro norman nen elesi nga mokloli murrun sapon nga sete m̄irres p̄elak tevi selen ngok, mian ko orrorrmi kele nga erres portotko, rrek erres ma portotko, erpe puto re norrorrmien nga ni mimrreni. Ko ngok sete evi nololien ko. <sup>37</sup> Ko poro jinibb san niko nga selen mutoe, nga sete san owraie, ko renga norrorrmien sen bbong orrul totoni nolon nga sete putotko, ko norrorrmien sen omolmol ko setewor ololi esij tevi selen, ko ngok morok ololi erres ko.

<sup>38</sup> Berij otvi nale suk vajin: si nga mutotko tevi selen ololi erres. Ko si nga sete mutotko tevi selen ololi erres kele wor. <sup>39</sup> Ko nesevin nga mutotko pa sete orongwose puwlu lingi diwen sen daron nga mimaur malume, ko daron nga diwen sen mimij vajin ko orongwose pia-lik ji jinibb m̄inij. Ko diwen sen nen pivi ko wor kalesia. <sup>40</sup> Ko renga norrorrmien suk, poro putur nawon ko rrek ni p̄ir kele wor. Norrorrmi Nēmin se Atua ko elai norrorrmien ngok tevik.

## 8

*Nanen nga marsulie van ji Atua m̄inij nir*

<sup>1</sup> Ko erpese re vison nga marsulsul lingi mijpon tevi atua m̄inij nir? Erres re kerr kalesia rrapurroi, rreknga ejki? Ko nale nga kamok-werai ngok, nga kerr jijle norongwosien se kerr otoa, ewretun kobbong. Ko norongwosien ngok ololi norrorrmien se jinibb ean mare ko okowkowri e kobbong. Ko merrenien ma ololi mauren ser evini mare erres. <sup>2</sup> Jinibb nga murrormi nawone ni orongrongwos, sete orongwos alje rragrag nanu san renga norongwosien weretunen. <sup>3</sup> Ko jinibb nga ma mimrreni lenglengen Atua, Atua

orongwos pae m̄ernen erres osuw, ko evi selen nga m̄irres.

<sup>4</sup> Ko erpese vajin re iok, re nanen nga marsuli van ji atua m̄inij nir? Rramrongwose pa nga atua m̄inij ngok nir sete arivi weretunen, ko Atua nga ma kerr rramlot tevi evi weretunen jerjer nga m̄isan rres kobbong. <sup>5</sup> Ko poro atua nga marirpok nir pilep nga jinibb marok-lot tevir nga marto mare rreknga re ngatan, ko pirpese ko? Rrek atua elep ko numal elep nga marirpok. <sup>6</sup> Ko kerr nga rramivi kalesia rramrongwose nga Atua se kerr sansan kobbong, ngok Tata se kerr nga mauren ko nanu jijle marivel jin vini. Ko Numal se kerr kele sansan kobbong, evi Iesu Kristo nga muloli nanu jijle nir ko muloli kerr rrammaur.

<sup>7</sup> Ko sete jinibb jile arongwose nanu nga mivi weretunen ngok. Jinibb sapor nga lelingenok marivi kalesia, tuwi ko arok-lot tevi atua m̄inij nir renga sia elep. Ko evini ejpari lelingenok, daron nga marurroi nanen nen, ko arunge erpe arosuri malume atua m̄inij nen nir, suri norrorrmien ser setewor eterter, ko arunge erpe arok-loli nanu nga sete m̄irres. <sup>8</sup> Ewretun, nanen evi nanu nawon. Nanen sete orongwose pirvei kerr nga rrapruj mori Atua, ejki. Sete rramrongwose rrapror jabble nanu san poro sete rrapurroi nanen ngok; ko erpok kele poro rrapurroi nanen ngok, sete rramrongwos rrapror sweri nanu san rengen. <sup>9</sup> Iok ewretun ko, ko kupmetmet re nanu san ngel: Tukrroi nanen san nga marsuli pa tevi atua m̄inij, ko selem san nga nosurien sen sete eterter tilesi ko ni kele tuloli tirpok ko tivitan van re nololien vajin. <sup>10</sup> Suri ni nosurien sen sete eterter, ko elesi nik nga tetajer komokwera norongwosien som otoa, kukorti kele renga nanen nga marloli tevi atua m̄inij nir, ko ngok tirvei norrorrmien sen nga tuloli ni tukorti kele renga kele nanen ngok, renga norrorrmien sen nga sete m̄irres. <sup>11</sup> Ko norongwosien som ngok tuloli vajin m̄er nga nosurien sen sete m̄iterter ngok tijjiki suri, ngok tasim nga Kristo mimij suri. <sup>12</sup> Ko renga murrun ngok, tomok-loli tisij tevi tasim ko tomok-lokloksi nga norrorrmien sen sete titerter, ko erpok tomok-loli tisij kele tevi Kristo kele. <sup>13</sup> Poro kalesia tasik rreknga jojik orrorrmi nga ololi nololien daron nga murroi nanen nga marloli tevi atua m̄inij ngok nir, ko inu ma ejki, sete inu mea-urroi nanen ngok nabong san, suri sete numrreni bololi tasik pivitan renga nololien.

## 9

*Pol evi Aposol ko setewor ela nanu jijle*

*nga moro pilai*

<sup>1</sup> Erpese? Kamrrormi inu sete nuvel sisarow? Kamrrormi sete nuvi Aposol? Kamrrormi sete nulesi metek e Iesu ngok nga miwi Numal se kerr? Erpese? Kami ko kamivi wenen renge majingen ngok nga mololi tevi Numal se kerr. <sup>2</sup> Rrek jinibb sopor arlesi inu erpe sete nuvi Aposol, ko kami ma ejki. Suri mauren se kami nga kamkorti pa tevi Numal se kerr eviseni erres pelak nga inu nuvi Aposol. <sup>3</sup> Ko ngel evi weli nale suk daron nga jinibb marwera parwer lokloksi inu, nuwra: <sup>4</sup> Erpese? Kamrrormi inu sete nurongwos belanenanen rreknga nuwi pivi nowli majingen suk? <sup>5</sup> Ko kamrrormi inu nusan sete erres nga belesi nesen suk san nga miwi kalesia ko piptevik re nivelen suk nir, pirpe Pita, ko aposol nga ngok nir, ko tasi Numal Iesu nir marloli? <sup>6</sup> Kamrrormi erres nga komru Banapas kobbong noborok-pelak nga nobor-tor sweri nijor ko nanen nir renge mauren se komru? <sup>7</sup> Sete pa jinibb nga miwi jinibb ne nuval san owli lweni kele sel sen nga pian pipalpal. Ko sete pa jinibb san orwi orsel san ko sete okan nga pilai wenen renge orsel nen; ko sete pa san owngani nawon buluk ko sete orroi rragrrag san. <sup>8</sup> Kamrrormi norrrormien ngok eplari renge mauren se kerr kobbong? Ejki rres. Oto kele wor renge nale neseseien se Moses. <sup>9</sup> Suri Moses oli pa renge nale neseseien nen owra 'Daron nga kamlai buluk nir nga paran parbböt jijreni batu wit nir nga parlai tutweni jelangin nir, sete kapkai totkoni jingor, ko kaploli ko wor parurroi wit ngok nir.' Erpese, Atua ok-rrormi buluk ko nir? <sup>10</sup> Ejki, nale ngok ejpari kerr, ko emawose kerr. Jinibb nga murwi ko jinibb nga pilai wenen, nuru korti porloli wor majingen se nuru ko, suri norrrormien se nuru oto nga pora-korti renge wenen nga pia-pelari. <sup>11</sup> Majingen se kem erpe namruwi orsel san ji kami nga nanen nen miwi kalesia mauren. Ko erpese? Erres kobbong nga nablai nanen rres ji kami nga kaplai tevi kem nabrroi? <sup>12</sup> Kammarong bbong nga jinibb sopor parok-la nanen ji kami, ko kem ma namivi jinibb mawos nga moro nablai nanen ji kami. Ko kem sete namloli erpok, ejki. Nammusus nabon tertere nanu pirkok, suri tulokloksi sel ne nospen nga mürres se Kristo. Sev nanu nga murray nga mivini, ko namwosi ko pa. <sup>13</sup> Ko kami kamrongwos pae nga jinibb nga martori majingen renge Naim On arlai nanen ser iok. Ko jinibb nga marok-revji nanu rrum nir nga parlai van loloim renge lat ne sulsulen, arok-urroi kele sapon renge nanen ngok nir. <sup>14</sup> Ko renge murrun ngok, Numal se kerr elngi

nale, owra jinibb nga marok-werai tweni nospen nga mürres sen, para-lai ko wor nowlir suri.

<sup>15</sup> Ko nurongwos bololi pirkok nga belai nowlik, ko ejki, sete nuloli. Ko sete nuspe nowlik erpel nga bevijajenge. Rrek erres nga inu bemij kobbong, asi nga poro san pila tweni nanu ngel nga nurunge erres ren, nga sete marwulik re majingen suk. <sup>16</sup> Sete nurongwose berij melmelas suri nomok-werwer renge nale se Kristo. Suri ngok evi wor majingen nga bololi ko. Ko poro sete bewerwer tweni nospen nga mürres ngok, ko ngok pisij pilep re inu. <sup>17</sup> Poro inu bbong belngi inu nga bololi majingen ngel, ko orongwose bowra 'O, rrek belai nowlik sapon rengen.' Ko suri sete inu nungki, ko Numal suk ko wor elngi inu nga bevi demij maur sen. <sup>18</sup> Ko nowlik evi bbong nga bewerwer tweni nospen nga mürres van ji jinibb nir nga sete nir san muwli tevik. Suri sete nuloli norrrormien suk nga belai nevöt nga moro belai suri nospen nga mürres ngok. Re murrun ngok ko pa erpe evi nowlik ren.

*Pol erpe demij maur se jinibb nir*

<sup>19</sup> Inu Pol nuvel sisarow. Sete nuvi demij maur se jinibb san. Ko inu kobbong nulngi inu nuvi demij maur se jinibb nir, nga bervei nir pilep parini parivi jinibb se Kristo. <sup>20</sup> Nuvijuri murrun se meri Isrel nir nga bervei nir parini parivi jinibb se Kristo. Ewretun sete nulik re nevre nale neseseien se Moses, ko renge no meri Isrel nir nga marlik re nevre nale sen, inu nuloli erpe inu kele nulik rengen, nga bervei nir parini parivi jinibb se Kristo. <sup>21</sup> Ko sete nulik ngasu re neseseien se Atua erpe jinibb ne vare nir, ko nulik re nevre neseseien se Kristo; ko renge no jinibb ne vare nir nga sete marlik re nevre nale neseseien se Moses, nuloli erpe nga inu kele sete nulik re nevre nale nen, nga bervei jinibb ne vare ngok parini parivi jinibb se Numal. <sup>22</sup> Ko renge no jinibb nga derteren ser mijkie, nuloli erpe inu kele derteren suk ejkie, nga bervei nir parini parivi jinibb se Kristo. Renge no jinibb lele nuloli erpe nuvijuri kele kobbong murrun nga muto jir, nga bevijuri sel totoklai nga bewilwil tama se nir sopor. <sup>23</sup> Nuloli nanu ngok nir suri nospen nga mürres ngok, nga puloli borongwose botor sweri beblen renge nanu nga marres renge nospen nga mürres ngok.

*Rrapwolu ko wor piterter nga rraplai nowli kerr*

<sup>24</sup> Kamrongwos pae murrun ne woluen. Jinibb elep arwolu, ko nir sansan kobbong orongwos pilai nowlin nen. Ko erpok kele, kapwolu ko wor piterter renge woluen

se kami ngok nga kaplai nowli kami nga Kristo pia-lai. <sup>25</sup> Jinibb ne woluen orongwose piplak daron pilep ko wor nga pia-lai vajin nowlin. Ko nowlin nen puto beblen kobbong. Ko kerr ma erpe nga rramwolu tweni rraplai nowlin san nga sete mia-jijki nabong sapon. <sup>26</sup> Iok ko ololi nga numrreni bowlu nungsi wor lat nga woluen musuw e. Iok ko ololi nurpe kele jinibb san nga mian renge boksing nga sete ewirr sarrsarr nevren. <sup>27</sup> Ko erpok nomokrrul totoni nibek eterter erres, nga puloli nibek pumolmol ko sete pirveik van lat nga misij. Inu nuverus pa jinibb elep nga parini parivi jinibb se Kristo, ko esij poro nga inu vajin bejijki.

## 10

*Sev nga miplari ji mēri Isrel tuwi evi nga puwni kerr*

<sup>1</sup> Tasik ko jojik, nuwra kaprongwose sev nga miplari ji apu se kem nir ne tuwi re daron se Moses. Nir jijle arteptepi renge namol re nabor nen, ko sete nanu san olokloksir. Nir jijle arivel bbong Belar ko arivel otvi dis nga musongsong. <sup>2</sup> Ko renge dis ngok rreknga nabor ngok, nir jijle arkorti tevi Moses, erpe arpaptaese kerr lelingenok rramkorti tevi Kristo. <sup>3</sup> Nir jijle arurroi nanen ngok mana nga Atua mīlai tevir. <sup>4</sup> Ko armini kele bbong nuwi sansan ngok ko nga Atua mīlai tevir, suri arlai nuwi renge nevōt nga milep nen. Nevōt nen erpe Kristo, nga miptevir tetajer. <sup>5</sup> Ko nir elelep Atua sete eir rer, niko muloli armij renge lat karkar renge lolo merwer.

<sup>6</sup> Ko nanu ngok nir arivi nga parsusur metue kerr ko nga parwuni kerr. Sete erres nga nolo kerr pivnae nanu karkar nir pirpe nir ngok ne tuwi marloli. <sup>7</sup> Sete erres rraplot tevi atua mīnij nir, pirpe nir ngok ne tuwi sopor marloli. Naul On ospē suri nir owra 'Nir ngok aran arkorti nga maraan ko marminmin, mian ko artur mera ko arloli detnijen nga sete marres.' <sup>8</sup> Sete erres rraploli murrūn nga mīsij tevi nesevin pirpe nir ne tuwi marloli, ko mian ko nir evi nuvarrerleng ngavōl eru dromon itul (23,000) marmij renge nabong sansan. <sup>9</sup> Sete erres rraprowrowe Numal se kerr pirpe nir ne tuwi sopor marloli, mian ko numēt nir maraji pinpinir. <sup>10</sup> Ko sete erres nga rraploli nale pirpe nir ne tuwi nir marloli, mian ko anglo nga mokrevji pini jinibb nir evini erevji pinpinir.

<sup>11</sup> Nanu karkar nga nir ngok ne tuwi nir marok-tor swerir ngok arivi nga parviseni kerr, ko aruli jiljilweren ser renge naul ngok nga puwni kerr lelingenok. Suri rrammaur jipari daron san nga otomori le pa nabong nga vitu pivini. <sup>12</sup> Niko si

nga orrorrmi otur eterter, pimetmet ko wor pīrres nga sete pivitan kele. <sup>13</sup> Nanu karkar nga marok-rowrowe kami ar-sorsan kobbong tevi nanu karkar nga marok-rowrowe kalesia jijle nir kele. Ko Atua orull totkoni rijrijen sen, ko ni sete mia-marong nanu san nga mīterter pelak purrowrowe kami; ko re daron mawos nga nanu nga mirpok muloli lesi nga purrowrowe kami, Atua puloli sel san nga kami kapasi renge nanu ngok nir.

<sup>14</sup> Selek nir, sete erres kapsurōvi atua mīnij nir. <sup>15</sup> Nomok-rij tevi kami erpok erpe kami kamrongwos pae, ko kaprrorrmī ta poro nuwrai erres rreknga esij. <sup>16</sup> Ko erpese renge biles ngok ne nanen se Numal nga rramwera erres wor tevi Atua suri? Daron nga rramminmin renge biles ngok, ko rramivi sansan tevi Kristo renge drān nga mīsese. Ko erpese kele renge niv ngok nga rramok-roi? Daron nga rramurroi niv ngok, ko rramivi sansan tevi Kristo renge niben. <sup>17</sup> Kerr elep, ko niv sansan rres kobbong. Ko kerr jijle rramurroi niv ngok, ololi erpe kerr jijle rramivi niben sansan kobbong.

<sup>18</sup> Kaprrorrmī ta murrūn ngok se mēri Isrel, erpese renge jinibb nga marurroi nanu rrum nir nga marevjir nga parloli sulsulen van ji Atua? Nir ngok arivi gortien sansan kobbong renge sulsulen ngok. <sup>19</sup> Ko re devjen se nir nga marloli sulsulen van ji atua mīnij nir, inu sete nuwra atua mīnij ngok nir arivi Atua weretunen, ejki, ko sete nuwra viso nanu rrum nga marevjir nga parloli sulsulen van ji atua mīnij nir evi nanu san, ejki. <sup>20</sup> Ko norrorrmien suk erpel ma: nir arok-loli sulsulen tevi demij nir, sete arloli tevi Atua. Ko numusus lenglengen nga kapkorti tevi demij nir. <sup>21</sup> Sete kamrongwose kapminmin renge biles se Numal se kerr ko rege biles se kele demij, ejki. Ko sete kamrongwose kaplik nga kapurroi kele nanen nga Numal mīlai ko nanen se kele demij, ejki. <sup>22</sup> Erpese? Kamwera kaploli Atua nolon pilelep suri sev

nga kamloli ngok? Kamrrorrmī rrek derteren se kami easi wore ni derteren sen? <sup>23</sup> Ko kamok-wera "O, rramrongwos rraploli nanu jijle nga sete san orongwos piwer ore kerr ren." Ewretun, ko sete nanu jijle erres nga rraploli, ko sete nanu jijle orongwose piwilwil se kerr. <sup>24</sup> Sete erres jinibb nga mivi kalesia san pipepej sel nga piwilwil se bbong ni rengen, ko rrappepej ma sel nga purongwose piwilwil se sele kerr nir. <sup>25</sup> Kamrongwos kaproi kobbong vison nga marsulsul lingi mijpon tevi atua mīnij nir nga kamwuli ji jinibb nga marok-wulwule, nga sete norrorrmien se kami puwlu karkar suri.



<sup>26</sup> Suri Naul On owrai owra 'Ngatan ngel ko nanu jijle nga marto rengen arivi se Atua nga mivi Numal se kerr.' <sup>27</sup> Poro jinibb san nga sete muosuri Atua piveruse kami nga kapan kapāan rengen naim sen, ko erres kobbong kamrongwose kapan ko kapurroi nanu jijle nga mīlai nga sete nolo kami puwlu karkar suri nanen sev nga marto. <sup>28-29</sup> Ko poro san puwrai puwra "O vison ngok evi ne nanu rrum san nga marloli sulsulen e van ji atua mīnij nir. Sete erres rraproi." Ngok kapvijuri nale se morok, ko sete kapurroi vison ngok. Suri nik nolom erres bbong, ko mīnen ma nolon tuwlu karkar suri. Ko poro kami san pususi kele re iok, puwra "O, borroi le! Inu nuvel sisarow. Suri sev bevijuri kele norromien se jinibb mīnij?" <sup>30</sup> Poro bowra erres tevi Atua suri nanen suk, sete san orongwose pīwer lokloksi inu suri nanen suk nga mowra erres tevi Atua suri." <sup>31</sup> Iok erres kobbong, ko nanu san ni le: sev tama san nga kamurroi rreknga kammini rrek nanu tama san nga kamloli, tetajer kapsusi ko wor nise Atua pian mare suri. <sup>32</sup> Ko sete kapok-loli nga daron sapon mēri Isrel rreknga jinibb ne vare nir rreknga jinibb ne kalesia se Atua nolor parok-sij suri murrin se kami. <sup>33</sup> Tetajer rengen inu murrin suk nomok-ṗelak nga bololi jinibb nir parir bbong rengen sev nga mololi. Sete nuloli nanu nga pīrres re inu kis, ejki. Nuloli nanu nga pīrres re jinibb mīnij nir nga puloli sel nga ḥelai mauren tevir. Ko kami kaploli surie pirpe inu mololi.

## 11

*Murrin mawos se nesevin re daron nga marwerwer e*

<sup>1</sup> Kapvijuri murrin suk pirpe nga mevijuri murrin se Kristo.

<sup>2</sup> Nusrōvi kami suri kamok-rrorrmī tetajer inu ko kamvijuri erres nevisvisien suk nga mevisvisien kami e womu. <sup>3</sup> Ko numrreni kaprongwose pīrres nanu san, ngel: norman ean mare wor easi nesen sen, ko Kristo ean mare kele easi jinibb jijle, ko Atua ean mare kele wor easi Kristo. <sup>4</sup> Ko daron nga jinibb san mulot rreknga muwra tweni sev nga Atua mīlai tevi, ko musunsun ore batun, mīnen ololi Kristo non ewis ko. Suri rengen murrin se kerr, jinibb san pusunsun ore batun nga piviseni nga jinibb san ni ko nga mian mare re ni. Ko ejki, Kristo esan rres ean mare re kerr. <sup>5</sup> Ko daron nga nesevin san mīwerwer rreknga mulot ko sete osunsun ore batun, nesevin ngok ololi diwen sen non ewis ko. Suri ni pusunsun ko wor, nga rengen murrin se kerr miviseni

nga diwen sen ni ko ean mare easi re ni. Poro pijki, ko erres ni pimanun pirpe nesevin san nga markiri batun mumus pētpēti. (Ngok nesevin ne sel nir arok-loli.) <sup>6</sup> Ko poro nesevin san pumus pusunsun ore batun, ko erres ma nga pitvei tweni jomro batun pētpēti. Ko poro pimanun nga pitvei rreknga pīkri pumus, ko erres ma nga ni pusunsun ore kobbong. <sup>7</sup> Ko sete erres nga norman pusunsun ore batun, suri ni erpe Atua, ko eviseni nosrōvien se Atua. Ko nesevin ma eviseni nosrōvien se norman. <sup>8</sup> Suri tuwi Atua sete elai nesevin nga muloli norman e, ko elai ma norman nga mīmajing nesevin e. <sup>9</sup> Ko Atua sete ololi norman nga piwilwil se nesevin, ejki. Ololi nesevin nga piwilwil se norman. <sup>10</sup> Ko rengen iok, osorsan kobbong nga nesevin pusunsun ore wor batun ko, nga piviseni tevi anglo nir nga elik rengen nevre diwen sen. <sup>11</sup> Rengen kalesia mauren ngok, nesevin sete orongwos pisan puloli nanu san, ko norman kele sete orongwos pisan puloli nanu san. Nuru kes pormajing kokorti ko wor. <sup>12</sup> Suri ewretun, tuwi Atua emajing nesevin re norman, ko lelingenok norman eak vajin rengen nesevin. Ko nanu jijle arpelari wor ji Atua.

<sup>13</sup> Kami kaprrorrmī ta, bowrai lweni kele sapon: Erres nga nesevin putur re no jinibb nir ko pulot van ji Atua nga sete pusunsun ore batun, rreknga ejki? <sup>14</sup> Ko murrin kerr muto suri eviseni nga daron nga jomro batu norman san mipriv ṗelak ko evi nanu nga mīsij. <sup>15</sup> Ko nesevin ma san, daron nga jomro batun mipriv, ko erres ṗelak, evi nanu san nga Atua mīlai tevi nga pitawi ore batun. <sup>16</sup> Ko poro sopor parmerreni parok-lat malum suri nanu ngok, ko ngel evi nale suk tevir: kem sete namok-loli murrin mīnij kele, ko nir ne Naim On jijle nir se Atua sete arongwose parloli kele.

*Sopor arloli murrin nga mīsij daron nga markorti re nanen se Numal se kerr*

<sup>17</sup> Ko re nanu san ngel, rrek sete bosrōvi kami. Suri daron nga kamkorti lat sansan, ko liken ngok se kami sete ewilwil se kami, ko olokloksi bbong kami. <sup>18</sup> Ko nanu nga womujnen nga nuwra bowrai erpel: nurngen nale nga daron nga kamini kamkorti lat sansan, ko kamlatlat lululweni tevi kami, ololi kamsisamis. Ko nurongwose nga nale ngok ewretun sapon. <sup>19</sup> Ko nga kamsisamis mirpok eviseni limjer re kami sisamis si nen ololi osorsan. <sup>20-21</sup> Ko daron nga kamkorti lat sansan nga kapurroi nanen se Numal se kerr, sete kamtori weretune, suri kamsisamis suri nanen se kami sisamis, ko sete kamtong suri lat nga moro kaptutweni nanen putu

## 12

suri. Ko kami sopor numer eajir, ko sopor arorr elep ko arminmin elep. <sup>22</sup> Poro kammerreni kaŋaan pilep ko kapminmin pilep, rrek erres kaploli pirpok re bbong naim se kami sisamis. Suri daron nga kamaan milep ko kamminmin milep re no tasi kami nir nga nanen ser mijkie, ko kamloli nor ewis, ko kamloli nanu nga m̄isij reŋge Naim On se Atua. Ko kamwera bowra pirpese re iok? Kamwera bosrövi kami? Eŋki nga ejki.

<sup>23</sup> Nale san nulai ji Numal se kerr ko nuwrai tweni tevi kami ngel: "Renge nutpong mawos nen nga martekai kerasi Iesu, ko ni elai niv <sup>24</sup> ko otori ko olot owra erres van ji Atua ko obbri otvi, ko owra "Ngel evi nibek nga bemaronge suri kami. Kapurroi, puloli nga kapok-rrormi inu reŋgen." <sup>25</sup> Ko erpok kele, daron nga marurroi jikle niv, ko elai biles kele ko owrai owra "Biles norro ngel erpe sel nga mimer se Atua nga drak piseser nga ŋitasi. Daron tama san nga kapok-minmin ren, kaprorrmi inu tetajer."

<sup>26</sup> Ko niko, daron tama san nga kamurroi niv ngok ko kammini norro ngok, erpe owra tweni mijen se Numal se kerr, pianan pijpari daron nga pia-luwi kele e vini.

*Kapurroi nanen se Numal reŋge murrun nga musorsan*

<sup>27</sup> Ko niko poro jinibb san purroi niv rreknga piminmin reŋge biles se Numal se kerr reŋge murrun nga sete musorsan, ko ololi esij reŋge drra ko nibe Numal se kerr. <sup>28</sup> Ko erpok ko, erres nga jinibb pimteni lilane ni puwomu, ko pia-vini nga purroi niv ko piminmin reŋge biles ngok. <sup>29</sup> Suri jinibb nga mokaan ko mokminmin tama, orrorrmi ololi nanu ngok nir arirpe detnijen kobbong, ko Atua putor vitrangi ko suri. <sup>30</sup> Niko nir milep re kami marok-mesi ko niber sete m̄iterter, ko nir elep re kami armij pa osuw suri murrun ngok. <sup>31</sup> Poro jinibb sisamis pimteni lilane pa womu reŋge mauren sen, ko sete Numal se kerr mia-tor vitrangi. <sup>32</sup> Ko daron nga Numal se kerr mutor vitrangi kerr, ko otor vitrangi kerr nga rrapvijuri sel nga musorsan. Ko daron nga pia-wera suri lat nga puto suri tevi jinibb jikle nir vajin, ko kerr rrapasi.

<sup>33</sup> Ngok, tasik ko jojik nir, poro kapkorti lat sansan reŋge nanen se Numal se kerr, kami totoklai kaplik ko wor. <sup>34</sup> Ko poro san numer eaji, ko erres nga piaan ko pa reŋge naim sen, musuw ko pia-vini. Ko daron nga kapini lat sansan, ko Atua sete mia-tor vitrangi kami vajin.

Ko nanu m̄inij nen nir nga kamsusi surir, poro bea-rremali kele ji kami ko bea-loli lilaner.

*Derteren nga Nem̄in se Atua moklair tevi kerr*

<sup>1</sup> Tasik ko jojik, inu numrreni nga kaprongwose ŋirres murrun nga Nem̄in se Atua moklai derteren lele nga marres nir tevi kerr. <sup>2</sup> Tuwi, daron nga kamlik malum reŋge mauren nga m̄isij, atua nga sete marongwose parij nir arevei tweni kami van jir e, nga sete orongwose kapwer ore. <sup>3</sup> Suri iok, numrreni kaprongwose lilane nale suk ngel: jinibb nga Nem̄in se Atua mokpitevi weretunene sete orongwose puwra "O, Iesu esij." Ko jinibb sete orongwose puwra tweni puwra "O, Iesu evi Numal suk", poro Nem̄in On sete eptevi.

<sup>4</sup> Ko derteren lele se kerr elep, ko Nem̄in se Atua sansan kobbong nga moklai. <sup>5</sup> Ko majingen lele kele elep nga rramok-loli, ko Numal sansan kobbong nga rramok-majing sen. <sup>6</sup> Ko murrun lele nga jinibb ŋimajinge elep, ko Atua sansan kobbong nga mokrij reŋge nolo kerr jikle nga rrap-tajer reŋge majingen ngok nir.

<sup>7</sup> Atua elai Nem̄in sen tevi kerr sisamis nga kerr sisamis rrapwilwi sisamis se kerr luwi ren. <sup>8</sup> Ko erpok, re jinibb sapon, Nem̄in ngok orongwose ŋilai nale ne norongwosien tevi, ko reŋge sapon, Nem̄in ngok kele kobbong orongwose ŋilai norongwosien nga purongrongwos. <sup>9</sup> Ko Nem̄in ngok orongwos ŋilai nosurien nga m̄iterter tevi jinibb sopor. Ko reŋge Nem̄in ngok kele kobbong, orongwose ŋilai dert-eren lele nga parloli jinibb nga mimi ŋirres luwi kele. <sup>10</sup> Renge jinibb sapon orongwose ŋilai derteren nga jinibb puloli nanu nga marinijinj nawone. Ko reŋge sapon, elai derteren nga parwerai tweni nale se Atua. Ko reŋge sapon, elai derteren nga parlesi wose nem̄in nga m̄isij ko nem̄in nga m̄irres. Ko reŋge sapon kele, Nem̄in ngok orongwose ŋilai derteren tevir nga parij reŋge nale m̄inij nir. Ko reŋge sopor, Nem̄in ngok elai derteren tevir nga parieni nale m̄inij nen nir nga jinibb purongwose. <sup>11</sup> Ko ngok, Nem̄in sansan ngok kobbong nga moklai derteren ngok jikle nir. Moklai derteren lele ngok tevi jinibb jikle osorsan erpe nga ni mimrreni.

*Pol owra rrongrongvi kalesia nir reŋge nibe kerr jinibb*

<sup>12</sup> Nibe jinibb sansan kobbong, ko mur-murrun nen elep. Ko murmurrun ngok sete arsansan, ko arkorti ma nga marloli niben sansan. Ko Kristo kele erpok ko. <sup>13</sup> Kerr jikle, m̄eri Isrel, rreknga jinibb ne vare nir, rreknga demij maur rreknga jinibb nga mivel sisarow, rramirpe niben sansan kobbong reŋge Kristo. Daron nga

marpaptaese kerr, ko Nerūin sansan okortoni kerr; ko rramivi vajin niben sansan, ko rramok-la mauren ji Nerūin nga sansan ngok bbong. Atua elai Nerūin ngok kobbong tevi kerr jijle nga rraplai mauren rengen.

<sup>14</sup> Ko sete nibe jinibb murrmurrin sansan, ko elep ko wor, ko parmajing ko wor lat sansan. <sup>15</sup> Poro belak purnge pīsij rengen majingen sen ko puwrai tevik puwra “O, nevrem ma emajing erres, ko inu sete nurongwos bololi majingen nga mūrres san rengen nibem”, nale ngok evi nale nawon kobbong, suri belak sete orongwos pīla tweni ni rengen inu. <sup>16</sup> Ko poro borok puwra “O, metem ma emajing erres, ko inu sete nurongwos bololi majingen san rengen nibem”, erpe nale ngok evi nale nawon, suri borok sete orongwos pīla tweni ni rengen inu. <sup>17</sup> Ko poro nibek jijle pivi metek bbong, ko borngurgen nanu pīrpeše? Ko poro nibek jijle pivi borok bbong, ko bongus re nanu pīrpeše? <sup>18</sup> Ko sete erpok; Atua elngi murrmurrin lele re nibe jinibb erpe nga ni murrormi. <sup>19</sup> Poro murrmurrin lele ngok nir pīrsorsan, ko nibe jinibb pīrres pīrpeše? <sup>20</sup> Ko ewretun, murrmurrin lele elep rengen nibe jinibb, ko nibe jinibb evi bbong sansan. <sup>21</sup> Ko erpok kele, metek sete orongwose pīrij tere nevrek, puwra “O, sete numrrenim”; ko batuk sete orongwose puwrai tevi belak puwra “O, sete numrrenim”. <sup>22</sup> ko sete erpok, ko murrmuru nibe kerr nga rramrormi derteren ner mijkie, nir majingen ser nga marlelep arto pae ko nga parloli; <sup>23</sup> ko murrmuru nibe kerr nga rramlesir sete marres, ngok nir rramloli lilaner ko. Ko murrmurrin nga rrammanune nir, rramlavla orer wor erres; <sup>24</sup> ko murrmuru nibe kerr nga rramlesir marres bbong, rramlingi kurtweni nawone nir erpok. Niko Atua okortoni murrmuru nibe kerr ngok nir, ko emrreni nga murrmurrin nen nir nga rramlesir sete marres, ko rraploli lilaner pīrres. <sup>25</sup> Renge murrin ngok kobbong, murrmuru ne nibe kerr sete orongwose parlatlat nir. Armetmet lululwi nir ma erres, ko arwilwil ser. <sup>26</sup> Poro murrin nibek san purnge pīsij, ko ngok nibek totoklai purnge pīsij. Ko poro parsurōvi murrin nibek san, ko ngok nibek totoklai purnge pīrres ko wor.

<sup>27</sup> Ko erpok, kerr jijle rramivi nibe Kristo, erpe kerr sisamis rramivi murrmurrin re niben ngok. <sup>28</sup> Ko rengen kalesia, Atua elngi majingen sisamis se jinibb jijle. Womujnen, elngi aposol nir. Ko suri nen e, elngi propet nir. Ko vatolin, elngi jinibb nevisvisenien nir. Mian ko nir nga marloli nanu nga marinijnj nawone, musuw ko elai derteren tevi nir nga parloli jinibb

parres luwi rengen mesien, mian ko nir nga parwilwil se jinibb, mian ko nir nga marmetmete majingen ne Naim On, mian ko nir nga marongwos parij rengen nale lele. <sup>29</sup> Ko sete kerr jijle rramivi aposol, sete kerr jijle rramivi propet, sete kerr jijle rramivi jinibb nevisvisenien. Sete kerr jile arlai derteren tevi kerr nga rraploli nanu nga marlelep marres, <sup>30</sup> rreknga rraploli jinibb parres luwi rengen mesien, rreknga rraprij rengen nale mīnij nir, rreknga rrapwer tweni mining ne nale nen nir nga jinibb purongwose, ejki. <sup>31</sup> Renge iok, kami kaploli norrormien se kami pīterter kele wor nga kaplai derteren nga marres nen nir. Ko beviseni vajin sel nga mūrres asi san, nga boli suri ngel:

## 13

*Merrenien nga jinibb murrreni Atua ko jinibb nir*

<sup>1</sup> Poro nurongwose berij nale jijle ne iel ngatan ko nale se anglo kele nir, ko merrenien suk mijkie, ko ngok nale suk evi nanu nawon kobbong, erpe naŕe nga drrelan mivijajeng nawon ko sete owra nanu san. <sup>2</sup> Ko poro derteren suk putoe nga bowrai tweni nale nga Atua mīlai tevik, ko

merrenien suk mijkie, ko ngok nale suk evi nanu nawon kobbong. Ko poro norongwosien suk pilep, ko nurongwosien nanu nga musuw ngok, ko merrenien suk mijkie, ko ngok inu sete nuvi jinibb san. Ko poro nosurien suk pilep, ewter nga purujoni botwen nga marlelep nir, ko merrenien suk mijkie, ko ngok inu sete nuvi jinibb san. <sup>3</sup> Poro belai nawone jorok pētpēti nir tei jinibb nga joror marjkie nir, ko bemarkng nga devje nuval nir parsulik rengen nabb suri nuvi jinibb se Kristo, ko merrenien suk mijkie, ko sete mea-tor sweri rragrrag nanu san, ejki. <sup>4</sup> Merrenien, nolon epriv, okrormi elep suri jinibb, ko erres tevi jinibb nir. Sete nolon pilelep ko sete nolon pian mare pēlak, ko sete pukowkowrie. <sup>5</sup> Sete piwer lokloksi jinibb, sete purrormi lweni kis ni. Sete pulolar pingavilvil, ko sete pokolar pipriv pēlak.

<sup>6</sup> Merrenien sete orongwose pīr rengen sev nga mīsij, ko eir ma rengen sev nga mivi weretunen. <sup>7</sup> Merrenien, nolon sete orongwose pīvan nga mokwilwil se jinibb nir. Tetajer osuri Atua, ko norrormien sen oto eterter rengen Atua tetajer; ko nekaien nga marlelep arongwose parini ren, ko nolon sete orongwose pīvan.

<sup>8</sup> Merrenien sete mia-suw nabong san. Rrek jinibb sopor derteren ser otoa nga parwerai tweni nale nga Atua mīlai; pian ko pusuw. Rrek sopor derteren ser putoe

nga pariŋ reŋge nale m̄inij; mian ko pijpon. Ko rrek sopor norongwosien ser pilep lenglengen; pian ko pijijki. <sup>9</sup> Suri norongwosien ngok se kerr evi beblen kobbong, ko derteren nga rramwerai tweni nale nga Atua m̄ilai keke evi beblen kobbong. <sup>10</sup> Ko daron nga nanu nga musorsan m̄irres jijle p̄irmali, ko nanu nga sete musorsan p̄elak pian pijijki vajin.

<sup>11</sup> Tuwi daron nga mewelili malum e, ko rijen, norrorrmien, ko norongwosien suk erpe bipiwarreng. Ko daron nga mevinu mevi jinibb vajin, ko nukurtweni murrun se bipiwarreng vajin. <sup>12</sup> Erpok keke, lelingenok erpe rramlesi drranu oto ore malum nanu nir; mian ko nabong san, nanu jijle pia-to limjer, ko rrapa-lesi Atua mawos vajin. Lelingenok norongwosien se kerr oto re liven kobbong; ko mian ko reŋge daron ngok inu bea-rongwose nanu jijle pirpe nga Atua murongwose lilane inu.

<sup>13</sup> Ko niko murru sel itul oto nga sete mara-jijki. Nga womu, evi nosurien se jinibb nga muosuri Atua. Nga suri nen e evi norrorrmien se jinibb nga m̄iterter reŋge Atua. Ko itolin evi merrenien. Ko nga m̄iasi jerjer re nir nga itul ngok evi merrenien.

## 14

### *Rijen re nale m̄inij ko rijen erpe propet*

<sup>1</sup> Kami kapp̄elak ko wor pilep nga kapvijuri sel ne merrenien. Ko kappej keke derteren nir nga Atua m̄ilair; ko womunen kappej derteren nga kapwera tweni nale se Atua erpe propet. <sup>2</sup> Suri jinibb nga m̄irij reŋge nale m̄inij erpe nga Nem̄in On m̄ilai, sete erij tevi jinibb, ko erij tevi Atua kobbong. Nem̄in On elai derteren ngok tevi nga puwrai tweni nale ngok suri nanu nir nga jinibb sete murongwose. <sup>3</sup> Ko jinibb nga ma muwra tweni nale se Atua reŋge nale se kerr mawos, ni vajin erij erpe propet; erij limjer nga jinibb nir parongwose, ko okwilwil se nir ko osusi norrorrmien ser van mare, ololi arunge erres. <sup>4</sup> Jinibb nga m̄irij reŋge nale m̄inij ewilwil sen lweni kobbong, ko jinibb nga ma muwra tweni nale nga Atua m̄ilai, reŋge nale se kerr jijle, ni ko vajin okwilwil se kalesia totoklai. <sup>5</sup> Rrek p̄irres poro nga kami jijle kaplai derteren ne marij re nale m̄inij; ko poro kaprongwose kapwerai tweni nale nga Atua m̄ilai reŋge nale se kerr jijle, ko inu ßeir keke wor. Erpe poro jinibb nga m̄irij reŋge nale m̄inij sete orongwose p̄irieni nale nen nga kalesia parongwose, ngok erresres jinibb m̄inij puwra tweni nale se Atua reŋge nale se kerr jijle, ko niko vajin pia-wilwil ser.

<sup>6</sup> Tasik ko jojik nir, p̄irres p̄irpese poro bevinuk ko ßerij nale m̄inij tevi kami nga setemun nuwra lilane sel nga muto suri? Nale ngok piwilwil se kami p̄irpese? Ko rrek p̄irres ma poro bowra mawos sev nga Atua miviseni tevik, rreknga norongwosien rreknga nevisvisenien rreknga nale keke san nga muto limjer. <sup>7</sup> Kaprrormi ta nabbu nga maruwi ko gita. Nanu ngok nir arivi nanu nawon, ko jinibb kobbong ololi drrelan mutoe. Ko poro drrelar sete p̄iniferer, ko jinibb sete mia-rongwose nubo nga marlai. <sup>8</sup> Ko poro dav̄o paruwi sete drrelan p̄iniferer p̄irres, ko sete jinibb san mia-rongwose nga evi daron ne nuval. <sup>9</sup> Ko erpok keke, sete jinibb san mia-rongwose sev nga kamwerai, poro nga nospen se kami oto tetajer reŋge nale m̄inij; nale se kami pian bbong pijijki reŋge mesa nawon. <sup>10</sup> Ko nale lele elep lenglengen iel ngatan, ko nir jijle ming ner artoe. <sup>11</sup> Ko poro sete borongwose nale se jinibb san, ko borŋge erpe m̄ernen enganga, ko ni keke purŋge inu erpe benganga. <sup>12</sup> Ko erpok keke re kami, suri kammerreni lenglengen derteren nir nga Nem̄in On m̄ilair, kapp̄elak ko wor pilep nga kaplai derteren nen nir nga marwilwil se kalesia jijle nir. <sup>13</sup> Ko niko, si nga derteren sen otoe nga m̄irij reŋge nale m̄inij mirpok, pulot ko wor nga Nem̄in On p̄ilai derteren tevi nga purongwose keke p̄irieni nale m̄inij nen. <sup>14</sup> Suri poro bolot pirpok reŋge nale m̄inij san, neŋik kobbong olot ko norrorrmien suk oto nawon. <sup>15</sup> Ko ngok, p̄irpese ko vajin? Ko erres daron nga rramlot reŋge neŋi kerr; ko rrapkortonu tevi norrorrmien se kerr keke; ko daron nga rramlai nubo tevi neŋi kerr keke, ko rrapkortonu keke tevi norrorrmien se kerr. <sup>16</sup> Daron nga kumlot nga kupwerai erres tevi Atua reŋge nale m̄inij san, ko jinibb nir sete arongwose parwera "Pirpok ko!" reŋge loten som, suri sete arongwose nale nga kumrij e. <sup>17</sup> Rrek loten som ngok tevi Atua erres p̄elak, ko sete mia-wilwil rragrag se jinibb ngok nir.

<sup>18</sup> Nuwra erres wor elep tevi Atua nga inu nomok-rij reŋge nale m̄inij easi kami jijle. <sup>19</sup> Ko re Naim On numrren ßerij e nale evis bbong nga marmumrrol nga jinibb orongwose ko nga parvisviseni nir erres, easi nga ßerij reŋge nale puwra saut reŋge nale m̄inij nga marrelenge.

<sup>20</sup> Selek nir, sete kapirpe bipiwarreng nir reŋge norrorrmien se kami. Kapirpe bipiwarreng nir nga marrelenge nanu nga marsij, ko re ma norrorrmien se kami, kapirpe jinibb tera. <sup>21</sup> Suri Naul On owra 'Inu bowrai tweni nale suk tevi jinibb suk nir, ko ßerij rurrŋgi nir ne nale m̄inij nir, ko ßerij reŋge jingo neturvitana kobbong

nir. Ko re sel ngok kele jinibb suk nir sete mara-murrong inu.' <sup>22</sup> Ko erpok kele, oto limjer nga derteren ne parij re nale m̄inij evi nga piviseni jinibb nga sete marosuri Atua, parlesi wose, ko sete evi se nir nga marosuri. Ko derteren ne parwera tweni mawos nale se Atua erpe propet reнге nale se kerr evi nga piwilwil se nir nga marosuri, ko sete evi se nir nga sete marosuri. <sup>23</sup> Poro jinibb m̄inij sopor, rreknga nir nga sete marosuri Atua parini daron nga kami kalesia jile kamkorti, ko kami jile kaprij reнге nale m̄inij nir, ko erpese? Rrek parwera "O, arlengleng ko!" <sup>24</sup> Ko poro kami jile kapwera tweni mawos nale se Atua reнге nale se kerr daron nga jinibb san nga sete muosuri Atua p̄ilik loloim, ko ngok enije. Ngok nale se kami jijle pujuji nolon suri nololien sen, ko piviseni kele ni, lat nga mauren sen muto suri. <sup>25</sup> Nale se kami ngok pirvei tweni norrorrmien sen nga mokteptepi ngok pivini puto limjer, puloli m̄ernen pijipa vitan pusr̄ovi Atua, puwra, "Ewretun, Atua elik liven re kami iel."

*Parsur̄ovi Atua reнге sel nga musorsan ko wor m̄irres*

<sup>26</sup> Tasik ko jojik nir, bowra sev tevi kami? Bowra, daron nga kamini kamkorti nga kapsur̄ovi Atua, ko kami jile kamloli majingen. Rrek san evi nga p̄ilai nubo, ko san evi nga pivisviseni, ko san evi nga puwra tweni norrorrmien nga m̄imerr nga Atua miviseni tevi, ko san evi nga p̄irij reнге nale m̄inij, ko san evi nga p̄irieni nale nen; ko kami jijle puloli wor sev nga muloli reнге sel nga piwilwil se delung. <sup>27</sup> Poro sopor parij reнге nale m̄inij, ko erres nga nir p̄ieru rreknga p̄itul bbong parij. Ko san p̄irij jile pusuw ko m̄inij kele, ko jinibb san p̄irieni nale ser. <sup>28</sup> Ko poro jinibb san pijki nga p̄irieni nale ser ne nale m̄inij ngok, ko erres nga m̄er nga m̄irij ngok p̄ilik malum kobbong reнге liven ne kalesia ko p̄irij kobbong tevi ni lweni kobbong ko tevi Atua kele. <sup>29</sup> Ko re devjen ne nir nga marwera tweni mawos nale se Atua erpe propet reнге nale se kerr, erres poro nuru p̄ieru rreknga p̄itul parij, ko nir m̄inij nen parselepor ko parmurronge nale ser, poro osorsan erres rreknga ejki. <sup>30</sup> Ko poro jinibb san elik nga murnge nale se Atua ko ornge nga Atua eviseni nanu san tevi, ko erres m̄er nga m̄irij pumosi mun ko p̄ilinglingi m̄ernen puwra tweni nanu nen. <sup>31</sup> Erpok kami jijle kamrongose kapwera tweni nale se Atua, san pusuw, ko san. Ko reнге murrun ngok puloli kaprongose nanu,

ko norrorrmien se kami pivini p̄iterter kele wor. <sup>32</sup> Puloli propet nir parmajing tevi derteren ngok reнге murrun nga musorsan m̄irres. <sup>33</sup> Suri Atua sete evi batu sel nga m̄ikarkar, ko evi ma batu demat. Renge Naim On totoklai se Atua nir arok-vijuri murrun ngel, ko kami kele kapvijuri ko wor: <sup>34</sup> nesevin parp̄erp̄er reнге Naim On. Sete erres parij, ko parlik malum ko parosuri, erpe nale nesereien se Moses muwrai. <sup>35</sup> Poro nesevin san puwra purongose nanu san, ko erres nga pususi tevi diwen sen re naim se nuru. Ko sete erres nga nesevin parij reнге Naim On. <sup>36</sup> Ko erpese? Kami kamrorrmi nale se Atua eplari womu ji kami? Kamrorrmi nale se Atua evini ejpari ji kami kobbong? <sup>37</sup> Poro san re kami orrorrmi derteren sen otoo erpe propet nga puwra tweni nale se Atua, rreknga orrorrmi Nen̄in On okpitevi ni, ko ni p̄ilesi wose kobbong nga nale nga nomok-uli tevi kami evi weretunen nale nesereien se Numal se kerr. <sup>38</sup> Ko poro san sete owor suri nale suk ngel, ko Atua kele sete pia-wor suri ni. <sup>39</sup> Tasik ko jojik nir, kaplingi ko wor norrorrmien se kami reнге derteren nga kapwera tweni nale se Atua erpe propet. Ko sete ma kama-wer ore jinibb nga derteren sen mutoe nga p̄irij re nale m̄inij. <sup>40</sup> Kaploli nanu jijle reнге murrun nga musorsan m̄irres nga jinibb parir reнге.

## 15

*Kristo emaur luwi kele re mijen*

<sup>1</sup> Tasik ko jojik nir, nuwra kaprongose suri nospen nga m̄irres nga m̄ewerwer e pa tevi kami, nga kamlai pa musuw, ko nga nosurien se kami muto m̄iterter malum reнге. <sup>2</sup> Ngok evi nospen nga m̄irres nga m̄ewerwer e tevi kami. Ko Atua pia-loli nospen nga m̄irres ngok pia-lai mauren tevi kami, poro kaprrul totoni p̄iterter. Poro pijki, ko rrek nosurien se kami pivi nanu nawon kobbong! <sup>3</sup> Sev nga m̄elai, nuvijngeni tevi kami. Evi norrorrmien nga milep temijpal re nosurien se kerr, ngel: nga Kristo emij suri nololien se kerr erpe maruli pa re Naul On; <sup>4</sup> nga artevni, ko nabong itul easi ko Atua ololi emaur luwi erpe maruli pa reнге Naul On; <sup>5</sup> nga m̄irrmali ji Pita, mian ko ji kele jinibb sen esngav̄ol dromon eru. <sup>6</sup> Ko vitunen errmali ji gortien ne jinibb nir nga nir easi ongut valim (500), nga nir jijle arlesi ni. Nir sopor re gortien ngok armij pa, ko nir elep armaur malum. <sup>7</sup> Vitunen errmali ji Jemes, ko vitunen kele errmali ji aposol sen jijle nir. <sup>8</sup> Ko vitu jerjer

ermali ji inu ngel nga sete nuvi jinibb san.<sup>B 9</sup> Nuwrai erpok suri nulesi inu nuan ngatan easi aposol mīnij nir; ko nurnge nibek nen nga sete erres parveruse inu aposol, suri tuwi inu nomok-ojoi kalesia nir.<sup>10</sup> Ko suri Atua ewilwil se inu reнге nolon nga mīrres, niko mewaji vajin nais ngok. Ko Atua sete ewilwil nawon se inu, ko wenen nen oto wore, ko inu numajing wor elep easi aposol mīnij nir. Ko ewretun, sete inu ko nga mīmajing; Atua ko nga mok-wilwil se inu reнге nolon nga mīrres sen, ni ko eptevik reнге majingen ngok nir.<sup>11</sup> Ko ngok, poro nga inu Bēwerwer, rrenga nir parwerwer, ko eplari osorsan kobbong, kami kamosuri pa.

*Jinibb se Atua para-maur luwi kele*

<sup>12</sup> Ko nospen nga mīrres owra nga Atua ololi Kristo emaur luwi kele reнге mijen. Ko ngok nale nga kami sopor kamok-werai nga nir nga marmij sete mara-maur luwi kele, sete evi weretunen.<sup>13</sup> Poro evi weretunen nga nir nga marmij sete mara-maur luwi kele, ko piprok ko, Kristo sete emaur luwi kele reнге mijen.<sup>14</sup> Ko poro Kristo sete emaur luwi kele reнге mijen, ko nospen nga namok-werwer tweni ngok evi nanu nawon kobbong, ko nosurien kele se kami evan lat nawon.<sup>15</sup> Ko ngok eviseni kele nga rramloli gerisen re Atua daron nga rramwera ololi Kristo emaur luwi reнге mijen. Ko poro nga Atua sete orongwose puloli nir nga marmij parmaur luwi, ko ngok sete ololi Kristo emaur luwi.<sup>16</sup> Suri poro nir nga marmij sete parmaur luwi, ko Atua sete ololi Kristo emaur luwi reнге mijen.<sup>17</sup> Ko poro Kristo sete emaur luwi reнге mijen, ko nosurien se kami reнге Kristo evi nanu nawon kobbong, ko Atua setewor etlasi tweni nololien se kami.<sup>18</sup> Ko nir nga marosuri Atua mianan ko marmij pa musuw, aran reнге nejikien ko pa.<sup>19</sup> Poro rramlingi norrorrmien se kerr reнге Kristo suri nowlin nga rraplai bbong iel ngatan, ko rramlik esij easi jinibb pētpēti ne iel ngatan ko!

<sup>20</sup> Ko ejki. Evi weretunen jerjer nga Atua ololi Kristo emaur luwi reнге mijen. Ko reнге nir nga marmij pa osuw, ni evi mēr nga muwowomu jer nga mimaur luwi reнге mijen. Ni erpe wenen san nga mītra womu reнге naut san.<sup>21</sup> Erpe mijen evi nanu san nga jinibb sansan kobbong, Atam, elai ermali iel ngatan. Ko mauren nga miplari reнге mijen ermali kele ji jinibb sansan kobbong vini.<sup>22</sup> Ko kerr jille nga rrampelari reнге metka se Atam, rrapan ko wor reнге mijen, mian ko rrapakorti tevi Kristo nga rrapa-maur luwi kele reнге mijen.<sup>23</sup> Ko nanu nir parpelari piprel le: ni nga mimaur luwi womue

evi Kristo, nga mirpe nanen nga mītra womu reнге orsel. Ko vitunen, re daron nga Kristo pia-rremali, ko jinibb sen vajin para-maur luwi.<sup>24</sup> Ko vitunen, bongsi nanu jille nir pīrrmali. Renge daron ngok Kristo pulokloksi batbatu jinibb nir ko gavman nir ko numal nga marivi se demij, para-jijki jile, ko pīlail weni dert-eren totoklai pulwi van re nevre Atua Tata sen.<sup>25</sup> Ko rramrongwose nga Kristo pivi Numal pian pian pijpari nga Atua pīlengi jile devje nuval jille nir se Kristo ngatan ko pubbōtbbōt renger re Belan ngatan.<sup>26</sup> Musuw ko devje nuval nga vitu jer nen nga Atua pia-lingi ngatan evi mijen.<sup>27</sup> Suri Naul On owra 'Atua elngi nanu jille arto reнге melve Belan'. Ko nga muwrai ngok, 'Nanu jille arto reнге melve Belan', ngok sete etawi ore Atua. Suri Atua ko elngi nanu jille reнге melve Bela Kristo.<sup>28</sup> Ko daron nga nanu jille parto vajin piprok re derteren se Kristo, ko vitunen, Kristo nga mivi Atua natun, ni kele kobbong pīlengi ni lweni van ngatan re derteren se Atua ngok nga womu mīlengi nanu jille marto reнге derteren se Kristo. Ko Atua vajin putori derteren reнге nanu jille.

<sup>29</sup> Ko erpok kele, poro jinibb nga marmij nir sete parmaur luwi kele re mijen, ko suri sev jinibb nir marok-lai baptaes marla wani nir nga sete marbaptaes tuwi, mian ko marmij?<sup>30-31</sup> Ko suri sev kem namok-pēlak tetajer nga namlokloksi mauren se kem nga otomori nabmij nabong jille? Neiren nga milep nga mutō reнге inu suri kami, ko mauren nga kamlai reнге Iesu Kristo, Numal se kerr, evi batun nga mowrai iok.<sup>32</sup> Ko iel Epesas erpe inu nomok-palpal tere nanu rrum nir, ko Bēlesi sev ko pīrres suri reнге iel ngatan? Poro nir nga marmij sete parmaur luwi kele reнге mijen, ko rrek erres ma rrapvijuri norrorrmien nga muwra 'Erres ma rraplik rraplelea rrapaan ko rrapminmin kobbong, suri mevi le pa rrapmij, ko setemun rrama-lesi kele nanu nga mīrres san.'

<sup>33</sup> Sete kaplengleng, sele kami nga mur-rur marsij arongwose parlokloksi kami.<sup>34</sup> Kaploli lilane norrorrmien se kami pīrres, ko kaplingi kurtweni nololien nga marsij se kami. Ko erres no kami pimanun ko pa, suri kami sopor nirko arrelenge Atua.

*Nibe kerr pia-irpese re daron nga rrap-maur luwi re mijen?*

<sup>35</sup> Ko rrek jinibb sopor para-susi nabong sapon, parwera "Jinibb nga marmij parmaur luwi piprese?" Ko "Niber kele para-irpese ko?"<sup>36</sup> Kamwolu lengleng! Sete kamrongwose nga drum pimij ko wor,

nga puloli drruvi nga m̄irres san piplari, erpe mauren nga mimerr.<sup>C 37</sup> Ko winen nga maruwi sete evi drruvi, ejki. Drruvi evi nanu nga n̄imerr taktak, ko elep ko erres p̄elak asi winen, nga mumutnut jile vajin. <sup>38</sup> Atua ko ela sinan tevi drruvi nir erpe nga ni mimrreni. Ko erpok keke, oklai niben tevi nanu jijle nir. <sup>39</sup> Nibe nanu nir sete arsorsan. Viso jinibb sete osorsan tevi viso nanu rrum. Numōn vison enije, ko mesal keke vison enije. <sup>40</sup> Ko nanu sopor arto mare re melrin, ko nanu sopor keke arto ngatan. Ko moron ne nanu ne melrin artoe, ko moro nanu ne iel ngatan keke artoe. <sup>41</sup> Nial sete erpe navōl ko, navōl keke sete erpe moju, ko moju sisamis arinije.

<sup>42</sup> Ko pia-irpok ko re daron nga jinibb para-maur luwi keke e renge mijen. Niben nga martevni, pian ko pupo ko pumutmut; ko daron nga para-maur luwi keke renge mijen, ko setemun mara-mutmut. <sup>43</sup> Ko nibe jinibb daron nga rramteveni ko rramlesi esij elep, ko derteren sen ejkie; ko daron nga para-maur luwi keke renge mijen, ko niber parres p̄elak, ko derteren ser pilep temijpal. <sup>44</sup> Niben nga marmij nga martevnir arivi ne mauren ne iel ngatan kobbong; ko daron nga para-maur luwi renge mijen, ko arivi vajin nga parmaur tevi Atua. Niben ne iel ngatan otoo, ko niko niben ne mauren tevi Atua oto keke e. <sup>45</sup> Ko Naul On owra 'Merwomu ngok Atam, Atua ololi evi jinibb nga n̄ilai mauren ne iel ngatan'; ko ni nga mivi Atam nga vitu jeren, Atua ololi evi nem̄in, nga orongwose p̄ilai mauren tevi kerr. <sup>46</sup> Ko sete mauren ne nem̄in oto womu, ejki, ko mauren ne iel ngatan oto womu, mian ko mauren ne nem̄in ea-to vitu. <sup>47</sup> Merwomu, armajinge renge maw ne iel ngatan; ko m̄ervitu eplari re melrin vini. <sup>48</sup> Jinibb jijle ne iel ngatan, niber erpe niben nga marmajinge renge maw ne iel ngatan; ko jinibb jijle ne melrin, niber erpe niben nga mivel renge melrin vini. <sup>49</sup> Ko erpe lelingenok rramirpe m̄erwomu nen, nga mivi Atam; ko erpok keke rrapa-irpe m̄ervitu nen nga miplari re melrin vini, nga mivi Kristo.

<sup>50</sup> Tasik ko jojik nir, ngel evi mining ne nale suk: Nibe kerr nga vison ko drra muto ren sete mara-van rragrag renge batun vanu se Atua. Ko niberr ngel nga pian ko pimij, sete orongwos p̄ila mauren ne tuwi ngok vini. <sup>51</sup> Selek nir, kapmurrong p̄irres; ngel evi nale teptepi le san, bowrai tevi kami. Sete kerr jijle ko rrama-mij. <sup>52</sup> Ko daron nga drrela davō nga milep ne nabong nga vitu p̄iting, ko Atua p̄irieni nibe kerr jijle pivesan rrese,

pirpe navil nga mivil. Suri daron nga davō ngok p̄iting, ko Atua puloli nir nga marmij parmaur luwi keke renge mijen, nga setemun mara-mij keke nabong san. Ko p̄irieni keke nibe kerr nga rrammaur malum re daron ngok. <sup>53</sup> Suri nibe kerr nga marok-mij, parieni ko wor nga parivi niben nga sete mia-mij nabong sapon. Ko nibe kerr nga marivi ne nejikien, parieni ko wor nga parivi niben nga sete mia-jijki nabong sapon. <sup>54</sup> Ko daron nga nanu ngok nir para-rremali, ko nale ne Naul On keke p̄irmali nga muwra 'Nanu ngok mijen, Atua olokloksi pa osuw, olokloksi jijle pa.' <sup>55</sup> 'E mijen, ngabe ko derteren som vajin? E mijen, erpese kurongwose kuplokloksi kem?' <sup>56</sup> Suri nololien ko elai derteren tevi mijen nga muloli mijen orongwos pulokloksi kerr; ko nale neseseiren elai derteren tevi nololien. <sup>57</sup> Ko rramwera erres temijpal wor tevi Atua suri mukortoni kerr renge Iesu Kristo, Numal se kerr; ko tetajer ololi rramok-asi.

<sup>58</sup> Ko ngok, tasik ko jojik nga mares p̄elak, kami kaptur ko wor p̄iterter, sete kapririr. Tetajer kapmajing ko wor p̄iterter renge majingen ngok se Numal se kerr. Ko kamrongwose pae nga daron nga kammajing se Numal se kerr; ko majingen ngok wenen puto wore ko.

## 16

*Merrenien nga piwilwil se kalesia nir ne Isrel*

<sup>1</sup> Ngok, ko daron nga kamtuwtuw nevōt suri jinibb se Atua nir, ko numrreni kaploli pusorsan pirpe sev nga mowrai tevi kalesia nir ne Galesia. <sup>2</sup> Ko ngok evi nga re nabong on jijle nir, kami sisamis p̄ilngi taleve nevōt sapon, piprel: Ni nga n̄ila nevōt nga milep p̄ilngi pilep, ko ni nga n̄ila nevōt nga welili p̄ilngi puwelili bbong, puto metmet. Suri poro pijki, devinuk ko taka-tipatun bbong nga takaloli. <sup>3</sup> Ko kaplingi kami sopor nga paratori nevōt nen nir van Jerusalem e. Ko daron nga bea-luwi vinuk ko bea-uli naul sopor nga bea-wera suri nir tevi kalesia nga Jerusalem nir, ko bokonir van vajin. <sup>4</sup> Ko poro belesi erres nga inu keke bean, ko nabkorkorti vises van.

*Norrormien se Pol suri sel sen*

<sup>5</sup> Daron nga beasi Masetonia vajin ko bevinuk ji kami vajin e. <sup>6</sup> Ko rrek belik piprepriv sapon tevi kami, rrek belik pijpari daron ne melas pusuw. Vitunen ko kapa-meteni sel suk lat nga bea-van keke e. <sup>7</sup> Sete numrreni belik beblen kobbong tevi kami, ko norrormien suk oto nga poro

<sup>C</sup> 15:36 Erpe iel, Pol ospe wit, ko kem namlingi drrum, nga puloli mining ne nale sen piplari limjer.

Numal pimarong ko inu belik piprepriv sapon tevi kami.

<sup>8</sup> Ko norrormien suk oto nga belik mun iel Epesas pianan pijpari nabong ne Pentekos. <sup>9</sup> Suri sel etpir erres nga bololi majingen iel nga puloli majingen se Numal pian mare. Ko jinibb elep kele arok-tere inu.

<sup>10</sup> Ko poro Timoti piplari iok ji kami, ko kapmetmete pirres, puloli purnge pirres nga pilik tevi kami, suri okmajing se Numal se kerr kobbong erpe inu nomok-loli. <sup>11</sup> Sete kami san puklu wutan re ni, ko kapwilwil ma sen nga pitajer malum re sel sen re demat, puloli sete putor sweri nanu nga nukarkar, mian pijpari ni ko tasi kerr nir parluwi kele vini jik. Suri namok-teravi malume le.

<sup>12</sup> Ko re devjen ne tuwa kerr ngok Apolos, nuwrai lilane tevi nga numrreni wor pivivitu suri tasi kerr ngok nir nga parinuk parlesi kami. Ko ni setewor emrreni pivinuk. Rrek poro daron sen putoe ko pia-vinuk pia-lesi kami vajin.

*Bongsi nale se Pol tevir*

<sup>13</sup> Kapmetmet pirres, sete kaplelea, ko kaptur pitertter renge nosurien se kami. Sete kapmetutu. <sup>14</sup> Kaploli nanu jijle re sel ne merrenien.

<sup>15</sup> Tasik ko jojik nir, kamrongwos pae jiljilweren ne Stepanas ko metka sen nir. Nir arivi mieri Akaea nga womu jerjer marlingi nosurien ser renge Kristo, ko marok-pelak nga parwilwil se kalesia nir. <sup>16</sup> Ko inu numrreni lengleng nga kaposurir pirres, tevi kele nir nga marmajing tevir. <sup>17</sup> Nuir temijpal nga mlesesi Stepanas, Potunatas ko Akaekas. Nir ko arlai wani milnge kami ko arloli nurnge erres. <sup>18</sup> Arloli inu nolok eir luwi, erpe kele arloli pa nolo kami eir luwi. Erres kaposuri jinibb nga marirpok.

<sup>19</sup> Ko gortien nir se kalesia nir nga Esia arwera erres tevi kami. Ko Akwila nuru Prisila tevi gortien ne kalesia nir nga marok-ser korti renge naim ser armerreni lenglengen parwerai erres tevi kami renge nise Numal se kerr. <sup>20</sup> Tasi kerr ko joi kerr jijle nir iel arwerai erres ser tevi kami. Kapwera erres tevi kami lululwi, tevi merrenien ko demat.

<sup>21</sup> Inu Pol vajin, nula pensil ji m̄er nga mok-uli tweni nale suk ngel nir, ko nuli vajin 'erres' suk ngel tevi kami.

<sup>22</sup> Poro san sete emrreni Atua, ko lolaren se Atua puto ren.

Erres wor Numal, ko sete pipriv ko kupluwi.

<sup>23</sup> Ko nalol nga nirres se Numal Iesu piptevi kami. <sup>24</sup> Ko merrenien suk piptevi

kami jijle renge nise Iesu Kristo. Remse kami.



**Naul Erwen nga Pol Muli  
tevi Kalesia nir renge  
KORIN  
Batu nale nga mivsvseni  
lut nga parmeteni naul  
ngel puto suri**

Naul (leta) erwen nga Pol muli tevi kalesia nir re Korin, oli re daron nga nir sopor arlolarsi ni ko artere ni. Ko Pol eviseni tevir nga ni orrorrmi eterter nga puloli lilane nanu ngok, ko puloli parkorti luwi keke.

Re bongsi naul ngel nga womunen (batun 1 musuwsuw re 9), Pol ospe suri sev ni niri ngale nga marteter tevir rengenaul san nga milai tevir, ko owrai nga ni eir nga nir marunge nale sen, ko marieni norrorrmien ser suri nale sen, ko marloli lilane nanu karkar nga muto livö e nir, ko markorti luwi keke tevi ni. Ko vitunen owrai keke tevir nga nir partuwuw ko wor merrenien sopen nga parlai tevi kalesia seler nir ne jutia nga joror mijkie.

Ko re bongsi naul ngel nga vitunen (batun 10 musuwsuw re 13), Pol erij eterter sopen tere meri Korin nga marwera nir arivi aposol weretunen, ko arok-lokloksi kalesia nir ne ie re nevsivsenien ser nga sete musorsan. Arok-werai nga Pol sete evi aposol weretunen, ko Pol erij orer eterter ko eviseni nga ni evi weretunen aposol se Iesu Kristo.

<sup>1</sup> Inu Pol nuvi aposol se Iesu Kristo suri marongen se Atua. Ko komru Timoti ngel, tasi kerr, nomor-uli naul ngel tevi kami kalesia ne Korin nir, ko tevi jinibb on petpeti nir nga marlik rengen Akaea totoklai. <sup>2</sup> Ngel evi loten suk, nga Atua Tata se kerr ko Numal Iesu Kristo porij pirres suri kami ko parlai demat tevi kami jile.

*Pol owra erres tevi Atua*

<sup>3-4</sup> Rramwera erres wor elep tevi Atua, Tata se Numal se kerr Iesu Kristo, ko Tata se kerr keke. Ni orrorrmi kem tetajer, ko tetajer okla lweni kem daron nga namrunge esij suri jinibb nga marloli misij tevi kem. Ngok ololi kem keke orongwos nabla lweni tasi kerr nir poro parunge pisij suri jinibb nir marojir, rengen murrun mawos nen nga Atua muloli pa tevi kem. <sup>5</sup> Ngok niko, ewretun jinibb elep pelak aroji kem suri namivi jinibb se Kristo, evi nanu nga mirres kobbong. Suri Kristo ela lweni norrorrmien se kem, ko kem keke orongwos nabla lweni norrorrmien se kalesia minij nir. Ko iok ololi jinibb elep

arunge erres nga erres. <sup>6</sup> Ko niko poro kem namrunge esij, ko nanu ngok orongwos puloli kami kaprunge pirres, ko kapasi van rengen mauren nga mirres nga Atua moklai. Ko poro ma namrunge erres, ko nanu ngok keke orongwos puloli kami kaprunge pirres; ko kaptur piteter, ewretun jinibb nir aroji kami, erpe maroji kem. <sup>7</sup> Ko nolo kem nga namlingi rengen kami sete pivel lingi kami, suri namrongwose nga kamtur tevi kem rengen norongen nga misij ko rengen keke vajin norongen nga mirres.

<sup>8</sup> Tasi kem ko joji kem nir, sete nabsilveni norongen nga misij milep nga mijpari kem rengen vanu ne Esia. Elep asi petpeti nga namrongwos nabori, ko namwera rrek nabmij. <sup>9</sup> Ko ewretun namtori mijen se kem tetajer. Ko ngok ololi setemun nambibto rengen kem lweni, ko nambibto ma rengen Atua nga muloli nir nga marmij armaur luwi. <sup>10</sup> Ko erpe ololi jile pa tevi kem rengen Esia, ko orongwos puloli keke. Namlingi nolo kem oto eterter ren. <sup>11</sup> Ko loten se kami keke suri kem ewilwil se kem. Jinibb elep arok-lot suri kem, ko daron nga marlesi nga Atua mirir mirres suri kem vajin, ko parwera erres tevi Atua suri.

*Murru Pol oto limjer bbong*

<sup>12</sup> Ko namrunge erres suri majingen se kem iel ngatan, suri nammajenge rengen sel nga musorsan mirres; ko namloli erpok keke tevi kami, ko ean mare keke wor. Sete namsilveni nolo kem sopen, ko sete namvijuri norongwosien se jinibb kobbong. Atua ko ewilwil se kem. <sup>13</sup> Ko sev nga namok-uli tevi kami, kami orongwos kaprongwose kobbong. Ko nammerreni kaprongwose nanu petpeti nir, <sup>14</sup> erpe nga kamrongwose kem sopen. Ko kami kaplololi kami e kem vajin rengen nabong nga milep se Numal Iesu, erpe keke kem nabloli kem e kami. <sup>15-16</sup> Ko suri nurongwose erres nanu ngok, norrorrmien suk oto nga bevinuk bokluklu womue kami, mian ko bean Masetonia e; mian ko bolwi keke vinuk ji kami, nga puloli kaprunge pirres pivaru. Mian ko kapmeteni sel suk nga ban keke jutia e. <sup>17</sup> Ko kami daron nga kamrunge norrorrmien suk ngok suri nivelen suk, ko kamwera "O, Pol elengleng, owluluw elep pelak." Ko sete erpok te. Ko norrorrmien suk sete oto re devjen ne jinibb kobbong norrorrmien ser, nga puloli bowra "O-o", ko mian ko sete epriv ko bowra "Ejki" vajin. <sup>18</sup> Ko suri Atua tetajer okwilwil suk, ko niko sete nurongwos bowrai nale ngel nuru korti porvesane, "O-o" ko "Ejki". <sup>19</sup> Suri Iesu Kristo, natu Atua, nga milik rengen nolo kami suri kem Saelas ko Timoti namwerwer rengen nospen nga mirres tevi kami, ni sete orongwos puwra "O-o" ko

"Ejki" orwesane, ko owra "O-o" ko pa.  
<sup>20</sup> Suri rijrijen p̄etp̄eti se Atua arpelari rengo Kristo. Niko rengo ni rramwera "Pir-pok" tevi Atua, ko rramsurōvi Atua. <sup>21</sup> Ko Atua ololi inu ko kami kele rramtur eterter rengo Kristo. Ko Atua otobbobbue kerr; <sup>22</sup> ko ela kele Nerūn On van rengo nolo kerr; nga muloli kerr rramrongwose ko jinibb jille arongwose nga rramivi jinibb se Atua.

<sup>23</sup> Ko suri sev setewor nuvinuk ji kami? Nuwretun, nujuji mare, setewor nulwi vinuk ji kami suri numusus bololi kaprunge p̄isij. <sup>24</sup> Iok sete namwera kaprunge p̄isij suri nosurien se kami ewelili, ko nga kem elep; ejki, suri nosurien se kami otur pa, ko namwera kem ko kami, rrammajing lut sansan, nga puloli kap̄ir.

## 2

<sup>1</sup> Ko norrorrmien suk eterter nga sete bevinuk kele ji kami poro bololi kami kaprunge p̄isij pirpe daron nga mevinuk womu. <sup>2</sup> Ko poro bololi kami kaprunge p̄isij, ko si puloli inu borngē p̄irres luwi? Kami ejki, suri inu nuloli pa kami kamrunge esij. <sup>3</sup> Ko nuli naul suk nga womu nga puloli sete mia-irpok, ko sete kapaloli inu borngē p̄isij daron nga bevinuk, ko kaploli ma βeir; suri erpok ko osorsan. Suri nurongwose, poro nga inu βeir, ko kami jille wajin kap̄ir kele. <sup>4</sup> Daron nga moli naul nen, ko nulik rengo norongen nga m̄isij, nurngē esij elep, ko nuting elep. Sete nuwra norrorrmien ngok nga puloli nolo kami pivitan, ko nga ma puloli kaprunge merrenien suk nga milep nga memrreni kami e.

*Kaptelasi ko wor jinibb nga muloli m̄isij*

<sup>5</sup> Ko poro nga san ololi inu nolok evitan, ko sete ololi inu kis kobbong, ko erpe ololi kami jile nolo kami evitan sopen. Iok nuwretun, sete nukrekris. <sup>6</sup> Ko suri erpok, ko erpe kami elep kamloli pa m̄ernen orngē esij, ko setemun oto nga san puloli pirpok kele. <sup>7</sup> Ko erres kapla lweni wajin nolon, kaploli p̄ir luwi, suri nolon tivitan p̄etp̄eti. <sup>8</sup> Kaploli bbong p̄irres tevi, nga puloli p̄ilesi wose merrenien se kami. <sup>9</sup> Nuli erpok rengo naul suk nga womu nga borngwose nolo kami erpese, poro kaposuri nale suk jille nir, rreknga ejki. <sup>10</sup> Ko si nga kami kaptelasi, ko inu kele nultasi pa. Ko poro nanu san oto nga βetlasi san suri, ko βetlasi rengo no Kristo suri kami. <sup>11</sup> Ko erpok ko puloli Demij sete putor tevtēvie kerr. Rramrongwose erres kerkerisen sen nir.

*Daron nga Pol m̄ilik re Troas ko nolon orrum*

<sup>12</sup> Nuvinu Troas re majingen suk nga nomok-werwer suri Nospen nga Mirres se Kristo, ko nulesi Numal ololi metali nga milep san etp̄ir tevik. <sup>13</sup> Ko nolok orrum sopen, suri Taetas ejki. Ko niko nuvel lingir, ko nuvinu iel Masetonia.

*Kristo ololi Pol easi*

<sup>14</sup> Ko nuwra erres wor elep tevi Atua nga tetajer ololi rramok-asi suri Kristo, ko ololi mapun nga m̄irres sen nga muto ji kerr suri rramrongwose ni, esesbel iok jille nir. <sup>15</sup> Suri Atua ololi kerr rramirpe mapun nga m̄irres se Kristo rengo gunsi nir nga marivi sen, ko para-lai mauren nga m̄irres; ko re kele gunsi nir nga para-van re mijen. <sup>16</sup> Tevi nir nga marosuri, mapun ngok erpe mapu mauren; ko tevi nir nga para-van re mijen, erpe mapu mijen kobbong. Ko si orngwos puloli nanu ngel nir? <sup>17</sup> Suri jinibb elep arok-werwer rengo nale se Atua nga bbong parla nevōt ren. Ko kem sete namsilveni nolo kem sopen. Atua okoni kem, ko namok-majing rengo no Atua ko rengo derteren se Kristo.

## 3

*Sel nga mimerr ko sel nga m̄itra*

<sup>1</sup> Ko iok namtipatun kele nga nabrij melmelas rrek? Rrek namirpe jinibb sopen ko nammerreni san puli naul nga pusrōvi kem nga nablai tevi kami, rrek kami kapuli naul san nga pusrōvi kem nga nablai tevi jinibb m̄inij nir? <sup>2</sup> Ejki! Kami ko pa kamivi naul se kem, nga maruli rengo nolo kem, nga jinibb jille nir marlesi ko marlesi wose. <sup>3</sup> Ko oto limjer wajin nga kami kamivi naul san se Kristo nga kem nammajing, nga maruli sete tevi pensil, ko tevi Nerūn se Atua nga derteren sen mutoe. Naul nen sete mariki re nevōt, ko re ma nolo jinibb.

<sup>4</sup> Nanu ngel nir namrongwoser erres suri Kristo. Namrij re no Atua. <sup>5</sup> Sete namwera kem namviter rrek namrongwos nabwera namsan ko namloli nanu san, ejki. Atua ko eptei kem ko ela derteren tevi kem. <sup>6</sup> Ni ko ololi namvitere nabmajing rengo Sel nga Mimerr sen. Sel ngel sete erpe nga tuwi nen nga muto rengo naul san, ejki. Nga ngel, ko Nerūn On ko eviseni. Naul derteren nen ejki, ko nir nga marvijuri para-mij kobbong. Ko Nerūn On derteren sen otoe, ko orngwos p̄ila mauren.

<sup>7</sup> Sel nga m̄itra nen nga mariki re nevōt nir nga m̄imajing bbong mijen eplari tevi nosrōvien nga milep. Meri Isrel nir sete arongwos parmeteni Moses non suri erinrin elep p̄elak ren. Mian ko sete epriv ko nosrōvien nen osuw. <sup>8</sup> Poro pirpok, ko nosrōvien ne sel nga mimerr se Nerūn On p̄irinrin pilep p̄iasi. <sup>9</sup> Suri Sel se

Moses nen ewer lokloksi bbong jinibb, ko nosrövien nen otoa. Ko Sel nga Mimerr ngel ololi jinibb omomsawos erres, ko niko nosrövien nen pilep asi. <sup>10</sup> Sel nga mītra, nosrövien nen otoa bonevis, ko lelingenok ejki, suri etra vajin. Ko nga mimerr vajin nosrövien nen elep nga elep lingi. <sup>11</sup> Sel nga mītra oto toto bbong, ko nosrövien nen otoa. Ko Sel nga puto tetajer, nosrövien nen elep asi lenglengen.

<sup>12</sup> Suri nga namosuri nga Sel nga namok-werwer ren erinrin erres erpok, no kem sete emanole sopen; <sup>13</sup> ko sete namrong-wos nabloli pirpe Moses, nga mītawi ore non tevi kalik san, nga puloli mīri Isrel nir sete parlesi nosrövien nga muto ren nga mokan ngatan. <sup>14</sup> Ko mīri Isrel nen nir, erpe nor eserer wonti vane. Ejpari lelingenok, erpe kalik nen oto orer vane daron nga mareve naul ne Sel nga Mitra. Suri Kristo esan kobbong orongwos pīla tweni jir. <sup>15</sup> Ko ejpari lelingen, daron nga mareve naul se Moses, ko erpe kalik nen oto ore norrorrmien ser vane. <sup>16</sup> Ko daron nga san erieni lweni ni van ji Numal, ko kalik nen ejki tweni vajin. <sup>17</sup> Suri Numal evi Nemīn, ko daron nga Nemīn se Numal mivini, ko okla tweni noslosloen jijle nir nga rramsolosloir. <sup>18</sup> Ko kerr jijle, nanu san ejki nga muto ore no kerr, ko rrammeteni erres nosrövien se Numal. Ko daron nga rrammeteni, ko Numal, nga mivi Nemīn, tetajer mok-rieni kerr rengo nosrövien nga tetajer mok-an mare, nga mian ko rrapa-sorsan tevi ni.

## 4

*Derteren nga milep jer nen oto wor ji Atua*

<sup>1</sup> Ko ngok, suri Atua orrorrmi kem ko ela majingen ngel tevi kem, sete nolo kem evitan. <sup>2</sup> Ko namtur ngasue sel nga marloli silveni nanu nga marsij nir. Sete namvijuri gerkerisen, ko sete namrieni nale se Atua pivi gerkerisen, ko nomok-werwer limjer re weretunen. Jinibb jijle arongwose, ko Atua kele erij se kem nga namweretun. <sup>3</sup> Ko poro nospen nga namok-werwer ren oto kelti sopen, ko oto erpok ji nir bbong nga marok-an re mijen. <sup>4</sup> Nir ko sete arosuri, ko atua ne ngatan ngel opongi mete norrorrmien ser nga sete parlesi moron ne nosrövien ne nospen nga mīrres ne Kristo, nga musorsan pini tevi Atua. <sup>5</sup> Suri sete namok-supe suri kem lweni, ko namsupe Numal Iesu Kristo, nga mīlengi kem namivi jinibb ne majingen sen. <sup>6</sup> Suri Atua, nga tuwi muwra “Moron piplari rengo nemalik”, ni kele ololi moron sen omor vaseni vajin nolo kerr nga rraplesi wose nosrövien se Atua re no Kristo.

<sup>7</sup> Ko nanu nga marres pēlak ngel nir namok-torir rengo nibe kem, nga mirpe bbong sospen dan san. Ko niko rramlesi nga derteren nga milep jer nen oto wor ji Atua, ko kem ma ejki. <sup>8</sup> Jinibb tetajer aroji kem, ko sete aror pini nolo kem. Namtur mēemav, ko sete namtur pot. <sup>9</sup> Arok-loli esij tevi kem, ko sete Atua elinglingi kem namsan. Artoni kem namvitan, ko sete nammij. <sup>10</sup> Ko tetajer erpe namwosi mijen se Kristo rengo nibe kem. Ko ngok puloli mauren sen kele piplari rengo nibe kem. <sup>11</sup> Tetajer kem nammaur ma, ko suri namvijuri Iesu, ko jinibb nir arwera parsoni kem van re mijen. Ko ngok puloli mauren se Iesu piplari rengo nibe kem ne mijen. <sup>12</sup> Niko derteren ne mijen emajing ji kem, ko niko ololi mauren emajing ji kami.

<sup>13</sup> Naul On owra ‘Nuosuri, ko niko nurij’. Nerīn On ko ela nosurien nen, ko Nerīn On kele elik ji kem. Ko niko kem kele namosuri, ko namok-rij. <sup>14</sup> Ko namrongwose, Atua nga muloli Numal Iesu emaur luwi re mijen, puloli kem kele nabmaur luwi kele tevi Iesu, ko puloli nabtur tevi kami rengo non. <sup>15</sup> Nanu jijle oto nga piwilwil se kami, ko niko merrenien se Atua daron nga mijpari jinibb elep vajin, ko puloli jinibb pilep parwera erres wor tevi Atua ko parsurōvi.

### *Rrambibto re Atua*

<sup>16</sup> Niko sete nolo kem evitan. Ewretun nibe kem ngel vare okan ngatan nga pimij, ko nolo kem ma, Atua nabong jijle okloli nga pian ko pimerr luwi kele. <sup>17</sup> Ko norongen nga mīsij ngel ewelili bbong ko oto bbong omrrol, ko puloli rrapvitere nosrövien nga milep nga milep temijpal, ko nga puto tuwi ngok vini. <sup>18</sup> Ko niko sete namok-meteni nanu nir nga mete kem ngel nir marongwos parlesir, ko namok-meteni ma nanu nir nga mete kem sete arongwos parlesir. Suri nanu nir nga meter marlesir paran ko parsuw kobbong, ko nanu nga ma sete rramlesir lelingenok parto tuwi ngok vini.

## 5

<sup>1</sup> Rramrongwose nga poro nga nibe kerr ngel, nga marirpe naim nga rramlik rer iel ngatan, poro nga parsij vajin, ko Atua pīlai naim nga mimerr tevi kerr. Nanu ngok, sete san emajinge; oto re melrin mare, ko puto tuwi ngok vini. <sup>2</sup> Renge naim ngel iel ngatan orongwos rraprunge pīsij, ko rrammerreni lenglengen rraplik re naim nga re melrin nen. <sup>3</sup> Ko nibe kerr nga mimerrr pirpe kele sunsun nga mimerr nga rrapuri, puloli sete erpe rrama-malmaal. <sup>4</sup> Rramlik mirpel re nibe kerr ko rramrunge esij,

nanu nir arrowsi kerr. Iok sete erpe rrammerreni rrapmalnal, ko rrammerreni ma rrapuri nibe kerr nga marmerr nir. Ko niko mauren pia-torrlai mijen. <sup>5</sup> Atua ko ololi rramvitere nanu ngel, ko ni kele ela Nerūin On, nga muloli rramrongwose erres nga rramivi sen.

<sup>6</sup> Niko sete nolo kerr evitan nabong san, suri rramrongwose nga daron nga rramlik re nibe kerr ngel, ko setewor rramlik re naim se Numal. <sup>7</sup> Rrambibto bbong re Atua; setewor rramlesi nanu nga marres nir nga ni pia-lai tevi kerr. <sup>8</sup> Niko nolo kerr sete evitan, ewretun jinibb elep arloli esij tevi kerr, ololi rrammerreni rrapiel lingi nibe kerr ngel ko rraplik ji Numal. <sup>9</sup> Ko nanu nga milep nga rrampelak tweni, poro rramlik malum re nibe kerr ngel rreknga ejki, evi nga majingen se kerr puloli ni p̄ir. <sup>10</sup> Suri kerr p̄etp̄eti rraptur ko wor nabong san re no Kristo, ko ni puwra suri majingen se kerr sisamis, poro p̄irres rreknga p̄isij, ko pia-lai nowli kerr.

#### *Kristo emij sere kerr*

<sup>11</sup> Niko nammetutue Numal, ko namok-p̄elak nga nabrevei jinibb nir. Sete namrongwos nabsilveni nolo kem e Atua, ko nuwra rrek kami kele kamrongwose nolo kem. <sup>12</sup> Iok ete namok-sursurōvi kem kele; kami kobbong orongwos kapsurōvi kem, daron nga kamjiljilwer tevi nir nga marsursurōvi lweni nir suri nanu ne vare nir, ko nanu ne nolor ejki. <sup>13</sup> Suri poro nga ewretun namlengle, ko namlengle suri namok-loli majingen se Atua. Ko poro norrorrmien se kem erres, ko iok evi nga nabwilwil se kami. <sup>14</sup> Merrenien se Numal owowomue kem, suri namrongwose, san emij sere jinibb jile. Iok erpe nir jijle armij. <sup>15</sup> Ko ni emij serer, nga daron nga parmaur malum, ko sete parmaur suri nanu nga nir kobbong marmerrnir, ko parmaur ma nga parmajing se ni nga mimij serer ko mimaur luwi.

<sup>16</sup> Niko setemun namlesi nanu nir erpe jinibb kobbong nir marlesir. Bonevis ko namlesi Kristo erpok, ko lelingenok vajin ejki mun. <sup>17</sup> Suri poro san okorti tevi Kristo, ko evi jinibb nga mimerr. Nanu nga martera nir arasi pa, ko nanu nga marmerr nir arini vajin. <sup>18</sup> Atua ko evi batu nanu jijle ngel nir. Ni ko ololi namivi lweni selen, ko ololi kem nammajing sen nga nabsuḗe tevi jinibb nir nga nir kele parivi lweni Atua selen nir. <sup>19</sup> Erpe Atua emajing rrurrngi Kristo nga puloli jinibb jijle parivi lweni selen nir. Setemun puwra lokloksir suri nololien ser nir. Ko ololi kem namivi jinibb sen nga nabsuḗe suri nospen nga m̄irres sen, sel nga jinibb nir parivi lweni selen.

<sup>20</sup> Erpe namivi devje nevre Kristo; erpe Atua erij re kem jingo kem. Namngoni kami eterter rengo majingen se kem se Kristo, kapini kapivi sele Atua. <sup>21</sup> Ni nga m̄irrlenge puloli nanu nga m̄isij san, Atua evrrali erpe jinibb nga m̄isij, nga puloli kerr nga rrama-korti vajin tevi Kristo, rrapivi jinibb nga marmomsawos m̄irres re no Atua.

## 6

<sup>1</sup> Niko nammajing tevi Kristo, ko namngoni eterter nga sete kaplokloksi nanu nga m̄irres p̄elak nga Atua m̄ilai tevi kami. <sup>2</sup> Suri Atua owrai rengo Naul On, 'Renge daron mawos nen ko nurnge nale se kami, ko rengo nabong mawos nen ko nula mauren tevi kami.' Lelingenok le evi daron mawos nen; nabong mawos nen evini le pa.

#### *Majingen se Aposol nir*

<sup>3</sup> Nammusus nablangi niblaot san putu ore san, suri jinibb nir tarwer lokloksi majingen se kem. <sup>4</sup> Ko oto limjer rengo majingen se kem totoklai nga namivi jinibb se Atua. Jinibb elep arloli esij tevi kem, ko namtu eterter; pesveni nat esij p̄etp̄eti, namrunge esij, <sup>5</sup> jinibb arvirrali kem, arwirre kem van re naim ne nekaien, jinibb arpalpal vijajeng. Namp̄elak lenglengen, numer aji kem, sete namrongwos nabsilveni. <sup>6</sup> Ko tetajer namvijuri sel nga mumomsawos m̄irres, namvijuri norongwosien nga m̄irres, namloli nolo kem epriv, namloli erres tevi jinibb jijle nir. Sete namsilveni nolo kem sopon, nammerreni jinibb jijle nir, ko Nerūin On eptevi kem. <sup>7</sup> Nale se kem ewretun tetajer, ko Atua ela derteren tevi kem. Joro nuval nir nga marval e tweni murrun nga mumomsawos m̄irres arto re nevre kem rres ko nevre kem mair. <sup>8</sup> Nabong sopon, ko jinibb nir arongwos partori kem p̄irres; nabong sopon, ko arongwos parllokloksi nise kem. Nabong sopon, arij erres suri kem, ko nabong sopon, arij esij suri kem. Arwera namkerkerasi jinibb nir, ko ejki, namworetun tetajer. <sup>9</sup> Jinibb elep sete arongwose kem, ko kami ma kamrongwose kem erres. Erpe nabmij, ko ejki, nammaur. Arvirrali kem ma, ko sete nammij. <sup>10</sup> Erpe nabting, ko ejki, nam̄ir. Erpe joro kem ejkie, ko namla nijor nga marres milep tevi jinibb elep. Erpe nijor se kem ejkie, ko erpe kele nanu p̄etp̄eti nir arivi se kem.

<sup>11</sup> Meri Korin nir, nale se kem tevi kami oto limjer, sete namsilveni sopon. Metali ne nolo kem etp̄ir tevi kami. <sup>12</sup> Sete nanu san ekikior rengo kem devjen nga kem,

oto bbong ji kami nolo kami. <sup>13</sup> Nomok-rij tevi kami erpe nurij tevi natuk mawos nir. Kami vajin, kaptasi nolo kami.

*Moron sete orongwos pibbölji nemalik*

<sup>14</sup> Sete kapkorti p̄elak tevi nir nga sete marivi kalesia. Murrun nga m̄irres sete orongwos pukorti tevi murrun nga m̄isij. Moron sete orongwos pibbölji nemalik. <sup>15</sup> Kristo sete orongwos p̄imajing korti tevi Demij. Kerr nga rramosuri, sete orongwos rrapkorti rragrag tevi nir nga sete marosuri. <sup>16</sup> Nai demij nga marsavi rrongrongvi sete orongwos putur renga Naim On se Atua. Ko kerr le rramivi Naim On se Atua nga mimaur tuwi ngok vini. Suri Atua owra 'Belik tevir ko pa, ko bevi Atua ser, ko nir parivi jinibb suk nir.' <sup>17</sup> Niko Atua owra kele, 'Kapruj ngasue nir nga marsij, ko kaplik ngasue nir. Sete kapjipari nanu nga m̄isij, ko niko vajin Betkai kami' <sup>18</sup> ko bevi Tata se kami, ko kami kapivi natuk norman ko nesevin nir.' Niko nale se Atua ne derteren p̄etp̄eti.

## 7

*Pol eir suri m̄eri Korin nir*

<sup>1</sup> Sele kem nir nga nammerreni kami, suri nga rijrijen se Atua oto erpok, rrapwirre murrun nga m̄isij pibbölji batu nai ngok. Rrapmetutue Atua, ko rraploli nibe kerr ko neñi kerr poron p̄etp̄eti.

<sup>2</sup> Kaprrorrm̄i kem renga norrorrm̄ien nga m̄irres. Sete namloli esij tevi san, sete namlokloksi san, ko sete namla ore joro kami san e joro kem. <sup>3</sup> Nomok-rij erpok, sete evi nga bewer lokloksi murrun se kami. Suri erpe nuwrai pa, nutori kami re nolok. Rrammaur korti ko rrapa-mij korti. <sup>4</sup> Nolok otutun suri kami, nurnge erres suri kami. Nat m̄ikarkar re kem, ko sete nolok evitan sopen, ko nuir lenglengen. <sup>5</sup> Ko daron nga namini Masetonia e, ko sete namlesi mosien sopen, ko nat ekarkar p̄etp̄eti. Balpalen oto rrerrale kem, ko metutuen oto re liven. <sup>6</sup> Ko Atua nga mokla lweni nir nga nolor maran ngatan ela lweni kem daron nga Taetas miplari. <sup>7</sup> Nam̄ir luwi, sete kis nga namlesi Taetas, ko nga ni osp̄e kele nosp̄en ne kami. Owra kamrrorrm̄i inu elep, kamtengsik, ko kamrij tere nir nga marwera parwer lokloksik. Ko niko nuir elep. <sup>8</sup> Rrek naul nga moli ololi kamrunge esij, suri nale suk eterter, ko nolok sete olwi nga moli. Suri ewretun ololi kamrunge esij beblen; <sup>9</sup> ko mian ko kamlesi wose nanu nga mowrair, ko nolo kami olululwi, ko kamlinglingi murrun nir nga mowra surir. Niko nuir. Suri Atua emajing daron nga kamrunge esij ngok, ko niko nale se kem nga m̄iterter sete olokloksi kami sopen.

<sup>10</sup> Suri daron nga norongen nga m̄isij miplari ji Atua, ko orongwos puloli nolo kerr pulululwi, ko rrapasi van re mauren. Lok erres. Ko norongen nga m̄isij nga mok-pelari re bbong ngatan ngel okloli rrapan re mijen. <sup>11</sup> Ko norongen nga m̄isij nen nga miplari ji Atua ololi erres elep. Ololi nibe kami ous nga kaploli nise kami p̄irres luwi. Ololi kamlolarsi nir nga marloli m̄isij, ko kamvirralir. Kamrrorrm̄i elep nanu nga mowrair, ko kamrrorrm̄i tutuner. Kamloli erres p̄etp̄eti. <sup>12</sup> Ko nurongwos bowrai, batu norrorrm̄ien nga muloli moli naul nen tevi kami sete eplari re devjen ne ni nga muloli m̄isij, rrek re devjen ne ni nga marloli m̄isij tevi. Ejki, nuli erpok nga puloli kaplesi wose renga no Atua norrorrm̄ien se kami lweni nga kamrrorrm̄i vane kem m̄iterter. <sup>13</sup> Ko inu nulesi, ko nolok eir.

Ko nolok eir lenglengen daron nga Taetas mivini. Suri ni eir renga murrun nga kami jikle kamla lweni ni daron nga m̄ilik ji kami. <sup>14</sup> Nusrosrövi pa kami tevi Taetas, ko ni elesi nuwretun. Nuwretun renga nale suk m̄inij nir nga mowrair tevi kami, ko nuwretun renga kele nale nir nga mosrosrövi kami tevi Taetas. <sup>15</sup> Ko norrorrm̄ien sen nga murrorrm̄i kami e okan mare daron nga murrorrm̄i jipari murru kami, nga tetajer kamvijuri nale sen tevi metutuen nga milep daron nga m̄ilik ji kami. <sup>16</sup> Niko nuir, suri nurongwose, kaposuri tetajer.

## 8

*Murrun nga marlai tevi nir nga nevrer mumrrol*

<sup>1</sup> Tasi kem nir, nammerreni kaprongwose sev nga meling kalesia ne Masetonia nir arloli, nga miviseni nolon nga m̄irres se Atua. <sup>2</sup> Nir arlik renga norongen nga m̄isij nga murrowrowe nir, ko joror ejki rres. Ko suri neiren ser nga milep, arloli nolor erres nga erres <sup>3</sup> ko arlai tevi tasi kerr nga marlik Julia sev nga marongwos parlai, ko asi nga marongwos parlai. Nir kobbong <sup>4</sup> arsusi eterter tevi kem poro parongwos parwilwil se jinibb on nen nir.

<sup>5</sup> Ko arloli asi nga namrrorrm̄i, ko arlai womu nir lweni tevi Atua ko tevi kem, suri marongen se Atua. <sup>6</sup> Niko namwera jilijle tevi Taetas nga m̄itipatune nanu nga m̄irres ngel tevi kami, nga pivinvini ore p̄irres. <sup>7</sup> Suri kaman pa mare renga nanu jikle nir: renga nosurien, renga nale, renga norongwosien, ko renga merrenien nga kammerreni inu e, nibe kami ous. Ko niko nammerreni kapan mare renga nanu ngel kele.

<sup>8</sup> Numusus bosoni kami, ko nurij suri nanu nga kalesia nga Masetonia marloli, nga borongwos weretunen kami merrenien se kami erpese. <sup>9</sup> Kamrongwose nalol nga mürres p̄elak se Numal se kerr Iesu Kristo. Ni joron elep nga elep, ko evel lingir nga pivini iel ngatan, nga puloli kami vajin joro kami pilep.

<sup>10</sup> Renge inu nelesien suk, rrek erres poro kapvinvini ore vajin sev nga kamti-patune re

sia nga womu. Kami kamrrormi womue, ko kami kele kamloli womu jere nir jijle. <sup>11</sup> Ko ngok, kaploli jile vajin, nolo kami pimaur ren. Ko kaploli tevi sev nga muto pa re nevre kami. <sup>12</sup> Poro kammarong erres, ko Atua p̄ir re sev nga kamlai. Sete orongwos kaplai p̄iasie sev nga kamlingi nika, ko poro bbong pusorsan tevi, ko erres.

<sup>13-14</sup> Ko re iok kele, numusus kami kapp̄elak, ko nir m̄inij nen parmosi bbong; ko suri lelingenok kami joro kami elep nika, erres nga kaplai tevi nir nga nevrer mumrrol. Ko poro nabong sopen kami nevre kami omrrol ko nir nijor ser elep, ko nir vajin arongwos parlai tevi kami. Erpok ko osorsan re devjen nuru kes. <sup>15</sup> Aruli pa renga Naul On, 'Ni nga m̄iser kortoni milep, sete oup p̄elak; ko ni nga m̄iser kortoni ewelili bbong, sete numer aji.'

### *Taetas nir paran Korin*

<sup>16</sup> Namwera erres tevi Atua nga muloli Taetas kele orrorrmi tutune kami erpe kem. <sup>17</sup> Ko ni emarong daron nga namwera tevi nga pian p̄ilesi kami, ko ni kob-bong emrreni elep pian. <sup>18</sup> Ko nabkoni san kele pipitevi Taetas. Mernen kalesia jijle arsurövi, suri ewerwer erres p̄elak renga Nospen nga Mirres. <sup>19</sup> Mernen ko kalesia nir artobbobbue nga pipitevi kem renga nivelen se kem nga nablai nevöt ngel van. Ko nevöt ngel evi nga puloli jinibb nir parsurövi Numal, ko puloli jinibb nir parlesi wose nga nammerreni nablai se nir nga nevrer marmumrrol renga nanu nir.

<sup>20</sup> Namtobbobbue nuru ngok porpitevi kem mirpok nga puloli sete san purongwos p̄iwer lokloksi kem renga sel nga namloli tevi nevöt nga milep ngel. <sup>21</sup> Nammerreni elep sel se kem pusorsan p̄etp̄eti renga no Atua ko re kele no jinibb nir.

<sup>22</sup> Niko nabkoni kele tasi kerr kele san, nga namok-lesi tetajer mivi drrav nga marale m̄irres, ko lelingenok vajin daron nga m̄ilesi nga kamterter mirpok, ko emrreni lenglengen kele wor pipitevi kem. <sup>23</sup> Ko Taetas eptevik nabong elep renga majingen suk p̄etp̄eti, ko re kele nga noborlai se kami. Ko tasi kerr m̄inij nen nuru, nuru ormajing se kalesia p̄etp̄eti

nir, ko majingen se nuru ololi jinibb nir arsurövi Kristo. <sup>24</sup> Ko niko kapmetmete nir ngok renga merrenien nga milep, nga puloli kalesia p̄etp̄eti nir parongwose nga namweretun daron nga namok-sursurövi kami.

## 9

*Nevöt nga piwilwil se kalesia nir renga Jutia*

<sup>1</sup> Nurongwose, nolo kami erres p̄elak pa, ko boli tama sopen kele renga naul ngel suri nevöt ngok. Erpe kamrongwose, evi nga rraplai tevi kalesia nir iak Jutia. <sup>2</sup> Nurongwose, kammarong pa nga kaplai sopen van, ko nusrövi pa kami tevi kalesia nir nga renga Masetonia. Nuwrai tevir, nuwra "Kalesia nir nga renga Akaea artur metmet nga parlai van, etipatun pa sia nga womu pa." Ko nolo kami nga m̄ir mirpok ngok ololi nir elep kele iak Masetonia armarong kele parlai van. <sup>3</sup> Ko nukoni tasi kerr ngok nir nga puloli nale se kem ngok suri kami sete pivini pivi nawon, ko kaptur metmet ko pa terai, pirpe nga namsuŕe pa suri kami tevi m̄eri Masetonia nir. <sup>4</sup> Poro mijki, ko dea-pitevi m̄eri Masetonia nir sopen vinuk ko nada-lesi nga sete kamtur metmet, ko no kem tia-wis renga nale nga namwera suri kami, ko kami kele no kami tia-wis lenglengen. <sup>5</sup> Ko niko nulesi erres poro bokoni tasi kerr ngok nir parwowomue kem, parinuk ji kami ko parloli lilane nanu nir re devjen ne nevöt ngok. Ko erres p̄elak nga kamwera pa kaplai. Ko mirpok ko puto metmet p̄irres tera daron nga kem nabinuk, ko puloli kele kaplai renga nolon nga m̄irres, ko sete suri marsoni kami.

*Atua emrreni ni nga m̄ilai renga nolon nga m̄ir*

<sup>6</sup> Kaprrormi nanu ngel: ni nga muruw muwelili p̄ili tweni kele puwelili kobbong, ko ni nga muruw milep p̄ili tweni pilep kele wor. <sup>7</sup> Jinibb jijle p̄ilai ko wor pusorsan pirpe nolon m̄ir nga p̄ilai, sete nga puloli nolon purnge p̄isij e, rrek suri ornge marsoni. Suri Atua emrreni ni nga m̄ilai renga nolon nga m̄ir. <sup>8</sup> Ko Atua joron elep temijjal, ko ni p̄ilai nanu nir tevi kami tetajer, puloli tetajer nevre kami sete pumrrol re nanu san, ko orongwos vajin kaplai tetajer tevi nir si nga nevrer marmumrrole nanu nir. <sup>9</sup> Erpe Naul On owrai, owra 'Ni elai elep tevi nir nga nevrer marmumrrol. Sel nga m̄irres sen oto tetajer.' <sup>10</sup> Ko Atua nga mok-lai winen tevi nir nga maruw ko nanen nga rrapaani, p̄ilai kele winen pilep tevi kami, ko puloli kap̄ili tweni pilep kele wor suri sel nga m̄irres se kami. <sup>11</sup> Ko orongwos kaplai

pilep tevi jinibb nir tetajer, puloli jinibb pilep parwera "Erres wor" tevi Atua suri nevõt nga kami kamlai ko kem namtori van jir. <sup>12</sup> Suri majingen nga mïrres ngel nga kamloli ololi nanu eru kis: ela se kalesia nir nga nevrer marmurrol, ko ololi kele nga jinibb elep arwera erres wor tevi Atua. <sup>13</sup> Nanu nga mïrres nga kamloli ngok ololi jinibb nir arlesi wose nolo kami, ko puloli parsurövi Atua, suri kamosuri nospen nga mïrres se Kristo erres, ko suri kamlai tevi nir ko tevi jinibb jijle nir. <sup>14</sup> Ko puloli parlot suri kami nga parrormli kami pilep suri nanu nga milep nga Atua muloli rengen nolo kami. <sup>15</sup> Rrapwera erres wor elep tevi Atua suri merrenien nga mïrres asi nga ni mïlai tevi kerr!

## 10

*Pol erij tevi nir nga marwera derteren ser ejkie*

<sup>1</sup> Kami sopor kamwera nga inu nomok-manun re no kami, ko nga nomok-rij eterter sopen re bbong daron nga mëlík ngasu vajin. Ko numrreni kapmurrong nale suk ngel, suri Kristo kele nolon ean ngatan ko nolon emao. <sup>2</sup> Erpok kele, kami sopor kamwera nga mevijuri murrun ne iel ngatan. Daron nga bevinuk vajin ßelesi kami, ko rrek ßerij wor pïterter sopen tevi nir. Sete kaploli nga ßerij pipok. <sup>3</sup> Ewretun namlik iel ngatan, ko sete namvijuri murrun ne iel ngatan. <sup>4</sup> Ko joro nuval se kem sete arivi nanu ne iel ngatan, ko derteren ner otoo nga Atua mïlai, nga nabrrerarre lat nga Demij murrul totkoni. Ko namok-rerrerarre nale gerisen <sup>5</sup> ko namok-lokloksi norrorrmien jijle nga mian mare ko nga muto ore ko muloli jinibb nir arrelenge Atua. Ko namrur totkoni norrorrmien jijle nir se jinibb nir, ko namloli marosuri Kristo. <sup>6</sup> Ko daron nga kami kaposuri erres vajin, ko nabor alje nir nga marmusuri parosuri.

<sup>7</sup> Kamok-meteni bbong nanu ne vare nir. Poro san ok-wera nga ni evi jinibb se Kristo, ko ni purongwose ko wor nga kem kele namivi jinibb se Kristo. <sup>8</sup> Rrek ewretun nurij elep pëlak suri derteren suk nga Numal mïlai tevi kem aposol. Ko derteren nen sete evi nga nablokloksi kami, ko nga nabor jilijle kami. Ko sete nok ewis nga mferij mirpok suri derteren nen. <sup>9</sup> Ko numusus bololi kapmetutue inu suri nale nga moli re naul suk nir. <sup>10</sup> Suri kami sopon kamok-wera "Pol naul sen nir arwun saute nale nga mïterter. Ko daron nga ma mïlik ji kerr, evi jinibb nga mïlemij nawon, ko nale sen nir armeljariv nawon." <sup>11</sup> Nir nga marij mirpok parmetmet ko wor, suri daron nga nablik vajin ji kami ko

nabloli vajin pusorsan pirpe nale se kem nga marto rengen naul.

*Pol erij tevi nir nga marwera ni osrosrövi lweni ni*

<sup>12</sup> Ko nammetutu nabwera kem namrres asi nir nga marok-wera nir lweni niser aran mare. Ko nir arlengeng, suri tetajer arok-wera nga nir marres, ko arok-meteni lweni bbong nir kis kobbong. <sup>13</sup> Ko kem nammusus nabsursurövi kem pipok suri nanu nga sete musorsan nga nabrij suri. Nabrij bbong suri majingen nga Atua mukoni kem nabloli. Ko majingen se kem epari kami kele. <sup>14</sup> Ko niko sete namsursurövi pëlake kem lweni, suri kem namla nospen nga mïrres evinuk ji kami. <sup>15</sup> Ko sete kem namok-sursurövi kem suri majingen nga jinibb mïnij muloli. Ko nammerreni nga kami kapan mare rengen nosurien se kami, puloli majingen se kem pivini mare kele iok. Ngok mirpok tetajer nammerreni nabloli. <sup>16</sup> Ko nabwerwer rengen nospen nga mïrres rengen vanu nga ngasu wor nir e kami vajin, lat nga setewor jinibb san evan ewerwer. Ko erpok sete nabsursurövi kem suri majingen se jinibb mïnij.

<sup>17</sup> Ko Naul On owrai owra 'Sete san pusursurövi lweni ni, pijki, ko pusurövi ma Numal.' <sup>18</sup> Nir nga marok-wera nir lweni niser aran mare sete arweretun. Atua kobbong esan orongwos puwra jinibb san erres rreknga erpese.

## 11

*Pol erij tere aposol ne gerisen*

<sup>1</sup> Kaplinglingi ta inu ßerij mun se lenglengen sopen. <sup>2</sup> Nurrorrmi terae kami, erpe Atua kele orrorrmi terae kami. Kami kamirpe nesenwarreng nga setewor mian ji jinibb san, ko nga inu nulgij ore pian ji Kristo kis kobbong. <sup>3</sup> Ko numtutu vajin suri nulesi erpe nga nir nga marini ji kami ko marok-rij melmelas marwera niser maran mare ko marivi 'aposol', erpe parlokloksi vajin norrorrmien se kami nga kamlingi pa rengen Kristo. Erpok kele numet nga mïsij nen muloli tuwi daron nga mïkrekrasi Iv rengen nale ne neni rretrun nga muwrai tevi. <sup>4</sup> Suri kammarong pae nir arinuk ji kami. Ko arwerwer ma suri Iesu, ko nale ser suri Iesu arinijnij wore. Ko arwerwer suri Nerin On ko suri Nospen nga Mirres, ko nale ser suri ngok nuru kele arinijnij wore. Ko kamosuri bbong nale ser, nga sete pa osorsan tevi nga inu nuwerwer e ko nga kamosuri womu.

<sup>5</sup> Niser mïrres O! Ko inu nisek sete ean ngatan rragrrag rengen nir. <sup>6</sup> Ewretun re devjen ne rijen, sete nurongwos ßerij

kemkamŋe erpe nir, ko re ma devjen ne norongwosien, sete nuan ngatan rragrrag re nir. Ngok kamrongwos pae erres.

<sup>7</sup> Rrek nuloli esij nga sete nungoni nevöt san ji kami daron nga mŋewerwer rene Nospen nga Mirres se Atua tevi kami, rrek? Ko nuloli inu nuan ngatan, ko kami kaman mare. <sup>8</sup> Ko nuloli kalesia mŋinij nir arwulik daron nga mŋemajing ji kami. Erpe nuvnae nir nevöt ser nga puwlik daron nga mŋemajing se kami. <sup>9</sup> Ko tetajer daron nga mŋelik ji kami iok, poro nevrekk pumrrrol re nanu san, ko tasi kerr nga Masetonia aroklai tevik, ko sete nuloli kami kampelake tevik. Ko numusus bololi pirpok nabong pisan. <sup>10</sup> Nuwretun rene weretunen se Kristo nga muto jik, nok eterter nga pirpok ko pa tetajer rene iok Akaea, ko sete san piwer orek nga mosrosrövök rengen. <sup>11</sup> Ko suri sev sete nungoni nanu san ji kami? Suri nga sete numrreni kami? Ejki, Atua ko orongwose nga memrreni kami elep!

<sup>12</sup> Ko betajer nga bololi pirpok. Erpok ko bolokloksi nale se aposol gerisen nen nir nga marok-sursurövi nir lweni, marokwera marmajing osorsan erpe inu. <sup>13</sup> Nir sete arivi aposol weretunen. Arkerkeris suri majingen ser, ko arloli mete jinibb owonwon, ko arloli jinibb nir arrorrmi nga marivi aposol se Kristo. <sup>14</sup> Ko sete rraptaole iok, suri Demij kele ololi mete jinibb nir owonwon, ko ololi arrorrmi ni evi anglo ne moron! <sup>15</sup> Niko jinibb sen nir arloli osorsan erpe ni daron nga marloli mete jinibb owonwon ko marwera marmajing suri sel ne murrun nga musorsan. Atua putor vitrangir pilep suri nanu nga marloli.

#### *Norongen nga mŋisij se Pol*

<sup>16</sup> Sete kaprorrmi nga inu nulengleng. Ko poro ewretun kamrorrmi ko erpok, ko kaplinglingik bosrosrövök mun sapon pirpe lenglengen san! <sup>17</sup> Berij le sapon; rrek nale suk sete pivi nale se Numal, ko pivi nale se san nga mŋilengleng. <sup>18</sup> Ko suri nir elep arsursurövi nir lweni suri nanu nga nir kobbong marloli, ko rrek inu kele bololi pirpok, bosrosrövök sapon. <sup>19</sup> Kami norongwosien se kami otoa, a? Ko niko kammarong bbong kaprunge nale se nir nga marlengleng. <sup>20</sup> Kammarong bbonge san nga

mukoni lokloksi kami, san nga mŋikrekrasi kami, san nga mivnae ji kami, san nga murrormi ni evi jinibb san ko muwje vasu kami. <sup>21</sup> Numanun nga bowrai, ko daron nga kem namlik ji kami, ko kem sete namviter ko nabloli pirpok!

Ko poro san owra pusrosrövi ni lweni, ko inu kele bololi pirpok. (Kamlesi nurij se lenglengen vajin!) <sup>22</sup> Nir arivi mŋeri

Ipru, a? Ko inu kele nuvi san. Meri Isrel ko nir? Ko inu kele. Metka se Epram ko nir? Inu kele. <sup>23</sup> Jinibb ne majingen se Kristo ko nir? Rrek nulengleng nga bowrai, ko bowrai tama: inu nuasie nir rene iok. Nurat elep asie nir, nuan re naim ne nekaien nabong elep asie nir, arvirralik vavis kis asie nir, ko otomori bemij vavis kis. <sup>24</sup> Valim kis ko nupal ji mŋeri Isrel nir nga marvirrvirralik ejpari ngavöl itul drromon esiw (39). <sup>25</sup> Vatul ko mŋeri Rom nir arevjik tevi nai nga milep san, ko nabong san jinibb sapor artuwek e nevöt. Drrav nga mŋesa rer nir, itul kis arron. Ko rene drrav nga itul nga marron nga, rene san, nuilong jer rene dis nutrin ko nutpong san. <sup>26</sup> Nivelen suk elep lenglengen, ko nutori mijen suk rene nuwi nga muwlu milep, rene jinibb venao, rene niaken suk nir mŋeri Isrel, rene jinibb ne vare nir, rene ngaim nga marlelep nir, rene lolo merwer, rene dis, ji nir nga markerkeris nga marwera marivi kalesia. <sup>27</sup> Nuplak elep, nurat elep. Nabong elep sete numatur erres. Numer ajik, nolok emesmes, melas ajik suri sunsun nga mori sete emtul, eminmaniv, ko sete evttere melas. <sup>28</sup> Ko nanu kele san nga muto jik tetajer evi nga nomok-rrorrmii pelak kalesia nir rene lat jijle nir. <sup>29</sup> Poro nir san nolon pimelisna, ko inu kele erpok, nolok emelisna. Ko poro nir san evitan, ko inu nurunge esij e.

<sup>30</sup> Poro bosrosrövök, ko bosrosrövök bbong suri derteren suk nga mijkie. <sup>31</sup> Atua, Tata se Numal Iesu Kristo orongwose nga sete nukrekris. Rrapsurövi ni tuwi ngok vini. <sup>32</sup> Daron nga mŋelik Damaskas, ko jinibb nga mimetmete ngaim nen se numal Aretas ololi jinibb nuval sen sapor artur metmet re metali ne ngaim nga parrul totonik. <sup>33</sup> Ko ejki mun, suri selek sapor arsongnik van re narr san ko arjurönik rrurrngi lat nga mŋitpir e san re naworr, ko arjurönik van ngatan re dan, ko nuwlu asi.

## 12

*Pol owra tweni nanu nga milep nga ni mŋilesi*

<sup>1</sup> Bosrosrövök ko wor. Bela sev ko piŋres ren? Ko bololi tama. Bospe vajin suri nanu sapor nga Numal mivisenir tevik. <sup>2</sup> Nurongwose jinibb le san nga mivi kalesia san. Ko evi sia esngavöl drromon ivij (14) pa, ko arlai van re melrin itolin, nga mare jer nen. Nurrlenge, ematur lesi lebbong, rreknga niben mawos le wor mian. Atua kobbong esan orongwose iok. <sup>3</sup> Erpe nga mowrai, nurongwose nga mŋernen arlai van re melrin, ko nurrlenge,



ematur lesi lebbong, rreknga niben mawos le wor mian. Atua kobbong esan orongwose iok. <sup>4</sup> Ko arlai van re melrin; ko reнге ie ni ornge nanu sopor nga marres nga marres nga sete orongwos jinibb san puspe re nale san ne iel ngatan. <sup>5</sup> Niko bosrosrövi mernen; ko re inu devjen nga inu, sete nurongwos bosrosrövik. Bospe bbong derteren suk nga mijkie. <sup>6</sup> Ko poro nga bosrosrövik, ko iok sete nulengleng, suri nuwretun bbong. Ko sete bosrosrövik, suri numusus kapmetenik van mare, ko numrreni kaprroirmi bbong nanu nir nga mololir pa ko nale nir nga mowrair pa.

<sup>7</sup> Ko Demij ololi nanu san esij re nibek, ko nanu ngok erpe evrralik ko orrut totoni nolok nga sete pian mare pelak, ko nga sete bolololik suri nanu nga marlelep nga melesir. <sup>8</sup> Ko nulot van ji Atua vatul nga pila tweni nanu ngok jik. <sup>9</sup> Ko ni owra lweni teik, owra "Ewretun, nik derteren som ewelili, ko inu derteren suk puwosim ko pa. Ko daron nga nik nibem mimeliswa, ko inu derteren suk emajing erres pelak vajin." Ko niko nuir nga bospe pilep lenglengen nibek nga mimeliswa vajin, nga puloli derteren se Kristo puto jik. <sup>10</sup> Ko niko numarong bbong derteren suk puwelili, jinibb nir parwer lokloksik, jinibb nir parojik, daron nga mitertter pijparik, ko niblaot lele nir parto pelaot suri mevijuri Kristo. Suri poro derteren suk puwelili, ko ngok derteren suk pilep ko vajin.

### *Pol orrorrmi kalesi ne Korin nir*

<sup>11</sup> Nurij se lenglengen nga merij re devjen suk mirpok, ko kami ko kamloli mololi mirpok. Moro kami ko kapsurövi inu, ko ejki! Inu sete ma nuvi jinibb nga welili reнге nir ngok nga marsursurövi lululwenir marwera marivi aposol, ewretun sete nuvi jinibb san! <sup>12</sup> Orongwos kaplesi kobbong enerer nga mevi aposol suri nesesien nir ko nanu nga marinijnij nawone nir nga mololir, reнге nolok nga mipriv, daron nga melik ji kami. <sup>13</sup> Kamjkie nanu sansan kobbong nga meling kelesia minij nir marloli, nile: sete kammeteni suri inu. Kaptelasi inu nga mololi misij tevi kami erpok!

<sup>14</sup> Pivatul le pa bevinuk belesi kami. Ko sete bongoni nanu san ji kami. Sete numrreni nevöt se kami, ko numrreni kami kobbong. Suri sete erres nga bipi san puwngani tata sen, ko tata sen ma puwngani bipi. <sup>15</sup> Numarong beles nevöt suk jikle, ko nibek kele, nga bewilwil se kami. Ko ewretun merrenien nga kammerreni inu e pian ngatan suri inu merrenien nga memrreni kami e ean mare?

<sup>16</sup> Niko kamlesi vajin nga sete nuloli kampelak suri inu. Ko rrek kapwera "Pol ololi erpok nga pikrekrasi kerr, musuw ko pia-lai nanu san ji kerr." <sup>17</sup> Ejki nga ejki rres! Ko nir san nga mokonir vinuk ekrekrasi kami, rreknga ejki? Ejki rres ma. <sup>18</sup> Nuloli Taetas evan, ko nukoni kele tasi kerr minij nen kele eptevi. Rrek Taetas ekrekrasi kami rrek? Ejki, suri ni norrorrmien sen osorsan bbong tevi nga inu, ko ni ololi osorsan bbong tevi nga inu nomok-loli.

<sup>19</sup> Kami kamrorrmi rrek tetajer namok-rij nga nabwer ore nale se kami nga muwra pulokloksi kem? Ejki! Tetajer namok-rij erpe Kristo emrreni ko erpe Atua emrreni. Ko nanu jikle nga namloli, namloli nga nabwilwil se kami, sele kem nir nga nammerreni kami. <sup>20</sup> Ko numtutu dea-vinuk ji kami ko delesi kami sete kamluk erres erpe numrreni, ko kami kele taklesi inu dololi nanu san nga kami sete kapmerreni. Suri numtutu delesi takrij latlat, nolo kami tilelep, nolo kami tumrol, nolo kami tukul, takroworsur, takrij otot tevi kami lululweni, nolo kami tian mare, ko nat tikarkar ji kami. <sup>21</sup> Numtutu dea-vinuk ko Atua tuloli nok tiwis re no kami, ko dea-tengsi nir tilep nga tarloli pa nololien ko sete nolor olululwi, ko nga nolor timrreni aseni nesevin, ko nga tarloli tisij tevi nesevin.

## 13

### *Bongsi nale se Pol*

<sup>1</sup> Vatolin le vajin bevinuk belesi kami. Naul On owra 'Poro jinibb san owra pirij tere selen, ko nuru pieru rrek nir pitul ko pa parij se nale nen.' <sup>2</sup> Nuwra bowrai tevi nir nga marloli pa nololien, ko tevi nir minij nen nir, erpe nga mowrai pa re daron erwen nga melik ji kami, ko bowrai lweni kele nga melik ngasue kami vajin: Poro bolwi kele vinuk, ko botor vitrangji kami vajin. <sup>3</sup> Ko kaprongwose pirres vajin nga Kristo erij rruungi inu. Ko ni daron nga muwra piete kami, ko ni derteren sen sete puwelili, ko derteren sen pilep. <sup>4</sup> Ewretun derteren sen ewelili daron nga murrul re nai pelaot, ko lelingenok vajin ni emaur reнге derteren nga milep se Atua. Ko kem namkortoni tevi Kristo, ko kem kele derteren se kem ewelili; ko nabmaur reнге ni mauren sen re derteren nga milep se Atua reнге no kami.

<sup>5</sup> Kaprrowrow kami lweni. Kamtur ko reнге nosurien se kami, rreknga ejki? Rrek sete kamrongwose nga Iesu Kristo elik livö e kami? Poro pijki, ko kamtor jabble petpeti! <sup>6</sup> Ko numrreni kami kaprongwose nga kem sete namtor jabble.

<sup>7</sup> Namok-lot van ji Atua nga sete kaploli p̄isij. Iok sete namloli nga jinibb nir parlesi kem majingen se kem erres, ko nga kami kobbong kaploli p̄irres, pesveni jinibb nir arlesi kem majingen se kem erres rreknga erpese. <sup>8</sup> Suri sete namrongwose nabloli nanu san nga puto ore weretunen, ko nga ma putor jilijle. <sup>9</sup> Naniir bbong daron nga derteren se kem ewelili ko derteren se kami elep. Ko namok-verus van ji Atua nga kapa-momsawos p̄irres p̄etp̄eti. <sup>10</sup> Niko nomok-uli naul ngel vinuk ji kami daron nga m̄elik ngasu ngel; nuli nga kami kapete lweni kami, ko poro bevinuk vajin ko setemun bololi nanu nga marterter spon tevi kami renga derteren nga Atua m̄ilai pa tevik. Suri derteren nen sete evi nga berrarre nanu, ko nga ma bololi pian mare.

<sup>11</sup> Rrek otomori nale suk pusuw ngel. Nuwra erres wor tevi kami. Kap̄elak nga kapa-momsawos p̄irres p̄etp̄eti; kaprunge nale suk nir; norrorrmien se kami pisansan; kaplik renga demat. Ko Atua nga mivi Atua ne merrenien ko Atua ne demat p̄ilik livö e kami.

<sup>12</sup> Kapwera erres tevi kami lululweni tevi merrenien ko demat. <sup>13</sup> Kalesia jijle nir arwera erres tevi kami. <sup>14</sup> Ngel evi loten suk, nga nalol nga m̄irres se Numal Iesu Kristo, ko merrenien se Atua, ko gortien se Neniin On puto ji kami jijle.

## Naul nga Pol Muli tevi Kalesia Nir renge GALESIA Batu nale nga mivsviseni lut nga parmeteni naul ngel puto suri

Renge daron nga ni muli naul ngel, ko Pol ornge esij elep ko orrorrmi elep mēri Galesia nir suri nga nir elep arivel lingi nevisvisenien nga Pol mīlai tevir bonevis, ko arvijuri nevisvisenien se jinibb mīnij sopor nga marok-wer lokdoksi Pol ko nospēn nga mīrres. Nir arwera kalesia nir parvijuri ko wor nale neseseien rreknga lo (law) nga Moses mīlai tuwi tevi mēri Isrel nir, ko paran re bae ser. Ko Pol owra eterter nga nosurien esan kis kobbong, nga jinibb muosuri Iesu Kristo, evi sel nga jinibb san pumomsawos pīrres re no Atua. Renge sel ngok, ko Nēmīn On okpitevi kalesia nir, ko ololi murrūn ser erres pēlak easi jinibb san nga mīrplak nga pivijuri nale neseseien tama san.

*Pol owra "Erres" tevi nir*

<sup>1</sup> Inu Pol, nuvi aposol san. Sete jinibb san elngik, suri nanu ngok sete eplari re devjen ne jinibb. Iesu Kristo ma elngik, ko Atua Tata nga muloli ni mimaaur luwi kele re mijen. <sup>2</sup> Inu tevi kalesia niaken suk jijle nir ne iel, namwera "Erres" tevi kami kalesia nga kamlik re vanu ngok Galesia.

<sup>3</sup> Nurongwose, Atua Tata se kerr ko Numal se kerr Iesu Kristo porlai merrenien ko demat tevi kami. <sup>4</sup> Iesu Kristo emarong lweni ni pimij pīsre nololien se kerr, nga pītka tweni kerr re ngatan nga mīsij ngel. Iok evi kele marongen se Atua Tata se kerr. <sup>5</sup> Rrapsturōvi ni tuwi ngok vini. Pirpok ko.

*Nale mīnij ngok nga kamrunge sete evi nospēn nga mīrres se Kristo*

<sup>6</sup> Nutaol lengleng nga kamwolu lingi Atua ngavilvil mirpok ko kamvijuri vajin nospēn mīnij san! Suri Atua everuse kami renge merrenien se Kristo. <sup>7</sup> Ko nospēn nga mīrres mīnij san ejki kele mun, ko jinibb kobbong sopor arwera parlokloksi kami ko parieni nospēn nga mīrres se Kristo. <sup>8</sup> Ko poro nga kem bbong, rreknga anglo san pivel re melrin vini ko pīwerwer re nospēn mīnij san tevi kami nga sete musorsan tevi nga inu mēwerwer pa ren tevi kami, Atua putor vitrangī ko wor rengen suri. <sup>9</sup> Iok namwerai pa osuw, ko lelingenok nuwra lweni kele: poro jinibb san pīwerwer tevi kami renge nospēn mīnij san nga sete musorsan tevi nga

kamrunge pa musuw, Atua putor vitrangī ko wor rengen suri.

<sup>10</sup> Nga mērij mirpok, kamrunge erpe numrreni bololi jinibb nir parunge pīrres kobbong re inu, rrek numrreni bololi Atua purnge pīrres re inu? Ko ejki, Atua kobbong. Rreknga numrreni bololi berres re no jinibb? Ejki! Poro nga bololi pirpok ngok, setete nuvi jinibb ne majingen se Kristo. Ko niko nir nga marieni nospēn nga mīrres se Kristo ko nga marwer lokloksi inu erpok arkerkeris kobbong.

*Pol ospē suri ela majingen sen ji Kristo erpese*

<sup>11</sup> Tasik nir, numrreni kaprongwose nanu ngel: nospēn nga mīrres nga nomok-werwer ren sete eplari ji jinibb, ejki. <sup>12</sup> Ko sete jinibb san elai tevik, ko sete jinibb san evisvisenik ren, ejki. Ko Iesu Kristo ko wor eviseni tevik.

<sup>13</sup> Kamrunge pa nospēn ne sev nga nomok-loli daron nga mevijuri malum sel se mēri Isrel nir nga marok-lot rengen. Nomok-oloji pēlak kalesia se Atua nir; nuwra βetelmajir pijari loten ser pusuw. <sup>14</sup> Ko nuan mare renge sel se mēri Isrel nir nga marok-lot rengen, asi re mēri Isrel elep nga marivi dul suk. Ko nuvijuri pēlak Bīrterwarrēng se kem nir renge sel nga marwerai tuwi.

<sup>15</sup> Ko Atua otobbobbu womue inu re daron nga mematur malum re depai tasu suk, ko everuse inu, suri ni nolon nga mīrres. Ko emarong vajin <sup>16</sup> piviseni ni Natun tevi inu, nga bospē suri nospēn ne ni tevi jinibb ne vare nir. Re daron mawos nen, sete nususi rongornge kele tevi jinibb kele san, <sup>17</sup> ko sete nuan Jerusalem nga βelesi nir nga marivi aposol womu re inu. Ko nuvel ko numawos pa Arepia nuvesane, mian ko nulwi vini kele Damaskes e. <sup>18</sup> Vitunen vajin re sia itul, ko nuan vajin Jerusalem nga bosusi rongornge tevi Pita. Ko nulik jin ejpari nabong esngavōl drromon elim (15). <sup>19</sup> Sete nulesi aposol mīnij san, Jemes kobbong, tasi Numal. <sup>20</sup> Nanu nga molir ngok tevi kami sete arivi gerisen, arivi weretunen ko wor mawos Atua.

<sup>21</sup> Mian ko nuan vajin re vanu Siria ko re vanu Silisia. <sup>22</sup> Ko kalesia nir nga marlik Jutia setewor arlesi wose nok. <sup>23</sup> Arunge ma nospēn nek nga marsuē mirpel: "Ni nga mok-oloji kerr bonevis, lelingenok vajin okwerwer re nosurien nga bonevis mok-lokloksi." <sup>24</sup> Ko arsurōvi Atua suri inu.

## 2

*Pol ejiljilwer tevi aposol mīnij nir*

<sup>1</sup> Vitunen vajin re sia esngavöl drromon ivij (14), ko nuan kele Jerusalem e tevi Banapas, ko nula Taetas kele eptevik. <sup>2</sup> Nuan suri Atua owrai tevik nga ban ko wor. Ko nukorti tevi nir nga martorir marivi jinibb nga marlelep, kem nanson kis. Ko nuwra suri nospen nga mürres nga nomokwerwer ren tevi jinibb ne vare nir. Suri dotor jabble re lat san, tuloli majingen suk tivi nanu nawon, ko nir ma parwera momsawose ko tevik. <sup>3</sup> Ko ejki, nir arlesi nanu jikle armomsawos erres kobbong. Re devjen ne bae kele, ko sete aron tertere selek Taetas. Ni evi mēri Gris san, ko setewor ean re bae se mēri Isrel nir.

<sup>4</sup> Ko nir sopor armerreni ni pian re bae. Nir ngok arkerkeris nga marwera marivi kalesia, ko arvij vini tweni parleslesi suri nivelen nga kerr rramiel sisarow ren re Iesu Kristo. Ko nir arwera parloli rrapivi demij maur kele. <sup>5</sup> Ko sete nammarong parasie kem sapon, suri nammerreni nabtor totoni weretunen ne nospen nga mürres ngel puto pürres tetajer, suri namrormi kami.

<sup>6</sup> Ko nir nga ma jinibb martorir marivi jinibb nga marlelep, sete arwera kele nale san tevik. (Poro pivi weretunen nga marivi jinibb nga marlelep evi nanu nawon ji inu, suri Atua elesi jinibb jikle nir arsorsan kobbong.) <sup>7</sup> Ko nir sete arwera kele nale san tevik, ejki rres. Ko arlesi evi weretunen Atua elngi pa rengen inu nospen nga mürres sen nga bowra tweni tevi jinibb ne vare nir, pirpe nga nūlgi womu pae rengen Pita nga ni puwra tweni tevi mēri Isrel nir. <sup>8</sup> Ko Atua ela derteren tevi Pita nga pivi aposol nga pian ji mēri Isrel nir, ko Atua kele ela derteren tevi inu nga bevi aposol nga bean ji jinibb ne vare nir. <sup>9</sup> Ko Jemes ko Pita ko Jon arlesi wose vajin derteren nga Atua nūlai tevik. Nir ngok, jinibb nir artorir erpe burtur. Ko arini vajin ko arrul totkoni komru Banapas nevre komru rres, erpe nomorivi seler. Ko armarang nga komru noboran ji jinibb ne vare nir, ko nir paran ji mēri Isrel nir. <sup>10</sup> Ko arwera bbong nga komru noborrormi beres ko nir. Ko nanu ngok mawos kobbong, numrreni lengleng womu pae nga bololi.

#### *Pol ewer ore Pita*

<sup>11</sup> Ko mian ko daron nga Pita mivini Antiok vajin, ko nutur imare re non nutre ni, suri ololi sarrsarre. <sup>12</sup> Suri womu Pita okaani nanen tevi jinibb ne vare nir. Ko daron nga jinibb sopor nga Jemes mukonir marini vajin, ko ni ewij ngasu kerkerasi jinibb ne vare nen nir, suri emtutue nir nga martori nale neseseien se mēri Isrel nir eterter, ko nga marungasi jinibb ne vare nir. <sup>13</sup> Ko nir nūnij nen nir nga marivi

kalesia re mēri Isrel nir arkorti tevi Pita rengen murrun gerisen ngok. Ko Banapas kele arwos tweni vajin rengen gerisen ser ngok.

<sup>14</sup> Ko daron nga inu mēlesi marloli mirpok, ko sete arivel mawos rengen weretunen ne nospen nga mürres, ko nuwrai tevi Pita rengen no nir jikle, “Nik kuvi mēri Isrel san. Ko kulik vajin erpe jinibb ne vare san, suri setemun kuvijuri nale neseseien se mēri Isrel nir, suri kuvi pa kalesia. Ko erpese vajin kuruj ngasue jinibb ne vare nir erpok, erpe kungasir kele, ko kuwra kupon tertere nir parluk pirpe mēri Isrel nir?”

#### *Nosurien evi nanu nga milep ji mēri Isrel nir ko ji jinibb ne vare nir kele*

<sup>15</sup> Kem namiak namivi mēri Isrel, ko sete namivi jinibb ne vare nga mēri Isrel nir marungasir. <sup>16</sup> Ko lelingenok vajin kem namrongose nga jinibb san sete orongwos puloli lweni ni pumomsawos pürres re nga mivijuri nale neseseien se mēri Isrel nir, ejki. Orongwos pumomsawos pürres ko re bbong nosurien sen re Iesu Kristo. Ko niko kem kele namosuri pa Iesu Kristo nga Atua puloli kem nabmomsawos pürres suri nosurien se kem re Kristo, ko sete suri nga namvijuri nale neseseien. Suri sete san orongwos pumomsawos pürres re nga mivijuri nale neseseien, ejki. <sup>17</sup> Ko mēri Isrel nir nga martori nale neseseien ser nir eterter arungasi kele kem vajin, suri setemun namvijuri nale neseseien ser, ko namok-vijuri sel nga Atua puloli kem nabmomsawos pürres suri bbong nosurien se kem re Kristo. Ko nir arwera vajin kem nololien se kem otoa erpe jinibb ne vare nir, ko arwera kele Kristo evi batu nololien. Ko ejki nga ejki rres nawon! <sup>18</sup> Nurrerrarre tweni nale neseseien ser nir nga marok-wer ore nanu milep. Ngok sete evi nololien nga nūisij nga mololi mirpok. Ko poro nga bemajing lweni nale neseseien ngok nir, ko ngok ko ma erpe nololien nga nūisij suk putoe vajin!

<sup>19</sup> Ko re devjen nga rengen nale neseseien, numij ko pa ren. Nale neseseien nen kobbong otor pinik. Ko ngok evi nga bemaure se Atua nga bemajing sen vajin. Erpe arwuse totonik pa re nai pelaot tevi Kristo. <sup>20</sup> Ko erpe inu vajin setemun numaur, ko Kristo ko vajin emaur rengen. Ko re nga memaur malum rengen nibek ngel, numaur suri nosurien suk kobbong nga mosuri natu Atua. Ni emrrenik elep, ko ela ni lweni suri inu.

<sup>21</sup> Bololi ototvi vajin nale suk pumrrol: Merrenien se Atua, nga mukoni natun Iesu Kristo nga pimij sere kerr, elep nga elep temijpal. Ko nir nga marwera jinibb

san orongwose pumomsawos p̄irres suri nga mivijuri nale neseseien arkerkeris kobbong. Suri poro nale ser ngok evi weretunen, ko niko Kristo emij nawon vajin, ko merrenien se Atua evi nanu nawon.

### 3

#### *Nale neseseien rreknga nosurien?*

<sup>1</sup> E, kami m̄eri Galesia, kamlengle. Siko ololi suri kami, nga muloli kamieli lingi Kristo? Nuwer metelepe mijen se Kristo renga nai pelaot tevi kami. <sup>2</sup> Nuwra borongwos nanu sansan ji kami, ngel: Kamlai pa Neñin On suri nga kamvijuri nale neseseien? Ejki, kamlai suri kamrunge ko kamosuri nospen nga m̄irres. <sup>3</sup> Erpese kamlengle temijpal mirpok? Kamtipatun pa re Neñin On, ko kamwera vajin kapvinvini ore re derteren ne nibe kami kobbong! <sup>4</sup> Nanu elap arpelpari ji kami, ko pesveni ko? Ejki, nuosuri wener partoe ko. <sup>5</sup> Bosusi kele: Atua nga mokla Neñin On tevi kami ko nga mokloli nanu nga marinijnij nawone nir livö re kami okloli erpok suri nga kamvijuri nale neseseien, rreknga suri kamrunge ko kamosuri nospen nga m̄irres? <sup>6</sup> Erpok kele 'Epram osuri Atua, ko Atua owrai vajin nga ni omomsawos erres suri nosurien sen', erpe Naul On owrai.

<sup>7</sup> Niko kamrongwose nir nga nosurien ser mutoe, nir mawos nen ko arivi metka mawos se Epram. <sup>8</sup> Naul On owra wowomu pae nga suri nosurien ser kobbong Atua pia-loli jinibb ne vare nir par-momsawos p̄irres ren. Ko niko Naul On owra wowomue tevi Epram erpel: 'Atua p̄irij p̄irres suri jinibb ne vare nir renga nik.' <sup>9</sup> Epram osuri Atua ko Atua erij erres suri Epram. Ko erpok kele nir p̄etp̄eti nga marosuri Atua, Atua erij erres suri nir. <sup>10</sup> Nir nga marmajil renga nale neseseien nga parvijuri majingen nen, ko Atua oungasir. Suri Naul On owra 'Atua ongasi jinibb jikle nir nga sete marvijuri tajer nale p̄etp̄eti nir nga maro renga nale neseseien.' <sup>11</sup> Ko vesan kele, rramrongwos alje nga sete san orongwos pumomsawos p̄irres re no Atua renga nga mivijuri nale neseseien, suri Naul On owra 'Mer nga bbong mumomsawos m̄irres renga nosurien sen ko, ni ko pimaur.' <sup>12</sup> Ko sel nga jinibb san pumomsawos p̄irres renga nale neseseien sete evi sel ne nosurien, ejki. Suri Naul On owrai kele, 'Ni nga bbong mivijuri nale neseseien nir pimaur surir.' <sup>13</sup> Ko Kristo ervei tweni kerr, ololi Atua setemun oungasi kerr, suri nga ni ela luwe nungasien nga Atua oungasi kerr ren, nga nale neseseien muspe. Ololi

erpok re nga murrul re nai pelaot, suri Naul On owra 'Jinibb san nga marevji pini, ko marruloni niben re nai san, ngok rramlesi wose nga Atua oungasi, suri ela norongen nga m̄isij temijpal.' <sup>14</sup> Ko niko renga Iesu Kristo vajin Atua purongwos p̄irij p̄irres suri jinibb ne vare nir pusorsan tevi nga m̄irij m̄irres suri Epram. Ko kerr rramrongwos vajin rraplai Neñin On nga Atua m̄irijrij e nga p̄ilai, suri nosurien se kerr.

#### *Nale neseseien rreknga nale ne rijri-jen?*

<sup>15</sup> Tasik nir, borrongrongvi re jinibb. Poro nga jinibb p̄ieru pormarong kokorti re nanu san nga porloli ore marongen se nuru ngok, ko sete jinibb san orongwos vajin p̄irieni kele rrek puwra kele mun nale san kele pian ren. Suri orloli ore jile ko pa. <sup>16</sup> Ko erpok, Atua ela rijrijen sen womu pa tevi Epram, ko nale neseseien nga mia-vini vitu sete orongwos p̄irieni. Ko Atua ela rijrijen sen ngok tevi Epram ko tevi metka sen san. Ko re iok, Naul On sete owra 'tevi metka som nir', ejki, ko owrai ma 'tevi metka som san'. Metka sen ngok evi Kristo ko. <sup>17</sup> Ko nanu nga milep nga mowra bowrai nen, erpel: Atua elai pa rijrijen sen tevi Epram owomu. Ko vitunen, sia ongut vavij bbulin ngavöl itul (430) easi osuw, ko nale neseseien eavini vajin. Ko niko nale neseseien ngok sete orongwos pulokloksi marongen ngok se Atua ko p̄irieni rijrijen sen. <sup>18</sup> Suri poro nga nelaien se Atua eplari renga nale neseseien, ko setemun orongwos piplari renga rijrijen. Ko Atua ela nawon pae tevi Epram suri rijrijen sen. <sup>19</sup> Ko erpese vajin re nale neseseien? Evini suri sev? Arevei oto tevi nale rijrijen suri bbong nololien nir se jinibb nir. Ko arlingi oto erpok pijpari nga metka nen se Epram nga marlai nale rijrijen ngok tevi pia-pelari. Ko nale neseseien nir, Atua elair tevi anglo nir, ko nir vajin arlai tevi Moses, ko Moses elai tevi m̄eri Isrel nir. <sup>20</sup> Ko daron nga ma Atua n̄ila nale rijrijen sen tevi Epram, ko ni esan kis kobbong elai mawose tevi Epram, sete jinibb san otur liven.

<sup>21</sup> Ko erpok, nale neseseien ngok oto tere nale rijrijen se Atua rrek? Ejki nga ejki rres nawon! Ko poro nga nale neseseien orongwos puloli jinibb parmaur, ko niko vajin jinibb nir par-momsawos p̄irres ren. Ko ejki, sete erpok. <sup>22</sup> Suri Naul On owrai pa nanu p̄etp̄eti nir arto pa re derteren ne nololien. Ko nale rijrijen kobbong vajin orongwos p̄ila tweni jinibb re derteren ne nololien suri nga marosuri Iesu Kristo.

*Kerr p̄etp̄eti rramivi sansan re Iesu Kristo*

<sup>23</sup> Ko daron nga nosurien ngok setewor mivini wor, ko nale nesereien owlu ore kerr, ejpari nga nosurien ngok m̄irrmali vajin. <sup>24</sup> Erpe nale nesereien emetmete kerr mijpari nga Kristo mivini vajin, ko rramomsawos erres suri nosurien vajin. <sup>25</sup> Ko suri nga nosurien m̄irrmali vajin, ko nale nesereien setemun emetmete kerr vajin. <sup>26</sup> Kami jijle kamivi natu Atua suri kamosuri Iesu Kristo. <sup>27</sup> Suri kami p̄etp̄eti nga kampaptaes renge Kristo, erpe kamuri pa mauren se Kristo. <sup>28</sup> Ko kerr jijle vajin rramsorsan, poro rramivi m̄eri Isrel rrek poro rramivi jinibb ne vare, ko poro rramivi demij maur rrek poro rramiel sisarow, ko poro rramivi norman rrek poro rramivi nesevin. Kerr p̄etp̄eti rramivi sansane renge Iesu Kristo. <sup>29</sup> Ko poro kamivi jinibb se Kristo, ko kamivi vajin metka se Epram, ko kaplai vajin nelaien se Atua nga m̄irrij e renge nale rijrijen sen.

#### 4

##### *Rramivi natu Atua*

<sup>1</sup> Bowra rrongrrongvi re bipiwarreng san nga tata sen joron milep. Daron nga m̄er wel nen muwelili malum, setewor otori joro tata sen san. Ko jinibb m̄inij sopor nga tata sen m̄ilngir armetmete ni ko nijor nen nir, pian pia-jipari daron nga tata sen m̄ilngi nga ni pilep vajin ko p̄ilai nanu p̄etp̄eti nir vajin. <sup>2</sup> Ko poro puwelili malum, ko pusorsan pini tevi demij maur se tata sen nga sete mutori nanu san evi sen.

<sup>3</sup> Ko erpok kele re kerr. Daron nga rramwellili malum renge sel se Atua, ko rramivi demij maur se demij nir ne iel ngatan. <sup>4</sup> Mian mian ko ejpari momsawos daron mawos nen vajin, ko Atua okoni vajin ni Natun. Ni eak re nesevin san, ko eak re daron momsawos nga nale nesereien murrul totkoni malum mauren se jinibb nir. <sup>5</sup> Ko ni evini nga pujri lweni kerr nga nale nesereien murrul totkoni kerr, ko nga kerr rrapivi vajin natu Atua.

<sup>6</sup> Ko suri rramivi vajin natu Atua, ko Atua okoni Ner̄i Natun vini renge nolo kerr, ololi kerr rramverus Atua evi Tata se kerr. <sup>7</sup> Ko niko kerr setemun rramivi demij maur, rramivi vajin natu Atua. Ko suri nga rramivi natu Atua, ko niko Atua pia-lai tevi kerr nanu jijle nga m̄ilngir parivi se natun nir.

##### *Pol orrorrmi m̄eri Galesia nir*

<sup>8</sup> Ko erpok ko, bonevis kamrrerlengen Atua, ko kamivi demij maur se demij nir nga sete marivi atua. <sup>9</sup> Ko lelingenok vajin, kamrongwos pae Atua (rreknga erresres ma bowrai Atua orongwose kami). Ko

erpe se kammerreni kele kapluwi van ji demij ngok nir, nga marmelisna ko joror marjiki? Erpe se kammerreni kapivi luwi demij maur ser kele? <sup>10</sup> Kamtori nabong sopor, ko navöl sopor, ko daron sopor, ko sia sopor nga marsupsufer renge nale nesereien se m̄eri Isrel nir! <sup>11</sup> Numtutu deplak nawon pa suri kami.

<sup>12</sup> Niaken suk nir, nungoni kami eterter nga kapirpe inu, erpe nga inu nurpe pa kami. Sete kamloli rragrag nanu nga m̄isij san tevik. <sup>13</sup> Kamrongwose inu numsi re nibek daron nga m̄ewerwer re nosp̄en nga m̄irres tevi kami womu. <sup>14</sup> Ko mesien nga mulolik sete kamungasik tevi, nurongwos ma kamlesi evi nanu nga m̄isij. Ko sete kamruj ngasue inu, ko kamlaik erpe anglo san se Atua, erpe Iesu Kristo. <sup>15</sup> Ko nibe neiren se kami ne wosenen? Nurongwose, re wosenen kami kapla tweni mete kami ko kaplai tevi inu, poro kaprongwose kaploli pipok. (Erpe iok nuspe suri nolo kami nga m̄irres nga sete murongwos pusuw tevi inu.) <sup>16</sup> Ko erpe se kamok-rij tere inu vajin, kamloli inu nurpe vajin devje nuval se kami? Rrek kamloli erpok suri nga m̄erij re weretunen tevi kami?

<sup>17</sup> Ko lenglengen ne jinibb ne nevisvise-nien ngok nir arsurövi kami re nale nga marivi neni rretrun marres arwera par-lumi nolo kami rer. Ko partur ore kami vajin ko kami vajin kapsurövi kis nir vajin. <sup>18</sup> Erres nga parsurövi kami, poro wor nolor parres. Ko erres kele nga kamsurövi inu daron nga m̄elik tevi kami. Ko suri sev kammosi re daron nga m̄elik ngasu vajin? <sup>19</sup> Natuk nir! O, nuflak elep re kami daron nga womu kamini kamivi kalesia, osorsan tevi nesevin san eplak nga puwosi bipi sen p̄iak. Ko rrek ßeplak luwi kele vajin pijpari nga nolo kami parini parmomsawos pirpe nolo Kristo. <sup>20</sup> O, poro nga ßelik tevi kami lelingenogel! Ko poro nga borongwos ßerieni nale suk tevi kami! Suri nomok-rorrmi lenglengen kami.

##### *Jijilwewen suri Eka ko Sera*

<sup>21</sup> Kapwerai ta tevi inu, kami nga kammerreni kaplik renge nale ne nesereien, sete kamrunge nanu nga nale ngok muwrai? <sup>22</sup> Suri aruli erpel, nga Epram natun norman eru. Tuwen evi natu Eka, nga mivi nesevin ne majingen sen; ko tuwen evi natu nesevin nga mivel sisarow san, nisen Sera, Epram wor nesen sen mawos. <sup>23</sup> Ko bipi nga nesevin ne majingen muwosi, eak suri marongen se jinibb kobbong. Nisen ko Ismael. Ko bipi nga ma nesevin nga mivel sisarow muwosi, eak suri rijrijen se Atua ko wor. Ni nisen ko Aesak. <sup>24</sup> Ko ngok orrongrrongvi nanu ko san. Nesevin ngok nuru orirpe

sel eru ngok nga jinibb san puruj mori lesie Atua. Sel tuwen nen eplari reнге botwen ngok Sinae, botwen nga Atua mīla nale neseseien tevi Moses. Ko nir nga marvijuri sel ngok arivi demij maur, erpe Eka ko metka sen nir. <sup>25</sup> Ko niko Eka erpe botwen nga Sinae nga muto reнге vanu Arepia, ko erpe kele Jerusalem ne lelingenok, suri ni tevi metka sen nir arivi demij maur. <sup>26</sup> Ko Jerusalem nga mimerr nen nga muto reнге melrin, ni erpe jinibb san nga mivel sisarow, ni ko evi tasu se kerr. <sup>27</sup> Suri aruli erpel reнге Naul On: 'Kupir, nik nga kumñer nga setewor kumvesi natum san rragrrag. Kupsorrviј ko kupkail suri kumñir, nik nga setewor kumwosi bipi san wor. Suri ni nga mutur nawon, natun pilelep piاسie ni nga diwen sen mutoe.'

<sup>28</sup> Ko kami, niaken suk nir, kamivi natu Atua suri rijriјen sen, erpe Aesak, natu Sera. <sup>29</sup> Ko erpe re wosenen, Ismael, nga mīak suri marongen se jinibb, okoji Aesak nga mīak suri rijriјen se Atua, ko erpok kele lelingenok arok-oјi kerr. <sup>30</sup> Ko Naul On owrai erpese? Owrai erpel: 'Kupwirr tweni nesevin ne majingen nuru natun, suri natu nesevin ne majingen sete orongwos pīlai nijor se tata sen pirpe natu nesevin nga mivel sisarow pia-lair.' <sup>31</sup> Ko kerr, niaken suk nir, sete rramivi metka se nesen ne majingen ngok, ko rramivi ma metka se nesevin ngok nga mivel sisarow.

## 5

### *Kaptur pīterter reнге nivelen sisarow se kami*

<sup>1</sup> Kristo ololi rramiel sisarow, ko owra rrapiel sisarow pētṗeti vajin. Ko ngok, kaptur pīterter reнге nivelen sisarow ngok, ko sete kaploli lweni kami kapivi luwi demij maur. <sup>2</sup> Kapmurrong! Inu Pol, nuwrai tevi kami nga poro nga kaploli nir parevji kami reнге bae ser, ko ngok Kristo sete orongwos pīla mauren tevi kami vajin. <sup>3</sup> Nuwrai eterter kele tevi jinibb jille nga maran reнге bae se mēri Isrel nir nga nir parvijuri ko wor nale neseseien ser pētṗeti vajin. <sup>4</sup> Kamjikie Kristo, kami nga kammerreni kapmomsawos reнге nale neseseien. Kamruј pa ngasue merrenien se Kristo. <sup>5</sup> Ko kerr ma, Nerñin On se Atua eptevi kerr, ko rramteravi nga Atua pia-loli kerr rrapmomsawos suri nosurien se kerr kobbong. <sup>6</sup> Suri bae evi nanu nawon reнге jinibb san nga mukorti pa tevi Iesu Kristo, poro ean pa rengen rreknga ejki. Ko nanu nga ma milep evi nosurien. Ko nosurien se kerr okpelari reнге merrenien se kerr nga rrammerreni jinibb nir.

<sup>7</sup> Womu, kamwolu erres reнге mauren ne kalesia se kami. Siko ololi nga kami setemun kamvijuri weretunen? <sup>8</sup> Nanu ngok sete eplari јi Atua, nga mokveruse kami. <sup>9</sup> Jinibb sansan kobbong orongwos puloli delung nir parsarr. <sup>10</sup> Ko nurongwose, norrrormien se kami sete orongwos pīniје reнге nga inu. Nurongwose iok suri nga kamkorti pa tevi Iesu Kristo. Ko isi nga pivi mēnen nga moklokloksi kami, Atua putor vitrangi ko.

<sup>11</sup> Tasik nir. Kamrongwos pae inu norrrormien suk suri bae. Nomok-wera nga kalesia nir setemun paran rengen. Ko niko arok-oјik suri. Nir arlesi murrun se Kristo nga mokla nawon mauren tevi kerr suri mijen sen reнге nai pelaot evi nanu nga mñisij. Suri armerreni nir wor parloli nanu sopor nga pīla lweni se nir, armusus Kristo pīsan kobbong pīla se nir. <sup>12</sup> Numrreni poro nga nir nga marwera parlokloksi kami re nga parevji kami reнге bae ser parla nesip ser ko parevji lokloksi lweni nir!

### *Kapla wenen ne Nerñin On ko sete ne mauren tera se kami*

<sup>13</sup> Ko kami, niaken suk nir, Atua everuse kami tweni nga kapiel sisarow. Sete nale ne neseseien san orrul totkoni mun kami. Iok erres. Ko nanu sansan kobbong ni le: sete kapwera "O, nanu san setemun orrul totkonik, inu bololi sev nga memrreni vajin", ko ngok kamvijuri lweni vajin mauren tera nga mñisij se kami. Sete kaploli pipok, pijki. Ko kaplila ma se kami lululweni suri merrenien. <sup>14</sup> Suri poro nga kupvijuri nale ngel, 'Kupmerreni selem pirpe nik luwi', ko ngok kuvijuri pētṗeti pa nale neseseien ngok nir ko osuw. <sup>15</sup> Ko poro nga kaploli pirpe nanu rrum nir nga mariјaji lululwenir, ko iok kapmetmet ren, taklokloksi pētṗeti lululweni kami.

<sup>16</sup> Ko nuwrai tevi kami, kapvijuri Nerñin On kobbong, ko sete kapvijuri mauren tera nga mñisij se kami. <sup>17</sup> Suri mauren tera se kami etre Nerñin On, ko Nerñin On etre mauren tera se kami. Nuru ngok orivivi devje nuval se nuru, ko orok-toni kami; ko niko, kami sete kamok-loli sev nga mūrres nga kammerreni. <sup>18</sup> Ko poro nga kapvijuri Nerñin On, ko niko nale neseseien setemun orrul totkoni kami.

<sup>19</sup> Ko majingen ne mauren tera se kami arto limjer, nir le ngel: murrun nga norman ko nesevin moroјoji nuru mirpe guli, <sup>20</sup> murrun nga marvijuri atua mñinj nir, murrun nga marloli suri jinibb, murrun nga martertere nir, murrun nga marpalpal, murrun nga nolor marlelep, murrun nga marok-lololar, murrun nga marivi lolkul, murrun nga marwijwjrir,

<sup>21</sup> murrun nga nolor marvevna, murrun nga marminmin, ko murrun nga marloli nanan san nga puloli bbong parkarkar ren, ko murrun lele nir nga marsorsan tevir marirpok. Nususur metue kami erpe nga mowrai womu: Nir nga marok-loli mirpok sete parlai batun vanu se Atua.

<sup>22</sup> Ko wenen ma ne Neñin On erpel: merrenien, neiren, demat, nolon nga mipriv, drrorin nga mürres, nolon nga mürres, nolon nga mokrorrmi tutune nanu, <sup>23</sup> nolon nga mimalum, ko nolon nga mimij nga sete orongwos pulolar. Nanu ngok nir arres ðelak, ko poro nga jinibb san pulolir, ko sete nale neseseiren san orongwos piplari suri, suri evijuri ðetðeti pa nale neseseiren ðetðeti osuw. <sup>24</sup> Ko nir nga marivi jinibb se Iesu Kristo arwuse mauren tera ser renge nai pelaot tevi murrun nga mok-merreni karkar nanu nir. <sup>25</sup> Neñin On ela mauren tevi kerr, ko niko rrapvijuri vajin Neñin On. <sup>26</sup> Sete kapsursuróvi lululweni kami, sete kaprij kerkerasi lululweni kami, ko sete nolo kami pokvenvenae nanu se kami mñinj.

## 6

<sup>1</sup> Niaken suk nir, poro nga kaptor sweri jinibb san nga mok-loli nanu nga mñisij san, ko kami nga kamvijuri malum Neñin On kaðete mñernen pumomsawos. Ko kaploli pirpok renge sel ne murrun nga mimalum. Ko kapmetmet re kami, suri murrun ngok tirvei kele nolo kami, ko kami kele takirpok. <sup>2</sup> Kapwosi jilijle soloslo nga marrow se kami lululweni, ko niko kapvijuri ðetðeti nale neseseiren se Kristo pusuw. <sup>3</sup> Ko poro nga jinibb san nolon ean mare ko orrorrmi ni evi jinibb nga milep san, ko re weretunen ni evi jinibb nawon, ko ngok ni okkerkerasi lweni ni kobbong. <sup>4</sup> Kami sisamis kapmeteni suri majingen se kami sisamis luwi ko wor, ko sete kapmeteni viringsi tevi majingen se jinibb mñinj. Ko niko kaprongwos vajin kaprij melmelas suri majingen se kami kis kobbong. <sup>5</sup> Suri Atua elngi majingen sisamis ji jinibb jilje nir nga nir parlolir. Ko niko sete erres nga kapmeteni viringsi majingen se kami tevi majingen se jinibb mñinj.

<sup>6</sup> Nik nga marok-visvisenim, kopok-tutweni nanan ko nanu nga marres ðetðeti nir nga komok-lair tevi ni nga mok-visvisenim.

<sup>7</sup> Sete kaprongsarr, sete jinibb san orongwos ðikrekrasi Atua renge nanu ngel: sev nga jinibb san murwi, nanu nen pimaaur ko wor. <sup>8</sup> Niko poro nga jinibb san purwi nanu nga marsij ne mauren tera sen, ko pia-tawe mijen ren. Ko poro purwi ma

nanu nga marres nga Neñin On mimrenir, ko pia-tawe mauren nga Neñin On mñilai nga sete orongwos pusuw. <sup>9</sup> Ko niko kerr nga rramok-loli mürres, sete nibe kerr pimijmij ren; suri rrapa-tawe wenen nen re daron mawos nen, poro bbong sete rraplinglingi majingen ngok ko. <sup>10</sup> Ko niko rraploli ðirres ngarr tevi jinibb ðetðeti nir, ko womunen, tevi kalesia nir.

### *Bongsi nale se Pol nga puwnir*

<sup>11</sup> Kamlesi, nulul elelep tevi vajin inu nevrek vajin. <sup>12</sup> Nir nga maron tertere kami nga kapan renge bae ser, lartul ngok nir arwera parij melmelas suri nanu nga muto re nibe jinibb kobbong. Ko arok-loli erpok suri bbong arwera jinibb tarojir poro parwera mijen se Kristo re nai pelaot esan ela mauren tevi jinibb. <sup>13</sup> Ko nir kele nga maran pa renge bae, nir kele sete artori nale neseseiren, erpe kami kele sete kamrongwos kaptori, suri sete jinibb san orongwose putori nale neseseiren. Ko nir arwera bbong parij melmelas suri nibe kami.

<sup>14</sup> Ko renge inu ma, setete ðerij melmelas re nanu pisan, pijki rres. Berij melmelas re bbong nai pelaot se Numal se kerr Iesu Kristo. Renge mijen se Kristo renge nai pelaot, Atua obbri tweni murrun ne derteren ne iel ngatan nir renge inu, ko ololi nuvel sisarow vajin re murrun ngok nir. <sup>15</sup> Ko erpok ko, poro nga jinibb san pian pa re bae, rrenga poro pijki, evi nanu nawon. Ko nanu nga milep ma evi mauren nga mimerr nga Atua mñilai tevi kerr renge Iesu Kristo. <sup>16</sup> Ko nurongwose, Atua ðila demat ko netlasien tevi nir jilje nga marvijuri nale ngok, ko tevi jinibb sen ðetðeti nir.

<sup>17</sup> Setemun jinibb san puloli kele vajin vitunen borng ðisij suri nanu ngok nir. Suri nuwosi nabil elep re nibek nga devje nuval se Iesu marevjk rer. Nabil ngok nir arviseni nga inu nuvi demij maur sen.

<sup>18</sup> Nurongwos mae tasik nir, merrenien se Numal se kerr Iesu Kristo puto renge nolo kami sisamis. Pirpok ko. Nuwra "Remse kami jilje.



**Naul nga Pol Muli tevi  
Kalesia Nir renge  
EPESAS  
Batu nale nga mivsvseni  
lut nga pargeteni naul  
ngel puto suri**

Renge naul ngel Pol ospe suri norrorrmien se Atua nga jinibb jikle nir parlik parivi sansan renge Iesu Kristo. Ko gortien ngok eplari pa ji kalesia nir. Nir arirpe nibe Kristo, ko Kristo evi batun. Ko arirpe kele naim san nga Kristo mivi batu nabur nen, ko arirpe nesen se Kristo. Nale rrongrvngvien rreknga pikja nale ngok nir arviseni nga kalesia nir arivi sansan renge Kristo. Ko rramlesi Pol eir elep ko ejiljilwer kemkame renge nale nga marres nir daron nga murrormi merrenien nga milep se Atua nga rramlesi renge Iesu Kristo nga mila mauren tevi kerr. Mian ko ospe kele suri lat nga liken ser puto suri renge mauren nga marmaur rengen nabong jikle.

*Pol owra erres tevi nir*

<sup>1</sup> Inu Pol nuvi aposol se Iesu Kristo suri marongen se Atua. Nuwra 'erres' tevi kami jinibb on nir nga kamlik Epesas, ko nga kamtur eterter renge Iesu Kristo. <sup>2</sup> Nurongwose, merrenien ko demat se Atua Tata se kerr ko se Numal Iesu Kristo piptevi kami.

*Atua elai pa nanu jikle nga marres tevi kerr*

<sup>3</sup> Rraprij pirres suri Atua Tata se Numal se kerr Iesu Kristo, suri ni elai pa nanu jikle nga marres nga marto renge melrin ko elngi re nolo kerr nga rramkorti pa tevi Iesu Kristo. <sup>4</sup> Ko ni otobbtobbu womue kerr nga rrapa-korti tevi Iesu Kristo, vitunen ko ea-loli iel ngatan mutovajin. Elngi pa kerr nga rrapon ko rrapwokwok renge ni non, ko nga rrapmerrmerreni kerr pilep. <sup>5</sup> Owra wowomu pae nga kerr rrapivi natun suri Iesu Kristo, suri ni kobbong marongen sen elesi erres pirpok. <sup>6</sup> Ololi erpok tweni nga jinibb nir parsurövi ni nosrövien sen ko merrenien sen re nga mila Kristo nga ni mimrreni milep tevi kerr erpe merrenien nga milep sen san nga mila nawone tevi kerr. <sup>7</sup> Renge dra ne mijen se Kristo ko ni ojri lweni kerr nga rramkorti tevi Kristo. Iok erpe etlasi tweni nololien se kerr, suri merrenien sen nga mirres milep <sup>8</sup> nga mijivreni milep renge kerr. Re norongwosien sen nga murongwose nanu petpeti nir <sup>9</sup> elesi erres nga kerr

rraprongwose marongen sen, nga womu mutovajin. Ko iok evijuri norrorrmien sen nga milngi womue renge Kristo <sup>10</sup> nga pia-pelari renge daron momsawos nen. Ko norrorrmien sen evi nga piser kortoni nanu petpeti nir renge Kristo, nanu nir ne melrin ko nanu nir ne iel ngatan, ko Kristo pivi batu nanu ngok petpeti nir vajin.

<sup>11</sup> Atua okloli nanu petpeti nir arok-pelari osorsan tevi ni marongen sen. Ko ni otobbtobbu kem renge Kristo, ko owra wowomu pae <sup>12</sup> nga jinibb jikle nir parsurövi nosrövien se Atua suri kem nga namlingi womu nolo kem renge Kristo. <sup>13</sup> Ko renge Kristo kami kele, nga kamrunge pa nale ne weretunen, ko nospen nga mirres nga muspe suri sel nga Atua pila mauren tevi kami rengen, kami kele kamlingi nolo kami rengen. Ko Atua otore kami tevi Nerün On nga muwrai pa wowomu nga pia-koni. <sup>14</sup> Ko Nerün On ngok eviseni womue nga Atua pia-lai ko wor nanu petpeti nir nga milngir pa parivi se kerr. Ko ngok rrapsturövi ni nosrövien sen.

*Loten se Pol*

<sup>15</sup> Suri nanu ngok ko nir, nütipatan re daron nga mornge nosurien se kami renge Numal Iesu ko merrenien se kami nga kammerreni kalesia nir, <sup>16</sup> sete numosi nga bowra 'erres wor' tevi Atua suri kami. Nomok-rorrmiki kami renge loten suk, <sup>17</sup> ko nomok-ngoni tevi Atua se Numal se kerr Iesu Kristo, nga mivi Tata ne nosrövien, nga pilai norongwosien nga murrow tevi kami renge Nerün On sen, ko nga Nerün On sen kele piviseni Atua tevi kami, nga kaprongwose ni pirres. <sup>18</sup> Ko niko, kaplesi wose pirres renge nolo kami vajin nanu nga marres temijjal nir nga Atua miverus kami tweni, nanu nga marwun saute nosrövien, nga Atua milngir pa se kerr jinibb on sen nir, nga rrapriv twenir. <sup>19</sup> Ko numrreni kele nga kaprongwose kele derteren sen nga milep nga milep temijjal nga mok-majing renge kerr nga rramosuri. Iok osorsan tevi derteren nga milep sen <sup>20</sup> nga muloli Kristo mimaur luwi re mijen, ko misakel renge Atua nevren rres renge melrin. <sup>21</sup> Ko iok Kristo ean mare re numal petpeti nir, ko nisen ean mare re nais petpeti nir re daron nga ngel ko daron nga pia-vini. <sup>22</sup> Ko Atua elngi nanu jikle re belan ngatan, ko ololi kele ni evi batu kalesia nir renge nanu petpeti nir, <sup>23</sup> ko kalesia nir arirpe ni niben. Ko mauren ser owun saute Kristo, nga mok-songni nanu jikle nir nga Atua mulolir.

**2**

*Re mijen van re mauren*

<sup>1</sup> Ko kami bonevis erpe kammij re nololien se kami ko nanu nga marsij nga kamok-lolir. <sup>2</sup> Re wosenen kamvijuri sel nga müsij ne ngatan ngel, ko kamosuri Demij, nga mivi numal se demij nir nga marlik ngatan pëtpeti nir, ko nga mok-majing malum rege nir nga sete marvijuri Atua. <sup>3</sup> Ko kerr jikle bonevis rramvijuri sev nga nolo kerr nga müsij ko norrorrmien se kerr nga müsij mimrenir. Ko nalol se kerr esij erpok ko wor, ko rramivi jinibb nga Atua mulolarsi kerr, erpe jinibb jikle nir. <sup>4</sup> Ko Atua orrorrmi terai kerr. Ko suri merrenien sen nga milep nga mimreni kerr e, <sup>5</sup> ololi rrammaur luwi tevi Kristo, daron nga rrammij pa rege nololien. Ko ngok rramlesi, Atua ela mauren tevi kerr suri ni merrenien sen kobbong. <sup>6</sup> Ko ni ololi kerr rrammaur luwi kele tevi Kristo, ko ololi rramsakel kokorti tevi Kristo rege melrin. <sup>7</sup> Ololi erpok nga piviseni rege sia sia nga para-vini, merrenien sen nga milep lenglengen ko murrun nga mokrorrmi kerr rege Iesu Kristo. <sup>8</sup> Atua ela mauren tevi kami nga kamosuri, suri bbong merrenien sen ko. Erpe evi nelaien san nga ni mïla nawone tevi kami, sete eplari rege kami. <sup>9</sup> Ko sete eplari kele rege majingen nga mïrres san nga kamloli, ejki. Ko niko, sete jinibb san orngwos pulololi lwenie. <sup>10</sup> Kerr rramirpe nanu san nga Atua kobbong mïmajinge. Ko ni ela mauren nga mimerr tevi kerr suri Iesu Kristo, tweni nga rraploli majingen nga marres nga ni mïlngir wowomu pae nga rrapmajing twenir.

*Kerr jikle rramivi meling sansan rege Kristo*

<sup>11</sup> Re womu kamiak kamivi jinibb ne vare. (Ko mïri Isrel nir, nga martori bae ser mïterter, arok-ungasi kami, ko arok-wera tevi kami, 'Sete kaman re mövil'. Ko iok evi nanu san nga jinibb kobbong muloli, ko epari bbong nibe jinibb kis ko.) Ko kaprorrmi wos kamirpese re wosenen. <sup>12</sup> Rrek re wosenen kamlik ngasue Kristo, ko kamivi jinibb mïnij re mïri Isrel nir, ko sete kamkorti rege nanu nga marres nir nga Atua muwra pïlai tevi mïri Isrel nir. Ko niko sete nanu san nga kaptiriv tweni vitunen otoo, ko kamlik ngasue Atua iel ngatan. <sup>13</sup> Ko lelingenok vajin kamkorti tevi Iesu Kristo, ko setemun kamlik ngasu erpe womu, ejki. Kamini pa mori suri drra ne mijen se Kristo.

<sup>14</sup> Ko Kristo ololi demat livö ne kem mïri Isrel nir ko kami jinibb ne vare nir, ko ololi kerr rramivi meling sansan. Erpe tevi ni niben ko etngitngi naworr nga martuwe muto kokorti mivi nawot nga muwlu livö ne nuru. Ko ololi nuru vajin setemun

orivivi devje nuval se nuru. <sup>15</sup> Ko ni ela tweni nale neseseien se mïri Isrel nir tevi neseseien wowarrene neni nir, nga puloli nuru nga womu orivel sisamis porivi vajin mïlewu, porirpe jinibb sansan rege Kristo, nga muloli demat ngok. <sup>16</sup> Mijen se Kristo rege nai pelaot erevji tweni jerjere murrun nga kem mïri Isrel nir, ko kami jinibb ne vare nir, rramivivi devje nuval. Ko mijen se Kristo rege nai pelaot ejipteni gortien se kerr nga eru ngok evi niben sansan vajin, evi ni niben. Ko ela kerr jikle ko ejipteni kerr tevi Atua. <sup>17</sup> Ko erpok, Kristo evini ko ewerwer suri nospen nga mïrres suri demat. Ewerwer tevi kami nga kamlik ngasue Atua, kamivi jinibb ne vare nir, ko ewerwer kele tevi kem mïri Isrel nir nga marlik morie Atua. <sup>18</sup> Ko suri Kristo, kerr jikle rramrongwose rrapan ji Atua, mïri Isrel nir ko jinibb ne vare nir. Ko Nemïn On nga mivi sansan okpitevi kerr jikle.

<sup>19</sup> Ko ngok, kami jinibb ne vare nir, setemun kamivi jinibb neturvitan. Ko setemun kamlik toto, ejki. Ko kamivi pa jinibb tera se Atua erpe jinibb sen jikle nir, ko kamivi pa naim se Atua. <sup>20</sup> Naim nen, batu nabur nen evi Iesu Kristo, ko nabur nir nga martur suri arivi propet nir ko aposol nir. <sup>21</sup> Ko nibe naim nen pëtpeti arjijipti rege Kristo, ko armajing rujujoni malume rege Kristo, pivi Naim On se Numal. <sup>22</sup> Ko kami kele, kamivi nibe naim nen sopen, suri kamivi se Kristo. Ko rege naim nen, Atua ko pïlik ren, suri Nemïn On sen.

### 3

*Majingen se Pol suri jinibb ne vare nir*

<sup>1</sup> Ko suri nanu ngok nir, inu Pol nomoklot tevi Atua suri kami. Nulik re naim ne nekaien ngel suri nuvi jinibb se Iesu Kristo. Ko nomok-majing se kami jinibb ne vare nir. <sup>2</sup> Rreknga kamrunge pa osuw nga Atua mïla tevi inu majingen ngel nga mïmajing se kami, suri ni merrenien sen kobbong. <sup>3</sup> Atua eviseni nospen nga mïrres tevik, nga womu muto teptepi. (Ko moli pa sopen tevi kami re murrun nga miviseni tevik ngok. <sup>4</sup> Ko poro nga kapeve sev nga moli ngok, ko kaplesi wose norongwosien suk suri nospen se Kristo ngok.) <sup>5</sup> Nospen ngok, Atua sete eviseni tevi dul ne jinibb nga wowomu nir, erpe nga miviseni pa re nevre Nemïn On tevi aposol nga maron nir ko tevi propet nir lelingenok. <sup>6</sup> Ko nanu nga milep nga muto teptepi sia sia rege nospen ngok evi: jinibb ne vare nir parkorti tevi nir nga marosuri re nanu nga marres nir nga marpelari rege Iesu

## 4

Kristo, nga marsuŕe reŕge noŕŕen nga mĩrres sen, ko nga rraplik terair. Ko parkorti kele reŕge niben sansan.

<sup>7</sup> Ko Atua ololi inu nuvi jinibb ne majingen nga bowrai tweni noŕŕen ngok suri merrenien sen nga mĩlai tevik ko suri derteren nga milep sen. <sup>8</sup> Inu nuvi jinibb nga welili jer reŕge jinibb on jille nir, ko Atua elai ma merrenien ngel tevik, nga bowra tweni tevi jinibb ne vare nir noŕŕen nga mĩrres suri nanu nga marres temijpal re Kristo nga jinibb nir marong wonwone nir. <sup>9</sup> Ko erpok kele, bowra tweni tevi jinibb jille nir suri majingen se Atua nga pia-majing piprel, pipok, ko pipak. Majingen ngok se Atua nga pia-majinge oto teptepi sia ko sia ji Atua nga mĩmajing nanu jille nir wowomu pa. <sup>10</sup> Ko Atua emarong nga lelingenok norongwosien sen nga sel lele nen milep piplari vajin reŕge liken se kalesia nir, puloli nga jinibb nga marlelep nir ko anglo nga marlelep nir re melrin parongwose. <sup>11</sup> Ko iok evi marongen sen nga muto tuwi pa, nga miplari suri majingen se Iesu Kristo Numal se kerr. <sup>12</sup> Suri Kristo ngok, kerr nga rramosuri ni rramrongwos rrapiel ruroni re no Atua daron nga rramlot, tevi nolo kerr nga sete mimtutu. <sup>13</sup> Ko niko, nungoni kami nga nolo kami sete pivitan suri norongen nga mĩsij nga mijparik suri kami. Ngok evi nga ma pususi kami imare ko.

*Loten se Pol*

<sup>14</sup> Ko suri nanu ngok ko nir, nujipa re no Atua Tata, nulot. <sup>15</sup> Ko ni evi batun ne tata nir, ko metka jille nir reŕge melrin ko reŕge iel ngatan arokla murrin se tata reŕge ni. <sup>16</sup> Ko nomok-ngoni tevi nga puloli kapterter pilep pusorsan tevi nosrövien nga milep sen, tevi Nerĩn sen nga moklik re nolo kami. <sup>17</sup> Ko nomok-ngoni kele nga Kristo kele poklik re nolo kami suri nosurien se kami. Ko nomok-ngoni kele nga mauren se kami puto reŕge merrenien, pirpe laŕe nai nga murrul totkoni dan, ko pirpe kele naim san nga mutur mĩterter re dan nga mĩterter mĩrres. <sup>18</sup> Ko nulot erpok nga kapviter nga kaprongwos vajine merrenien se Kristo, tevi jinibb sen jille nir. Merrenien sen ngok elep temijpal; ean ngasu jer, ko ean mare jer, ko ean ngatan jer. <sup>19</sup> Merrenien se Kristo ngok elep pelak re jinibb san purongwose, ko nulot nga kami kaprongwose. Ko ngok, kapwun saute murrin nga mĩrres se Atua.

<sup>20</sup> Atua orongwos puloli asi jere temijpal isev nga rramgoni ko isev kele nga rramrormi, suri derteren sen nga mokmajing livö ne kerr. <sup>21</sup> Ko kerr nga rramivi kalesia, nga rramkorti pa tevi Iesu Kristo, rrapurövi ni tuwi ngok vini. Pipok ko.

*Kerr kalesia rramirpe nibe Kristo*

<sup>1</sup> Ko niko inu, nga mĩelik re naim ne nekaien suri nomok-majing se Numal, nomok-werai malume eterter tevi kami nga liken se kami pĩrres pusorsan tevi nga Atua muwrai womu daron nga miveruse kami. <sup>2</sup> Nolo kami pumolmol ko wor, ko kapivi jinibb malum. Nolo kami pipriv, ko kaprresres ko wor tevi kami, sete kapsisij tevi kami, suri merrenien nga kammerrmerreni kami ren. <sup>3</sup> Ko erpok, kapsaro pĩterter nga sete nanu san pulokloksi gortien se kami nga Nerĩn muloli mĩrres pa tevi demat nga mubböli kortoni kami. <sup>4</sup> Kami kamirpe niben sansan, ko Nerĩn sansan elik livö ne kami. Ko Atua everuse kami nga kamok-tiriv tweni nanu sansan kobbong, nabong se Kristo nga pia-luvi vini reŕgen. <sup>5</sup> Ko Numal se kerr kele evi sansan, ko nosurien se kerr nga rramosuri evi sansan, ko baptaesen nga marpptaese kami evi sansan. <sup>6</sup> Ko Atua, nga mivi Tata se jinibb pẽtpeti nir, ni kele evi sansan. Ko ni ean wor mare re jinibb jille nir, ko emajing rrrurrgi jinibb jille nir. Ko ni elik livö ne jinibb jille nir.

<sup>7</sup> Ko Kristo ela merrenien tevi kerr sisamis pusorsan tevi nga ni mimarong. <sup>8</sup> Nale san suri nanu ngok oto reŕge Naul On, nga muwra 'Daron nga ni mian mare re melrin, ko ni etkai kele devje nuval sen nir nga mĩasie pa nir. Ko re wosenen ela merrenien nir tevi jinibb nir.' <sup>9</sup> Ko iok, nga muwra 'mian mare' iok, eviseni nga ni ean ngatan womu re nolo dan. <sup>10</sup> Ko ni nga mian ngatan ngok evi ni nga mian kele mare asi pẽtpeti melrin, nga ni puwun saut re nanu pẽtpeti nir nga Atua mulolir.

<sup>11</sup> Ko merrenien ngok nir nga mĩlair arivi derteren lele. Elai derteren tevi jinibb sopor nga parivi aposol. Ko elai derteren tevi jinibb sopor nga parivi propet. Ko elai derteren tevi jinibb sopor nga parwera tweni noŕŕen nga mĩrres. Ko elai derteren tevi jinibb sopor nga parivi jinibb nga parmetmete kalesia nir. Ko elai derteren tevi jinibb sopor nga parvisviseni kalesia nir. <sup>12</sup> Kristo ololi erpok nga jinibb sen nir parviter parmajing se kalesia nir, ko nga nibe Kristo nga mivi kerr kalesia purujruj pĩrres kele wor, <sup>13</sup> pianan pijpari nga kerr jille rraprut kokorti reŕge nosurien pisansan, ko nga rraprongwos alje Natu Atua, rraprus rraplep pĩrres pusorsan tevi Kristo, ko rrapivi vajin jinibb tera mawos. <sup>14</sup> Ko niko, setemun rrapirpe bipiwarreng, ko setemun rrapirpe jinibb san nga daptap ne dis marsilsileni rreknga nga ling mokuwi petpate. Nevisvisenien se jinibb nga marivi botgerisen arwera

parloli pīrpok. Nir arok-majing nanu elep nga pārevreivi tweni jinibb nir. <sup>15</sup> Ko kerr ma, rrapok-rij re weretunen rengo merrenien se kerr; ko rrapmaur pijpari nga rraporsan pētēpeti tevi Kristo, nga mivi batun. <sup>16</sup> Ko Kristo ololi kerr jijle nga rramirpe ni niben, rramijijipti erres. Ko niko, poro nga murrmurrun jijle nir re niben ngok parmajing kokorti pīrres, ko niben toklai pimaur pīrres, ko pilep rujruj kele wor rengo merrenien.

### *Liken nga mimerr se kami*

<sup>17</sup> Ko niko, re nise Numal, nusur metue kami: setemun kapok-lik pirpe jinibb ne vare nir, nga marvijuri norrorrmien ser nga marlengeng. <sup>18</sup> Norongwosien se emalik, ko arrelenge nanu suri nolor nga marsiror ore, suri armusus temijjal parunge nale se Atua. Ko niko, arlik ngasue mauren nga Atua moklai. <sup>19</sup> Setemun arongrongwos suri nanu nga marsij nga marok-lolir. Ko aroji nesevin nir, ko arloli karkar nanu nga marsij nir. Ko armerreni temijjal nga parloli murrun jijle nir nga sete marwokwok. <sup>20</sup> Sel se Kristo nga marvisviseni kami ren sete erpok. <sup>21</sup> Ko kamrunge ko pa nale sen, ko arvisviseni ko pa sel sen tevi kami, suri kamivi kalesia. Suri weretunen oto rengo Kristo. <sup>22</sup> Ko niko, kapla tweni liken tera se kami nga womu, nga kammerreni sarrsarr nanu nga marsij nir, ko sete kamrongwose nga kami kammosoksok rer. <sup>23</sup> Ko kaploli Atua pīrieni norrorrmien se kami pivini pimerr pētēpeti. <sup>24</sup> Ko kapla liken nga mimerr nga Atua muloli mivi se kami, nga musorsan tevi ni liken sen. Liken nga mimerr ngok, osorsan erres, on erres, ko eplari re weretunen kobbong.

<sup>25</sup> Ko pīrpok ko, kapla tweni nale gerisen nir, suri kerr jijle rramirpe murrmurrun ne niben sansan; ko Naul On owra 'Kami kaprij re weretunen tevi kami.' <sup>26</sup> Ko Naul On owrai kele, 'Poro nga kaplolar, ko sete kaploli nanu nga pīsij suri ren.' Sete kaploli lolaren se kami puto pijpari nial pian ngatan. <sup>27</sup> Ko niko Demij daron sen pijkie. <sup>28</sup> Ko jinibb nga mokvevna setemun pokvevna, ko pīmajing majingen re nevren rengo nanu nga marres nir. Ko niko purongwos pīlai tevi nir nga neverr mumrrol rengo nanu san. <sup>29</sup> Ko nale nga nīsij sete pipari re jingo kami, ko nale nga nīrres kobbong, nga murongwos pīrres re jinibb sisamis parmerreni. Ko niko, kamrongwos kaplumi nolor pīrres ren. <sup>30</sup> Ko sete kaploli Nemīn se Atua purnge pīsij. Suri Atua ela Nemīn sen tevi kerr, erpe oto ore kerr pijpari nabong nga pia-juri lululweni pētēpeti kerr. <sup>31</sup> Sete nolo kami pubbubuj, ko sete kaplolar

rragrag, ko sete kapkikail rengo balpalen. Ko sete kaprij pīsij tere jinibb san, ko sete kapsisij tevi kami. Murrun ngok nir paruj ngasue kami. <sup>32</sup> Ko kaprresres tevi kami, kaprrorrorrmi kami, ko kapteltelasi lululweni kami, pusorsan pirpe Atua etlasi tweni pa nololien se kami suri Kristo.

## 5

### *Rraplik re moron*

<sup>1</sup> Ko pīrpok ko, kaploli rrongrongvi murru Atua, suri kamivi ni natun nga mimrreni kami milep. <sup>2</sup> Merrenien pivi ko wor nanu nga milep rengo liken se kami, pusorsan tevi merrenien se Kristo nga mimrreni kerr. Ko ni elai mauren sen esre pa kerr, erpe sulsulen san nga marsuli van ji Atua nga mapun nīrres.

<sup>3</sup> Ko murrun nga norman muoji nesevin, ko murrun nga nesevin muoji norman, ko murrun jijle nir nga sete marwokwok ko murrun nga marmmerreni nawon nanu, arivi lat on ko pa. Sete kaplolar, ko sete kapsupsufer kele. Pīrpok erres kobbong re jinibb on nir. <sup>4</sup> Ko sete omomsawos nga kaprij nale nga marsij nir, nale ne lenglengen nir, ko nale sopsofen nga marsij nir. Omomsawos ma nga kapokwera "erres" tevi Atua. <sup>5</sup> Kaprongwose nanu ngel pīrres: jinibb jijle nga marok-oji nesevin, ko jinibb jijle nga marok-loli murrun nga sete marwokwok, ko jinibb jijle nga marok-merreni nanu jijle (ko iok erpe arvijuri nanu ngok nir arirpe atua ser nir), sete milnger putoe rengo batun vanu se Kristo ko se Atua. <sup>6</sup> Sete kaploli jinibb san pīkrekrasi kami tevi nale lenglengen sen. Suri nanu ngok ko pa nir, lolaren se Atua pia-pelari re nir nga marong tweni ni nale sen. <sup>7</sup> Sete kapan kapkorti tevi nir pisan, pijki. <sup>8</sup> Suri bonevis kamlik re nat nga mimalik, ko lelingenok vajin kamlik re moron suri kamkorti pa tevi Kristo. Ko niko, liken se kami pusorsan ko wor tevi jinibb ne moron. <sup>9</sup> Wenen se jinibb ne moron eplari re nanu jijle nga marres, nga mokloli nanu jijle nga marmawos, ko nanu jijle nga marivi weretunen. <sup>10</sup> Ko kaplak pīterter kaprongwose sev nga Numal mimrreni. <sup>11</sup> Ko sete kappitevi nir nga marmajing majingen nir ne nemalik nga wener marjiek. Ejki, ko kaploli ma jinibb nir parlesi wose nga majingen ser arsi. <sup>12</sup> Sev nga nir marloli teptepie, rramsupsufer kobbong, ko rrammanun pae ko. <sup>13</sup> Ko daron nga moron mimor vaseni nanu san, ko arlesi wose vajin evi nanu nga mirpese ko, nīrres rreknga nīsij. <sup>14</sup> Suri nanu jijle nga moron mimor vaseni arirpe vajin moron. Niko nubo san muwra

'Kupmera, nik nga kummatur  
Kuptur imare re mijen  
Ko Kristo pia-mor vasenim.'

<sup>15</sup> Ko ngok, kapmetmet re liken se kami. Sete kapirpe jinibb lenglengen, ko kapirpe ko wor jinibb san nga norongwosien sen mutoe. <sup>16</sup> Kapmetmet re nabong jijle, sete san piyasi nawon, suri lelingenok evi daron san nga n̄isij pa. <sup>17</sup> Ko ngok, sete kaplengle, ko kaprongwose p̄irres sev evi marongen se Numal. <sup>18</sup> Ko sete kapmini p̄elak norro. Ngok puloli murrun karkar parpelari ko. Ko kapwun saute Neñin kobbong. <sup>19</sup> Ko daron nga kamrijrij tevi kami, ko kapla nale ne Sam nir, ko nubo nir nga kalesia nir marok-lair, ko nubo nir nga marsurövi Atua rer. Kapla nubo lele nir, ko nubo ne Sam nir, nga kapsurövi tevi nolo kami. <sup>20</sup> Ko kapok-wera "erres" tetajer tevi Atua Tata suri nanu p̄etp̄eti nir nga marpelpelari, rengenise Numal se kerr Iesu Kristo.

#### *Murrun ne totkoien*

<sup>21</sup> Kapok-osuri kami, suri kamosuri Kristo. <sup>22</sup> Nesevin nir nga kamlik ji diwen se kami nir, kaposuri diwen se kami nir, pirpe nga kamosuri Numal. <sup>23</sup> Suri diwen sen owomu re nesen sen, pirpe Kristo owomu re kalesia nir. Ko ni okla mauren tevi nir, nga marirpe ni niben. <sup>24</sup> Ko erpe kalesia nir arosuri Kristo, pipok ko nesevin ser nir parosuri diwen ser rengen nanu jijle nir. <sup>25</sup> Ko kami diwen ser nir, kapmerreni nesen se kami nir, pirpe Kristo mimrreni kalesia nir ko ela mauren sen tevir sere. <sup>26</sup> Kristo ololi erpok nga kalesia nir paron p̄irres, daron nga m̄illa nale sen tevir. Re iok erpe ejivler e nuwi nga parwokwok. <sup>27</sup> Kristo ololi erpok suri owra p̄ila lweni kalesia nir tevi ni lweni rengen nosrövien, pirpe jinibb san m̄itka nesen sen. Ko owra kalesia nir parirpe narrlu mete nesenwarreng san nga n̄irres p̄elak, nga niben sete mimeriri ko namot nen ko nanu nga marsij mirpok kele nir arjiki re niben. Ko pipok ko, Kristo owra kalesia nir paron ko parwokwok p̄irres. <sup>28</sup> Ko niko, diwen ser nir parmerreni nesen ser nir pirpe nir lululweni niben. Jinibb nga mimrreni nesen sen eviseni nga emrreni lweni ni. <sup>29</sup> Sete jinibb san ongasi ni niben lweni, ejki, ko okwungani ko okmetmete erres. Ko erpok kele, Kristo emetmete kalesia nir, <sup>30</sup> suri kerr rramivi murrmmurr ne ni niben. <sup>31</sup> Naul On owra 'Ko niko jinibb san p̄ilngilngi tata sen ko tasu sen ko pukorti tevi nesen sen, ko nuru korti porini porivi niben pisansan vajin.' <sup>32</sup> Rrek murrun nga milep san oto silveni wor re nale ngok, ko inu nulesi erpe ospe suri murrun se Kristo tevi kalesia nir. <sup>33</sup> Erres

kobbong, ko kami jijle kapmerreni nesen se kami pirpe kami lululweni, ko nesevin nir parosuri kele diwen ser nir.

## 6

#### *Murrun ne metka*

<sup>1</sup> Bipiwarreng nir, kaprunge nale se tata ko tasu, suri kamivi pa kalesia, ko suri murrun ngok omomsawos erres. <sup>2</sup> Naul On owra 'Kuposuri tata som ko tasu som'. Ko ngok evi womujnen re nale nesesreien nga nale rijrijen san muto tevi, ngel: <sup>3</sup> 'Ko niko, p̄irres rem, ko kuplik pipriv iel ngatan.'

<sup>4</sup> Ko kami tata nir, sete kaploli kele natu kami parlolarsi kami. Ko kaptor pipi p̄irres tevi bipiwarreng se kami nir; kapeter parmomsawos, ko kapvisvisenir pirpe Numal mokete ko mokvisviseni kerr.

#### *Murrun ne jinibb ne majingen nir ko numal ser nir*

<sup>5</sup> Kami jinibb ne majingen nir, kaprunge nale se nir nga marivi numal se kami iel ngatan. Kaposurir p̄irres tevi metutuen ko tevi nolo kami p̄etp̄eti, pirpe kamosuri Kristo. <sup>6</sup> Sete kapok-majing p̄irres re bbong daron nga numal se kami marlik e, nga nir parunge p̄irres nawon re kami. Ko kapmajing ko wor pirpe jinibb ne majingen se Kristo nga marmajing n̄irres se Atua tevi nolor. <sup>7</sup> Ko kapmajing tevi nolo kami nga mivi weretunen, erpe kammajing se Numal ko sete se jinibb kobbong nir. <sup>8</sup> Kamrongwos pae nga Numal pia-kele lweni jinibb jijle nir pusorsan tevi majingen nga marres ser, poro parivi jinibb ne majingen rreknga poro sete parivi jinibb se numal san.

<sup>9</sup> Ko kami numal nir, kami kele kaploli pipok kele tevi jinibb ne majingen se kami nir, ko sete kapsorponir. Suri kamrongwos pae nga Numal se nir ko se kami kele oto re melrin, ko ni setete okloli erres tevi jinibb sansan, ko okloli osorsan tevi jinibb p̄etp̄eti nir.

#### *Rramok-palpal tevi Demij*

<sup>10</sup> Ngel evi bongsi nale suk: kapterter rengen Numal ko rengen derteren sen nga milep temijpal. <sup>11</sup> Kapuri sunsun p̄etp̄eti ne nuval nga Atua m̄ilair pa tevi kami, ko ngok kapviter vajin nga kaptur p̄iterter tere sel ne gerisen lele nir se Demij. <sup>12</sup> Suri sete rramok-tertere jinibb, ejki. Rramok-tertere numal nga marlelep nir se demij nir, nir nga marok-metmete nemalik ne iel ngatan, ko neñin nir nga marsij re melrin. <sup>13</sup> Ko niko kapuri sunsun p̄etp̄eti ne nuval nga Atua m̄ilair pa tevi kami, nga kapviter nga kaptur p̄iterter re nabong nga n̄isij. Ko vitunen, daron nga kamval jile, ko kaptur p̄iterter malum kobbong.

<sup>14</sup> Ko pīrpok ko, kaptur lilane tera nuval. Kaploli weretunen pirpe netatuw se kami. Ko murrun nga mumomsawos mīrres pirpe puto ore morko kami. <sup>15</sup> Ko nospēn nga mīrres nga mokla demat, nga kamtur tera kapwerai tweni, pirpe but nga kamrae. <sup>16</sup> Ko nanu nga milep nga kaplai evi nosurien, nga mirpe nanu san nga milep miteberber nga kaptori ore nibe kami e daron nga Demij muwra pīlwe kami. Ko ngok neliw sen nga marsij nga marin mirpe nabb sete parjipari kami sōpon. <sup>17</sup> Ko murrun se Atua nga mokla mauren tevi kami erpe nuvan ne balpalen. Kaplai kapuri re batu kami. Ko nale se Atua erpe nesip nuval nga Nemīn On mīlai tevi kami. Kaplai ko kaptori metmete.

<sup>18</sup> Ko renge nanu jīle nga kamlolir, ko kaplot, ko kapngoni Atua pīptevi kami. Ko tetajer, kaplot renge derteren se Nemīn On. Ko kapmetmet kapkulkulu pīrres, ko sete kapmosi nga kaplot suri kalesia pētpēti nir. <sup>19</sup> Ko kaplot kele suri inu nga daron nga bowra tweni nale se Atua, ko Atua pīla nale sen mawos tevik nga bowrai tweni. Ko sete bemanun nga bospē jir suri nospēn nga mīrres nga bonevis muto teptepi. <sup>20</sup> Inu nuvi jinibb ne bowra tweni nospēn nga mīrres ngok, ko nile marwirrek re naim ne nekaien ngel. Kaplot nga bololi nok pīterter. Iok osorsan kobbong nga inu bololi.

*Bongsi nale se Pol*

<sup>21-22</sup> Numrreni kaprongwose nospēn nek, ko sev nga nomok-lolir, ko niko nukoni pa Tikikas vinuk ji kami. Ni evi niaken se kerr san nga rrammerreni, ko evi kele jinibb ne majingen se Numal nga mok-majing lilane. Ko ni, poro pivinuk, ko pia-wera tweni nanu jīle ne nospēn nek. Ko pia-wer jilijle kele nolo kami.

<sup>23</sup> Nurongwose nga Atua Tata ko Numal Iesu Kristo porlai demat ko merrenien ko nosurien tevi kami niaken suk nir. <sup>24</sup> Ko nurongwose kele nalol nga mīrres se Atua puto tevi kami jīle nga kammerreni Numal se kerr Iesu Kristo tevi merrenien nga sete orongwos pusuw. Nuwra “Remse kami jīle.”

**Naul nga Pol Muli tevi  
Kalesia Nir renge  
PILIPAE  
Batu nale nga mivsvseni  
lut nga parmeteni naul  
ngel puto suri**

Pilipae evi ngaim rreknga taon san renge vanu ne Masetonia. Ko iok Pol etipatun majingen sen nga mīmajing ji dosalsal nir nga marlik renge Iurop. Ko daron nga muli naul ngel tevir, ko ni elik renge naim ne nekaien iak Rom. Ko rramlesi nolon sete evitan, ko neiren sen owun saut malum kobbong, ko evijuri malum sel nga mīrres nga Kristo miviseni. Ko owrai tevi nir nga nir kele parirpok ko wor renge nanu nga marsij nir nga marok-pelpelari ji nir. Ko ni owra kele erres wor tevi nir suri merrenien nga marlai tevi, ko owra Atua pīlai nanu pētpēti nir nga poro nevrer marmumrrol rer.

*Pol owra erres tevi nir*

<sup>1</sup> Inu Pol ko Timoti nomorivi jinibb ne majingen se Iesu Kristo, nomorwera 'erres' tevi kami nga kamivi jinibb se Iesu Kristo renge iok Pilipae. Ko nomorwera kele 'erres' kele tevi kami nga kamok-metmete kalesia nir, ko tevi kami nga kamok-majing ser. <sup>2</sup> Nurongwos mae, merrenien ko demat se Atua Tata se kerr ko se Numal Iesu Kristo puto tevi kami.

*Pol oklot suri nir nga renge Pilipae*

<sup>3</sup> Nomok-wera 'erres wor' tevi Atua tetajer ne morrorrmi kami. <sup>4</sup> Ko renge verusen suk pētpēti nir suri kami jijle, nomok-ir kobbong rer. <sup>5</sup> Nomok-ir mirpok ngok suri nga kamkorti erres tevik renge majingen ne nospen nga mīrres suri Iesu Kristo, re nga kamok-la nanu tevik, mītipatun re nabong womunen mijpari lelingenok. <sup>6</sup> Nurongwose erres nga Atua nga mia-majing rrongvi majingen nga mīrres sen livó e kami pia-vinvini ore ko wor renge nabong nga Iesu Kristo pia-luwi vini ren. <sup>7</sup> Ko erpok erres kobbong osorsan nga bowrai pirpok tevi kami jijle, suri nomok-rorrmī kami tetajer renge nolok, ko suri renge nalol nga mīrres se Atua, ni elngi kami jijle kappitevi inu renge majingen ne nospen nga mīrres. Rramkorti nga rramwera tweni nospen nen puto pīrres limjer nga jinibb jijle parlesi evi weretunen. Ko sete kamieli lingi inu epari lelingen ngel nga marsere totoni inu. <sup>8</sup> Atua orongwos puwrai nga nuwretun, numarong elep

βelesi kami jijle. Numrreni kami tevi merrenien weretunen se Iesu Kristo.

<sup>9</sup> Ko verusen suk suri kami erpel, nga merrenien se kami purujruj pilep malum tevi norongwosien nga kaprongwos alje nanu nga marres ko nanu nga marsij. <sup>10</sup> Kaprongwose vajin kaptobbobbue sel nga marres nir. Ko re murrun ngok, renge nabong nga vitunen nga Kristo pia-wera suri lat nga puto suri tevi jinibb jijle ren, ko kami mauren se kami puwokwok jijle pīrres vajin, ko sete jinibb pisan purongwos pīwer ngusngasi kami. <sup>11</sup> Ko kapwun saute wenen nga marres renge murrun nir nga marsorsan mīrres nga marpelari renge Iesu Kristo. Ko jinibb nir parsurōvi vajin nise Atua ko parsusi nisen pian mare.

*Pol elik re naim ne nekaien, ko majingen ne nospen nga mīrres etajer van malum*

<sup>12</sup> Numarong kami niaken suk nir kaprongwose pīrres nanu ngel le: nanu nga marsij nir nga marpelari ji inu sete artor ore sel nga parwera tweni nospen nga mīrres, ejki, ko arwilwil se nospen nga mīrres kobbong. <sup>13</sup> Suri jinibb ne nuval nir nga marok-metmet suri iel, ko nir pētpēti nga marlik iel renge naim se numal ser, arongwos pae nga marsere totoni inu suri bbong nomok-majing se Kristo. <sup>14</sup> Ko suri kele nir eleplep lingir renge kalesia niaken se kerr, nolor arterter kele wor renge Numal. Ko setemun armetutu mun, ko tetajer arok-asasi rer nga parlingi nor van nga parwera tweni nale se Kristo.

<sup>15</sup> Ewretun, nir sopor arok-wera tweni nale se Kristo suri nolor eleplep suri inu, ko arwera parloli inu βelik pīsij suri. Ko nir nūnij nen ma nir arok-wera tweni nale se Kristo re nolor nga marres kobbong, <sup>16</sup> ko suri merrenien ser. Suri nir arongwos pae nga Atua elngi inu iel nga bowra tweni nospen nga mīrres puto limjer. <sup>17</sup> Ko nir nūnij arok-supe nospen se Kristo re nolor nga sete marres, nga parsusi lweni nir imare kobbong, ko arwera parloli inu βelik pīsij kele wor renge naim ne nekaien ngel.

*Mauren weretunen nibe?*

<sup>18</sup> Ko erres kobbong! Erres nga parwera tweni nospen se Kristo, poro piplari renge nolon nga mīsij rreknga renge nolon nga mīrres. Ko nuir kobbong suri. Ko beair kele, <sup>19</sup> suri nurongwos pae nga inu bea-tela ivare bea-ivel sisarow vajin, suri verusen se kami ko suri nga Nerūin se Iesu Kristo nga moklila se inu. <sup>20</sup> Nanu sansan kobbong nga nurongwose pia-pelari, nga mēlngi norrorrmien suk rengen, ngel: nga sete inu mea-vitan nabong san renge majingen suk, ko nga βelngi nok van ren. Ko erpok, jinibb jijle nir parsurōvi Kristo

suri nanu nir nga marpelari ji inu lelingenok pirpe nabong jijle, poro nga bemaaur rreknga poro nga parevji pinik iel re naim ne nekaien.

<sup>21</sup> Batu mauren weretunen nibe ko? Nga inu nen oto renga Kristo. Niko, erres ðelak poro nga bemij, ko ban vajin ðelik tevi. <sup>22-23</sup> Ko poro nga ðelik re mauren ne ngatan ngel, ngok orongwose wenek nen piwen e majingen nga marres. Erpe nuvini re mesekle sel suk, ko inu sete nurongwose sel ngabes nen erres renga nuru nga inu botobbttobue. Re inu kobbong, numrreni bevel lingi mauren ngel ko bean ðelik tevi Kristo. Ngok erres temijpal womu ne sel tuwen. <sup>24</sup> Ko poro pirpok, ko si pimetmete kami? Rrek erres ðelak malum poro nga ðelik malum re ngatan ngel tevi kami. <sup>25</sup> Nurongwose emawos erpok, ko niko ðelik ko pa. Bepatevi kami jijle nga bololi nosurien se kami purujruj pilep kele wor tevi neiren. <sup>26</sup> Ko niko, poro nga ðelik kele tevi kami vajin, ko kamrongwos kapwera, 'O, Pol ololi majingen nga mürres temijpal. Rrapsurövi Iesu Kristo ren.'

#### *Rraptur ðiterter ko rrapval*

<sup>27</sup> Ko re lelingenok, nanu nga milep evi nga liken se kami ðirres pusorsan tevi nga marwera tweni renga nospen nga mürres se Kristo. Ko ngok, poro nga bea-vinuk bea-lesi kami, rreknga poro nga pia-jiki ko bea-runge kobbong nospen suri kami, bea-rongwose nga kamlík eterter, ko kamkorti erres renga norrorrmien nga mivi sansan e. Ko kappalpal vajin pirpe jinibb pisanan suri nosurien ne nospen nga mürres. <sup>28</sup> Ko bea-rongwos pae nga setete kammetutue devje nuval nir. Ko murrun ngok nga sete kammetutue nir piviseni nir nga nir para-jijki, ko kami kapa-maur. Suri Atua pia-la mauren tevi kami. <sup>29</sup> Ko renga nalol nga mürres se Atua, ni elngi kami nga kaposuri Kristo, ko nga kaplesi kele norongen nga mürsij suri ni. <sup>30</sup> Ko ngok lelingenok erpe kamtur pa vajin tevi inu renga balpalen suk nga kamlesi bonevis mēpalpal ren, ko nga kamrunge nomok-palpal malum renga.

## 2

*Pol owra parlik renga merrenien, gor-tien nen, ko lolmalum nen*

<sup>1</sup> Erpese renga kami? Mauren nga kam-lai renga Kristo okloli nolo kami eterter? Murrun se Atua nga mokmerreni temijpal kerr e okjinge kami? Nemün On okkorti tevi kami erres? Kamok-loli erres tevi kami ko kamok-rrorrmii kami? <sup>2</sup> Poro pirpok, erres, ko kaploli neiren suk pilep temijpal, pirpel: Kaploli norrorrmien se

kami pivini lat sansan, ko kami jijle kap-mermerreni kami. Kaploli nolo kami parini parivi sansane. <sup>3</sup> Sete kami san puloli nanu san nga pususi lweni ni imare kobbong, pijki rres, rreknga nga pulololi lweni ni e. Ko renga nolo kami nga mian ngatan mürres, kapmeteni jinibb münij nir pirpe parres asie kami. <sup>4</sup> Ko sete kapmetmete nanu nga marivi se kami kis, ko kapmetmet lululwenie nanu jijle nga marivi se kami jile nir.

<sup>5</sup> Kaploli nolo kami pirpe nolo Iesu Kristo. <sup>6</sup> Iesu tetajer osorsan tevi Atua, ko sete orrorrmi nga owra purull totkoni nanu ngok, ejki. <sup>7</sup> Elngilngi tweni nanu ngok nir, ko eak iel ngatan, ko rramlesi osorsan tevi jinibb vajin. Ko ololi lweni ni vajin osorsan tevi jinibb ne majingen san. <sup>8</sup> Ololi nolon ean ngatan temijpal ko osuri Atua, ejpari mijen sen nga mürsij renga nai pelaot. <sup>9</sup> Ko suri nanu ngok, Atua osusi ni ean mare temijpal, ko ololi ewaji nais nga mian mare jijle re nais nir. <sup>10</sup> Ko ngok, renga nise Iesu, jinibb jijle nir para-jipa baur ngatan, anglo ne melrin nir, ko jinibb nir ne iel ngatan, ko jinibb nir nga marmij martevnir pa ngatan. <sup>11</sup> Ko nemer jijle para-wera tweni nga Iesu Kristo evi Numal, ko parsurövi Atua Tata renga ni.

#### *Kami kamirpe moron ne iel ngatan*

<sup>12</sup> Ko ngok, selek nir nga memrreni kami, kapvijuri inu ðirres. Kamloli pa erpok daron nga mēlik tevi kami, ko kaploli ko wor pusorsan kele lelingenok nga mēlik ngasue kami. Atua elai pa mauren tevi kami. Ko kapmetutu ko kapririr renga majingen se kami nga kammajing tweni wenen nga mürres nen renga mauren se kami. <sup>13</sup> Suri Atua kobbong okmajing re nolo kami nga puloli kapmarong ko kapterter nga kaposuri ni marongen sen.

<sup>14</sup> Sete kapwer ngusngasi, ko sete kapwera lweni "O, esij" daron nga marlai majingen san tevi kami. <sup>15</sup> Ko niko kapwokwok ðirres, ko nanu nga mürsij pijki re nolo kami. Kapirpe natu Atua nir nga marres ðetðeti, nga kamlík liven ne dul nga marsij ðerðer. Liven ne nir, kapmor pirpe moju renga iel ngatan. <sup>16</sup> Ko kapsupsupe nale ne mauren tevi nir. Ko niko, re nabong nga Kristo pia-luwi vini ren, ko inu ðeir re kami, suri sete woluen suk nga mowlu renga evi woluen nawon, ko sete ðelaken suk evi ðelaken nawon.

<sup>17</sup> Ko pesveni poro nga parevji pinik. Iok pirpe parjivreni drrak renga nosurien se kami nga mutone renga nawot ne sulsulen se Atua. Ko Atua purnge mapun ðirres. Ko inu ðeir ren, ko ðeir korti tevi kami jijle. <sup>18</sup> Ko kami kele kaðir ko wor, ko kaðir korti tevi inu.



*Pol orrorrmi pukoni Timoti van jir*

<sup>19</sup> Poro nga Numal Iesu pimarong, nuwra bokoni Timoti sete ngasu pivinuk ji kami. Ko numrreni ni pia-la lweni kele nospen ne kami vini jik, puloli nolok pumolmol pirres. <sup>20</sup> Sete jinibb san erres emawos erpe ni. Ni okrorrmi weretune kami. <sup>21</sup> Jinibb jikle arrorrmi lweni nir kob-bong, sete arrorrmi suri nanu nga marivi se Iesu Kristo. <sup>22</sup> Ko kami kamrongwose, Timoti murrun erres, ko eptevi inu rengo majingen re nospen nga murrer erpe natun miptevi tata. <sup>23</sup> Ko niko, nurrorrmi bokoni ni vinuk ji kami re daron momsawos nga borongwose lut nga putu suri tevi inu. <sup>24</sup> Ko nurongwos kemkamie erres nga poro Numal pimarong, ko sete ngasu inu kele bevinuk.

*Pol orrorrmi nga pukoni tweni Epaprotetaas van jir*

<sup>25</sup> Inu nurrorrmi pa osuw nga bokoni kele merel Epaprotetaas pulwi vinuk ji kami. Ni evi niaken se kerr san nga komru nomorok-majing kokorti, ko nomorok-val kokorti. Kamkoni ni vini bonevis nga piwilwil se inu re majingen. <sup>26</sup> Ni emarong lengleng nga pilesi kami, ko ornge esij nga kamrunge ni mimsi. <sup>27</sup> Ewretun, ni emsi, ko otomori pimij. Ko Atua orrorrmi ni; ko sete ni kis, inu kele. Suri poro nga ni pimij, ko inu nolok purnge p̄isij kele wor. <sup>28</sup> Ko niko, numrreni lenglengen nga bokoni ni vinuk ji kami, nga kami kapir kele daron nga kamlesi, ko inu kele sete borng p̄isij. <sup>29</sup> Ko kami kaplesi ni tevi neiren nga milep, erpe niaken san rengo Numal. Ko kaposuri jinibb nir nga marirpe ni. <sup>30</sup> Suri ni otomori pimij suri majingen se Kristo, ko emajing tama se inu rengo majingen nga kami sete kamrongwos kaploli.

**3***Murrun nga momsawos murrer*

<sup>1</sup> Niaken suk nir, bevnivni ore nale suk iel: Kapir rengo Numal. Nga boli viringsi kele nanu nga moli womu sete evi belaken tevi inu, ko puloli kami kaprrreleng kapsarr ren.

<sup>2</sup> Kapmetmet pitertter ko wor rengo but-terter nir nga marok-loli m̄isij ko nga marwera paron tertere kami kapan rengo bae ser. <sup>3</sup> Suri kerr rraman pa rengo bae nga mivi weretunen, ko Nermin On eptevi kerr daron nga rramlot. Ko rramlololi kerr e rengo Iesu Kristo, ko sete rramlingi nolo kerr rengo nanu san nga muto rengo nibe kerr, erpe bae.

<sup>4</sup> Ewretun, inu nurongwose belngi nolok rengo nanu nga marirpok nir. Poro jinibb pisan purrorrmi p̄ilngi nolon rengo nanu nga jinibb bbong marlingi nawone mirpok,

ko inu kele beasi wore ni. <sup>5</sup> Inu nuvi drra sansan tevi meri Isrel nir, ko nuplari rengo metka se Benjamin. Re bongik muowil, nuan pa re bae, osorsan tevi murru meri Isrel nir. Ko re devjen ne nale ne nesereien se meri Isrel nir, nutori eterter temijpal, suri nuvi san rengo gortien ne Parasi nir. <sup>6</sup> Ko nuasi pelak re iok, ko nuoji kalesia nir vajin. Ko nusorsan nurrer p̄etp̄eti re devjen ne nga mevijuri nale ne nesereien.

<sup>7</sup> Ko re womu, nulesi nanu ngok nir arres; ko re Kristo vajin, nulesi arirpe nanu nga marsij kobbong. <sup>8</sup> Ko sete nanu ngok kis kobbong. Nulesi nanu p̄etp̄eti nir arirpe arsi, suri nga nurongwose Iesu Kristo, nga mivi Numal suk. Ko ngok evi nanu nga murrer asi nanu p̄etp̄eti nir. Suri re Kristo ko nuwir tututweni nanu p̄etp̄eti nir, suri daron nga memteni viringsir tevi Kristo, arirpe nubus kobbong. <sup>9</sup> Numrreni bokorti pirres tevi ni. Setemun bep̄lak nga bevijuri sel ne nale ne nesereien nga bololi lweni inu bosorsan pirres, ejki. Ko bosorsan pirres suri bbong nosurien suk nga muto rengo Kristo. Ko iok evi sel nga Atua kobbong muloli nga jinibb san pusorsan pirres ren, suri nosurien sen. <sup>10</sup> Nga ngok kobbong numrreni vajin, nga borongwose Kristo pirres, ko nga bebbolji derteren se Atua nga muloli Kristo mimaaur luwi re mijen. Nuwra bokorti tevi ni re nga inu kele nibek purnge p̄isij pirpe ni, pijpari nga bea-mij kele pirpe ni. <sup>11</sup> Ko ngok Atua pia-loli inu kele vajin bea-maur luwi re mijen.

*Pol eplak malum, owl tweni norrngov*

<sup>12</sup> Sete nurongwos bowra nujpari pa nanu ngok nir, ejki. Setewor nuvi jinibb nga mimawos murrer jile wor. Ko nomok-pelak tweni ko wor nga bea-rrul totkoni nanu ngok nir, suri Kristo orrul totkoni pa inu. <sup>13</sup> Niaken suk nir, inu nulesi erpe setewor nurrul totkoni wor, ejki wor. Ko nanu kobbong san nomok-loli, ni le: nomok-mali nanu nir ne bonevis nga marto rengo durek, ko nomok-tortor suri vajin nga belai nanu nga marto rengo nok. <sup>14</sup> Nuplak nga bowlu mawos tweni norrngov ko nowlin. Ko nowlin ngok evi nga Atua everuse kerr nga rrapkorti tevi Iesu Kristo, ko rrapan rraplik sisen mare. <sup>15</sup> Ko kerr jikle nga rramtera murrer jikle, rraprorrmi ko wor pirpok. Ko poro nga san orrorrmi jabble, ko Atua piviseni lweni putu limjer tevi. <sup>16</sup> Ko sev nga rramjipari pa, rraprrul totkoni, ko rrapvijuri ko wor.

<sup>17</sup> Niaken suk nir, kapok-rorongrongvi inu tetajer, ko kapmeteni suri pirres re si nir nga marviseni murrun nga murrer. <sup>18</sup> Ko nale ngel, nuwrai pa nabong elep tevi

kami, ko lelingenok kele, nuwra lweni tevi suwen metek nga mubbun: nir elep arok-loli esij, arlik erpe devje nuval ne murrun nga nai pelaot se Kristo eviseni. <sup>19</sup> Nir arivi jinibb nga parjijki kobbong. Nanu nga bbong nolor marmerrni arivi atua ser, ko arok-lololir e murrun nir nga jinibb non pisij e, ko arok-lingi norrorrmien ser renga nanu nir ne ngatan ngel kobbong. <sup>20</sup> Ko kerr ma nir, rramivi pa jinibb ne melrin, rramivi jinibb gortien nen. Ko rramtiriv Numal Iesu Kristo eterter, nga pia-luwi re melrin vini ko pia-la mauren tevi kerr. <sup>21</sup> Ko ni pia-rieni nibe kerr ne ngatan ngel nga marmelisna, para-irpe ni niben ne nosrövien. Pia-loli piprok renga derteren sen nga milep nga murongwos puloli nanu jijle nir parosuri ni.

#### 4

##### *Pol ela nale sapon tevir*

<sup>1</sup> Ko niko, niaken suk nir nga memrreni temijpal kami ko morrorrmi kami, kaptur pitertir piprok renga Numal. Nomok-ir suri kami, ko bea-la nowlik ji Kristo suri kami.

<sup>2</sup> Kamru Iuotia ko Sintike, inu nungoni tevi kamru eterter nga norrorrmien se kamru puto kokorti pirres pirpe Numal mimrreni. <sup>3</sup> Ko nungoni nik kele, nga kerru rromormajing kokorti pa erres, nga kuppitevi nuru, suri orpelak tevi inu renga majingen ne nospen nga mïrres, tevi kele Klemen ko nir nga marok-majing korti tevi inu. Niser nir, aruli pa renga naul nga maruli nise jinibb nir nga para-lai mauren nga mïrres.

<sup>4</sup> Kañir tetajer renga Numal. Iok bowra lweni kele: kañir.

<sup>5</sup> Kapviseni nolo kami nga mimalum tevi jinibb petpeti nir. Otomori Numal pulwi vini. <sup>6</sup> Sete kaprorrmi pelake nanu san, ko daron nga kamlot ko tetajer kapwera erres wor tevi Atua, ko kapok-ngoni sev nga nevre kami marmumrrol rer. <sup>7</sup> Ko demat se Atua nga mïasi norongwosien se kerr, purrul totkoni nolo kerr ko norrorrmien se kerr renga Iesu Kristo.

<sup>8</sup> Niaken suk nir, bevnivni ore nale suk iel: nanu nir nga marivi weretunen, nanu nir nga maran mare, nanu nir nga marmawos, nanu nir nga marwokwok, nanu nir nga marres, nanu nir nga jinibb marij mïrres suri, murrun nir nga marsorsan mïrres ko nga marsorsan nga rrapusi paran mare, ngok kaplingi norrorrmien se kami renga nanu ngok nir. <sup>9</sup> Ko sev nga kamrunge ko nga kamlai renga nale suk, ko sev nga kamlesi renga liken suk, ngok kaploli surir ko wor. Ko Atua nga mivi batu demat piptevi kami.

##### *Pol owra erres wor tevir*

<sup>10</sup> Nuir elep re Numal nga lelingenok kami kamviseni lweni merrenien se kami tevi inu. Epriv le pa, ko sete kamla merrenien san tevi inu. Kamrorrmi ma inu, ko sel ejki. <sup>11</sup> Sete nuspe nanu ngok suri nevre omrrol renga nanu san, ejki. Suri nurongwos pae vajin belik pirres pirpe moup pa tevi sev nga muto pa jik. <sup>12</sup> Nurongwose belik pirres poro nga jorok puwelili, rrenga poro nga jorok pilep. Renga liken petpeti nir, nurongwos pae belik pirres; poro nga nanen pilep rrenga nanen pijki, poro nga nijor pilep rrenga nijor pijki. <sup>13</sup> Nurongwos belik re liken petpeti nir suri Kristo nga mokla derteren tevi inu.

<sup>14</sup> Ko erres ma nga kamrorrmi inu renga norongen nga misij suk. <sup>15</sup> Ko kami mïri Pilipae, kamrongwos pae nga renga daron ne majingen ne nospen nga mïrres, etipatun daron nga mevel lingi vanu Masetonia, ko kami kamsan kamkorti tevi inu, suri kamok-la nanu tevi inu. Sete kalesia mïnjing kele nir arloli erpok tevik re wosenen. <sup>16</sup> Ko erpok kele, daron nga melik iak Tesalonaeka, ko vavis kis kamok-la nanu nir nga nevre kumrror rer. <sup>17</sup> Sete erpe nomok-rorrmii kis nanu nga Belair ji kami, ejki. Ko nomok-rorrmii wenen nga piplari renga nolo kami nga mïrres suri. <sup>18</sup> Nula pa nanu ngok jile nir, ko nula pelake. Nup pa, suri nulai pa ji Epaprotas merrenien se kami nir. Arirpe sulsulen nga mapun mïrres van ji Atua nga pir ren. <sup>19</sup> Ko Atua pilai petpeti nanu jijle nir nga nevre kami marmumrror rer tevi kami, pusorsan tevi nga mïlengi pa mïasi ji Iesu Kristo re nosrövien. <sup>20</sup> Rrapsturövi Atua Tata se kerr lelingen ngel ko tuwi ngok vini. Piprok ko.

##### *Bongsi nale se Pol*

<sup>21</sup> Kapwera 'Erres' tevi nir nga marivi jinibb nga markorti tevi Iesu Kristo. Niaken se kerr nir nga marlik tevi inu iel arwera 'Erres' tevi kami. <sup>22</sup> Ko kalesia jijle nir ne iel arwera 'Erres' tevi kami, ko mare nen nga marlik renga naim se numal nga milep jer se mïri Rom nir. <sup>23</sup> Merrenien se Numal Iesu Kristo puto tevi neñi kami. Nuwra 'Remse kami'.

**Naul nga Pol Muli tevi  
Kalesia Nir renge  
KOLOSI  
Batu nale nga mivsviseni  
lut nga parmeteni naul  
ngel puto suri**

Pol oli naul ngel tevi kalesia nir nga marlik renge Kolosi, ngaim san ie Esia. Oli suri nevisvisenien gerisen san nga miplari jir. Nir nga marvisviseni nevisvisenien gerisen nen arwera jinibb nir parosuri anglo nir ko parosuri kele nale wowar-reng elep nga marto renge nale nesereien rreknga lo (law) se Moses, ko niko parong-wose weretunen Atua vajin. Ko Pol owra Iesu Kristo esan okla mauren tevi jinibb, ko daron nga marvijuri nale gerisen ngok ko aruj ngasu kobbong e ni. Ko ospē kele suri mauren ser nga marlai renge Kristo, ko piprese renge mauren ser vajin renge nabong jijle. Ko daron nga muli jile naul ngel, ko elai tevi selen Tikikas putori van jir. Ko Onesimas kele eptevi Tikikas, suri re wosenen Pol okoni ni pulwi van ji numal sen Pilimon.

*Pol owra erres tevi nir*

<sup>1</sup> Inu Pol nuvi aposol se Iesu Kristo renge marongen se Atua. Tevi Timoti tasi kerr, <sup>2</sup> nomoruli naul ngel tevi kami mēri Kolosi nga kamivi tasi komru renge Kristo, ko nga kamosuri mūrres renge sel nga muon. Nurongwos mae, merrenien ko demat se Atua Tata se kerr pipatevi kami.

*Pol owra erres tevi Atua suri nir*

<sup>3</sup> Tetajer daron nga nomorok-verus suri kami, ko nomorok-wera 'erres' tevi Atua, Tata se Numal se kerr Iesu Kristo. <sup>4</sup> Suri nomorunge pa nospen nen nga kami kamosuri Iesu miterter, ko kami kammerreni temijpale kalesia nir. <sup>5</sup> Kami kamok-loli murrn ngok suri nga kami kamok-lingi norrorrmien se kami oto eterter renge nanu nir nga Atua mīlgi tera kami re melrin. Nanu ngok nir, kamrunge pa nospen ner womu daron nga kamrunge nospen ne nale weretunen suri Kristo. <sup>6</sup> Nospen ngok epari kami pa osuw. Ko etajer malum, pila wenen renge ngatan ngel totoklai, pusorsan tevi nga miwen pa ji kami musuw, mītipatun re daron nga kamrunge e, ko kamrongwose weretunen merrenien se Atua. <sup>7</sup> Kamrunge womu pae nanu ngel nir ji Epapras, nga mivi sele kerr san nga nomormerreni. Ni evi jinibb nga mokmajing lilane mūrres se Kristo tevi kami. <sup>8</sup> Ko ni owrai pa tevi

komru merrenien nga Nerūin On nūlai pa tevi kami.

*Verusen se Pol suri nir*

<sup>9</sup> Ko suri nospen ngok ne kami, ololi komru nomorverus suri kami tetajer, mītipatun renge daron nga komru nomorunge. Komru nomorok-ngoni tevi Atua nga Nerūin On puloli kapivi jinibb nga kaplesi wose, ko puloli kami kaprongwos alje marongen se Atua. <sup>10</sup> Ko ngok, liken se kami pumomsawos pīrres vajin pirpe Numal mimrreni. Ko puloli mauren se kami wenen putoe renge majingen nga marres nga kamok-lolir, ko puloli kami kaprongwos temijpal kele wore Atua. <sup>11</sup> Ko kapterter pētēpeti pusorsan tevi derteren nga milep se Atua, nga puloli kami kaptur pīterter tetajer malum renge nanu nga marsij nga marokini. Ko kapijir bbong. <sup>12</sup> Ko kapwera vajin 'erres' tevi Tata suri nga muloli kami kamviter kaplai pivsvises nanu nga marres nga mīlgi kortonir nga marto tera jinibb sen nir, re lat nga moron kis muto ren. <sup>13</sup> Ko Atua etka tweni kerr pa renge derteren ne nemalik, elngi kerr renge batun vanu se Natun nga mimrreni. <sup>14</sup> Ko ojri lweni kerr suri Kristo, erpe etlasi tweni nololien se kerr.

*Kristo evi batu nanu jile nga Atua mulolir*

<sup>15</sup> Sete jinibb san orongwos pīlesi Atua. Ko Kristo ma, rramlesi pa Atua ren, suri ni osorsan pētēpeti tevi Atua. Ko Kristo owomu re nanu jijle nir, <sup>16</sup> suri Atua elngi re nevre Kristo nga ni puloli nanu jile parpelari; nanu nga marto re melrin ko nanu nga marto iel ngatan, nanu nga rramlesir ko nanu nga sete rramlesir, ko derteren jile se anglo nir ko se jinibb. Ni lolir, ko arivi sen ko wor. <sup>17</sup> Ko ni owowomu re nanu jile, ko nanu jile arto kokorti erres re ni kobbong.

<sup>18</sup> Ko kalesia nir arirpe nibe Kristo, ko ni erpe batur. Ni owowomu re kalesia nir; ni emaur wowomu re mijen, nga puwowomu re nanu pētēpeti. <sup>19</sup> Suri Atua eir nga pīlgi mauren sen jile renge Kristo, <sup>20</sup> ko eir kele nga Kristo pivi nevren nga puloli ore lolaren se Atua pusuw jerjer. Ko Kristo ololi vajin nanu jile arkorti erres luwi tevi Atua, poro parivi nanu ne melrin nir rreknga nanu ne ngatan ngel. Ololi demat ngok suri drra ne mijen sen nga mīseser renge nai pelaot.

*Kaptur pīterter renge murrn ne nosurien*

<sup>21</sup> Ko bonevis sapon, kami Atua kamturtur telur e kami, ko kamivi devje nuval se Atua, ko kamok-loli majingen nga marsij

nir. <sup>22</sup> Ko lelingen ngel vajin, suri Kristo ololi niben erpe jinibb ko emij suri kerr; niko muloli kerr rramkorti luwi tevi Atua. Ko ololi kami kele kamivi jinibb on nga marwokwok, ko jinibb sete parongwos parok-wor suri kami. Ko Kristo pia-pitevi kami pirkok van re no Atua. <sup>23</sup> Ko ni puloli pirkok poro bhong kaptur piterter renye murrin ne nosurien. Sete kaptur mēmav, ko sete kapruj lingi nanu nga kamoktiriv tweni nga marsuḡe renye nosḡen nga mūrres nga kamrunge pa. Nosḡen ngok, arwerwer ren tevi jinibb jile nga melrin mīsalsal orer. Ko inu Pol nuvi jinibb nga mēmajing ren.

*Pol erpe jinibb nga mēmajing se kalesia nir*

<sup>24</sup> Nomok-runge esij elep renye naim ne nekaien ngel. Ko nuir kobbong, suri erpe nuwosi luwe norongen nga mīsij se kami renye inu nibek. Kristo kele ornye esij elep daron nga ni mīlik iel ngatan. Ko jinibb sen jijle nir arirpe vajin ni niben, ko nir kele parunge pīsij ko wor iel ngatan. Ko erpe inu nuwosi luwe sapon norongen nga mīsij se kami. <sup>25</sup> Ko inu nuvi jinibb nga mok-majing se kalesia. Majingen ngok, Atua ko elngi re inu nevreng nga bēmajing jile e suri kami. Ko majingen suk evi nga bowrai tweni nale sen puto limjer.

<sup>26</sup> Ko nale ngok oto teptepi sia ko sia renye dul ko dul, ko lelingenok vajin Atua ololi eplari limjer jile ji jinibb sen nir. <sup>27</sup> Atua emrreni piviseni tevir nale sen nga muto teptepi ngok, nga musḡe suri nanu san nga mūrres temijpal nga miplari pa musuw renye jinibb ne vanu jijle nir, ngok: Kristo elik pa re kami, ko kamtiriv tweni vajin nga kapa-korti re nosrōvien sen.

<sup>28</sup> Kristo ngok, namok-werwer ren. Namsusur metue jinibb jile ko namokvisviseni jinibb jile renye norongwosien jile nga murrōw nga nabpitevi jinibb jile nir partera pīrres pētpēti renye Iesu van ji Atua. <sup>29</sup> Nuḡlak tweni nanu ngok, nurat suri renye derteren sen nga mūrterter nga moklai tevik.

## 2

*Rraposuri piterter Kristo*

<sup>1</sup> Numarong kaprongwose nga nurat temijpal suri kami ko suri mēri Laotisia nir, ko suri nir jile nga sete marlesi wos wore nibek ko nok. <sup>2</sup> Nurat suri nga nolōr piterter ko pumolmol nga parkorti pīrres renye merrenien. Ngel evi nanu nga mūrres pēlak san: numrreni parongwos alje, parongwos pīrres nga pīrres kemkarē Kristo, nga bonevis nosḡen nen oto teptepi ji Atua. <sup>3</sup> Ko Atua esilveni renye Kristo norongwosien totoklai nga marres.

<sup>4</sup> Nomok-suḡe nanu ngok suri jinibb sopor arok-loli ler erres, ko tarckerkerasi kami. <sup>5</sup> Nulik ngasue kami renye nibek, ko renye nemīk ma, nukorti tevi kami. Ko nuir nga mēlesi kamtur vivōngsur ko kamtur mūrterter renye nosurien se kami renye Kristo.

*Mauren se kami pīrres ko wor renye Kristo*

<sup>6</sup> Erpok, kamlai pa Iesu Kristo evi Numal se kami. Kaploli mauren se kami totoklai vajin pipitevi ni. <sup>7</sup> Kaprrul totkoni ni piterter, pirpe laḡe nai murrul totkoni dan, ko kaptur piterter ren pirpe naim san nga mutur mūrterter renye dan. Ko nosurien se kami pivini ko wor piterter malum tetajer, pirpe nga marvisviseni kami pae. Ko kapwera 'erres' temijpal wor tevi Atua. <sup>8</sup> Kami kapmetmet pīrres, lartul ngok nir tarul totkoni kami re nale nawon ser ko gerisen ser nga marvijuri norrorrmien nawon se jinibb nir, ko sel ne nevisvisenien ne ngatan ngel nir. Sete arvijuri sel se Kristo.

*Kristo kobbong evi batu jinibb nir ko anglo kele nir*

<sup>9</sup> Kristo niben oḡe erpe jinibb, ko mauren totoklai se Atua elik ren. <sup>10</sup> Ko kami kele, daron nga kamkorti tevi ni, ko kamlai mauren totoklai. Kristo owowomu re Numal pētpēti nir ko derteren pētpēti nir. <sup>11</sup> Ko erpok kele, daron nga kamkorti tevi ni, erpe kaman re pa bae ko osuw. Ko iok, sete nusḡe suri bae nga norman mian ngalu marevji, ko nusḡe suri bae nga Kristo mirevji tweni murrū nalōl nga mīsij renye mauren se kami. <sup>12</sup> Ko daron nga marpapaese kami, erpe arḡevni kami tevi Kristo. Ko erpok kele, daron nga kamḡawij luwi re nuwi ngok, erpe kamḡaur luwi tevi Kristo renye mijen, suri kamosuri Atua nga derteren sen ololi Iesu mimaur luwi re mijen.

<sup>13</sup> Ko erpe kami kamḡij pin renye nololien se kami ko renye murrin nga mīsij se kami. Ko lelingenok vajin, Atua ololi kami kamḡaur luwi tevi Kristo. Ni etlasi tweni nololien jile se kerr, <sup>14</sup> ko olokloksi nanu nga maruli kortoni martere kerr tevi nale neseseien nga marwer ore kerr rer, ko ela tweni pētpētir ko owser renye nai pelaot tevi Kristo. <sup>15</sup> Renge nai pelaot ngok, Kristo obbri otvi derteren se jinibb nga marlelep nir ko jinibb nga marwowomu nir renye devjen se Demij. Kristo otorrlair pa osuw, ko ololi tevir erpe Numal san nga mutorrlai devje nuval sen musuw, ko ololi nor arsj, nga jinibb arongwos parmetenir.

*Kristo evi batu kami*

<sup>16</sup> Ko lartul ngok arwera parwer lokloksi kami suri nanen lele nga kamrroi, ko nanu lele nga kammmini. Ko arwera keke kamloli esij nga sete kamtori nabong sopor, ko sete kamtori nanen na navöl muwut rrongvi, ko sete kamtori murrun ne nabong ebutun, nga marmosi ren. Ko sete kapmarong parij pirkok, pijki. <sup>17</sup> Nanu ngok nir, mēri Isrel nir arvijuri tuwi. Ko arjuji bbong Kristo. Ko daron nga Kristo mivini vajin, rramlesli vajin ni sel sen nga mīrres p̄elak asi nanu ngok nir. <sup>18</sup> Lartul ngok nir, norrorrmien ser ean pa mare osuw, suri arlesi nanu sopor re bori ser. Ko arkerkerasi jinibb nir, arwera jinibb nolor pian wor ngatan ko, ko parsurövi wor anglo ko nir. Sete kaplinglingi nir parwer lokloksi kami, parwera kamsij rengen nanu ngok nir. Norrorrmien ser ean mare temijpal, ko pesveni ko. Arok-rrorrmī nanu ngok nir suri murrū jinibb kobbong nir. <sup>19</sup> Ko setemun artori Kristo eterter, ko ni mawos ma evi batu jinibb sen nir. Ko jinibb sen nir arirpe ni murrū niben nir nga marokla nanen ser rengen batun, suri nau ko murrmurr arjijipti erres re niben. Ko erpok vajin, Atua orongwos puloli niben totoklai pimaur rujruj pilep p̄irres.

#### *Mauren nga mimerr rengen Kristo*

<sup>20</sup> Kami erpe kammij pa osuw tevi Kristo. Kamivi vajin jinibb nga kamiel sisarow osuw, setemun nevisisenien ne ngatan ngel nir arrowsi kami. Ko erpese kamokvijuri malume murrun ne ngatan ngel? Erpese kamvijuri nale neseseien ne ngatan ngel nir, nga muwra: <sup>21</sup> ‘Sete kaptori nanu ngok ko nanu ngok’, ‘Sete kaprroi nanu ngok ko nanu ngok’, ‘Sete kapjipari nanu ngok ko nanu ngok?’ <sup>22</sup> Ko iok arsupe suri nanu nga partorir ko parsij bbong. Ko nale neseseien ngok ko nevisisenien ngok arivi se jinibb kobbong. <sup>23</sup> Nale ser ngok, rramlesli rrongvi erpe erres, erpe eviseni norongwosien erres p̄elak, suri osoni jinibb nga parlot, ko nga nolor pian ngatan, ko nga partor ore p̄iterter murrūn nga marmerrēni karkar nanu nga marsij nir. Ko neseseien ngok nir, dertēren ser ejki rres nawone nga partor ore weretunen nanu nga nolo jinibb mokmermerreni sarrsarr nir. Ko rramlesli, daron nga rramvijuri sel ser, murrūn nga m̄isij ngok oto erpok malum kobbong.

### 3

<sup>1</sup> Kami, erpe Atua ololi kammaur luwi re mijen evesane tevi Kristo. Ko niko, kap̄elak suri nanu nga marto re melrin tevi Kristo, nga m̄isakel pa re Atua nevren rres. <sup>2</sup> Kami kaplingi norrorrmien se kami ko wor puto re nanu nga marto re

melrin nir, setemun kapok-rrorrmī nanu ne ngatan ngel nir. <sup>3</sup> Suri erpe kammij pa osuw, ko mauren se kami oto teptepi tevi Kristo ji Atua pa osuw. <sup>4</sup> Ko ngok, batu mauren weretunen se kami evi Kristo kobbong. Ko daron nga Kristo pia-rremali, ko kami keke kapa-rremali tevi ni vajin rengen nosrövien.

#### *Mauren se kami nga m̄itra pusuw vajin*

<sup>5</sup> Ko ngok, kapbböt pini murrū kami nga marivi ne ngatan ngel kobbong, erpe norman muoji nesevin, ko nesevin muoji norman, murrūn nga sete muwokwok, ko armerreni nanu nga marsij nir. Ko nir arok-mermerreni nanu jile, ko iok erpe arosuri nanu ngok nir arirpe atua m̄inij nir. <sup>6</sup> Suri murrūn ngok nir, lolaren se Atua pian rengen nir nga sete marosuri ni. <sup>7</sup> Ko kami keke, bonevis kamok-vijuri murrūn ngok nir, daron nga kammaur renger e. <sup>8</sup> Ko lelingenok vajin, kami kapjiekie murrūn jikle nga marsij, erpe lolaren, nolon nga mulolar, nalol nga mungasi jinibb, murrūn nga marij m̄isij tere jinibb, rereren nga marsij nir. Setemun kapok-rij pirkok nabong pisan. <sup>9</sup> Ko sete kapkerkerasi lululweni kami. Suri kamla tweni pa mauren nga womu tevi murrūn nen nga marsij nir, <sup>10</sup> ko kamuri lwēni pa mauren nga mimerr ngok, nga Atua mokloli lululweni mimerr tetajer. Suri Atua emrreni nga kaprongwose ni p̄irres, ko nga kapsorsan tevi nir. <sup>11</sup> Ko niko, setemun jinibb san orongwos puwra, ‘O, inu nuvi mēri Isrel ko san, ko nik kuvi jinibb ne vare ko san’, rreknaga ‘O, inu nuan pa rengen bae, ko nik setewor kuan re bae’, rreknaga ‘O, inu nurongwose erres, ko nik kurlenge nanu’, rreknaga ‘O, inu nuvel sisarow, ko nik kuvi jinibb ne majingen’. Setemun kapok-rij pirkok, pijki. Suri Kristo elep asi nanu ngok nir, ololi arirpe nanu nawon kobbong nir. Ko ni elik pa rengen jinibb sen nir.

#### *Mauren se kami emerr*

<sup>12</sup> Tow, erres, kamivi jinibb nga Atua mutobbobbue kami, kamivi jinibb on, kamivi jinibb nga Atua mimrreni kami. Ko niko, kapuri mauren nga mimerr nga murrūn mirpel: kaprrormī jinibb nir, kaprres tevir, nolo kami pian ngatan ko kapivi jinibb malum, ko norrorrmien se kami pipriv. <sup>13</sup> Kaptor totoni nolo kami, ko kaptelasi lululweni nololien se kami rengen sel nga Numal m̄itlasi tweni pa nololien se kami ren. <sup>14</sup> Ko murrūn ngok nir, kapjijipteni tevi merrenien. Suri merrenien evi nanu san nga murongwos p̄ijijipteni nanu jikle p̄irres. <sup>15</sup> Ko demat se Kristo puwowomu re nolo kami. Suri

demat evi nanu nga milep nga Atua mimrreni puto renge jinibb sen nir, nga markorti mirpe niben sansan. Ko kapok-wera 'erres' tevi Atua suri nanu p̄t̄p̄eti nir. <sup>16</sup> Ko nale se Kristo puto p̄t̄p̄eti re nolo kami. Ko kapvisiveni lululweni kami, ko kapsusur metu lululwi tevi kami renge norongwosien jile nga murr̄ow. Ko kapok-lai nubo lele tevi Atua nga kapsur̄ovi ni, nubo nir ne Sam renge Naul On, nubo nir nga kami kamkoji, ko nubo nir nga Nem̄in On m̄ilair tevi kami. Kaplai nubo ngok nir tevi nolo kami nga marok-wera "erres" tevi Atua tetajer. <sup>17</sup> Ko nanu p̄t̄p̄eti nga musuwsuw ngok nga kamwerai, ko nanu p̄t̄p̄eti nga musuwsuw ngok nga kamloli, ko kaplolir ko wor renge nise Numal Iesu. Ko kapok-wera tetajer 'erres' tevi Atua Tata renge nise Iesu mawos.

*Murr̄un ne metka renge mauren nga mimerr*

<sup>18</sup> Kami nesevin nga kamlik ji diwen se kami nir, kaposuri diwen se kami nir. Murr̄un ngok osorsan erres kobbong renge kalesia nir. <sup>19</sup> Ko kami norman nga kamlesi nesevin, kapmerreni nesen se kami, ko sete kapok-sij tevir. <sup>20</sup> Ko bipiwarreng nir, kapvijuri nale p̄t̄p̄eti se tata ko tasu se kami nir, suri Numal ornge erres re murr̄un nga mirpok. <sup>21</sup> Ko tata nir ko tasu nir, sete kaploli natu kami nir parungasi kami suri sel nga m̄iterter nga kamok-loli tevir, suri nolor tarok-vitan.

*Murr̄un ne jinibb ne majingen nir ko numal ser nir*

<sup>22</sup> Jinibb ne majingen nir, kaposuri nale p̄t̄p̄eti se nir nga marivi numal se kami iel ngatan. Sete kapok-majing p̄irres re bbong daron nga numal se kami marlik e, nga nir parmerreni nawone kami. Ko kapmajing ko wor renge nolo kami nga m̄irres p̄t̄p̄eti, suri kammetutue Numal Kristo. <sup>23</sup> Ko nanu jile nga kamloli, kapmajinge tevi nolo kami, pirpe kammajing se Numal, sete se jinibb kobbong. <sup>24</sup> Suri kamrongwose nga Numal pia-lai nowli kami tevi kami, nga marivi nanu nga marres nir nga ni m̄ilngir terai kami e. Erpe kamok-majing pa se Numal Kristo. <sup>25</sup> Ko nir nga ma marok-loli m̄isij, ko Numal p̄ikle lweni tevi nir p̄t̄p̄eti pusorsan tevi nga marloli ngok. Suri Numal ololi osorsan tevi jinibb p̄t̄p̄eti nir, poro parivi jinibb nga marwelili rreknga jinibb nga marlelep.

#### 4

*Pol ela nale tevi nir*

<sup>1</sup> Ko kami numal nir, kaploli murr̄un nga mumomsawos m̄irres tevi jinibb ne majingen se kami nir, pusorsan p̄irpok tevi

nir p̄t̄p̄eti. Suri kamrongwos pae nga kami kele Numal se kami oto pa re melrin, ko ni pia-loli tevi kami pusorsan tevi nga kami kamloli tevi nir.

<sup>2</sup> Kami kapok-lot tevi nolo kami nga marterter tetajer. Kapkulkulu p̄irres renge loten se kami, ko kapok-wera 'erres' tevi Atua. <sup>3</sup> Ko kaplot suri kem kele, nga Atua p̄itasi metali nga nabwera tweni nosp̄en suri Kristo, nga bonevis muto teptepi. Ko inu nulik renge naim ne nekaien le ngel suri numajing ren. <sup>4</sup> Ko kaplot suri nga inu b̄erij p̄irres, puloli nale nen parmerer. Lok pirpe pusorsan p̄imawos tevi nga inu bololi.

<sup>5</sup> Kapok-loli murr̄un nga mivijuri norongwosien tevi jinibb ne vare nir. Kaploli womue p̄irres ngarr tevir, nabong tarasasi nawon. <sup>6</sup> Kapok-rij p̄irres tevi nir tetajer, puloli nir parir nga parunge nale se kami. Ko kaprongwose p̄irres vajin lut nga kaprij weli jinibb jile nir parto suri.

*Nosp̄en ne Pol*

<sup>7</sup> Tikikas pia-supe suri nosp̄en nek tevi kami. Ni evi niaken se kerr san nga rrammerreni, ko nga mokmajing korti lilane m̄irres tevi inu renge majingen se Numal. <sup>8</sup> Nukoni vinuk ji kami suri nanu ngel le, nga puloli kaprongwose nosp̄en ne kem, ko nolo kami parmoldmol suri p̄irres. <sup>9</sup> Ko bokoni kele Onesimas pipitevi ni. Ni kele evi niaken se kerr san nga rrammerreni, ko nga mokmajing lelane m̄irres, ko evi kami san. Nuru ngok porloli kaprongwose nanu jile nga marok-pelpelari iel.

*Bongsi nale se Pol*

<sup>10</sup> Aristakas le nga m̄ilik renge naim ne nekaien ngel owra 'erres' tevi kami, ko Mak kele nga mivi tasi Banapas san, ni kele owra 'erres' tevi kami. Nuwra rurr̄ngi pa tevi kami nga poro ni pivinuk, ko kapatekai ni. <sup>11</sup> Ko m̄irel nga nisen muwaji Iesu nen nga marverus kele nisen tuwen Jastas, ni kele owra 'erres' tevi kami. Nir itul ngok kobbong renge m̄eri Isrel nir arp̄itevi inu renge majingen ne batun vanu se Atua, ko arok-loli nolok erres. <sup>12</sup> Ko Epapas kele, nga mivi kele kami san, owra 'erres' tevi kami. Ni evi jinibb ne majingen se Iesu Kristo, ko okrat tetajer suri kami renge loten sen nga kaptur p̄iterter jile, kaptera jile, ko nga kaploli marongen p̄t̄p̄eti se Atua. <sup>13</sup> Nurongwos bowrai nga ni mokp̄elak milep suri kami, ko suri nir nga renge Laotisia, ko nir nga renge Ierapolis. <sup>14</sup> Ko dokta Luk le, nga rrammerreni ni, ko Demas kele, orwera 'erres' tevi kami. <sup>15</sup> Kapwera 'erres' tevi tasi kerr nir nga marlik Laotisia, ko tevi vinok Nimpa, ko tevi kalesia nir nga marok-korti renge naim sen. <sup>16</sup> Ko poro nga

para-eve jile naul ngel tevi kami, kaplai keke van para-eve keke tevi kalesia nir nga renga Laotisia. Ko naul suk nga m̄elai tevi kalesia nir renga Laotisia, kami kaplai vinuk ko kaploli para-eve tevi kami. <sup>17</sup> Ko kapwerai tevi Akipas, 'Kupmetmet p̄irres nga kupmajing jile majingen ngok nga Numal m̄ilai tevi nik.'

<sup>18</sup> Inu mawos vajin, nula pensil ji m̄er nga mok-uli tweni nale suk ngel nir, ko nuli vajin "erres" suk ngel tevi kami. Erres kaprrormi inu renga dil delrrurr nga marserek e. Nurongwos mae, merrenien se Atua puto tevi kami. Nuwra 'Remse kami'.

**Naul nga Pol Muli Womue  
tevi Kalesia Nir renge  
TESALONAEKA  
Batu nale nga mivsvseni  
lut nga parmeteni naul  
ngel puto suri**

Tesalonaeka evi ngaim nga milep ne Masetonia. Pol evan ie daron nga mivel lingi Pilipae, ko etipatun re majingen ne kalesia ie. Ko sete epriv, ko neri Isrel sopor nga nolor mileplep suri jinibb elep arosuri nospen nga mirres, aroji tweni Pol. Ko Pol etajer kele, okmajing renge ngaim minij sopor. Ko mian ko orrorrmi neri Tesalonaeka nir elep, ko okoni Timoti nga ni pimteni suri liken ser erpese. Mian ko Timoti olwi vajin ko ospe nospen se nir tevi Pol, ko ololi Pol nolon eir elep suri. Ko eauli vajin naul ngel nga rramveruse 1 Tesalonaeka nga puloli norrorrmien ser pitertter renge nosurien ser, ko liken ser puon pirres. Ko ni ospe kele sapon suri nanu sopor nga nir marsusi, erpe pipse re nabong nga Kristo pia-luwi vini rengen.

*Pol owra erres tevi nir*

<sup>1</sup> Inu Pol, Silas, ko Timoti, namuli naul ngel tevi kami kalesia nir nga Tesalonaeka nga kamkorti pa tevi Atua Tata ko Numal Iesu Kristo. Nurongwos mae, merrenien ko demat se Atua piptevi kami.

*Pol owra erres tevi Atua suri murrun ko nosurien se nir*

<sup>2</sup> Tetajer namok-wera erres elep tevi Atua suri kami jijle, ko namok-verus suri kami renge loten se kem tetajer. <sup>3</sup> Namrorrmi re no Atua Tata se kerr erpese nga kammajing tweni nosurien se kami, ko nga merrenien se kami muloli kampelak; ko nga norrorrmien se kami muti miterter malum renge Iesu Kristo Numal se kerr, ko sev nga ni pia-loli tevi kami.

<sup>4</sup> Niaken se kem nir, kem namrongwose erres nga Atua emreni kami elep, ko elngi pa kami osuw nga kapivi jinibb sen. <sup>5</sup> Suri daron nga kem namwerai tweni nospen ngel nga mirres tevi kami, ko sete evi nale nawon, ejki. Ko Atua elai pa derteren sen ko Nerin On sen orpitemi nale se kem, ko ololi kamrongwose erres nga evi nale weretunen. Ko kamrongwose, liken se kem omomsawos erres daron nga namlik tevi kami. Ko namloli erpok nga piviseni sel tevi kami. <sup>6</sup> Ko kami kamvijuri sel ngok kobbong nga kem namviseni. Evi pa sel se Numal. Ko daron nga kami kamlai

nospen nga mirres, ko kami kele, jinibb nir arloli esij tevi kami. Ko Nerin On ololi kami kamir kele. <sup>7</sup> Ko re murrun ngok, kami kamviseni kele sel nga mirres re no kalesia nir ne vanu nga Masetonia ko kalesia nir ne vanu ne Akaea, nga nir parvijuri kami. <sup>8</sup> Suri kami kamwera tweni nale se Numal renge Masetonia ko Akaea kobbong, ko nospen ne nosurien se kami renge Atua etajer kele wor re vanu pitpeti. Ko niko muloli kem setemun namrongwose nabwerai tweni nanu san suri nosurien se kami tevi jinibb nir. <sup>9</sup> Suri lartul ngok nir kobbong arsupuŕe suri kami, ko sev nga miplari daron nga namini ji kami, nga kami kamlingi tweni pa atua minij nir, ko kamini kamvijuri Atua nga mimaur ko nga mivi weretunen. <sup>10</sup> Ko arsupuŕe kele nga kami kamok-tiriv Iesu nga mivi Atua Natun nga Atua muloli mimaur luwi re mijen, nga pia-luwi kele wor re melrin vini, ko pia-lai mauren tevi kami re nabong nga pia-vini nga Atua pia-wera suri lat nga puto suri tevi jinibb nir.

**2**

*Majingen se Pol renge Tesalonaeka*

<sup>1</sup> Tasi kem nir, kamrongwos pae nga sete naminuk nawon ji kami, ko jelangin nga namlingi emaur pa ji kami. <sup>2</sup> Ko kami kamrongwose, daron nga namlik malum ngaim Pilipae, ko jinibb arloli esij tevi kem ko arij esij elep kele wor tevi kem. Ko arij tere kele kem daron nga naminuk ji kami. Ko Atua se kerr ololi norrorrmien se kem eterter nga nabwera tweni nospen nga mirres sen tevi kami. <sup>3</sup> Ko nale se kem nga miveruse kami evi weretunen. Sete erpe nga nir marok-werai, nga nam-sarr, rreknga namwera nablai nanu san ji kami kobbong, rreknga namkerkerasi kami, ejki. <sup>4</sup> Ko Atua emteni pa nolo kem ko elesi erres, ko elai pa nospen sen tevi kem nga nabwerai tweni. Ko niko nammajing se Atua, nga puloli ni pir re majingen se kem; ko sete nammajing se jinibb, nga nir parir renge majingen se kem. Ko Atua okmeteni nolo kem malum rengen. <sup>5</sup> Ko kamrongwose erres nga kem sete naminuk nga nabsurövi nawon kami, rrek suri nabloli sel nga nabvenae joro kami nir, ejki. Atua orongwos puwrai nga nale ngok evi weretunen. <sup>6</sup> Ko kem sete namloli murrun ngok nga nabloli jinibb parsurövi kem, poro pivi kami, rreknga jinibb minij kele. <sup>7</sup> Ko kem namrongwose nablolir parsurövi kem, suri namivi pa aposol se Kristo. Ko sete namloli erpok. Ko namloli nolo kem omolmol pa livö ne kami, erpe tasu san nga mokter lilane natun nir. <sup>8</sup> Ko erpok kele, nammerreni



kami elep, ko nammarong nga nablai, sete nospen se Atua kis kobbong, ko mauren se kem kele wor tevi kami. Suri merrenien se kem elep wor tevi kami.

<sup>9</sup> Tasi kem nir, kaprrormi wose nga nampelak elep. Nutrin ko nutpong nam-majing tevi nevre kem, nga kami sete kaprrormi pelak kem renge nanen daron nga namok-werai tweni nospen se Atua tevi kami. <sup>10</sup> Kami kamrongwos kapwerai, ko Atua kele orongwos puwrai nga murrin nga kem namloli tevi kami kalesia owok-wok, ko osorsan erres. Ko sete jinibb san orongwos pirij tere kem renge murrin kem ngok. <sup>11</sup> Ko kami kamrongwose nga kem namvisviseni kami sisamis kobbong osorsan tevi tata san nga mivisviseni natun nir. <sup>12</sup> Ko kem namok-rinj nale elep nga mirres tevi kami, nga puloli nevre kami pitertter, ko nolo kami sete pivitan. Ko Atua everuse kami nga kapan renge batun vanu sen ne nosrovien, niko muloli namok-rinj mitertter mirpok tevi kami, nga kami kaptori murrin nga musorsan mirres renge no Atua.

*Lartul nga marok-oji kalesia nir*

<sup>13</sup> Ko suri nanu mininj kele namok-wera erres tevi Atua suri kami tetajer, nga daron nga namlai nale se Atua vinuk ji kami, ko kami kamlai erres. Kami kamlesi wose weretunen nga evi pa nale se Atua, sete nale se jinibb kobbong. Ko nale ngok okmajing malum tevi kami nga kamok-osuri. <sup>14</sup> Ko tasi kem nir, eplari osorsan tevi kami erpe nga miplari tevi kalesia se Atua nir renge vanu ne Julia nga martur renge Iesu Kristo. Suri jinibb ne vanu se kami nir arloli esij tevi kami osorsan erpe nga meri Isrel nir marloli pa misij tevi kalesia nga nir. <sup>15</sup> Ko meling ngok kele kobbong nir arevji pini Iesu Numal se kerr, ko propet nir ne tuwi; ko arok-oji kem kele, ko arloli Atua sete eir renge sev nga marloli. Ko artere jinibb totoklai, <sup>16</sup> suri arok-tur ore kem nga sete nabwerai tweni nale se Atua tevi jinibb ne vare nir, nga Atua sete pilai mauren tevi nir. Ko erpok nololien ser ean pelak tetajer, ko lolaren se Atua oto tevir ko pa osuw.

*Pol emrreni pilesi nir kele*

<sup>17</sup> Tasi kem nir, daron nga namiel lingi kami, ko namrrormi kami elep, erpe norrrormien se kem elik malum tevi kami. Ko sete epriv nga namrunge erpe nammerreni kelewor nablesi no kami. <sup>18</sup> Niko nammerreni nabinuk ji kami. Ko inu Pol, nulwi lesi vavis le pa, ko Demij oktur ore kem. <sup>19</sup> Ko daron nga Iesu Numal se kerr pia-luwi e vini, ko naba-runge pirres renge ni non suri kami kis kobbong. Ko naba-rinj melmelas suri kami kis kobbong, ko naba-lai nowli kem suri kami kis kobbong.

<sup>20</sup> Suri kami kamjoroj pa kem, ko kami kamlai pa neiren tevi kem.

### 3

<sup>1</sup> Ko namrrormi kami elep erpok mian, ko nolo kem setemun orongwos puto malum. Ko niko nammarong nga komru Saelas noborlik jer ko pa iel renge ngaim ne Atens, <sup>2</sup> ko nomorkoni Timoti. Ni evi tasi kerr san, ko okpitevi komru renge majingen se Atua nga parwerai tweni nospen nga mirres suri Kristo. Nomorkoni ni vinuk nga puloli kaptur pitertter renge nosurien se kami, sete nolo kami pivitan <sup>3</sup> suri nanu nga marsij nga marok-loli tevi kami. Ko kami kamrongwos pae nga paraloli pirpok, suri evi pa marongen se Atua. <sup>4</sup> Ko kem, daron nga namlik malum ji kami, ko namwerai womu pae tevi kami nga nir para-loli pisij tevi kami pirpok. Ko kami kamrongwos pae, suri eplari pa osuw osorsan tevi nga namwerai. <sup>5</sup> Niko muloli setemun nurongwos belik malum, mian ko nukoni Timoti nga pimteni suri nosurien se kami erpese. Nomok-rrormi Demij nga mokrrowrowe jinibb tikrekrasi pa kami ko tuloli belaken se kem tarivi vajin nanu nawon.

*Neiren nga milep se Pol suri meri Tesalonaeka nir*

<sup>6</sup> Ko lelingenok vajin Timoti evel lingi kami ko olwi pa vini ji kem, ko elik pa tevi kem osuw, ko ospe nospen nga mirres suri nosurien se kami ko merrenien se kami. Ko ni owrai nga norrrormien se kami okrres tetajer suri kem, ko nga kammerreni kaplesi kem, osorsan erpe nga kem kele nammerreni nablesi kami. <sup>7</sup> Tasi kem nir, suri namrunge pa nospen ngel nga mirres suri nosurien se kami, niko muloli nolo kem sete evitan renge norongen nga misij ko nanu nga marsij nir nga marok-loli tevi kem. <sup>8</sup> Ko suri kami kamtur pa eterter renge Numal, niko muloli vajin kem nammaur renge mauren nga mirres. <sup>9</sup> Kem sete namviter rragrrag nga nabwera erres tevi Atua suri kami, ko suri neiren nga milep nga nanir suri kami rengen re no Atua se kerr. <sup>10</sup> Nutpong ko nutrin namok-verus eterter nga nabrongwose nablesi no kami kele, ko nga nablai kele sev nga nosurien se kami murrrol rengen. <sup>11</sup> Ko ngel evi loten se kem, nga Atua Tata ko Iesu Numal se kerr porloli sel nga kem nabinuk nablesi kami, <sup>12</sup> ko nga Numal puloli merrenien se kami nga kammerrmerreni kami ko nga kammerreni jinibb jijle pimaur kele van mare pilep, pusorsan tevi merrenien se kem nga nammerreni kami. <sup>13</sup> Ko nomok-lot kele nga ni pia-loli norrrormien se kami

pitertter ko puon p̄irres re no Atua Tata se kerr; pijpari daron nga Iesu Numal se kerr pia-luwi vini kele tevi jinibb sen nir.

#### 4

*Murrun nga marmomsawos renge no Atua*

<sup>1</sup> Tasi kem nir, nuwra bosp̄e suri vajin liken se kami. Namvisviseni pa kami renge sel nga puloli Atua p̄ir tevi kami, ko lelingenok kamok-vijuri sel nen. Ko namngoni kami renge nise Numal Iesu nga kapvijuri sel nen p̄irres kele wor, ko nga nolo kami puto pitertter renge. <sup>2</sup> Ko kami kamrongwos pae nale nga namlai tevi kami renge nise Numal Iesu, ngel: <sup>3</sup> Atua emarong nga kapivi jinibb nga muon m̄irres. Norman sete puloli sel nga m̄isij tevi nesevin, ko nesevin sete puloli sel nga m̄isij tevi norman. <sup>4</sup> Kami sisamis kaptor sweri ko wor nesen se kami renge sel nga muon ko muwokwok m̄irres, <sup>5</sup> ko sete renge sel nga m̄isij mirpe jinibb ne vare nir nga sete marongwose Atua. Suri nir arok-vijuri nolor kobbong nga marvenae nesevin. <sup>6</sup> Ko kami sete kaploli p̄isij tevi tasi kami san nga kapvenae nesen sen. Suri Numal pia-tor vitrangsi isi nga marloli mirpok. Namwerai womue ko namwerai eterter tevi kami erpok. <sup>7</sup> Suri Atua everuse kerr nga rrapvijuri sel nga muon, sete sel nga m̄isij. <sup>8</sup> Ko si nga murong tweni nale ngok, sete orong tweni jinibb kobbong, ko orong tweni kele Atua nga moklai Ner̄in On sen tevi kami.

<sup>9</sup> Ko re devjen ne merrenien, setemun nurongwose boli nale san tevi kami. Suri Atua evisviseni pa kami osuw nga kapmermerreni kami, <sup>10</sup> ko kamok-loli erpok tevi tasi kerr jilje nga marlik sisamis renge Masetonia totoklai. Ko namok-werai eterter tevi kami nga kapan mare kele wor renge sel ngok, <sup>11</sup> ko nga kami kapp̄elak ko wor nga mauren nga mumolmol puto ji kami, ko nga kapmetmet nga kapmajing lululweni majjening se kami kobbong. Ko erpe namok-werai pa, sete kaplik nawon, ko kami kapmajing ko wor tevi nevre kami. <sup>12</sup> Ko nanu ngok nir parloli nir nga sete marosuri Iesu parlesi kami pirpe jinibb mawos kobbong, ko setemun kapkulu van ji jinibb m̄inij nir renge sev nga nevre kami mumrrol ren.

*Pol osp̄e suri nabong nga Iesu pia-luwi e vini*

<sup>13</sup> Tasi kem nir, nammerreni kaprongwose erpese renge kalesia nir nga marmij pa. Sete nammerreni nga kami kapting ko kaprunge p̄isij pilep suri nir pirpe lartul nga norrorrmien ser sete muto renge Atua, ko nga sete marteravi nanu san jin. <sup>14</sup> Kerr

rramosuri nga Iesu emij, ko emaur luwi kele. Ko erpok kele, renge kalesia nir nga marmij, Atua pia-la lweni nir kele paran renge melrin tevi Iesu. <sup>15</sup> Sev nga namok-sesre tevi kami ngel evi nesesreien se Numal: Kerr nga rrammaur jer re daron nga Numal pia-luwi vini setete rramawowomu renge kalesia nir nga marmij pa. <sup>16</sup> Atua pia-werai nale, ko numal se anglo nir pia-verus, ko san pia-uwi dav̄o se Atua. Ko Numal vajin pia-linglingi melrin vini ngatan. Ko kalesia nir nga marmij paramaur luwi puwomu. <sup>17</sup> Para-maur luwi jile pusuw, ko kerr vajin nga rrammaur malum mijpari nabong ngok, Atua pia-teka kerr vajin, ko pukortoni kerr tevi nir nga marmij, renge nabor nir. Ko kerr jile rrapa-lesi Numal renge mesa nawon. Ko ngok ma rrapa-lik tevi Numal tuwi ngok vini. <sup>18</sup> Ko niko erres ma nga kami kapoksupupe nale ngok tevi kami lulweni, nga puloli norrorrmien se kami puto pitertter.

#### 5

*Sete jinibb san orongwose nabong nen*

<sup>1</sup> Tasi kem nir, sete nurongwos boli tevi kami suri nabong ko daron nga nanu ngok nir para-rremali ren. <sup>2</sup> Suri kami kamrongwos alje pae nga Numal pia-vini re nabong san nga jinibb sete marongwose, osorsan erpe nga jinibb venao san mivini natmupong. <sup>3</sup> Jinibb nir para-wera, 'O erres kobbong, nanu jilje erres bbong', ko nanu nga m̄ikarkar pivini pijpari nir pivesane ko pulokloksir, ko sete parongwos parasi. Pirpe kele nesevin san nga milelea mian ko murnge depain nga pivasus.

<sup>4</sup> Ko kami, tasi kem nir, sete kamlik renge nemalik, nga kapa-taole nabong ngok pirpe nga martaole jinibb venao nga mivini. <sup>5</sup> Suri kami jilje kamivi pa jinibb ne moron, ko jinibb ne nat nga m̄irin. Sete kamivi jinibb ne nemalik, rrek jinibb ne natmupong. <sup>6</sup> Ko sete rrapatur porporwon pirpe lartul ngok nir, ko rrapkulu metmet ko wor, ko norrorrmien se kerr p̄im̄erer p̄irres. <sup>7</sup> Ko nir nga marok-matur porporwon arok-matur natmupong, ko nir nga marok-minmin arok-minmin natmupong. <sup>8</sup> Ko kerr rramivi pa jinibb ne nat nga m̄irin, ko niko norrorrmien se kerr p̄im̄erer ko wor p̄irres. Nosurien ko merrenien porirpe sunsun nga puto metmet nga neliw se devje nuval sete purongwos p̄ilik rrrurrgi. Ko rraplingi norrorrmien se kerr renge Atua nga pia-la mauren tevi kerr, ngok erpe evi nuvan re batu kerr nga muto metmet erpok kele. <sup>9</sup> Suri Atua sete elngi kerr nga pulolarsi kerr kele, ejki. Elngi pa kerr ji Iesu Kristo,

Numal se kerr; nga ni pia-lai mauren tevi kerr. <sup>10</sup> Ni emij suri kerr nga kerr rrapa-korti tevi ni renga mauren, poro nga rrapmaur rreknga rrapmij daron nga pia-luwi e vini. <sup>11</sup> Ko ngok ma kami kapok-rij ko wor p̄irres tevi kami lululweni, nga puloli norrorrmien se kami p̄iterter; ko kapok-lilai se kami, pirpe nga kamok-loli lelingenok.

*Bongsi nale se Pol*

<sup>12</sup> Tasi kem nir, namngoni eterter tevi kami nga kaposuri p̄irres nir nga Numal n̄ilngir parp̄elak renga nemetmetien ko nevisvisenien se kami. <sup>13</sup> Kapmerrenir ko kaposurir p̄irres renga majingen nga marok-lolir. Ko tetajer kapok-korti lulweni tevi kami p̄irres, nga demat puto livö e kami.

<sup>14</sup> Tasi kem nir, namwerai eterter tevi kami nga kapsulngatir ko wor nga niber p̄iterter nga parloli majingen. Ko kaprij p̄irres tevi nir nga nolor marmetutu, nga puloli parterter luwi kele; ko kaplai se nir nga derteren ser mijkie. Ko tevi nir totoklai nolo kami pipriv ko wor. <sup>15</sup> Kami kapmetmet ko wor nga kami san sete p̄ikle lweni murrun nga n̄isij tevi jinibb san. Ko kami kap̄elak pilep nga kaploli p̄irres tetajer ko wor tevi kami lulweni ko tevi jinibb m̄inij kele nir.

<sup>16</sup> Kami kap̄ir ko wor tetajer. <sup>17</sup> Kami kaplot ko wor tetajer, nga nolo kami sete pijebreni. <sup>18</sup> Ko kami kapwera 'Erres' ko wor tevi Atua renga nanu jijle nga marok-pelari ji kami. Suri ngok evi marongen se Atua renga gortien se kami tevi Iesu Kristo. <sup>19</sup> Sete kapvisi pini Nem̄in On se Atua. <sup>20</sup> Sete kapkulu wutan re nale se jinibb san nga muwra nga ni mivi propet ko m̄irij nale se Atua. <sup>21</sup> Ko kaprowrrow wore nanu jijle, ko kaplesi nga m̄irres ko kaptori; <sup>22</sup> ko kaplinglingi nanu jijle nga marsij.

<sup>23</sup> Ko ngel evi loten suk, nga Atua nga mivi batu demat, puloli kapon nga kapon p̄etp̄eti; ko ni putori totkoni kami nga norrorrmien se kami, mauren se kami, ko nibe kami puto p̄irres totoklai, pian pijpari daron nga Iesu Kristo Numal se kerr pia-luwi e vini. <sup>24</sup> Atua nga miveruse kami pialoli nanu ngok nir, suri ni okloli pa nanu nga muwrai nir osuw.

<sup>25</sup> Tasi kem nir, kaplot suri kem kele ko wor. <sup>26</sup> Kapwera "erres" tevi kalesia selerr nir, renga sel nga m̄irres san. Ko ngok ma piviseni nga rramirpe niaken mawos vajin. <sup>27</sup> Nuwrai eterter tevi kami, renga nise Numal se kerr; nga kapeve naul ngel tevi kalesia jijle nir.

<sup>28</sup> Merrenien se Iesu Kristo, Numal se kerr, puto tevi kami. Nuwra "Remse kami jijle."

**Naul Erwen nga Pol Muli  
tevi Kalesia Nir renge  
TESALONAEKA  
Batu nale nga mivsvseni  
lut nga parmeteni naul  
ngel puto suri**

Ngel evi naul tuwen nen nga Pol muli tevi kalesia nir ie Tesalonaeka. Ospe kele suri nabong nga Kristo pia-luwi vini rengen, ko ewer rrerarre nale gerisen ngok nga muwra nabong nen eplari pa osuw. Ko owrai tevir nga partur piterter renge nosurien ser, ewretun jinibb sopor arok-loli esij tevir. Ko owrai kele nga sete parlik nawon, ko nir sisamis parmajing tweni ko wor nanen ser, ko nga parok-loli majingen nga marres tetajer.

*Pol owra erres tevi nir*

<sup>1</sup> Inu Pol, Silas, ko Timoti, namuli naul ngel tevi kami kalesia nir nga Tesalonaeka nga kamkorti pa tevi Atua Tata ko Numal Iesu Kristo. <sup>2</sup> Merrenien ko demat se Atua Tata ko se Numal Iesu Kristo pipatevi kami.

*Pol owra erres tevi Atua suri nir*

<sup>3</sup> Tasi kem nir, namok-werai erres ko wor tevi Atua tetajer suri kami. Ko erres nga nabloli pipok, suri nosurien se kami okmaur elep, ko merrenien se kami nga kamok-merrmerreni kami okan mare elep kele wor. <sup>4</sup> Ko ngok ololi kem vajin namok-surövi kami tevi kalesia se Atua nir renge vanu totoklai. Namok-supe murrun ngel, suri nga kamtur eterter pa daron nga jinibb nir marloli misij tevi kami. Ko jinibb ne vare nir arok-oji kami ko arok-loli esij tevi kami nabong elep, ko nosurien se kami sete evitan rengen.

*Atua putor vitrangi nir nga marok-loli misij tevi mieri Tesalonaeka nir*

<sup>5</sup> Ko nanu ngok nir para-loli kapivi jinibb mawos ne batun vanu ne melrin, ko ngok evi batun nga marok-loli misij tevi kami. Ko suri arok-loli esij tevi kami erpok, niko miviseni nga Atua puloli pusorsan pïrres daron nga putor vitrangi jinibb nen nir. <sup>6</sup> Ko rrek pïrres pelak ma poro Atua puloli pisij tevi nir nga marok-loli misij tevi kami ngok. <sup>7</sup> Ko re wosenen kele kobbong, Atua pia-la tweni norongen nga misij ji kami ko ji kem kele. Re daron ngok, Numal Iesu pia-linglingi melrin ko pïrmali iel ngatan tevi anglo sen nir nga marterter, <sup>8</sup> ko tevi nabb nga muror milep. Ko ni pia-tor vitrangi nir nga marivi devje nuval se Atua, ko nir nga sete marosuri nospen nga

mïrres suri Iesu Numal se kerr. <sup>9</sup> Atua pia-tor vitrangir renga nabong ngok daron nga pilngi kurtwenir, ko parlik vajin ngasue Atua renga lut nga misij san pijpari tuwi ngok vini. Ko setemun parini mori ji Numal nga parlesi nosrövien sen rreknga derteren sen. <sup>10</sup> Renge nabong ngok, kami kapa-pitevi nir nga marres, suri kami kamosuri pa nale nga namwerai tevi kami. Ko Iesu pia-luwi vini, ko jinibb sen nir nga marosuri ni partaole ko parsurövi ni.

*Loten se Pol suri nir*

<sup>11</sup> Niko muloli namok-lot tetajer suri kami, nga Atua se kerr puloli kapviter renga mauren nga ni miveruse kami tweni; ko nga pilai derteren kele tevi kami nga kaprongwos kapmajing nungsi norrorrmien jikle nga marres ko majingen jikle nga muto pa renga nosurien se kami. <sup>12</sup> Murrun ngok puloli jinibb parsurövi nise Iesu Numal se kerr suri kami, ko parsurövi kami kele suri ni, suri merrenien se Atua se kerr ko se Numal Iesu Kristo.

## 2

*Murrun nga Iesu Kristo pia-luwi e*

<sup>1</sup> Tasi kem nir, namwera nabsupe vajin suri murrun nga Iesu Kristo pia-luwi e, ko piprese rrapa-korti tevi ni. <sup>2</sup> Ko namwera nabwerai piterter tevi kami nga sete norrorrmien se kami pisarr pingavilvil, rreknga sete kaprunge pisij renga nale karkar nga marwerai 'O, nabong se Numal evini pa.' Rrek kami kamrunge nale ngok ji jinibb san nga muwra Nemin On elai tevi ni, rreknga ji jinibb san nga mokwerwer, rreknga renga naul san nga marwera kem namuli. Ko ejki, sete kaprunge. <sup>3</sup> Sete kaploli jinibb san pikrekrasi kami renga sel san. Suri nabong ngok sete mia-vini womu. Kapa-lesi womu nabong nga milep san nga pïrmali, nga jinibb partur imera ko partere Atua. Ko jinibb nga moktor otvi nale pia-rremali, ni nga mivi jinibb ne nejjikien. <sup>4</sup> Ni pia-tere atua minij nir nga jinibb marok-surövir, ko pilngi ni pian mare re nir ngok. Ko ni pian vajin renga Naim On se Atua ko pisakel ko puwra tweni nga ni kobbong evi Atua.

<sup>5</sup> Ko erpese? Kami kammalie nga nuwrai pa nanu ngel tevi kami daron nga meptevi kami e? <sup>6</sup> Ko nanu kele san nga murul totkoni nanu ngel nga sete pïrmali lelingenok, ko rrekma kami kamrongwos pae nanu nen. Purrul totkoni mian, ko renga daron mawos nen, jinibb nen pia-rremali. <sup>7</sup> Suri murrun nga marok-tor otvi nale okimare pa osuw, ko eteptepi malum. Ni nga mokrrul totkoni murrun ngok puloli pipok ko wor pijpari nga Atua pia-lai tweni ni renga sel ngok. <sup>8</sup> Ko jinibb

nga moktor otvi nale p̄irmali ko vajin limjer. Ko Numal Iesu sowin p̄ilai m̄nren ko p̄irevji pini. Ni pia-mij pivesan daron nga Iesu pia-luvi e vini.

<sup>9</sup> Mernen pia-vini suri majingen se Demij, ko derteren sen pilep nga puloli nanu pilep nga jinibb nir partaole, ko p̄ikrekrasi jinibb pilep nga parosuri ni. <sup>10</sup> Ko ni pia-loli gerisen lele nga marsij nga p̄ikrekrasi nir nga para-jijki. Nir ngok para-jijki suri sete armerreni parvijuri weretunen, ko ngok kobbong evi sel nga Atua pia-lai mauren tevi nir rengen. <sup>11</sup> Ko renge murrun nga mutō jir, Atua okloli norrorrmien ser nga p̄ilengleŋg kele wor nga parok-osuri gerisen. <sup>12</sup> Niko nir jile nga sete marosuri weretunen ko marok-ir suri nanu nga marsij, Atua pia-tor vitrangir ko suri.

*Atua elngi pa jinibb sen nir osuw*

<sup>13</sup> Ko kami ma, tasi kem nir, Numal emrreni kami elep. Ko tetajer, nammerreni nabwera erres wor tevi Atua suri kami. Suri Atua elngi pa kami osuw nga kapwomu renge nosurien renge vanu se kami, nga Atua pia-lai mauren tevi kami. Ko ni ela mauren tevi kami renge sel ngel, nga Nem̄in sen puloli kapon, ko kaposuri weretunen. <sup>14</sup> Ko Atua everuse kami renge nosp̄en nga m̄irres nga namwerai tweni pa tevi kami osuw, nga kaptor sweri mauren ne nosrōvien se Numal se kerr Iesu Kristo.

<sup>15</sup> Ko ngok, tasi kem nir, kaptur p̄iterter, ko kaprrul totkoni nevisvisenien nga namvisviseni tevi kami renge jingo kem ko renge naul nga namuli tevi kami. <sup>16</sup> Atua Tata se kerr emrreni kerr. Ko renge merrenien sen, otori nolo kerr nga puto p̄iterter, sete pivitan nabong san. Ko ni elai kele nanu nga m̄irres nga rrapa-tiriv tweni. <sup>17</sup> Ko Atua tevi Numal se kerr Iesu Kristo porloli norrorrmien se kami p̄iterter nga sete orongwos pimijmij renge majingen ko nale jijle nga marres.

### 3

*Pol owra parlot suri ni*

<sup>1</sup> Tasi kem nir, rreknga ngel evi bongsi nale suk. Kami kaplot ko wor suri kem nga nale se Numal se kerr orongwos putuw asasi pingavilvil, nga jinibb arongwos parosuri renge vanu lele nir pirpe pa iak ji kami. <sup>2</sup> Ko kaplot kele nga Atua p̄ilai tweni kem renge nevre nir nga sete marsorsan m̄irres, ko nga marivi jinibb nga marsij. Ko suri sete nir p̄etp̄eti ko nga nosurien ser mutoe.

<sup>3</sup> Ko Numal osorsan erres nga rraplingi nolo kerr rengen, ko ni puloli nolo kerr p̄iterter, sete pivitan. Ko putor ore Demij nga sete pivini mori ji kerr. <sup>4</sup> Ko Numal

ololi nosurien se kem oto eterter re kami nga lelingenok kamok-loli erpe nga namwera pa, ko nga kapok-loli pirpok tetajer ko wor. <sup>5</sup> Ko ngel evi loten se kem kele san, nga Numal puwrai visviseni tevi kami nga kami kapmerreni Atua pilep, ko nga puloli kaptur p̄iterter kele wor renge derteren se Kristo.

*Kalesia nir sete parlik totrong nawon*

<sup>6</sup> Tasi kem nir. Renge nise Iesu Kristo, Numal se kerr, namwera eterter tevi kami nga sete kapkorti tevi kalesia nir nga marlik totrong nawon, ko sete marvijuri nale nga namlai pa tevi kami, nga kalesia nir parmajing ko wor. <sup>7</sup> Kami kamrongwos pae nga kaploli rrongrongvi kobbong sev nga kem namloli pa. Daron nga namlik tevi kami, sete namlik totrong nawon. <sup>8</sup> Sete namlai nawon nanu san ji kami san, ejki, namwuli ko wor. Nammajing eterter elep tevi nevre kem natm̄irin ko natmupong, nga puloli kami sete kapp̄elak re nanen se kem. <sup>9</sup> Ko kem namrongwos nabngoni nanu pilep, suri namivi pa aposol. Ko sete namloli erpok. Ejki, nammajing tweni ko wor nanen se kem, nga piviseni sel nga kami kapvijuri kem. <sup>10</sup> Daron nga namlik tevi kami, namokwerai erpel tevi kami: 'Jinibb si nga mumus p̄imajing, sete kaplai nanen tevi.'

<sup>11</sup> Suri namok-runge nale nga kami sopor arok-lik totrong nawon, sete amajing, ko areses ma nanu van re majingen se jinibb m̄inij nir. <sup>12</sup> Renge nise Numal Iesu Kristo kem namwera nale ngel nga puwni nir ngok: kaplik malum, ko kapp̄elak nga kaptor sweri nanen se kami kobbong.

<sup>13</sup> Ko kami, tasi kem nir, sete nibe kami pimijmij nga kaploli majingen nga marres nir. <sup>14</sup> Rrek kami sopor ni ko iok nga sete marvijuri nale nga namok-lai tevi kami renge naul ngel. Poro san ni ko nga mirpok, erres ma nga kaprongwos ni p̄irres, nga sete kapok-korti mun tevi, puloli ni non p̄isije sev nga muloli. <sup>15</sup> Ko sete kapmeteni ni pirpe devje nuval se kami, ejki. Evi pa tasi kami ko. Ko niko kaploli lesi wor nga nolon pulwi.

*Bongsi nale se Pol*

<sup>16</sup> Ko ngel evi loten suk, nga Numal, nga mivi batu demat, p̄ilai demat tevi kami tetajer renge sel jijle nir. Ko Numal piptevi kami jijle. <sup>17</sup> Inu mawos vajin Pol, nula pensil ji m̄er nga mok-uli tweni nale suk ngel nir, ko nuli vajin 'erres' suk ngel tevi kami. Nomok-uli erpok renge naul suk jijle nir, nga kami kaprongwose nga evi weretunen naul suk. <sup>18</sup> Ko ngel evi loten suk, nga merrenien se Numal se kerr Iesu Kristo puto tevi kami jijle. Nuwra "Remse kami jijle."

**Naul nga Pol Muli  
Womue tevi  
TIMOTI  
Batu nale nga mivsviseni  
lut nga parmeteni naul  
ngel puto suri**

Timoti tasu sen evi nesen Isrel san nga mivi kele kalesia, ko tata sen evi meri Gris. Ko etipatun majingen sen nga mīmajing tevi Pol daron nga mivi mēlakel malume. Pol oli naul ngel nga rramveruse 1 Timoti tevi Timoti daron nga ni mokmetmete kalesia nir ie Epesas. Pol owra Timoti puwer ore nevisvisenien gerisen nga jinibb sopor marok-visviseni ie. Ko ospe kele suri lat nga marlot muto suri, ko lat nga kalesia liken ser puto suri renge devjen sopor kele.

*Pol owra erres tevi Timoti*

<sup>1</sup> Inu Pol, nuvi aposol se Iesu Kristo suri nale se Atua nga mīlai mauren tevi kerr, ko Iesu Kristo Numal se kerr nga rramok-teravi. <sup>2</sup> Nuwrai 'erres' tevi nik Timoti. Kurpe natuk woswos renge kalesia nir. Ko ngel evi loten suk, nga merrenien, netlasien, ko demat se Atua Tata ko Numal se kerr Iesu Kristo piptevīm.

*Pol owra puwer ore nevisvisenien gerisen*

<sup>3</sup> Erpe mowrai pa musuw tevīm daron nga mēlinglingim nga bean Masetonia, numrreni nik kuplik ko wor Epesas, nga kupwer ore nir nga marok-visviseni gerisen nir. <sup>4</sup> Ko kupwerai tevi nir nga nir parlinglingi tutunmasa gerisen ser ko naul nga marpepriv lenglengen ne nise metka ser nir. Daron nga marmeteni nanu ngok nir, ko arpalpal elep. Ko marongen se Atua sete orongwos piplari renge nanu ngok nir. Eplari kobbong renge nosurien se jinibb nir. <sup>5</sup> Ko Atua owrai kerr rrapēlak tweni merrenien nga miplari renge nalol nga muwokwok mīrres, ko nga sete mubbujbbuj suri nanu nga marsij nga rramlolir, ko renge nosurien nga mivi weretunen. <sup>6</sup> Jinibb sopor arlinglingi pa murrūn ngok nir ko arsarr pa renge nale nawon. <sup>7</sup> Nir arwera arongrongwos elep suri nale nesesreien se Atua, ko arok-rij eterter erpe norongwosien ser mutoe kobbong. Ko setete arongwose suri murrūn nale nga marok-werai.

<sup>8</sup> Ko rramrongwose erres nga nale nesesreien se Atua erres poro parrul totkoni renge sel momsawos nen. <sup>9</sup> Ko tetajer

rraprongwose nga nale nesesreien sete eplari tweni jinibb nga marres kobbong, ko purrul totkoni ma jinibb nga marok-tor otvi nale, ko jinibb nga marok-loli batur, ko jinibb nga sete marosuri Atua, ko jinibb nga marok-loli nololien nir, ko jinibb nga sete marvijuri sel se Atua ko sete marok-rrorrmī Atua nabong sapon, ko jinibb nga marok-revji pini tata ser ko tasu ser, rreknga marok-revji pini jinibb lele. <sup>10</sup> Ko evi nga purrul totkoni norman nga sete puloli pīsij tevi nesevin, ko nesevin nga sete puloli pīsij tevi norman, ko norman nga sete puloli pīsij tevi norman piprok kele. Ko evi kele nga purrul totkoni nir nga marok-venae jinibb, ko nir nga markerkeris, ko nir nga marlai nale gerisen re nospen se numal nir, ko nir nga marloli murrūn mīniji kele nga marsij ko martor otvi nale nga musorsan.

*Kristo etlasi Pol ko elngi nospen nga mīrres renge nevren*

<sup>11</sup> Nale ngok nga musorsan eplari renge nospen nga mīrres ne nosrōvien se Atua. Rrapsturōvi ni rengen. Ko nospen ngok Atua elngi pa renge nevrek osuw nga inu bowra tweni. <sup>12</sup> Inu nuwra erres tevi Iesu Kristo, Numal se kerr, nga mīlai derteren tevi inu, ko mīlesi inu mosorsan nga botori majingen sen. <sup>13</sup> Tuwi, nomok-rij esij tere ni, nomok-oji jinibb sen nir, ko nomok-loli esij tevir. Ko iok erpe nuloli esij tevi ni mawos. Ko erres kobbong, ni ornge esij suri inu, suri inu sete nurongwose nanu nga nomok-loli nir, ko sete nuosuri re wosenen. <sup>14</sup> Ko merrenien se Numal se kerr emejivjiv nawon ko elai nosurien ko merrenien nga morivi se kerr kokorti vajin tevi Iesu Kristo. <sup>15</sup> Ko nale ngel nga muwrai Iesu Kristo mivini iel ngatan nga pīla mauren tevi jinibb nga marsij evi nale weretunen, nga kerr rraposuri ko wor tetajer.

Ko inu nusij wor asi nir ngok. <sup>16</sup> Ko Iesu Kristo etlasi inu suri emrreni piviseni rrongi renge inu nolon nga mipriv torrlai tevi jinibb nir nga nir kele para-osuri ni, nga para-tor sweri mauren nga puto tuwi ngok vini. <sup>17</sup> Atua evi Numal ne tuwi ngok vini nga mauren sen sete orongwos pusuw nabong san. Evi Atua nga sete rramrongwos rraplesi; esan kobbong evi Atua. Rrapsture ko wor nisen pian mare, ko rrapsturōvi lelingenok ko pian pijpari tuwi ngok vini. Amen.

<sup>18</sup> Belai nale ngel tevīm, natuk Timoti, nga pusorsan tevi nale se Atua nga marwerai pae womu piplari suri nik. Kuptori totkoni nale ser nir, puloli nororrmien som puto pīterter nga kupbbōt totkoni nanu nga marsij nir. <sup>19</sup> Kupmetmete

nosurien som þirres, ko kupmetmet kele nga norrormien som sete pubbujbbuj, ko kupiel lingi sel nga m̄isij pivesane. Jinibb sopor sete arloli erpok, ko arlokloksi pa nosurien ser osuw. <sup>20</sup> Renge laru ngok nuru Aemenaes ko Aleksanda, nuru orloli pa esij erpok, ko nulngi pa nuru re derteren se Demij nga porlinglingi murrun ne nale nga m̄isij.

## 2

### *Loten*

<sup>1</sup> Nale suk nga womujnen nga kupwera i þitertter tevi nir, ngel: nga nir parlot ko wor pilep tevi Atua suri jinibb nir. <sup>2</sup> Ko parlot rengo loten lele nir suri numal nir ko jinibb nga marlelep nga martori totkoni vanu nir, nga Atua purongwos þilik tevir rengo majingen ser; ko nga rraprongwos rraplik rengo liken nga mumolmol m̄irres, ko nga rraprongwos rraplot tevi Atua ko nga rraprongwos rrapvijuri murrun jijle nga m̄irres. <sup>3</sup> Murrun ne loten nga mirpok erres þelak, ko ololi Atua nga m̄ila mauren tevi kerr ornge erres. <sup>4</sup> Suri ni emrreni þila mauren tevi jinibb totoklai, ko nga parlesi wose sev nga mivi weretunen. <sup>5</sup> Atua esan rres kobbong. Ko jinibb san esan rres kele nga m̄ilik livõ e Atua ko jinibb nir, evi Iesu Kristo nga mivi jinibb. <sup>6</sup> Ko ni elngi mauren sen nga puloli lilane sel nga pujri lweni jinibb jijle nir rengen. Lok eviseni erres rengo daron momsawos nen nga Atua mimrreni þila mauren tevi jinibb totoklai. <sup>7</sup> Ko Atua okoni inu erpe aposol nga bowra tweni nanu ngok. Nuwretun, sete nukerkeris; majingen suk evi nga bevisviseni jinibb ne vare nir murrun ne nosurien nga mivi weretunen. <sup>8</sup> Renge lat jijle, numrreni jinibb nir parlik malum nga lolaren ko laten pijki jir, ko nga parsusi nevrer paran mare ko parlot loten nga mumomsawos vajin tevi Atua.

### *Murrun momsawos se nesevin nir*

<sup>9</sup> Renge murrun ngok kele, numrreni nesevin nir paruri nijor ser nir rengo sel nga m̄irres, sete parkowkowrir nga parlokloksi mete jinibb nir. Ko sete parlokloksi daron pilep nga parviri batur. Ko sete parlokloksi nevõt pilep nga parwuli gol, rreknga nevõt nen nga marok-lai lolo botrum, rreknga sunsug nga nowlin mian mare þelak. <sup>10</sup> Ko parjoro i lweni nir sete tevi sunsug ko tevi majingen nga marres. Suri ngok evi murrun momsawos se nesevin san nga muwra ni evi kalesia nesevin san. <sup>11</sup> Nesevin parlik malum rengo Naim On, ko parloli norrormien ser pian ngatan

nga parongrongwos. <sup>12</sup> Nomok-wer ore nesevin nir nga sete parok-visviseni jinibb nir rengo Naim On, ko sete paran mare re norman, ko parlik malum kobbong. <sup>13</sup> Suri tuwi jer pa, Atua ololi Atam womujnen, ko vitunen ea-loli Iv. <sup>14</sup> Ko sete Atam ko nga murnge nale gerisen nen, ko vinnen ko ornge nale gerisen nen, ko otor otvi nale nesesreien se Atua. <sup>15</sup> Ko sel san otoi nga Atua þilai mauren tevi nesevin nir rengen, suri nesevin arvesi bipi. Ko nesevin parrul totoni kele ko wor nosurien ser ko merrenien ser ko paron þirres, sete parkowkowrir.

## 3

### *Murrun se jinibb nga marlelep se kalesia*

<sup>1</sup> Nale ngel evi nale weretunen: 'Poro nga san emrreni pivi jinibb nga pilep se kalesia, ko ni emrreni majingen nga m̄irres þelak ngok.' <sup>2</sup> Mernen sel sen þirres kemkanie ko wor, pimrreni temijjal nesen sen ko sete puoji nesevin m̄inij;<sup>A</sup> sete pivi jinibb nga pokminmin; pokmetmet lweni ni ko murrun puwokwok þirres. Ni þir ko wor nga þilai jinibb neturvitam paran jin. Ko ni purongwos þiwerwer kele. <sup>3</sup> Jinibb ne minninen ko jinibb ne balpalen sete putori majingen ngok. Pivi jinibb nga nolon mumolmol, sete mokkarkar, ko sete norrormien sen puto þelak rengo nevõt. <sup>4</sup> Ko pivi kele jinibb nga purongwos pimemet metka sen nir ko puloli natun nir parosuri ni nga parunge drrelan. <sup>5</sup> Poro jinibb san sete purongwose sel nga pimemetete metka sen nir rengen, ko pia-metmete kalesia nir pirpese ko? <sup>6</sup> Ko jinibb nga mia-ivi taol kalesia bbong sete orngwos putori majingen ngok, suri nolon turow þelake, ko Atua tia-tor vitrangi tirpe piator vitrangi Demij. <sup>7</sup> Ko jinibb nga putori majingen ngok kele pivi wor jinibb san nga jinibb ne vare nir parwera i pirlpel: 'O, m̄erel evi m̄er nga m̄irres þelak.' Ko re murrun ngok puloli nisen sete orngwos þisij, ko sete orngwos pivitan re nimet nga Demij m̄ilngi.

<sup>8</sup> Ko re murrun ngok kele kobbong, jinibb nga marlai majingen nga marmajing se kalesia nir, parmomsawos þirres, sete parvijuri nale nga marok-wera i þirres, sete parok-mini þelak norro rreknga nuwi nga m̄itertter, ko sete parmerreni þelak nevõt. <sup>9</sup> Ko parosuri þitertter nale weretunen ngok rengo murrun ne nosurien nga Atua miviseni pa musuw, nga sete nanu san pubbujbbuj rengo norrormien

<sup>A</sup> 3:2 Erpe iel, Pol owra 'Nesen sen pisansan kobbong', ko rengo nale se m̄eri Gris nir, ngok erpe þetile nale san nga mining nen erpe nga namlingi, 'pimrreni temijjal nesen sen ko sete puoji nesevin m̄inij.'

ser suri. <sup>10</sup> Ko kalesia nir parrowrow lesi lartul nga marwera parlai majingen ngok nir puwomu, ko poro parviter, kalesia nir arongwos para-susture nir vajin. <sup>11</sup> Ko nesen ser kele parmomasawos p̄irres, ko sete parworworsur, ko sete parok-minmin, parivi nesevin nga parok-majing tetajer suri norrorrmien ser p̄irres. <sup>12</sup> Lartul ngok nir parmerreni temijpal nesen ser nir, ko sete paroji nesevin m̄inij.<sup>B</sup> Ko parivi jinibb nga parongwos parmetmete natur nir ko metka ser nir p̄irres. <sup>13</sup> Nir nga marmajing m̄irres renge majingen ngok, niser orongwos pian mare ko norrorrmien ser orongwos p̄iterter kele wor nga parrul totkoni murrun nga marosuri m̄irres Iesu Kristo.

*Kerr kalesia rramtori totkoni weretunen se Atua*

<sup>14</sup> Timoti, daron nga moli naul ngel tevim, nomok-rorrm̄i rreknga sete mia-periv nga bevinuk Belesim iok. <sup>15</sup> Ko poro sete bevinuk pingavil, ko naul ngel evi nga puwrai visviseni murrun nga marsorsan nga rraptori, kerr nga rramivi kalesia se Atua nga mimaur. Kerr kalesia rramivi pa metka se Atua, ko rramtori totkoni weretunen oto erres.

<sup>16</sup> Ko weretunen, nale nga miteptepi suri Kristo renge murrun ne nosurien se kerr ean mare elep. Arsuṣuṣe erpel: Kristo ngel, Atua ololi eplari ko evi jinibb erpe kerr nga rraprongwose ni. Ko Nem̄in On ewilwil sen nga muwra, 'Mernen le ngel.' Ko anglo sen kele arlesi ni. Jinibb ne vare nir arunge nosṣen nga m̄irres sen, ko jinibb ne iel ngatan nir arosuri ni. Ko Atua elai ni vajin ean elik tevi renge melrin.

## 4

*Nevisvisenien gerisen*

<sup>1</sup> Nem̄in On owrai tweni pa osuw nga daron nga iel ngatan putomori pusuw, jinibb sopor arongwos parlinglingi murrun ne nosurien ser renge Atua, ko parosuri nem̄in ne gerisen kobbong nir. Ko demij parongwos parkerkerasi nir rengen. <sup>2</sup> Jinibb ne gerisen ngok nir nga markerkerasi jinibb nir mirpok, setemun arunge nanu san obbuḣbuḣ re nolor daron nga marloli m̄isij. <sup>3</sup> Nir parwer ore nga jinibb sete putotko, ko sete purro nanen lele. Ko Atua elngi pa nanen ngok nir nga jinibb nga marosuri ni ko marongwose weretunen parwera erres wor tevi Atua rengen ko parlai parurroi. <sup>4</sup> Nanu jijle nga Atua muloli arres kobbong; rramrongwos

rrapurroi nanu jijle poro rraplot ko rrapwera 'erres' tevi Atua rengen. <sup>5</sup> Suri nale se Atua ko loten nga mirpok arongwos parloli nanu jijle paron p̄irres re no Atua.

*Jinibb ne majingen nga musorsan se Iesu Kristo*

<sup>6</sup> Poro nik Timoti kopok-werai tweni nale ngok tevi tasi kerr nir, nik kupivi jinibb ne majingen se Iesu Kristo nga musorsan m̄irres. Ko nale ne nosurien ko nevisvisenien nga m̄irres nga komok-vijuri pora-irpe nanen som renge kalesia mauren som. <sup>7</sup> Sete kuprunge tutunmasa gerisen nir nga marij tere nale se Atua. Ko kupḣelak ko wor p̄iterter tweni mauren nga musorsan m̄irres nga Atua mimrreni. <sup>8</sup> Rrek erres sopen nga marḣelak tweni nga niber p̄iterter, ko erres kele renge sel jijle nga marḣelak tweni mauren nga musorsan m̄irres nga Atua mimrreni. Suri jinibb nga muloli mirpok orongwos purnge p̄irres renge mauren nga lelingenok ko mauren nga pia-vini vitu kele. <sup>9</sup> Nale ngok evi nale weretunen nga kerr rraposuri tortorlai ko wor tetajer. <sup>10</sup> Ko rramlingi pa norrorrmien se kerr osuw renge Atua nga mimaur, nga mokla mauren tevi jinibb jijle nir, ko mare nen kele ela mauren tevi jinibb nga marosuri ni. Ko niko rramokḣelak milep renge majingen se kerr.

<sup>11</sup> Ko nik Timoti kuprij p̄iterter ko wor ko kupvisiseni nanu ngok nir tevi kalesia nir. <sup>12</sup> Sete kuploli jinibb parkulu wutan renge nik suri nik kuvi m̄elakel kobbong san. Ko renge nale som ma ko liken som ko merrenien som ko nosurien som ko sel nga m̄irres som nga komokloli tevi nesevin nir, puloli kupviseni sel nga m̄irres tevi kalesia nir nga parvijuri. <sup>13</sup> Pian pijari daron nga inu bea-luwi e vini, nik kupḣelak nga kopok-eve wor Naul On, ko kopok-werwer, ko kopokvisiseni nir renge nale weretunen. <sup>14</sup> Sete kuploli norongwosien som nga Nem̄in On m̄ilai tevim seveling nga pa puto nawon. Arlai tevim suri nale se Atua nga propet san muwrai tweni tevim, daron nga Birterawareng nir nga marwowomue kalesia marwilwil nga marlingi nevrer renge batum. <sup>15</sup> Nik kuploli wor majingen ngok ko nir, norrorrmien som puto p̄iterter renge nanu ngok nir, nga puloli jinibb parongwos parlesi wose nga norrorrmien som oktajer malum. <sup>16</sup> Kupmetmete nik, ko kupmetmet renge nevisvisenien som kele. Kuptur p̄iterter renge nanu ngok nir, suri poro kuploli mirpok, nik kupa-loli

<sup>B</sup> 3:12 Erpe iel, Pol owra 'Nesen ser pisansan kobbong', ko renge nale se m̄eri Gris nir, ngok erpe Beṣile nale san nga mining nen erpe nga namlingi, 'parmerreni temijpal nesen ser ko sete puoji nesevin m̄inij.'



nik lweni kupasi van re mauren, ko nir nga marunge drrelam kele.

## 5

*Murrun nga m̄irres nga p̄iriv tevi jinibb nir*

<sup>1</sup> Sete kupan kuprij p̄iterter tevi jinibb nga m̄itra, ko kuprij ma rijrijen lilane tevi ni, erpe ni evi tata som woswos kobbong. Ko kuprij tevi m̄elakel nir parirpe tasim woswos. <sup>2</sup> Ko kuprij p̄irres tevi lekterwarreng nir pirpe nir arivi tasu som woswos. Ko kuprij kele tevi nesenwarreng m̄elakel nir pirpe nir arivi joim woswos, rengo sel nga muwokwok m̄irres.

*Murrun nga parmetmete nesevin nir nga diwen ser marmij lingir*

<sup>3</sup> Kuposuri p̄irres nesevin san nga diwen sen mimij lingi ko nga metka sen san mijki nga pimetmete ni. <sup>4</sup> Ko poro natun rreknga mebbun putoe, nir ngok ko parloli wos wore majingen nga milep ngel se kalesia nir, nga parmetmete metka ser. Nir parloli ko wor pirpel, erpe parkele lweni belaken se nir nga marvesir nga marloli tevir. Ngok evi nanu san nga Atua p̄ir rengen.

<sup>5</sup> Ko osorsan nga kalesia nir parmetmete nesevin nga diwen sen mimij lingi ngok ko nga metka sen arjkie nga parmetmete ni, ko nga m̄ilngi norrorrmien sen muto m̄iterter rengo Atua, ko nga muklu tetajer nat m̄irin ko nat mupong nga Atua pokmetmete ni rengo liken sen. <sup>6</sup> Ko poro nga ni mokrorrmi lweni ni kobbong, ngok erpe niben emaur malum ko nen̄in emij pa osuw. <sup>7</sup> Nale ngok kupwera tweni ko wor tevi nesevin ngok nir, nga parloli san sete orongwos p̄iwer lokloksi nir rengen. <sup>8</sup> Ko jinibb nga mumusus pimetmete metka sen mirpe tasu sen san nga diwen sen mimij lingi, eviseni nga ni setemun orul totkoni murrun ne nosurien, ko evan ngasu malum wore Atua easi jinibb san nga nosurien sen mijkie.

<sup>9</sup> Ko rengo naul ngok nga maruli tweni nise nesevin nir nga diwen ser marmij lingir rengen, nga kalesia nir parmetmete nir, kupuli bbong nise nesevin nir nga sia ser m̄iasi ngav̄ol ouwon (60), ko nga marmirreni temijpal diwen ser mijpari daron nga marmij lingir, ko sete maroji norman m̄inij.<sup>C</sup> <sup>10</sup> Ko nir niser parres ko wor, suri nir arok-loli majingen nga marres. Nir parivi nesevin nga marres, suri artor pipi erres epari nga natur marlelep, ko arok-ir nga parok-la neturvitan parini jir, ko parmetmete kalesia san p̄irres pelak poro pivini jir, ko parlai se nir nga jinibb

marojir. Suri nir norrorrmien ser eterter pa nga parloli majingen jikle nir nga marres.

<sup>11</sup> Ko sete kupuli tweni nise nesen m̄elakel nir nga diwen ser mimij lingir. Suri daron nga norrorrmien ne totkoiem mivini m̄iterter renger, ko taran ngasue Kristo vajin. <sup>12</sup> Ko jinibb nir tarwer lokloksi nir vajin, suri arlinglingi tweni rijrijen ser nga womu, nga setemun partotko kele ko parkorti tevi Kristo p̄isan vajin. <sup>13</sup> Ko pipok kele, tartipatun nga tarlik totrong nawon, ko tarivel karkar rengo naim nir, ko tarunge lokloksi ko tarworworsur, ko tarsūpe nanu nga sete m̄irres re nir parwerai. <sup>14</sup> Ko niko numrreni nesen m̄elakel nir nga diwen ser marmij lingir partotko kele ko wor, ko natur partoe, ko parmetmet lilane naim ser. Ko ngok puloli devje nuval se kerr sel ser pijki rrese nga parongwose parij tere kerr. <sup>15</sup> Nesevin nga diwen ser marmij lingir ngok sopor arivel lingi pa sel nga mimawos ko arvijuri Demij vajin.

<sup>16</sup> Ko poro kalesia nesevin san evi sops̄pen e nesevin san nga diwen sen mimij lingi, ni ko pimetmete p̄irres sops̄pen ngok. Sete parloli belaken nen pian re kalesia jikle nir. Ko kalesia nir vajin para-metmete nesevin nir nga diwen ser marmij lingir ko metka ser san mijkie nga pimetmete nir.

*Majingen se birterawarreng nir nga marok-wowomue kalesia nir (elta)*

<sup>17</sup> Birterawarreng nir nga marok-wowomue kalesia nir, poro nga parmajing p̄irres, ko kalesia nir parosurir ko wor. Ko parlai kele nev̄ot tevir, ko ngok erpe arlai nowlir evaru ko. Parloli pipok pilep ko wor tevi nir nga marpelak milep nga marweri ko marvisviseni. <sup>18</sup> Suri Naul On owra 'Daron nga kumlai buluk nga parbb̄ot tututweni jelangi wit nir, kami kaploli ko wor parurroi jelangin ngok sopor, sete kapkai totkoni jingor.' Ko nale owrai kele nga 'Poro jinibb san puloli majingen san, erres nga ni pia-la nowlin ren ji jinibb nga mokmajing ser.'

<sup>19</sup> Sete kaprunge nale san nga marwera 'O, birterawarreng ngok nga mokwowomue kalesia nir ololi esij', poro sete nir p̄ieru rreknga p̄itul nga parwera pipok ewretun. <sup>20</sup> Ko poro birterawarreng ngok san puloli p̄isij, kuprij p̄iterter tevi rengo no kalesia nir, nga puloli nir m̄inij parmetutu kele.

<sup>21</sup> Inu nuwrai eterter tevim rengo no Atua ko rengo no Iesu Kristo tevi anglo

<sup>C</sup> 5:9 Erpe iel, Pol owra 'Diwen sen pisansan kobbong', ko rengo nale se m̄eri Gris nir, ngok erpe betile nale san nga mining nen erpe nga namlingi, 'pimrreni temijpal diwen sen ko sete puoji norman m̄inij.'

sen nir nga ni m̄lŋgir pa musuw, nga kupvijuri ko wor nale suk ngok nga m̄elai tevim. Kuploli pusorsan ko wor tevi jinibb p̄t̄p̄eti. Sete kuploli sel nga m̄iterter tevi jinibb sopor, ko sel nga mimalum tevi nir sapon kele.

<sup>22</sup> Sete nolom pingavilvil nga kuplingi nevrengenge jinibb san nga kupsusture ni nga putori majingen san se Atua. Ko sete kupkorti tevi jinibb karkar nir nga parloli kupvitan van rengenge nololien ser. Kuprrul totkoni mauren som puwokwok p̄irres.

<sup>23</sup> Sete erres nga nik kopok-mini nuwi kis kobbong, ko suri nik komok-mesi daron elep, ko erres nga nik kopok-mini norro beblen nga puloli lilane depaim.

<sup>24</sup> Nololien se jinibb sopor arto limjer rres, ko jinibb jijle arlesi wos pae nololien ser osuw. Ko jinibb sopor ma arloli nololien ser arto kelti, nga jinibb sete p̄ilesi wose pian pijpari nabong nga Atua pia-wera suri lat nga puto suri tevi jinibb nir. Ko iok evi batun nga mowrai sete nolom pingavilvil nga kuplingi jinibb san putori majingen san se Atua. <sup>25</sup> Ko erpok kele, majingen nga marres kele arto limjer kobbong. Ko poro sete parto limjer womu, ko nir para-pelari ko wor nabong sapon.

## 6

*Murrun nga mumomsawos se jinibb ne majingen nir*

<sup>1</sup> Nir nga marivi jinibb ne majingen parosuri ko wor numal ser nir p̄irres, puloli sete jinibb san purongwose p̄iwer lokloksi nise Atua ko nevisvisenien se kerr, nga parwera 'O, kalesia nir sete armajing erres'. <sup>2</sup> Ko jinibb ne majingen nga numal ser marivi kalesia sete arongwos parloli murrun ngok nga parwera "O, numal suk erpe tuwak kobbong", ko sete parosuri p̄irres suri. Ejki, parmajing p̄irres kele wor, suri arok-majing se kalesia san nga marmmerreni.

*Nevisvisenien gerisen ko nijor nga marres*

Nanu ngok nir, kupwer visviseni ko kupwer sesesre ko wor tevir. <sup>3</sup> Ko si nga mivisviseni nevisvisenien m̄inij nga sete musorsan tevi nale weretunen se Iesu Kristo Numal se kerr ko tevi nosurien nga mimawos m̄irres, <sup>4</sup> ko m̄iernen sete orongwose nanu san, ko norrorrmien sen ean mare p̄elak. Ko murrun ngok ololi arok-merreni lenglengen partertere nir re nale, ko nolor eleplep, ko parsisij tevir, ko parlat, ko norrorrmien nga marsij p̄elak parto tevir. <sup>5</sup> Ko ngok evi murru jinibb nga norrorrmien ser m̄ilengleng, ko weretunen ejki rres jir, ko niko marmmerreni parlat tetajer. Ko nir arrorrmi nosurien se

jinibb orongwos puloli sel nga putor sweri nev̄ot pilep.

<sup>6</sup> Ko ewretun, murrun nosurien se kerr evi sel nga jinibb orongwos putor sweri nanu pilep, poro ni p̄ir suri sev nga muto pa jin. <sup>7</sup> Ko kurongwose, daron nga rrampelari iel ngatan sete rramtori nanu san tevi kerr. Ko daron nga rrapluwi kele, sete rrama-tori nanu san kele tevi kerr. <sup>8</sup> Ko poro nanen se kerr putoe, ko sunsun se kerr puto kele, ngok evter pa kerr ko. <sup>9</sup> Ko p̄isij re jinibb nga marokmerreni nga joror pilep, parirpe jinibb san nga nover misrapo ore. Ko murrun nga marmmerreni joror pilep ngok e orongwos puloli parvitan p̄isij nga mauren ser pian p̄isij p̄t̄p̄eti. <sup>10</sup> Murrun nga marmmerreni p̄elak nev̄ot e evi batbatu murrun lele nga marsij. Ko jinibb sopor arok-vijuri sel ngok eterter, ko aran ngasue murrun ne nosurien vajin, ko arloli nanu elep nga nir kele marunge m̄isij milep suri.

*Nale mawos se Pol tevi Timoti*

<sup>11</sup> Ko nik, Timoti, kuvi jinibb se Atua. Kupruj ngasue nanu ngok nir. Ko kup̄elak ko wor pilep nga kuploli murrun nga musorsan m̄irres, ko murrun nga muon m̄irres, ko nosurien, ko merrenien, ko nga kuptur p̄iterter pijpari bongsin, ko nga kupivi jinibb malum. <sup>12</sup> Kupwolu p̄iterter rengenge woluen ne nosurien, nga kuplai mauren nga muto tuwi ngok vini pivi som. Suri Atua everuse nik nga kuplai mauren ngok rengenge daron nga kumwera tweni nosurien som bonevis rengenge no delung nir. <sup>13</sup> Ko womu ne Atua, nga m̄ila mauren tevi nanu jijle, ko womu ne Iesu Kristo nga muwra tweni nosurien nga m̄irres sen rengenge no Ponjes Paelet, <sup>14</sup> nuwrai eterter tevim nga kupvijuri nale nen nir p̄iterter, sete kupvitan re nanu san, pianan pijpari nabong nga Iesu Kristo Numal se kerr pia-luwi kele vini rengen. <sup>15</sup> Kristo ngok, Atua pia-viseni ni rengenge daron momsawos sen. Atua ngok esan kobbong derteren sen otoo, ko jinibb jijle parsur̄ovi ko wor, ko evi Numal se numal ngabe ngabe p̄t̄p̄eti nir. <sup>16</sup> Ni esan rres kobbong nga mauren nga muto tuwi ngok vini oto jin. Ko lat nga m̄ilik ren erinrin erres, nga jinibb san sete orongwos pian mori. Atua ngok, sete jinibb san elesi wor nabong san, ko sete san orongwos p̄ilesi. Ko kerr rapsusi nisen pian mare tetajer, ko rrapwera tweni derteren sen nga puto pijpari tuwi ngok vini. Pirpok ko.

*Kalesia nir nga nijor ser milep*

<sup>17</sup> Kuprij p̄iterter ko wor tevi nir nga nijor ser milep iel ngatan, nga sete parloli norrorrmien ser pian mare p̄elak, ko puto p̄elak rengenge nev̄ot ser. Suri rrek nev̄ot

orongwos pijijki kobbong. Ko nir parlingi norrorrmien ser puto rengen Atua kobbong. Suri ni oklai pa nanu elep nga rraprunge p̄irres rengen. <sup>18</sup> Nik kupwera ko wor tevir nga nir parloli majingen nga marres, ko nga parir rengen majingen ngok nir p̄iasi nga marir rengen nijor ser nir. Nolor parres, ko parvijngeni joror tevi nir nga joror mijkie. <sup>19</sup> Re murrun ngok erpe arokingi lilane joror nga marres nir re melrin nga parto p̄iterter tetajer tuwi ngok vini. Ko parongwose vajin parlai mauren nga mivi mauren weretunen.

*Bongsi nale se Pol tevi Timoti*

<sup>20</sup> O Timoti, kuptor totkoni p̄irres nanu nga Atua m̄ilngi pa re nevrem musuw. Kupan ngasu re nale nawon ngok nga marij tere Atua rengen, ko lenglengen se nir nga marwera evi norongwosien, ko ejki, nir arkerkeris kobbong. <sup>21</sup> Suri jinibb elep arok-vijuri murrun ngok, nga muloli maran ngasu pa rengen murrun ne nosurien.

Ko ngel evi loten suk, nga merrenien se Atua piptevi kami jijle. Nuwra "Remsom".

**Naul Erwen nga Pol Muli  
tevi  
TIMOTI  
Batu nale nga mivsivseni  
lut nga parmeteni naul  
ngel puto suri**

Nanu nga milep nga Pol muspe suri renge naul erwen nga muli tevi selen Timoti evi nga Pol mimrreni Timoti nosurien sen piterter ko puloli majingen sen pumomsawos, ko nga sete pimtutue jinibb. Ko Pol owra Timoti puruj ngasue murrun nga nir sopor marok-loli nga marok-palpal suri nale, ko owra Timoti pivijuri sel nga nurrer nga nilesi Pol muwlu rengen.

*Pol owra erres tevi Timoti*

<sup>1</sup> Inu Pol nuvi aposol se Iesu Kristo suri marongen se Atua, nga bowra tweni nospen nga nurrer ne mauren nga mivi se nir nga markorti pa tevi Iesu Kristo. <sup>2</sup> Nuwrai "erres" tevi nik, Timoti, natuk nga memrrenim milep. Ngel evi loten suk, nga merrenien, netlasien ko demat se Atua Tata ko Iesu Kristo Numal se kerr piptevim.

*Pol erij nga pususture norrorrmien se Timoti*

<sup>3</sup> Nuwra "erres" tevi Atua. Nomok-majing sen nga nolok sete obbujujbu, erpe birterawareng suk nir ne tuwi marok-loli. Ko natnirin ko natmupong, daron nga nomok-lot, tetajer nomok-rrorrmni nik, ko nomok-wera "erres" tevi Atua surim. <sup>4</sup> Nomok-rrorrmni daron nga melinglingim ko kumtengsik, ko numrreni lenglengen wor nga bevinuk belesim kele, nga puloli beir lenglengen luwi kele. <sup>5</sup> Ko nurrorrmni wose nosurien som nga sete mivi gerisen, nga musorsan kobbong tevi nosurien nga apu som lekter Loes ko tasu som lunis mortori. Ko nurongwose erres nga nik kele nalol ngok oto malum tevim. <sup>6</sup> Ko suri nanu ngok, nuwrai tevim nga derteren nga Atua mlai tevim daron nga melngi nevrengem, kopok-wuni suri ko wor, nga sete pian ngatan. <sup>7</sup> Suri Nemnin nga Atua mlai tevi kerr, sete evi nga puloli rrapmetutue jinibb, ejki. Nemnin ngok evi nga pila derteren ko merrenien, ko nga puloli kerr rramrongwos rraprur ore sev nga kerr kobbong rrammerreni.

<sup>8</sup> Ko suri nanu ngok, nik sete kupmanun nga kupwera tweni nospen se Numal se kerr. Ko sete kupmanune inu kele suri nga inu mean re naim ne nekaien suri numajing sen. Ko nik kupmarong ko wor

nga jinibb parloli pisij tevim suri nospen ngok, ko Atua puloli kuptur piterter vajin.

<sup>9</sup> Atua elai mauren tevi kerr, ko everuse kerr osuw nga rrapivi jinibb on sen tuwi jer pa, suri Iesu Kristo. Ko ni sete ololi erpok suri elesi majingen se kerr erres, ejki. Ololi erpok suri ni kobbong marongen sen ko merrenien sen. <sup>10</sup> Ko Iesu Kristo nga mokla mauren tevi kerr errmali vajin ji kerr. Ko ni eviseni merrenien se Atua, ko erevji pini pa derteren ne mijen, ko ololi mauren nga sete murongwos pusuw errmali vajin renge nospen sen.

<sup>11</sup> Ko Atua okonik erpe aposol nga bowra tweni ko bevisviseni nospen sen nga nurrer nen. <sup>12</sup> Ko ngok evi batun nga marwirrek vini re naim ne nekaien ngel. Ko sete nurongwos bemanun, suri nurongwos pae jinibb nga mosuri osuw. Ko nurongwose erres nga ni orongwose pimetmete inu renge nanu jilje nga ni mlngi pa re nevrengem, pianan pijpari nabong nga Atua pia-wera suri lat nga puto suri tevi jinibb nir. <sup>13</sup> Kuptori totkoni nale weretunen nga mevisviseni tevim. Ngok eviseni sel nga kupvijuri, renge murrun ne nosurien ko merrenien nga rramok-korti tevi Iesu Kristo rengen. <sup>14</sup> Nanu nga marres pelak ngok nir, nga Iesu Kristo mlngi pa re nevrengem, nik kuptori totkoni wor nir ko renge derteren se Nemnin On nga mlilik pa re nolo kerr musuw.

*Pol owra tweni murrun se Onesiporas*

<sup>15</sup> Erpe kurongwos pae osuw, selek nir nga iel Asia, tevi nuru nga Pukelas ko Emojenos, arwolu lingi pa inu osuw. <sup>16</sup> Ko ngel evi loten suk, nga Numal puloli pirres tevi metka se Onesiporas, suri womu ni okla lweni inu vavis le pa. Ko ni sete emanun nga inu melik iel Rom re naim ne nekaien, ejki; <sup>17</sup> ko daron nga miplari iel, ko epejpej inu eterter, mianan ko eskai inu vajin. <sup>18</sup> Ko nulot nga Numal pilai netlasien tevi renge nabong nga Atua pia-wera suri lat nga puto suri tevi jinibb nir. Suri nik, Timoti, kurongwose erres pelak ni ololi nanu elep nga marres tevik iak Epesas.

**2**

*Jinibb ne nuval mawos se Iesu Kristo*

<sup>1</sup> Ko natuk, kupterter renge merrenien nga mivi se kerr nga rramkorti tevi Iesu Kristo. <sup>2</sup> Ko kuptori nevisvisenien nga kumrunge pa jik renge no delung nir. Ko kuplingi nale ngok nir renge nevre nir nga kurongwos nir murrur erres, ko nolom eterter renge nir nga parviter parvisviseni nir mlngi kele vajin renge nale ngok nir.

<sup>3</sup> Nik kupmarong ko wor nga jinibb parloli pisij tevim suri nale ngok. Ko kupirpe

vajin jinibb ne nuval san nga m̄irres se Iesu Kristo. <sup>4</sup> Re daron ne nuval, jinibb ne nuval sete orongwos pivel sarrsarr pirpe lartul nga nuval mijki jir. Ni piplak ko wor p̄iterter nga puloli nabur sen purnge p̄irres rengen. <sup>5</sup> Ko jinibb nga mokwolu re woluen san sete orongwos putor sweri nowlin nga womujnen poro sete puosuri murrun mawos ne woluen nen. <sup>6</sup> Ko jinibb nga mokp̄elak milep rengo orsel sen, erres p̄elak nga ni p̄iaani nanen nen puwomu. <sup>7</sup> Kuprroormi nale rrongrrongvi suk ngok nir, ko Numal se kerr piviseni nik nga kuprongwose murrun p̄etp̄eti nen tweni mauren som.

*Erres nik kuprroormi Iesu Kristo*

<sup>8</sup> Kuprroormi Iesu Kristo, nga mimaur luwi rengo mijen, ko nga mivi metka se Numal Devet san, erpe nga nomok-werwere pa rengo nospen nga m̄irres. <sup>9</sup> Suri nospen nga m̄irres ngok nga nomok-werwer e, ko jinibb arok-loli nomok-runge esij ko arka'i totkoni inu e dil ngel nga mivi delrrurr, erpe nga marok-loli tevi jinibb san nga mokloli m̄isij. Ko nale se Atua ma sete arongwos parkai totkoni rengo dil san. <sup>10</sup> Ko ngok, nolok sete evitan rengo nanu nga marsij nir nga marloli tevik; ko nuplak nga beskai sel nga Atua p̄ilai mauren tevi nir nga markorti tevi Iesu Kristo, nga paran para-korti kele rengo mauren ne nosrovien rengo melrin nga sete mia-suw nabong sapon. <sup>11</sup> Ko ngel evi nospen weretunen san: 'Kerr erpe rramkorti ko pa tevi rengo mijen sen; ko niko, rrapa-korti kele vajin tevi rengo mauren sen. <sup>12</sup> Poro nga rrapok-tur p̄iterter, ko rramongwos rrapa-korti tevi rengo derteren nen se Numal. Ko poro rrapok-kerkeris nga rrapok-wera sete rramivi jinibb sen, ko ni kele orongwos pia-wera tweni nga ni sete evi Numal se kerr. <sup>13</sup> Ko poro kerr sete rraporti totkoni rijrijen se kerr, ko ni pia-tori totkoni wor rijrijen sen ko tetajer, suri ni sete orongwos p̄irieni kele nale sen san.'

*Sel mawos nga musp̄e suri nale weretunen se Atua*

<sup>14</sup> Nik kopok-werai visviseni nale ngok ko tevi jinibb som nir. Ko nik kopok-rij p̄iterter tevi nir rengo no Atua nga nir parlinglingi murrun ngel nga marok-lat suri nale kobbong. Murrun ngok ololi mauren se jinibb nga marok-runge evan esij kele wor elep. <sup>15</sup> Ko nik kupp̄elak ko wor pilep nga kupivi jinibb ne majingen nga Atua purnge p̄irres surim, ko kupivi jinibb nga sete pimanun rengo majingen sen; ko kupivi jinibb nga mokvisviseni jinibb rengo nale weretunen se Atua rengo murrun nga musorsan m̄irres. <sup>16</sup> Sete kupruj

mori nale ngok nir nga marij karkar tere Atua. Rijen nga mirpok okrevei tweni bbong jinibb ko nir, nga paran ngasu kele rengo Atua. <sup>17</sup> Rijen se jinibb nga maripok erpe bolkar san nga sete murongwos p̄irres luwi kele. Tetajer okkar elep nga pulokloksi belan. Ko nale se nuru Aemenaeeas ko Paelitas erpok. <sup>18</sup> Nuru ngok ortor jabble pa sel suri nale weretunen, ko nuru orok-lokloksi kele murrun ne nosurien se kalesia sapor. Suri nuru orok-werai nga meraien ne mijen eplari jile pa osuw, ko niko, daron nga kerr rrammij, ko nibe kerr sete mara-maur luwi. <sup>19</sup> Ko batu nale nga m̄iterter nga Atua m̄ilngi pa sete orongwos putoto, ko nale nga muto rengo batu nale ngok owrai erpel: 'Numal Atua orongwos pae jinibb sen nir osuw'. Ko nale m̄inij san kele rengo Naul On owrai erpel kele, 'Ko si nga muwra ni evi jinibb se Atua p̄ilngilngi ko wor murrun nga sete marsorsan m̄irres.'

<sup>20</sup> Renge naim se jinibb nga joron milep, narov lele arto rengen. Sapor armajinge rengo nanu nga marerr m̄irres, ko sapor arsavi rengo duru nai, rrek armajing nir rengo dan kobbong. Sapor arivi nga parlingi nanen rengo daron ne nabong nga milep, ko sapor arivi nga marlingi nanen rengo nabong jijle kobbong. <sup>21</sup> Ko poro jinibb san puloli ni puwokwok rengo nanu nga marsij ngok nir ko puon p̄irres, ko ni pia-irpe vajin narov ngok nga numal sen purongwos pia-rrul totkoni rengo nabong nga milep. Ko m̄iernen elik metmet vajin nga pia-loli majingen jijle nga m̄irres.

*Jinibb ne majingen se Atua nga Atua murnge m̄irres rengo*

<sup>22</sup> Kupruj ngasue murru lenglengen se m̄elakel nir nga marmerreri sev nga marsij nir.

Ko kupp̄elak tweni murrun nga musorsan m̄irres, nosurien, merrenien, ko demat, tevi nir nga norrorrmien ser muwokwok m̄irres, ko marok-verus van ji Atua tetajer.

<sup>23</sup> Ko kupan ngasu rengo laten se nir nga marlengeng, suri nik kurongwos pae nga murrun ngok orongwos pivesi balpalen kobbong. <sup>24</sup> Ko jinibb ne majingen se Numal sete pivi jinibb ne balpalen. Ni pivi wor jinibb ne nevisvisenien, ko norrorrmien sen pimalum, ko nolon pipriv tevi jinibb totoklai. <sup>25</sup> Ko ni purongwos piviseni lilane nir nga marok-tere ni, rengo murrun nga mumolmol kobbong. Ko rrek Atua ko puloli nolor pululuwi nga puloli parini parongwose weretunen nen vajin.

<sup>26</sup> Ko norrorrmien nga m̄irres pijpari vajin batur, ko parwolul lingi never nga Demij m̄ilngi, nga m̄ilair rengo nga puloli parvijuri norrorrmien sen.

## 3

*Murru jinibb renge daron ne nabong nga vitu*

<sup>1</sup> Nik kuprongwose wor nanu ngel: nga mauren ne iel ngatan pivini piterter pilep re daron ne nabong nga vitu. <sup>2</sup> Jinibb parrormi lweni nir kobbong, ko parmerreni nevöt pilep. Nir parij melmas, ko norrorrmien ser pian mare pelak, ko parij pisij tevi jinibb nir, ko sete mara-osuri tata ser ko tasu ser. Ko sete mara-wera "erres" tevi seler renge nanu san, ko sete mara-rongwos parrormi Atua. <sup>3</sup> Parivi jinibb nga parloli terter nanu tevi jinibb minij nir nga sete parunge pisij ren, ko parongwos parllokoxi nise jinibb minij. Parivi kele jinibb nga marok-verver ko marerri lenglengen. Ko nir parungasi sev nga mirres. <sup>4</sup> Parivi jinibb nga parloklokxi seler nir nga sete parosurir, ko sete partotrong suri sev nga parloli, ko norrorrmien ser pian mare pelak. Parivi jinibb nga marmmerreni nanu nga parunge pirres ren, easi nga parmerreni Atua. <sup>5</sup> Renge no jinibb nir, nir parok-loli nga parvijuri murrun se kalesia nir, ko sete parmerreni derteren se Atua pirieni norrorrmien ser nga marsij. Sete kupruj mori rragrrag jinibb nga marirpok. <sup>6</sup> Nir sopor arokan loloim nga parkerkerasi nesevin nir nga batur marjikke ko marok-likto suri nololien ser, ko norrorrmien lele nga marsij marok-revei totkonir. <sup>7</sup> Nesevin ngok nir tetajer arok-merreni jinibb pivisvisenir, ko sete arongwos partor sweri weretunen nabong san. <sup>8</sup> Nir ngok artere nale weretunen, erpe tuwi laru nga morongrongwos ngok nuru, Janes ko Jabres, ortere Moses. Jinibb nga marirpok nir, norrorrmien ser sete osorsan, ko murrun ne nosurien ser evi gerisen kobbong. <sup>9</sup> Ko majingen ser sete mia-to mia-periv, suri jinibb jikle para-lesi murru lenglengen ser, pirpe nir nga tuwi marlesi murru lenglengen se nuru ngok.

*Kupvijuri ko wor murrun suk*

<sup>10</sup> Ko nik, Timoti, kuvijuri pa nevisvisenien suk, murrun suk, ko sev nga inu mielngi nolok rengen, ko murruk ne nosurien, ko nolok nga mipriv, ko merrenien suk, ko murruk nga nomok-rrul totkoni majingen puto piterter pijpari bongsi majingen nen. <sup>11</sup> Ko nik kulesi pa nga jinibb marok-oji pelak inu, ko marloli nibek murunge misij. Nik kurongwos pae sev nga mutur sweri inu Antiok ko Ikoniom ko Listra, nga jinibb marok-oji inu, ko marok-loli misij pelak tevik. Ko Numal elai tweni inu re nanu ngok nir. <sup>12</sup> Ko si nga marmmerreni parmaur korti tevi Iesu Kristo renge mauren nga musorsan mirres, nir ngok kele ko para-ojir ko para-loli pisij

tevir pirpok kele. <sup>13</sup> Ko jinibb nga marsij ko jinibb ne gerisen nir partajer malum ko parkerkeris malum tevi jinibb nir, ko nir kele vajin parongwos parosuri nale gerisen ser.

<sup>14</sup> Ko nik ma kuptori totkoni nanu nga namvisviseni tevim tuwi, ko nga kumosuri pa mirres musuw, suri nik kurongwose erres murrun se kem nga namvisviseni nik e. <sup>15</sup> Ko nik kurongwos pae daron nga kumivi bipi mivini mijpari lelingenok, nga kurongwose erres nale ne Naul On. Nale nen orongwos puloli kuprongwos pirres renge sel nen nga Atua purongwos pila mauren tevi nir rengen. Ko sel nen evi nga parosuri Iesu Kristo. <sup>16</sup> Ko nale jile renge Naul On arpelari ji Atua, ko erres nga pivisviseni jinibb, ko puwrai tweni gerisen sen poro putoe; ko erres nga piete murru lenglengen, ko pivisviseni jinibb nir renge murrun nga musorsan mirres. <sup>17</sup> Atua elai nale ngok nir nga puloli jinibb sen nir norongwosien ser pilep jikle ko nga partiriv terai vajin majingen jikle nga marres.

## 4

*Kuptori totkoni ko wor nale se Atua*

<sup>1</sup> Renge no Atua ko renge no Iesu Kristo, nga pia-wer sesesre lat nga puto suri tevi jinibb jikle nir, nir nga marmaur, ko nir nga marmij pa, inu nuwrai nale nga miterter ngel tevim. Suri nga Iesu Kristo pia-luwi kele vini, ko suri batun vanu sen nga pia-rremali vajin, inu nuwrai eterter tevim: <sup>2</sup> Kupwerai tweni ko wor nale sen. Poro parmerreni parunge rreknga ejki, ko erres kobbong. Tetajer nik kupterter nga kupwerai tweni. Kuprevei jinibb nga parosuri Kristo, ko kuprij piterter tevir nga sete parloli karkar nanu, ko kuploli norrorrmien ser parterter. Kuploli nolom pipriv nga kupvisviseni nir pirres. <sup>3</sup> Suri daron pia-vini nga jinibb sete parmerreni parunge nale nga mivi nale weretunen, ko parvijuri lweni nir kobbong norrorrmien ser, ko paran parpej jinibb nevisvisenien pilep nga parongwos parwerai nale sev nga nir kobbong parmerreni parunge. <sup>4</sup> Ko nir partur telure nale weretunen ngok, ko paran ngasu ko parunge tutunmasa nawon kobbong nir. <sup>5</sup> Ko nik kupmetmet ko wor pirres renge sev nga marinuk jim, nga kupvijuri sel nga musorsan. Ko poro nga parloli pisij tevim, ko nik kuploli wor norrorrmien som piterter ko pipriv. Nik kuploli ko wor nga kupwerai tweni nospen nga mirres se Kristo, ko kuploli petpeti majingen ngok nga Atua milai tevim.

*Mauren se Pol otomori pusuw*

<sup>6</sup> Ko inu, daron suk evini pa nga belinglingi mauren suk; partor pinik suri

nuvi jinibb se Atua. <sup>7</sup> Nuḗlak pa elep reŋge woluen, nuwlu nunsi ꝑetꝑeti lat ne woluen nen, ko nurrul totkoni nosurien suk tetajer. <sup>8</sup> Ko nowli jinibb nga mokasasi reŋge woluen oto metmet pa teraik nga bean Belai. Nowlin ngok Numal pia-lai tevik reŋge nabong nga Atua pia-wera suri lat nga puto suri tevi jinibb nir. Numal osorsan erres, ko ni pia-lai nowlik ngok tevik suri inu mauren suk osorsan erres. Ko sete inu kis kobbong, ko tevi kele nir jijle nga marok-tiriv kele tevi merrenien daron nga ni pia-rremali luwi e.

*Pol elai nosꝑen tevi selen nir*

<sup>9</sup> Inu numrreni nga kupsaro pingavil nga kupini kuplesi inu. <sup>10</sup> Suri Demas emrreni ꝑelak mauren ne iel ngatan, ko owlu lingkik pa evan Tesalonaeka e. Ko Kreseus kele evan pa Galesia e, ko Taetas kele evan pa Dalmatia e. <sup>11</sup> Ko Luk kobbong elik tevik lelingenok. Ko erres ma kupan kuplesi Mak nga ni piptevim; suri ni okpitevik erres reŋge majingen. <sup>12</sup> Ko nukoni pa Tikikas evan Epesas pae. <sup>13</sup> Daron nga kupini e, ko erres kuplai sunsun ne melas suk tevim nga mēlŋgi tweni mijpon jer Troas, reŋge naim se Kapas. Ko erres kuplai kele naul suk nir parini, o ko womujnen reŋge naul ngok nir, kuplai kele naul ngok nga marmajing nir reŋge nevlu nanani.

<sup>14</sup> Morok Aleksanta nga mivi jinibb nga mokmajing delrrurr nir olokloksi inu elep. Ko Numal pia-kele lweni sev nga muloli ngok. <sup>15</sup> Ko nik kele kupmetmet reŋge ni, suri etre nale se kerr eterter.

<sup>16</sup> Ko womujnen daron nga mean loloim re kot iel Rom nga bowrai tweni nale suk, sete san erij suk. Nir jijle arwolu lingkik. Ngel evi loten suk, nga Atua sete putor vitrangir suri. <sup>17</sup> Ko Numal ma elik tevi inu, ko elai derteren tevik, niko ololi nurongwos bowrai tweni ꝑetꝑeti nale sen, ko jinibb ne vare ꝑetꝑeti nir parunge. Ko otomori jer parlingi inu van re mijen, ko Atua ela tweni inu. <sup>18</sup> Ko Numal ngok pia-lai tweni inu reŋge nanu jijle nga marsij, ko pia-teakai inu ꝑirres van reŋge batun vanu sen ne melrin. Ko rrapok-susi nisen pian mare tetajer pijpari tuwi ngok vini. Pipok ko.

*Bongsi nale se Pol*

<sup>19</sup> Kupwera “erres” suk tevi Akwila ko nesen sen Prisila, ko tevi kele metka se Onesiporas. <sup>20</sup> Erastas elik jer iak Korin; ko daron nga mēlinglingi iak Maelitas, nulinglingi Tropimas elik jer iak, suri ni emsi. <sup>21</sup> Inu numrreni nga kupsaro pingavil nga kupini kuplesi inu puwomu, ko daron ne melas pia-vini. Iupulas, Putens ko Linas,

tevi joji kerr Klotia, ko tevi tasi kerr ko joji kerr nga iel jijle nir, arwerai “erres” tevim.

<sup>22</sup> Ko ngel evi loten suk, nga Numal piptevi nik reŋge norrorrmien som. Ko merrenien sen piptevi kami jijle. Nuwra “Remsom”.

## Naul nga Pol Muli tevi TAETAS Batu nale nga mivsviseni lut nga parmeteni naul ngel puto suri

Pol elngi Taetas nga ni p̄majing renge norour ne Krit, ko oli naul ngel tevi nga pusp̄e suri lat nga p̄majing tweni majingen sen puto suri. Pol osp̄e suri liken se jinibb san nga puwowomu re kalesia nir. Ko osp̄e kele suri liken se kalesia nir puon ko p̄irres p̄irpese.

### *Pol owra 'Erres' tevi Taetas*

<sup>1</sup> Inu Pol nuvi jinibb ne majingen se Atua. Ko Iesu Kristo okonik erpe aposol nga ßela se jinibb nga Atua n̄l̄ngir pa musuw nga nir parosuri ni, ko nga parongwose nale ne weretunen nga mivi batbatu kalesia mauren se kerr. <sup>2</sup> Ko ni okonik kele nga bololi nir parlingi norrorrmien ser puto p̄iterter renge mauren nga muto tuwi ngok vini. Mauren nen, Atua, nga sete orongwos p̄ikerkeris, owrai womu pae tuwi jer nga p̄ilai tevi kerr. <sup>3</sup> Ko renge daron momsawos nen, eviseni mauren nen, renge nale sen. Ko Atua nga m̄ila mauren tevi kerr elngi nale ngok renge nevrek, ko owrai eterter nga inu bowra tweni ko wor tevi jinibb nir.

<sup>4</sup> Taetas, nik kurpe natuk woswos renge metka ne nosurien, nomok-uli nale ngel tevim. Ngel evi loten suk, nga merrenien ko demat se Atua Tata ko se Iesu Kristo nga m̄ila mauren tevi kerr p̄iptevim.

### *Majingen se Taetas iak Krit*

<sup>5</sup> Nulngim iak renge norour nga Krit nga nik kupmajing lilane majingen nir nga mevel lingir. Nuwrai pa tevim nga kupsusture b̄irterawarrang nga parwowomu re kalesia nir renge lat j̄jle nir. Ngok kupr̄orrmi nale lilane suk ngel: <sup>6</sup> B̄irterawarrang nga pokwowomu re kalesia nir pivi wor jinibb nga mauren sen musorsan ko n̄irres. Ko pimrreni temijpal nesen sen ko sete puoji nesevin m̄inij.<sup>A</sup> Ko natun kele nir parosuri Atua ko wor. Sete erres nga nosp̄en nga m̄isij puto suri natun nir, nga marwolu karkar rrek sete marosuri nale. <sup>7</sup> Jinibb san nga pokmetmete kalesia nir, mauren sen pusorsan wor p̄irres. Suri Atua elngi pa majingen sen oto re nevren. Ni nolon sete pian mare p̄elak, sete purongwos pulolar

pingavil, sete pokminmin, sete pokpalpal, ko sete pokmerreni nev̄ot pilep. <sup>8</sup> Ni poklai ko wor neturvitan nir paran re naim sen. Ko pimrreni sev nga n̄irres. Ko pivi m̄er nga pusorsan p̄irres, ko puon p̄irres. Ko sev nga m̄isij nga ni mimmrreni, pubb̄ot ore tetajer. <sup>9</sup> Ni putor totkoni nale nga rramok-visviseni jinibb nir ren p̄iterter ko nga sete purongwos pimjabb̄ol. Ko ni purongwose v̄ajin p̄ivisviseni jinibb nir renge nale momsawos nen, ko p̄iwer rrrerarre nale se nir nga martere nale nen.

### *Jinibb ne nevisvisenien gerisen*

<sup>10</sup> Ko jinibb elep sete arosuri nale, ko arkerkerasi jinibb m̄inij nir renge kalesia tevi norrorrmien ser nga n̄ikarkar. Nir elelep renge nir ngok arivi m̄eri Isrel. <sup>11</sup> Kapwer ore ko wor nale ser, suri renge metka sopor, nale nga mirpok erpe pok-lokloksi pa jinibb p̄etp̄eti nir. Jinibb ngok nir arvisviseni jinibb nir renge nale nga sete n̄irres nga jinibb puwrai, nga puloli parongwos parev̄i bbong nev̄ot ser pilep ren. Ko murr̄un ngok evi nga jinibb non p̄isij e kobbong. <sup>12</sup> Meri Krit lweni kobbong san nga mivi propet se nir, owra 'O, m̄eri Krit arivi jinibb nga marok-kerkeris tetajer, arirpe nanu rrum nga marsij, arivi jinibb nga sete marongwos parmajing, ko marorr milep.' <sup>13</sup> Ko nale sen ewretun kob-bong. Ko suri nanu ngok, nik kupsurponir ko wor nga puloli nosurien ser p̄iterter. <sup>14</sup> Nik kupwer ore nir nga setemun parrul totkoni tutunmasa gerisen ngok se m̄eri Isrel nir, ko nale se nir nga marivel lingi pa nale weretunen musuw.

<sup>15</sup> Nanu j̄jle arwokwok tevi nir nga nolor marwokwok, ko sete nanu san owokwok tevi nir nga nolor marrokitkit ko sete marosuri. Suri norrorrmien ser orongta pae renge nanu nga m̄isij osuw, ko nolor setemun arongwos parbbujbbuj re nanu nga marsij nga marok-lolir. <sup>16</sup> Nir ngok arok-wera arongwose Atua, ko murr̄un nga marok-loli arviseni nga nale ngok nga marok-wera evi gerisen kobbong. Nir ngok arsi p̄erp̄er. Arok-tor otvi nale, ko sete arongwos parloli nanu nga n̄irres san.

## 2

### *Nale tevi jinibb nga martera nir*

<sup>1</sup> Ko nik Taetas kupwera tweni ko wor nevisvisenien nga musorsan tevi nale weretunen. <sup>2</sup> Kupwera tevi b̄irterawarrang nir nga sete parmini p̄elak norro rreknga nuwi nga m̄iterter, ko nga murr̄un nga mumomsawos puto tevir. Ko

<sup>A</sup> 1:6 Erpe iel, Pol owra 'nesen sen pisansan kobbong', ko renge nale se m̄eri Gris nir, ngok erpe ßetile nale san nga mining nen erpe nga namlingi, 'pimrreni temijpal nesen sen ko sete puoji nesevin m̄inij.'



sev nga m̄isij nga nir marmmerreni, partur ore tetajer. Nosurien ser ko merrenien ser porsorsan p̄irres, ko parongwos partori majingen ser p̄iterter pian pijpari bongsin. <sup>3</sup> Ko renge murrun ngok kele kobbong, kupwera tevi lekterwarreng kele nir nga nir parloli wor murrun nga marmomsawos, pirpe nesevin nga marlik renge sel nga muon m̄irres. Ko sete parij p̄isij suri nise jinibb m̄inij nir. Ko sete parok-mini p̄elak norro rreknga nuwi nga m̄iterter. Ko parvisviseni sel nga m̄irres ko wor, <sup>4</sup> nga parongwos parsesre nesenwarreng nir nga nir parmerreni lenglengen diwen ser tevi natur nir. <sup>5</sup> Ko sev nga m̄isij nga nir marmmerreni, partur ore ko wor, puloli nga nir paron p̄irres. Ko parvisviseni nga parmetmete naim ser p̄irres, ko nga parosuri diwen ser. Ngok puloli jinibb san sete purongwos p̄irij tere nale se Atua.

#### *Nale tevi m̄elakel nir*

<sup>6</sup> Ko renge murrun ngok kele kobbong, nik kuprevei m̄elakel kele wor nir nga sev nga m̄isij nga nir marmmerreni, partur ore tetajer. <sup>7</sup> Renge nanu jille nga kumloli, kupviseni ko wor renge nor majingen nga marres nga komok-lolir, nga puloli nir parvijuri vajin. Ko daron nga kopok-wer visviseni, ko nale som pivi wor weretunen ko, ko purrow p̄irres. <sup>8</sup> Ko kupvisviseni nale nga musorsan kobbong, nga jinibb sete parongwos parij p̄isij suri. Ko kuprongwos kuploli vajin jinibb san nga mutur tere kerr non p̄isij, suri ni nanu nga puwrai tere kerr pijkie, suri murrun ne kalesia nir osorsan erres.

#### *Nale tevi jinibb ne majingen nir*

<sup>9</sup> Nik kupviseni jinibb ne majingen nir nga parosuri numal ser ko parloli numal ser parir renge nanu jille nga marlolir. Ko sete parij weli kele numal ser, <sup>10</sup> ko sete parsesaro renge nanu se numal ser. Ko nir parviseni tetajer nga nir arok-loli erres, puloli numal ser parongwose parbibto re nir. Ko re murrun ngok, nanu jille nga marlolir ngok parjoroj rengo no jinibb nir nale se Atua nga mokla mauren tevi kerr.

#### *Batbatu mauren se kalesia nir*

<sup>11</sup> Merrenien se Atua ermmali pa nga p̄ilai mauren tevi jinibb jille nir. <sup>12-13</sup> Ko kerr rramok-tiriv nga rraples nabong nga milep ngok nga norrorrmien se kerr muto rengen, nga Iesu Kristo nga mivi Atua ko nga p̄ilai mauren tevi kerr pia-rremali rengen tevi nosrövien sen nga milep. Ko lelingenok nga rramok-tiriv, merrenien ngok se Atua eviseni tevi kerr nga lelingenok ko pa rraplinglingi murrun nga sete marsorsan re no Atua. Sete rrammerreni

p̄elak nanu ne iel ngatan nir. Ko nanu nga marsij nga kerr rrammerreni, rrapur ore tetajer. Rraploli murrun nga marsorsan marres nga Atua purnge p̄irres suri kerr renger.

<sup>14</sup> Iesu Kristo ela mauren sen nga p̄ila mauren tevi kerr. Ko ni ojri lweni kerr renge murrun nir nga sete marsorsan, ko ololi kerr rramirpe gortien san nga mauren se kerr muwokwok m̄irres. Rramivi jinibb sen kobbong, ko rramterter nga rraploli majingen nga marres nir. <sup>15</sup> Kupwera nale ngok tevi jinibb som nir. Ko kupsusture norrorrmien ser, ko kuprij p̄iterter nga kupwer ore murrun nga m̄isij se nir renge derteren jile nga muto jim. Ko sete kuploli jinibb san puklu wutan re nik.

## 3

### *Murru kalesia nir*

<sup>1</sup> Kupwera lillane tevi jinibb som nir nga parosuri ko wor jinibb nga marlelep nir nga martori vanu, ko nga parvijuri nale ser. Ko parlik metmet tetajer nga parloli majingen nga marres nir. <sup>2</sup> Ko kupwera tevir nga sete parij p̄isij tere jinibb san, ko sete parivi jinibb nga parok-lat; parivi jinibb nga parok-loli sel p̄irres tevi jinibb nir. Ko murrur pumolmol tevi jinibb totoklai. <sup>3</sup> Ko kerr kele, bonevis rramok-irpok, nga rramok-lengleng nabong sapon, ko rramok-tor otvi nale ko rramok-sarr; ko nabong sapon rramok-loli nanu nga rraprunge p̄irres ren nga kerr kobbong rrammerreni. Ko iok rramirpe demij maur se nanu ngok nir. Ko tetajer, nolo kerr oklelep, ko rramok-tori lolaren epriv p̄elak. Jinibb nir arungasi kerr, ko kerr rramungasi nir.

<sup>4</sup> Ko daron nga merrenien se Atua ko sel sen nga mokloli m̄irres miplari ji kerr, ko ni elai mauren tevi kerr vajin. <sup>5</sup> Ko sete ololi erpok suri kerr rramloli majingen nga marres, ejki. Ela mauren tevi kerr suri ornge esij kobbong suri kerr. Erpe Nerñin On errawe vaseni nolo kerr ko ololi kerr erpe rramiak luwi tevi mauren nga mimerr kele. <sup>6</sup> Erpe Atua ololi Iesu Kristo nga mila mauren tevi kerr ejvireni Nerñin On sen rengo kerr. <sup>7</sup> Ko nalol nga m̄irres sen elai mauren tevi kerr nga muloli rramivi jinibb nga marsorsan m̄irres rengo non, ko kerr rramrongwos rrapur sweri mauren nga sete orongwos pusuw. Rramlingi norrorrmien se kerr oto pa rengo mauren nen osuw. <sup>8</sup> Nale ngok evi weretunen.

Ko numrreni nik Taetas kuprij wor suri nanu ngok nir, nga puloli jinibb nga marosuri Atua arongwos parloli norrorrmien ser p̄iterter kele nga parloli majingen nga

marres, ko nga marongwos para-rres kele wor tevi jinibb jijle nir. <sup>9</sup> Ko nik kupan ngasu wor re laten se nir nga marlengleng ko nga marok-meteni pelak re naul ne nise metka ser nir nga tuwi pa, ko kupan ngasu wor re laten ko balpalen nga marok-loli rengo murrun wowarrens nga marpelari rengo nale nesereien se Moses. Nale nga marirpok arivi nale nawon rres, sete arongwos parloli nanu san pirres. <sup>10</sup> Poro jinibb san pokloli jinibb parwijwij ngasu nir rengo nale nga mirpok, ko nik kupan kupser metutue pijari pivaru kobbong, ko vitunen setemun kupan. Ko setemun kupkorti tevi mernen kele. <sup>11</sup> Suri nik kurongwos pae jinibb nga mirpok, norrrmien sen esij ko pa, ko nololien sen eviseni nga ni ololi pa esij.

*Bongsi nale se Pol*

<sup>12</sup> Ko daron nga mokoni Atemas rreknga Tikikas nuru tuwen vinuk jim, nik kuppelak pitertter nga kupini jik Nikopolis, suri inu nurrormi bean belik ie daron ne melas. <sup>13</sup> Ko kuppelak kele nga kupla se nuru ngok Apolos ko jinibb nga mokvisviseni nale ngok Sinas, nga kupseser tevi nuru rengo nanu jijle nga portori rengo sel se nuru. <sup>14</sup> Ko jinibb se kerr nir parongwos parterter ko wor rengo majingen nga marres, nga parongwos parlai se nir nga nevrer murrrol rengo nanu san. Sete erres nga parlik nawon.

<sup>15</sup> Nir nga marlik tevik iel arwera "Erres" tevi nik. Ko nik kupwerai "erres" tevi sele kem nir nga marivi kalesia. Ko ngel evi loten suk, nga merrenien se Atua puto tevi kami jijle. Nuwra "Remsom".

## Naul nga Pol Muli tevi PILIMON Batu nale nga mivsvseni lut nga parmteni naul ngel puto suri

Pilimon evi jinibb nga nijor sen milep, ko evi kele kalesia. Ni elik rrek ie Kolosi. Ko jinibb ne majingen sen san nga nisen Onesimas owlu lingi. Mian ko Onesimas mivini mulesi Pol, nga re wosenen milik re naim ne nekaien. Ko Pol ela Onesimas vini ji Kristo, evi vajin kalesia. Ko Pol okoni vajin Onesimas nga pulwi van ji Pilimon, ko oli naul ngel tevi nga Onesimas putori suri. Ko Pol owra Pilimon sete pulolarsi Onesimas. Ko owra kele nga Pilimon pia-koni Onesimas pia-luwi kele van ji Pol ko pimejmajing sen pijpari nga Pol pia-ivel sisarow renga naim ne nekaien nga marrul totkoni ni rengen.

### *Pol owra "Erres" tevi Pilimon*

<sup>1</sup> Inu Pol, nga melik re naim ne nekaien ngel suri Iesu Kristo, ko Timoti kele nga mivi tasi kerr, nomorwera "erres" tevi nik, Pilimon. Kerr itul ngel, rramlik renga majingen sansan kobbong, ko komru nomormerrenim elep. <sup>2</sup> Ko nomorwera "Erres" tevi joji komru Apia, ko tevi natu kamru Akipas, nga kem namivi jinibb ne nuval ne gortien sansan kobbong. Ko nomorwera "Erres" kele tevi kalesia nir nga marok-korti renga naim som. <sup>3</sup> Ko ngel evi loten suk, nga merrenien ko demat se Atua Tata ko se Iesu Kristo nga mila mauren tevi kerr, piptevim.

### *Merrenien ko nosurien se Pilimon*

<sup>4</sup> Pilimon, daron nga molot e, tetajer nomok-rrormi nik, ko nomok-werai "Erres" tevi Atua, <sup>5</sup> suri nomok-runge nospen suri merrenien nga komokmerreni lenglengen jinibb se Atua nir, ko nosurien som nga muto mitertter renga Numal Iesu. <sup>6</sup> Nomok-lot suri nga nik komok-korti tevi kem renga murrin ne nosurien, ko numrreni kele nga kuprongwos kele nanu nga marres nir nga Atua moklai tevi kerr nga rramkorti tevi Kristo. <sup>7</sup> Niaken suk, merrenien som ela neiren nga milep tevik, ko ololi norrorrmien suk eterter kele vajin. Ko murrin som ngok okloli jinibb se Atua nir arunge erres luwi vajin renga norrorrmien ser.

*Pol ongoni Pilimon nga pilai lweni  
Onesimas*

<sup>8</sup> Ko suri nanu ngok, ko suri rromorkorti pa tevi Iesu Kristo, nurongwos berij pitertter tevim nga kuploli ko wor nanu ngel nga musorsan mirres nga kuploli. <sup>9</sup> Ko suri memrrenim, sete numrreni berij pitertter tevim, ko bongonim kobbong. Inu le Pol, nutra le pa, ko lelingenok nulik re naim ne nekaien ngel suri Iesu Kristo. <sup>10</sup> Ko nungonim suri Onesimas, nga mivi jinibb ne majingen som womu, mian ko muwlu lingim. Ko daron nga melik malum re naim ne nekaien ngel, ko melai vini ji Kristo. Ko ni erpe natuk ko vajin. <sup>11</sup> Womu Onesimas sete orongwos puloli majingen som nga mirres san, ko lelingenok vajin orongwos puloli majingen nga marres pilep se nik ko se inu kele, suri evi vajin kalesia.

<sup>12</sup> Ko lelingenok nukoni ni pulwi vinuk jim. Ko norrorrmien suk oto malum bbong tevi. <sup>13</sup> Ko numrreni poro pilik mun iel sopon tevik, nga ni pila milnge nik nga pimnejmajing se inu renga naim ne nekaien ngel nga melik ren suri nospen nga mirres. <sup>14</sup> Ko inu sete numrreni nga bosortonim nga kuploli nanu ngok nga pirres tevik pipok. Nik kuploli suri nik ko wor kumrreni. Ko sete nurongwos bololi nanu san poro nga nik sete kupmarong. <sup>15</sup> Rrek kutor jabble Onesimas behlen, nga daron nga kupla lweni, ko pilik tevim pijpari tuwi ngok vini vajin. <sup>16</sup> Ko lelingenok ni asi kele pa jinibb ne majingen. Ni evi vajin tasi kerr nga mirres, nga inu memrreni milep. Ko rrek nik kupmerreni kele wor pias, suri ni evi jinibb ne majingen som, ko okorti kele tevi Numal. <sup>17</sup> Ko poro kopok-lesi inu pirpe nga rromorivi niaken kobbong, erres nga sete kuplolarsi ni, ko kuploli pirpe nga kupla inu vinuk renga naim som. <sup>18</sup> Poro ni ololi esij pa tevim renga nanu tama san, rreknga nivnon sen san oto jim, erres nga nik kuplingi inu nisek puto renga nivnon sen nen. <sup>19</sup> Nale ngel nuli tevi inu nevrek kobbong. Inu Pol bea-wuli lweni nivnon ngok tevim. Ko sete kupmalie nga nik nivnon som oto pa jik, suri inu nuvi batun nga nik kumtor sweri pa mauren ji Kristo. <sup>20</sup> O tasik, kupla se inu renga nanu ngel, suri kerru rromorkorti pa tevi Numal. Kuploli inu bornges pirres luwi renga norrorrmien suk.

<sup>21</sup> Nomok-uli nale ngel vinuk jim, ko nurongwose erres nga nik kuploli nanu nga inu mongoni jim. Ko nurongwose nga nik kuploli kele wor pias sev nga mowrai ngel. <sup>22</sup> Ko re daron mawos nen kele, kuploli milnguk san puto metmet teraik renga naim som. Suri tetajer inu nomok-rrormi nga Atua okrunge verusen se kami jijle ko pia-la lweni inu vinuk ji kami kele.

*Bongsi nale se Pol*

<sup>23</sup> Epapras ngok, nga moklik renge naim ne nekaien tevi inu <sup>24</sup> suri Iesu Kristo, tevi Mak, ko Aristakas, ko Demas, ko Luk, nga marok-majing tevi inu, arwera "Erres" tevim. <sup>25</sup> Ko ngel evi loten suk, nga merrenien se Iesu Kristo Numal puto tevi kami jikle. Nuwra "Remse kami".

## **Naul nga mian ji Meri Isrel Nir (Ibrus) Batu nale nga mivsvseni lut nga pargeteni naul ngel puto suri**

Sete rramrongwose si oli naul ngel: Pol, rreknga Apolos, rrek nir mīnij nen san. Ko oli van ji mēri Isrel sopor nga marivi kalesia. Ko owra Iesu ean mare re anglo nir (1:5-14), ean mare re propet nir, ko ean mare kele re Moses ko Josua (2:1—4:14). Iesu evi batu jinibb ne sulsulen nga mumomsawos mīrres pētēpeti, suri ni ejkie nololien. Ni emarong bbong pimij erpe sulsulen san nga mian ji Atua, ko setemun rrammerreni sulsulen mīnij kele san nga rraplai tevi Atua (9:23—10:18). Ko Atua ololi ni emaur luwi re mījen, ko etasi vajin sel nga jinibb jijle arongwos paran ji Atua (4:14—5:10; 7:1—8:13).

Ko naul ngel ošpe nosurien kele, owra kerr rraposuri ko wor Iesu. Nosurien ololi kerr rramrongwose erres nga rraplai ji Atua nanu nir nga lelingenok sete rramleslesir. Ošpe nosurien se jinibb se Atua nga tuwi nir (11:1-40), ko owra kerr kele nosurien se kerr pīterter ko wor (12:1-3).

*Iesu ean mare wor easi propet nir*

<sup>1</sup> Tuwi jer vini, Atua ok-rij tevi Bīrterawarrēng se kerr nir reнге sel lele nir rruurrngi propet nir. <sup>2</sup> Ko reнге ma nabong nga mivi bongsi iel ngatan erpe rramlik vajin rengen lelingenok, erij mawos vajin rruurrngi Natun mawos. Natun ngok ko, womu jer daron nga iel ngatan mitipatun e, ko Atua emajing nanu jijle reнге ni nevreng; ko owrai nabong sopon nanu jijle para-ivi sen e. <sup>3</sup> Natun ngok, moron se Atua omor rengen, ko non omor erpe Atua, ko eviseni erres Atua. Ni kobbong orrul totkoni nanu jijle, ko ololi kele arto erres reнге derteren ne rijrijen sen. Ko emarong lweni kele nga mivini mīrrawe tweni nololien se kerr jijle. Daron nga mivinvini jijle majingen sen ngok iel ngatan ko olwi van re melrin e, ko elik vajin tevi Tata sen reнге nevreng rres, nga mivi Numal nga mian mare reнге melrin.

*Iesu ean mare kele wor easi anglo nir*

<sup>4</sup> Iesu ean mare kele wor easi anglo nir, ko nisen nga miwajie ean mare wor easi nise anglo nir. <sup>5</sup> Rramrongwose iok, suri Atua sete owrai nabong san tevi anglo sen san owra 'Nik kuvi natuk. Lelingen nuvini bevi tata som woswos'; ko Atua sete ošpe kele anglo sen san nga muwra, 'Inu bevi

Tata sen ko ni pivi natuk.' <sup>6</sup> Ko daron nga ma Atua muwra pukoni natun norman nga mivi mērwomu vini iel ngatan, ko owra 'Anglo pētēpeti se Atua parsusi wor nisen ko van mare.' <sup>7</sup> Ko reнге nospen tweni anglo nir Atua owra 'Nuloli anglo suk nir arirpe ling nga muwuw karkar, ko nuloli nir nga marmajing suk arirpe nabb nga muroror.'

<sup>8</sup> Ko daron nga ma nale on muspe suri natu Atua, ejilwer suri erpe nga ni osorsan bbong tevi Atua, owra 'O Atua, nik kuvi Numal, ko kupivi Numal ko pa pijpari tuwi ngok vini. <sup>9</sup> Ko komok-loli erres pelak ko pa reнге murrun nga kummetete jinibb jile nir ren. <sup>9</sup> Kumrreni sev nga mīrres ko musorsan, ko kungasi sev nga mīsij. Iok ko evi batun nga Atua nga mivi Atua som mutobbobbue nik ko ololi kurnge erres nga mususi nisen van mare temijpal easi jinibb nga marlik rrale nik.'

<sup>10</sup> Ko vesan kele Atua owra 'Numal, tuwi jer pa, nik kobbong kuloli iel ngatan muto, ko reнге nevreng kobbong kulngi melrin mare. <sup>11</sup> Nanu ngok nir paran ko parjiki, ko nik ma kuplik tetajer. Nanu ngok nir pian ko partera daron sopon pirpe sunsun nga mian ko mītra, <sup>12</sup> pirpe boriti nga mītra san nga marlulngi tweni mijkie, erpe nijor nga martera nir nga marlai twenir. Ko nik ma kusorsan kumerr tetajer, ko mauren som sete orongwose pusuw nabong san.'

<sup>13</sup> Ko nale se Atua san oto kele nga ni setewor owrai rragrage tevi anglo sen, ko owrai ma tevi Natun mawos, owra 'Kuplik ko pa kuptiriv reнге devjek rres pijpari nga belngi devje nuval som nir parirpe boriti nga kupvervasi ngatan.'

<sup>14</sup> Ko niko anglo nir arirpese? Arivi bbong neṁin nga marmajing se Atua, ko arivi nga parwilwil se kerr, ngok kerr nga Atua pīla mauren tevi kerr.

## **2**

*Nospen nga mīrres se Iesu ean mare wor easi nale neseseien se Moses*

<sup>1</sup> Renge iok ko, kerr rrapterter ko wor nga rraprrul totkoni nale weretunen nga rramrunge pa musuw, puloli sete rrapror jabble sel se kerr. <sup>2</sup> Rramlesi pa reнге nale se Moses nga miplari ji anglo nir tuwi pa tevi metka se kerr nir, nga arivi weretunen; ko nir nga martor otvi nale ngok ko sete marosuri, artor sweri pa norongen nga mīsij osuw. <sup>3</sup> Iow, ko rrapasi pirpese reнге norongen nga mīsij ngok poro sete rrapvijuri sel nga mimerr nga Atua mimrreni piwilwil se kerr ren lelingenok? Iesu, Numal se kerr, owomu jer nga muwrai tweni sel ngok nga Atua piwilwil se kerr ren. Ko nir nga marunge ni arviseni tevi

kerr nga sel ngok evi weretunen jerjer; <sup>4</sup> ko Atua vajin okorti tevi nir nga puwrai lilane nga sel ngok evi pa weretunen jerjer. Okloli nanu nga marinijnij nawone nir ko nanu nir nga jinibb marok-taole nir; ko ok-tututweni derteren nir nga marpelari ji Neñin On aran ji jinibb, osorsan erpe nga ni mimrreni.

*Iesu owomu renge liken nga pia-vini vitu*

<sup>5</sup> Atua sete osusture anglo nir nga parivi numal renge liken nga mimerr nga pia-vini, ngok liken nga rramok-jiljilwere ngel. <sup>6</sup> Suri nale san nga muto renge Naul On owra 'O Atua, suri sev kumrrormi milep suri jinibb, nga mivi nanu nga welili jer kobbong?' <sup>7</sup> Kuloli ni ean ngatan renge anglo nir beblen kobbong, ko lelingenok kulai nais nga mian mare ko kususture, <sup>8</sup> ko kuloli emetmete nanu jijle.' Nale nga muwra, 'emetmete nanu jijle', eviseni nga sete nanu san pijpon, ko nanu jijle vajin. Ko setewor rramlesi nga jinibb san emetmete nanu jijle nir. <sup>9</sup> Ko rramrongwos ma rraplesi Iesu nga mivini iel ngatan mivi jinibb, ni ko evi vajin Numal ne nanu jijle nir. Ko renge nalol nga mirres se Atua, ololi Iesu ean ngatan renge anglo nir beblen kobbong, puloli ni pimij nga piwilwil se jinibb nir. Iesu ornge esij renge niben eanan ejpari mimij; ko renge iok ko, Atua osusture lweni, ko elai nais nga mian mare tevi.

<sup>10</sup> Atua ngok nga muloli nanu jijle nga marivi sen, emrreni pilai jinibb pilep parini parkorti tevi renge mauren nga mirres pelak sen renge melrin. Ko osorsan erres tevi murrun sen nga muloli Iesu murnge müsij renge niben, nga pivi jinibb mawos nga puloli ni purongwose piwilwil se jinibb vajin. Ko Iesu owomu re nir nga Atua mimrreni piwilwil se nir. <sup>11</sup> Atua ololi aron ko arwokwok erres renge nololien ser. Ko ni tevi nir nga muloli marwokwok, tata ser sansan kobbong. Ngok ko ololi Iesu sete emanun nga puwrai nga nir arivi tasin ko jojin nir. <sup>12</sup> Iesu owra 'Atua, bowrai tweni murrun som renge no tasik ko jojik nir. Belai nubo ko bosrövi nik renge no jinibb som nir.' <sup>13</sup> Ko owrai kele 'Belngi nosurien suk piterter renge Atua'; ko owrai kele 'Inu le ngel tevi natuk nir nga Atua mlai pa tevik musuw.'

<sup>14</sup> Ko kerr jijle nga rramivi natu Atua, kerr jijle rramivi jinibb, rramivi drra ko niben. Ko ewretun Iesu evini erpe tuwa kerr, ko emaur renge drra ko niben erpe kerr. Ko emarong kele niben nga pimij suri kerr. Ololi erpok suri renge mijen sen orongwose putor pini derteren ne mijen nga Demij murrul totoni. <sup>15</sup> Elai tweni

derteren se Demij nga mulokloksi kerr nga tetajer muloli rramok-metutue mijen.

<sup>16</sup> Ko oto limjer nga Iesu sete ewilwil se anglo nir, suri Naul On owrai, 'Ewilwil se nir nga marpelari renge metka se Epram.' <sup>17</sup> Ko norrrormien se Atua erpok, elesi erpe Iesu pivini pivi niaken kobbong tevi kerr renge nanu jijle nir. Ko kerr rraptur piterter ko wor renge nosurien se kerr renge majingen nga Iesu ololi tevi Atua suri nololien se kerr, nga puloli no kerr pirres tevi Atua. Erpe ni evi batu jinibb sulsulen se kerr nga mokrrormi kerr. <sup>18</sup> Otur tere daron nga marterter milep renge nanu elep nga marpelari renge mauren sen nga murnge müsij suri, mianan ko easi; ko lelingenok orongwose piwilwil se kele kerr daron nga nanu nga marterter marini marrowrrowe kerr.

### 3

*Iesu ean mare wor easi Moses*

<sup>1</sup> Tasik ko jojik nir, Atua everus pa kami osuw nga kapon ko kapivi jinibb sen. Ngok, kaprrormi ko wor Iesu nga Atua mukoni ko mlngi mivi batu jinibb sulsulen tevi kerr jijle nga rramosuri. <sup>2</sup> Iesu ololi osorsan erres renge no Atua nga mususture ni renge majingen ngok, erpe tuwi Moses mok-loli musorsan renge majingen sen nga mimetmete jinibb se Atua nir. <sup>3</sup> Ko jinibb nga mñmaging naim ean mare wor easi naim ngok; ko erpok kele osorsan nga Atua pususture Iesu pian mare kele wor piasis Moses. <sup>4</sup> Ewretun naim jijle, jinibb sisamis emajinge; ko Atua ma emajinge nanu jijle nir. <sup>5</sup> Moses osuri ko ololi osorsan nga mimetmete jinibb se Atua nir. Ni evi jinibb ne majingen se Atua nga mok-werwer womu renge nanu nir nga jinibb mñnij se Atua para-werai vitue. <sup>6</sup> Ko Kristo ma ololi osorsan renge majingen se Atua erpe evi pa natu Atua mawos. Ko kerr rramrongwose rrapivi jinibb sen, poro rraplingi norrrormien se kerr puto piterter renge nanu nir nga rramrongwose erres nga Atua pia-lai tevi kerr.

*Meri Isrel ne tuwi artor jable sel*

<sup>7</sup> Renge iok ko pirpe ko wor nga Neñin On muwrai renge Naul On muwra 'Porokaprunge nale se Atua lelingen <sup>8</sup> setemun batu kami piterter nga kaptere ni pirpe nga nir marok-loli tuwi. Sete kaploli murrun ngok nga marrowrrowe ni renge lolo merwer.' <sup>9</sup> Re daron nen kele, Atua owra 'Renge lolo merwer ngok, birterawarrang se kami nir arok-lesi murrun suk nga marres tetajer ejpari sia ngavöl ivij (40), ko arloli lesi wor nga parrowrrowe inu tetajer. <sup>10</sup> Renge iok ko ololi inu nulolarsi temijpal nir suri; ko nuwra, nir arlengleng

nawon, ko sete artor sweri murrun suk rragrag. <sup>11</sup> Inu nulolar ko nuwirr nale nga miterter san, nuwra 'Nir ngok sete paran renge dan ser nga moro belai teir parmosi ren.'

<sup>12</sup> Tasik ko jojik nir, kapmetmet nga sete kami san norrorrmien sen puwun saut re nanu nga marsij nir, ko sete tuosuri Atua nga mimaur nga sete orongwos pimij nabong sapon, ko tutur imare, ko tivel lingi. <sup>13</sup> Kapwilwil sisamis se kami nabong jijle. Renge nabong jijle, kerr rramwera "Lelingen", ko niko, nale nen renge Naul On nga muspe suri 'lelingen' eplari ji kerr. Ko niko, nabong jijle, kaploli norrorrmien se kami puto piteter, nga puloli nololien sete orongwose pikrekrasi kami san, ko pirvei tweni kami san. Ko batu kami keke sete piteter. <sup>14</sup> Suri poro rraprrul totkoni nosurien se kerr nga rramtipatun ren piteter pianan pijpari bongsi mauren se kerr, ngok kerr jijle rrapok-korti tevi Kristo vajin nga rrapror sweri nale rijrijen se Atua.

<sup>15</sup> Nale on owra 'poro kaprunge nale se Atua lelingen, setemun kaploli batu kami piteter pirpe nga birterawarrend nir se kami marloli tuwi nga martur imare ko martere ni.' <sup>16</sup> Ko siko nir nga marunge nale se Atua ko martur mera ko martere keke ni? Ko nir ngok ko nga Moses mitkai tweni nir Ijip. <sup>17</sup> Ko siko nir nga Atua mulolarsi temijpal nir mijpari sia ngavöl ivij (40)? Ko nir ngok kobbong nga marloli misij ko marmij renge lat karkar renge lolo merwer. <sup>18</sup> Ko siko nir nga Atua muloli nale terter ngok tweni nir, nga muwra 'Nir ngok sete paran renge dan ser nga moro belai tevir parmosi ren'? Ngok nir nga bbong martur mera ko marok-tere ni. <sup>19</sup> Ko rramlesi wose nga nir ngok sete aran renge dan ser suri sete arosuri Atua.

## 4

### *Jinibb se Atua parmosi*

<sup>1</sup> Ko Atua elai nale rijrijen san pa tevi kerr osuw nga kerr rrapror sweri mosien nga ni pilai. Ko rrapmetmet nga kerr san sete tivter. <sup>2</sup> Suri rramrunge pa nospen nga mirres osuw erpe nir ngok nga tuwi marunge. Arunge, ko arunge nawone kobbong, suri daron nga marunge ko sete arosuri. <sup>3</sup> Ko kerr nga ma rramosuri, rraplesi ko wor mosien nga Atua pia-lai tevi kerr. Ngok mosien nga Atua muwrai pa nga muwra 'Nulolar ko nuwirr nale nga miterter san nuwra, nir ngok sete paran renge dan ser nga moro belai tevir parmosi ren.' Atua erij erpok, ko tuwi pa daron nga mimajing iel ngatan ko evinvini jijle wor majingen sen, ko omosi vajin.

<sup>4</sup> Suri nale san oto renge Nale On nga muwra 'Atua elngi iel ngatan ko nanu jijle nir renge nabong ouwon, ko renge nabong ebutun ko omosi rengen.' <sup>5</sup> Ko nale keke san ospe suri mosien ngok keke, owra 'Nir ngok sete mara-lesi mosien se Atua.' <sup>6</sup> Nir nga marunge womu nospen nga mirres ngok sete arlesi mosien ngok, suri sete arosuri Atua. Ko oto limjer nga nir minij ma partor sweri mosien ngok. <sup>7</sup> Renge iok ko Atua elngi nabong minij keke san nga marveruse "Lelingen". Mian ko sia elep arasaki, ko Atua owrai rurrngi re jingo Devet nale nen nga rramlesi pa nga muwra 'Poro kaprunge nale se Atua lelingen, setemun batu kami piteter.'

<sup>8</sup> Ko daron nga Josua mitkai mieri Isrel nir nga paran parlesi mosien ngok renge dan ser mawos, ko setemun arlesi. Poro weretunen wor parlesi jile pa, ko Atua sete orongwose pilngi daron minij keke tevi jinibb sen nir nga parlesi. <sup>9</sup> Ko niko, sel oto wor nga jinibb se Atua partor sweri mosien erpe nga Atua mumosi renge nabong ebutun. <sup>10</sup> Suri nir nga paran parlesi mosien ji Atua parmosi renge majingen ser osorsan erpe Atua mumosi renge majingen sen womu. <sup>11</sup> Renge iok ko, kerr rrapelak ko wor nga rraplesi mosien ngok ji Atua. Sete erres poro kerr san pivijuri butterter se nir nga tuwi nir, tuloli ni tutor jabble mosien ngok.

### *Nale se Atua eterter elep*

<sup>12</sup> Nale se Atua emaur ko emajing eterter elep, ko oso easi nesip ne balpalen nga muso renge devjen korti nuru. Orongwose pijpari nolo jinibb, pirpe nesip ne balpalen nga mian mijpari nuwi nga muto renge ji jinibb. Nale se Atua orongwose puwra suri norrorrmien ko nalol nga muto renge nolo jinibb. <sup>13</sup> Sete nanu san iel ngatan orongwose piteptepi renge no Atua. Nanu jijle arto limjer rres renge non. Ko renge no Atua kobbong kerr jijle rrapa-werai tweni murrun ne mauren se kerr.

### *Iesu evi batu jinibb sulsulen se kerr*

<sup>14</sup> Kerr rraprrul totkoni ko wor piteter nosurien se kerr. Suri rramror sweri pa batu jinibb sulsulen nga mirres pelak san, nga mivi Iesu ngok nga mivi Atua natun nga mian pa jin ko milik loloim renge melrin. <sup>15</sup> Jinibb sulsulen ngok sete erpe jinibb sulsulen minij nir, nga daron nga derteren se kerr mijkie ko sete marong pote kerr. Ko nanu jijle nga marok-rrowrowe jinibb arrowrowe ni keke. Ni orongwos rrerarre pa osuw. Ko nanu sansan kobbong, ni nololien sen ejkie. <sup>16</sup> Ko ngok, daron nga nanu nga marterter marok-ini ji kerr, sete rramametutu, rrapini ko wor re no Atua nga

mok-rorrirmi kerr ko nga mok-wilwil se kerr renga nalol nga mürres sen, ko ni vajin piwilwil se kerr re daron mawos nga mürterter.

## 5

<sup>1</sup> Tuwi, Atua oklai tweni renga jinibb nir san nga ni mĩlgi nga puloli majingen renga ni non renga nise jinibb nir. Jinibb sulsulen ngok oksuli nanu nga marres nir tevi Atua. Erevji nanu rrum nir nga puloli sel nga pilai tweni nololien se jinibb nir. <sup>2</sup> Orongwos purnge pisij renga nir nga marvitan, suri daron sapon ni kele derteren sen ejkie ko okvitan renga nololien. <sup>3</sup> Ko niko ni pivevji nanu rrum, sete erpe nga pilai tweni nololien se jinibb mĩnij kobbong nir, ko evi nga pilai tweni kele nololien se ni kele. <sup>4</sup> Ko sete evi marongen se jinibb san nga ni pivini pivi jinibb sulsulen. Atua everuse jinibb nga ni pivini pivi jinibb sulsulen, osorsan erpe nga miveruse Eron tuwi.

<sup>5</sup> Ko erpok sete evi norrorrmien se Kristo nga piwaji nais nga mian mare ngok, 'batu jinibb sulsulen'. Ejki. Atua ko osusture Kristo ko owrai tevi owra 'Nik kuvi natuk, lelingen nuvi tata som weretunen.' <sup>6</sup> Ko owrai kele renga naul kele san renga Naul On, owra 'Nik kuvi jinibb sulsulen erpe jinibb sulsulen nga tuwi ngok Melkisetek. Ko kuptori majingen se jinibb sulsulen ngok pianan pijpari tuwi ngok vini.'

<sup>7</sup> Renge mauren sen iel ngatan, Iesu ongoni eterter tevi dingen sen nga suwen meten mujumjum tevi Atua, nga Atua piwilwil sen, sete mia-mij. Ko suri norrorrmien sen ean ngatan, ololi Atua ornge drrelan. <sup>8</sup> Ewretun Kristo evi Atua natun, ko ornge ma esij re niben, ko niko elesi wose nga puosuri wor nale se Atua. <sup>9</sup> Ko norongen nga mĩsij sen ololi ni osorsan erres jijle, ko orngwos vajin pila mauren ne tuwi ngok vini tevi nir nga marosuri. <sup>10</sup> Ko Atua elai nais ngok nga piwajie, nga evi batu jinibb ne sulsulen nga muosuri jinibb sulsulen nga tuwi ngok Melkisetek.

### *Nale nga puwni nir*

<sup>11</sup> Renge murrun ngok nale elep oto nga nabwerai tevi kami; ko eterter nga nabwerai lilane nir jijle tevi kami, suri norrorrmien se kami ololola pelak nga kaprunge wose. <sup>12</sup> Tuwi le pa nga kamokrunge nale nga Atua muwrai, ko evter vajin kapvisviseni; ko sete kamrongwose, ko evter ma jinibb sopor kele wor parini parvisviseni kami renga batu nale ngok. Erpe kami kamluwi kele nga sete kamrongwose kapurroi nanen terter, ko kamsus malum. <sup>13</sup> Ko nir nga marok-sus malum arirpe bipi nga welili, nga setewor

mĩlesi wose sev nga mürres ko sev nga mĩsij. <sup>14</sup> Ko nanen nga mürterter evi se nir nga marini pa marivi jinibb nga marlelep nga marok-pelak pa tuwi vini, ko arviter vajin nga parini parwera tweni murrun ngabe erres ko murrun ngabe esij.

## 6

<sup>1</sup> Ko niko, erres rraplinglingi norrorrmien nga womu renga nosurien se Kristo, ko rraptajer tevi norrorrmien nga mĩtra. Rramrieni pa kerr osuw renga majingen nga mĩsij ne mijen, ko rramlai nosurien ji Atua osuw; ko sete evi nga rrapokluwi kele tetajer van re norrorrmien nga womu. Erpe rramloli lilane pa milnge naim, ko evi vajin daron nga rraploli naim putur e ko. <sup>2</sup> Arviseni pa kerr osuw re sel ne marbaptaes ko nga marlingi nevrer re jinibb, ko rramosuri pa nga rrapmaur luwi kele renga mijen, ko rramrongwose nga norongen nga mĩsij san oto metmet nga jinibb nga marsij nir parlesi nga sete orongwose pusuw nabong sapon. Nanu ngok nir rraman pa renger osuw, ko sete erres rraplõni lululwenir kele; ko rraptajer malum ma tevi Numal se kerr. <sup>3</sup> Ko ngok evi majingen nga rraploli, nga rraptajer ko pa, poro nga Atua pimarong pipok.

<sup>4</sup> Erres nga rraptajer ko pa tevi ni tetajer. Ko piprese renga nir nga marvitan ko marluwi kele van re nololien? Nir ngok, womu arok-ivel erres renga moron, ko arok-urroi pa nanen ne orsel re melrin osuw, ko Nemĩn On evan pa renger; ko daron nga marini marsij kele mirpok, ko setemun orongwose parieni lwenir parluwi vini renga mauren kele. <sup>5</sup> Suri nale on se Atua ewilwil pa se nir, ko arlai pa derteren nen beblen ne batun vanu nga pia-vini. <sup>6</sup> Ko daron nga martur telur mirpok ko marloli batur mirpok, orongwose parini luwi kele? Ejki rres! Pisij wor pilep renga nir, suri erpe arok-wuse lweni kele Natu Atua mare kele renga nai pelaot renga nevrer, ko erpe arok-lingi ni mare nga parsowri lokloksi kobbong.

<sup>7</sup> Kaprorrirmi ta dan nga mimni suwe naus nga mürres tetajer, ko mok-lai wenen milep tevi nir nga marmajing rengen. Atua erij erres suri. <sup>8</sup> Ko dan nga mösmös nga mĩsij mimaure, erpe nga Atua pilngi rijrijen ne mijen kobbong tevi, ko pusli renga nab.

<sup>9</sup> Ewretun lenglengen selek nir, nale nga maripok arterter temijal.

Ko re devjen se kami, sete nurrorrirmi kami kamirpok, ejki. Nulngi nolok eterter renga kami nga wenen nga marres ne mauren nga mimerr pok-maur pĩrres malum wor renga kami. <sup>10</sup> Nuosuri Atua nga ni sete mia-malie majingen nga mürres



se kami, ko ni purrorrmi p̄iterter murrn ne merrenien nga kamlai tevi ni daron nga kamwilwil se kalesia m̄inij nir. Kami kammajng erres erpok tuwi ko pa, evini erpe nga kamok-majng rengen malum, ko Atua eir elep suri. Ko ni kele puloli pusorsan ko p̄irres tevi kami jijle. <sup>11</sup> Ko erpok kele, numrreni bowrai p̄iterter tevi kami nga sete kapluwi kele, ko kapterter ko wor nga kaptajer malum pianan pijpari bongsin, nga puloli kaplai nanu jijle nga Atua m̄ilngir marto metmet rengo no kerr. <sup>12</sup> Sete nibe kami pimijmij, ko kapmajng p̄iterter pirpe birterawarrng se kerr nga martori totkoni majng m̄iterter. Norrorrmien ser m̄iterter ko mipriv eanan ejpari m̄arlai nanu p̄et̄peti nga Atua m̄ilai rengo nale rijrijen tevir.

#### *Nale rijrijen weretunen se Atua*

<sup>13</sup> Daron nga Atua m̄ilai rijrijen sen tevi birtera Epram nga mus̄pe suri metka nga para-rremali rengen, san ejki kele nga Atua orongwose pujuji nga puloli rijrijen ngok p̄iterter. Suri Atua ean mare rengo nanu jijle, ko niko ojuji ni lweni kobbong daron nga m̄ilai nale rijrijen sen, ko owra <sup>14</sup> 'Inu Atua berij p̄irres lenglengen suri nik. Bololi metka som nir pilep temijpal iel ngatan.' <sup>15</sup> Epram elesi nga Atua ololi rijrijen sen ngok eterter erres p̄elak, ko niko, daron nga mutor sweri daron nga m̄iterter milep, ko sete elngi kurtweni rijrijen se Atua; ko orrul totkoni eterter, mian ko elai vajin sev nga Atua m̄irijrije tevi. <sup>16</sup> Renge murrn nga parloli rijrijen p̄iterter, arok-juji jinibb nga marlelep. Ko sete arongwose parij latlate kele ren, suri nais ngok oto pae, ko ololi nale eterter. <sup>17</sup> Ko erpese rengo Atua? Ni kele emrreni puloli nale sen p̄iterter p̄irres nga rraposuri ko sete rraprong tweni. Kerr rramirpe bipi nir nga rraplai nanu pilep ji Atua. Ko Atua owra rraprorrmi p̄irres nga norrorrmien sen tevi kerr sete mia-suw nabong sapon. Ko niko ojuji ni lweni nga puloli rijrijen sen tevi kerr puto p̄irres tetajer. <sup>18</sup> Ko nanu nga eru ngok, rijrijen sen, tevi murrn nga mujuji ni lweni, nuru korti ormajng lat sansan, orviseni nga Atua sete ekrekris, ko sete p̄irien nale sen nabong san. Niko rraprur p̄iterter rengo nale sen. Rramivi jinibb nga rramwolu lingi lat nga m̄isij nga rramlik rengen tuwi, ko rramok-pejpej kele lat nga m̄irres san. Ko rijrijen se Atua ok-wilwil se kerr nga muloli norrorrmien se kerr epriv, nga kerr rrapan rrapror sweri lat nga m̄irres p̄elak ngok nga Atua m̄ilngi muto metmet rengo no kerr. <sup>19</sup> Nosurien se kerr nga m̄iterter ngok nga muwra Iesu p̄ilai mauren tevi

kerr evi norrorrmien nga mirpe angka nga murrul totkoni m̄iterter drrav nga m̄isal murrong. Purrul totkoni mauren se kerr nga sete nanu san purongwose p̄ilai tweni kerr kele. Angka ngok erpe oto pa osuw rengo lat nga muon milep ji Atua, nga kalik nga milep murrul ore pa rengo melrin. <sup>20</sup> Ko Iesu owowomu pa kerr van lat nen osuw, nga puloli majng sen erpe mivi jinibb sulsulen se kerr nga puloli lilane kerr tevi Atua. Ni erpe batu jinibb sulsulen nga muosuri birtera ngok Melkisetek, ko ni putori majng ngok pianan pijpari tuwi ngok vini.

## 7

### *Batu jinibb sulsulen ngok Melkisetek*

<sup>1</sup> Naul ne Jenesis os̄pe suri Melkisetek. Owra ni elik re daron se birtera Epram nga tuwi pa. Birtera Melkisetek ngok evi numal re ngaim nga Salem, ko jinibb sulsulen se Atua ne drromsen mare. Daron san birtera Epram ean ololi balpalen san tevi devje nuval sen nir, nga mirevji numal nir ivij. Ko daron nga mulwi vajin ko eskai Melkisetek, ko Melkisetek erij erres suri ni. <sup>2</sup> Ko rengo joron nir nga Epram m̄ilair rengo nuval, elai songovl̄on tevi Melkisetek. Ko nais ngok Melkisetek owra puwra 'Numal ne murrn nga musorsan'. Ko ni evi kele numal ne Salem.<sup>A</sup> Ko Salem owra puwra Demat, ko niko ni evi kele 'Numal ne demat'. <sup>3</sup> Ko nale san ejki nga mus̄pe suri Melkisetek tata sen rreknga tasu sen rreknga apu sen nir, ejki rres. Ko sete nale san os̄pe lat nga m̄iak e rreknga mimij e. Ni erpe natu Atua nga mutori majng sen ne jinibb sulsulen m̄irres nga sete orongwose pusuw nabong sapon.

### *Melkisetek ean mare wor easi batu jinibb sulsulen se m̄eri Isrel*

<sup>4</sup> Kaprorrmi ta Melkisetek ngok, nga mivi nais nga mian mare lenglengen. Epram nga mivi birtera se kerr, daron nga m̄ilai joron nir rengo nuval, ko emrreni wor p̄ilai songovl̄on tevi Melkisetek. <sup>5</sup> Ko nga marok-lai songovl̄on mirpok evi murrn nga m̄eri Isrel marok-loli rengo sia jijle. Nale neseseiren se Moses owra 'songovl̄on pok-an ko wor ji metka se Livae nga marivi jinibb sulsulen.' Ko m̄eri Isrel jijle nir arivi sansan kobbong, erpe arivi metka se Epram. <sup>6</sup> Ko Melkisetek sete evi metka se Livae, ko Epram elai ma joron nir nga m̄ilair re nuval songovl̄on tevi, ko Melkisetek erij erres suri. Ko Epram ngok ko, Atua m̄ila pa rijrijen tevi. Ko ngok evini en̄erer kele tevi kerr nga Melkisetek ean mare wor easi Epram, <sup>7</sup> suri oto limjer nga

<sup>A</sup> 7:2 Nais ngok Salem evi nise Jerusalem, tuwi jer.

jinibb nga mian mare kobbong orongwose piriŋ p̄irres suri jinibb nga mian ngatan sopen.

<sup>8</sup> Jinibb arok-lai joror songovlön tevi jinibb sulsulen nir. Ko jinibb sulsulen nir j̄jle paran ko parmij kobbong. Ko Melkisetek ma sete emij, erpe nga Naul On muwrai. <sup>9</sup> Ko lelingenok metka se Livae nir arok-lai songovlön ngok nir ji m̄eri Isrel nir. Ko tuwi daron nga Epram m̄ilai songovlön ngok van ji Melkisetek, ko erpe Livae kele elai tevi. <sup>10</sup> Nuwrai erpok, suri Livae evi metka se Epram ko san, nga mivitu. Ko niko, daron nga Epram mutori Melkisetek, ko erpe Livae kele otori Melkisetek.

*Batu jinibb sulsulen re metka se Livae ko jinibb sulsulen nga mutori murrun se Melkisetek*

<sup>11</sup> Atua osusture metka ne jinibb sulsulen nir, mian ko elai vajin nale nesereien sen tevi m̄eri Isrel nir. Ko poro majingen se jinibb sulsulen ngok nir erres pa, ko jinibb sulsulen m̄inij san pivini kele suri sev? Ko suri nir sete arviter, ko niko san pivini kele ko wor. Ko ni sete pirpe Eron, nga mivi m̄erwomu nga mutori majingen ne jinibb sulsulen re metka se Livae, ko pirpe ma Melkisetek. <sup>12</sup> Ko poro parlai tweni batu jinibb sulsulen nga womu ngok, ko nale neserien kele rrek parieni ko. <sup>13</sup> Ko pirpok ko wor, suri iok os̄pe Numal se kerr nga miplari reŋge metka m̄inij. Setewor nir san reŋge metka nga Iesu miplari ren otur re nawot nga puloli majingen ne sulsulen se Atua. <sup>14</sup> Jinibb nir arongwos pae osuw nga ni eplari reŋge metka se Juta. Ko Moses sete os̄pe rragrage sopen suri metka se Juta, daron nga mokjilwer suri majingen se batu jinibb sulsulen nir.

*Batu jinibb sulsulen m̄inij san nga murul totkoni murrun se Melkisetek*

<sup>15</sup> Ko eplari limjer nga batu jinibb sulsulen m̄inij ngok evi jinibb sulsulen nga murrul totkoni murrun se Melkisetek. <sup>16</sup> Otori majingen ne jinibb sulsulen, sete suri nga nale nesereien muwra ni metka sen ko wor putori majingen ngok, ejki. Otori suri derteren ne mauren sen nga bongsin mijkie. <sup>17</sup> Suri Naul On owra 'Nik kuvi batu jinibb sulsulen erpe jinibb sulsulen ngok Melkisetek ne tuwi. Ko kuptori majingen ne jinibb sulsulen ngok tetajer pijpari tuwi ngok vini.' <sup>18</sup> Nale ngok elai tweni sel nga mitra nga derteren nen ejkie ko sete orongwose puloli rrapmomsawos p̄irres. <sup>19</sup> Ko nale nesereien se Moses sete orongwose puloli nanu san pusorsan p̄irres. Ngok norrorrmien nga mimerr san eimare nga p̄ila milnge sel nga m̄itra ngok.

Sel nga mimerr ngok ko vajin rraposuri p̄iterter, suri evi sel ne mauren weretunen nga p̄itkai kerr rrapan mori ji Atua.

<sup>20</sup> Ko Atua ololi kele nale rijrijen sen san tuwi nga puloli sel nga mimerr nen pivini mare. Ko sete ololi nale rijrijen san daron nga jinibb sulsulen re metka se Livae nir marini marlai majingen ser. <sup>21</sup> Ko Iesu evini evi jinibb sulsulen suri nale nga Atua muloli m̄iterter pa nga Naul On muwra: 'Atua ololi nale sen eterter pa, ko sete m̄iarieni kele norrorrmien sen. Ni owra 'Nik kuptori majingen se jinibb sulsulen tetajer pijpari tuwi ngok vini.' <sup>22</sup> Ko Iesu orrul totkoni majingen sen erres, ko etasi sel nga mimerr se Atua tevi kerr, nga m̄irres wor asi nga womu.

<sup>23</sup> Ko nanu kele san ni le: jinibb ne sulsulen ne tuwi, nir elep ko wor, suri marmajing mianan ko san emij, ko san kele p̄ilai wani milngen. <sup>24</sup> Ko Iesu ma emaur ko sete mia-mij nabong sopen. Sete mia-lai majingen sen ne batu jinibb sulsulen tevi jinibb m̄inij kele san. <sup>25</sup> Ko niko etipatun lelingenok ko pijpari tuwi ngok vini, ni orongwos p̄ila mauren tevi jinibb nga markorti tevi nga parini ji Atua. Ni pimaur ko pulot tetajer tevi Atua suri nir.

<sup>26</sup> Rramwerai erres wor elep tevi Atua nga mukoni jinibb sulsulen nga m̄irres p̄elak mirpel vini ji kerr nga pimetmete kerr. Ni on elep. Sete nanu san esij jin, ko nololien ejki jin. Sete erpe rragrag kerr jinibb ne nololien nir. Nisen ean mare temijpal easi nanu j̄jle ne iel ngatan. <sup>27</sup> Ni sete erpe batu jinibb sulsulen nga nabong j̄jle marok-revji nanu rrum nga p̄ilai tweni nololien ser puwomu, ko vitunen pia-lai tweni kele se jinibb nir. Iesu evinvini ore murrun ngok ko pa osuw daron nga m̄imarong ni mimij nga p̄itlasi tweni nololien se jinibb nir ne iel ngatan totoklai. <sup>28</sup> Nale nesereien se Moses osusture jinibb nga derteren ser mijkie, ko marok-loli nololien, nga parivi jinibb sulsulen. Ko rijrijen se Atua, nga mivini vajin vitunen, osusture natun Iesu Kristo nga musorsan m̄irres tetajer pijpari tuwi ngok vini.

## 8

*Sel nga mimerr: Majingen se jinibb sulsulen nen erres wor asi*

<sup>1</sup> Ngel evi batu rijen suk, nga batu jinibb sulsulen se kerr otoa, ko elik pa reŋge melrin tevi Atua reŋge nevren rres tevi derteren sen nga milep. Ko nisen ko Iesu. <sup>2</sup> Sete ololi majingen sen reŋge naim on nga jinibb m̄imajinge, ko ololi majingen sen reŋge Naim On mawos nga Atua kobbong m̄imajinge reŋge melrin.

<sup>3</sup> Ko majingen se jinibb sulsulen ne iel ngatan tetajer evi nga parlai merrenien ko parevji nanu rrum nga parloli sulsulen van ji Atua. Ko batu jinibb sulsulen se kerr, Iesu, ni kele pilngi wor nanu ko san nga pilai tevi Atua. <sup>4</sup> Ko poro Iesu pilik malum iel ngatan, ko sete mia-tori nais ngok jinibb sulsulen, suri jinibb sulsulen nir arlik pa nga parlai merrenien tevi Atua, osorsan erpe nale neseseien se Moses muwrai. <sup>5</sup> Majingen nga jinibb sulsulen nir arok-loli, erpe arloli rrongrongvi kobbong nanu nga muto renge melrin; ko nga renge melrin ma evi weretunen jerjer. Ko ewretun, suri daron nga Atua muwrai tevi Moses tuwi pa nga pususture Naim On nga mivi devji ngok, ko owra 'Kupmetmet pirres

nga kupmajing nanu ngok nir pusorsan tevi nanu nga meviseni pa tevim renge botwen iak.' <sup>6</sup> Ngok rramlesi vajin majingen se jinibb sulsulen nga Iesu mīmajinge erres wor elep easie nga jinibb sulsulen nir iel ngatan marloli. Ko renge murrum ngok kele, sel se Atua nga Iesu mīlai mīrrmali ji jinibb nir erres kele wor easi sel ne tuwi. Suri nale rijrijen nga marres nir kele wor arto nga puloli putur.

<sup>7</sup> Poro sel nga womu pirres malum, ko sete sel nga vitu mia-to kele.

*Sel nga mimerr: Atua erijrij pae tuwi nga pilai*

<sup>8</sup> Atua elesi nga mēri Isrel nir sete arvijuri sel nga womu erres, evi batun nga muloli rijrijen nga pilngi nga mimerr kele san. Owrai tweni renge nale san nga mīlai tevi propet Jeremaea nga puwrai tweni. Renge nale nen, Atua rijen sen owrai erpel, owra 'Kapmurrong pirres. Numrreni bowrai tevi kami nga daron san pia-vini ni ko nga inu belngi kele sel nga mimerr san tevi kami jinibb suk nir, kami nga renge metka ne Isrel nir ko metka se Juta. <sup>9</sup> Ngel sete mia-irpe rijrijen nga mēlai tevi apu se kami nir nga tuwi. Renge daron nen erpe nuvel jilijle nir ko mētkai tweni nir Ijip. Ko suri nir sete artori rijrijen nga mēlai tevir, ko iok ko ololi setemun nurrorrmi nir.' <sup>10</sup> Ko Numal owra 'Rijrijen nga bealingi tevi mēri Isrel nir renge daron nga pia-vini, ni le vajin ngel. Belngi lilane nale neseseien suk renge norrorrmien ser, ko boli tweni renge nolor. Ko inu bevi Atua ser, ko nir parivi jinibb suk. <sup>11</sup> Ko setemun evi nga paran parvisviseni seler, parwera 'O sel le ma ngel', rreknga, 'O Atua erpel, erpok, rreknga erpak wor.' Ejki. Setemun mara-loli mirpok, suri nir jijle para-rongwose vajin inu renge mauren ser sisamis, pitipatun renge bipiwarreng nir pian pijpāri jinibb nga mītra. <sup>12</sup> Ko rijrijen

suk evi nga, poro nololien sev oto ji nir, ko inu betlasi tweni, puloli bemalie. Ngok evi sel suk nga mimerr tevi jinibb suk nir.'

<sup>13</sup> Ko renge nale sen ngok, Atua ospe suri sel nga mimerr ngok nga puloli rraplesli wose sel nga womu pa erpe etra pa osuw. Ko norrorrmien oto renge sev nga Atua muwrai etra pa osuw; suri evan pa ngatan, ko sete mia-periv ko pia-jijki pētpēti vajin.

## 9

*Sel nga mimerr: Lat on nen erres wor asi*

<sup>1</sup> Ko rramrongwose erres rijrijen nga mītra ngok, ko sel nen nga parsurōvi Atua ren otoo. Ko lat on nen kele san otoo nga muto bbong iel ngatan. <sup>2</sup> Jinibb ne tuwi arsusture devji san nga mivi Naim On nga markel otvi mīerue. Loloim nga womunen arwrai lat nga muon. Renge loloim nen, laet san oto, tep san, ko niv sopen nga marok-lingi tetajer renge no Atua. <sup>3</sup> Ko aruloni ore loloim nen tevi kalik nga milep san nga mīrres pēlak. Ko loloim tuwen nen evi lat nga muon nga muon lenglengen. <sup>4</sup> Ko renge loloim nen, nawot nga mivi gol oto ren, nga marjingtēni nanu nir nga mapur marres nga parsulir tevi Atua. Ko bokis ngok kele ne rijrijen se Atua nga mivi gol ngok nga biles san nga mivi gol marjingtēni lolon, nga nanen ngok mana muto rengen. Ko nai san nga mivi nejipjip se Eron nga tuwi Atua muloli mīmra luwi kele raon mutoe, ko nevōt nivev kele eru nga nale neseseien esngavōl se Atua maruli renge nuru. <sup>5</sup> Mare renge bokis ngok kele evi lat nga Atua mok-lai tweni nololien se jinibb e nir rengen. Ko mare rengen kele, nanu eru kele nga marveruse nisen jerubim nga mīrinrin lenglengen nga piviseni nga Atua elik iok, ko naben kele orsalsal ore lat nen. Ko daron ejki nga rrapupe nuni pētpēti murrmurrum wowarreng ne nanu nen nir.

*Sel nga mimerr: Sulsulen nen erres asi*

<sup>6</sup> Ko nanu jijle muto mirpok vajin, ko jinibb sulsulen nir arok-an vajin renge loloim nga womunen nabong jijle nga parloli vajin majingen se jinibb sulsulen nir. <sup>7</sup> Ko batu jinibb sulsulen kobbong orongwose pian renge loloim nga erwen nen nga muon lenglengen, ko pian pivesan kobbong renge sia san. Daron nga mian, ko elai drra nanu rrum nir erpe evi sulsulen van ji Atua. Drra ngok evi nga pilai tweni ni nololien sen, ko pilai tweni kele nololien nga mēri Isrel jijle nir marloli ko sete marongwose nga evi nololien. <sup>8</sup> Iok, Nerūin On eviseni vajin nanu san erērer erres tevi kerr. Daron nga devji ngok mutur malum, ko metali setewor etpir nga

kerr jijle rrapan loloim renge lat nga muon lenglengen ngok. <sup>9</sup> Ngok erpe nale rrongrongvi nga piviseni kerr daron nga rramlik ren lelingenok. Nale rrongrongvi ngok owrai erpok, nga merrenien nga jinibb sulsulen marok-lai tevi Atua, ko nanu rrum nga marok-revji nga pilai tweni nololien se jinibb nir, sete evter. Nanu ngok nir sete arongwose parloli norrorrmien se jinibb puwokwok pirres renge no Atua. <sup>10</sup> Iok arsupsupe bbong murrin ne jinibb mīaan ko miminmin ko mīalalos. Ko nanu ngok nir arivi nanu nawon nga marto kobbong mijpari daron nga Atua mīrieni nanu jijle nir arini armerr luwi kele.

*Kristo elai mauren sen nga pilai tweni nololien se jinibb*

<sup>11</sup> Ko Kristo errmali pa osuw nga mirpe batu jinibb sulsulen ne nanu nga marres ngok nga marpelari pa. Ko devji nga ni mīmajing ren erres ko osorsan easi nga womu. Devji ngok, sete jinibb ne iel ngatan emajinge, ko sete evi nanu ne iel ngatan san. <sup>12</sup> Daron nga Kristo mian loloim nga womu renge devji ngok, ko etajer van renge loloim nga muon lenglengen. Ko sete ololi erpe jinibb sulsulen mīnij nir marloli. Sete elai drra nanu rrum san nga pitlasi tweni nololien se jinibb nir, ejki. Elai ni drran mawos kobbong. Ko ololi evesan rres kobbong, nga pivinvini ore sel nga mītra ngok ko pilai tweni nololien se kerr, ko puloli rrapiel sisarow vajin pian pijpari tuwi ngok vini. <sup>13</sup> Drra nanani, drra buluk ko natu buluk nga marsuli mivi niavin, majingen ner otoo. Jinibb sulsulen arongwose parlai drra ngok sopon ko niavin ngok ko parwirrwrirlenir renge jinibb nga marrokkitkit renge no Atua, ko nanu ngok orongwose puloli parwokwok luwi kele. <sup>14</sup> Ko drra Iesu orongwose puloli majingen nga mīterter kele wor easi majingen ne nanu ngok nir. Renge majingen se Nerīn On nga mimaaur tuwi ngok vini, Kristo elai mauren sen tevi Atua erpe sulsulen san nga musorsan mīrres pētpeti. Ko drran ngok orongwose puloli norrorrmien se kerr puwokwok re nanu ne mijen nga rramloli, nga rraploli vajin majingen se Atua nga mimaaur tuwi ngok vini.

*Tetajer drra puwlu ko wor nga piviseni nga rijijen otur*

<sup>15</sup> Ko suri majingen nga mīrres mirpok, niko Iesu mususture kele rijijen nga mimerr se Atua. Emij nga puwli tweni jinibb nir renge nololien ser nga martor otvi nale neseseien se Atua nga womu. Kristo ololi nir nga Atua miveruse nir arivel sisarow pa nga artor sweri nanu nga sete mia-suw nabong sopon, nga Atua

mīrijrij pae musuw nga pilai tevir nabong san. <sup>16</sup> Poro jinibb san puloli marongen san puwra 'Daron nga bemij ko nanu ngok parivi se morok, nanu ngok parivi se morok', emēer erres tevi jinibb nir nga poro mīnen pia-mij, puloli marongen nen putur vajin. <sup>17</sup> Suri poro jinibb san ololi marongen nga mirpok san ko emaur malum, ko setewor mara-vijuri nale nen. Para-vijuri ko ma renge daron nga poro pia-mij. <sup>18</sup> Ko erpok kele renge marongen rreknga sel nga womu nga Atua muloli. Nanu san pimij ko wor, drran puwlu, ko niko sel nen putur vajin. <sup>19</sup> Erpok ko, Moses owra tweni jijle nale nir re nale neseseien tevi jinibb nir. Daron nga muwrai tweni jijle musuw, ko otor pini vajin sulsulen nga puloli nale renge nale neseseien ngok pimaaur ko putur. Arevji pini natu buluk tevi nanani, ko elai drran sopon ko ejvi nuwi sopon van ren. Ko elai rao nai san nga marveruse isop tevi silvi sipsip nga musongsong, ko orurrngoni van re drra nga, ko erringrringe renge naul ngok nga maruli nale neseseien se Atua nir rengen ko renge kele jinibb nir, ko owra <sup>20</sup> 'Ngel evi drra nga puloli sel se Atua putur. Atua owra kami kaposuri ko wor.' <sup>21</sup> Ko renge murrin ngok kele kobbong Moses ewirrwirrleni kele drra ngok sopon lat lele nir renge devji ko renge nanu sopor nga marto renge lat nga marok-surōvi Atua rengen. <sup>22</sup> Sel ne majingen ne nale neseseien arirpok ko, nga otomori nanu jijle nga marmajinge rengen, arok-wirrwirrleni ko wor drra pian ren nga puloli puon. Ko poro drra sete pīsiser, ko Atua sete mia-telasi tweni nololien se jinibb.

*Kristo elai mauren sen, ko drran owlu nga pilai tweni nololien se jinibb.*

<sup>23</sup> Nanu nen nir, erpe devji nen, arloli rrongrongvie nanu ne melrin nir. Ko drra nanu rrum san puwlu ko wor suri nga puloli parwokwok. Ko nanu mawos ma nga marto renge melrin armerreni sulsulen nga mīterter kele ko wor san nga puloli nir parwokwok. <sup>24</sup> Ko Kristo sete ean loloim renge lat nga muon lenglengen ngok nga jinibb kobbong marsusture nga mirpe marrongrongvie kobbong, ejki. Ean mawos renge melrin weretunen ko otur renge no Atua. Ko evan nga pīla se kerr. <sup>25</sup> Ko erpok, batu jinibb sulsulen ok-lai drra nanu rrum nir evesan renge sia jijle nga mian renge lat nga muon lenglengen ngok. Ko Kristo sete ololi lululweni erpe nir ngok, ejki. Ololi evesan kobbong. <sup>26</sup> Suri poro ni pok-loli pipok, ko kami kamrormi ni pok-rrul lululwi ko pa renge nai pelaot? Pok-runge pīsij

rengge niben daron pilep, etipatun re daron nga iel ngatan mītipatun, mivini mijpari lelingenok? Ko ejki, sete erpok. Evini vesansan rres kobbong nga pivinvini ore nanu jijle nir ne daron nga womu. Ko ermali nga mīlai mauren sen nga pīlai tweni nololien se jinibb.

<sup>27</sup> Ko Atua owngani pa sel se jinibb jijle nir, owra jinibb pimij pivesan kobbong, ko vitunen ko Atua pia-wera suri lat nga puto suri tevi vajin. <sup>28</sup> Ko rengge iok, Kristo elai mauren sen evesan rres kobbong nga pīlai tweni nololien se delung. Ko pia-rremali luwi kele, ngok erpe pivi varwen ko vajin, sete nga pītiasi tweni nololien se jinibb. Ko evi nga piwilwil se nir nga marok-teravi.

## 10

### *Sulsulen se Iesu erres kele wor*

<sup>1</sup> Nale neseseien se Moses owra rrongrongvi bbong nanu nga marto ko rengge melrin, ko sete arivi nanu nen mawos nir; ko sete osorsan pēlak tevir, namol ner kobbong. Ko mian ko nanu mawos nen nir para-pelari ko. Tetajer rengge sia jijle, jinibb sulsulen arok-revji nanu rrum nir rengge murrun ngok ko pa, nga pīlai tweni nololien se jinibb. Arpēlak malume, ejpari lelingen ngel, ko ejki mun. Suri nale neseseien se Moses nga mīmajing rengge sel ngok sete orongwose puloli jinibb nga marwera parini ji Atua parmomsawos pīrres. <sup>2</sup> Ko nir nga marok-loli sulsulen van ji Atua sete arwokwok erres rengge nololien ser. Poro parwokwok, ko setemun parunge nanu san purrowsir, ko sulsulen ser pusuw ko vajin. Ko sete erpok. <sup>3</sup> Sia jijle, arpēlak malum, ko sulsulen nir nga marloli arviseni lweni bbong tevi nir, nololien nga nir marok-loli. <sup>4</sup> Suri drra buluk rrekgan nanani sete orongwose pīrrawe tweni rragrrag nololien se jinibb.

<sup>5</sup> Ko rengge iok, tuwi pa, daron nga Kristo muwra pivini iel ngatan, owrai tevi Atua owra 'Nik sete kumrreni sulsulen ko merrenien nga marok-lai tevim, ko kula ma nibek tevik. <sup>6</sup> Nanu nga marsulir van ko marnivniv nawon, ko merrenien nga puloli jinibb puwokwok rengge nololien, setemun kuir renger. <sup>7</sup> Ko nutur mera ko nuwrai lilane tevi Atua nuwra 'O Atua, nuir nga bololi marongen som, erpe maruli pa rengge Naul On.' <sup>8</sup> Womu jer Kristo owra 'Nik sete kumrreni nga jinibb parok-revji nanu rrum ko parok-lai merrenien tevim. Sete kumrreni parevji nanu rrum ko parloli sulsulen nga pīlai tweni nololien ser. Sete kurnge erres rengge murrun ngok.' Ko murrun nga marok-loli ngok osorsan bbong tevi nga nale neseseien se Moses muwrai. <sup>9</sup> Ko mian ko Kristo

owra 'Atua, numarong le vajin nga bean bololi marongen som.' Rengge iok, rramlesi sel nga womu ne sulsulen tweni nololien, Atua ewirr tweni; ko nga vitunen ma, elai ko otori. <sup>10</sup> Rengge sel nga mimerr ngok ko vajin, Iesu Kristo ololi erpe marongen se Atua muwrai, nga mīlai niben erpe sulsulen mivesan kobbong nga sete mialoli vesan kele. Ko suri muloli mirpok, Atua ololi rramwokwok ko rramon erres rengge nololien se kerr.

### *Sulsulen se Iesu puto tuwi ngok vini*

<sup>11</sup> Nabong jijle jinibb sulsulen se mēri Isrel arok-loli majingen ser nga marevji nanu rrum nir nga pītiasi tweni nololien se jinibb. Ko murrun ngok sete orongwose pītiasi tweni rragrrag nololien se jinibb. <sup>12</sup> Ko Kristo ma elai ni lweni niben nga pīlai tweni nololien se jinibb nir. Ololi vesansan kobbong, rengge mijen sen, ko evter nga pītiasi tweni ko pa nololien se jinibb nir pijpari tuwi ngok vini. Ko vitunen ko ean esakel vajin tevi Atua vajin rengge nevren rres. <sup>13</sup> Ko Iesu pīsakel iok pian pijpari nga Atua puloli devje nuval sen parlik ngatan pirpe boriti, ko Iesu pibbōtbbōt rer. <sup>14</sup> Daron nga Kristo mimij vesan bbong nga pītiasi tweni nololien se jinibb nir, ko ololi kele nir aron ko pa, ko arivi jinibb sen. Ko armomsawos erres jijle, ko parlik vajin pīrpok pian pijpari tuwi ngok vini.

<sup>15</sup> Ko Nemīn On kele ok-werai lilane nanu ngok nir tevi kerr. Womujnen owra <sup>16</sup> 'Ngel evi rijrijen nga βelai tevi mēri Isrel nir rengge daron nga pia-vini. Bevisviseni nir rengge nale neseseien suk, ko βelngi lilane nale neseseien suk rengge nolor. <sup>17</sup> Ko setemun mea-rorrormi nololien ser tevi sev nga marsij nga marok-loli.' <sup>18</sup> Daron nga Atua nūtiasi tweni nololien se nir mirpok, sel san ejki kele mun nga jinibb purrorrmi nga parlai kele wor merrenien van ji Atua nga pīlai tweni kele nololien ser, ejki.

### *Erres nga rrapruij mori Atua*

<sup>19</sup> Tasik ko jujuk nir, suri drra Iesu Kristo ololi rramwokwok pa osuw, rramrongwose rrapan loloim ko vajin rengge lat nga muon lenglengen ngok, nga sete rrammetutu rragrrag. <sup>20</sup> Iesu etasi pa sel nga mimerr san osuw. Sel ne mauren ngok elik rrerresi kalik nga tuwi murrul ore lat nga muon lenglengen ngok, niko evi nga mimij suri. <sup>21</sup> Ngok rramtor sweri vajin batu jinibb sulsulen nga mīrres nga pok-metmet vajin jinibb se Atua nir. <sup>22</sup> Ko niko erres rrapini mori ji Atua, nga norrorrmien se kerr puwokwok ko nosurien se kerr pīterter. Drra Iesu Kristo errawe vaseni nolo kerr arwokwok, ko nibe kerr kele

aralao pa rengo nuwi nga muwokwok.<sup>23</sup> Erres nga rraplingi norrorrmien se kerr puto p̄iterter rengo Atua, suri ewretun rramrongwose rraposuri Atua nga ni puloli rijrijen sen nir pia-rremali.<sup>24</sup> Ko erres nga rrapok-lai se lululweni kerr nga puloli rraḡir nga rrapmerreni sele kerr nir rengo murrun nga m̄irres p̄elak.<sup>25</sup> Sete erres nga rraplingi kurtweni sel nga rramok-korti lat sansan, pirpe kerr sopor marloli pa musuw. Tetajer ko wor rrapkorti rengo jiljilweren, puloli norrorrmien se kerr pivini p̄iterter kele wor. Suri daron nga Numal se kerr pia-wera sesesre lat nga puto suri tevi jinibb e nir oto mori pa.

*Sete rrapok-loli kele nololien*

<sup>26</sup> Ko poro kerr nga rramtor sweri nale weretunen pa osuw, rrapatur mera ko rrapok-loli kele nololien, ngok, sel san ejki rres mun nga rraprevji kele nanu san nga pilai tweni nololien se kerr.<sup>27</sup> Sel sansan kobbong oto, nga rrapmetutu temijjal Atua rengen, evi nga putor vitrangi kerr, ko rrapmetutu nabb ngok nga m̄iterter lenglengen nga Atua pusli deve nuval sen nir ren.<sup>28</sup> Renge nale neseseien se Moses tuwi, poro jinibb san otor otvi nale neseseien nen san, ko jinibb eru rrek itul orwera nga ewretun m̄ernen muloli, ko osuw ko, partor pini m̄ernen ko suri.<sup>29</sup> Poro parloli pipok rengo jinibb nga mutor otvi nale neseseien se Moses, ko pipese rengo jinibb nga mungasi natu Atua? Atua putor vitrangi ni pilep suri. Erpe olokloksi drra nga muon rengo sel nga mimerr nga muloli muwokwok pa rengo no Atua, ko Atua pulolarsie pilep suri.<sup>30</sup> Suri Atua ko owra 'Bekle lweni nanu nga m̄isij nga marloli.' Ko owra kele 'Atua p̄iwer sesesre lat nga puto suri tevi jinibb sen nir.'<sup>31</sup> Ngok evi nanu nga rrapmetutue pilep san, poro rrapwera rrapwolu asi ji Atua, ko Atua purrul totkoni kerr, ko pivrrivrrali kerr. Suri Atua emaur, ko derteren sen elep.

<sup>32</sup> Erres ma kaprrorrmii nanu ngok nir nga kamok-lesir tuwi, daron nga moron se Atua mia-rremali ji kami. Ewretun kamrunge esij suri nanu elep nga marteter, ko nolo kami sete evitan.<sup>33</sup> Daron sapon jinibb arij esij tevi kami rengo no jinibb nir, ko arloli esij kele tevi kami. Ko daron sapon jinibb arok-loli esij tevi kami sopor rengo no kami, ko kami sete kammetutu, kamtur eterter lat sansan.<sup>34</sup> Kamkorti tevi nir nga marlik rengo naim ne nekaien rengo norongen nga m̄isij ser; ko daron nga jinibb marlai luwe joro kami ko sete kamrunge esij suri, norrorrmien se kami erres bbong, suri kamrongwose nga joro kami m̄inij san oto metmet nga m̄irres kele

wor, nga sete mia-jijki nabong san.<sup>35</sup> Ko kaprrul totkoni ko pa norrorrmien se kami p̄iterter pipok, suri nowlin nga kapa-lesi elep nga elep temijjal.<sup>36</sup> Ko kami kaploli nolo kami pipriv, ko kaploli nanu nga Atua mimrreni, puloli kaplai sev nga nale se Atua muwra kaplai.<sup>37</sup> Ngok pirpe nale san nga muto rengo Naul On nga muwra 'Beblen kele ma, ko si nga muwra pia-vini, p̄irrmali ko. Sete mia-lolola.<sup>38</sup> Renge daron ngok, jinibb suk nga marmomsawos ko marosurik, para-maur. Ko poro nir san p̄irieni lweni kele, ko Atua sete mia-ir rengen.'<sup>39</sup> Ko kerr ngel sete rramivi jinibb nga rraprieni kerr ko rrapluwi van rrapijiki kele, ejki. Rramivi ma jinibb nga rramosuri Atua, ko ni pia-lai mauren tevi kerr.

## 11

*Jinibb nga mimrreni pivini ji Atua, nosurien sen puto wore ko*

<sup>1</sup> Sev ko evi nosurien? Nosurien erpe nga rramrongwose erres nga rraplai ko wor sev nga rramlingi nolo kerr renger. Ko nosurien erpe nga rramrongwose erres suri nanu nga sete rramleslesir.<sup>2</sup> Birterawarng se kerr ne tuwi nir arlingi nosurien ser eterter rengo Atua erpok, niko muloli Atua m̄ir suri nir.<sup>3</sup> Murrun ne nosurien kobbong ololi rramlesi wose nga ewretun, nale se Atua kobbong ololi nanu jijle ne iel ngatan marremali. Atua sete emajing tevi nanu san, ko ololi ma nanu jijle arpelari nga lelingenok rramlesir.

<sup>4</sup> Ko erres nga rraprorrmi kele van re birtera ne tuwi nir. Womunen, rraprorrmi luwe Apel. Renge ni nosurien sen, ko ololi merrenien nga m̄irres p̄elak van ji Atua, easi Ken. Ko suri Epel osuri Atua, ko niko Atua muloli mumomsawos. Atua eir rengo sulsulen se Epel. Ko Epel ngok emij pa, ko murrun ne nosurien sen ngok oto malum nga pilai norrorrmien tevi kerr.

<sup>5</sup> San kele evi birtera Inok. Elngi nosurien sen eterter rengo Atua; ko niben sete emij, ko Atua elai tweni ni iel ngatan van mare e nga setemun arlesi kele. Ko Naul On owra 'Daron nga Inok m̄ilik iel ngatan, ko evi jinibb nga m̄irres', ko niko Atua m̄ir suri ko vitunen m̄ilai lweni van mare e.<sup>6</sup> Ko ewretun lenglengen nga poro nosurien sete puto rengo kerr, ko Atua sete mia-ir suri kerr. Si nga mimrreni pivini mori ji Atua ko purongwose Atua rengo mauren sen, puosuri ko wor p̄iterter nga ewretun Atua elik pa, ko puloli p̄irres p̄elak tevi nir nga marok-pej ni eterter.

<sup>7</sup> Ko nir san kele evi birtera Noa. Evi nosurien kele ko nga Noa osuri sev nga Atua muwra womue, nga setewor jinibb

san mīlesi. Ko emajing drrav nga milep nga piwilwil se metka sen nir rengen. Ngok erpe Noa ewer lokloksi jinibb jikle nir nga marlik iel ngatan re daron nen, lat nga puto suri tevir. Ko Atua vajin owra nga Noa omomsawos erres suri nosurien sen ngok.

<sup>8</sup> Ko evi nosurien ngok kele nga muto ji Birtera Epram nga muloli daron nga Atua miveruse nga pian rengen vanu mīnij, ko evan. Atua ololi pa nale rijrijen tevi nga pia-lai lat nen tevi ni, ko Epram elinglingi sisen nga pian lat nen. Daron nga mīlinglingi sisen, ko setewor orongwose lat nen oto ngabe; <sup>9</sup> ko suri osuri Atua, niko ean, ko elik ren. Ko elik iok erpe jinibb neturvitan kobbong, ni nuru Aesak ko Jekop, nga Atua mīlai rijrijen ngok tevir. Nir sete armajing naim; armajing devji kobbong, arlik toto rer. <sup>10</sup> Epram elik erpok suri etriv tweni ngaim san nga Atua mīmajinge ko pia-susture, nga puto tuwi ngok vini.

<sup>11</sup> Epram evi pa Birtera, etra p̄elak pa, setemun orongwos natun putoe. Ko Sera kele em̄er. Ko suri Epram osuri Atua, niko Atua elai bipi san tevi nuru nga Sera muwosi. Epram osuri rijrijen se Atua nga muloli tuwi, mian ko ermmali vajin. <sup>12</sup> Ko suri nanu ngok, Epram nga mītra lenglengen ko otomori pimij, ko metka sen ma nir nga vitunen elep nga elep temijpal erpe moju nga rengen melrin mare, ko erpe kele depinan nga ngalu.

<sup>13</sup> Jinibb ngok nir arosuri Atua, ko mian ko armij, ko setemun arlai sev nga Atua mīrijrije p̄ilai tevir. Arlesi ma nanu ngok nir, ko erpe arto ngasu lengleng malume nir; ko arir ma nga marlesir. Ko arwerai tweni limjer nga arlik iel ngatan arirpe jinibb neturvitan kobbong. Iel ngatan sete evi siser mawos. <sup>14</sup> Ko daron nga jinibb marok-rij mirpok, oto limjer nga arok-pej lat kele san nga mivi siser mawos. <sup>15</sup> Ko norrorrmien ser sete oto rengen lat nga marivel e vini. Poro parrormi ko rrek parluwi ko, ko ejki. <sup>16</sup> Nir ngok armerreni siser mīnij kele san, nga lat nen evi melrin kobbong. Renge iok ko, Atua sete emanune te nga nir marok-werai nga evi Atua ser, suri ololi pa ngaim ser san oto metmet osuw.

<sup>17</sup> Ko rramlesi kele Epram nosurien sen re nanu san kele, ni le: Aesak evi m̄er nga Atua mīrijrije p̄ilai tevi Epram. Ko elai pa tevi, nga mivi natun sansan bbōlbbōl. Ko daron nga vajin Atua owra purrowrowe Epram, ko Epram emarong bbonge nga p̄ilai natun Aesak tevi Atua. <sup>18</sup> Atua owrai tweni womu pae tevi Epram owra 'Renge Aesak ngok, metka som pilep lenglengen

nga parrul totkoni nisem.' <sup>19</sup> Epram orrorrmi mian ko owra "O, rreknga Atua puloli pimaaur luwi kele rengen mījen", ko niko emarong nga putor pini pirpe nga Atua muwrai. Ko erpe pirpe otomori pirpok, nga Atua muloli mimaaur luwi re mījen, suri otomori jer Aesak pimij.

<sup>20</sup> Mian ko suri Aesak muosuri Atua, niko Atua erij erres suri natun nuru Jekop ko Esao nga nanu nga parres nir parremali ji nuru. <sup>21</sup> Ko Jekop osuri Atua, niko ololi daron nga mutomori pimij, ko emajil rengen nejipjip sen ko olot van ji Atua, ko erij erres suri mebbun nuru nga morivi natu Josep.

<sup>22</sup> Ko Josep kele osuri Atua, niko ololi daron nga mutomori pimij e, ejilwer suri daron nga m̄eri Isrel nir parivel lingi Ijip. Ko owra tweni ngarre tevir nga para-wosi lweni niben.

<sup>23</sup> Ko suri nosurien nga tata ko tasu se Moses morosuri Atua rengen, niko daron nga Moses mīiak e, ko morsilveni mian mijpari navōl itul mīasi. Orlesi nga mivi bipi nga mīrres p̄elak, ko sete ormetutu nga portor otvi nale se Pero, batu numal ne Ijip.

<sup>24</sup> Ko suri Moses kele osuri Atua, niko ololi daron nga milep vajin ko sete emrreni jinibb parok-wera ni evi mebbu Pero ko tasu sen e Pero natun nesevin. <sup>25</sup> Orrormi erres nga pian pukorti tevi jinibb se Atua nir nga marunge m̄isij, easi nga pukorti tevi nir nga marok-loli nololien nga neiren nen puto beblen kobbong, pian ko pijijki. <sup>26</sup> Ko owrai, poro parmen kerajik suri Mesaea nga Atua pia-koni vini, ko sete inu mea-manune. Bea-runge pirres kele ma p̄iasi nga nurongwos borngre rengen nijor nir nga marres ne Ijip. Ko elngi meten oto eterter rengen nowlin nga pia-tor sweri vitu.

<sup>27</sup> Ko suri Moses osuri Atua, ololi sete emtutu numal Pero nga mulolarsi, ko evel lingi Ijip. Ewretun jinibb sete orongwos p̄ilesi Atua, ko Moses evijuri ma sel nga Atua muwra pivijuri, etajer erpe mīlesi meten e, ko omusus p̄irieni lweni. <sup>28</sup> Renge nosurien sen tevi Atua, ololi etipatun rengen murrun ne nanen ne asien. Owrai tevi m̄eri Isrel nir nga parperteni drra sipsip nir rengen metali ne naim ser. Parloli pirpok nga anglo nga Atua mukoni vini nga p̄irevji m̄eri Ijip natur norman nga womunen nir, sete p̄irevji natu m̄eri Isrel nir.

<sup>29</sup> Ko suri m̄eri Isrel kele nir arosuri Atua, ololi dis ngok nga marwera dis nga musongsong emes evi dan, ko arivel otvi vajin. Ko daron nga m̄eri Ijip nir marini vajin nga parojo surir, ko dis devjen korti orlulngoni lweni vini, ko orwoj ojer.

<sup>30</sup> Ko evi nosurien kobbong nga muloli nawot nga milep nga ngaim nga Jeriko mivitan daron nga mēri Isrel nir marivel rrale vabut. <sup>31</sup> Ko Reap evi nesevin ne sel san, ko suri nosurien sen kobbong, ololi mēri Isrel ngok nuru morini re naim sen. Iok ololi mēri Isrel nir sete arevji nesevin nen daron nga marevji jinibb ne ie nir nga sete marosuri Atua.

<sup>32</sup> Ko sete inu mea-tajer. Sete daron oto nga ñejilwere nale se Kition, Barak, Samson, Jepta, Devet, Samuel ko propet kele nir. <sup>33</sup> Ko suri arosuri Atua, ololi armajinge nanu elep. Lartul ngok nir artekai mēri Isrel nir aran arval tevi mēri mīnij nir, mian ko arevji: Arloli murrun nga mumomsawos, ko arlai nanu nga Atua mīrijrije nga pīlai tevir. Daron sapon artur ore nanu rrum ngok laeon nga sete orongwos pīajir. <sup>34</sup> Daron sapon arvisi pini nabb nga mīn temijjal, ko daron sapon arwolu asi rengo jinibb nga marwera parevji rengo nesip ne nuval. Nir ngok derteren ser ejkie, ko Atua elai derteren tevir nga muloli marterter nga marevji jinibb nuval ne vanu mīnij nir. <sup>35</sup> Ko nesevin sapor arosuri Atua, ko Atua ololi natur nir armaur luwi kele rengo mijen. Ko nir sapor, devje nuval ser arrul totonir, ko artorrlair, ko arwerai tevir 'Poro nga kaplingi kurtweni nosurien se kami rengo Atua, ko ngok orongwos kapiel sisarow.' Ko armusus, suri arrorrmi eterter nga Atua puloli nir para-maur luwi kele rengo mauren san nga mīrres kele wor. <sup>36</sup> Jinibb sapor nga marosuri Atua, arok-men keraji lokloksir ko arvirralir. Ko nir sapor, arkai totkonir ko arlingir van rengo naim ne nekaien. <sup>37</sup> Nir sapor, artuw pinpinir. Nir sapor, arvarre otvir, morrlor eru e, armij. Nir sapor, arsari pinir e nesip nuval. Ko nir sapor kele nen arivel nbawon erpok, ko aruri sunsun nga marsij bbong nga marloli rengo nevlru sipsip tevi nevlru nanani. Joror ejkie, ko jinibb arojir ko arloli esij tevir. <sup>38</sup> Nir arivi jinibb nga marres pēlak, ko iel ngatan sete erres evtere nir. Arivel sarsarr van rengo lolo merwer e nir, ko rengo botwen e nir, ko armatur rengo nolo ñereng ko rengo lolo bbulwil ne dan nir.

<sup>39</sup> Suri nosurien ser nga marosuri Atua rengen, elai nais nga mīrres tevir arwaje nga sete orongwos pijijki nabong sapon.

Ko setewor arlai sev nga Atua mīrijrije tevir nga pīlai tevir. <sup>40</sup> Suri Atua ololi pa norrorrmien sen san oto metmet kele osuw se kerr, nga mīrres asi. Renge norrorrmien sen ngok, emrrēni pukortoni nir tevi kerr nga rrapivi sansane ko rrapomsawos pīrres.

## 12

### *Atua Tata se kerr*

<sup>1</sup> Ko delung elep nga marlik rrale kerr, ko marok-meteni kerr. Niko rraplingi kurtweni nanu nga marok-to ore kerr ko nololien nga marrul totkoni kerr, ko rraploli norrorrmien se kerr pīterter nga rrapwolu rengo sel nga muto rengo no kerr. <sup>2</sup> Ko tetajer rrapok-meteni Iesu. Nosurien se kerr arto pētpeti rengo ni, etipatun rengo bongsin, ko ean osuwswu rengo bongsin. Daron nga mīlgi non mawos nai pelaot nga pimij ren, sete elngi tweni sel sen, ejki. Renge iok, orongwose nga neiren nga milep san oto metmet terai, ololi setemun orrorrmi nai pelaot nga mivi manunen nga milep, ko emawose ko pa van. Ko lelingen esakel vajin tevi Atua rengo nevren rres rengo nai seksakel sen rengo melrin.

<sup>3</sup> Erres nga kaprorrmi wor daron nga marterter nga Iesu moklesir, nga jinibb nga marsij martur imare ko marungasi ni milep. Ko ngok puloli nosurien se kami puto pīterter nga sete kaplingi kurtweni. <sup>4</sup> Ko rengo balpaleen nga kamok-tur tere nololien nga marini nir, setewor kami san emij esre.

<sup>5</sup> Rrek kammali pae nale ngok nga pususi norrorrmien se kami van mare, nga muto rengo Naul On, nga Atua mīrijje tevi kami mirpe natun mawos nir, muwra 'Natuk, inu nuvi Numal; ko daron nga mēvrrali nik, kuprongwose nga nuvisvisenim ko. Ko daron nga mērij mīterter tevim, ko sete nolom pīsij nga norrorrmien som pivitan. <sup>6</sup> Nuvi Numal Atua, ko nurongwose bololi lilane nir nga memrrēni lenglengen nir, ko ñete nir nga meveruse marivi natuk.' <sup>7</sup> Ko nanu totoklai nga marloli rramrunge mīsij rengo nibe kerr ngok arirpe Atua mokete kerr. Murrun nga Atua muloli tevi kerr ngok eviseni nga rramivi natun. Setewor bipi san elik nawon nga tata sen sete erij tevi, rreknga evrrali. <sup>8</sup> Ko poro Atua sete pok-loli murrun ngok nir tevi kami pirpe nga mok-loli tevi natun jijle nir, ko ngok eviseni nga sete kamivi natun, ko kamivi bipi ne sel kobbong nir. <sup>9</sup> Renge murrun se kerr jinibb, tata se kerr arvirrali kerr, ko rramosuri bbong nir. Ko erpepe rengo tata se kerr nga mīlik rengo melrin? Rraposuri ko wor pīasi tata se kerr ne iel ngatan, puloli rraplai mauren e. <sup>10</sup> Daron nga tata se kerr marvirrali kerr, ko arvirrali kerr beblen kobbong, re norongwosien beblen nga muto jir. Ko Atua okvirrali kerr nga puloli lilane kerr nga rrapon pīrres. <sup>11</sup> Rramrongwose pae nga poro Atua pivrrali jinibb san, ko mēnen purnge pīsij. Ko vitunen, nir nga Atua mivrralir



nga puloli parmomsawos arongwos parlesi wenen nga mīrres; parlesi mauren nga mumolmol ko mumomsawos mīrres rengo ne Atua.

<sup>12</sup> Ko iok, kapsusi nevre kami nga marmijmij van mare, ko kaploli bau βela kami nga marok-mīmarring parini parterter luwi kele. <sup>13</sup> Kapok-ivel suri bbong sel nga mīrres, ko poro bau βela kami pīsij, ko orongwose pivini pīrres luwi kele kobbong.

#### *Kapmetmet pīrres*

<sup>14</sup> Kapkorti ko wor tevi jinibb nir rengo mauren nga mumolmol mīrres. Tetajer kaploli mauren se kami puon pīrres; poro pijki ko sete kama-lesi Numal se kerr nabong san. <sup>15</sup> Kapmetmet pīrres nga kami san tirieni lweni ko tian ngasu rengo Atua ngok nga mok-wilwil se kerr rengo nalol sen nga mīrres. Kapmetmet nga sete kami san pirpe duru nai ngok nga raon mimelmele, ko daron nga jinibb marurroi ko armesi e, ko olokloksi delung elep. <sup>16</sup> Ko kapmetmet pīrres nga sete kami san pirpe Esao, nga mauren sen sete omomsawos nga sete orongwose purrorrmi kele Atua. Suri ni evi mīrwomu, ko joron nga moro pīlai erpe mīrwomu, ko ekle lweni nir pētpēti e nanen sansan bbong. <sup>17</sup> Ko vitunen, erpe kamrongwos pae, ko orrorrmi lweni nanu ngok nir; mian ko owra pīrieni lweni kele, ko ejki mun. Otor jabble pa. Ko eting lenglengen vajin. Murrun nga muloli womue oto ore sel sen.

#### *Sel nga mītra ko sel nga mimerr*

<sup>18</sup> Nanu nga kamini renger ngel sete erpe nanu nga mīri Isrel nir maran renger tuwi, ko sete arirpe nanu ne iel ngatan nga kamrongwose kaprunge nir rengo nibe kami. Meri Isrel ngok nir aran rengo botwen ngok nga marveruse Sinae. Iok, nabb okin rengen, ko nat kele emalik elep ko emalik ore nanu jille nir; ko ling kele owuw elep. <sup>19</sup> Ko rengo iok, davō nga milep san eting, ko mīri Isrel nir arunge nga Atua okrij tevir. Daron nga marunge drrelan, ko arungoni eterter, arwera setemun armerreni parunge nale ngok kele. <sup>20</sup> Suri aririr elep daron nga marunge nale ngok nga muwra 'Poro jinibb san rrek nanu rrum san pijpari botwen ngok, ko kami kaptuwe pini ko wor.' <sup>21</sup> Daron nga Moses mīlesi nanu ngok nir, ko ni kele ornge esij elep, mian ko owra 'Inu nuririr ko numtutu elep suri.'

<sup>22</sup> Ko kami kamjkie nanu ngok nir. Suri kamini rengo botwen ngok nga marveruse Saeon nga mivi ngaim nga milep se Atua nga mimaur. Ngok Jerusalem nga mimerr nga muto mare rengo melrin, nga anglo elep nga elep arlik ren ko arir tetajer.

<sup>23</sup> Ko kamini re gortien se jinibb se Atua nga marirpe mīrwomu se Atua nir nga marir tetajer, ko nga niser marto pa rengo melrin musuw. Kamini ji Atua, nga pīwer sesesre lat nga puto suri tevi jinibb jille, ko kamini ji neñi jinibb nir nga Atua mulolir marmomsawos mīrres. <sup>24</sup> Kamini ji Iesu nga ni evi jinibb nga mususture sel nga mimerr ngok se Atua, nga drran puloli kapwokwok, erpe owrai tweni nanu nga mīrres kele wor easi nanu nga drra Epel muwrai. <sup>25</sup> Ko ngok, kapmetmet nga sete kapsir dure kami tevi si nga mokrij tevi kami ngok. Nir nga tuwi nga marmusos parunge drrela si nga muwrai tweni nale ngok vini iel ngatan sete mara-wolu asi. Ko poro kerr sete rraprunge nale ngok se Atua nga mivle rengo melrin vini nga puwni kerr, ko rrapasi pīrrese ko?

<sup>26</sup> Tuwi pa Atua ololi dan eririr. Ko lelingenok elai vajin nale rijrijen sen tevi kerr owra 'Bololi iel ngatan piririr kele pivesan. Ko sete dan kis ko tevi melrin kele, nuru korti poririr.' <sup>27</sup> Nale ngok nga Atua muwrai nga muwra 'Vesan kele wor', eviseni erres nga Atua ospe suri nanu jille nga mīlengi iel ngatan. Ni puloli nanu jille ngok paririr, ko pīla twenir vajin. Ko sev nga sete marongwose paririr parjipon jer.

<sup>28</sup> Ko rengo iok, erres nga rrapwerai erres temijpal wor tevi Atua nga mivi Numal se kerr ko miverus kerr rramini re batun vanu san nga sete orongwos pīririr. Erres nga rrapurōvi ni rengo murrun nga pīr rengen, ko rrapatori ni puon ko rrapmetutu wore ko. <sup>29</sup> Suri ewretun, Atua se kerr osorsan tevi merre nabb nga muroror lenglengen se nga murongwose pusli nanu totoklai nir pianan ko parjijki pētpēti.

## 13

#### *Murrun momsawos se Kalesia*

<sup>1</sup> Kami kapmermerreni ko wor kami pirpe kamivi niaken woswos. <sup>2</sup> Ko kapokmetmet tetajer nga kapteki neturvitan vini re naim se kami. Kamrongwose nga jinibb sopor ne tuwi arloli murrun ngok, ko vitunen vajin artaol nga marteke anglo vini loloim re naim ser. <sup>3</sup> Kaprorrmi nir nga marlik rengo naim ne nekaien pirpe nga kami kamlik tevir rengo naim ne nekaien. Ko kaprorrmi nir nga marunge mīsij rengo niber pirpe nga kami kele kamrunge esij tevir.

<sup>4</sup> Totkoi eni nanu san nga kaprorrmi pilep suri. Norman pīlik tevi ko wor nesen sen mawos, ko nesevin pīlik tevi ko wor diwen sen mawos. Atua pivrali norman mīelakel nga mututur nawon malum, ko nesen mīelakel nga mututur

nawon malum, poro pormatur kokorti. Ko pivrrali kele norman nga mimatur tevi nesevin nga sete mivi nesen sen, ko pivrrali kele nesevin nga mimatur tevi norman nga sete mivi diwen sen.

<sup>5</sup> Sete erres nga kaploli murrun nga kapmerreni p̄elake nevõt. Poro joro kami pilep rreknga joro kami puwelili, ko kaprunge p̄irres ko wor, suri Atua owrai pa osuw owra 'Sete mea-linglingim kumasan, ko sete mea-linglingim nabong san.'

<sup>6</sup> Ko erpok, rramrongwose rraploli norrorrmien se kerr p̄iterter nga rrapwera 'Sete mea-metutu, suri Numal Atua ok-wilwil se inu. Ko si vajin orongwos pulokloksik?'

<sup>7</sup> Ko sete kapmalie nir ngok nga tuwi nga marwomomue kami, nga marlai nale se Atua vini ji kami. Kaprrorrimi ta murrun ser, mauren ser, ko mijen ser erpese, ko kapvijuri vajin murrun ne nosurien ser.

<sup>8</sup> Iesu Kristo sete orongwose p̄irieni kele. Osorsan rres kobbong. Murrun osorsan kobbong, etipatun tuwi pa, evini ejpari lelingenok, ko pianan sete orongwose pusuw nabong sapon. <sup>9</sup> Ko sete kaploli nale ne murrun lele parini pavevei tweni kami renge murrun nga mumomsawos. Rrapkulu ko wor van ji Atua nga piwilwil se kerr renge nalol nga m̄irres sen, puloli rrapterter. Ko sete erres nga rrapvijuri nale se nir nga marok-vile nanen sopor. Murru sel ngok nir sete arwilwil rragrrag se jinibb nga marvijurir, ejki.

<sup>10</sup> Lat ne sulsulen se kerr oto, ko jinibb sulsulen se m̄eri Isrel nga marok-loli majingen ser renge Naim On ser sete arongwose parla nanen ser renge lat ne sulsulen se kerr. <sup>11</sup> Ko batu jinibb sulsulen, daron nga mirevji nanu rrum ko elai drran van lat nga muon lenglengen, ko elai van ji Atua nga p̄ilai tweni nololien se jinibb nir. Ko vitunen arlai nibe nanu rrum ngok nir van, arwirrer vare re ngaim ko arsulir. <sup>12</sup> Ko renge iok, Iesu kele eivare renge ngaim ngok, ko ornge esij lenglengen renge niben. Ko suri mijen sen ko drran nga murongwose puloli jinibb parwokwok renge nololien ser, ko orongwose parini partur vajin renge no Atua. <sup>13</sup> Ko kerr kele, rraploli ko wor pipok nga rrapan rrapkorti tevi ni vare re ngaim, ko rrapir kobbong daron nga jinibb parungasi kerr. <sup>14</sup> Renge iel ngatan, ngaim woswos se kerr san ejki nga putu tetajer. Ejki rres. Rramok-pej ngaim woswos se kerr nga piarremali daron sapon. <sup>15</sup> Renge iok, kerr rrapkorti ko wor tevi Iesu ngok nga tetajer rrapusi nise Atua van mare. Murrun nga mirpok erpe nga rramok-revji nanu rrum nga rramlai tevi. Suri tetajer daron nga rramok-werai tweni tevi jinibb nir nga Iesu evi Numal, iok erpe nga rramlai

merrenien tevi Atua. <sup>16</sup> Ko kaploli murrun nga marres nir ko kapok-wilwil lululweni se kami tetajer, suri murrun ngok nir kele arirpe nga kele kamok-revji nanu rrum nir nga kaplai tevi Atua, nga ni m̄ir lenglengen ren.

<sup>17</sup> Kaposuri ko wor nir nga marok-wowomue kami, ko marivi burtur se kami, ko kaposuri nale ser. Nir erpe arok-metmete mauren ne kalesia se kami ko, nga sete marongwos parmosi. Ko nir parwerai tweni ko wor tevi Atua erpese nga martori majingen ngok. Poro kaposurir, ko nir parir nga parloli majingen ser p̄irres. Ko poro sete kaposurir, ko sete mara-ir re majingen ser, ko murrun ngok sete mia-wilwil rragrrag se kami.

<sup>18</sup> Ko kami kapok-tajer ko wor nga kaplot suri kem. Sete namrunge erpe norrorrmien se kem erpe p̄irij lokloksi kem, ko namrunge bbong erres, suri nammerreni nga tetajer nabloli p̄irres kobbong. <sup>19</sup> Re iok ko ololi numrreni lenglengen wor nga kaplot van ji Atua ko kapngoni tevi p̄iterter kele wor nga inu borongwos bea-luwi kele vinuk ji kami pingavil.

#### *Bongsi nale*

<sup>20-21</sup> Ngel evi loten suk, nga Atua nga mivi batu demat p̄ilai nanu jijle nga nevre kami mumrrol ren tevi kami, puloli kapviter nga kapmajing sev nga mimrreni. Iesu nga mivi Numal se kerr emij ko drran eseser nga pususture sel ngok se Atua nga sete mia-vitan nabong sapon. Ko Atua ololi emaur luwi rengen mijen. Ko suri drran nga m̄iseser, Atua ololi evi jinibb nga m̄iasi jer nga pimetmete sipsip sen nir. Ko ngel evi loten suk, nga Atua puloli kerr nga rramkorti tevi Iesu Kristo, rraploli pirpe nga ni mimrreni. Ko rrapusi nise Kristo pian mare kele wor pijpari tuwi ngok vini. Pipok ko.

<sup>22</sup> Tasik ko jojik nir, kaploli norrorrmien se kami pipriv, ko kapmurronge nale suk nir p̄irres. Nale ngok arivi nga parjile norrorrmien se kami, ko naul nga moli ngel sete epriv p̄elak.

<sup>23</sup> Ko numrreni bowrai tevi kami nga tasi kerr ngok Timoti, arlai tweni pa rengen naim ne nekaien. Ko poro piplari pingavil, ko pia-pitevi suri inu re daron nga beavinuk belesi kami e.

<sup>24</sup> Kapwera erres suk tevi nir nga marivi burtur se kami, ko tevi kele kalesia jijle nir re sise kami. Ko kalesia nir ne Itali nir arwera erres kele tevi kami. <sup>25</sup> Ngel evi loten suk, nga nalol nga m̄irres se Atua pipitevi kami jijle.

**Naul nga  
JEMES  
Muli  
Batu nale nga mivsvseni  
lut nga parmteni naul  
ngel puto suri**

Rrek Jemes nga muli naul ngel evi Jemes nga tasi Iesu, nga mivi m̄erwomu se kalesia nir Jerusalem (Majingen se Aposol nir 15:13, 21:18). Jemes oli naul ngel van ji kalesia p̄etp̄eti nir nga marlik sarrsarr rengen vanu nir nga batu numal se m̄eri Rom mutorir. Ko owra suri lat nga parlik puto suri.

Jemes owra, poro rraposuri, ko rraploli ko wor nanu sopor suri, sete rrapmatur tevi. Ko ospe nanu elep nga m̄ilesi m̄irres nga rraplolir. Ko owra, poro jorom ejkie, sete nolom pivitan. Sete kuplolar pingavil. Kuprres tevi jinibb nir. Kupmetmete nemem. Kupmarong nga kuploli sev nga Atua mimrreni, ko kuptur tere Demij. Sete kuprij melmelas suri sev nga kuwra kuploli. Poro jorom pilep, ko kupwilwil se nir nga joror mijkie. Nolom pipriv, nolom p̄irres.

*Nale womujnen*

<sup>1</sup> Inu Jemes, nuvi jinibb ne majingen se Atua ko se Iesu Kristo Numal se kerr. Nuwrai erres tevi kami, metka esngavöl dromong eru (12) ne m̄eri Isrel, nga kamlik sisamis iel ngatan.

*Nosurien ko norongwosien*

<sup>2</sup> Tasik ko jojik nir, daron nga nanu lele parini parrowrrowe kami, sete kaplai pirpe nanu nga kaprunge p̄isij suri. Ejki, kap̄ir temijpal ko wor suri. <sup>3</sup> Erpe kami kamrongwos pae, daron nga nosurien se kami m̄iterter rengen nanu nir nga marrowrrowe kami, kamrongwose kapterter kele wor nga kaptur pipriv. <sup>4</sup> Kaptur p̄iterter ko wor tetajer. Ko ngok puloli kapa-ivi jinibb nga marmomsawos jile m̄irres, ko nororrmmien tera puto vajin p̄irres re mauren se kami, ko murrun jijle nga marres arto pa re mauren se kami.

<sup>5</sup> Ko poro norongwosien pijki ji kami san, ni pungoni ko wor tevi Atua; ko Atua p̄ilai norongwosien tevi ni, suri nolo Atua nga m̄irres p̄elak oklai nawone wor nanu tevi jinibb totoklai, nga sete nolon p̄isij kele suri. <sup>6</sup> Ko daron nga kamngoni e, nosurien se kami pivi weretunen ko wor, sete piwelili. Suri jinibb nga nororrmmien sen miwelili erpe dis kobbong; suri daron nga ling muwuwi, ko owlu karkar. <sup>7-8</sup> Jinibb

si nga nolon mieu e mirpok, nororrmmien sen owlulu, ko sete erres ni purorrmi nga ni orongwose p̄ilai nanu san ji Atua, ejki.

*Jinibb nga joror milep ko jinibb nga joror miwelili*

<sup>9</sup> Kalesia si nga jorom miwelili sete purnge p̄isij suri. Ejki, p̄ir ko wor, suri Atua osusture ni. <sup>10</sup> Ko kalesia nga jorom milep sete pukowkowri suri jorom, ejki. Poro Atua p̄ilngi ni ngatan, ko ni pukowkowri kobbong. Suri jinibb nga jorom milep erpe nevngu vava kobbong. <sup>11</sup> Daron nga nial mivini mare nga mututun milep, p̄isne nevngun ngok nir parmeli ko parvitan, ko nulser nga marres p̄elak ngok parjijki. Ko pusorsan kele rengen murrun ngok, daron nga jinibb nga jorom milep ngok mokp̄elak nga jorom pilep kele wor, ni pia-jijki suri.

*Nanu nir nga marok-rrorowe jinibb*

<sup>12</sup> Jinibb nga mutur m̄iterter rengen daron nga nanu nir marrowrrowe purnge p̄irres ko wor. Suri daron nga m̄iasie nanu ngok nir, ko Atua pia-lai nowlin tevi vajin, nga mivi mauren nga m̄irres. Ngok evi nowlin nga muwrai pa musuw nga pia-lai tevi nir nga marmerrreni ni milep. <sup>13</sup> Poro jinibb san p̄ilesi nanu san purrowrrowe ni, ko ni sete puwrai pipel "O, Atua ko orrowrrowe inu." Ejki, suri nanu nga m̄isij sete orongwos purrowrrowe Atua, ko Atua sete orongwos purrowrrowe jinibb san nga puloli nololien nga m̄isij. <sup>14</sup> Ko nanu nir arongwos parrowrrowe jinibb daron nga ni sete mivijuri Atua ko mivijuri lweni sev nga ni lweni mimrreni, ko nanu nga marsij markerkerasi ko marevei tweni. <sup>15</sup> Ko nororrmmien nga marsij ngok arvesi nololien, ko nololien, daron nga milep vajin, ko evesi mijen.

<sup>16</sup> Tasik ko jojik nir, numrreni kami elep. Sete kaploli jinibb parkerkerasi kami, ko kaprongwose p̄irres <sup>17</sup> nga nanu jijle nga marres ko merrenien jijle nga marres lenglengen arpelari mare ji Atua ko wor nga m̄ilngi moron re melrin, mian ko mara-vini ji kerr. Murru Atua sete orongwos p̄irieni, ko sete orongwos p̄ilik telure kerr ko p̄ilinglingi kerr rengen nemalik. <sup>18</sup> Suri Atua emarong, niko m̄ilai nale weretunen sen tevi kerr nga rrapivi natun. Ko rengen nanu jijle nga m̄imajenge ko m̄ilngi iel ngatan, kerr rramivi batbatun.

*Kaprunge ko kaploli ko wor nale se Atua*

<sup>19</sup> Tasik ko jojik nir, numrreni kami elep. Kapmurrong p̄irres. Kami jijle, lolaren se kami sete pingavilvil p̄elak, ko rijen se kami kele sete pingavilvil, ko kapsaro ma

pingavilvil nga kapmurrong. <sup>20</sup> Suri murru jinibb nga mulolar sete orongwose puloli murrung nga mumomsawos nga Atua mimrreni pïrrmali. <sup>21</sup> Niko, kaplai tweni ko wor murrung jijle nga marrokkitkit ko murrung nga marsij nga marmaur wor milep re nolo kami, ko kaploli wor norrorrmien se kami pian ngatan. Ko kapmarong nga Atua purwi nale sen re nolo kami, nga puloli kapmaur.

<sup>22</sup> Ko sete kapkerkerasi lweni kami nga kaprunge nawon bbonge nale se Atua ko sete kamloli. Kaploli wor nale nga naul ngok muwrai ko. <sup>23</sup> Jinibb nga mumurrongre nale ngok ko sete mokloli nanu nga nale ngok muwrai, osorsan tevi jinibb nga mokmeteni non rengenatung, <sup>24</sup> ko daron nga mivél lingi, setemun orongwose nga non erpese. <sup>25</sup> Ko nale neseseieren ngok emawos jijle, ko orongwose puloli jinibb pivél sisarow. Ko mïer nga mokmeteni lilane nale nen, ko mokmurrongre mïrres, sete ornge nawone, ejki, okloli ko wor. Ko morok ko ma, Atua puloli purnge pïrres re sev nga muloli ngok.

<sup>26</sup> Poro jinibb san owrai nga ni okosuri Atua erres, ko sete otor metmet lilane nemen, morok rrek okkerkerasi lweni kobbong, ko murrung nga mokosuri Atua rengen evi nanu nawon kobbong. <sup>27</sup> Murrusel nga rraposuri Atua Tata, nga mïlesi muwokwok mïrres ko musorsan mïrres, erpel: kerr pivél ko wor ji bipiwarreng nga marivi melus, ko ji nesevin nga diwen ser marmij lingir, ko piwilwil se nir rengen sev nga nevrer mumrrol rer. Ko rraprrol totkoni mauren se kerr puwokwok, nga murrung nga mïsisj ne iel ngatan sete pulokloksi.

## 2

*Sete kapmeteni nir nga joror muwelili parirpe nanu nawon*

<sup>1</sup> Tasik ko jojik nir, kamosuri pa Numal se kerr nga mivi Numal ne nosrövien. Ko niko sete kaploli murrung nga kamtoro jinibb nga joror milep nir, ko nga kamok-meteni jinibb nga joror muwelili nir arirpe nanu nawon kobbong. <sup>2</sup> Ko niko, poro jinibb pieru porini loloim re naim loten se kami, tuwen nga mujokjok mïrres ko mïlengi nasum nga mivi gol rengen bbös nevrén, ko tuwen nga joron marmerrerrerr, ko esij poro norrorrmien se kami pieru e re laru ngok nuru. <sup>3</sup> Sete erres nga kaposuri mïer nga mujokjok mïrres ngok, ko kaprorrmi písij suri mïer nga joron mïsisj ngok. Sete osorsan nga kaplai mïerwomu van lat nga mïrres pêlak ngok, ko kapwera “Numal, ngel evi lat nga nik, kupini kupsakel rengen”, ko tevi

mïervitu nen, kapwera “Kuptur pa iok ko!”, rreknga “O, ejki, rrek kupini ma kuplik iel ngatan”. <sup>4</sup> Daron nga kamokloli mirpok, ko kamok-teri wukari vajin kalesia se kami evi meling eru e, ko kamokwer lokloksi jinibb rengen norrorrmien nga setete mumomsawos mïrres.

<sup>5</sup> Tasik ko jojik nir, numrreni kami elep. Kapmurrong pïrres. Jinibb nga joror muwelili rengen iel ngatan, Atua otobbtobbue tweni nir nga parimare parwun saut rengen nosurien. Ko elai derteren tevi nir ngok nga paran loloim rengen batun vanu sen, erpe nga muwrai pa tevi jinibb nga marmerrreni ni milep. <sup>6</sup> Ko kami ma kamok-meteni ðeres nir nir arirpe nanu nawon kobbong. Weta, ko jinibb si nga marok-lokloksi kami, ko marok-lai kami van re nospën se numal nir? Ngok sete jinibb nir nga joror muwelili, ko jinibb nga joror milep kobbong. <sup>7</sup> Ko nir kele kobbong marok-rij mïsisj tere nais nga mïrres ngok nga Atua muloli kamwajie, nga jinibb nir parveruse kami ‘Jinibb se Kristo’.

<sup>8</sup> Renge Naul On, nale neseseieren san oto nga mivi batu nale neseseieren mïnij kele se Atua, nga muwra ‘Kupmerreni ko wor selem nir, kuploli pïrres ko wor tevir pirpe nik komok-loli lweni mïrres tevi nik.’ Poro kapok-vijuri nale neseseieren ngok, ko kamok-vijuri sel nga musorsan ko. <sup>9</sup> Ko poro kapok-osuri jinibb nga joror milep ko kapok-meteni jinibb nir nga joror muwelili parirpe nanu nawon kobbong, ko ngok kami kamok-loli nololien ko, ko nale neseseieren se Atua puwrai nga kamivi jinibb nga kamok-tor otvi nale neseseieren. <sup>10</sup> Suri jinibb nga putor otvi nale sansan kobbong re nale neseseieren ngok ololi nololien, osorsan erpe nga poro putor otvi nale totoklai ren. <sup>11</sup> Suri Atua nga muwra ‘Sete kapvenae nesevin’, Atua nen kele kobbong muwra ‘Sete kaprevji pini jinibb’. Poro sete kapvenae nesevin ko kaprevji pini ma jinibb, kamivi ko wor jinibb nga kamtor otvi nale neseseieren. <sup>12</sup> Renge nabong nga Atua pia-wer sesesre lat nga puto suri tevi jinibb nir, ko ni puloli kami kapa-asi kobbong. Ko niko lelingenok kami kaploli murrung kami pïrres pêtpeti. <sup>13</sup> Suri daron nga Atua pia-wer sesesre lat nga puto suri tevi mïer nga sete mokrorrmi jinibb, ni kele sete orongwose purrorrmi mïernen. Ko jinibb nga ma mokrorrmi jinibb, Atua sete mia-wer lokloksi ni.

*Nosurien ko majingen*

<sup>14</sup> Tasik ko jojik nir, poro jinibb san pokwera okosuri Kristo, ko sete okloli majingen nga mïrres san suri, ni pia-lesi sev ko pïrres rengen? Nosurien nga mirpok sete orongwose pïlai ni van re mauren

nga mīrres. <sup>15</sup> Poro tasi kerr rrek joji kerr sopor sunsun ko nanen ser pijkie, <sup>16</sup> ko kerr san sete mia-van mia-lai ser, erpe se ko? Ko poro kerr san puwrai tevi nir “Atua pīrij pīrres suri kami. Kapluwi van, kaplutun ko kapaan pīrres”, ko sete pīlai sunsun rrek nanen tevir, ko iok sete ewilwil ser rragrag. Nale ngok evi nanu nawon kobbong. <sup>17</sup> Ko nosurien se kerr erpok: poro pisan bbong putur, ko majingen nga mīrres san sete putur tevi, ko ngok erpe emij jile ko pa osuw.

<sup>18</sup> Ko poro nik kupwera, “Morok nosurien sen otoo, ko mērak ma okloli majingen nga marres”, ko inu bowra lweni tevim, “Eterter wor nga nosurien putoe rengo jiniibb san poro nga majingen sen ejkie. Suri majingen sen ko wor eviseni nga nosurien sen mutoe.” <sup>19</sup> Nik kuosuri nga Atua esan kobbong otur? Erres, ko demij kele arosuri erpok, ko aririr elep suri! <sup>20</sup> Jiniibb nga muosuri ko sete mokloli majingen nga marres, nosurien sen ngok evi nanu nawon kobbong. Jiniibb lenglengen, kumrreni beviseni nanu ngok tevim? <sup>21</sup> Erres, ko kuprroormi ta bīrtera ngok se kerr Epram. Atua ololi evi jiniibb momsawos rengo non suri sev? Suri majingen sen kobbong, nga mīlai natun Aesak ko mīkai totkoni rengo nawot nga pivi sulsulen van ji Atua. <sup>22</sup> Kuplesi, nosurien sen ko majingen sen orto korti erres, ko niko muloli nga nosurien sen mīrres jijle vajin. <sup>23</sup> Ko nanu ngok ololi nale nga muto rengo nale on ermal, nga muwra ‘Epram osuri Atua, ko suri muosuri Atua, Atua ololi ni evi jiniibb mawos rengo non’. Ko jiniibb arok-veruse ni ‘Sele Atua’. <sup>24</sup> Kaplesi ta suri: Atua ololi jiniibb evi jiniibb mawos rengo non suri majingen sen, sete erpe nosurien sen kis kobbong. <sup>25</sup> Ko osorsan kobbong tevi nesevin san ne sel nga tuwi ngok, Reap. Atua ololi evi nesevin nga mimawos rengo non suri sev? Suri emetmete mēri Isrel ngok nuru erres, nga morini silveni porlesi wose Jeriko. Ko ni etkai nuru oran ortepeti rengo naim sen, mian ko vitunen okoni twni nuru orluwi van sise nuru e rengo sel mīniji, nga mēri Jeriko nir sete parull re nuru.

<sup>26</sup> Niben nga nenīn mijki ren sete mia-maur, pimij ko wor. Ko osorsan kele, nosurien nga majingen nga marres sete marpitevi, ni sete mia-maur, pimij kele ko wor.

### 3

#### *Neme kerr*

<sup>1</sup> Tasik ko jojik nir. Sete erres re kami pilep kapivi jiniibb nevisvisenien se kalesia nir. Kaprongwose ko wor daron nga Atua

pia-wer sesesre lat nga puto suri tevi kem jiniibb nevisvisenien, ni pia-loli pīterter kele wor tevi kem, pīasi murrun nga pia-loli daron nga pia-wer sesesre lat nga puto suri tevi jiniibb mīniji nir. <sup>2</sup> Daron elep nga kerr jijle rramok-loli esij. Jiniibb nga sete mutur jabble nanu san rengo nale sen evi jiniibb san nga mimawos jile mirres, ko orongwose putor ore nanu nga marsij nga marivi neblaot van re mauren sen totoklai. <sup>3</sup> Rramok-lingi bebje delrrurr nga welili van rengo jingo os nga puloli puosuri kerr, ko orongwose rraploli pian lat nga rrammerreni pian e. <sup>4</sup> Ko kaprroormi ta drav nga marlelep nga niwos ner marwelili jer kobbong. Ko daron nga ling nga milep mīlai, jiniibb nga mutori niwos ngok orongwose puloli ko wor pian lat nga mimrreni pian e. <sup>5</sup> Ko neme kerr erpok ko. Evi nanu nga welili jer kobbong, ko orongwose pīrij melmelas rengo nanu nga marlelep nir.

Nabb nga mīn nga welili jer kobbong evter nga puloli lat nga milep san pīnsa. <sup>6</sup> Ko neme kerr osorsan erpok. Evi nibe kerr sopon; ko nanu jijle nga marsij arok-pelari rengen, ko arok-lokloksi totoklai mauren se kerr. Neme kerr elai nabb rengo lat ne nejikien, ko okloli nabb ngok okin surusri rengo nolo kerr. <sup>7</sup> Jiniibb orongwose puloli nanu rrum nir, numōn, numēt, ko mesal ne dis parmu, ko arok-loli pa erpok osuw. <sup>8</sup> Ko san sete orongwose puloli ni lweni nemen pumu. Nale nga miplari rengo neme kerr esij elep, ko sete rramrongwose rrapjinge. Osorsan tevi nanu nga murongwose pīrevij pini jiniibb. <sup>9</sup> Rramrij ma tevi neme kerr nga rramok-surōvi Atua Tata Numal se kerr, ko rramok-rij mīsij kele tevi jiniibb nir nga Atua muloli nir marsorsan kobbong tevi ni. <sup>10</sup> Renge jingo kerr sansan kobbong rramok-rij nale nga mīrres, ko nale nga mīsij kele. Tasik ko jojik nir, setete erres nga nanu ngok piplari pipok. <sup>11</sup> Sete mete nuwi san orongwose nuwi ko dis, nuru korti porremali rengen. <sup>12</sup> Kami kamrroormi nga duru mango orongwose piwen wene namul rengen, rreknga bainau orongwose piwen wene mango rengo? Ejki! Ko dis sete orongwose pivi nuwi nga rramok-mini. Erpok, poro nga jiniibb san pokrij pīsij, ngok eviseni pae nga liken sen totoklai esij.

#### *Norongwosien nga Atua moklai*

<sup>13</sup> Poro evis re kami ngok marok-wera nga norongwosien ser mutoe ko marongwos, erres nga parviseni nanu ngok rengo mauren ser. Mauren ser pusorsan ko wor. Nolor pian ngatan, ko majingen ser piplari rengo norongwosien ser

ngok. <sup>14</sup> Ko poro nolo kami pokleplep p̄elak nga jinibb m̄inij marivi jinibb nga marlelep, daron nga kami kele bbong kammerreni kapivi jinibb nga marlelep, ngok, sete kaprij melmelas suri norongwosien se kami, ko sete kaploli gerisen nga kapsilveni weretunen. <sup>15</sup> Norongwosien ngok sete evi norongwosien nga miplari rengo melrin. Ngok evi norongwosien se jinibb kobbong, nga miplari iel ngatan, ko miplari ji Demij kele. <sup>16</sup> Daron nga jinibb nolon mogleplep mirpok ko mimrreni pian mare re jinibb m̄inij kele, niko muloli nanu jille setemun orongwose pukorti p̄irres, ko murrin jille nga marsij arpelpelari vajin.

<sup>17</sup> Ko murru jinibb nga ma m̄ilai norongwosien rengo melrin enije. Womujnen, mauren sen owokwok erres. Evi jinibb ne demat, evi jinibb nga m̄ilik malum, evi jinibb nga mukorti m̄irres tevi jinibb nir, ko evi jinibb nga mokrrormi jinibb. Ko evi jinibb nga wenen nga marres elep arto rengo mauren sen. Ko morok sete pokwera jinibb san esij kele, ko sete poksilveni nolon. <sup>18</sup> Ko daron nga jinibb ne demat marmajing rengo murrin nga mumolmol, osorsan tevi maruwi jelangin nga m̄irres nga wenen mivi mauren nga musorsan m̄irres.

## 4

### *Murrin nga marsij ne iel ngatan*

<sup>1</sup> Batu balpalen ko batu laten nga marokpelari ji kami arivel ngabe vini? Arokpelari suri re norormien se kami, kammerreni kaplai nanu jille, ko ngok ololi nolo kami oto karkar. <sup>2</sup> Nolo kami elai temijpal nanu nir, ko suri sete kamrongwose kaplair, niko kamrevji pini jinibb surir. Kammerreni nanu elep, ko sete kamrongwose kaplair; mian ko kamlat, ko kampalpal surir. Ko sete kamlai wor nanu nga kammerreni, suri sete kamngoni tevi Atua. <sup>3</sup> Ko daron nga kamngoni tevi Atua, sete kamlai kele, suri norormien se kami sete osorsan. Kamok-ngoni nanu ngok nir tevi Atua nga nolo kami kobbong mirrreni.

<sup>4</sup> Kamirpe nesevin san nga mokloli batun. Suri sev sete kamrongwose nanu ngel: jinibb nga mivijuri murru iel ngatan, ko evi pa devje nuval se Atua. Niko, poro jinibb san pimrreni pivijuri murru iel ngatan, ko evi vajin devje nuval se Atua ko. <sup>5</sup> Nale On se Atua owrai erpel: 'Atua emrreni wor elep nga norormien se kerr nga ni m̄ilngi muto re nolo kerr p̄iterter rengo ni kobbong', ko ngok sete evi nale nawon ko. <sup>6</sup> Ko Atua elai malum wor se kerr, niko Nale On sen muwra 'Atua ewer

ore jinibb nga mulololie, ko oklai se m̄er nga nolon mian ngatan'.

<sup>7</sup> Suri nanu ngok, kami kaplingi wor kami ko rengo melve nevre Atua. Kami kaptur ore wor Demij ko p̄iterter, puloli ni puwlu lingi kami. <sup>8</sup> Kapruj mori Atua, ko ni puruj mori kami. Kamivi jinibb nga kamsij, kapjejavöl vaseni nevre kami ko wor. Kami nga nolon mieru e puloli lweni ko wor nolon pivini pivi sansan e, nga puwokwok luwi. <sup>9</sup> Lelingenok erres re kaprunge p̄isij ko wor, ko kaptung. Erres re kaptung wor suri nololien se kami ko. Rrek erres setemun kapmen ko kaprunge p̄irres, ko kaprunge p̄isij ko kaptung. <sup>10</sup> Kaploli nolo kami pumolmol womu ne Atua, ko ni pia-loli kapa-tur imare.

### *Sete kapwer lokloksi tasi kami nir*

<sup>11</sup> Tasik ko jojik nir, sete kapwer lokloksi lululweni kami. Suri si nga m̄iwer lokloksi tasin, ewer lokloksi kele nale neseseien se Atua, ko owra nga nale neseseien ngok esij. Ko daron nga kamwera nga nale neseseien ngok esij, setemun kamteptepi rengo; kamtur pa mare rengo nale neseseien ngok osuw. <sup>12</sup> Atua kobbong esan ela nale neseseien, ko esan kele orongwose p̄iwer lokloksi jinibb. Derteren sen otoo nga p̄ila mauren tevi jinibb, rrek puloli jinibb parjiki kele. Ko kami kamrrormi kamivi Atua nga kamok-wer lokloksi jinibb nir mirpok?

### *Nale nga puwni jinibb nga mokrij melmelas*

<sup>13</sup> Kami sopor arongwose parwerai p̄irpel, "O, lelingin rreknga mevi kem naban re kele ngaim m̄inij e san, ko iok ma nablik e sia totoklai san, nabloli majingen nga nablesi nevöt pilep ren." Ko kapmurrong ta. <sup>14</sup> Kami sete kamrongwose sev nga p̄irmali rengo mauren se kami mevi. Kamirpe bbong numow ko nga m̄irmali ko muto behlen kobbong, ko vitunen mijiki kele. <sup>15</sup> Nale nga mumomsawos nga kapwerai, erpel: "Poro Atua pimrreni nabok-maur, ko kem namrongwose nabloli p̄irpel, p̄irpok, ko p̄irpak." <sup>16</sup> Ko lelingenok kami kamok-rij melmelas pa mirpok, ololi norormien se kami ean mare p̄elak. Ko nale melmelas nga mirpok esij. <sup>17</sup> Ko si nga murongwose pa murrin nga musorsan ko sete muloli, erpe ololi pa nololien ko.

## 5

### *Nale nga puwni jinibb nga joron milep*

<sup>1</sup> Ko jinibb nga joror milep, kami kele kapmurrong ta inu. Erres kaptung e daron nga m̄iterter nga piplari ji kami. <sup>2</sup> Nijor se kami, erpe armutmut pa osuw. Ko

sunsun se kami erpe momom mutir pa musuw. <sup>3</sup> Gol ko silva se kami arerra pa osuw. Ko rrerreaen ngok erpe nanu san nga mĩtre kami, ko pĩani nibe kami pirpe nabb. Lelingenok bongsi iel ngatan oto mori, ko kami kamtur imare ko kamok-sere kortoni malum nevõt se kami.

<sup>4</sup> Sete kamteve nowli jinibb nga marmajing renye naut se kami, ko dingan ser ngok ejpari pa nolo boro Atua nga derteren nga milep muto jin. <sup>5</sup> Renge iel ngatan, mauren se kami emalum bbong, ko kamlai pa nanu jijle nga puloli kaprunge pĩrres. Kamirpe buluk nga marwungani milep mĩrres; ko nabong nga parevji e, kami kampelari pa ren osuw. <sup>6</sup> Kamok-wer lokloksi jinibb nga marmomsawos ko kamrevji pinir. Ko jinibb momsawos ngok nir setete arjinge kami.

*Kami kaploli wor norrorrmien se kami pipriv ko*

<sup>7</sup> Tasik ko jojik nir, kaploli wor norrorrmien se kami pipriv ko, nga kaptiriv pianan pijpari Numal se kerr pia-luwi kele vini. Kaprrorrmie ta murrun ne marloli orsel. Kamrongwose kaploli norrorrmien se kami pipriv kele wor ko kamtiriv mi-anan mijpari orsel se kami wenen pia-toe. Kami kamtiriv naus nga pusani orsel se kami, ko kamtiriv kele ko wor nga kapan kaplai nanen rengen. <sup>8</sup> Ko renye murrun ngok kele, kami kaploli norrorrmien se kami pipriv ko wor nga kaptiriv re nabong nga milep ngok nga Numal se kerr pia-luwi kele. Kaploli wor norrorrmien se kami pĩterter ko, suri sete mia-periv nabong ngok piplari.

<sup>9</sup> Tasik ko jojik nir. Sete erres kapok-worwor suri kami, kapwera "O, nanu nga mĩsij ngok, ni ko ololi." Poro kapok-loli murrun ngok, ko Atua putor vitrangĩ kami. Ko kami kamrongwose nga jinibb nga mok-tor vitrangĩ jinibb evini pa mori, ko otomori pa pĩrrmali.

<sup>10</sup> Tasik ko jojik nir, erres kaprrorrmie propet ne tuwi nir nga marok-werwer renye nise Numal Atua. Jinibb nir ar-loli arunge esij elep; ko norrorrmien ser sete evitan. Ko renye murrun ngok, nir arviseni sel nga mĩrres pĩlak san tevi kerr. <sup>11</sup> Ko suri nir arok-tur eterter tetajer, rramwera Atua ololi nir arunge erres. Ko kami kamrunge pa nale suri murru Jop, nga muloli norrorrmien sen mipriv. Ko kami kamrongwos pae nga Numal Atua muloli mĩrres tevi vitunen. Suri Numal Atua okloli erres temijpal ko okrrorrmie jinibb nir.

*Murrun ne rijen*

<sup>12</sup> Ko tasik ko jojik nir, mare re nanu jijle nir, daron nga kamloli rijijen, sete kaplai

nais mĩnij van re rijijen se kami nga puloli pĩterter kele. Sete kapjuji melrin, rreknga iel ngatan, rreknga nanu mĩnij kele. Poro kapwera "O-o", ko o-o ko pa, rreknga poro kapwera "Ejki", ko ejki ko pa. Ko poro kaprij karkar kele, Atua orongwos putor vitrangĩ kami ko.

*Loten nga derteren nen mutoe*

<sup>13</sup> Erpese? Kami san ni ko nga norongen nga mĩsij miplari jin? Rrek erres ma ni pulot. Jinibb san ni ko re kami nga mokrunge mĩrres? Erres ma nga ni pĩlai nubo nga pusrövi Atua. <sup>14</sup> Kami san ni ko nga mĩmsi? Erres nga piveruse Elta se kalesia nir nga parini parlesi ni. Ko arongwose parlot suri ni ko parjivi oel van rengen re nise Numal se kerr. <sup>15</sup> Ko loten se nir nga nosurien ser mutoe ngok puloli morok pĩrres luwi. Ko poro morok ololi pa nololien sopor, ko Numal se kerr pĩtlasi tweni ko suri, ko puloli niben pĩterter luwi kele. <sup>16</sup> Suri nanu ngok, kami kapwerwera tweni ko wor nololien se kami tevi kami, ko kaplot suri kami sisamis nga Atua puloli kaprrres luwi. Loten se jinibb nga mumomsawos mĩrres, derteren nen elep temijpal. <sup>17</sup> Elaeja evi jinibb nga mirpe kerr kobbong, ko olot eterter nga naus sete pus; ko renye sia itul ko devje sia kele san, naus sete ous renye dan. <sup>18</sup> Ko vitunen olot kele, ko naus ous vajin, ko orsel nir arres ko nanen elep kele vajin.

*Rrapteka jinibb nga mivel lingi were-tunen pulwi kele*

<sup>19-20</sup> Tasik ko jojik, erres kaprongwose nanu ngel. Poro san re kami pivel lingi weretunen ngok, ko mĩnij re kami ngok pian pĩtkai porluwi kele, ko mĩnij nen ngok ololi pa majingen nga mĩrres pĩlak ko. Jinibb nga mokrieni jinibb sij mijkie renye sel nga sete mumomsawos, mulwi vini renye sel nga mumomsawos kele, elai pa se mauren se jinibb nga mĩsij ngok, ko mĩer nga mĩsij ngok sete mia-jijki. Ko mĩerwomu ngok ololi kele sel nga Atua pĩtlasi tweni nololien pilep.

**Naul nga  
PITA  
Muli Womue  
Batu nale nga mivsvseni  
lut nga parmeteni naul  
ngel puto suri**

Pita oli naul ngel van ji kalesia nir nga marlik sarsarr mirpe jinibb neturvitan nir (strenja) renge lat sopor nga marwera Pontas, Galesia, Kapatosa, Esia, ko Bitinia (ko lelingenok iok pētḗti nir arwera vajin Teki e). Ko lartul nga marlik ie arok-sij tevi kalesia nir, suri sete armerreni kalesia. Ko Pita owra nir parir ko wor, suri norongen nga mīsij ngok orongwos puloli nosurien ser pīterter pīrres (1:6,7). Ko owra Kristo kele ornge esij daron nga mīlik iel ngatan, ko mian ko emij suri kerr, ko mian ko emaur luwi kele, ko mian ko nabong sapon ni pia-luwi vini ko pītkaī jinibb sen nir. Ngok nir partur pīterter ko wor renge norongen nga mīsij, ko parosuri Kristo pīterter.

*Pita owra erres tevi nir*

<sup>1</sup> Inu Pita nuvi aposol se Iesu Kristo, nuwra erres tevi kami jinibb se Atua nga kamlik lat sarsarr mirpe jinibb neturvitan nir, re Pontas, Galesia, Kapatosa, Esia, ko Bitinia. <sup>2</sup> Atua Tata se kerr otobbobbue kami tuwi ko pa nga kapivi jinibb sen, ko Nemīn sen ololi kamon erres. Kamosuri Iesu Kristo, ko drran ejivle tweni nololien se kami. Ngel evi loten suk, nga tetajer Atua pok-wilwil se kami renga nalol nga mīrres, ko tetajer pīlŋgi demat puto tevi kami.

*Mauren nga mīrres oto wor renge mel-rin*

<sup>3</sup> Erres nga rrapwera erres temijpal tevi Atua nga mivi Atua ko Tata se Numal se kerr Iesu Kristo. Atua ngok ok-rongpote kerr, ko renga murrun ngok, ololi erpe kerr rraḿiak luwi kele, rramtor sweri mauren nga mimerr. Ko ngok eplari suri nga muloli Iesu Kristo mimaaur luwi kele renga mijen. Ngok puloli nororrmmien se kerr pīterter nga puto tetajer. <sup>4</sup> Ko rram-rogwose nga Atua elngi merrenien nga milep oto metmet renga melrin terai jinibb sen nir. Nanu ngok sete orongwose pīsij rreknga pumutmut rreknga pijijki, ejki. Atua emetmet lilane re melrin. <sup>5</sup> Nanu nga mīrres ngok evi se kerr nga rramosuri Atua. Ko suri nosurien se kerr nga muto

mīterter renga Atua, Atua orrul totkoni kerr pianan pijpari nga pīlai mauren tevi kerr, ko pia-viseni vajin nanu jijle nir renga nabong nga vitu.

<sup>6</sup> Kaḗir lenglengen suri iok, ewretun poro lelingen wolok ko pa, kami kamrunge esij wor suri nanu karkar nga marini parrowrowe kami. <sup>7</sup> Nanu ngok nir arivi nga parrowrowe kami ko parlesi nga nosurien se kami evi weretunen. Netkur ne sir nga mīkipkaḗil, arolngi re nabb, mian ko emetet erres vajin.<sup>A</sup> Ko norongen nga mīsij se kami lelingenok erpe nabb ngok, ko orongwos puloli nosurien se kami pimetet pīrres. Ko netkur ne sir puto beblen kobbong, mian ko pīsij; ko nosurien se kami puloli Atua pia-susi nise kami pian mare renga nabong nga Iesu Kristo pia-luwi vini ren. <sup>8</sup> Kammerreni lenglengen Iesu Kristo, ko setewor kamlesi nabong san. Ko nosurien se kami oto eterter rengen, ko sete nale san orongwose pīwer jipari neiren nga mīrres se kami nga muto mīterter renga Atua. <sup>9</sup> Ngok kapjipari sev nga nosurien se kami murrormi nga kaptor sweri ko, nga Atua pīlai se mauren se kami.

<sup>10</sup> Propet ne tuwi kele nir arok-pejpej sel nga Atua pīmajing ren nga piwilwil se jinibb ren. Ko arḗelak elep nga parlesi; ko sete arlesi, ko arwera pia-pelari nabong san. Ko kerr le vajin rrama-lesi. <sup>11</sup> Propet nen nir arloli lesi, arpejpej sel sev, ko renga daron sev nga nanu ngok nir parremali ren, suri Nemīn se Kristo nga muto renger ok-juji malum nanu ngok nir. Ok-werai tweni tevir nga Kristo purnge pīsij renga niben, ko vitunen Atua pīlai nais nga mian mare temijpal tevi renga melrin. <sup>12</sup> Atua eviseni tevi propet nir nga nale weretunen ngok sete evi rragrag se nir, ko evi se kerr nga rramaur lelingenok. Ko nale weretunen ngok ermali pa ji kerr osuw.

Nir nga marwerai tweni vajin nosḗen nga mīrres renga derteren se Nemīn On nga Atua mukoni renga melrin vini, nir ngok ko arlai eplari. Ko nale weretunen ngok, anglo kele nir arser rrale nga parlesi wose.

*Kaptori murrun ko mauren nga muon*

<sup>13</sup> Re iok, kami kaploli nororrmmien se kami puto metmet ko piḿerer pīrres. Ko kami kaplingi nororrmmien se kami puto tetajer renga Atua nga ni piwilwil se kami renga nolon nga mīrres daron nga Iesu Kristo pia-rremali ren. <sup>14</sup> Kaposuri Atua. Sete kapmarong nanu nga kammerreni nir ne tuwi daron nga kamlengleŋg vane e,

<sup>A</sup> 1:7 Erpe iel, Pita osḗe gol, ko namlingi netkur ne sir, nga puloli mining ne nale se Pita piplari piḿierer.



pareveji murru kami. <sup>15</sup> Atua ngok nga mok-verus kami on, ko owokwok erres. Ko rengen murrun ngok, kami kele kapon ko kapwokwok p̄irres. <sup>16</sup> Suri Naul On owra 'Kami kapon ko wor ko kapwokwok p̄irres, pirpe inu nuon ko nuwokwok erres.' <sup>17</sup> Ko kamok-lot van jin, ko kamveruse kamw-  
era, Tata. Ko kaposuri kele ko wor ni p̄irres re mauren se kami iel ngatan, suri Atua puwra suri lat nga puto suri tevi jinibb jijle re norngov sansan ngok kobbong, suri murrun nga marloli. <sup>18</sup> Ko kami kamrongwos pae sev nga Atua m̄ilai nga puwli tweni kami e nga puloli kapiel sisarow rengen murrun nga m̄isij nga kamtor sweri ji apu se kami nir ne tuwi. Ko sete elai nanu nga pian ko p̄isij, erpe silva rreknga gol, ejki. <sup>19</sup> Elai drra Iesu Kristo natun mawos, nga m̄iseser rengen nai pelaot, nga puwli tweni kerr. Drra ngok erpe drra sipsip san nga nabil san mijki rres ren. Ko rengen no Atua, drra ngok se Kristo erres p̄elak. <sup>20</sup> Tuwi jer pa daron nga Atua setewor m̄ilngi iel ngatan, ko otobbobbu tweni pae Kristo nga pia-majing nanu ngok nir. Ko lelingenok nga sete mia-periv iel ngatan pusuw, Atua eviseni pa ni nga pia-lai mauren tevi kerr. <sup>21</sup> Ko suri nanu nga Atua muloli ngok, kami kamini pa kamosuri Atua nga muloli Kristo emaur luwi kele rengen mijen ko m̄ilai nais nga mian mare rengen melrin. Ko kamosuri eterter ko kamlingi norrorrmien se kami oto malum eterter rengen Atua. <sup>22</sup> Kamloli mauren se kami owokwok pa osuw re no Atua suri kamosuri pa nale weretunen osuw, ko orongwose kapmerreni tasi kami rengen murrun nga musorsan m̄irres. Ko kapmerrmerreni lululweni kami tevi nolo kami p̄etp̄eti vajin. <sup>23</sup> Kaniak luwi pa, ko kamtor sweri mauren nga mimerr. Ko mauren ngok sete eplari rengen jelangin nga mia-mutmut; eplari rengen jelangin nga sete mia-mutmut nabong sapon. Jelangin ngok evi nale se Atua, nga mimaur ko sete mia-jijki nabong san. <sup>24</sup> Naul On owra 'Kerr rramirpe m̄ösmös kobbong, ko joro kerr nga m̄irres p̄elak erpe b̄hong nevgu m̄ösmös ko. M̄ösmös orongwose pukur, ko nevgun kele pian ko parvitivan. <sup>25</sup> Ko nale se ma Atua puto tetajer.' Ko nale ngok evi nale ne nosp̄en nga m̄irres ngok nga marwerai tweni pa osuw tevi kami.

## 2

*Murru kami pivi ko wor weretunen jerjer*

<sup>1</sup> Niko, kapsuw vajin re kamok-loli murrun nga m̄isij. Sete kaplolar, ko sete kapkerkeris, ko sete kapsilveni nolo kami. Sete nolo kami pileplep, ko sete kaprij p̄isij

tevi jinibb m̄inij. <sup>2</sup> Kami kapirpe bipi nga mia-iak nga mimrreni lenglengen pusud; ko daron nga musus vajin mian ko jin eterter temijjal. Ko kami kele kapirpok, kaplai nanen nga puwngani nem̄i kami nga puloli Atua pia-lai mauren tevi kami rengen. <sup>3</sup> Suri nale ne Naul On owra 'Kami kamrrowrow pae murrun se Numal, ko kamlesi wose lat nga m̄irres muto suri.'

### *Burtur nga mimaur*

<sup>4</sup> Kapini ko wor rraport tevi Numal se kerr. Ni erpe burtur nga mimaur. Jinibb ne majingen arwirr tweni ko pa osuw, ko Atua otobbobbu pa ni osuw. Ko rengen no Atua, ni erres p̄elak. <sup>5</sup> Kami kele kapirpe burtur nga mimaur nga Atua puloli kapirpe naim ne Nem̄in sen nga mimaur. Ko rengen naim sen ngok, kami kapirpe jinibb sulsulen nga muon se Atua, nga mok-lai merrenien van jin. Merrenien nen erpe nga kamlai norrorrmien se kami van ji Atua. Ko ni eir nga putor sweri merrenien nga mirpok, suri kamkorti tevi Iesu Kristo daron nga kamlai e. <sup>6</sup> Suri Naul On owra 'Kaplesi, inu nususture burtur nga m̄irres p̄elak rengen botwen nga Saeon. Evi burtur nga m̄irres p̄elak ne naim. Ko si nga muosuri, ko sete nolon pijebreni.' <sup>7</sup> Tevi kami nga kamosuri, burtur ngok erres p̄elak. Ko tevi nir nga sete marosuri, erpe nga Naul On muwra 'Burtur ngok nga jinibb ne naim marwirr tweni pa musuw, artaol lengleng nga evini kele evi burtur nga m̄irres p̄elak vajin.' <sup>8</sup> Ko Naul On owrai kele 'Ngok evi burtur nga puloli jinibb parvitan rengen.' Jinibb ngok nir arvitan ren suri sete arosuri nale se Atua, ko ngok evi pa norngov nga Atua muloli pa musuw tevir. <sup>9</sup> Ko kami ma Atua otobbobbu kami pa nga kapivi metka sen. Kamirpe jinibb sulsulen se Numal, kamivi jinibb on se Atua. Atua ololi erpok nga puloli kapwerai tweni majingen nga m̄irres sen. Everus tweni pa kami rengen nemalik nga kapini rengen moron nga m̄irres sen. <sup>10</sup> Womu kamiel ngasue Atua, ko lelingenok kamivi vajin jinibb se Atua. Womu sete kamtor sweri nga Atua purrorrmi kami, ko lelingenok kamtor sweri vajin nga Atua orrorrmi kami.

### *Rramivi jinibb ne majingen se Atua*

<sup>11</sup> Seleki nir, kamlik iel ngatan erpe jinibb neturvitan kobbong nga siser mijkie. Ko nuwrai eterter tevi kami nga sete kaploli murrun nga marsij nga norrorrmien se kami mimrreni. Murrun ngok nir artere kami nga pulokloksi mauren se kami. <sup>12</sup> Ko jinibb ne vare nir arp̄elak nga partor sweri nga kami kamivi jinibb nga kamtor otvi nale nesesreien. Ko kami kaploli lilane wor murru kami pusorsan p̄irres re no

nir, puloli parlesi majingen nga m̄irres se kami. Ko vitunen daron nga Atua piawera suri lat nga puto suri tevi jinibb nir reнге nabong nga vitu, ko para-susi nise Atua van mare suri majingen nga m̄irres se kami.

<sup>13</sup> Suri kamivi jinibb se Numal se kerr, ko kaposuri ko wor nir nga marivi numal gavman nga jinibb mususture ko ni nga mivi batbatu numal gavman, nga mimetmete jinibb totoklai nir. <sup>14</sup> Ko kami kaposuri gavman nga batu numal gavman mukonir nga parvirrali jinibb nga martor otvi nale neseseien, ko parsurovi kele nir nga marvijuri murrun nga musorsan m̄irres. <sup>15</sup> Ko ngok evi nanu san nga Atua mimrreni, nga re murrun nga musorsan se kami, kapwer ore nale nga marlengleng se jinibb nir nga norrorrmien ser mijkie. <sup>16</sup> Kamivi jinibb nga kamiel sisarow pa osuw, ko murru kami piviseni ko wor nanu ngok. Sete erres nga kaploli nivelen sisarow se kami pitawi ore kele murrun nga m̄isij, ko kaplik ma pirpe demij maur se Atua. <sup>17</sup> Kaposuri jinibb p̄etp̄eti nir p̄irres. Kapmerreni lenglengen jinibb nga marivi kalesia nir. Ko kaposuri Atua p̄irres, ko kaposuri p̄irres batbatu numal gavman se kami.

*Norongen nga m̄isij se Kristo eviseni sel tevi kerr*

<sup>18</sup> Jinibb ne majingen nir, kaposuri p̄irres numal se kami nir, ko tetajer kaptorir p̄irres. Kaploli pipok sete tevi kis nir nga marres ko marok-rrormi kami, ko tevi kele wor nir nga markoni lokloksi kami. <sup>19-20</sup> Poro kaploli p̄isij, ko parvirrali kami suri, ko kaploli nolo kami pipriv nga kaptori nekaien ngok. Ngok sete evi nanu san, suri kami kobbong kamrevei nekaien ngok. Ko poro ma kampal ko sete suri sev nga kami kamloli, ko kapkulu van ji Atua ko pa, ko ngok merrenien nga milep se Atua piptevi kami vajin. <sup>21</sup> Ngok evi murrun san nga Atua miveruse kami nga kaplai, suri Kristo ornge esij reнге niben nga piwilwil se kami, ko eviseni murrun ngok tevi kami nga kami kapvivotu kele suri reнге bbötun ngok. <sup>22</sup> Ko Naul On owra 'Sete ololi nanu san esij, ko sete nale gerisen san eplari reнге jingon.' <sup>23</sup> Sete erij weli nale nga m̄isij san tevi jinibb san. Daron nga marloli murnge m̄isij reнге niben, ko sete orrorrmi nga p̄ikle lweni tevi nir. Ni elngi norrorrmien sen oto eterter reнге Atua nga mok-wer sesese lat nga puto suri tevi jinibb nir reнге murrun nga musorsan. <sup>24</sup> Daron nga Kristo mian re nai pelaot, ko owosi nololien se kerr reнге niben. Ololi erpok nga kerr rrapmij

reнге murrun nga rramloli m̄isij, ko rrapmaur reнге murrun nga rramloli musorsan. Reнге niben nga mimabbur reнге nai pelaot, ololi kerr rramterter luwi kele vajin. <sup>25</sup> Tuwi rramirpe sipsip nga martor jabble pa sel osuw, ko lelingenok rramluwi vajin vini ji Kristo, erpe jinibb nga mokmetmet vajin sipsip, erpe jinibb mawos vajin nga mok-metmete mauren se kerr.

### 3

#### *Murrun ne totkoien*

<sup>1</sup> Reнге murrun ngok kele, kami nesevin, kaposuri ko wor diwen se kami. Ko poro diwen se kami sete parosuri Atua, ko murru kami kobbong orongwos pirvei nir vini nga parosuri, nga san sete miawerai nanu san tevi nir, <sup>2</sup> suri nir para-lesi meter e erpese kami kamlingi nosurien se kami tevi mauren nga musorsan m̄irres se kami reнге Atua. <sup>3</sup> Ko sete erres nga kapkowkowi kami, nga kapviri batu kami, ko kapweni nasum nga marer nir ko sunsun nga marmerr nir, ko kapiel ngolngoli ßela kami re mete jinibb nir. <sup>4</sup> Erres ma nga kaploli norrorrmien se kami pusorsan re no Atua. Erres ma nga demat puto reнге nolo kami, ko kapivi nesevin nga nolo kami pian ngatan. Ko murrun nga mumolmol ngok pivi nanu san nga puto tetajer ko p̄irres temijpal kele reнге mete Atua. <sup>5</sup> Ko nesevin ngok nir ne tuwi aron ko arwokwok erres re no Atua tevi norrorrmien ser nga m̄iterter, ko arosuri diwen ser erres. Iok ko ololi nir arres kele reнге mete diwen ser. <sup>6</sup> Sera kele ololi erpok. Osuri Epram ko everuse owra 'Numal suk'. Poro kaploli murrun nga m̄irres ko sete kapmetutue nir nga sete marosuri, ko kami kapviter vajin nga parveruse kami natu Sera nir. <sup>7</sup> Ko reнге murrun ngok kele, kami norman nga kamtotko, kaprrormi ko wor p̄irres suri nesen se kami reнге murru mauren ne martotko. Suri nir sete arterter erpe kami, ko rijrijen se Atua oto livö ne kamru kes, nga reнге nolo Atua nga m̄irres, ni p̄ilai mauren tevi kamru. Ko ngok, kaposuri nesen se kami, puloli sete nanu san puto ore verusen se kamru.

#### *Norrorrmien se kerr pivi ko wor sansan*

<sup>8</sup> Bevinviri ore nale suk. Kami kalesia jile, norrorrmien se kami pivi sansane, ko kaprrormi lululweni kami. Kapmerreni lululweni kami pirpe niaken nir, ko nolo kami pian ngatan. <sup>9</sup> Daron nga jinibb muloli m̄isij tevi kami, ko sete kapkele lweni kele. Daron nga jinibb m̄irij m̄isij tevi kami, ko sete kapkele lweni kele, pijki. Kami kaplai lweni nale nga m̄irres tevi jinibb nga mirpok, suri daron nga Atua

miveruse kami, ko ni emrreni p̄irij p̄irres tevi kami. <sup>10</sup> Naul On owra 'Jinibb nga mimrreni mauren nga n̄irres ko mimrreni purnge p̄irres tetajer setemun p̄ikerkeris. <sup>11</sup> Ni p̄ilngi tweni sel nga n̄isij ko puloli murrn nga n̄irres; ko tetajer pipej mauren nga mumolmol ko p̄iplak ko wor p̄iterter nga putor sweri. <sup>12</sup> Suri Numal Atua tetajer oklu van ji jinibb nga marsorsan nir ko ok-runge verusen ser, ko ok-sir duren tevi nir nga marloli n̄isij.' <sup>13</sup> Poro kapok-loli murrn nga n̄irres ko sete san orongwose pulokloksi kami ren, ejki. <sup>14</sup> Ko poro daron sopen jinibb nir arloli kampal suri bbong kamloli murrn nga n̄irres, ko ngok kaprunge p̄irres kobbong. Ko sete kapmetutu, ko sete kaprormi p̄elake nir. <sup>15</sup> Kaploli Kristo pivi Numal se kami, ko kaploli ni puwowomu re norrorrmien se kami. Ko kami kaptiriv tetajer nga kaplai lweni weli nale tevi jinibb san, poro san pususi tevi kami puwra "Suri sev kamtori Kristo rege norrorrmien se kami?" Ko kami kapviter nga kapwerai lweni weli nale tevi. <sup>16</sup> Ko kapjiljilwer tevir rege murrn nga mumolmol nga demat muto ren, ko tetajer kaploli murrn nga musorsan nga norrorrmien se kami sete p̄iwer lokloksi kami suri. Renge sel ngok puloli jinibb parmanun rege nale nga marsij nga marwerai, suri sel nga kamvijuri se Kristo evi pa sel nga mumomsawos n̄irres. <sup>17</sup> Ko erres kobbong nga parvirrali nik nga kumloli nanu nga n̄irres san, poro evi marongen se Atua. Ngok erresres ma easi poro nga parvirralim suri nanu nga n̄isij nga kumloli.

#### *Kristo emij pa suri kami*

<sup>18</sup> Kristo emij pa suri kami. Emij vesan kobbong ko sete mia-mij kele, nga p̄ilai tweni nololien se kami. Jinibb nga musorsan emij suri kami nga sete kamsorsan, nga p̄ilai lweni kami van ji Atua. Renge mauren sen iel ngatan, nir arevji pini; ko Atua ololi emaur luwi kele rege mauren nga mivi ne melrin. <sup>19</sup> Ko nem̄i Iesu evan ji nem̄in nga marlik rege naim ne nekaien ko ewerwer tevir. <sup>20</sup> Ngok lartul nga marong tweni Atua daron nga Noa m̄imajinge drrav sen. Ko Atua nolon epriv temijpal ko etriv nir, ko nir sete arosuri. Ko rege drrav ngok gortien nga welili san, erpe nir owil kobbong, nga Atua miwilwil se nir rege drrav se Noa daron nga muloli iel ngatan murrn ko jinibb jijle armij. <sup>21</sup> Nuwi ngok nga tuwi evi nelesien ne baptaes nga n̄ilai mauren tevi kerr lelingenok. Ko baptaes ngok sete evi nga pirrawe tweni nijorjor re nibe kami, ko evi nga rijrijen se kami tevi Atua sete orongwose p̄iwer lokloksi kami suri. Ko

baptaes ngok evi nga putor sweri derteren nga p̄ilai mauren tevi kami, suri Atua ololi Iesu Kristo emaur luwi kele rege mijen. <sup>22</sup> Ko ean pa rege melrin e ko elik rege devjen rres ji Atua. Ko Atua ololi anglo tevi jinibb nga marlelep tevi numal nir ne melrin parsusi nisen pian mare.

## 4

### *Murru kami p̄inije ko wor*

<sup>1</sup> Daron nga Kristo n̄ilik iel ngatan, ko ornge esij rege niben. Ko rege iok, kami kele kaplai norrorrmien ngok nga puloli kapterter, suri nir nga marunge n̄isij rege niber setemun arloli nololien. <sup>2</sup> Ko ngok, p̄itipatun lelingen, setemun kapmarong norrorrmien nga marsij parto ore kami. Ko kaplai ma nanu nga mivi se Atua puto ore kami. <sup>3</sup> Kamlokloksi daron elep pa womu nga kamloli sev nga jinibb ne vare nir marloli. Tuwi kamok-loli esij tevi nesevin, kamloli nanu nga n̄isij, ko kamok-minmin nga batu kami p̄ilengleng. Ko evter vajin re sel nga kamlot van ji atua n̄inij nir. <sup>4</sup> Jinibb ne vare nir artaol elep suri setemun kamkorti tevir rege sel ser nga marsij, ko iok ko ololi marworwor suri kami ren. <sup>5</sup> Ko nir parwerai tweni mauren ser re no Atua nga n̄itriv nga p̄iwer suri lat nga puto suri tevi jinibb nga marmij ko jinibb nga marmaur. <sup>6</sup> Iok ko ololi nospen nga n̄irres mian pa ji nir nga marmij osuw. Daron nga marmaur ko artor sweri nekaien ko armij sere, erpe jinibb jijle nir. Ko arwerere nospen nga n̄irres tevir nga puloli liken ne nem̄in nga n̄irres ser pirpe Atua.

### *Jinibb ne majingen nga n̄irres p̄elak se Atua*

<sup>7</sup> Rramini mori pa daron san nga nanu ne iel ngatan parjijki. Re iok kaploli lilane ko wor norrorrmien se kami pumolmol ko pinferer, ko kapok-lot ko wor. <sup>8</sup> Ko mare re nanu jijle, kapmermerreni lenglengen wor kami pilep, suri merrenien orongwose putor ore nololien pilep. <sup>9</sup> Tetajer naim se kami p̄itp̄ir nga neturvitian rreknga jinibb tama san p̄isil van loloim, nga sete nolo kami p̄isij suri kele. <sup>10</sup> Ko re Atua nolon nga n̄irres, elai derteren lele tevi kami nga kaploli majingen sen. Ko kaplai ko wor derteren ngok nga piwilwil se kami. <sup>11</sup> Poro kapok-werwer, kapwerai tweni ko wor nale se Atua. Ko poro kapwilwil se jinibb, ko kaploli ko wor re derteren nga Atua n̄ilai tevi kami. Ko rege murrn ngok nise Atua pian mare tevi nanu jijle nga marivi se Iesu Kristo, pianan pijpari tuwi ngok vini. Pirpok.

*Kaprunge p̄isij daron sopen re nibe kami suri kamivi jinibb se Atua*

<sup>12</sup> Selek nir, sete erres kaptaole nanu nga marsij nga marok-ini nga parrowrrowe kami, suri nanu ngok nir parok-pelari lululwi ko. <sup>13</sup> Ko erres nga kaprunge p̄irres erpe kamwilwil se Kristo rengo norongen nga m̄isij sen. Ngok puloli kapwun saute neiren sen daron nga nalol nga m̄irres sen p̄irrmali e. <sup>14</sup> Poro jinibb parij p̄isij tevi kami suri kamivi jinibb se Kristo, ko kap̄ir, suri ngok eviseni nga Neñin ngok ne melrin nga mivi se Atua evini pa iel ngatan ji kami. <sup>15</sup> Ko jinibb nga ma mokrevji jinibb, rreknga mivevna, rreknga mutor ovi nale neseseien, rreknga jinibb nga mieses nanu van re majingen se jinibb m̄inij nir, nir ko Atua pia-tor vitrangir suri. Ko sete erres nga kami san pipal suri murrun nga mirpok. <sup>16</sup> Ko poro kami san pipal suri bbong ni evi kalesia, sete pimanun, ko pusurovi ko wor Atua suri nise Kristo nga muto pa rengo kami. <sup>17</sup> Ko daron evini nga Atua p̄itipatun nga p̄iwer suri lat nga puto suri tevi jinibb nir; ko womujnen ni puloli tevi jinibb sen nir. Ko poro p̄itipatun tevi kerr, ko 'pia-irpese re nir nga sete marosuri nospen nga m̄irres se Atua?' <sup>18</sup> Ko nale se Atua owra 'Poro p̄iterter re Atua p̄ilai mauren tevi jinibb nga marres nir, ko nir nga sete marosuri ni ko arok-loli esij, rrek sel pijki rragrag.' <sup>19</sup> Ko ngok, nir nga Atua mimarong nga parunge p̄isij rengo niber, parlingi ko wor mauren ser rengo nevre Atua nga rijrijen sen muto, ko parloli ko wor murrun nga m̄irres tetajer.

## 5

*Nale tevi Elta nir*

<sup>1</sup> Inu numrreni belai nale san tevi kami elta nir. Inu kele nuvi elta san, ko nulesi Kristo tevi metek daron nga ni murnge m̄isij rengo niben. Ko inu nutur eterter nga bokorti rengo mauren nga m̄irres rengo melrin nga Kristo p̄ilai pia-rremali. Ko nuwrai eterter tevi kami nga <sup>2</sup> kapmetmete p̄irres nir nga Atua m̄ilair tevi kami, pirpe jinibb ne sipsip nga mokmetmete m̄irres sipsip sen nir. Ko kaptor lilaner p̄irres, ko nolo kami p̄ir suri majingen pirpe nga Atua mimrreni. Ko sete erres nga kaploli suri bbong kammerreni nevöt pivitan ren. Ko kaploli majingen pirpe nga nolo kami purnge p̄irres rengo. <sup>3</sup> Sete nororrmmien se kami pian mare p̄elak tevi nir nga kammetmete nir, ko kapviseni ma sel nga musorsan m̄irres tevi

sipsip nir nga nir para-vivitu suri kami rengo. <sup>4</sup> Ko daron nga Kristo, Nunal nga muwowomu re jinibb nir nga marmetmete sipsip nir p̄irrmali, ko kami kapa-tor sweri nowli kami nga m̄irres p̄elak nga sete orngwose mia-sij nabong sopen.

<sup>5</sup> Ko rengo murrun ngok kele, kami m̄elakel, kaposuri ko wor nir nga martera. Nolo kami pian ngatan ko kapwilwil se lulweni kami, erpe Naul On muwra 'Atua etre nir nga markowkowi, ko ok-wilwil se nir nga nolor mian ngatan.' <sup>6</sup> Kaplingi kami van ngatan ji Atua nga derteren sen milep temijjal, ko ni pia-susi kami van mare re daron mawos sen nga ni kobbong m̄ilngi.

<sup>7</sup> Kaplinglingi nororrmmien se kami nga muwlu p̄elak tevi ni, suri tetajer ok-orrormi kami.

<sup>8</sup> Kaptur p̄iterter, ko kapmetmet. Devje nuval se kami, Demij, ok-wolu nrerrale kami erpe bae san nga numer m̄iaji milep, epepej jinibb nga puwun totoklai.<sup>B</sup>

<sup>9</sup> Kaptur ore p̄iterter. Kamrongwose nga rengo lat sopen iel ngatan, kerr sopor rrampal suri nise Kristo, osorsan erpe nga kami kamtor sweri. <sup>10</sup> Ko Atua ok-wilwil se kerr tetajer rengo nalol nga m̄irres sen, ko everus kerr nga rrapan rrapkorti tevi Kristo rengo mauren nga m̄irres p̄elak re melrin nga sete mia-suw nabong san. Kaprunge p̄isij beblen kobbong, ko vitunen Atua puloli kapterter, kapsorsan p̄irres, ko p̄ilai derteren tevi kami ko pusustere kami pirpe duru nai san nga sete orngwose putoto. <sup>11</sup> Ko loten suk, nga derteren jijle puto rengo neven ko pa pijpari tuwi ngok vini. Pirpok.

*Bongsi nale se Pita*

<sup>12</sup> Naul suk nga wellili ngel, Silas oli tevi kami. Silas erpe kalesia tasi kerr nga inu mosuri. Numrreni bowrai tweni nga sel nga Atua mok-wilwil se kerr rengo nalol nga m̄irres sen evi sel weretunen, ko kaptori p̄iterter. <sup>13</sup> Ko nir ne Naim On ne Bapilon<sup>C</sup> nga Atua m̄ilngir arwera erres tevi kami. Ko natuk kele Mak owra erres tevi kami. <sup>14</sup> Kapwera erres tevi kami lululwi tevi merrenien ko demat. Ko ngel evi loten suk, nga demat puto tevi kami jijle nga kamivi jinibb se Kristo.

<sup>B</sup> 5:8 Erpe iel, Pita orrongrongvi Demij erpe laeon, ko suri laeon ejki iel, namlingi bae, nga puloli mining ne nale se Pita piplari piñierer. <sup>C</sup> 5:13 Nais ngok Bapilon evi nale teptepi san, ko owra puwra Rom.

**Naul Erwen nga  
PITA  
Muli  
Batu nale nga mivsvseni  
lut nga parmeteni naul  
ngel puto suri**

Pita oli naul sen erwen ngel van ji kalesia p̄t̄p̄eti nir. Re wosenen jinibb nevisvisenien sopor arlik nga nevisvisenien ser sete arsorsan, ko kalesia sopor arvijurir rengo murrun nga marsij ser. Ko Atua putorrlai nir (2:1-22). Daron nga jinibb nga marirpok nir marini ji kerr, ko kerr rraprrul totkoni ko wor nosurien se kerr, ko murrun nga marres nir.

*Pita owra erres tevi nir*

<sup>1</sup> Inu Saemon Pita nuvi aposol ko jinibb ne majingen se Iesu Kristo. Nuwrai erres tevi kami nga nosurien se kami m̄irres p̄elak mirpe bbong nga kem. Nosurien ngok kamlai suri murrun nga musorsan se Iesu Kristo nga mivi Atua ko m̄er nga mokla mauren tevi kerr. <sup>2</sup> Ngel evi loten suk, nga Atua p̄irij p̄irres suri kami rengo nalol nga m̄irres sen, ko p̄ilai demat pilep tevi kami suri kamrongwos pae Atua ko Numal se kerr Iesu Kristo.

*Atua everus nga kapivi jinibb sen*

<sup>3</sup> Atua rengo derteren sen elai nanu jikle tevi kerr, evter nga orongwos rraplik rengo mauren nga musorsan m̄irres. Ngok eplari ji kerr suri rramrongwose Iesu Kristo, ngok jinibb nga miveruse kerr nga rrapkorti rengo nisen nga mian mare ko mauren nga musorsan sen. <sup>4</sup> Re iok ko ololi nga m̄ilai tevi kerr rijrijen sen nga marlelep ko nga marres nir, nga puloli kaprongwose kapwolu lingi murrun nga m̄isij ne iel ngatan, murrun nga marmerrmerreni nawon nanu nir. Murrun ngok ela mijen. Ko kapini rrapkorti vajin re murrun nga m̄irres se Atua. <sup>5</sup> Ko suri iok ngok ko, kami kapp̄elak ko wor pilep nga kapla kele murrun nga musorsan m̄irres puto tevi nosurien se kami; musuw, ko kapp̄elak tweni kele nga norongwosien puto tevi murrun nga musorsan m̄irres se kami, <sup>6</sup> musuw, ko kapp̄elak tweni kele murrun nga kapwer ore sev nga kami kobbong kammerreni, puto tevir. Musuw ko kapp̄elak tweni kele murrun nga marok-rrul totoni nolor mipriv, puto tevir. Musuw ko kapp̄elak tweni kele murrun nga kapmerreni tasi kami puto

tevir. Musuw ko kapp̄elak tweni kele murrun nga kapmerreni lenglengen jinibb jikle nir puto tevir. <sup>8</sup> Nanu ngok nir arivi nanu nga parto ko wor ji kami; ko poro parto pilep ji kami, ko ngok nibe kami pus, ko wene kami putoe, suri kamrongwose Numal Iesu Kristo. <sup>9</sup> Ko jinibb si nga nanu ngok nir sete marto rengo mauren sen, erpe jinibb san nga meten mumot nga sete orongwose puklu van ngasu; ko emali pae nga Atua m̄irrawe tweni nololien sen nga muloli womu.

<sup>10</sup> Ko niko, tasik ko jojik nir, suri Atua otobbtobbu pa kami ko everus pae kami nga kapivi jinibb sen, kami kapp̄elak pilep kele wor nga kaploli nanu ngok pivi weretunen rengo mauren se kami. Poro kaploli p̄irpok, ko sete kama-vitan nabong san. <sup>11</sup> Ko rengo murrun ngok puloli sel pimetet tevi kami nga kapsil van loloim rengo batun vanu ne tuwi ngok vini se Numal Iesu Kristo nga mokla mauren tevi kerr. <sup>12</sup> Kami kamrongwos pae sev nga mowrai ngok, ko kamlingi norrorrmien se kami oto eterter rengo weretunen nga kamlai; ko inu sete mea-tibbtibbot kele nga bowra lwenir kele tetajer.

<sup>13</sup> Nulesi mirpok osorsan kobbong nga bololi, nga bowni malum nanu ngok nir e tevi kami daron nga memaur malume. <sup>14</sup> Suri nurongwose, otomori bemij, ko belngi kurtweni nibek ne mijen ngel, erpe Numal se kerr Iesu Kristo owrai pa limjer tevik. <sup>15</sup> Ko niko beplak pilep ko wor nga belngi sel sopor parto metmet tevi kami nga kaprrormi iok ngok nir rengen re daron tetajer. Ko poro inu bemij vajin, ko kami kaptur tetajer renger.

<sup>16</sup> Daron nga namwerai tweni tevi kami nga Iesu Kristo Numal se kerr derteren sen otoo ko pia-luwi kele vini, ko sete namlai nale ngok rengo sel, ejki, ko kem namlesi mawose tevi mete kem nga niben mumor nga mumor lenglengen. <sup>17</sup> Daron nga Atua Tata mususi nisen van mare ko muloli moron mumor vaseni, kem namlik ko, ko namrunge drrelan san nga miplari rengo moron ngok mare vini nga muwra "Ngel evi natuk le nga memrreni lenglengen e, nuir temijpal wor suri." <sup>18</sup> Kem mawos ko namrunge drrelan ngok nga miplari rengo melrin vini, daron nga nampitevi rengo botwen nga muon ngok. <sup>19</sup> Nanu ngok nir arloli nga kem namrongwose kele erres nga nale se propet nir arweretun, ko erres kapmurrong surir p̄irres. Suri nale se propet nir erpe moron san nga mumor rengo nemalik. Ko pumor pijpari nga moju nutrin pia-pelari, ko nat pia-rin vajin rengo nolo kami, rengo nabong se Kristo nga ni pia-luwi vini rengen.

<sup>20</sup> Ko ngel evi norrorrmien nga milep san nga kaprongwose, nga sete san orongwose p̄isan puwra suri nale san nga muto renge Naul On, poro Nen̄in On sete ewilwil sen rengen. <sup>21</sup> Suri nale se propet nir sete eplari renge nir bbong norrorrmien ser, ejki, ko arvijuri wor derteren nga mivel ji Nen̄in On vini daron nga marlai nale nga mivel ji Atua vini.

## 2

### *Jinibb nevisvisenien gerisen*

<sup>1</sup> Renge n̄eri Isrel nir tuwi, propet ne gerisen sopor arlik tevir. Ko pipok kele, jinibb nevisvisenien ne gerisen sopor parpelari renge kami. Arongwose parvisviseni silveni nevisvisenien gerisen nga marsij milep tevi kami nga murongwose pulokloksi kami. Arongwose parlingi kurtweni Iesu Kristo nga mivi Numal ser nga miwilwil se nir renge nololien ser. Renge daron wela ngok, nir luwi kobbong parlokloksi lweni nir. <sup>2</sup> Ko jinibb pilep kele parvijuri nir renge murrin nga marsij p̄erper ser ngok. Re murrin ser ngok jinibb pilep parij p̄isij tere sel ne nale weretunen. <sup>3</sup> Jinibb nevisvisenien gerisen ngok nir nolor evnae nev̄ot, ko parloli kapwulir pilep daron nga marvisviseni kami e nale gerisen ser. Ko tuwi jer pa Atua owra suri lat nga pia-to suri tevir, ko orrorrmi nga pulokloksir. Atua sete ematur, ko ni pia-lokloksir ko, pirpe nga ni muwrai pa nga puloli ko. <sup>4</sup> Ramrongwose nga Atua otorrlai pa anglo nga marloli nololien ko nir; ewirr nir van ngatan jer ko ekai totkonir arlik renge nemalik, pian pijpari nabong nga Atua pia-wera suri lat nga puto suri tevi jinibb nir. <sup>5</sup> Ko rramrongwose nga re daron se Noa, Atua olokloksi jinibb nga marsij ne tuwi nen nir. Ololi vanu orron ko nanu jijle armij. Ko emetmet lilane bbong Noa tevi nir ebut kele. Noa evi jinibb nga mokvisviseni mauren nga muon ko m̄irres tetajer. <sup>6</sup> Ko rramrongwos kele e nga Atua otorrlai jinibb ne ngaim nga Sotom ko Gomorra nga musli nuru tevi nabb. Ololi erpok nga p̄ilai norrorrmien tevi nir nga para-vitu, ko piviseni sev nga pia-pelari kele tevi jinibb jijle nga marsij. <sup>7</sup> Rramrongwose nga Atua emetmet lilane Lot nga mivi jinibb nga m̄irres. Suri Lot ornge esij elep renge murrin nga jinibb nga marsij marloli. <sup>8</sup> Jinibb nga mumomsawos ngok elik tevi lartul ngok nir, ko oklesi murrin nir, ko okrunge nale ser, ko nabong jijle kobbong okrunge esij elep suri. <sup>9</sup> Nanu ngok nir arviseni nga Numal Atua orongwos p̄itkai tweni jinibb nga marres nir parjiekie renge nanu nga marrowrrower; ko nir nga sete

marres, orongwose purrul totkonir pijpari nabong nga milep nga Atua pia-wera suri lat nga puto suri tevi jinibb nir, <sup>10</sup> ko putor vitrangi nir nga marok-loli murrin nga marsij nga nir kobbong marmmerreni, ko nir nga marungasi Atua.

### *Murrin nga m̄isij se jinibb sopor*

Jinibb nevisvisenien gerisen ngok nir nolor ean mare lenglengen. Sete armetutu nir nga marlik renge melrin, ko arok-rij kele esij tevir. <sup>11</sup> Ko anglo nir nga maran mare ko, derteren ser milep wor m̄iasie jinibb nevisvisenien gerisen ngok nir, ko nir armetutu ko sete arongwos parij p̄isij tevi nir renge no Atua. <sup>12</sup> Jinibb nevisvisenien gerisen ngok nir arirpe bbong nanu rrum ko nga marerri ko mariak tweni bbong nga jinibb parrul totonir ko parevji pinir. Nir ngok arij tere sev nga nir sete marongwose; ko para-jijki pirpe nanu rrum ngok ko nir. <sup>13</sup> Nowlir nga marloli jinibb marunge m̄isij renge niber evi nga nir kele para-runge p̄isij. Daron nga marloli limjer nanu nga marsij nir nga nir kobbong armerreni, ko arir kele wor. Nir arloli kammanun ko arlokloksi kami; arini arlik korti tevi kami re nanen, ko daron ngok kele kobbong arok-loli silveni esij. <sup>14</sup> Daron nga marmeteni nesevin san, ko sete arongwose parmeteni nawone, ko armerreni parloli p̄isij ko pa tevi. Tetajer arloli nololien, ko sete arunge evter wor. Arteka kerasi nir nga batur mijkie van re nimet. Arvisviseni nir lweni nga nolor parvevna. Ko nale se Atua eplari pa nga muto pa ji nir, nga para-van re nejijkien ko suri. <sup>15</sup> Arlinglingi sel nga mumomsawos ko arsarr. Arvijuri sel se Balam nga mivi natu Boso. Ni emrreni temijpal nev̄ot nga murrorrm̄i p̄ilai renge sel nga m̄isij, <sup>16</sup> ko dongki sen ewer ore nga sete puloli. Dongki ngok erij tevi erpe jinibb, ko ewer ore murrin lenglengen sen.

<sup>17</sup> Jinibb nevisvisenien gerisen ngok nir arirpe mete nuwi nga mimes pa, ko arirpe nabor nga ling nga milep muwi sisamise. Atua ololi lat san oto metmet pa terair nga mimalik nga mimalik. <sup>18</sup> Arok-rij nale lenglengen ne kowkowrien nga pususture norrorrmien nga marsij nga jinibb mimreni nanu ne niben kobbong. Renge murrin ngok arongwose parkerkerasi jinibb nga mara-lingi kurtweni bbong murrin ne nemalik nir, ko pirvei nir paran parlengleng kele. <sup>19</sup> Jinibb nevisvisenien gerisen ngok nir arok-werai tevi jinibb nir nga parivel sisarow; ko nir lweni sete arivel sisarow, ko arivi ma demij maur re murrin nga pulokloksir. Sete arivel sisarow rragrag, suri daron nga murrin

san m̄ilai tweni jinibb san nga sete orongwose putor ore, ko m̄nren ko erpe demij maur ko pa renga murrun ngok. <sup>20</sup> Jinibb san nga murongwose m̄irres Iesu Kristo Numal se kerr, evel lingi pa murrun ne iel ngatan nga muloli ni murrokitkit. Ko poro vitunen pian kele ko p̄isarr kele renga murrun ngok nga nanu ngok parwowomu kele e ni, ngok nekaien se morok p̄isij kele wor p̄iasi nekaien nga muto womu ren daron nga sete murongwose wore Iesu. <sup>21</sup> Erres p̄elak renga jinibb nga mirpok san nga poro pa sete purongwose sel nga musorsan ko nale nga muon, asie nga ni murongwose ko mivijuri beblen bbong, mian ko mivel lingi kele mirpok. <sup>22</sup> Murru jinibb nga mirpok eviseni nga nale ngok ewretun nga muwra 'Guli olwi kele van orroi lweni sev nga mulu tweni.' Ko eviseni kele nale ngok nga muwra 'Berper nga muwokwok olwi kele van epelpalos luwi kele renga laplap.'

### 3

*Rijrijen tweni daron nga Iesu pia-luwi kele e vini*

<sup>1</sup> Selek nir, ngel evi naul suk erwen tevi kami. Renge naul suk nga eru ngok nomok-lai nale nga puwni kami, nga puloli norrorrmien se kami pusorsan p̄irres. <sup>2</sup> Numrreni kaprormi tutune nale nga propet nga maron nir marwera tweni pa tuwi ko, tevi nesereien se Numal Iesu Kristo nga aposol nir marlai tevi kami. <sup>3</sup> Ko ngel evi norrorrmien nga milep san nga kaprongwose, nga re nabong nga vitu ngel nir, jinibb sopor parini nga murrur pimrreni sev nga m̄isij. Nir parsopsop tevi kami ko parrowrowe nosurien se kami. <sup>4</sup> Parsusi parwera "Ai, p̄irpese le vajin? Rijrijen sen owrai pa nga pivini, ko ean ngabe pae? Birterawarreg se kerr, artevnir pa osuw, ko sete nanu san ermali wor. Etipatun tuwi jer pa evini ejpari lelingenok, ko nanu jikle arorsan bbong erpe nga marto." <sup>5</sup> Arij erpok ko arkikiorore metali re nanu san, ngel: Renge tuwi jer pa Atua erij, ko melrin ko dan orpelari. Ela nuwi ololi dan e, ko dan ermali. <sup>6</sup> Ko erpok kele, ela nuwi ko olokloksi dan, re daron se Noa. <sup>7</sup> Ko melrin ko ngatan nga morto lelingenok, nale se Atua emetmet ore nuru, ortiriv ko vajin nga nabb pia-ani nuru. Nale ngok purrul totkoni pianan pijpari nabong nga milep nga Atua pia-wera suri lat nga pia-to suri tevi jinibb nga marsij nir, ko puloli nir para-jijki suri.

<sup>8</sup> Selek nir, lut san kele nga kaprormi jipari, erpel: Sia evi nuvasngavöl vesan (1000) osorsan kobbong tevi nabong

sansan renga nelesien se Numal. <sup>9</sup> Jinibb sopor arrormi Numal se kerr ololola p̄elak nga sete ololi rijrijen sen eplari engavil; ko sete erpok. Okloli norrorrmien sen epriv nga p̄itravi kami, suri sete emrreni nga jinibb parjijki. Emrreni ma nga jinibb jikle parieni norrorrmien ser suri nololien ser.

<sup>10</sup> Ko nabong se Numal se kerr p̄irmali pirpe nga jinibb venao mivini, renga daron nga kerr sete rramrongwose. Ko renga nabong nga milep ngok, drrela nanu nga milep p̄iap mare, ko melrin pijijki. Nabb nga m̄in milep p̄iani moju nir van ko parjijki, ko ngatan kele tevi nanu jikle nga marto ren parjijki.

### *Bongsi nale*

<sup>11</sup> Suri pianan ko nanu jikle ne iel ngatan parjijki p̄irpok, ko kami kapmetmet ko wor mauren se kami p̄irres. Kami kapon ko wor, ko murru kami p̄irres jikle re nanu p̄etp̄eti nga kamloli. <sup>12</sup> Kaptirive nabong nga Atua pia-vini ren, ko kapmajing tweni nga nabong ngok pivini pingavil. Daron ngok, nabb p̄iani nanu totoklai ne melrin parjijki, ko moju parliv. <sup>13</sup> Ko Atua owrai pa nga nabong sopon pia-lingi ngatan ko melrin nga mimerr; nga murrun nga musorsan m̄irres kobbong puto ren. Ko rramok-tiriv rijrijen sen ngok.

<sup>14</sup> Ko selek nir, kerr jikle rramtiriv tweni nabong se Atua. Ko daron nga kamok-tiriv tweni nanu ngok nir parremali, kami kapp̄elak ko wor pilep nga kaploli mauren se kami puwokwok p̄irres renga no Atua, ko kaplik renga demat. <sup>15</sup> Numal se kerr nolon epriv temijpal nga mok-travi kerr. Ko erres nga rraplesi murrun sen ngok evi sel se kerr nga rraplesi mauren ren. Tasi kerr nga rrammerreni ngok Pol oli naul san tevi kami nga muspe iok kele, renga norongwosien nga Atua m̄ilai tevi. <sup>16</sup> Tetajer re naul sen nir oksupe suri nanu ngok nir. Ko lat sopor re naul se Pol nir eterter nga jinibb parongwose. Jinibb nga sete batur mivter, ko jinibb nga norrorrmien ser sete musorsan, arieni murru nale ngok enije, erpe marok-loli pa re nale nga marto pa sopon renga Naul On. Re murrun ngok nir arlokloksi lwenir, ko para-jijki ko suri.

<sup>17</sup> Ko selek nir, kamrunge pa nale nga puwni kami. Re iok, kapmetmet ko wor p̄irres; poro pijki, ko nir ngok nga sete martori murrun nga musorsan tarevei kami renga nale gerisen ser nga tuloli takator jabble lat nga m̄irres nga kamtur e, ko tuloli takvitan.

<sup>18</sup> Tetajer, kerr rraplik ko wor ko rrapimare kele renga liken se kerr renga sel nga rraprongwos rruungi merrenien se

Iesu Kristo, Numal se kerr ko m̃er nga mokla mauren tevi kerr, nga mok-wilwil se kerr rengenolon nga m̃irres p̃elak. Tetajer rrapstur̃ovi Kristo ko rraposuri, p̃itipatun lelingenok pianan pijpari tuwi ngok vini. Pirpok.



**Naul nga  
JON  
Muli Womue  
Batu nale nga mivsvseni  
lut nga parmteni naul  
ngel puto suri**

Rrek Jon nga muli naul ngel evi Jon nen nga muli nospen nga mĩrres ivajin, ko nga mĩlesi kele bori sen ko muli tweni mivi naul nga vitu jer nen renga Naul On nga Mimerr. Ko naul ngel nga rramveruse Naul (rrek Leta) nga Jon muli womue, ni oli van ji kalesia petpeti nir. Ko ni owra batu merrenien oto ji Atua, ko kerr rramerrmerreni wor kerr ko. Ko erpok orongwos kerr rrapasie murrun nga marsij ne iel ngatan.

*Nale ne mauren*

<sup>1</sup> Namulul tevi kami suri Nale ne mauren nga muto pa tuwi musuw, ko Atua mia-loli nanu jikle vajin. Namrunge mauren nen ko pa ko namlesi ko pa tevi mete kem mawos. Nammeteni ko namjipari nevre kem e. <sup>2</sup> Daron nga Atua miviseni mauren nen, kem namlesi ko pa, ko namwerai tevi kami suri mauren nga muto tuwi ngok vini tevi Atua Tata, nga muloli kerr rramrongwose vajin. <sup>3</sup> Sev nga namlesi pa ko namrunge pa, namwerai tevi kami kele, puloli nga kami kappitevi kem kele renga gortien se kem tevi Atua Tata ko Natun Iesu Kristo. <sup>4</sup> Ko namuli erpok nga neiren se kerr pokres kemkarne.

*Atua evi moron*

<sup>5</sup> Ko ngel evi nospen nga namrunge pa ji Natun Iesu ko namwerai vajin tevi kami: Atua evi moron, ko nemalik ejki rres nawon ji ni. <sup>6</sup> Ko niko, poro kerr rrapwerai rramloli gortien tevi ni, daron nga murru kerr muto re nemalik kobbong, rramkerkeris ko sete rramok-loli osorsan tevi weretunen. <sup>7</sup> Ko poro murru kerr puto re moron, pirpe Atua nĩlik pa re moron, rramok-loli gortien tevi kerr sisamis, ko drra Iesu Kristo Atua Natun okrawe tweni kerr renga nololien jikle.

<sup>8</sup> Poro rrapwerai nololien se kerr ejkie, rramok-kerkerasi lweni bbong kerr, ko weretunen ejki ji kerr. <sup>9</sup> Ko poro rrapwera tweni nololien se kerr tevi Atua, rramrongwose erres nga Atua puloli sev nga mumomsawos ko pilai tweni nololien se kerr ko pirrawe tweni kerr renga sel nga marsij. <sup>10</sup> Ko poro rrapwera "O, kerr sete rramloli nololien te", ngok erpe rrawera

"Atua ekerkeris kobbong", ko nale sen ejki ji kerr.

**2**

*Kristo nga mokpitemi kerr*

<sup>1</sup> Nomok-uli naul ngel tevi kami, natuk nir, nga pilje totoni norrorrmien se kami nga sete kaploli nololien kele. Ko poro kami san puloli kele pirpok, ko jinibb nen otoa nga pirij tevi Atua Tata nga pilai mauren tevi kerr, evi Iesu Kristo nga mumomsawos. <sup>2</sup> Ko Kristo esan evi jinibb nga pitlasi nololien se kerr, suri mijen sen. Ko sete nololien se kerr kis kobbong, ko nololien se jinibb jikle ne iel ngatan.

<sup>3</sup> Ko poro rraproti totoni nale se Atua, ko ngok rramrongwose erres nga rramrongwose ni. <sup>4</sup> Poro jinibb san puwra "O, nurongwose ni", ko sete otori totoni nale sen, morok ekrekris, ko weretunen ejki ji ni. <sup>5</sup> Ko si nga moktori totoni nale sen evi ni nga merrenien se Atua muto jile pa jin musuw, suri emrreni Atua elep. Ko renga nanu san rramrongwose nga rramkorti pa tevi Atua, ngel: <sup>6</sup> Si nga muwrai nga mukorti pa tevi Atua, murrun pusorsan ko wor tevi murru Iesu Kristo.

*Nale neseseien nga mimerr*

<sup>7</sup> Selek nir, nale neseseien nga moli tevi kami ngel sete emerr. Ejki, evi nale nga mĩtra pa san, etipatun daron nga kamivi rrongvi kalesia e. Nale nga mitra ngel evi nale nga kamrunge pa musuw. <sup>8</sup> Ko nuwretun, nale nga moli tevi kami emerr kele. Suri lelingenok nemalik evanan pa pijijki, ko moron weretunen omor pa. Eplari pa erpok renga liken se Kristo ko re kele liken se kami.

<sup>9</sup> Isi nga muwra ni elik pa renga moron, ko mungasi tasin, osorsan erpe nga ni nĩlik malum re nemalik mivini mijpari lelingenok. <sup>10</sup> Isi nga mimrreni tasin elik pa renga moron, ko nanu san ejki kele nga puloli mĩernen pivitan van re nololien kele. <sup>11</sup> Ko si nga mungasi tasin elik re nemalik, otong nawon ko sete orongwose lat nga mivel ren, suri nemalik ololi meten orrorr.

<sup>12</sup> Natuk welili nir, nulul tevi kami suri Atua etlasi pa nololien se kami suri Kristo. <sup>13</sup> Tata nir, nulul tevi kami suri kamrongwos pae ni nga nĩlik pa tuwi musuw. Melakel nir, nulul tevi kami, suri kabböt ore pa nemĩn nga nĩsij ko kamtorrlai.

<sup>14</sup> Natuk welili nir, nulul tevi kami kele, suri kamrongwose Atua Tata; tata nir, nulul tevi kami, suri kamrongwos pae ni nga nĩlik pa musuw renga daron nga womujnen. Melakel nir, nulul tevi kami suri kamterter; nale se Atua emaur renga nolo kami pa, ko kabböt ore pa nemĩn nga nĩsij ko kamtorrlai.

<sup>15</sup> Sete kapmerreni iel ngatan ko nanu nga marivi ne iel ngatan. Poro kapmerreni iel ngatan, ko sete kamrongwos kapmerreni Atua Tata, ejki. <sup>16</sup> Suri nanu jijle nga marivi ne iel ngatan, nga nolo jinibb m̄ilai, ko marlesi ko marmerreri, ko nanu jijle nga jinibb m̄ir ko nolon mian mare suri, sete san evel ji Atua Tata vini; totoklai eplari rengo iel ngatan kobbong. <sup>17</sup> Ko ngatan ngel ko nanu jijle nen nga jinibb nen marmerreri arok-jijki. Ko si ma nga mokloli marongen se Atua jilik ko wor tetajer pijpari tuwi ngok vini.

*Devje nuval se Kristo*

<sup>18</sup> Natuk welili nir, sete mia-periv nga iel ngatan pusuw. Erpe kamrunge pa nga devje nuval nen se Kristo pia-vini; ko lelingenok, devje nuval se Kristo elep pa marpelari musuw. Ko ngok rramrongwose nga sete mia-periv iel ngatan pusuw. <sup>19</sup> Devje nuval ngok nir, womu arlik rengo gortien se kerr. Ko sete arivi kalesia weretunen, ko arivel lingi kerr. Poro parweretun nga marpitevi kerr rengo gortien se kerr, ko parlik ko wor tevi kerr; ko ejki. Ko suri arivel lingi pa kerr, ko eplari erres nga sete nir san rengo nir ngok evi jinibb weretunen rengo gortien se kerr.

<sup>20</sup> Ko kami ma, Kristo, Jinibb On se Atua, elai pa Ner̄in On tevi kami osuw; ko kami jijle kamrongwose. <sup>21</sup> Niko muloli nuli naul ngel kele tevi kami. Sete suri kamrelenge sev nga mivi weretunen, ejki. Nuli naul ngel tevi kami suri kami kamrongwos pae weretunen, ko kami kamrongwose nga gerisen sete orongwose piplari rengo weretunen.

<sup>22</sup> Ia, ko jinibb si evi botgerisen? Jinibb nga mokwerai nga "Iesu sete evi Kristo nga Atua mukoni". Mernen ko evi devje nuval nen se Iesu Kristo, nga mutur telure Atua Tata ko Natun Iesu. <sup>23</sup> Nale ngok evi weretunen, suri daron nga jinibb mutur telure Natu Atua, ko otur telure Atua Tata kele ko pa, ko Atua Tata sete eptevi ni. Ko jinibb nga muwrai tweni nga muosuri Natu Atua, Atua Tata kele eptevi ni.

<sup>24</sup> Erpok, kaplingi nolo kami tetajer re nale nga kamrunge womujnen e pa musuw. Poro kaplingi nolo kami tetajer re nale ngok, ko kaplik korti tetajer tevi Atua Natun ko Atua Tata. <sup>25</sup> Ko ngel le evi merrenien nga ni muwra pia-lai tevi kerr, mauren nga muto tuwi ngok vini.

<sup>26</sup> Nuli nale ngok van ji kami tweni nir nga marwera parkerkerasi kami kapan re nololien nga marsij. <sup>27</sup> Ko kami ma Kristo ejivreni pa Ner̄in sen re kami. Ko sete kama-pej kele mun m̄ier san nga pivisviseni kami, suri Ner̄in oto pa re kami osuw, ko okvisviseni kami suri nanu

jijle. Ko sev nga mivisviseni sete evi gerisen, evi weretunen jerjer. Kaposuri nevisvisenien nga Ner̄in m̄ilai tevi kami, ko kaplik korti tevi Kristo.

<sup>28</sup> Pirpok, natuk nir, mauren se kami pukorti ko wor tevi Kristo. Ko pirpok, daron nga pia-rremali e, ko norrorrmien se kerr oto eterter pa. Setemun rramamanun ko setemun rrama-teptepi rengo non re nabong nga milep nga pia-vini e. <sup>29</sup> Kami kamrongwos pae nga sel se Atua omomsawos kobbong. Ko ngok ma, kamrongwose kele nga nir jijle nga marokloli nanu nga mumomsawos arivi natu Atua.

### 3

*Kerr rramivi Atua natun*

<sup>1</sup> Kaplesi merrenien nga milep nga Atua Tata m̄ilai tevi kerr! Merrenien sen elep pelak nga miveruse kerr Atua natun. Ko weretunen rramivi pa natu Atua. Erpok ko, suri jinibb ne iel ngatan nir sete arongwose Atua, ko niko nir sete marongwose kerr. <sup>2</sup> Selek welili nir, rramivi natu Atua pa osuw. Ko sete eplari wor erres nga rrapa-irpese. Ko kerr rramrongwose nga daron nga Kristo piplari e, kerr rrapa-irpe ni, suri rengo daron ngok rrapa-lesi momsawose ni rengo mete kerr. <sup>3</sup> Ko jinibb si nga moklingi nolon m̄iterter rengo Kristo mirpok, okloli lweni ni owokwok kele, erpe nga Kristo kele muwokwok.

<sup>4</sup> Si nga mokloli nololien, erpe otur otvi pa nale neseseien se Atua. Suri sel ne nololien erpok ko, nga martor otvi nale neseseien se Atua. <sup>5</sup> Ko kamrongwose nga Kristo eplari pa nga pilai tweni nololien se kerr; ko nololien san ejki ji ni. <sup>6</sup> Jinibb nga mauren sen mukorti tevi Kristo setemun okloli nololien. Ko jinibb nga marokloli nololien sete arlesi wose Kristo, ko sete arongwose ni.

<sup>7</sup> Natuk welili nir, sete kaploli jinibb parkerkerasi kami. Si nga mokloli sev nga mumomsawos, ni omomsawos, erpe kele nga Kristo mumomsawos. <sup>8</sup> Ko si nga mokloli nololien evi se Demij. Suri Demij ololi nololien sen oto pae, etipatun re daron nga iel ngatan setewor miplari e. Suri nololien se Demij muto pa, evi batun nga Iesu Atua Natun mivini kele nga pulokloksi sev nga Demij muloli.

<sup>9</sup> Si nga mivi natu Atua setemun mia-loli nololien tetajer, suri wenen se Atua emaur rengen. Ko sete orongwose puloli kele nololien tetajer, suri evi pa natu Atua. <sup>10</sup> Rramrongwose rraplesi wose p̄irres si nga marivi natu Atua ko si nga marivi natu Demij mirpel ngel: Si nga sete mokloli sev

nga mumomsawos rreknga sete mokmerreni tasin, sete evi natu Atua.

*Rrapmerrmerreni kerr*

<sup>11</sup> Nospën nga kamrunge m̄itipatun re nga kamivi womu kalesia e erpel: rrapmerrmerreni wor kerr ko. <sup>12</sup> Sete rrapirpe Ken. Ni evi se nen̄in nga m̄isij, ko erevji pini tasin Apel. Suri sev Ken mirevji pini Apel? Suri, sev nga Ken mokloli arsi, ko sev nga Apel mokloli, arres. Ko niko muloli Ken mungasi Apel suri, ko mirevji pini.

<sup>13</sup> Tasik ko jojik nir, sete kaptaol daron nga jinibb ne iel ngatan nir marungasi kami. <sup>14</sup> Rramrongwose nga rramasi pa renge mijen ko rramini re mauren. Rramrongwose erpok suri rrammerreni tasi kerr nir. Si nga merrenien sen mijkie elik malum rengen sel ne mijen. <sup>15</sup> Si nga mokungasi tasin evi m̄er nga mokrevji pini jinibb. Ko kamrongwose nga jinibb nga mirpok sete elai wor mauren nga muto tuwi ngok vini ko. <sup>16</sup> Ko ngel le eviseni kerr nga merrenien erpese: Kristo emarong pa nga mimij suri kerr. Ko kerr rrapmaronge kerr kele ko wor nga rrapmij suri tasi kerr nir. <sup>17</sup> Ko poro jinibb nga joron milep p̄ilesi tasin nga joron san mijkie, ko ololi nolon okul tevi tasin, ko suri sev puwrai nga merrenien se Atua oto jin? <sup>18</sup> Natuk welili nir, merrenien se kerr sete pivi nale kobbong ko rijen; ko pivi merrenien weretunen ko wor, nga rramok-loli musorsan rengen mauren se kerr.

*Norrormien se kerr nga m̄üterter re no Atua*

<sup>19</sup> Erpok, rramrongwose nga rramivi jinibb ne weretunen, ko ngok ma orongwose puloli norrormien se kerr p̄üterter rengen no Atua. <sup>20</sup> Sete rraprorrmi nale sev nga norrormien se kerr mokrorrmi nga mokwer lokloksi kele bbong kerr rengen. Suri Atua ean wor mare easi norrormien se kerr, ko orongwose nanu jijle. <sup>21</sup> Ko selek welili nir, poro norrormien se kerr sete mokwer lokloksi kerr, ko rrapan ji wor Atua ko, nga nolo kerr sete pimtutu. <sup>22</sup> Ko poro rrapvijuri sel nga ni m̄ir ren, ko rraposuri nale neseseien sen, rramrongwose rraplesi sev nga rramgoni ji ni. <sup>23</sup> Nale neseseien se Atua owrai erpel, nga rraposuri Natun Iesu Kristo, ko rrapmerrmerreni kerr pirpe Kristo muwrai pa tevi kerr. <sup>24</sup> Si nga mokosuri nale se Atua elik korti tevi Atua, ko Atua okorti tevi ni. Ko suri Nem̄in nga Atua m̄ilai tevi kerr pa, rramrongwose nga Atua elik korti pa tevi kerr.

**4**

*Nem̄in ne weretunen ko nem̄in ne gerisen*

<sup>1</sup> Selek nir, propet elep marok-ivel ko marok-wera "O inu ma Nem̄in se Atua elik re inu". Ko sete erres nga kaposuri nir jijle. Kaprrowrowe nir ko wor ko kaplesi poro nem̄in nen eplari ji Atua rreknga ejki. Suri propet ne gerisen elep marivel sarsarr iel ngatan. <sup>2</sup> Kapa-rongwose pia-irpel ko poro nga evi Nem̄in se Atua; nir nga marok-suŕe nga daron nga Iesu Kristo mivini iel ngatan niben evi jinibb rres erpe kerr; nir ngok Nem̄in nga miplari ji Atua oto pa ji nir. <sup>3</sup> Ko jinibb nga mokwera "Daron nga Iesu mivini iel ngatan, niben enije", ko morok Nem̄in nga miplari ji Atua ejki ko muto rengen ngok. Nem̄in nga muto jin ngok evel ji devje nuval se Kristo ko vini. Rramrunge pa nale nga ni pia-vini, ko lelingenok elik tevi pa kerr iel ngatan osuw.

<sup>4</sup> Ko natuk nir, kami kamivi pa jinibb se Atua. Ko kabböt ore pa gerisen se propet ngok nir osuw, suri Nem̄in nga muto rengen kami ngok, derteren nen easi nem̄in nga muto re jinibb ne iel ngatan nir. <sup>5</sup> Jinibb gerisen ngok nir arok-ivel arsuŕe suri norrormien ne iel ngatan, suri arivi pa jinibb ne iel ngatan. Ko jinibb nir armurronge nir, suri nir kele arivi jinibb ne iel ngatan kobbong. <sup>6</sup> Ko kerr ma rramivi jinibb se Atua, ko nir nga marongwose Atua arok-murronge kerr. Ko nir nga sete marivi jinibb se Atua, sete arongwose parmurronge kerr. Renge sel ngok ko, rramrongwose nga isi evi nem̄in ne weretunen ko isi evi nem̄in ne gerisen.

*Batu merrenien oto ji Atua*

<sup>7</sup> Selek nir, rrapmerrmerreni wor kerr ko, suri merrenien evel ji Atua vini. Si nga merrenien muto jin evi pa natu Atua ko orongwose Atua. <sup>8</sup> Ko si nga merrenien mijki jin sete orongwose Atua, suri batu merrenien oto ji Atua. <sup>9</sup> Ko Atua eviseni merrenien sen tevi kerr nga mukoni Natun sansan bbölböl mivini iel ngatan, nga puloli sel se kerr nga rraplai mauren rengen ni. <sup>10</sup> Merrenien erpel: sete evi nga kerr rrammerreni Atua, ejki. Atua ko wor emrreni kerr elep, ko okoni Natun nga pivini pimij nga p̄itlasi tweni nololien se kerr.

<sup>11</sup> Selek nir, suri Atua emrreni kerr elep erpok, niko kerr kele ko wor rrapmerrmerreni lululweni kerr. <sup>12</sup> Jinibb san setewor elesi Atua nabong san. Ko daron nga rrammermerreni lululweni kerr, ko Atua elik vajin liven e kerr; ko merrenien sen oto jile pa ji kerr osuw.

<sup>13</sup> Atua elai pa Nem̄in sen tevi kerr, ko ngok rramrongwose erres nga rramkorti erres tevi Atua, ko Atua okorti tevi kerr. <sup>14</sup> Rramlesi pa nga Atua Tata se kerr

mukoni Natun mivini nga m̄isre nololien se kerr, nga p̄ilai mauren tevi kerr jinibb ne iel ngatan. Ko rramok-werai nga nanu ngok evi weretunen. <sup>15</sup> Si nga muwrai tweni nga Iesu evi Natu Atua, Atua okorti tevi ni, ko ni okorti tevi Atua. <sup>16</sup> Ko kerr rramrongwose ko rramosuri merrenien nga milep nga Atua mimrreni kerr rengen.

Atua evi batu merrenien, ko si nga moklik renge merrenien oklik korti kele tevi Atua, ko Atua oklik korti tevi ni. <sup>17</sup> Daron nga merrenien se Atua oto jile pa erpok ji kerr osuw, ko rrapa-tur p̄iterter renge nabong nga Atua pia-wera suri lat nga puto suri tevi jinibb nir, suri mauren se kerr iel ngatan osorsan pa tevi Kristo. <sup>18</sup> Jinibb nga mimrreni Atua setemun orongwose pimtutu. Daron nga merrenien se Atua muto jile pa ji kerr musuw, ko oji tweni vajin metutuen. Ko jinibb nga mokmetutu nga Atua putor vitrangi, rrekma merrenien se Atua setewor oto erres jin.

<sup>19</sup> Kerr merrenien se kerr oto pa, suri Atua emrreni lenglengen wor kerr womujnen. <sup>20</sup> Si nga muwra "O inu numrreni Atua", ko mungasi tasin, evi jinibb ne gerisen kobbong. Sete orongwose pimrreni Atua nga ni sete m̄ilesi re meten, poro ni sete pimrreni tasin nga ni m̄ilesi pa musuw re meten. <sup>21</sup> Ko ni le nale neseseien nga Kristo muwrai tevi kerr, muwra jinibb nga mimrreni Atua pimrreni kele wor tasin ko.

## 5

### *Rramasie murru iel ngatan*

<sup>1</sup> Si nga muosuri nga Iesu evi Kristo nga Atua mukoni, evi pa natu Atua. Ko si nga mimrreni Atua Tata, emrreni natun kele. <sup>2</sup> Poro rrapmerreni Atua pilep, ko rrapokvijuri nale neseseien sen, ko ngok ma evi sel nga rramrongwose nga rrammerreni natun nir kele. <sup>3</sup> Poro rrapmerreni Atua, ko ngok rrapvijuri nale neseseien sen. Ko nale neseseien sen sete eterter nga kerr rrapvijuri. <sup>4</sup> Suri kerr jijle nga rramiak pa ji Atua, rramrongwose rrapasie murru iel ngatan. Ko sel nga rrapasie iel ngatan erpel: rramok-asi suri rramosuri Iesu. <sup>5</sup> Sete jinibb elep arongwose parasie murrun nga marsij ne iel ngatan, nga paroloi pusorsan. Jinibb nga muosuri nga Iesu mivi Natu Atua kobbong orongwose p̄iasi.

### *Sev nga Atua muwrai suri Iesu*

<sup>6</sup> Iesu Kristo evi jinibb nga mivini; ko nuwi nga marpaptas ni rengen ko drran nga m̄iseser daron nga mimij e, ko erpe nanu ngok ko orviseni ni. Sete nuwi kobbong nga miviseni ni, ko nuru korti, nuwi ko drran nga morviseni. Ko Nem̄in On kele okwerai tweni nga Iesu evi Natu

Atua, ko Nem̄in On ngok evi pa weretunen. <sup>7</sup> Nir itul nga martur tevi Iesu: <sup>8</sup> Nem̄in On, nuwi nga mipaptaese, ko drran nga m̄iseser daron nga mimij e. Ko nir itul ngok arwera nanu sansan kobbong. <sup>9</sup> Ko rramosuri sev nga jinibb marwerai; ko sev nga Atua muwrai ma easi kele wore nanu nga jinibb muwrai. Ko nanu itul ngok arivi nanu nga Atua muwrai tweni Natun. Rrek rraposuri ko wor. <sup>10</sup> Ko si nga muosuri Natu Atua otori ko pa nanu nga Atua muwrai rengen nolon osuw. Ko si nga sete muosuri Atua erpe owra "Atua ekekris kobbong", suri sete osuri nanu nga Atua muwrai tweni Natun. <sup>11</sup> Ko ngel evi nanu nga Atua muwrai, nga ni elai mauren nga muto tuwi ngok vini tevi kerr, ko mauren nen oto ji Natun. <sup>12</sup> Si nga muosuri Natun re nolon ela pa mauren nen. Ko si nga sete muosuri Natu Atua re nolon setewor ela mauren nen.

### *Mauren nga muto tuwi ngok vini*

<sup>13</sup> Nuli naul ngel tevi kami nga kamosuri nise Natu Atua, nga kaprongwose nga kamlai pa mauren nga muto tuwi ngok vini ko sete mia-suw nabong sopon. <sup>14</sup> Ko daron nga rramini re no Atua nga rraplot e, norrorrmien se kerr eterter pa. Rramosuri nga poro rrapngoni nanu san ji ni nga musorsan tevi marongen sen, ni purnge verusen se kerr ko. <sup>15</sup> Ko suri rramrongwose nga ni ornge pa verusen se kerr, ko niko rramrongwose kele nga nanu jijle nga rramngoni ji ni arivi pa se kerr osuw.

<sup>16</sup> Poro kami san p̄ilesi tasin puloli nololien nga sete pivi nololien nga pialai ni van re mijen, ni pulot ko wor suri tasin ngok. Ko Atua p̄ilai mauren tevi tasin nga muloli nololien ngok. Ko nololien nga mok-lai jinibb van re mijen oto wore, ko sete nuwra kaplot tevi Atua suri iok, ejki. <sup>17</sup> Murrun jijle nga sete marsorsan arivi nololien, ko sete nololien jijle arterter p̄elak. Nololien otoe nga sete mok-lai jinibb van re mijen.

### *Bongsi nale*

<sup>18</sup> Rramrongwose isi nga m̄iak ji Atua sete okloli nololien tetajer, suri Iesu Natu Atua okmetmete, ko nem̄in nga m̄isij sete orongwose pijpari ni.

<sup>19</sup> Rramrongwose nga kerr ngel, rramivi jinibb se Atua. Ko nir p̄etp̄eti nga martur rengen sel ne iel ngatan arlik rengen derteren se nem̄in nga m̄isij.

<sup>20</sup> Ko rramrongwose nga Natu Atua evini pa iel ngatan, ko elai pa derteren tevi kerr nga rraprongwose Atua weretunen. Ko mauren se kerr okorti tevi Atua nga mivi weretunen, suri mauren se kerr okorti pa tevi Natun Iesu Kristo. Ngok ko Atua nga

mivi weretunen, ko ngok ko mauren nga  
sete murongwose pusuw nabong sapon.

<sup>21</sup> Natuk nir, kapmetmet lululweni kami  
p̄irres, sete kaplengleng kapvijuri atua  
gerisen nir.

**Naul Erwen nga  
JON  
Muli  
Batu nale nga mivsvseni  
lut nga parmeteni naul  
ngel puto suri**

Jon olul kele, ospé suri merrenien ko weretunen. Ko olul van ji 'lekter' san ko 'natun' nir, ko rrek iok ni owra puwra meling kalesia (jos) san.

*Nale Womujnen*

<sup>1</sup> Inu le nga mevi mērwomu ne Naim On, nuwra erres tevi nik, lekter san nga Atua mutobbobbue nik, ko nuwra erres tevi natum kele nir. Inu numrreni kami elep, suri rramkorti renge nale weretunen. Ko sete inu kis kobbong, nir jijle nga markorti renge nale weretunen armerreni kami erpok, <sup>2</sup> suri weretunen nga muto pa ji kerr ko puto kele tevi kerr tetajer.

<sup>3</sup> Ngel evi loten suk tevi kerr nga rramlik renge nale weretunen, ko rramok-merreni jinibb nir. Atua Tata, tevi Iesu Kristo Natu Atua, porok-la se kerr tevi nolo nuru nga mīrres, ko porrorrmi kerr, ko porlai demat tevi kerr.

*Weretunen ko merrenien*

<sup>4</sup> Inu nurnge erres nga mēlesi natum nir sopor marok-vijuri nale weretunen, erpe nga Atua Tata muwrai pa tevi kerr musuw. <sup>5</sup> Ko lekter, inu numrreni bowrai kele tevim nga kerr rrapmerrmerreni kerr pilep ko wor. Inu sete nuli nga bea-werai nesesreien nga mimerr kele san tevim, ejki. Nesesreien ngok, rramrunge pa womujnen osuw. <sup>6</sup> Ko murrun nga rramok-merrmerreni lenglengen kerr e, ngok evi nga rrapvijuri nesesreien nga Atua muwrai. Nesesreien se Atua ngok rramrunge pa osuw daron nga rramrunge nale nga mīrres womujnen, nga muwra mauren se kerr puwun saut ko wor renge murrun nga rrapok-merrmerreni kerr pilep.

<sup>7</sup> Jinibb ne gerisen elep pa marivel karkar iel ngatan musuw. Nir ngok sete arok-werai nga, daron nga Iesu Kristo mivini iel ngatan, niben erpe jinibb rres kobbong. Nir nga marirpok arivi jinibb ne gerisen mawos, ko arivi devje nuval se Kristo. <sup>8</sup> Kapmetmet nga taktor jabble sev nga kampelak tweni, ko kapa-lai wor nowlin pētpēti.

<sup>9</sup> Jinibb si nga mivel ngasu ko sete mivijuri nale nesesreien se Kristo, Atua sete elik re mauren sen. Ko jinibb si nga

mivijuri nale nesesreien se Kristo, Atua Tata tevi Natun Iesu Kristo, nuru korti orlik tevi renge nolon. <sup>10</sup> Poro jinibb san pivini ji kami ko sete owra visviseni nale se Kristo, ko sete kaplai pian loloim se kami. Poro jinibb nga mirpok pivini, ko sete kapwerai erres tevi. <sup>11</sup> Suri jinibb nga puwrai erres tevi mīernen, ko erpe ni kele ko ok-korti tevi renge majingen nga marsij sen.

*Bongsi nale*

<sup>12</sup> Nale elep nga bowrai tevi kami, ko numusus boli tweni renge naul. Ko norrorrmien suk oto eterter erpel, nga bea-vinuk kele bea-lesi kami, ko rrapa-jiljilwer sapon. Renge murrun ngok kerr jijle rraprongwos rrapa-runge pīrres pilep ren.

<sup>13</sup> Jojim nga Atua mutobbobbue, natun nir arwerai erres wor tevi nik.

**Naul Itolin nga  
JON  
Muli  
Batu nale nga mivsvseni  
lut nga parmeteni naul  
ngel puto suri**

Jon olul kele, ko owra kalesia nir par-wilwil se nir nga marok-ivel tweni par-supsupe Numal tevi jinibb nir. Ko oli van ji kalesia san nga nisen Gaeas, nga mivi burtur (lida) san, ko nga mokmetmete erres nir nga marok-ivel mirpok.

*Nale womujnen*

<sup>1</sup> Inu le nga mevi m̄erwomu ne Naim On ko nuwra erres tevi nik Gaeas, nga memrreni nik milep.

<sup>2</sup> Selek, nurongwose osuw nga mauren som rengo no Atua oto erres. Ko nomok-lot suri nga liken som puto p̄irres rengo nanu jijle nga marres, ko nibem kele p̄iterter.

<sup>3</sup> Tasi kerr sopor arpelari pa osuw, ko arw-erai nga nik kutur eterter nga kumtori nale weretunen ne nale nga m̄irres ngel, ko nga nik komok-vijuri nale weretunen tetajer rengo mauren som. Daron nga morngo, ko nuir elep suri. <sup>4</sup> Daron nga morngo natuk nir marok-vijuri nale weretunen tetajer rengo mauren ser, ngok ololi inu nuir kele wor easi nanu m̄inij kele nir.

<sup>5</sup> Selek, nik komok-tori majingen eterter. Ko tasi kerr ngok nga marinuk jim, poro arivi jinibb nga dis nar mia-jumjum bbong, ko nik komok-metmete nir erres. <sup>6</sup> Ko nir arwerai tweni pa osuw tevi kalesia ne iel nga nik kumrreni nir elep. Ko daron nga parivel lingi naim som, erres nga kuppitevir rengo nanu jijle rengo murrun nga Atua p̄ir rengen, <sup>7</sup> suri lartul ngok nir arlinglingi siser suri majingen se Kristo kobbong, ko sete arlai nanu san ji jinibb nga sete marivi kalesia nga partotori. <sup>8</sup> Erres nga kerr ma rraplai tevi lartul ngok nir sev nga nevrer marmumrrol ren, nga rrapmajing korti tevir rengo majingen ser nga parwerai tweni weretunen.

*Diotrepes ko Demitrias*

<sup>9</sup> Inu nuli naul san pa osuw van ji kalesia nga sisom. Ko Diotrepes orong tweni nale suk, suri emrreni p̄ilngi lweni ni puwomu. <sup>10</sup> Ngok ma, poro bevinuk, ko bowrai tweni tevi m̄ernen murrun sev nga ni mokloli, ko bowrai tweni nale gerisen nga ni mokwerai nga poklokloksi liken suk. Ko murrun setewor osuw iok. Sete orongwose p̄itkai kele tasi kerr ngok nir parini re naim sen; ko mare nen kele,

okwer ore nir nga marwera partekair van re naim ser. Ko okoji tweni kele sele tasi kerr ngok nir rengo Naim On.

<sup>11</sup> Selek, sete kupvijuri murrun nga m̄isij. Kupvijuri murrun nga m̄irres kobbong. Si nga mokloli murrun nga m̄irres evi natu Atua. Ko si nga mokloli murrun nga marsij rrek setewor okorti tevi Atua nabong san.

<sup>12</sup> Ko Demitrias, jinibb jijle arok-werai ni evi jinibb nga m̄irres, ko nale weretunen se Atua kele eviseni nga ni osorsan. Ko inu kele nulai devjen sen nga nuwrai ni erres osorsan, ko nik kurongwose nga nale suk ngel evi weretunen.

*Bongsi nale*

<sup>13</sup> Nale elep nga bowrai, ko sete numrreni boli tweni rengo naul. <sup>14</sup> Ko norrorrmien suk oto eterter nga sete mia-periv rrek bea-lesim kele ko rropora-jiljilwer sapon.

<sup>15</sup> Ngel evi loten suk, nga demat pipatevi nik. Sele kerr nir nga iel arwerai erres tevim. Ko kupa-werai erres sisamis tevi sele kerr kele nir nga iok.

**Naul nga  
JUT  
Muli  
Batu nale nga mivsviseni  
lut nga parmeteni naul  
ngel puto suri**

Jut nga muli naul ngel evi tasi Jemes, ko niko evi tasi Iesu san. Ko ospê jinibb nevisvisenien gerisen, ko owra Atua putor vitrangî (panisem) nir. Ko owra kalesia nir parrul totkoni wor nosurien ser.

*Jut owra erres tevi nir*

<sup>1</sup> Inu Jut nuvi jinibb ne majingen nga Iesu mukonik, ko nuvi tasi Jemes. Nuli naul ngel tevi kami, ko nuwrai erres tevi kami nga Atua miveruse kami ko nga merrenien se Atua Tata miptevi kami, ko nga liken se kami muto mîrres re Iesu Kristo. <sup>2</sup> Ngel evi loten suk, nga Atua purrorrmi kami, ko nga puloli demat puto ji kami kele wor nga kalesia mauren se kami pian mare kele wor, ko nga murrun nga kapmerreni sele kami pimaaur pîterter kele wor.

*Jinibb nevisvisenien gerisen*

<sup>3</sup> Selek nir, nurrormi elep nga boli naul ngel tevi kami tweni nosurien nga muto pa ji kalesia nir. Ko lelingenok nurnge erpe boli wor naul vinuk ji kami nga pususture norrorrmien se kami, nga puloli kaptur pîterter, ko kapirpe nato dosevin nga miverver ore natun tevi nale weretunen nga kamosuri pa musuw. Ngok nale weretunen nga Atua mîlai pa musuw, ko setemun mia-lai mînij kele, ejki. <sup>4</sup> Inu nurnge erpe jinibb nga martere Atua sopor arini pa arkorti kele tevi kami re gortien se kami nga kami sete kamrongwose. Nir ngok artori nale nga muwra 'rengê nolo Atua nga mîrres, ni ewilwil se kerr'; ko artur imare, ko arwera 'Niko, orongwos kerr rraploli tama nanu san, ko Atua sete mia-lolarsi kerr.' Ko arok-loli murrun nga marsij nir ser vajin. Ko arwera kele sete armerreni Iesu Kristo, nga ni kele kobbong mivi Numal ko Atua se kerr!

*Atua pia-tor vitrangî jinibb nevisvisenien gerisen nir*

<sup>5</sup> Nale ngok kamrongwos pae erres osuw, ko inu numrreni bowra lilane kele tevi kami. Daron nga Atua mîlai tweni mîri Isrel renga vanu ngok Ijip, ko vitunen olokloksi nir nga sete marosuri, ko ololi armij. <sup>6</sup> Ko kaprorrmi ko wor anglo nir nga sete marir nga partori nais nga mian

mare nga Atua mîlai tevir, ko armerreni wor partori nais nga mian mare jer wor. Niko ololi marwolu lingi siser woswos. Atua ekai totkonir e dil delrurr nga sete mia-maot nabong sapon, ko parlik renga nemalik pijpari nabong nga milep nga Atua pia-tor vitrangir e. <sup>7</sup> Ko erres kaprorrmi kele ngaim nga eru ngok Sotom ko Gomora, ko lat sapon nga marto mori kele nuru. Nir arlengleng kele erpe anglo ngok nir, ko arloli esij tevi nesevin ko arloli esij tevi nir lululweni kele; ko arla norongen nga mîsij ne nabb nga mîin nga sete orongwose pimij nabong san. Nanu ngok ok-viseni nelesien nga milep tevi jinibb, nga parmetutu.

*Jinibb nevisvisenien gerisen arivi jinibb nga marij mîsij*

<sup>8</sup> Ko lelingenok, nir ngok arok-loli erpok kele kobbong, arok-tere Atua. Armatur lesi bori ner ko artajer nga marloli murrun nga marsij renga niber. Armus Atua pimetmete nir, ko arij esij tere anglo nir ne melrin. <sup>9</sup> Ko numal se anglo ngok nir nga nisen Maekel, ni kele sete ololi erpok. Daron nga mîlat tevi demij suri nibe Moses nga nuru si nen pîlai, ko Maekel sete elngi ni van mare nga piwirr nale nga mîsij tevi demij, ejki, ko owrai bbong, "Numal Atua pîwer orem!" <sup>10</sup> Ko nir ngok ma poro sete arongwose nanu san ko rrek parij pîsij ko pa suri. Murru nir erpe nanu rrum nga norrorrmien ser mijkie ko arloli bbong nanu nga nir marmerrni parlolir; ko murrun ser ngok kobbong oklokdoksir.

*Jinibb nevisvisenien arok-lokloksi jinibb*

<sup>11</sup> Woi, kaplesi ta lartul lepel nir. Arvi-juri sel se Ken nga tuwi ngok. Ko suri norrorrmien ne nevôt oto pèlak renga batur, ololi artor jabble sel ser. Ko arvitan van kele re nololien nga Balam, muloli nir artor otvi nale se Atua erpe Kora, ko parajiki kele pirpe Kora. <sup>12</sup> Daron nga kamini kamser korti renga nabong nga mîrres pèlak se kami, nir ngok arirpe nevôt nga milep san nga mutur ore sale, ko drav san puwlu vini, ko pîres ren ko pimawor. Nir arrorrmi lwenir kobbong. Arirpe nat nga mimot milep nga ling mîlai vini ko sete mus rragrrag. Arirpe kele duru nai nga re daron mawos nga pîlengi wenen, ko mutur nawon; ko jinibb arrangi tweni ko emijmij jer. <sup>13</sup> Erpe daptap nga marlelep ne dis nga marerrre ko melabbser marut peleplari; nir kele murrur nga marsij arpelpelari arirpe melabbse dis ngok. Arirpe moju nga marvitan nga Atua mîlengi pa siser nga mimalik nga mimalik muto metmet terair. <sup>14</sup> Ko Inok nga mivi ebutun re metka se Atam, nga tuwi pa muwrai tweni sel nga musorsan ngok tevir, nga muwrai



muwra 'Kaplesi, Numal Atua pia-rremali tevi anglo sen nga maron nir owun saut lenglengen <sup>15</sup> ko pia-wera suri lat nga putu suri tevi jinibb jille nir, ko tevi nir kele nga marloli m̄isij ko sete marosuri ko marij m̄isij tevi nale nga m̄isij nga marlai tevi Atua.' <sup>16</sup> Nir ngok arivi jinibb nga marok-loli nale ko marij m̄isij tetajer. Arvijuri norrorrmien nga m̄isij ser ko arij melmelas p̄elak, ko nale ser erpe neni rretrrun nga puloli partor sweri bbong sev nga marmmerreni.

*Nale nga puwnir*

<sup>17</sup> Selek nir, kaprorrmi ko wor nale se aposol se Iesu Kristo nir nga marlai tevi kami tuwi nga piviseni sev nga pia-rremali. <sup>18</sup> Arwerai pa tevi kami nga renge daron ne bongsi iel ngatan pusuw, jinibb sopor parmen keraji murru kami ko parvijuri murrun nga nir kobbong marmmerreni, nga sete mara-osuri rragrrag Atua. <sup>19</sup> Jinibb nga marirpok arongwose parloli kapsisamis, suri arvijuri norrorrmien ser, ko sete arvijuri Nem̄in On.

*Murrun nga parmerreni temijpal jinibb*

<sup>20</sup> Selek nir, kami kap̄elak ko wor nga kapini kapterter renge murrun ne nosurien nga muwokwok m̄irres nga miplari ji Atua. Kaplot ko wor p̄iterter renge derteren se Nem̄in On. <sup>21</sup> Ko kaplik renge mauren nga merrenien se Atua muto tetajer tevi kami, daron nga kamok-tirive Numal Iesu Kristo nga mok-rrorrm̄i kami nga p̄ilai mauren nga muto tuwi ngok vini tevi kami. <sup>22</sup> Jinibb sopor nga nosurien ser sete eterter ko norrorrmien ser elele, ngok kami kaprorr̄mir ko wor. <sup>23</sup> Ko nir m̄inij kele, kapwilwil ko wor ser erpe nga kapteseni twenir renge nabb. Ko re nir sopor sel nga marsij ser arrul totkoni nir. Ko kaprorr̄mi nir, ko kaptelasi nololien ser. Ko kapmetmet p̄irres nga nalol nga m̄isij ser ngok tuloli takvitan re nololien ser. <sup>24</sup> Ko lelingenok, Atua sansan kobbong nga orongwose purrul totkoni kerr nga sete rrapvitan. Ni kobbong orongwos p̄ilai kerr van rrapur rengenon re melrin, nga norrorrmien se kerr p̄ir temijpal. <sup>25</sup> Atua ngok kobbong nga miwilwil se kerr ololi rramkorti tevi Iesu Kristo Numal se kerr nga rapsusi nise Atua pian mare, ko nga rrapwerai tweni nga ni evi Numal nga mian mare ko mutori derteren ko nosr̄övien totoklai, n̄itipatun tuwi jer pa, mivini mijpari lelingenok, ko pianan sete orongwose pusuw nabong sapon. Pirpok ko.

## Bori se JON

### Batu nale nga mivsivseni lut nga parmeteni naul ngel puto suri

Jon nga muli naul ngel rrek evi Jon nen nga muli nospen nga mirres ivajin. Daron nga ni etra sopon, mēri Rom nir arloli ni evan elik talev renge norour san nga nisen Patmos, suri okwera tweni nale se Iesu. Ko ie, ni elesi bori san, ko oli totoni. Norrorrmien nga milep nga miplari renge bori nen evi nga owretun derteren se mēri Rom nir elep, ko derteren se Atua elep asie wor. Ko niko sete erres nga kalesia nir parmetutu nga parwer tweni nise Iesu.

Nale elep ne Naul On Tuwi arremali renge naul ngel, ko arivi vajin nale teptepi nga jinibb minij sete orongwos purongwose. San evi nale nga muspe Bapilon (batun 18), nga mujuji Rom. Ko nale owra Bapilon pivitan, ko iok osoni lweni norrorrmien se kalesia nir van mare. Ko nir partiriv tweni daron san nga pia-vini nga mijen pijki mun, dengen pijki mun, ko norongen nga nūisij pijki mun (21:4).

#### *Nale nga mīwer visviseni naul ngel*

<sup>1</sup> Ngel evi naul ne bori se inu Jon. Nanu ngel nir, Atua evisenir tevi Iesu Kristo nga ni piviseni tevi jinibb sen nir sev nga sete ngasu para-pelari. Ko Kristo okoni anglo sen nga pivisenir tevi inu Jon, nga mevi jinibb ne majingen sen. <sup>2</sup> Ko inu nuli tututweni nanu jijle nir nga mēlesir, arto renge naul ngel. Arivi nale se Atua, ko arivi weretunen nga Iesu Kristo miviseni tevik. <sup>3</sup> Neiren renge mēer nga mieveve naul ngel, ko neiren renge nir nga marunge nale se Atua ngel nir, ko marosurir. Suri daron evini mori pa nga nanu ngel nir parpelari.

#### *Jon owra erres tevi meling kalesia ebut*

<sup>4</sup> Inu Jon, nuli nale ngel tevi kami renge meling kalesia ebut nga kamlik rrale renge vanu ngok Esia. Ngel evi loten suk, nga Atua nga muwowomu tuwi jerjer, ko nga mīlik lelingenok, ko nga pīlik tuwi ngok vini, tevi nemin ebut nga marlik liven renge nai seksakel sen, pīlai demat sen puto tevi kami renge nalol nga mīrres pēlak sen. <sup>5</sup> Ko Iesu Kristo nga mīwerwer tweni nale se Atua ko nga orongwos rrapvijuri, ni kele pīlai demat sen puto tevi kami. Ni evi mēer nga Atua muloli mimaur luwi kele wowomue re mijen. Ko

ni emetmete numal jijle nir ne iel ngatan. Ni emrenni kerr elep, ko drran nga mīseser etlasi tweni nololien se kerr, ololi rramiel sisarow vajin. <sup>6</sup> Ko ni ololi rramivi numal, ko rramirpe kele jinibb nga marok-sulsul tevi Atua Tata sen. Ko tetajer rrapusi nisen pian mare temijpal, ko sete rrapmosi nga rrapwerai tweni nga derteren sen ean mare temijpal. Pirpok ko.

<sup>7</sup> Ko ngok kaplesi sete mia-periv nga pīrrmali renge nabor nir vini, ko namet jijle puklu pimteni. Ko renge daron ngok, nir nga maruni sir rengen ko jinibb jijle ne iel ngatan parunge pīsij ko parting daron nga parlesi e. Pirpok ko. <sup>8</sup> Numal Atua owra “Inu nuvi batu nanu jijle, ko nuvi kele bongsi nanu jijle.” Atua ngok elik tuwi jerjer, ko elik malum lelingenok, ko pia-lik pijpāri tuwi ngok vini, ko evi Atua ne Derteren Jijle.

#### *Nanu nga Jon mimatur kuluku mīlesir*

<sup>9</sup> Inu Jon nga mevi tuwa kami suri nukorti pa osuw tevi Iesu ko nukorti tevi kami. Kerr jijle rrapatur pīterter renge norongen nga nūisij nga rramunge re niberr suri batun vanu se Atua. Ko arkoni tweni inu van re norour nga Patmos suri nomok-wera tweni nale se Atua ko nale se Iesu. <sup>10</sup> Ko renge nabong on se Numal, Nemīn sen orrull totoni inu. Ko sete epriv nurnge drrelan san renge durek nga mian mare temijpal, mirpe davō san. <sup>11</sup> Ko owra “Kupuli tweni sev nga kumlesi, ko kuplai naul nen van ji meling kalesia ebut nga marlik renge ngaim ebut ngel nir, Epesas, Smana, Pekamam, Tuatira, Satis, Pilatelpia ko Laotisia.” <sup>12</sup> Ko nurienik nga bēlesi si mīrij tevik, mian ko nulesi lat ebut nga marmajing nir e gol, nga laet parjinget rer. <sup>13</sup> Ko re liven ne nanu ngok nir, san erpe jinibb mawos, ori sunsun nga mipriv temijpal ervirvi ngatan erpe sunsun se batu numal nir. Ko netatuw sen armajinge renge gol, ko etatuwe re morkon. <sup>14</sup> Ko jomro batun arow titis arirpe numow, ko meten oror erpe nabb nga muror. <sup>15</sup> Belan orinrin erres pēlak, ko drrelan erpe dis bburbur nga mīrrre renge botunmal. <sup>16</sup> Ko otori moju ebut renge nevren rres, ko renge jingon nesip nga muso renge devjen korti nuru eplari rengen vini. Ko ni esareni nevren rres eparik ko owra “Sete kupmetutu, inu nuwowomu jerjer ko bea-vivitu jerjer kele. <sup>18</sup> Inu nuvi jinibb nga memaur. Womu numij, mian ko numaur luwi kele, ko setemun meamij kele. Ko derteren suk otoa nga bololi nir nga marmij parmaur luwi kele, ko

nga bela lweni jinibb re lat ne mijen.  
<sup>19</sup> Ngok kupuli tweni nanu nga kumlesir nga marpelari lelingenok, ko nga parapelari vitunen. <sup>20</sup> Kulesi moju ebut nga marto rengo nevrekk rres ngok nir, tevi lat ebut nga laet marjinget rer marmajing nir e gol? Nanu ngok nir nospen ner arto wore, ko arto teptepi, nir le ngel: moju nga ebut ngok arivi anglo ebut ne meling kalesia ebut, ko lat ebut nga laet marjinget rer ngok arivi meling kalesia ebut ko.”

## 2

### *Nale tevi kalesia nir ne Epesas*

<sup>1</sup> Ko owrai tevik owra “Kupuli tweni nale suk ngel nir, ko kuplair van ji anglo se kalesia nir nga Epesas, ko kupwera “Nale ngel evel ji san nga mutori moju ebut rengo nevrekk rres ko mok-ivel suri lat ebut nga laet marjinget rer. <sup>2</sup> Nurongwose sev nga kamloli, ko nurrorrmi elep suri majingen nga milep nga kamloli ko norrorrmien nga mipriv temijpal se kami. Nurrorrmi sete kamir rragrag re nir nga marloli misij. Ko kamrrowrow pae ko kamlesi otvi nir nga marwera marivi aposol, ko gerisen ser eviseni nga marivi botgerisen bhong. <sup>3</sup> Nurongwose, norrorrmien se kami epriv. Jinibb arloli kamrunge esij rengo nibe kami suri inu nisek, ko norrorrmien se kami sete evitan. <sup>4</sup> Ko nanu nga misij san oto liven rengo inu ko kami, ngel: Setemun kammerreni inu erpe nga womu kamokmerrenik. <sup>5</sup> Ko ngok kaprorrmi pirres suri murrun nga mirres nga kamvijuri tuwi, ko kapvijuri lilane lweni kele pirpe tuwi daron nga murrun nen mitkai kami vini nga kamlesi wore moron. Ko poro sete kaprieni norrorrmien se kami rengo sel nga misij nga kamok-loli lelingenok, ko inu bevinuk ko bela tweni jilje laet se kami. <sup>6</sup> Ko nanu san nga kamloli mirres ngel: sete kammerreni murrun ne gortien se Nikolas, kamungasi nir erpe inu kele nungasi nir.

<sup>7</sup> Si nga nolo boron mutoe, pumurrong lilane nale nga Nerin On milai tevi kalesia nir. Ko tevi nir nga marevji devje nuval, inu bemaronge parurroi wenen ne duru nai ne mauren nga mutur rengo orsel nga mirres pelak se Atua.”

### *Nale tevi kalesia nir ne Smana*

<sup>8</sup> Ko owra tevik owrai “Kupuli tweni nale suk ko kuplai van ji anglo se kalesia nir nga Smana, ko kupwera “Inu nuwowomu jerjer ko bea-vivitu jerjer kele. Numij ko lelingenok numaur luwi kele. Kapmurrong sev nga mowrai. <sup>9</sup> Nurongwose norongen nga misij nga kamlik ren, ko joro kami kele ejkie; ko weretunen joro kami

elep. Nurongwose nale nga marsij nga mornge nga nir marij tere kami, nir nga marwera marivi miri Isrel ko marwera nawone. Naim ne verusen ser evi bhong naim nga marlote demij ren. <sup>10</sup> Sete kapmetutue nanu sopor nga parini ko parloli kaprunge pisij. Demij piwirre kami sopor van re naim ne nekaien nga purrowrowe nir, ko kaprunge pisij nabong pisngavöl. Kaptur piteter pian pijpari kapmij, ko bela mauren tevi kami pirpe nowli kami nga mirres. <sup>11</sup> Si nga nolo boron mutoe ko pumurrong lilane sev nga Nerin On muwra tevi kalesia nir. Nir nga marevji devje nuval, mijen erwen nga vitunen sete orongwos pijpari.”

### *Nale tevi kalesia nir ne Pekamam*

<sup>12</sup> Ko owrai tevik owra “Kupuli tweni nale suk ko kuplai van ji anglo se kalesia nir nga Pekamam, ko kupwera “Inu nga nesip nga muso rengo devjen korti nuru miplari re jingok, nale suk le ngel: <sup>13</sup> Nurongwos pae lat nga kamlik ngok e Pekamam, lat nga Demij misakel re nai seksakel sen. Ko nurongwose kamosuri malum inu eterer. Ko daron nga marevji pini Antipas, jinibb nga mokwerwer se inu ko mutur miteter tetajer tevi inu iok ji kami, lat nga Demij milik e, ko sete kamvilvil ore inu. <sup>14</sup> Ko kamloli ma nanu sopon nga sete mumomsawos re metek. Kami sopor arvijuri malum sel ne tuwi erpe propet ngok Balam, nga muwrai tevi Balak nga pikrekrasi miri Isrel nir nga parurroi vison nga marsuli jile tevi demij ko nga parloli kele pisij tevi nesevin. <sup>15</sup> Ko erpok kele, kami sopor arvijuri nale se gortien se Nikolas nir. <sup>16</sup> Ngok kaprieni kami re nololien se kami. Poro pijki ko sete mia-periv inu bevinuk ko bepupal tere nir ngok tevi nesip nuval nga miplari re jingok. <sup>17</sup> Si nga nolo boron mutoe ko pumurrong lilane sev nga Nerin On muwrai tevi kalesia nir. Ko tevi nir nga marevji devje nuval, inu belai nanen san tevir nga muto teptepi re melrin, nga pirpe mana nga miri Isrel nir marurroi tuwi. Ko belai kele nevöt nga muow titis tevi nir sisamis nga nais nga mimerr muto rengen ngok. Nais nga mimerr ngok, mer nga milai nevöt sen kobbong orongwose purongwose.”

### *Nale tevi kalesia nir ne Tuatira*

<sup>18</sup> Ko owrai tevik owra “Kupuli tweni nale suk ko kuplai van ji anglo se kalesia nga Tuatira, ko kupwera: Inu nuvi Natu Atua, ko metek oror orirpe nabb nga muror, ko belak orinrin erres pelak. <sup>19</sup> Nurongwose erres murrun se kami iok Tuatira, ko nurongwose merrenien ko nosurien se kami. Ko nurongwose

nga kamok-majing nga kapwilwil se jinibb nir, ko nolo kami epriv temijpal nga sete orongwose kapvitan. Ko majingen se kami lelingenok erres kele easi majingen nga kamloli womue. <sup>20</sup> Ko nanu le san sete nuri tevi kami ren, ngel: Sete kamwer ore vinok nga muwra ni evi propet, ko ejki, ni erpe bbong nesevin nga n̄isij ngok Jesepel ne tuwi. Ko nevisvisenien sen ololi jinibb suk arlengleng nga marok-loli n̄isij kele tevi nesevin, ko arok-urroi kele viso nanu nga marsulsul jile e tevi demij. <sup>21</sup> Nulai daron evter tevi nga p̄ilesi wose ko p̄irien lweni renge murrun nga n̄isij sen, ko ni omusus. <sup>22</sup> Ko suri iok, inu βela mesien nga milep tevi, bololi pimatur re maling. Ko ni tevi nir nga marloli n̄isij tevi bonevis parunge p̄isij lenglengen. Ko poro sete parienir re nanu nga marsij nga marloli tevi, ko bololi nanu nga mowrai ngok lelingen wolok. <sup>23</sup> Ko berevji pini kele natun nir, puloli kalesia nir parongwose, inu nurongwose nanu jijle nga muto re nolo jinibb ko norrorrmien se jinibb, ko bea-lai nowlin mawos tevi nir sisamis re murrun nga marloli. <sup>24</sup> Ko nuwrai kele tevi kami n̄inij kele sopor ne ie Tuatira, kami nga sete kamvijuri nevisvisenien sen, ko nga sete kamrongwose nanu nga nir marwera evi 'nale teptepi se Demij', nuwra: Nurongwose kamtor sweri daron nga marteter evter, ko sete numrreni βelngi kele soloslo nga murrow kele re kami. <sup>25</sup> Ko numrreni kaptajer malum, ko kaprrul totoni sel nga n̄irres ngok p̄iterter pian pijpari daron nga bea-rremali kele e vini. <sup>26-28</sup> Ko βelai derteren tevi si nga mirevji devje nuval ko muter n̄iterter nga muloli sev nga memrreni mijpari bongsin. Derteren nen, inu nulai ji Tata suk, ko bea-lai tevi nir. Ko nir vajin parlik metmete jinibb ne vanu jijle nir tevi nai delrrurr. Ko parevji e erpe nga nai delrrurr mipir worwor sospen dan. Ko bea-lai moju nutrin kele tevir. <sup>29</sup> Si nga nolo boron mutoe, erres pumurrarronge p̄irres nale nga Neñin On moklai tevi kalesia nir.

### 3

#### *Nale tevi kalesia nir ne Satis*

<sup>1</sup> Ko owrai tevik owra "Kupuli tweni nale suk ko kuplai van ji anglo se kalesia nga Satis, ko kupwera: Ngel evi nale se inu nga motori Neñin se Atua ebut tevi moju ebut. Nurongwose murrun se kami erres, ko nurnge jinibb arok-wera, kam-maur bbong; ko ejki, rrek kami kammij pa. <sup>2</sup> Ko kapmera kele, kaploli mauren se kami nga mutomori pimij pimaaur luwi p̄iterter. Suri inu nulesi nga majingen se kami setewor arres jijle renge nelesien

se Atua suk. <sup>3</sup> Kaprrorrmie nevisvisenien nga marlai tevi kami, ko kaptur p̄iterter ren ko kaprieni kami renge nololien se kami. Porō sete kapmera luwi nga kaplik metmet, ko inu dea-vinuk re daron nga kami takrrelenge, tia-sorsan tevi murrū jinibb venao. <sup>4</sup> Ko kami sopor iok Satis sete kamloli murrūn nga n̄isij, erpe sunsun se kami sete arrokkitkit. Kami ngok ko kapauri sunsun nga marow ko kaptutur tevik, suri kamrres ren. <sup>5</sup> Si nga mirevji devje nuval, ni ko parjuroi sunsun nga marow titis e nir, ko sete mara-la tweni nisen renge naur ne mauren. Ko bea-wera tweni renge no Atua ko tevi kele anglo sen nir nga ni mivi suk. <sup>6</sup> Ko si nga nolo boron mutoe, ko erres purnge ko purongwose sev nga Neñin muwrai tevi kalesia nir."

#### *Nale tevi kalesia nir ne Pilatelpia*

<sup>7</sup> Ko owrai tevik owra "Kupuli tweni nale suk ko kuplai van ji anglo se kalesia nir nga Pilatelpia, ko kupwera tevir nga ngel evi nale suk, nga inu mon temijpal ko mewretun. Inu nutori totkoni ki ngok nga mivi se Devet tuwi, ko daron nga n̄etasi metali ko sete san orongwose p̄ikikior kele; ko daron nga n̄ekikior, ko sete san orongwose p̄itasi kele. <sup>8</sup> Ko nurongwose majingen se kami nga Pilatelpia. Nurongwose nga derteren se kami ewelili bbong, ko kamvijuri ma nevisvisenien suk, ko sete kamvilvil ore inu. Kaplesi, nutasi pa metali etp̄ir re no kami oto metmet nga sete san orongwose p̄ikikior kele. <sup>9</sup> Kaplesi, bololi nanu san tevi gortien ngok nir nga naim loten ser mivi naim loten mawos se demij nir. Nir arwera arivi n̄eri Isrel, ko arwera nawone. Ko bololi parini para-jipa vitan ji kami ko parsusi nise kami van mare, puloli nir parongwose nga inu numrreni kami. <sup>10</sup> Ko nuwrai eterter tevi kami nga bemetmet lilane kami re daron nga n̄iterter nga pia-pelari renge iel ngatan ngel nga purrow-rowe jinibb nir, suri kamosuri nale suk nga mowra 'Kaptur p̄iterter tetajer, sete nolo kami pivitan.' <sup>11</sup> Sete mia-periv bea-rremali ji kami. Ko kaptori totkoni p̄iterter sev nga kamtor sweri pa musuw, suri san tia-lai luwe nowlin nga moro kami kapalai. <sup>12</sup> Si nga mirevji devje nuval, ko inu bololi pivi nabur nga n̄iterter renge Naim On se Atua suk, ko sete mia-jikie rengen. Ko bea-uli nise Atua suk rengen, tevi nise ngaim ngok kele se Atua suk, Jerusalem nga mimerr ngok nga Atua suk pia-koni tweni re melrin vini iel ngatan. Ko bea-uli nisek nga mimerr kele puto rengen. <sup>13</sup> Ko si nga nolo boron mutoe, ko erres purnge ko purongwose sev nga Neñin muwrai tevi kalesia nir."

#### *Nale tevi kalesia nir ne Laotisia*

<sup>14</sup> Ko owrai tevik owra “Kupuli tweni nale suk ko kuplai van ji anglo se kalesia nga Laotisia ko kupwera, Ngel arivi nale suk nga nomok-wera pīrpok ko pa tevi rijrijen se Atua nir, ko nga nomok-wera tweni nale se Atua, ko nga orongwos jinibb pivijurik. Ko nuvi batbatu nanu jijle nga Atua mulolir. <sup>15</sup> Nurongwos alje majingen se kami. Kami sete kamirpe nuwi nga mututun, ko kami sete kamirpe nuwi nga mimemrrali. Erres p̄elak ma poro kapiirpe nuwi nga mututun, rrek poro kapiirpe nuwi nga mimemrrali. <sup>16</sup> Ko suri kamivi liven re nuru, ko nuvirngise kami, ko boltuv tweni kami. <sup>17</sup> Ko kami kamwera “Kem ma joro kem elep temijpal, sete nevre kem armurrol re nanu san.” Ko sete kamlesi wose nga joro kami mijkie, kamlik esij, kammalmal, ko kamivi metr-rorr. <sup>18</sup> Ko nuwrai tevi kami, kapwuli gol nga m̄irres ji inu, puloli joro kami pilep. Ko kapwuli kele sunsun nga muow nga kapuri, ko puloli setemun kammanun nga jinibb parlesi kammalmal. Ko kapwuli kele roi ne meter ji inu, nga puloli kapkulkulu luwi p̄irres. <sup>19</sup> Inu nomok-rij eterter ko nomok-tor alje nir nga memreni temijpale nir. Ko ngok, kaprrormi p̄irres ko kaprieni norrorrmien se kami renge nololien se kami. <sup>20</sup> Ngok, kapmurrong, inu nutur nututi metali, ko nuverus. Poro si nga murrnge drrelak ko n̄itasi metali, inu bean re loloim sen ko noboraan korti. <sup>21</sup> Si nga mirevji devje nuval, ko bololi ni p̄isakel renge nai seksakel suk renge nelik, erpe inu kele nurevji pa devje nuval ko nusakel pa renge neli Tata suk renge nai seksakel sen. <sup>22</sup> Ko si nga nolo boron mutoe, erres pumurrarronge p̄irres nale nga Nem̄in On mokwera tevi kalesia nir.”

## 4

### *Nir nga renge melrin arsurōvi Atua*

<sup>1</sup> Mian ko numatur lesi nanu kele san, ko nulesi metali san et̄p̄ir renge melrin. Ko drrelan nga mornge womu, nga mirpe davō, erij luwi kele, ko owra “Kupini iel mare, ko beviseni tevim sev nga p̄iapelari.” <sup>2</sup> Ko derteren se Nem̄in On evini evesane ko orrul totonik. Ko iok renge melrin nulesi nai seksakel san, ko san esakel ren. <sup>3</sup> Mernen non erinrin erpe nevōt nga morres ngel nuru, jaspā ko kanilian, nga morsongsong. Ko li-waliw san oto rrale nai seksakel nen, nga m̄irrinrin mirpe emral nga nulsen mirpe ro nai san nga miejejen m̄irres. <sup>4</sup> Ko nai seksakel ngavōl eru drromon ivij (24) kele arto

rrale nai seksakel nen, ko b̄irterawarreng ngavōl eru drromon ivij arsakel rer. Ko nir aruri sunsun nga muow ko aruri nuvan nga marivi gol re batur. <sup>5</sup> Ko navil okvil pelari renge nai seksakel nen, ko belver drrelan orrorrorr ko ever. Ko womu re nai seksakel nen, nasul ebut aror, nga marivi ner̄in ebut se Atua. <sup>6</sup> Ko iok kele, nulesi nanu san erpe dis nga mivivil ko m̄irmer m̄irres p̄elak.

Ko netun vanu ivij nga meter marto p̄et̄p̄eti re niber, re nor ko re durer, artur rrale nai seksakel nen. <sup>7</sup> Nga mutur womunen erpe laeon; nga mutur surie erpe buluk norman; nga suri kele e non erpe jinibb; ko nga vitu jer nen erpe numōn ngel ikel, ko ete naben erpe nga purow. <sup>8</sup> Ko nir jijle nga ivij ngok, naber sisamis ouwon. Ko meter arto p̄et̄p̄eti re niber, vini vare e ko lolor e. Ko nat m̄irin ko nat nga mupong, sete armosi nga parlai nubo, ngel: ‘Atua ne drromsen mare nga muon nga muon nga muon, ni elik tuwi pa, ko elik malum lelingenok, ko p̄ilik kele tuwi ngok vini. Ni otori derteren jijle.’ <sup>9</sup> Ko netun vanu ivij nga arok-la nubo, arsurōvi, artori, ko arwera erres wor tevi ni nga mimaaur tuwi ngok vini, ko nga m̄isakel renge nai seksakel. Ko daron nga marlai nubo nen, <sup>10</sup> ko b̄irterawarreng nga ngavōl eru drromon ivij nga arjipa armatur van ngatan re no ni nga m̄isakel re nai seksakel, ko arsurōvi ni ngok nga m̄ilik tuwi ngok vini. Ko aruri tweni nuvan ser ko artuwer van womu re nai seksakel e, ko arwera <sup>11</sup> “Numal Atua se kem! Nik kures nga parsurōvim, partorim, ko parlai derteren jile tevim. Suri nik kuloli nanu jijle nir, ko renge nik marongen som arpelari ko armaur.”

## 5

### *Naul nga marbbōlji ore pa*

<sup>1</sup> Mian ko nulesi naul san; ni nga m̄isakel re nai seksakel otori re nevren rres. Arulul p̄et̄p̄eti ren, devjen ko devjen, ko arlulngi jile pa, ko arla nabbōl<sup>A</sup> ko arwusi bongsin re lat ebut ko arbbōlji ore pa. <sup>2</sup> Mian ko nulesi anglo san nga derteren sen milep. Ni erij, drrelan ean mare, ko owra “Ngok, si erres re p̄ila tweni nabbōl nga marbbōlji ore naul ngok e, ko pieveve vajin?” <sup>3</sup> Ko san ejki renge melrin ko renge iel ngatan ko renge ngatan nga muto van re melve ngatan ngel e, nga m̄irres re pieveve naul nen rreknga pimteni lolon. <sup>4</sup> Nuting lenglengen suri san ejki nga m̄irres re pieveve naul nen ko pimteni lolon. <sup>5</sup> Mian ko san renge b̄irterawarreng nen nir owrai

<sup>A</sup> 5:1 Nabbōl evi nanu san nga marlai tuwi nga marbbōlji ore naul e nga puloli jinibb nawon sete pieveve.

tevik, owra “Ete kupting! Kuplesi, Laeon nen nga renge metka se Juta, ngok metka nen nga milep se Devet, ni erevji devje nuval, ko ni ko orongwos pila tweni nabböl nga ebut ngok ko pieveve naul.” <sup>6</sup> Mian ko nulesi natu sipsip san<sup>B</sup> otur liven ji ni nga mäsakel renge nai seksakel nga netun vanu nga ivij nga martur rrale tevi biterawarrend nira. Ko natu sipsip nen, nulesi erpe arevji pini womue. Batin ebut, ko meten ebut, nga marivi nemin ebut se Atua nga ni mok-konir van re iel ngatan totoklai. <sup>7</sup> Ko natu sipsip nga evan ko ela naul nen ji ni nga mäsakel re nai seksakel, re nevre nres. <sup>8</sup> Ko daron nga muloli, ko netun vanu nga ivij nga ko biterawarrend nga ngavöl eru drromon ivij arjipa armatur van ngatan renge no natu sipsip. Nir jijle artori nevis tingting ser, ko besin nga marmajing gol e ko nga marwun saute nanu san nga mapun mürres, ni ko evi verusen se jinibb se Atua nira. <sup>9</sup> Ko nir arla nubo nga mimerr san, ni le: “Nik kures re kupla naul ko kupla tweni nabböl ko kupeveve. Suri nik arevji pinim, ko dram nga muwlu erpe sulsulen nga muwli tweni jinibb nira arivi se Atua, metka nga marivel renge botnafe nira, ko renge vanu nira, ko arivi jinibb nga marij nale petpeti nira. <sup>10</sup> Ko kuloli arivi jinibb ne sulsulen som nira nga parmajing se Atua, ko nira parwowomu renge jinibb nira iel ngatan.” <sup>11</sup> Ko nulesi kele anglo elep nga elep, ko nurnde drrelar nga martur rrale nai seksakel, netun vanu nga ivij nga, ko biterawarrend nira, <sup>12</sup> ko arla nubo, drrelar ean mare, arwera “Natu Sipsip nga marevji pini, ni erres re pila derteren, nijor, norongwosien, ko nga partori, parsurovi, ko parsusi van mare!” <sup>13</sup> Mian ko nurnde drrela nira jijle nga marlik re melrin, ko renge iel ngatan, ko renge ngatan nga muto van re melve ngatan ngel e, ko renge dis; nanu jijle nira nga marmaur iok jijle nira. Ko arla nubo, arwera “Ni nga mäsakel renge nai seksakel, ko Natu Sipsip, parsurovi nuru ko partori nuru ko parsusi nuru van mare, ko parlai derteren jile tevi nuru tuwi ngok vini.” <sup>14</sup> Ko netun vanu nga ivij nga arij welir, arwera “Pirpok ko!” Ko biterawarrend nira arjiol armatur van ngatan ko arsurövi.

## 6

*Natu Sipsip ela tweni nabböl renge naul*

<sup>1</sup> Mian ko nulesi Natu Sipsip nen ela tweni nabböl<sup>C</sup> nga womunen, ko nurnde drrelan san renge netun vanu nga ivij nga, drrelan erpe belver, ko owra “Kupini!”

<sup>2</sup> Ko nuklu ko nulesi os nga muow san. Ko jinibb san esakel ren, ko oke nevis, ko arla nuvan san tevi re batun. Ko ni ololi os sen owl, ean epalpal re nuval. Ko tetajer okrevji devje nuval sen nira.

<sup>3</sup> Mian ko Natu Sipsip ela tweni nabböl nga erwen nen. Ko nurnde drrela netun vanu nga erwen nen, owra “Kupini!” <sup>4</sup> Ko os kele san owl vini, nga musongsong. Ko ni nga mäsakel ren ela derteren nga pirvei nuval pivini iel ngatan, nga puloli jinibb nira parevrevji pinipini lululwenir. Ko arla nesip ne nuval nga milep san tevi.

<sup>5</sup> Mian ko Natu Sipsip ela tweni nabböl itolin. Ko nurnde netun vanu nga itolin owrai

owra “Kupini!” Ko nuklu, ko nulesi os nga mumotmot san. Ko ni nga mäsakel ren otori skel san re nevre. <sup>6</sup> Ko nurnde drrelan san eplari re liven ne netun vanu nira, ko owra “Nowli nanu nira paran mare. Niv ne nabong san, nowlin pusorsan tevi nowli majingen ne nabong san totoklai. Ko nowli raes ne nabong itul, nowlin pivi nowli majingen ne nabong san totoklai. Ko nowli oel nga marok-tabbu e, ko nowli norro, pusorsan malum tevi nga womu ko pa.”

<sup>7</sup> Mian ko Natu Sipsip ela tweni nabböl ivajin. Ko nurnde drrela netun vanu nga ivajin, owra “Kupini!” <sup>8</sup> Ko nuklu, numteni os nga mivi niavi betiv. Ko ni nga mäsakel rengen, nisen ko Mijen. Ko san evitu bbong mori suri, nga nisen ‘Vanu se jinibb nga marmij.’ Ko Atua ela derteren tevi nuru nga poran renge iel ngatan totoklai ko renge lat jijle, porloli jinibb pivi meling pivivji, ko porevji tweni meling ivajin re nira petpeti. Ko nanu ngel le nira porevji e, nuval, numer, mesien, ko nanu rum.

<sup>9</sup> Mian ko Natu Sipsip ela tweni nabböl elmen. Ko nulesi re melve nawot nga marsulsul ren nemini nira nga jinibb nira marevji pinir suri arwerwer renge nale se Atua, ko arij sen. <sup>10</sup> Ko nira arkail drrelar ean mare, arwera “Atua ne Drromsen Mare! Nik kuon, kuwretun tetajer! Seveling ko kupvirrali jinibb nira suri marevji pini kem?” <sup>11</sup> Ko arlai sunsun nga marow tevi nira sisamis, ko arwera tevir “Kapmosi beblen mun tera nga tasi kami jile nga marosuri ko marmajing se Atua nga marlik vane ko nga jinibb parevji pinir, parini jile mun.”

<sup>12</sup> Ko mian ko nulesi Natu Sipsip ela tweni nabböl ouwnon. Ko narini san enini eterter, ko nial moron ejki, omot nawon, ko navöl osongsong erpe drra. <sup>13</sup> Ko moju nira armietewtaw arvitan ngatan, erpe

**B** 5:6 Iesu **C** 6:1 Nabböl evi nanu san nga marlai tuwi nga marbböli ore naul e nga puloli jinibb nawon sete pieveve.

wene nai san daron nga ling mīser milep ko mīterure. <sup>14</sup> Ko melrin olulngi tweni erpe boriti, mijkie, ko botwen jile ko norour jile aruj lingi milnger. <sup>15</sup> Ko numal nir ne iel ngatan, tevi jinibb nga marlelep nir, tevi batu jinibb ne nuval nir, tevi jinibb nga joror milep, ko jinibb jijle nir, jinibb nga marivi demij maur nir, ko jinibb nir nga marivel sisarow, aran arteptepi re nolo bereng nir ko re melve bereng nir nga renge botwen nir. <sup>16</sup> Ko arwerai tevi botwen nir ko tevi bereng nir, “Kaptawi ore kem pingavil, kaploli nabteptepi re mete ni nga mīsakel re nai seksakel, ko re lolaren se Natu Sipsip! <sup>17</sup> Suri nabong nga milep nen evini pa ne lolaren se nuru. Si orongwos putur?”

## 7

*Meri Isrel nir nuvasngavöl ner evi ongut vesan bbulin ngavöl ivij drromon ivij (144 000)*

<sup>1</sup> Mian ko nulesi anglo ivij artur renge bongsin ne ivij ne iel ngatan, artor ore mete ling nir nga puloli ling setewor parongwos parser sopen renge dan rreknga renge dis rrek renge duru nai san. <sup>2</sup> Mian ko nulesi anglo kele san eplari renge lat nga nial mimraej e. Ni otori Atua nga mimaur nabböl<sup>D</sup> sen. Ko ni everus drrelan ean mare van ji anglo nga ivij nga, suri Atua elai pa derteren tevir nga parllokksi dan ko dis. <sup>3</sup> Ko anglo nen owrai owra ‘Sete kaplokloksi dan, rreknga dis, rreknga duru nai san, pijpari nga nabbölji nabböl se Atua ngel renge jinibb ne majingen se Atua se kerr borngir”. <sup>4</sup> Ko arbbölji nabböl se Atua renge borngir, mian ko arwerai tevik nir elep nga elep nga nir nga marbbölji nabböl se Atua renge borngir. Nuvasngavöl ner ejpari ongut vesan bbulin ngavöl ivij drromon ivij (144 000). Ko nir arpelari renge metil naim nga esngavöl drromon eru se mēri Isrel, <sup>5</sup> evi nuvasngavöl vasngavöl drromon eru (12 000) renge metil naim sisamis, metil naim se Juta, metil naim se Rupen, metil naim se Gat, <sup>6</sup> metil naim se Asere, metil naim se Naptali, metil naim se Manase, <sup>7</sup> metil naim se Simeon, metil naim se Livae, metil naim se Isakara, <sup>8</sup> metil naim se Sepulun, metil naim se Josep, metil naim se Benjamin.

*Delung jinibb nga milep ne vanu jijle*

<sup>9</sup> Mian ko nuklu, ko nulesi delung jinibb nga milep nga milep. Sete san orongwos

pieve pētḗpeti nir, suri nir elep pēlak. Arivel renge botnaḗe pētḗpeti nir, ko renge vanu pētḗpeti nir, ko arivi jinibb nga marij nale pētḗpeti nir. Ko artur womu re no Atua nga mīsakel re nai seksakel ko re no Natu Sipsip. Aruri sunsun nga marow ko artori nablasi nini nga raor marto malum rer. <sup>10</sup> Ko arkail drrelar ean mare, arwera “Atua se kerr, nga mīsakel rege nai seksakel, ko Natu Sipsip orla mauren tevi kem.” <sup>11</sup> Ko anglo nir artur rracle nai seksakel, tevi bīrterawareng nir, ko netun vanu nga ivij nga. Ko nir arjipa armatur ngatan renge nai seksakel, ko arsurövi Atua, <sup>12</sup> arwera “Pirpok! Atua se kerr, jinibb jijle nir parsurövi, parsusi, partori, parwera erres wor tevi, ko parsupsupe norongwosien sen ko derteren sen, tuwi ngok vini. Pirpok.” <sup>13</sup> Ko san renge bīrterawareng nir osusi tevik, owra “Ia, ko isi ko jinibb ngel nir nga maruri sunsun nga marow ngel nir, arivel ngabe ko vini?” <sup>14</sup> Ko inu nuwra “Iawo, numal, inu nurrleuge. Nik ma kurongwose.” Ko ni owra lweni tevik, owra “Nir le ngel nga marlesi norongen nga mīsij, nga jinibb nir arojir elep. Nir arrawe sunsun ser, arloli arow titis renge drra Natu Sipsip. <sup>15</sup> Niko artur womu re no Atua nga mīsakel re nai seksakel sen. Ko nutrin ko nutpong, arlotoe renge Naim On sen. Ko Atua nga mivi Numal ser pīlik tevir tetajer, ko pimmet nir pīrres. <sup>16</sup> Setemun nabong san kele numer piajar; setemun nabong san kele nolor pimesmes; nial setemun pīsne loklokksir, ko nat nga mututun setemun puloli parunge pīsij. <sup>17</sup> Suri Natu Sipsip nga mutur morie nai seksakel se Atua, ni pimmet nir pīrres, ko piptevir paran re mete nuwi ne mauren nir. Ko Atua pitwasi tweni suwen meter jijle nir.

## 8

*Nabböl ebutun*

<sup>1</sup> Mian ko Natu Sipsip ela tweni nabböl<sup>E</sup> ebutun, ko nat emnena nawon re melrin oto beblen, setemun ejpari mete nial san. <sup>2</sup> Mian ko nulesi anglo ebut nga martur re no Atua, arlai davö ebut tevir.

<sup>3</sup> Ko anglo kele san, nga mutori nai juljul san nga mirpe niwos nga marmajing gol e, evini ko otur re nawot ne sulsulen nga mivi gol nga muto re no Atua. Arla nanu san nga mapun mīrres tevi, nga puto tevi verusen nir se jinibb se Atua nir, nga ni pīsale nai sen e ko pusulsule renge nawot. <sup>4</sup> Ko ololi Atua ornge nousnin, ko mapun

<sup>D</sup> 7:2 Nabböl evi nanu san nga marlai tuwi nga marbbölji ore naul rrek nanu mīnij san e nga puloli jinibb nawon sete pijpari. Jinibb jile arlesi wose nabböl se jinibb nga milep ko niko sete mara-jipari nanu sen nga mibbölji ore mirpok. <sup>E</sup> 8:1 Nabböl evi nanu san nga marlai tuwi nga marbbölji ore naul e nga puloli jinibb nawon sete pieveve.

esesbel erres rengenai juljul nga mutori, ko oto tevi verusen se jinibb se Atua nir. <sup>5</sup> Mian ko anglo ela nai juljul sen, ko ososle tweni nabb sapon nga mün rengenawot, ko evijreni tweni vini iel ngatan. Ko belver orrorrorr ko ever, ko navil evil, ko narñi emñi.

*Anglo ivij aruwi davö*

<sup>6</sup> Mian ko anglo ebut nga martori davö ebut artori metmete nga paruwir. <sup>7</sup> Ko anglo nga womunen owi davö sen. Ko bebje aes arvitvitan oto tevi nabb nga muror ko tevi drra, arirpe naus nga mus. Ko poro dan itul ni ko, ko nabb nen osli tweni itolin. Ko poro nai itul ni ko, ko nabb nen osli tweni itolin. Ko osli tweni mösmös p̄etp̄eti.

<sup>8</sup> Mian ko anglo erwen owi davö sen. Ko nanu san erpe botwen nga milep ein, ko arwirre van rengenadis. Ko poro dis lat nen itul, ko lat nen itolin erieni evi drra. <sup>9</sup> Ko poro nanu itul nga marmaur rengenadis, ko itolin emij. Ko poro drrav itul, ko itolin nabb osli, ein lokloksi.

<sup>10</sup> Mian ko anglo itolin owi davö sen. Ko moju nga milep san, nga muror erpe nasul, evitan vini iel ngatan; ko evitan van rengenauwi seser ko mete nuwi nir. Ko poro nuwi seser itul, ko olokloksi itolin; ko poro mete nuwi itul, ko olokloksi itolin. <sup>11</sup> Ko moju nen, nisen ko botut. Ni ko ololi nuwi nga mivitan ren emelmel; ko jinibb elep, daron nga marmini, ko armij, suri emelmel erpe besu newri.

<sup>12</sup> Mian ko anglo ivajin owi davö sen. Ko nial devjen itul e ko itolin omotmot, ko navöl devjen itul e ko itolin omot, ko moju devjen itul e ko itolin omot. Ko rengenat nga m̄irin, devjen eru bbong nat erin re nuru, ko devjen san nat opong ren. Ko rengenat nga mupong, devjen eru bbong omor, ko devjen san emalik.

<sup>13</sup> Mian ko nuklu kele, ko nulesi ikel san orow mare jer, ko erij drrelan ean mare, owra "Wurru! Wurru! Wurru! Pisis p̄erp̄er re nir nga marlik iel ngatan daron nga davö itul nga marjipon anglo paruwir!"

**9**

<sup>1</sup> Mian ko anglo elmen owi davö sen. Ko nulesi moju san nga mivitan pa rengenadan. Ko arla ki san tevi moju nen nga p̄itasi bbulwil nga nabbön mijkie. <sup>2</sup> Mian ko moju nen etasi bbulwil. Ko nousni nabb nga milep ous pelari ren, ko ous ore nial ko melrin, ololi nat emalik. <sup>3</sup> Ko nato nga marok-rowrow re mösmös arow pelpelari rengenousin nen, arwijwaji rengenadan. Ko derteren ser otoi nga paraji jinibb p̄isij erpe netu nurñet. <sup>4</sup> Ko arwer orer nga

sete parurro lokloksi mösmös rreknga rao nai rreknga nanu tama san nga mimaur, ko paraji kis bbong jinibb nga nabböl se Atua sete mibbölji borngir. <sup>5</sup> Ko arwer orer nga sete paraji pinir, ko parlolir parunge nevrut kobbong pijpari navöl pielim. Milnge liwer ererer erpe milnge liwe netu nurñet. <sup>6</sup> Ko rengenavöl nga elim ngok nir, jinibb ngok nir parpepej sel tama san nga partor pini lwenir e, ko sete mara-tor sweri rragrrag san; parmerreni lengleng parmij, ko parrelenge parmij.

<sup>7</sup> Ko nato nen nir arirpe os nga martur vivöngsur tera nuval. Nuval ser re batur arirpe nuval se numal nga marmajing gol e, ko nor arirpe no jinibb. <sup>8</sup> Rao batur arirpe rao batu nesevin, ko liwer arirpe liwe bae. <sup>9</sup> Ko nanu san erpe delrrurr oto ore morkor, ko drrela naber arirpe drrela kat nir ne nuval nga os mareveir nga paran re nuval. <sup>10</sup> Nerurer otoi, erpe nerure növi, nesip ser arto rer; ko derteren ser nga parloli jinibb parunge nevrut pijpari navöl pielim arto re nerurer. <sup>11</sup> Numal ser otoi, ko ni evi anglo nga mimetmete bbulwil nen. Ni nisen rengenale se m̄eri Isrel nir, Apaton, ko rengenale se m̄eri Gris nir, evi Apolion, nga muwra puwra: Jinibb nga moktor pinipni jinibb. <sup>12</sup> Ngok evi nanu itolin nga parsij p̄erp̄er nir nga miplari womu, ko eru orjipon malum.

*Anglo ouwnon owi davö sen*

<sup>13</sup> Mian ko anglo ouwnon owi davö sen. Ko nurnge drrelan san eplari rengenabongsin nga ivij ne nawot nga mivi gol nga mutur re no Atua. <sup>14</sup> Ko drrelan owrai tevi anglo ouwnon nen owra "Kuptelasi tweni anglo ivij nga marile totonir martur rengenajeli nuwi seser nga milep Iupretes." <sup>15</sup> Ko ni ean etlasi twenir: Anglo nga ivij nga, tuwi pa arok-tur tera sia ngel, navöl ngel, nabong ngel, ko mete nial ngel, nga parevji pini jinibb nir; parloli jinibb pivi meling p̄ititlu, ko parevji tweni meling itolin re nir p̄etp̄eti. <sup>16</sup> Ko nurnge arwera tweni jinibb ne nuval nir evis nga marsakel re os nga marpitevi anglo nga ivij nga; nir ejpari milian ongut varu (200 000 000). <sup>17</sup> Ko numatur lesi bori suk malum, ko nulesi os nen nir ko jinibb nir nga marsakel rer. Aruri sunsun ne delrrurr arto re morkor. Ko delrrurr nen nir arsongsong erpe nabb, ko arejejen temijpal erpe nuwi seser nga milep, ko aringango temijpal, erpe salpa. Ko batu os nen nir arirpe batu laeon. Ko nabb ein peleplari rengenajingor, ko nousni nabb ous peleplari re jingor, ko salpa kele aringango peleplari re jingor. <sup>18</sup> Ko nabb nga m̄in nen ko nousni nabb nen ko salpa nen artor pini meling itolin re



jinibb p̄et̄p̄eti. <sup>19</sup> Suri os nen nir, derteren ser oto rengo jingor, ko re kele nerurer. Nerurer arirpe nuñet, suri batur otoa, nga marok-ajaji lokloksi jinibb.

<sup>20</sup> Ko jinibb nga sete marmij e nanu nga marsij ngok nir, nolor sete arlululwi rengo murrin nga marsij ser; ko sete armosie nga parlot tevi demij, ko tevi atua ne gerisen nga nir kobbong marta rrongrongvi gol, silva, bras, nevöt, ko nai. Atua ne gerisen nen nir sete arongwos parkulkulu, sete arongwos parungrunge, ko sete arongwos parivel. <sup>21</sup> Ko jinibb nen nir nolor sete arlululwi rengo murrin nga martor pinipni jinibb, nga marloli botut, nga marloli m̄isij tevi nesevin, ko nga marvevna.

## 10

### *Anglo nga mutori naul nga welili san*

<sup>1</sup> Mian ko nulesi anglo kele san nga derteren sen mutoe orow jubbul rengo melrin vini ngatan e. Ni ori nabor erpe sunsun sen, ko liwalwi san oto rrale batun. Non erpe nial, ko ðelan nuru orirpe nabur ne naim eru nga morin. <sup>2</sup> Ko ni otori naul nga welili san nga mieveve jile rengo nevren. Ko otur, ðelan rres rengo dis, ko ðelan mair rengo dan. <sup>3</sup> Ko everus, drrelan ean mare; drrelan erpe drrela laeon nir nga marngorr. Mikail musuw, ko belver ever weli vabut. <sup>4</sup> Belver miver jile, ko otomori bolul; ko drrelan san eplari re melrin, ko owra “Kupsilveni nanu nga belver muwrai ngok, sete kupuli tweni.”

<sup>5</sup> Mian ko anglo nen nga m̄lesi nga mutur rengo dis ko rengo dan ojuji melrin e nevren rres, <sup>6</sup> ko nga puloli nale sen p̄iteter, owra nise Atua nga mimaaur tuwi ngok vini, nga muloli melrin ko iel ngatan ko dis ko nanu jijle nir nga marmaur renger. Ko anglo owrai owra “Setemun nanu san oto ore. <sup>7</sup> Ko daron nga anglo ebutun puwi davö sen, ko Atua puloli norrrormien sen nga muto silveni nga muwrai pa tevi propet sen nir nga marivi jinibb ne majingen sen nir tuwi.” <sup>8</sup> Mian ko drrelan nga mornge rengo melrin erij tevik kele, owra “Kupan kupla naul nen nga muto rengo nevre anglo nga mutur rengo dis ko rengo dan.” <sup>9</sup> Ko nuan ji anglo nen, ko nungoni naul nen. Ko ni owrai tevik, owra “Kuplai ko kuproi. Renge jingom ko purrun pirpe narllu sukabak, ko depaim ma p̄ikarkar e.” <sup>10</sup> Ko nulai jin, ko nurroi. Ko re jingok, orrun erpe narllu sukabak; ko nurrolmi, ko depaik ekarkar e. <sup>11</sup> Mian ko arwerai tevik, “Pivesan kele nik kupwera tweni nale se Atua suri jinibb ne vanu elep wor, jinibb ne nale elep wor, ko numal elep wor.”

## 11

### *Jinibb eru nga morij se Atua*

<sup>1</sup> Mian ko arlai mavir san tevik nga mivi norrngov. Ko arwerai tevik, “Kupan kuprrongvi Naim On se Atua ko nawot nen, ko kupeve nir evis nga marlot rengen. <sup>2</sup> Ko sete kuprrongvi norrngov ne lolo naworr ne Naim On, suri evi pa se jinibb ne vare nir. Ko nir parloli Ngaim On Jerusalem setemun puon pijpari navöl pingavöl pivij drromon pieru (42). <sup>3</sup> Ko inu bokoni jinibb suk eru nga porij suk. Ko bak kobbong pivi sunsun se nuru, pirpe nga jinibb maruri daron nga martaur. Ko nuru porwera tweni nale se Atua rengo nabong nen nir nga mivi nuvasngavöl vesan bbulin pungut pivaru drromon pingavöl puouwon (1260).” <sup>4</sup> Ko nuru ngok porirpe duru olip eru, ko porirpe nasul eru nga marusi nuru re no Atua Numal ne iel ngatan. <sup>5</sup> Ko poro san puwra pulokloksi nuru, ko nabb puror pelari re jingo nuru ko pusli pini. Ko pipok devje nuval se nuru nir parmij. <sup>6</sup> Ko nuru derteren se nuru otoa nga porwer ore naus sete miaus rengo daron nga morwerwer rengo nale se Atua. Ko derteren se nuru oto kele rengo mete nuwi nir, nga porienir parivi drra. Ko derteren se nuru otoa nga porloli nanu nga parsij kele pilep parpelpelari iel ngatan. <sup>7</sup> Ko daron nga pora-wera tweni jile vajin nale se nuru, ko nanu rrum nen nga miplari rengo bbulwil nga nabbön mijkie pipalpal tere nuru. Ko ni p̄irevji pini nuru. <sup>8</sup> Ko nibe nuru pormatur rengo sel rengo ngaim nga milep Jerusalem, ngaim nga Iesu nai pelaot nga murrul ren mutur ren. Ngaim nen, nisen eru kele ni le: Sotom ko Ijip, suri murrin osorsan tevi nir nga marlik rengo lat nga eru ngok tuwi. <sup>9</sup> Ko jinibb elep, jinibb ne vanu p̄et̄p̄eti nir, metka p̄et̄p̄eti nir, ko nale p̄et̄p̄eti nir parini parmeteni nibe nuru, pijpari nabong p̄itul totoklai ko devje nabong kele san. Ko parwer ore nga partevni nuru. <sup>10</sup> Ko jinibb nir ne iel ngatan parir lenglengen suri laru nga eru ngok mormij. Ko parlila merrenien tevir lululweni, suri nuru daron nga mormaur malume, ko nale se nuru ololi jinibb nir arunge esij. <sup>11</sup> Mian ko nabong itul nga ko devjen arasi vajin, ko Atua ela lweni sowi nuru tevi nuru, ko ortur imare. Ko jinibb jijle nga marlesi nuru armetutu lenglengen. <sup>12</sup> Ko nuru orange drrelan san eplari rengo melrin, owra “Koporini iel mare!” Ko rengo no devje nuval se nuru, nuru oril van mare rengo nabor san, oran re melrin. <sup>13</sup> Ko moroka-van mare, ko nan̄i nga milep em̄i. Ko rengo Jerusalem, devjen san omotoptop, ko devjen esiv

arres bbong. Ko jinibb armij, nir ejpari nuvasngavöl vabut (7000). Ko jinibb minij nen nir armetutu lenglengen ko arsurövi Atua nga milep re melrin. <sup>14</sup>Ngok evi nanu erwen nga mäsij p̄erper nga miplari; ko san ojon malum, ko otomori jer pa piplari.

#### *Anglo ebutun owi davö sen*

<sup>15</sup>Mian ko anglo ebutun vajin owi davö sen. Ko nurnge drrelan sopor rengo melrin aran mare, arwera "Batun vanu nir ne iel ngatan arini vajin rengo nevre Numal Atua se kerr ko re nevre Kristo sen nga mukoni. Ko ni pimetmet nir tuwi ngok vini." <sup>16</sup>Ko b̄irterawarrang ngavöl eru drromon ivij nga marsakel rengo nai seksakel ser rengo no Atua arjiol van ngatan armatur ko arsurövi Atua, arwera <sup>17</sup>"Numal Atua ne derteren jile, nik nga kumlik tuwi pa vini, kem namwera erres wor elep tevi nik nga kumsa raji lweni derteren som nga milep, ko kumetmete vajin nanu jijle nir." <sup>18</sup>Jinibb ne vare nir arlolar lenglengen suri nabong ne nik lolaren som evini pa, daron nga kupwera suri lat nga puto suri tevi jinibb jijle nir nga marmij, ko daron kele nga nik kupla nowli jinibb som nir, propet nir ko jinibb som jijle nir nga martorim, jinibb nga marlelep nir ko jinibb nga welili nir. Ko daron evini pa nga kuplokloksi nir nga marlokloksi iel ngatan." <sup>19</sup>Ko Naim On se Atua nga rengo melrin etp̄ir, ko jinibb nir arlesi bokis nga miviseni marongen se Atua tevi m̄eri Isrel nir tuwi. Mian ko navil evil, belver orrorrorr ko ever, nam̄i em̄i, ko bejje aes nga marlelep nir arvitvitan ngatan.

## 12

#### *Nesevin ko drakon*

<sup>1</sup>Mian ko nanu nga minijnij nawone san eplari rengo melrin. Nesevin san ori nial erpe sunsun sen, ko ejingteni ßelan nuru re navöl, ko nuvan sen nga rengo batun evi moju esngavöl drromon eru. <sup>2</sup>Otomori puwosi bipi sen, ko engirr erave nga murnge bipi p̄iak. <sup>3</sup>Mian ko nanu nga minijnij nawone kele san eplari re melrin. Drakon san, erpe mokoblab ko elep temijpal asi mokoblab. Osongsong, ko batun ebut ko batin esngavöl, ko nuvan se numal arto rengo batun nga ebut ngok. <sup>4</sup>Ko drakon ewirrleni neruren ko erevji tweni moju elep rengo melrin arvitvitan vini ngatan. Ko poro moju nir meling itul e, ko san evitan, eru orjipon, san evitan, eru orjipon. Ko drakon otur re no nesevin nen, owra "Natum poka-iak tweni, ko borroi!" <sup>5</sup>Mian ko nesevin owosi natun norman san. Ko natun norman nen pia-metmete vanu nir ko putori nai nga mivi delrrurr nga pivrralir e. Ko arteseni

tweni van ji Atua e ko nai seksakel sen. <sup>6</sup>Ko nesevin owlu van rengo lolo merwer, rengo lat san nga Atua ololi metmete terai nga ni p̄ilik ren. Ko iok parmetmete ni pijpari nabong pivi 1260.

<sup>7</sup>Mian ko nuval nga milep san eplari re melrin. Maekel ko anglo sen nir arval tevi drakon ko anglo sen nir. <sup>8</sup>Ko drakon esaro esij, ko setemun orongwos p̄ilik re melrin, nir anglo sen nir. <sup>9</sup>Ko arwirre tweni vini iel ngatan, nir anglo sen nir. Drakon nga milep nen evi numet nen nga mikrekrasi Iv tuwi. Nisen ko Demij, ko nisen tuwen nen evi Setan. Ko ni ko ok-kerkerasi jinibb ne iel ngatan p̄etp̄eti.

<sup>10</sup>Mian ko nurnge drrelan san rengo melrin ean mare, ko owra "Lelingenok vajin Atua se kerr ela mauren tevi kerr. Lelingenok vajin Atua eisi dewsin erpe Numal. Lelingenok vajin Kristo sen nga mukoni eviseni derteren sen. Suri ni nga mutur re no Atua ko ewer lokloksi tasi kerr nir nutrin ko nutpong, arwirr tweni pa rengo melrin. <sup>11</sup>Ko nir arevji rengo drra Natu Sipsip ko rengo weretunen nga marok-werwer ren. Ko sete arorrmi alje mauren ser, armarong bbong parmij suri. <sup>12</sup>Niko, nik, melrin, kup̄ir, ko kami jijle nga kamlik rengo. Ko warru kobong rengo iel ngatan ko rengo dis. Suri Demij evinuk re kamru ko ni ololar lenglengen, suri orongwose nga daron sen omrrol bbong nga mijpon."

<sup>13</sup>Ko drakon ololar nga marwirre vini ngatan e, ko oji nesevin nga mivasus nga. <sup>14</sup>Ko ikel san nga milep arla naben nuru tevi nesevin nga purow van rengo lolo merwer san nga Atua muloli teraie. Ko iok parmetmete pijpari sia p̄itul ko devje sia kele san, nga drakon sete orongwos pijpari. <sup>15</sup>Mian ko drakon ololi nuwi eseser elep rengo jingon, owra pujri tweni nesevin nga. <sup>16</sup>Ko dan ela se nesevin; emawor ko emni tepe nuwi nen. <sup>17</sup>Ko drakon ololarsi nesevin elep, ko evel owra pipalpal tevi natu nesevin minij nen nir, nir jijle nga marosuri nale se Atua ko weretunen nga Iesu muwra tweni. <sup>18</sup>Ko drakon otur rengo jeli dis.

## 13

#### *Nanu rrum eru*

<sup>1</sup>Ko nulesi nanu rrum san eplari rengo dis. Ni batin esngavöl ko batun ebut. Nuvan se numal arto rengo batin nir, ko rengo batun nir aruli nais sisamis rer nga marwer lokloksi Atua. <sup>2</sup>Nanu rrum nen erpe puskat ko elep asie. Belan nuru orirpe ßela nanu rrum nen bea, ko jingon erpe jingo laeon. Ko drakon ela derteren sen nga milep tevi nanu rrum nen, ko

ela kele nai seksakel sen tevi. <sup>3</sup> Ko nanu rrum nen batun san erpe arevji evter nga pimij, ko emaur luwi pa. Ko jinibb jijle nir ne iel ngatan artaole ko arvitu suri nanu rrum nen. <sup>4</sup> Ko jinibb jijle nir arsurövi drakon, suri nãila derteren sen tevi nanu rrum nen. Ko arsurövi kele nanu rrum nen, ko arwera "Isi erpe nanu rrum? Isi orongwos pipalpal tevi?"

<sup>5</sup> Ko Atua elngilngi nanu rrum nen þirij melmelas ko ewer lokloksi Atua. Ko Atua elngilngi puloli derteren sen pipari navöl pingavöl pivij drromon þieru (42). <sup>6</sup> Ko etipatun þirij þisij tere Atua ko Atua nisen, ko lat nga nãilik e, ko nir nga marlik rengen melrin. <sup>7</sup> Ko Atua elngilngi pian pipalpal tevi jinibb se Atua, ko pivevji. Ko Atua elngilngi nga pimetmete jinibb jijle nir ne vanu þetþeti nir, nale þetþeti nir, ko metka þetþeti nir. <sup>8</sup> Jinibb jijle nir nga marlik iel ngatan parsurövi, ko nir nga maruli niser rengen naul ne mauren se Natu Sipsip nga marevji pini, sete parsurövi. Nir ko, aruli niser jile musuw, ko iel ngatan miapelari. <sup>9</sup> Kupmurrong, nik nga nolo borom mutoe! <sup>10</sup> Si nga parrul totoni ko wor, ko parrul totoni. Ko si nga parevji pini e nesip nuval, parevji pini ko. Ko ngok, kami jinibb se Atua, kaptur þiterter ko kaposuri þirres.'

<sup>11</sup> Mian ko nulesi nanu rrum kele san nga miplari rengen dan. Ni batin eru erpe bati natu sipsip, ko drrelan erpe drrela drakon. <sup>12</sup> Ko ni ela derteren ji nanu rrum nga womunen. Ko otur re no nanu rrum nga batun nen mimaur luwi, ko on tertere jinibb jijle nga marlik iel ngatan nga parsurövi. <sup>13</sup> Nanu rrum nga erwen nga ololi nanu nga marinijnij nawone nir. Ololi nabb ein pelari re melrin evini iel ngatan, jinibb jijle nir arlesi. <sup>14</sup> Ko ekrekrasi jinibb jijle nir suri nanu nga Atua elngilngi pulolir rengen no nanu rrum nga womunen. Ko owrai tevir nga parsavi nai san purrongrrongvi nanu rrum nen nga nesip nuval erevji, ko emaur bbong. <sup>15</sup> Ko nanu rrum nga erwen nga, Atua elngilngi nga pimabbös van rengen nai nen nga puloli pimaur. Ko nai nen orongwos þirij vajin, ko orongwos pivevji pini si nga mumusus pusrövi. <sup>16</sup> Ko nanu rrum nen on tertere jinibb þetþeti nir, jinibb nga welili nir, jinibb nga marlelep nir, nir nga nijor ser milep, nir nga nijor ser mijkie, demij maur nir, ko nir nga marivel sisarow, nga parlingi nabil san puto rer, rengen nevrer rres rreknga rengen borngir. <sup>17</sup> Ko poro san sete ela nabil nen, ko ni sete orongwos puwulwule nanu san, ko sete orongwos puwli nanu san. Ko

nabil nen evi neveveien<sup>F</sup> ne nise nanu rrum nen. <sup>18</sup> Si nga norongwosien sen mutoe orongwos purongwose bbong. Si nga batun muwlu orongwos purongwos neveveien nen evi neveveien ne nais sev. Suri evi neveveien ne nise jinibb ko san. Ko neveveien nen evi ongut vawon bbulin ngavöl ouwon drromon ouwon (666).

## 14

### *Natu Sipsip ko jinibb sen nir*

<sup>1</sup> Mian ko nuklu ko nulesi Natu Sipsip mutur rengen botwen Saeon. Ko ni eptevi jinibb sen nir 144,000 nga maruli ni nisen ko Tata sen nisen rengen borngir. <sup>2</sup> Ko nurnge drrelan san eplari rengen melrin erpe drrela dis nga milep nga nãirrerre rengen botunmal, ko erpe kele belver nga miver milep, ko erpe kele drrela nevis tingting nir nga marok-kinkinji. <sup>3</sup> Ko nir 144 000 artur rengen no Atua nga nãisakel rengen nai seksakel sen, ko rengen no netun vanu ivij, ko þirterawarrang nir; ko arok-la nubö nga mimerr san, nga nir kis kobong arongwos parongwose. Atua owli twenir rengen iel ngatan arivi sen. <sup>4</sup> Nir ko arivi jinibb on nga sete aran ji nesevin nabong san. Ko arvitu suri Natu Sipsip ngabe ngabe nga ni pian e. Atua owli twenir, ko nir parirpe sulsulen womunen vajin van ji Atua ko Natu Sipsip. <sup>5</sup> Sete nale gerisen san eplari rengen jingor nabong san, ko arivi jinibb nga marmomsawos marres jijle.

### *Anglo itul*

<sup>6</sup> Mian ko nulesi anglo kele san orow mare, ko okwerwer rengen nosþen nga nãirres nga muto tuwi ngok vini tevi jinibb jijle nir ne iel ngatan, ne vanu þetþeti nir, nale þetþeti nir, ko metka þetþeti nir. <sup>7</sup> Ko anglo nen erij drrelan ean mare, owra "Kaptori Atua, ko kapsurövi. Suri daron evini le pa nga ni þiwer sesesre lat nga puto suri tevi jinibb jijle nir. Kapsurövi ni nga muloli melrin, iel ngatan, dis, ko mete nuwi nir." <sup>8</sup> Mian ko anglo kele san evijuri nga womunen, ko owra "Ngaim nga milep Bapilon eil jubbul pa, esij þetþeti. Suri ni ololi jinibb jijle nir armini norro sen nga nãiterter, ko arlengleng e, ko arvijuri sel nga marsij sen nir." <sup>9</sup> Ko anglo itolin vajin evijuri anglo nga womu nuru. Ko ni ekail, drrelan ean mare, owra "Nir nga marsurövi nanu rrum nen ko nai nga marsavi rrongrrongvi, ko nga marla nabil nen rengen borngir rrek rengen nevrer, <sup>10</sup> nir ko parmini norro ne lolaren se Atua, nga mivi norro kiskis nga nãiterter temijpal, sete arkisi nanu san e. Erpok ko nir parlesi lolaren tera se Atua, parunge þisij rengen nabb nga nãin ko nga muror peleplari re

<sup>F</sup> 13:17 namba

nevöt nga nisen salpa, reнге no anglo nir nga maron ko reнге no Natu Sipsip. <sup>11</sup> Ko nousni nabb nen pus tuwi ngok vini. Ko nir nga marsurövi nanu rrum nen ko nai nga marsavi rrongrrongvie, ko nir nga marlai nabil nen, nabb nen puslir tetajer nutrin ko nutpong, sete pumosi sapon nabong san. <sup>12</sup> Ko ngok jinibb se Atua nir nga marosuri nale se Atua ko nga marlingi nolor reнге Iesu partur piterter ko wor.”

<sup>13</sup> Mian ko nurnge drrelan san eplari reнге melrin, ko owra “Kupuli nanu ngel: Neiren reнге nir nga marmij suri marmajing se Numal Atua, etipatun le pa ngel pian pijpari bongsi iel ngatan.” Ko Nemün erij weli, owra “Pirpok ko. Nir parmosi reнге ßelaken ser, ko partori suri wene majingen ser putu tevir.”

#### *Anglo nga martori nesip netkiß ser*

<sup>14</sup> Mian ko nulesi nabor nga muow san, ko san nga mirpe jinibb esakel ren. Ko nuvan nga mivi gol oto re batun, ko otori nesip netkiß nga muso san oto re nevren. <sup>15</sup> Ko anglo kele san eivare re Naim On, ko everus mare jer van ji ni nga müsakel re nabor, owra “Kupla nesip netkiß som, kupan kupta wit, suri armirr pa. Daron evini pa, ko jinibb ne iel ngatan nir arirpe naut ne wit nga mütra pa, ko daron evini nga parta twenir ko.” <sup>16</sup> Ko ni nga müsakel reнге nabor ela nesip netkiß sen ko eta iel ngatan e, ko eta tweni wit ne iel ngatan nir ko esraker.

<sup>17</sup> Mian ko nulesi anglo kele san mivare reнге Naim On nga reнге melrin; ko ni kele otori nesip netkiß nga muso san. <sup>18</sup> Ko anglo kele san, nga mok-metmete nabb nga müin, evel re nawot vini. Ko everus van ji anglo nga mutori nesip netkiß nen, ko owra “Kupla nesip netkiß som, kupan kupta tututweni wene grep nir ne orsel ne iel ngatan. Armirr arpongpong ko pa.” <sup>19</sup> Ko anglo nen ela nesip netkiß sen, ko eta iel ngatan e; ko eta tututweni wene grep nir reнге gar, ko otuwer van reнге merremrre besin nga milep temijpal san. Ko iok parbbötbböt rer nga puloli suwer piseser tweni. Ngok ko vajin evi lolaren se Atua. <sup>20</sup> Besin nen oto vare re ngaim, ko suwer nga marbbötbböt kirkirsir arsongsong peleplari, arseser arivi drra. Drra nen eserer peleplari van ngasu, erpe norngov nen eipari 1600 statia (ngok evi 300 kilomita). Ko orron erpe poro jinibb san putur ren, ko pijpari nowen mare.

## 15

### *Jinibb se Atua nir arsurövi*

<sup>1</sup> Mian ko nulesi nanu nga müinjijije kele san reнге melrin, ko nutaol lenglengen e.

Anglo ebut artori nanu ebut nga marsij. Nir ko parvinvini ore nanu nga marsij nir nga partor kemkarne jinibb nir, suri poro parpelari jile, ko lolaren se Atua pusuwsuw vajin.

<sup>2</sup> Mian ko nulesi sale nga mivilvil müres san, nabb nga müin eksiksi tevi. Ko nulesi jinibb nir nga marevji nanu rrum nga neveveien<sup>G</sup> nen eviseni nisen, ko nai nga marsavi rrongrrongvie. Ko jinibb nen nir artur reнге jeli sale nen. Artori nevis tingting nga Atua mülai tevir, <sup>3</sup> ko arok-la nubo se Moses, jinibb ne majingen se Atua, ko evi kele nubo se Natu Sipsip. Ko arlai erpel: “Numal Atua ne derteren jijle, Nik majingen som arlelep arres, nik batu numal ne vanu jijle nir. Sel som nir armomsawos arres, arivi weretunen. <sup>4</sup> Numal, isi sete orongwos pimtotue nik? Isi pumusud pusrövi nise? Nik kusan bbong kuon. Jinibb ne vanu petpeti nir parini parsurövim, suri jinibb jijle nir arlesi murrun som nir nga marmomsawos marres.”

#### *Besin ebut nga marwun saute lolaren se Atua*

<sup>5</sup> Mian ko nulesi devji nga mivi Naim On nga muto reнге melrin etpir. <sup>6</sup> Ko anglo nga ebut nga martori nanu ebut nga marsij nga arivare reнге. Aruri sunsun nga marow titis marres, ko artatuwe netatuw ne gol re morkor. <sup>7</sup> Mian ko san reнге netun vanu nga ivij nga elai besin ebut tevi anglo nir nga marwun saute lolaren se Atua, nga mimaur tuwi ngok vini. <sup>8</sup> Ko nousni nabb osongni Naim On petpeti, nga mus pelari reнге nosrövien ko derteren se Atua. Ko sete san orongwos pian lolaim re Naim On, pijpari nga nanu ebut nga marsij nga anglo ebut martorir parsuwsuw.

## 16

<sup>1</sup> Mian ko nurnge drrelan san ean mare, eplari reнге Naim On ko owrai tevi anglo ebut nga, owra “Kapan kapjivreni tweni besin ebut nga marwun saute lolaren se Atua, parmejivjiv van re jinibb totoklai nir.” <sup>2</sup> Ko anglo nga womunen evan ko ejivreni tweni besin sen van re jinibb totoklai nir. Ko garen lele nga marsij nir ko marerngis arap pelari reнге nibe jinibb nir nga nabil se nanu rrum nen muto rer, ngok nir nga marsurövi nai nga marsavi rrongrrongvie.

<sup>3</sup> Mian ko anglo erwen ejivreni tweni besin sen van reнге dis. Ko dis erieni evini erpe drra jinibb nga mimij. Ko nanu jijle reнге dis armij.

<sup>4</sup> Mian ko anglo itolin ejivreni tweni besin sen van reнге nuwi seser nir ko

mete nuwi nir; ko arieni arivi drra. <sup>5</sup> Ko nurnge drrela anglo nga mimetmete nuwi nir owrai owra "Nik nga kumon, nga kumlik lelingen ngel ko kumlik tuwi pa. Kutor aljer osorsan kobbong tevi nanu nga marlolir. <sup>6</sup> Suri nir arevji pini jinibb on nir drrar emejivjiv, ko drra propet kele nir; ko niko nik kula drra tevir parmini. Mirpok ngok osorsan kobbong." <sup>7</sup> Mian ko nurnge drrelan san nga miplari rengo nawot ko owra 'Numal Atua ne derteren jijle! Kutor alje jinibb nir rengo sel nga marivi weretunen ko marsorsan mürres.'

<sup>8</sup> Mian ko anglo ivajin ejivreni tweni besin sen van rengo nial, ko esne lokloksi jinibb nir erpe nabb nga min. <sup>9</sup> Esne lokloksir, ko arwer lokloksi nise Atua, nga mimetmete nanu nga marsij nen nir. Ko armusus nolor pulululwi ko parsurövi.

<sup>10</sup> Mian ko anglo elmen ejivreni tweni besin sen van rengo nai seksakel se nanu rrum nen. Ko nat emalik rengo batun vanu sen, ko jinibb nir araji nemer suri arunge garen ser otor kemkarier. <sup>11</sup> Ko arwer lokloksi Atua ne melrin suri marunge müsij, ko suri garen ser. Ko ejki, sete nolor arlululwi rengo sel nga marsij ser.

<sup>12</sup> Ko anglo ouwnon ejivreni tweni besin sen van rengo nuwi seser nga milep lupretes. Ko nuwi emes, ko sel otoa vajin se numal nir nga parivel rengo Is ko vini. <sup>13</sup> Mian ko nulesi nemin itul nga marsij nga marirpe prok. San eplari rengo jingo drakon, san eplari rengo jingo nanu rrum, ko san eplari rengo jingo propet ne gerisen san. <sup>14</sup> Nir ko arivi nerüi demij nir nga marongwos parloli nanu nga marinijnij nawone nir. Ko nir arivel van ji batu numal ne iel ngatan jijle nir, nga puloli parkorti re nuval rengo nabong nga milep se Atua ne derteren jijle.

<sup>15</sup> Ko Iesu owra "Kapmurrong! Inu devel silveni vinuk tirpe jinibb venao san, ko dea-taolsi kami. Jinibb nga mimetmet mürres, ko sete muri tweni sunseng sen ko ematur bbong elelea, ni purnge pürres, ko sete orongwos pivel malmal re no jinibb nir ko pimanun."

<sup>16</sup> Mian ko nemin nga itul nga artekai numal nir ne iel ngatan arini korti lat sansan. Lat nen, nisen rengo nale se mieri Isrel nir evi Amaketen, nga muwra puwra Botwen nga milep ne Mekito.

<sup>17</sup> Mian ko anglo ebun ejivreni tweni besin sen van rengo ling. Ko drrelan san ean mare, eplari rengo nai seksakel nga rengo Naim On, ko owra "Osuw le pa!" <sup>18</sup> Ko navil evil, belver ever, ko narüi nga milep temijpal san emi. Setewor jinibb san elesi wor narüi nga milep mirpok nabong san, nenen elep asi pëtpeti. <sup>19</sup> Ko Jerusalem omoworwor devjen itul e, ko

ngaim ne vanu pëtpeti nir arsj pëtpeti. Ko Atua sete emalie Bapilon, otorlai, ololi emni norro ne lolaren sen nga milep. <sup>20</sup> Ko norour jijle nir armëtaev ko botwen nir arjijki. <sup>21</sup> Ko motpo aes nga marlelep nga marrow ejpari kilo ngavöl elim (50) arvitvitan rengo jinibb nir. Ko nir arwer lokloksi Atua, suri evi nanu nga müsij milep.

## 17

### *Nesevin ne sel nga müsij nga müsij*

<sup>1</sup> Ko san rengo anglo nga ebut nga martori besin ebut evini jik ko owrai tevik owra "Kupini, ko kuplesi partor alje nesevin ne sel nga müsij nga müsij. Nesevin nen evi ngaim nga muto mori nuwi seser elep. <sup>2</sup> Ko batu numal ne iel ngatan nir arloli esij pa tevi nesevin nen. Ko jinibb nir ne iel ngatan armini norro sen ko arlengle e, ko arvijuri sel nga marsij sen nir."

<sup>3</sup> Ko derteren se Nemän On orrul totonik, ko anglo nen owosik van rengo lolo merwer. Ko iok nulesi vin nga. Ni esakel rengo nanu rrum nga musongsong san. Nanu rrum nen, batun ebut ko batin esngavöl, ko aruli nais nga marwer lokloksi Atua rengo niben pëtpeti. <sup>4</sup> Ko vinnen ori sunsun nga nulsen mürres pëlak, nga nulsen eru e, tuwen osongsong ko tuwen opongpong e. Ko ni ojroi ni e nanu nga marivi gol nir, ko nevöt nga marres nir, ko perel. Ko otori biles ne gol nga muwun saute nanu nga marsij pëpëp nir nga marivi wene sel nga marsij sen nir. <sup>5</sup> Ko rengo borngin aruli nale nga muto tepi san ren, evi nais san, ko owra puwra 'Bapilon nga milep, tasu se nesevin ne sel nir ko batu murrung nga marsij pëpëp nir ne iel ngatan.' <sup>6</sup> Ko nulesi vinnen elengle e mimni drra jinibb se Atua nir, ko drra nir nga marevji pinir suri marosuri Iesu.

Melesi, ko nutaol lenglengen. <sup>7</sup> Ko anglo owrai tevik, owra "Suri sev kutaol? Inu bowra visviseni tevim nale nga muto tepi suri vinnen ko nanu rrum nga ni müsakel ren nga batun ebut ko batin esngavöl. <sup>8</sup> Nanu rrum nen emaur ko wor womu, ko mian ko emij pa. Ko otomori piplari kele rengo bbulwil nga nabbön mijkie; ko sete pipriv kele, ko parevji pini pimij kele. Ko nir nga niser mijkie rengo naul ne mauren nga maruli tweni jile pa, mian ko iel ngatan mia-pelari, nir nen ko partaol lenglengen daron nga marlesi nanu rrum nen, suri emaur ko wor womu, mian ko emij pa, ko eplari luwi kele vajin. <sup>9</sup> Iok poro jinibb san orongwose, ko mernen norongwosien sen elep ko. Nanu rrum nen, batun nga ebut nga arivi botwen ebut

nga nesevin nga m̄isij nen elik renger, ko arivi kele batu numal ebut. <sup>10</sup> Ko renge batu numal nga ebut nga, nir elim arjiki pa, ko eru orjipon. Nuru tuwen otori derteren sen malum, ko nuru tuwen setewor eplari. Ko daron nga pia-pelari e, ko ni putori derteren sen re daron kobbong sapon. <sup>11</sup> Ko nanu rrum nen nga mimaur ko wor womu, ko emij pa, ni womu evi nir san renge nir nga ebut ngok; ko eplari luwi kele vajin, ko evi vajin numal owalin kele. Ko sete pipriv, ko parevji pini kele pimij.

<sup>12</sup> Ko batin esngavöl nga kumlesir arivi batu numal esngavöl nga setewor arla derteren ser, ko mian ko para-lai ko. Ko parpitevi nanu rrum nen, para-ivi numal re mete nial sansan. <sup>13</sup> Nir nga esngavöl ngel, norrorrmien ser evi sansan bbong. Ko nir parla derteren ser, parlingi re nevre nanu rrum, <sup>14</sup> ko nirnir nanu rrum nen vajin parval tevi Natu Sipsip. Ko Natu Sipsip evi Batu Numal ne batu numal p̄et̄p̄eti nir. Ni everus pae jinibb sen nir, otobbobbuer, ko nir arosuri ni erres. Ko ni pipitevi jinibb sen nen nir ko paran parval tevi numal nga esngavöl nga, ko parevji.

<sup>15</sup> Ko anglo owrai kele tevik, owra “Nuwi nir nga kumlesir nga nesevin nga m̄isij m̄ilik morir arivi jinibb ne vanu nir, ko ne metka nir, ko ne nale nir. <sup>16</sup> Ko batin esngavöl nga kumlesir ko nanu rrum parungasi nesevin nga m̄isij nen. Ko nir parrawe tututweni joron p̄et̄p̄eti, ko vinnen putur malmal. Ko nir parurro vison ko parsuli p̄inivniv. <sup>17</sup> Suri Atua elngi pa re nolor nga parloli nanu nga murrormi nir, ko nga parini korti ko parlai derteren ser tevi nanu rrum, pijpari nga nale se Atua nir para-pelari. <sup>18</sup> Ko nesevin nen evi ngaim nga milep nen nga mimetmete numal nir ne iel ngatan.

## 18

*Ngaim nga milep Bapilon eil jubbul, esij p̄et̄p̄eti*

<sup>1</sup> Mian ko nulesi anglo kele san ojubbul re melrin vini. Ni derteren sen elep, ko ni erinrin ko omor vaseni iel ngatan p̄et̄p̄eti. <sup>2</sup> Ko erij drrelan ean mare, owra “Ngaim nga milep Bapilon eil jubbul, evitan pa esij p̄et̄p̄eti! Evi vajin sise demij ko nem̄in nga marsij nir, ko numön lele nga marsij nir artur pa ren. <sup>3</sup> Suri jinibb ne vanu p̄et̄p̄eti nir armini pa norro sen nga m̄iterter ko arlengleng e, ko arvijuri sel nga marsij sen nir. Ko batu numal ne iel ngatan nir arloli esij tevi; ko jinibb nir ne iel ngatan nga marok-wulwule nijor nir, nevöt ser elep

vajin suri ni murrun nga mimrreni nanu jijle.”

<sup>4</sup> Mian ko nurnge drrelan kele san eplari renge melrin, ko owra “Jinibb suk nir, kapivare ko wor renge Bapilon. Sete kap-korti tevi renge nololien sen nga marsij nir. Kapwolu lingi, suri Atua putor kemkame renge nanu nga marsij nir nga parini jin. <sup>5</sup> Nololien sen ousuni kortonir, owu jipari melrin. Ko Atua elesi sel sen nga marsij ngok ko elngi pa renge norrorrmien sen nga puloli nanu san tevi. <sup>6</sup> Kapkele tevi pusorsan pirpe ni muloli tevi kami. Ko nanu nga muloli pa tevi kami vesan, kapkele pivaru tevi. Kapjivi norro nga m̄iterter re biles minmin sen, pimni norro nga derteren sen m̄iasi varu renge norro nga m̄ilai tevi kami. <sup>7</sup> Ni eramet, ko ololi ni luwi nisen ean mare. Kaploli ni purnge p̄isij ko p̄iting vajin. Suri tetajer ni nolon okan mare, ko okwera ‘Inu le, numal san. Diwen suk sete emij lingik, ko sete b̄eting nabong pisan.’ <sup>8</sup> Suri muwrai mirpok, ni p̄ilesi mesien, dinging, ko numer, renge bbong nabong pisansan, ko nabb p̄iani pini. Suri Numal Atua nga m̄iwer sesesre lat nga puto suri tevi, ni derteren sen elep. <sup>9</sup> Ko batu numal ne iel ngatan nir nga tetajer marir e nijor sen nga marres nir ko markorti tevi vinnen Bapilon renge sel nga marsij sen nir, parting pilep daron nga parlesi nousni nabb nga p̄iani. <sup>10</sup> Artur tuwi ngasu, suri armetutu nir kele tarin, ko arwera “Warru! Warru! Ngaim nga milep Bapilon nga m̄iterter! Renge mete nial sansan bbong artorrlaim!” <sup>11</sup> Ko jinibb nir ne iel ngatan nga marok-wulwule nijor nir partengsi kele, suri san ejkimun nga pokwuli tweni nijor ser nir. <sup>12</sup> Setemun san okwuli gol ser, silva ser, nevöt ser nga marres nir, ko perel nir. Ko setemun san okwuli kalik ser nga marres nir, nga marow titis, ko nga marpongpong, ko nga marsongsong, ko kalik nga mivi silik marmalum m̄irres. Setemun san okwuli nai ser nga mapur m̄irres, ko nai nir nga marsavi renge liwe elepen, ko renge nai nga nowlin mian mare, ko renge bras, ko renge delrrurr, ko renge nevöt nen nga m̄iterter m̄irres ko muow; <sup>13</sup> ko rao nanu nir nga mapur m̄irres, erpe sinamon ko spaes ko insens, ko mir ko prangkinsens. Setemun san okwuli norro, oel, plaoa, ko wit ser. Setemun san okwuli buluk, sipsip, os ko kat ser, ko setemun san okwuli jinibb nir nga marivi demij maur. <sup>14</sup> Ko nir nga marok-wulwule nanu ngok nir parwera tevi vinnen Bapilon: “Nijor nga marres nir nga kumlingi nolom rer arjijki pa. Nanu nga marinrin nir ko nga nowlir milep arwolu lingim, ko setemun kumalesir kele.” <sup>15</sup> Ko nir nga marok-wulwule

nanu nir renge Bapilon ko marok-lai nevõt nga milep rengen partur tuwi ngasu, suri armetutu nir kele tarla norongen nga mäsij. Ko arting nga arting lenglengen, armesmasorr e, ko arwera <sup>16</sup> “O, warru, warru temijpal wor renge nik, ngasu nga milep. Seveling nga, komok-uri sunsun som nga nalser marres, nga marsongsong ko nga marpongpong mürres, ko arivi kalik nga marres. Seveling nga komok-juroi nik e nanu nga marivi gol nir, ko nevõt nga marres nir, ko perel. <sup>17</sup> Ko renge mete nial sansan bbong, nijor som nga marres nir arjijki pa.”

Ko numal ne drrav nir tevi jinibb nir nga marsa renge drrav nen nir ko jinibb nga marmajing renge drrav nir, artur tuwi ngasu, <sup>18</sup> ko arlesi nousni nabb nga mïiani ngaim nga milep nen, ko arkail arwera “Sete pa ngaim san elep ko erres osorsan tevi nga ngok!” <sup>19</sup> Ko arker a maw arjijreni renge batur, ko arting nga arting lenglengen, armesmasorr e, ko arwera “O, warru, warru temijpal wor renge nik ni ko, ngaim nga milep. Jinibb nir nga drrav ser marok-wolwolu renge dis arla nevõt nga milep jim. Ko renge mete nial sansan bbong, nijor som nga marres nir arjijki pa.” <sup>20</sup> Ko nik, melrin, kuþir, ko jinibb on se Atua nir, ko aposol nir, ko propet nir. Suri Atua otorrlai suri nanu nga ni muloli tevi kami.

<sup>21</sup> Mian ko anglo san nga derteren sen milep owosi nevõt nga milep san ko ewirre van renge dis. Ko owrai owra “Bapilon, nik kuvi ngaim nga milep san. Ko parwirrem pia-irpok, ko sete san þilesim kele. <sup>22</sup> Re sisom, jinibb nga þitetnije nevis tingting pijki mun, ko jinibb nga þila nubo pijki mun, ko jinibb nga puwi nabbu pijki mun, ko jinibb nga puwi davõ pijki mun. Metusa san pijki mun, ko setemun parunge drrela nevõt nga milep nga mipsi worwor jelangi wit marok-ivi plaoa. <sup>23</sup> Setemun parlesi moro nasul re sisom, ko setemun parunge drrela jinibb parkarkar re daron nga marloli totkoi. Ko seveling nga, jinibb som nir nga marok-wulwule nanu nir, nijor ser elep asi nir þetþeti nga renge iel ngatan. Ko botut som ekrekrasi jinibb ne vanu jijle nir. Nanu ngok nir arvinvini ore nga evi bongsin ko vajin.” <sup>24</sup> Atua otorrlai Bapilon erpok suri drra propet nir ko drra jinibb se Atua nir eseser rengen, tevi drra jinibb jijle nir nga martor pinipnir iel ngatan.

## 19

### *Nir nga renge melrin arla nubo*

<sup>1</sup> Mian ko nurunge drrelan san erpe jinibb delung nga milep drrelar re melrin, ko

arwera “Rrapsturövi Atua! Ni elta mauren tevi kerr; nisen ean mare, ko derteren jijle arivi se ni ko. <sup>2</sup> Ni ewer sesesre lat nga puto suri tevi jinibb jijle nir renge sel nga mimetet musorsan mürres. Ko ni otorrlai nesevin ne sel nga mäsij nga mäsij nen nga mulokloksi iel ngatan renge sel nga marsijsen nir, ko ekle lweni nga ni mutor pini jinibb se Atua nir.” <sup>3</sup> Ko vesan kele arkail, arwera “Rrapsturövi Atua! Nousni nabb nga mïiani ngaim nga milep pus tuwi ngok vini.” <sup>4</sup> Ko Birtera nga ngavöl eru drromon ivij nga, ko netun vanu nga ivij nga arjol van ngatan armatur ko arsurövi Atua nga mäsakel renge nai seksakel sen. Ko arwera “Pirpok ko! Rrapsturövi Atua!”

### *Nanen ne totkoi se Natu Sipsip*

<sup>5</sup> Mian ko drrelan san eplari renge nai seksakel se Atua, owra “Kapsurövi Atua se kerr; kami jinibb sen nir, kami nga kammetutue ni, kami nga kamwelili ko kami nga kamlelep.” <sup>6</sup> Mian ko nurunge drrelan san erpe jinibb delung nga milep drrelar, ko erpe kele drrela dis bburbur nga mürrerre re botunmal, ko erpe belver okver. Ko nurunge arwera “Rrapsturövi Atua! Ni evi Numal, ko otori derteren jijle. <sup>7</sup> Rrapir, rrapusi nisen pian mare. Suri daron evini pa nga Natu Sipsip þilesi nesen sen. <sup>H</sup> Ko nesen sen etriv pa. <sup>8</sup> Ko arlai pa sunsun nga muow titis, ori pa.” Nesevin nen orrongrongvi jinibb se Iesu nir, ko sunsun nen orrongrongvi murrin nga marres nga marloli. <sup>9</sup> Ko anglo owrai tevik, owra “Kupuli tweni nanu ngel: Neiren renge nir nga marverusi parini renge nanen ne totkoi se Natu Sipsip.” Ko owrai kele owra “Ngok arivi nale se Atua, ko arweretun.”

<sup>10</sup> Mian ko nujiol vitan numatur renge þelan, nuwra bosrövi; ko ni owra “Pijki, pijki! Inu kele nuvi jinibb ne majingen se Atua erpe nik ko tasi kerr nir nga martori totoni nale se Iesu. Kupsurövi Atua kobbong pisan. Suri nale se Iesu evi batu nale se propet nir.”

### *San esakel renge os nga muow*

<sup>11</sup> Mian ko nulesi melrin eteri wukari etþir. Ko nulesi os nga muow san, ko san esakel rengen. Ni nisen ko ‘Mer nga mokwera nanu ko mokweretun, puloli suri pirpe muwrai.’ Ni okwer sesesre lat nga puto suri tevi jinibb nir renge sel nga musorsan mürres, ko eval renge sel momsawos nen. <sup>12</sup> Ko meten nuru orirpe nabb nga mulumlumem pelpelari ren, ko ori nuvan elep rege batun. Ko aruli nais san renge niben, ko ni esan kobbong orongwos nais nen. <sup>13</sup> Ko sunsun sen

<sup>H</sup> 19:7 Natu Sipsip orrongrongvi Iesu, ko nesen sen evi kerr kalesia.

eþelpalos þetþeti drra. Ko nisen ko 'Nale se Atua'.<sup>14</sup> Ko jinibb nuval nir ne melrin arvijuri. Nir arsakel reнге os nga marow nir, ko aruri sunsun nga marwokwok marres, arow titis.<sup>15</sup> Ko nesip nuval san nga muso varrvarr okpelari reнге jingon, ko ni pipalpal e ko putor kemkañe jinibb ne vanu nir. Ko ni pimetmet vanu nir tevi nai delrrurr san, ko pibbötbböt kirkirsi wene grep nir. Ngok orrongrongvi lolaren nga milep se Atua ne derteren jijle.<sup>16</sup> Ko aruli nais san reнге sunsun sen ko reнге jakin, nga muwra 'Batu Numal se numal þetþeti nir.'<sup>17</sup> Mian ko nulesi anglo kele san otur reнге nial. Ko ni everus drrelan ean mare van ji numön nga marow mare nir, ko owra "Kapini, kapser korti reнге nanen nga milep se Atua."<sup>18</sup> Kapini kaptisasi viso batu numal nir, viso batu jinibb ne nuval nir, ko viso jinibb ne nuval nir, viso os nir, ko viso nir nga marsakel rer, viso jinibb jijle nir, demij maur, nir nga marivel sisarow, jinibb nga marlelep, ko jinibb nga welili nir."

<sup>19</sup> Ko mian ko nulesi nanu rrum nen eptevi batu numal nir ne iel ngatan ko jinibb ne nuval ser nir, arser korti nga parval tevi Ni nga misakel reнге os nga muow ko tevi jinibb sen nir.<sup>20</sup> Ko jinibb sen nir aran arrul totoni nanu rrum nen, tevi propet ne gerisen nga muloli nanu nga marinijnij nawone nir re non. (Nanu ngok nir arkerkerasi jinibb nir nga marla nabil ne nanu rrum ko nir nga marsurövi nai nga marsavi rrongrongvi nanu rrum nen e.) Ko nanu rrum nen ko propet ne gerisen nen arwirr maur nuru reнге nabb nga geken milep nga salpa muror ren.<sup>21</sup> Ko jinibb nir se nuru, nesip nuval nga mokpelari reнге jingo ni nga misakel reнге os nga muow esari pinipnir. Ko numön nir artistasi visor, artasi, artasi, artasi, mian ko arup vajin.

## 20

*Jinibb nga parpitevi Kristo parmetmete vanu nir pijpari sia pivi 1000 pusuw*

<sup>1</sup> Mian ko nulesi anglo san ojubbul re melrin vini. Ko ni otori ki ne bbulwil nga nabbön mijkie, ko dil delrrurr nga milep san.<sup>2</sup> Ko orrul totoni drakon nen, nga mivi numet nga tuwi mükrekrasi Iv. Nisen ko Demij, ko nisen tuwen nen evi Setan. Ko anglo eka totoni dil delrrurr nen e, ko þisre totoni pipok pijpari sia pivi nuvasngavöl vesan (1000) pusuw.<sup>3</sup> Ko anglo ewirre van reнге bbulwil nen, ko eplaji ore tevi ki. Eplaji ore jile, ko ebbölji ore nabböl e, nga sete san orongwos þitasi metali nen. Ko ngok Demij sete orongwos pivel ko þikrekrasi jinibb nir pijpari nga

sia 1000 nen pusuw. Ko poro sia nen nir parsuw vajin, ko ni pivel sisarow vajin nabong pievis bbong.

<sup>4</sup> Mian ko nulesi nai seksakel sopor. Ko nir nga marsakel rer, derteren ser otoe nga parwer sesesre lat nga puto suri tevi jinibb nir. Ko nulesi nemin nir nga marta otvi batur suri arwerwer reнге nale weretunen se Iesu ko se Atua. Nir armusus parsurövi nanu rrum nen nir rreknga nai nga marsavi rrongrongvie, ko armusus parlingi nabil ne nanu rrum reнге borngir ko reнге nevrer; ko jinibb artor pinir suri. Ko Atua ololi armaur luwi, ko parpitevi Kristo, parmetmete vanu nir pijpari sia 1000 pusuw.<sup>5</sup> Ngok evi womunen nga Atua muloli jinibb marmaur luwi kele re mijen. Ko jinibb minij nen nir nga marmij, sete parmaur luwi pijpari nga 1000 sia nen para-asi.<sup>6</sup> Neiren reнге jinibb on nir nga Atua misa raji wowomue nir mirpok. Mijen erwen nga vitunen sete orongwos pijparir. Ko parivi jinibb ne sulsulen se Atua ko se Kristo, ko parpitevi ni nga parmetmete vanu nir, pijpari sia 1000 nen pusuw.

*Arevji kemkañe Demij*

<sup>7</sup> Mian ko sia 1000 nen poro parsuw vajin, ko Demij pivel sisarow reнге naim ne nekaien sen.<sup>8</sup> Ko ni pivel van ko þikrekrasi metka se Gok ko Makok, ngok arivi jinibb ne vanu jijle nir iel ngatan. Ko ni þiser kortonir lat sansan tera nuval, nir elep nga elep, erpe deþinan ne ngalu.<sup>9</sup> Mian ko nulesi arivel otvi iel ngatan ko artur ore rrale þetþeti lat nga jinibb se Atua nir marlik e, ko ngaim nga Atua mimrreni. Ko nabb oror pelari reнге melrin ko eanir þetþeti.<sup>10</sup> Mian ko Demij, nga mükrekrasir, arwirre van reнге nabb nga geken milep nga salpa muror ren, lat nga marwirre jile pa nanu rrum nen ko propet ne gerisen nen van ren. Ko nir parunge nevrut iok nutrin ko nutpong pijpari tuwi ngok vini.

*Atua ewer sesesre lat nga puto suri tevi jinibb jijle nir*

<sup>11</sup> Mian ko nulesi nai seksakel nga muow nga milep san, ko Atua esakel ren. Iel ngatan ko melrin ornätaw vesan lingi non, oran orjijki jer.<sup>12</sup> Ko nulesi jinibb nir nga marmij, jinibb nga marlelep ko jinibb nga marwellili, martur re no Atua. Ko anglo nir areveve naul sopor, mian ko areveve naul ne mauren. Ko reнге naul nen nir, aruli tweni nanu jijle nir nga jinibb nir marlolir. Ko Atua emteni naul nen nir, mian ko ewer sesesre lat nga puto suri tevi jinibb nir.<sup>13</sup> Ko jinibb nir nga marmij reнге dis arivare reнге dis, ko arini. Ko jinibb jijle nir nga marmij arini. Mijen sete orongwos



purrul totonir, arivel lingi ko arini renga nai seksakel se Atua. Ko Atua emteni naul nen nir nga maruli tweni nanu jijle nir nga jinibb nir marloli renger, mian ko ewer sesesre lat nga puto suri tevi nir p̄et̄p̄eti. <sup>14</sup> Mian ko mijen ko lat nga jinibb nga marmij nir marlik e, anglo ewirre nuru van renga nabb nga geken milep. Nabb nga geken milep nen evi mijen erwen nga vitunen. <sup>15</sup> Ko jinibb jijle nir nga niser sete marto renga naul ne mauren, arwirrer van renga nabb nen.

## 21

*Melrin nga mimerr ko ngatan nga mimerr*

<sup>1</sup> Mian ko nulesi melrin nga mimerr san ko ngatan nga mimerr san. Melrin nga womu ko ngatan nga womu orjijki pa, ko dis ejki mun. <sup>2</sup> Ko nulesi Ngaim On, Jerusalem nga mimerr, ojubbul re melrin ji Atua vini. Ko ni erpe nesevin nga mutori nijor nga marinrin nga muwra pian ji diwen sen. <sup>3</sup> Ko nurge drrelan nga milep san eplari renga nai seksakel, owra "Lelingenok Atua ololi liken sen vajin tevi jinibb. Ni p̄ilik tevir, ko nir parivi ni jinibb sen. Atua ko p̄ilik tevir, ko pivi Atua ser. <sup>4</sup> Ni pitwasi tweni nir jijle suwen meter. Mijen pijki mun, dengen pijki mun, ko norongen nga n̄isij pijki mun. Nanu nga tuwi nir parjijki."

<sup>5</sup> Mian ko Atua nga n̄ilik re nai seksakel sen owra "Kuplesi! Nuloli nanu jijle arivi kele nanu nga marmerr." Ko owrai kele tevik owra "Kupuli tweni nanu ngel, suri nale ngel nir arweretun ko orongwos jinibb parosurir." <sup>6</sup> Ko owra "Osuw le! Inu nuvi batu nanu jijle, ko nuvi kele bongsi nanu jijle. Inu nuwowomu jerjer, ko inu bea-vivitu jerjer. Poro san nolon pimesmes, ko inu bemarkonge pimni nuwi nga mipleplari renga mete nuwi ne mauren, ko pimni nawone. <sup>7</sup> Jinibb nga mirevji devje nuval parlai nanu ngel jik: Inu bevi Atua ser, ko nir parivi inu natuk. <sup>8</sup> Ko jinibb nga marmetutu, jinibb nga sete marosuri, ko jinibb nga marok-loli murrun lenglengen, ko jinibb nga marok-tortor pinipni jinibb, ko jinibb nga marok-loli n̄isij tevi nesevin, ko jinibb ne botut nir, ko jinibb nga marok-surövi demij nir, ko jinibb nga markerkeris, nir ko lat nga nir pivi nabb nen nga geken milep nga muror tevi salpa. Ngok evi mijen erwen nga vitunen.

*Jerusalem nga mimerr*

<sup>9</sup> Ko san renga anglo nga ebut nga bonevis martori besin ebut nga nanu nga marsij nir marwun rer evini jik ko owra "Kupini, ko beviseni teim nesen se Natu

Sipsip nga mia-lik jin." <sup>10</sup> Ko derteren se Nerün On orrul totonik, ko anglo nen owosik van renga drromo botwen nga milep san. Ko eviseni Jerusalem tevik, Ngaim On, nga mujubbul re melrin ji Atua vini. <sup>11</sup> Ko erinrin renga moron nga mokpelari tetajer ji Atua. Erinrin erpe nevöt nga m̄irres san, erpe jaspaga nga m̄im̄erer kemkarñe. <sup>12</sup> Ko nawot nen elep, owu mare, ko epriv. Ko metali ne nawot esngavöl drromon eru, ko anglo esngavöl drromon eru armetmeter. Ko renga metali nen nir aruli nise botnañe esngavöl drromon eru se n̄eri Isrel nir. <sup>13</sup> Ko nawot nen devjen ivij arto rrare ngaim, ko metali itutlu arto renga devjen nga ivij ngok nir. Itul re devjen nga van renga Is e, ko itul renga devjen nga van renga Saot e, ko itul renga devjen nga van renga Not e, ko itul renga devjen nga van renga Wes e. <sup>14</sup> Ko nawot nen ejnget renga nevöt nga marlelep esngavöl drromon eru. Ko renga nevöt nga esngavöl drromon eru nen aruli nise aposol esngavöl drromon eru se Natu Sipsip. <sup>15</sup> Ko anglo nga n̄irij tevik otori norngov nga mivi gol nga purrongvi ngaim, metali nir, ko nawot nen. <sup>16</sup> Ko norngov ne devjen nga ivij nga arsorsan, arivi 12 000 statia (ngok evi 2 400 kilomita). Ko owu mare kele ejpari 12 000 statia. <sup>17</sup> Ko anglo orrongvi kele nawot, ko emtul ejpari 144 kiubit (ngok evi 65 mita). Kiubit nen evi kiubit nga marok-rorongvi nanu nir rengen tetajer. <sup>18</sup> Ko nawot nen evi jaspaga, nevöt nga m̄irres p̄elak san. Ko ngaim armajinge gol nga m̄im̄erer m̄irres p̄elak erpe glas.

<sup>19</sup> Ko nevöt nga marlelep nga nawot ne ngaim m̄ijnget ren arivi nevöt nga marres lele nir. Nga womunen evi jaspaga, nga vitunen evi sapaea, nga mivi itolin evi akat, nga mivi ivajin evi emeral, <sup>20</sup> nga mivi elmen evi onikis, nga mivi ouwnon evi kanilian, nga mivi ebutun evi ialakwoj, nga mivi owalin evi malakaet, nga mivi eswen evi topas, nga mivi songvölön evi kalsetoni, nga mivi drromon san evi takwaes, ko nga mivi drromon erwen evi ametis. <sup>21</sup> Ko metali nga esngavöl drromon eru nen arsavi ko arlolir re perel. Perel nen nir arlelep lenglengen ko arpepriv. Sansan kobbong orongwos parloli metali nen e san. Ko sel nga muwlu otvi liven ne ngaim, armajinge gol nga m̄im̄erer m̄irres p̄elak erpe glas.

<sup>22</sup> Ko Naim On san ejki renga Ngaim, suri Naim On nen evi Numal Atua ne Derteren Jijle, ko Natu Sipsip. <sup>23</sup> Ko sete emreni nial rrek navöl, suri moron se Atua omor rengen, ko Natu Sipsip evi nasul nen. <sup>24</sup> Ko jinibb nir parivel bburbur renga moron. Ko batu numal nir ne iel ngatan parlai

nijor ser nir paran rengen. <sup>25</sup> Ko metali nen nir parteŕir tetajer, suri nutpong pijki iok. <sup>26</sup> Ko nanu nga marlelep ko nga marres ŕelak nir se jinibb jijle nir parwosir vini rengen. <sup>27</sup> Ko sete nanu san nga purro pian ren, rreknga jinibb san nga muloli nanu nga mŕisij, rrek nga mŕikrekris. Nir kis kobbong nga niser marto renge naul ne mauren se Natu Sipsip, nir ko paran rengen.

## 22

<sup>1</sup> Ko anglo nen eviseni kele nuwi seser ne mauren tevik. Evilvil peleplari renge nai seksakel se Atua ko se Natu Sipsip. <sup>2</sup> Ko eseser van, eseser suri live sel ne ngaim. Ko renge jelin ko jelin, nai ne mauren artur ren. Ko arwen navöl jijle re navöl esngavöl drromon eru re sia. Ko raon arivi roi ne mesien nga parla tweni mesien se jinibb jijle nir. <sup>3</sup> Ko sete nanu san oto renge ngaim nga Atua owra evi nanu nga mŕisij. Ko nai seksakel se Atua ko se Natu Sipsip oto renge ngaim, ko jinibb sen nir parsurövi. <sup>4</sup> Nir parlesir Ni non, ko paruli nisen renge borngir. <sup>5</sup> Ko setemun nat pupong, ko setemun nial ŕisin, ko setemun parsuli nasul. Suri Numal Atua ko vajin pivi moron ser. Ko nir parivi numal ko parmetmete nanu jijle nir tuwi ngok vini.

### *Iesu pulwi vini*

<sup>6</sup> Mian ko anglo owrai tevik, owra "Nale ngel nir arweretun ko orongwos jinibb puosurir. Ko Numal Atua, nga mokla Nemŕin sen tevi propet nir, okoni anglo sen nga piviseni tevi jinibb sen nir sev nga pia-pelari sete ngasu."

<sup>7</sup> "Kuplesi! Bevinuk sete ngasu! Ko neiren renge nir nga marosuri nale ngel nir renge naul ngel nga Atua mlair."

<sup>8</sup> Inu le, Jon, nurnge ko nulesi nanu ngel nir. Ko daron nga mornger ko mŕelesir jile osuw, ko nujiol vitan numatur renge ŕela anglo nga mivisenir tevik, nuwra bosrövi. <sup>9</sup> Ko ni owra "Pijki, pijki pa! Suri inu kele nuvi jinibb ne majingen kobbong erpe nik ko tuwam nir nga marivi propet, ko nir jijle nga marosuri nale nir nga marto renge naul ngel. Kupsurövi Atua kobbong pisan." <sup>10</sup> Ko ni owrai tevik kele, owra "Sete kupsilveni nale se Atua nir nga marto renge naul ngel, suri daron nen

evini mori nga nanu jijle ngel nir parapelari. <sup>11</sup> Si nga murrun mŕisij ŕiplake pirpok tajer ko wor, ko si nga murrun murro, ŕiplake pirpok tajer ko wor. Ko si nga murrun mŕirres pirpok tajer ko wor, ko si nga muon, pirpok tajer ko wor."

<sup>12</sup> Ko Iesu owra kele, "Bevinuk sete ngasu! Ko botori tevik jinibb jijle nir nowlir, ko ŕelai tevi jinibb jijle nir pusorsan tevi murrun nga marloli. <sup>13</sup> Inu nuvi batu nanu jijle, ko nuvi kele bongsi nanu jijle. Inu nuwowomu jerjer, ko inu beavivitu jerjer kele. Inu nutipatune nanu nir, ko inu bea-vinivini orer. <sup>14</sup> Neiren renge nir nga parrawe sunsun ser ko parviter vajin nga parurro wene nai ne mauren, ko parasi re metali ko paran laut. <sup>15</sup> Ko vare renge ngaim, nir nga marok-loli murrulenglengen, nir nga marok-loli botut, nir nga marok-loli mŕisij tevi nesevin, nir nga marok-tor pinpini jinibb, nir nga marok-surövi demij nir, ko nir nga nolor marto suri gerisen."

<sup>16</sup> "Inu le, Iesu, nukoni anglo suk nga puwrowrai nanu ngel nir tevi kami kalesia nir. Inu nuvi metka se Devet. Inu nuvi moju nutrin nga mimor mŕirres." <sup>17</sup> Nemŕin On tevi ni nga mirpe nesen se Kristo<sup>I</sup> orwera "Kupini." Ko jinibb jijle nir nga parunge nale ngel parwera kele, "Kupini." Kupini, nik nga nolom mimesmes; nik nga kumrenni kupla nuwi ne mauren, kupini kupla nawone, nowlin ejkie.

### *Nale nga vitu jer*

<sup>18</sup> Inu le Jon, nusurur metu tevi kami jijle nga kamrunge nale se Atua nga marto renge naul ngel: Poro san ŕilngi nawone nale kele san puto tevi nale ngel nir, ko Atua ŕilngi kele nanu nga marsij nir nga naul ngel musŕe surir, partor kemkanŕe mŕernen. <sup>19</sup> Ko poro san ŕila tweni bebje nale san nga muto renge nale se Atua nga marto renge naul ngel, ko Atua ŕila tweni jin wene nai ne mauren nga moro ŕilai, ko setemun mŕernen pian laut ne Ngaim On nga naul ngel musŕe suri.

<sup>20</sup> Ko ni nga muwra nale ngel arivi weretunen owra "Nuwretun, bevinuk sete ngasu!" Pirpok ko. Kupini, Numal Iesu.

<sup>21</sup> Ko ngel evi bongsi nale suk, nga Numal Iesu pipitevi kami jijle renge nalol nga mŕirres ŕelak sen. Remse kami.